





1358



27. Ø.

1871



JOANNIS LAURENTII BERTI  
FLORENTINI  
FRATRIS EREMITAE AUGUSTINIANI  
*LIBRORUM*  
DE THEOLOGICIS  
DISCIPLINIS  
TOMUS VI.

Qui de SACRAMENTIS in genere,  
ac de BAPTISMO, præcipuas  
dissertationes complectitur.



ROMÆ APUD PANTHEON ANNO D. MDCCLII.

EXCUDERAT ANTONIUS DE RUBEIS

---

SUPERIORUM PERMISSU.

THE

LIBRARY

OF THE

UNIVERSITY OF

CHICAGO

1892

1893

1894

## C E N S U R A .

**Q**uo eruditionis delectu, quave iudicii præstantia, ac animi moderatione priora quinque Volumina *de Theologicis Disciplinis* Adm. Rev. P. Mag. Jo. Laurentius Berti hujus Collegii Regens elucubravit, iisdem planè, parique scribendi methodo, ac felicitate posteriores libros de Sacramentis in genere, & in specie publicæ expectationi donat. In his porrò libris eximius Auctor quæcumque circa Sacramenta a Deo revelata sunt, nedum religiose amplectitur, ut nec ab iis vel latum unguem discedat, sed splendide illustrat, & contra Aetholicos fortiter tuetur: & quæ permittuntur Scholarum libertati tanta cautione pertractat, ut in opinionum delectu ad Ecclesiæ doctrinam, sensum, ac voluntatem se totum componat. Quapropter cum de mandato Reverendissimi totius nostri Ordinis Præfulis libros hosce attentè perlegerim, ac omnia in iis repererim Catholicæ Fidei firmandæ multum utilia, & moribus piè formandis aptissima, dignissimos iudico, qui publici juris fiant.

Romæ in Conventu S. P. Augustini die 3. Januarii 1742.

*Fr. Joannes Andreas Onofri Genuensis Procurator  
Generalis Ordinis Eremitarum S. P. Augustini.*

## C E N S U R A.

U T in aliis quinque *De Disciplinis Theologicis* Voluminibus Eximius Auctor Pater Mag. F. Joannes Laurentius Berti emunctioris naris Theologorum expectationem vel vicit, vel implevit, ita in tribus hisce postremis, in quibus agitur de Sacramentis in genere, & in specie, exquisitissimo Summi Pontificis BÉNEDICTI XIV. judicio satis eundem facturum non dubito. Hic enim Sanctissimus æquè ac Doctissimus Pontifex, dum benignè exciperet Auctorem, & lucubrationes ab eo humillime oblatas, eundem humanissime admonuit, ut de Sacramentis scripturus omnes tum ingenii, tum doctrinæ, ac eruditionis nervos intenderet in hac maximi momenti materia pertractanda, & in optimo lumine collocanda. Quamquidem vel adhortationem, vel jussionem tanto studio, sedulitate tanta implevisse mihi videtur egregius Auctor, ut facile credam, lucubrationes hasce vel Sapientissimo Pontifici probatum iri: Quod perinde est ac dicere, eas esse omnibus numeris absolutas; quippè quibus Hæreticorum circa Sacramenta errores & portenta funditus everuntur, Ecclesiæ dogmata nervosè firmantur, Catholicorum placita vel urbanè revincuntur, vel solidè comprobantur. Quare, ut præclarum Opus in lucem prodeat tam ad Theologorum commodum, quam ad Ecclesiæ utilitatem dignissimum judico. Sic censebam in Conventu S. Patris Augustini de Urbe die prima Martii 1742.

*Fr. Hieronymus Augustinus Zazzeri Arretinus in Archigymnasio Urbis publicus S. Scripturæ Interpres, Academiæ Theologicæ Censur, ac Sacræ Rituum, Congregationis Consultor.*

FR. F E L I X L E O N I  
A J U V E N A T I O

*Sacrae Theologiae Magister, totius Ordinis FF. Eremitarum  
S. P. Augustini Prior Generalis.*

**C**um opus *De Theologicis Disciplinis* completens libros de Septem Ecclesiae Sacramentis a Rev. P. Magistro F. Jo. Laurentio Berti hujus Almae Urbis Regente elaboratum, nostri Ordinis Theologi a Nobis deputati recognoverint, & in lucem edi posse probaverint; Nos tenore praesentium facultatem concedimus, ut typis mandetur, si ita iis, ad quos reliquum spectat, videbitur.

Datum in Conventu nostro S. P. Augustini de Urbe die 1. Maji 1742.

*F. Felix Leoni Generalis.*

Nostri mun. aff. Sig.

*Magister Fr. Angelus Maria de Orgio  
Ordinis Secretarius.*

## IMPRIMATUR,

Si videbitur R<sup>m</sup>o Patri Magistro Sacri Palatii Apostolici.

*Ferdinandus M. de Rubéis Archiep. Tarfen. Vicefg.*

## C E N S U R A.

**M** Andata R<sup>m</sup>i Patris Aloysii Nicolai Ridolfi, Sacri Palatii Apostolici Magistri persequens, accuratè legi libros *Theologicarum Disciplinarum* de Sacramentis, erudite conscriptos ab Adm: R. Patre Magistro Johanne Laurentio Berti Doctissimo nostri Aevi Theologo; atque cum in eis nihil deprehenderim fidei, ac morum regulis dissonum, cenfeo in publicam lucem posse proferri, præsertim cum Auctoris scribendi studium, & eruditionis copia plurimum laudis sibi vindicent.

Datum in Collegio S. Mariæ Transpontinæ Kal. Decembris anni 1741.

*Fraser Petrus Thomas Cacciari Carmelita, Cleri Romani Examiner Apostolicus, & in Collegio Urbano Propagandæ Fidei Theologiæ Polemicæ Lector.*

## C E N S U R A .

**Q**UOS nunc in publicam lucem profert Libros de Sacramentis Adm. Rev. P. Magister Jo. Laurentius Berti Vir pietate, doctrina, atque eruditione clarissimus, illos jubente Reverendissimo P. Sac. Apostolici Palatii Magistro Aloysio Nicolao Ridolfi attentè & magna cum animi oblectatione perlegi, atque omnia in illis reperi Catholicæ Fidei, & bonis moribus consona. Antiquam quippe, & ex purissimis Scripturarum, & Traditionis fontibus haustam doctrinam adversus Novatorum calumnias egregius Auctor vindicat, Theologicas controversias passim occurrentes copioso argumentorum apparatu, prudentique sententiarum delectu illustrat, ac minus opportunam quorundam Criticorum summa cum animi moderatione castigat: paucis verò multa complectens ea styli elegantia, eaque claritate, ac diligentia singula pertractat, ut partam præcedentibus Operibus Nomini suo celebritatem augeat, operi autem huic pretium singulare apud æquos rerum æstimatores conciliet. Ita censeo.

Ex Ædibus S. Petri ad Vincula 3. Kal. Martii 1742.

*D. Antonius Andreas Galli Abbas Canon. Regul.  
Smi Salvatoris, & Sac. Congreg. Indicis  
Consultor.*

---

IMPRIMATUR.

Fr. Aloysius Nicolaus Ridolfi Ord. Præd. S. P. A. Magister.

## AUGUSTINI

In subsequens Opus de Sacramentis  
Prælude.

*P*rimo itaque tenere te volo, quod est hujus disputationis caput, Dominum nostrum Jesum Christum, sicut ipse in Evangelio loquitur, levi iugo suo nos subdidisse, & sarcinæ levi. Unde Sacramentis numero paucissimis, observatione facillimis, significatione præstantissimis Societatem novi populi colligavit. a. Etenim in nullum nomen religionis, seu verum, seu falsum, coagulari homines possunt, nisi aliquo signaculorum, vel Sacramentorum visibilibus consortio colligentur: quorum Sacramentorum vis inenarrabiliter valet plurimum, & ideo contempta sacrilegos facit. Impie quippe contemnitur, sine quo non potest perfici pietas. b. Cum itaque prima Sacramenta, quæ observabantur & celebrabantur ex lege, prænunciativa essent Christi venturi, quæ cum suo adventu Christus implevisset, ablata sunt, & ideo ablata, quia impleta, non enim venit solvere legem, sed adimplere; alia sunt instituta virtute majora, utilitate meliora, actu facilia, numero pauciora, tanquam justitiæ fidei revelata. c. Omnia hæc Sacramenta cum obsint indigne tractantibus, prosunt tamen per eos digne sumentibus. d. Quæ unusquisque cum percipit, quo referantur imbutus agnoscit, ut ea non carnali servitute, sed spiritali potius libertate veneretur. Ut autem literam sequi, & signa pro rebus quæ iis significantur accipere, servilis infirmitatis est; ita inutiliter signa interpretari, malè vagantis erroris est. e.

DE

a. Epist. 118. nunc 54. ad Januar. num. 1.

b. Lib. 19. contra Faustum cap. 11.

c. Eodem libro 19. cap. 13.

d. Lib. 2. contra Epist. Parmen. cap. 10. num. 22.

e. De Doctr. Christ. lib. 3. cap. 9. num. 13.





# DE THEOLOGICIS DISCIPLINIS LIBER TRIGESIMUS,

*In quo generatim , atque universè dis-  
quiritur quicquid spectat ad septem  
Ecclesiæ Catholicæ Sacramenta.*



**L**ADIDERAT in cruce spiritum , omnemque consummaverat expiationem , humani generis Conditor , & Reparator , quemadmodum a nobis ad calcem præcedentis voluminis scriptum est ; quando contractis latronum cruribus , unus militum lancea latus ejus aperuit , & continuo exiit sanguis & aqua , id attestante in capite Evangelij decimonono , qui & eventus hujus inspector fuit , prædilecto , castissimoque discipulo . Non diu me hoc in Opere detinebit sive conditio militis , sive magnitudo miraculi , tametsi hæc duo haud vulgarem rerum copiam suppeditare queant Theologicis disquisitionibus ; sed per pauca tantum prologii præmittam loco , quoniam postulat quamcumque operam summa dignitas & amplitudo latentium in Aqua & Sanguine mysteriorum . Fuerunt quidem haud numero pauci , quos inter Joannes Calvinus , Nicolaus Nancellus , Emmanuel Tremellius , Theodorus Beza , Joannes Gerardus Vossius , alique infani homines , qui non ex Evangelicis verbis , neque ex auctoritate ac traditione Majorum.

To. VI.

A

rum,

rum, sed ex Galeni, & Hippocratis Aphorismis, atque ex historiis Anatomicis Andreæ Laurentii pensitantes postremum illud Christi miraculum, verè maximum, & cum illo comparandum, quod initio a Domino in Cana Galilæe legimus fuisse patratum, non alium cruorem ex perforato Salvatoris latere profluxisse autumarunt, præter humorem in *pericardio*, sive, ut Gaspar Bartolinus, & Thomas filius conati sunt demonstrare, in cavitate thoracis, tunicisque pectoris latitantem. Quem profecto errorem arbitror apertissime refutari sola Evangelici textus accurata lectione; quoniam beatissimus Evangelista, posteaquam dixerat, *Continuo exivit sanguis & aqua*, forte prævisa incredulitate futurorum hæreticorum, sese veridicum prodigiosæ rei testem subiectis verbis asseruit, *Et qui vidit, testimonium perhibuit, & verum est testimonium ejus: & ille scit quia vera dicit, ut & vos credatis*. Quis enim tali verborum significatione oppignorat fidem suam ad naturalem rem comprobendam? Prætermitto traditionem Veterum adeo hac in parte exploratam, ut Bulgariæ Archiepiscopus Theophylactus, suis in Evangelia editis Commentariis, istiusmodi homines, quamvis nondum exortos, appellaverit sycophantas, delatores scilicet mendaciorum. Mitto insuper latentem, illum in *pericardio* humorem, tradentibus ipsis, ad quos provocant, peritis medicæ artis, non aquam rectè dici, quum biliosus omnino sit, amarus sapore, & colore subflavus: manasse demum separatum a sanguine, quod miraculi eximii censendum esse argumentum, neque denegare ausus est ad annum vulgaris Aetæ tricesimum tertium Samuel Basnagius. Neque verò futurum aliquem puto, quem Thomæ Bartolini permoveant cavillationes; dum cap. xi. Operis, quod inscripsit *de Latere Christi aperto*, ait antiquos Patres, nulla facta mentione aquæ, sanguinis tantummodo memioisse, Barnabam præsertim, Gregorium Nyssenum, atque Hieronymum, nec non Joannem Baptistam Mantuanum, qui in Fastis cecinit:

*Iude cruor confusus aquis bastilia circum  
In digitos lapsus, tetigit cum lumina, morbum  
Sustulit.*

Dum enim laudati Patres affirmant è Christi latere fluxisse sanguinem, minime negant illinc pariter egressam aquam: nec nobis attendenda sunt verba quælibet poetarum; quamquam Mantuanus cruorem *confusum aquis* dicat *circum bastilia*: & si carmine certandum est, antiquior Aurelius Prudentius utrumque in Enchiridio sejunxit, *laticem, atque cruorem*. Prudentium autem imitatus est Marcus Hieronymus Vida Canonicus Regularis eloquentissimus, scribens in vii. Christiadam,

*Et purum laticem, & rorem exiliisse rubentem.*

Atque hæc tantum adversus miraculorum irrifores duximus adnotanda.

In Militis pariter, qui lancea petivit sacratissimum Christi pelus, conditione sedulo investiganda diu, ut dicebam, non immorabor; sed quædam molli brachio, celerique manu conscribam. Appellatum militem illum Longini nomine fert opinio communis, sive ex *λόνγιος*, *lancea*, ut placet compluribus, sive usitato apud Latinos vocabulo, quod nos arbitramur verisimilius. In libris quippe veterum nomina occurrunt Velii Longini Grammatici, Cassii Longini Jurisconsulti, Dionysii Longini Rhetoris; neque ignotum est a Longo Longinum derivari, ut a Macro Macrinum, Marcellinum a Marcello, aliasque bene multa: in Martyrologio etiam Romano quinque, saltim Longini sub nomine veneramur, inter quos idibus Martiis Longinus ille, cujus modo mentionem facimus. Adnotatum eo loci a Baronio sacras Longini exuvias apud nos in Romana S. Parentis Augustini Aede servari, in hanc translatas ex antiquiori S. Tryphonis: de iisdem gloriatur Mantuani Cives, qui cum ex vetustioribus *Cæsarea in Cappadocia*, excogitarunt quamdam urbis suæ plateam *Cappadocia* nomenclatura insignitam; nescio, an prope Mincium etiam *Cæsaream* constituerint: quum tamen ad sibi vindicandas Reliquias Martyris superna, ut ajunt, revelatione compertas, necessum non foret figmenta talia compingere. Legitur præterea in Fano Insulæ S. Mariæ *Barbarorum*, non procul a Lugduno, & ad confluentem Araris, & Rhodani vetus inscriptio,

*Qui Salvatoris Latus in cruce cuspidi fixit,  
Longinus hic jacet.*

At, sive in causa fuerit, ut in his, aliisque locis adesse credantur Longini cineres, similitudo nominis, quod diximus commune fuisse pluribus, sive asportatio, & divisio cinerum eorundem, quorum partem Mantua a Leone IX. Romam fuisse translatam legimus in Actis Sanctorum apud Henschenium; nequeunt hæc elevare pervulgatam traditionem, Militem illum, qui Latus Salvatoris confodit, suscepta Christiana religione martyrem occubuisse, ubicunque terrarum obierit, & qualicunque tandem nomine appellaretur.

Putavit prælaudatus Ecclesiasticorum Annalium scriptor clarissimus Cæsar Baronius, hunc Longinum fuisse Centurionem, qui *viso terramotu, & iis quæ fiebant*, exclamavit, *Verè filius Dei erat iste*; quod nos quidem, si non falsum, non satis comprobatum existimamus; non ea ducti ratione, quam post alios urget Basnagius, quod nimirum incredibile sit virum spectabilem, & qui Christum paulo antea Deum prædicaverat, ausum hujus latus ferro acutissimo violare; non enim id fecit Longinus, ut sæviret in mortuum, sed ut illatæ cædis sumeret experimentum; quod sane aut innoxia res fuit, aut non fuit facinus atrocissimum: sed hoc unum movet me, ut asseram Longini

a Centuriæ præfecto discrimen, quod *unus militum* simplici vocabulo sit appellatus, & quidem si Græca adeamus, *επειρωτης*, idest, ex peditum cohorte, atque, si munus attendamus, ex ordine illorum, quos *hastatos* dixerunt, & qui in acie post velites, ut Vegetius & Lipsius tradiderunt, contis, idest, stabilibus hastis certantes inibant statariam pugnam. Itaque hæc tantum de trasverberato dulcissimi Jesu Latere, ac de milite, qui lancea illud aperuit, ut principia hujus libri extremis absoluti partibus responderent, dicta sunt remissè, breviter, ac perfunctorie.

Converto nunc stilum ad sublimia, & sacratissima Aquæ, & Sanguinis, quæ ex vulnerato Christi latere promanarunt, pertractanda mysteria. Ex eodem divino Latere ædificatam Ecclesiam, & exiisse SACRAMENTA, scripsit tractatu cxx. in Joannem, aliisque in locis pluribus, columnen, præsidiumque meum Augustinus. Cyrillus etiam libro in Joannem duodecimo Aquam illam ac Sanguinem symbola nuncupavit τῆς μυστικῆς ἰουδαίας, ἢ τοῦ αἵματος βαπτισματος, *Mystica Eulogia*, & *sancti Baptismatis*, nec aliter sentiunt ceteri Ecclesiæ Patres. Ad agendum itaque de Ecclesiæ Catholicæ Sacramentis, posteaquam disceui de Redemptoris nostri crucifixione, trahunt me sacrosancta illius vulnera, ac maxime amabile pectus lancea confossum. Nil verò præmittam, ut scriptores ceteri consueverunt, de argumenti dignitate, de gravitate disputationum, de rerum dicendarum amplitudine, de industria denique, quam adhibui, ne post egregia summorum Theologorum opera, meum hoc plane impolitum & rude, legentibus prorsus inutile videretur. Quod enim attinet ad rei magnitudinem, puto hanc satis unicuique perspectam: quod verò ad me pertinet, absit, ut quum conficius sim imbecillitatis meæ, audeam me vel Theologorum minimo comparare. Si quid ergo in hoc opere offendat lector litura dignum, cujus generis vereor ne sint quamplurima, per ipsum Domini mei lancea transfixum, dulcissimumque pectus oro, atque obtestor, ut æquo animo patiaturs ignorantiam meam, ingenique mei tarditatem: & si quid crit, cujus gratia percipiat me sibi aliquid contulisse, id unum mihi rependat; diligat me, piissimique Jesu perforato pectori cnixe commendet.

## C A P U T I.

*De Sacramenti vocabulo, etymologia, atque definitione.*

**A** SACRAMENTI vocabulo, Dei optimi maximi auxilio demisse, suppliciterque invocato, amplissimam aggredimur disputationem. Quidam hæreticorum *Sacramenti* quoque nomen procul eliminare tentarunt, *signi*, vel *symboli* vocabulo substituto. Ita in libro  
de

de captiv. Babyl. & de abrog. Missa Lutherus ; Philipp. Melanchthon in priori editione de Locis com. Ultricus Zuvinglius apud Joannem Eckium hom. 1. de Sacram. Abrogato namque *Sacramenti* nomine, facilius sibi heterodoxi persuadebant adhæsurum simpliciorum animis nefarium dogma, quod *Sacramenta* signa sint inefficacia & egena, nulla prædita vi, & energia diluendi peccata. Principio itaque statuendum est, *Sacramenti* vocabulum in Ecclesia jure, meritoque usurpari.

PROPOSITIO I. *Sacramenti* nomen in Ecclesia merito retinetur.

Id evincitur primo ex Scripturis: in quibus *Sacramenti* nomen occurrit cum ad significandam rem occultam, arcanumque mysterium, ut Tobie x11. 7. *Sacramentum regis abscondere bonum est*: tum ad commonstrandum signum aliquod rei obscuræ & latentis, ut Apocalypsis 1. 20. *Sacramentum septem stellarum, quas vidi in dextera mea*: atque de Matrimonio ad Ephes. v. 32. *Sacramentum hoc, magnum est, ego autem dico in Christo, & in Ecclesia*. Frustra reponerent adversarii, intrusum hæc in loca *Sacramenti* nomen a Latino interprete, Græcè autem ubique scriptum esse *μυστήριον*; *mysterium*: Enimvero quicquid Græci designant *μυστηρίου* nomine, id nos demonstramus vocabulo *Sacramenti*. Quare Ambrosius Catharinus in libro, quem conscripsit adversus confratrem suum, percelebrem tamen, clarissimumque, affirmantem ab Apostolo Paulo matrimonium non dici *Sacramentum*, haud male reponit: *Nunquid Paulus Græcè scribens potuit dicere Sacramentum, quæ est vox latina? Dicens autem Græcè mysterium, id cerè Græcè dixit, quod Latine significat Sacramentum. Nam Cyrillus, Chrysostomus, Basilus, & Dionysius ante hos, etiam Eucharistiam mysterium vocant, & sic alia, quæ nos dicimus Sacramenta. Animadversione quoque dignum est, in Epistola prima ad Corinthios cap. x11. 2. ubi legimus, Et si habuerim prophetiam, & noverim mysteria omnia, lectum olim, Et noverim Sacramenta; atque id a fulgidissimo Ecclesiæ Lumine Augustino acceptum de baptismo, ceterisque Ecclesiæ mysteriis; quippe Apostoli testimonio probat lib. 1. contra Petilianum cap. 77. num. 172. quomodo non præsit hominibus, quamvis in eis sint vel Sacramenta, vel fides, ab caritas non est: & Donatistas alloquens, Atque ita videtis, inquit, sine illa nihil vos esse, etsi baptismum, & fidem teneatis. Habemus itaque in Scripturis *Sacramenti* nomen expressum, sive Latino, sive Græco vocabulo; atque id etiam, ubi fit sermo de regenerationis lavacro.*

Ad Patres quod attinet, ab his *Sacramenti* nomen antiquitus usurpatum facillimè suadetur. Nam Tertullianus librum de Baptismo incipit: *Felix Sacramentum aquæ nostræ*; & cap. 13. ejusdem libri ait: *Addita est ampliatio Sacramenti, obsecratio baptismi*. De Præscript.

script. etiam cap. 40. verba faciens de idolorum mysteriis hæc habet : *Ipsas res, de quibus Sacramenta Christi administrantur, tam amplexanter affectuè exprimere (Dæmon) in negotiis idololatricæ. S. Martyr Cyprianus epist. 63. ad Cæcilium pluries Sacramenti nomine repetito, scribit, Sacramenti veritatem fraternitate omni præsentē celebremus; & Epist. 77. ad Nemesianum inquit: Sacramentum salutis suæ Christi servus agnovit. Hilarius in Matth. 1v. num. 27. baptismum Sacramentum appellat; & cap. 1x. num. 3. de Eucharistia scribit: In fide enim resurrectionis sacramentum panis ecclesiæ accipitur. Ambrosius de Sacramentis libros sex sacra eruditione plenos conscripsit. Augustinus epist. 118. ad Januar. nunc 54. num. 1. coadunatum docet Christianum populum, Sacramentis numero paucissimis, observatione facillimis, significatione præstantissimis: quod repetit lib. xix. contra Faustum cap. 13. Ex his verò abunde constat Sacramenti nomen nequaquam fuisse antiquis Patribus incompertum, aut inusitatum.*

Tandem ipsis hæreticis annuentibus Sacramenti nomen retinendum est. In Confessione Augustana de Sacramentis *sub hoc nomine*, agitur art. 5. 7. 8. & 13. Eodem utuntur vocabulo Brentius in Confess. Wittembergenſi, & Kemnitius in 2. p. Exam. Concilii Trid. Grotius in Voto pro Pace Eccl. aiebat: *Ego in Ecclesiæ auctoritate, cui Deus Sacramenta, & aliquod in ea jus dedit, acquiesco.* Vossius disputationibus de Baptismo præmisit dissertationem prolixam, *de Sacramentorum natura, vi, & efficacia.* Sacramenti denique vocabulum passim usurpat ipse Melanchthon epist. 40. ad Joannem Matthesium, & 173. ad Georgium Principem, Salmasius de Transubstant. Joannes Henricus Hottingerus in Analectis Append. dissert. vii. 11. alique hæretici benè multi.

Opponebat Ulricus Zuinglius Sacramenti vocabulum non adinveniri in scripturis, & qui eo utuntur, pessundare monitum Apostolicum in priori ad Timoth. vi. 20. *Devita profanas vocum novitates.* Verùm ex ipsa Scriptura, & ex antiqua Patrum Traditione demonstratum est modo, vocabulum Sacramenti nequaquam novum esse, sed sacramentum literarum auctoritate, & Sanctorum usu probatum. Adde Apostolum commonere, ut evitentur *profane vocum novitates*, quibus hæretici fidem commaculant, non vocabula nova ad fidem stabiliendam adversus emergentes hæreses in usum recepta. *Non ait verborum novitates, sed addidit profanas. Sunt enim & doctrinæ religionis congruentes verborum novitates, sicut ipsum nomen Christianorum quando dici coepit scriptum est. In Antiochia enim primum post adseensionem Domini appellati sunt discipuli Christiani, sicut legitur in Actibus Apostolorum: & Xenodoecia & monasteria postea sunt appellata novis nominibus, res tamen ipsæ & ante nomina sua erant, & religionis veritate firmantur, qua etiam contra improbos defenduntur.*

tur . *Adversus impietatem quoque Arianorum hæreticorum novum nomen Patres Homousion condiderunt : sed non rem novam tali nomine signaverunt ; hoc enim vocatur Homousion , quod est , Ego & Pater unum sumus , unius videlicet ejusdemque substantia . Nam si omnis novitas profana esset , nec a Domino diceretur , Mandatum novum do vobis : nec Testamentum appellaretur novum , nec cantaretur in universa terra Canticum novum . Sed profana sunt verborum novitates , ubi dicit mulier insipiens & audax , Panes occultos libenter attingite , & aqua furtiva dulcedinem . Ab hac pollicitatione falsæ scientiæ prohibet etiam illo loco Apostolus ubi dicit , O Timothee depositam custodi , devitans profanas vocum novitates , & contradictiones falsi nominis scientiæ , quam quidam promittentes circa fidem exciderunt . Nihil enim sic amant isti , quam scientiam promittere ; & fidem rerum verarum quas credere parvuli præcipiuntur , velut imperitiam deridere .* Hæc Augustinus Tract. xcvii. in Joannem num. 4. unde hæc placuit exscribere , quoniam sæpenumero hæretici , cum in his , tum in aliis controversiis solent Theologis opponere novitatem vocabulorum .

PROPOSITIO II. *Sacramenti* vocabulum ad plura significanda usurpatur .

Ac primò apud Latinos Scriptores *Sacramentum* est oppignratio quædam judicialis , sive sponsio pecuniæ a litigantibus olim facta , ea conditione , ut qui judicio vinceret , è sacro pecuniam auferret suam ; victus vero relinqueret apud Pontificem , eaque publico ærario cederet . Ita Varro lib. iv. de lingua latina . Juxta hanc *Sacramenti* acceptionem Isidorus lib. iv. Originum ait : *Sacramentum est pignus sponsionis* . Appellabatur autem *Sacramentum* , vel quia deposita pecunia sacro asservaretur in loco , vel quia sponsionem illam violare summa perfidia esset , vel quia ipsa sacrorum ministri alerentur . Joachimus Stephanus de Jurisdict. vet. Græc. cap. 4. tradit Romæ litigantes deposuisse quingentos æris nummos ; eandemque fere summam depositam ab æstoribus & reis in Prytaneo . Erat Prytaneum Athenis forum civilium causarum , quemadmodum Areopagus publicorum criminum . Interdum *Sacramentum* dicebatur ipsamet pecunia a litigantibus deposita , unde Latina phrasis *sacramento contendere* , apud Ciceronem epist. ad Voluminium , & i. de Oratore .

*Sacramentum* insuper significat legitimam militiam , sive jumentum , quo per aliquid sacrum milites sese obligabant ad fidem & obedientiam Imperatori præstandam . Hujus militaris sacramenti formula erat : *Ivo quo jusserit Senatus Populusque Romanus* , sive , *quo duxerit Imperator* , sive , *quo jussierit Consules* . Addebant milites se non deserturos signa , non facturos se furtum , nihil adversus Rempublicam molituros . Adeas Livium lib. iii. & xxi. Polybium lib.

lib. xi. Senecam Epist. 96. Vegetius lib. 2. de re milit. cap. 5. ait Christianos milites scriptos, & matriculis insertos, jurare *picturis in cute punctis per Deum, & Christum, & Spiritum Sanctum, & per majestatem Imperatoris, omnia se strenue facturos, quaecumque praeceperit imperator, nunquam deserturos militiam, nec mortem recusaturos pro Republica Romana*. Hinc quoniam ex militiæ Romanæ legibus plura adversus Christianam fidem perpetrabantur, Tertullianus lib. de Corona cap. xi. hæc gravi oratione conscripsit: *Credimus ne humanum sacramentum divino superduci licere, & in alium Dominum respondere post Christum? & ignorare patrem ac matrem, & omnem proximum, quos, & lex honorari, & post Deum diligere præcipit, quos, & Evangelium solo Christo pluris non faciens sic quoque honoravit?* Plura de Sacramento militari Dempsterus Rom. Antiq. lib. x. cap. 3.

Ex juramento a militibus facto *Sacramenti* vocabulum extensum est ad significandum quodlibet jusjurandum. Et juramentum quidem militum *Sacramentum* latinissimè dici fatentur omnes, comprobantque ex Tullio, Livio, & l. 2. 5. Miles. D. de his qui not. infamia, & l. Ex militari. D. de Testam. milit. Reliqua juramenta haud recte *Sacramenti* nomine insigniri censent complures. Legimus tamen apud Quintilianum lib. 12. cap. 2. *Sed hæc inter ipsos, qui velut sacramento rogati, vel etiam superstitione constricti nefas ducunt a suscepto semel persuasione desistere*, idest, inquit Budæus, *jurejurando adacti*. Et Horatius lib. 2. Ode 17. *Non ego perfidum Dixi sacramentum*: sumpta tamen, ut animadvertit Lævinus Torrentius, a re militari translatione.

Adhæc vocabulum *Sacramenti* idem significat, ac *Mysterium*, rem scilicet arcanam, & latentem, sive profana sit, sive sacra. *Mysterium* enim, sive derivet a *μυσος*, claudio, sive a *μυσος* *τὸ κρυπτον*, os obsequare, sive ab hebræo מסתרים, latibula, nihil aliud significat, quam occultam aliquam rem, quam nefas sit vulgo efferri; & si de re sacra loquamur, rationem quandam religionis nonnisi initiandis communicandam. Ferunt *mysteria* in cultum Cereris & Proserpinæ instituta apud Eleusinos, vel potius Eleusinis ea tradidisse Eumolpium Thracem: erantque propriè mysteria initiationes, a quibus arcebantur profani. Initiati ab arcanorum doctrina appellabantur *Mystæ*: at qui admittebantur intra adytum dicebantur *Epoptæ*: quod vocabulum recte usurpat Tertullianus scribens adversus Valentinos cap. 1. de Mysteriis Atticæ superstitionis: *Ceterum tota in adytis divinitas, tot suspiria epoptarum, totum signaculum linguæ*. Initiatio hæc peragebatur noctu, ex Cicerone lib. 2. de legibus cap. 14. Gregorio Nazianzeno Orat. in Sancta Lamina, Evagrio lib. 1. H. E. cap. 11. Initiatis Hierophantæ res turpissimas detegebant, a quarum nomine censum



mus esse abstinendum . Horum mysteriorum signa apud Eleusinos fuisse sesamides , pyramides , tæniæ , sive lanæ elaboratæ , liba umbilicata , micæ salis , draco , mala punica , corda , ferula , hederæ , plantæ , papavera . Ita hæc recenset Clemens Alexandrinus in Protreptico , atque , ut constat ex Plutarcho in Phocione , prorsus optime . Quæ enumerat Eusebius lib. 2. de Præp. Evang. cap. 3. ex Orpheo Thrace , sunt mysteria Bacchi , non Cereris : sunt verò , talus , pila , trochus , poma , turbo , speculum , vellus . Omittimus verècundia causa pballos . Ad hunc ergo modum arcanorum doctrinæ , & symbola rerum occultarum dicuntur *Sacramenta* , aut , *Mysteria* . Ita in Apocalypsi xviii. 7. de re non sacra legimus : *Ego dicam tibi sacramentum mulieris ;* & de Antichristo 2. ad Thesalonice. ii. 2. *Operatur jam mysterium iniquitatis ;* de fidei autem arcanis Matth. xiii. 35. *Vobis datum est nosse mysteria regni celorum ,* & 1. ad Corinth. xv. 51. *Ecce mysterium dico vobis : omnes quidem resurgemus , &c.*

Juxta hanc *Sacramenti* significationem ea Ecclesiasticæ doctrinæ capita , quæ primis Ecclesiæ sæculis Gentibus occultabantur , sive ad fidei dogmata , sive ad Eucharistiæ , aliorumque mysteriorum consecrationem , ritus , & celebrationem pertinentia , solent a Patribus *Sacramenta* nuncupari . Ita Tertullianus de Præscript. cap. 20. Christianam institutionem , fidei regulam , omniaque Apostolicæ Ecclesiæ jura , appellat *ejusdem Sacramenti* traditionem , usurpato *Sacramenti* vocabulo pro universis Apostolicis rudimentis , uti observant in notis ad hunc locum præclari viri Albaspinæus , & Lupus , necnon quæst. 2. de Sacram. eximius Lovaniensium Theologus Farvaquez . Hinc percipimus cur olim Patres de Trinitatis mysterio , de Eucharistiæ frequentatione , & aliis religionis Christianæ arcanis parce , & tanta verborum obscuritate locuti fuerint ; ut nimirum sacro initiati baptisinate commissi sibi mysteria assequerentur , eaque occulta remanerent profanis . Quare Cyrillus Jerosolymitanus Catech. 6. pertractans de mysteriis , quæ continentur in Symbolo , *Hæc Sacramenta* , inquit , *non patefacis Ecclesia ei , qui ex Catechumenis excedit , nec moris est Gentilibus exponere* : & S. P. Augustinus in Ps. 103. serm. 1. num. 14. *Opera enim nostra bona vident & pagani ; Sacramenta vero occultantur illis* . Epistola pariter ad Honoratum Catechumenum , 120. nunc 140. num. 48. pertractans de Eucharistiæ *Sacramento* , & de sacrificio novi Testamenti , ait : *Quod ubi , & quando , & quomodo offeratur , cum fueris baptizatus invenies* . Vide & Chrysostomum Hom. 60. ad Illuminandos . Aliquando tamen , dum conviciis Christianis fama laceraretur , iisque occulta imponerentur crimina , Ecclesiæ Patres in iis quoque libris , quos pro Religione Christiana exornarunt , hanc disciplinam arcani minime servaverunt , uti fecit in Apologia ad Antoninum Pium sanctus Martyr Justinus , non ut

lubenter enunciaret mysteria, quemadmodum inquit Albaspinaeus, sed ut impactas calumnias dispelleret; quamquam & Justinus in altera Apologia ad Marcum & Lucium Antonini filios altum tenuerit de arcanis fidei silentium.

Rursus accipitur nomen *Sacramenti* pro signo quolibet rei sacræ. Est autem signum, quemadmodum ab Augustino definitur initio librorum de doctrina Christiana, *res, quæ ad significandum aliquid adhibetur*, ut lignum quod in aquas amaras Moysen misisse legimus, lapidis, quem Jacob sibi ad caput posuit, pecus, quod pro filio Abraham immolavit; & alia, quæ ita res sunt, ut aliarum etiam signa sint rerum. Ac secundo libro ejusdem Operis cap. 1. *Signum*, inquit S. Pater, *est res præter speciem quam ingerit sensibus, aliud aliquid ex se faciens in cogitationem venire*: sicut vestigio viso, transisse animal cujus vestigium est cogitamus, & fumo viso ignem subesse cognoscimus, & voce animantis audita affectionem animi ejus advertimus. Non autem quodlibet signum *Sacramentum* dicitur, sed signum rerum divinarum duntaxat, scribente ipsomet Augustino Epist. v. ad Marcelinum, nunc 138. num. 7. *Signa, cum ad res divinas pertinent, Sacramenta appellantur*. Juxta hanc acceptionem *Sacramenti* Tertullianus contra Marcionem disputans vocat duos Abraham filios *Sacramenta figurarum*, & *allegorias Sacramentorum*, & in antiquis Patribus allegorias veteris testamenti exponentibus occurrunt passim hæc vocabula, *Sacramenta numeri, panis, piscis, &c.* Signorum quidem aliqua nullam habent cum re quam significant similitudinem, ut campanæ sonus signum est convocandi Clerum; quædam similitudinem talem habent, ut absque ulla vel humana, vel divina institutione commonstrent rem quam significant, ut vestigium in arena impressum indicat pedem hominis, aut alterius animantis: nonnulla denique signa ex institutione rem aliquam indigitant, sed cum ea habent analogiam aliquam & proportionem, ut immolatio Isaac Christi sacrificium, productio Evæ institutionem Ecclesiæ præfigurarunt. Haud dubium est, quin *Sacramenta* signa sint hujus generis, scribente magno Augustino ad Bonif. Epist. 23. nunc 98. num. 9. *Si enim Sacramenta quandam similitudinem earum rerum, quarum sacramenta sunt, non haberent, omnino sacramenta non essent*. Signorum denique aliqua sunt *significativa* duntaxat, sive ut in Scholis loquimur, *speculativa*, quemadmodum ramus, aut hedera demonstrant vini tabernam, vel cauponam: aliqua *obsignativa*, sicut sigillum principis obsignat, confirmatque contentum in diplomate privilegium, aliqua *exhibitiva* dignitatis vel muneris, ut baculus, annulus, pileus, qui præbentur Abbati, Episcopo, Cardinali: aliqua demum sunt signa practica & efficacia, qualia nos contendimus esse *Sacramenta*, de quibus in præsentia instituimus dissertationem.

PROPOSITIO III. Optima est definitio *Sacramenti*, quam adversus heterodoxos tradunt Catholici.

Quamvis non occurrat una *Sacramenti* definitio in libris Catholicorum, quibusdam ad Dialecticæ regulas pressius illud definitibus, quibusdam vero fusiori descriptione ipsius naturam explanantibus; consentiunt tamen omnes, Sacramenta esse signa quædam sensibilia sacro ritu exhibita Christi nomine, quæ, modò certæ conditiones adsint, gratiæ salutarem effectum in suscipiente operantur, super eam mensuram, quam exigant suscipientis meritum ac præparatio. Ita, principio libri IV. Sententiarum Guilelmus Estius, & in Hist. Conc. Trident. lib. IX. cap. 4. Pallavicinus. Definitiones verò *Sacramenti*, quæ circumferuntur, sunt hujusmodi. Magister Sententiarum primo Sacramentum definit latissimè, prout omnia rerum sacrarum signa complectitur, dicens: *Sacramentum est rei sacræ signum*. Deinde tradit definitionem communem Sacramentis veteris legis, quæ Christi gratiam præsignabant, & Sacramentis legis Evangelicæ, quæ ipsam gratiam efficiunt, scribens: *Sacramentum est invisibilis gratiæ visibilis forma*. Tertio Sacramentum novæ legis, quod est gratiæ signum efficax, ad hunc modum definit: *Sacramentum est quod ita signum est gratiæ Dei, & invisibilis gratiæ forma; ut ipsius imaginem gerat, & causa existat*. Illicorus lib. VI. Etymolog. cap. 18. ita Sacramentum describit: *Sacramentum est illud, in quo sub tegumento rerum visibilium divina virtus secretius humanam salutem operatur*. Hugo Victorinus lib. I. de Sacramentis p. 9. cap. 1. hanc Sacramenti definitionem suppeditat: *Sacramentum est materiale elementum foris sensibilibus propositum ex similitudine representans, & ex institutione significans, & sanctificatione continens invisibilem gratiam*. In Catechismo Romano p. 2. ita Sacramentum definitum legimus; *Sacramentum est res sensibus subjecta, quæ ex Dei institutione sanctitatis & justitiæ tum significanda, tum efficiendæ vim habet*: quam definitionem rectè Bellarminus lib. I. de Sacram. cap. 11. pulcherrimam vocat, & insignis Theologus Tournellius optimam & retinendam. Circumfertur & hæc Sacramenti vulgaris definitio: *Sacramentum est invisibilis gratiæ visibile signum ad nostram justificationem institutum*: quæ definitio traditur ab eodem Catechismo Romano, & deprompta videtur ex Conc. Trident. sess. XXI. cap. 3. ubi asseritur Eucharistiam cum ceteris Sacramentis symbolum esse rei sacræ, & invisibilis gratiæ formam visibilem.

Ex quibus omnibus videtur nobis posse Sacramentum hac definitione describi: *Sacramentum est invisibilis gratiæ signum sensibile, divinitus institutum, & Christi nomine, sacroque ritu exhibitum, & hominum sanctificationem efficiens*; ita, ut primum definitionis membrum Sacramentis veteris, ac novæ legis æquo conveniat; alterum verò commonstret utrorumque discrimen. Ac principio Sacra-

mentum rectè dici *signum sensibile* omnes prorsus cum hæretici, tum orthodoxi consentiunt. Enimverò quod occultum est, nec ingerit speciem aliquam sensibus, signum appellari non potest, quare Augustinus de Catechizandis Rudibus cap. 26. num. 50. Sacramenta vocat *signacula rerum divinarum visibilia*: lib. xix. contra Faustum cap. 16. *corporalia Sacramenta*: quæst. 84. in Leviticum, *Sacramenta visibilia*: tract. lxxx. in Joan. num. 3. *elementum, & tanquam visibile verbum*; & in expositione inchoata Epist. ad Rom. num. 18. *sacrosancta signacula*. Ideo autem *signum sensibile* ad Sacramentum constituendum fuit adhibitum, *quoniam anima corpori inserta est, & in sensibilibus illi intelligibilia præbentur*, ut inquit Io. Chrysostomus hom. 60. ad Populum Antioch. & 83. in Matth. sive ut ait S. Thomas q. 1x. art. 4. *quia connaturale est homini, ut per sensibilia perveniat in cognitionem intelligibilem*. Addamus S. P. Augustini rationem ex citato lib. xix. contra Faustum cap. 11. quoniam scilicet *in nullum nomen religionis, seu verum, seu falsum, coagulari homines possunt, nisi aliquo signaculorum, vel sacramentorum visibilium consortio colligentur*.

Non est tamen *Sacramentum* hujus solius in unum Religionis nomen coadunationis signaculum, ut perperam autumant Sociniani, qui contendunt nihil aliud *Sacramentum* esse, nisi simplex nudumque signum, quo a Judæis, & a Gentilibus discriminantur Christiani: sed est signum *invisibilis gratiæ*: nam infra demonstrabimus sacramenta novæ legis sanctificationem efficere, quam sacramenta vetera præstigabant; unde Augustinus citata quæst. 84. in Leviticum scribit: *Nam sine ista sanctificatione invisibilis gratiæ, visibilia Sacramenta, quid prosunt?* Animadvertendum hoc loco, etiam sacramenta legis veteris aliquam sanctitatem contulisse, sed legalem duntaxat, scribente eo loci Augustino, *Moses visibiliter Sacerdotes sanctificabat*, quæ sanctitas umbratica erat, & figura sanctificationis conferendæ per Christum: quamobrem Sacramenta illa appellantur ab Apostolo ad Galat. iv. 9. *infirma & egena elementa*, ad Hebræos vii. 18. reprobanda propter *infirmitatem, & inutilitatem*, & ibidem cap. ix. 13. asseritur inquinatos tantummodo vetustis sacrificiis sanctificatos ad *emundationem carnis*. Ceterum tam sacramenta veteris legis, quam novæ in re significata paria sunt, nam significant eundem Christum, ejusque gratiam; cum hoc tamen discrimine, quod sacramenta vetera signum erant Christi venturi, Sacramenta novæ legis signum sunt redemptionis jam peractæ, sive, ut loquitur S. Pater cit. lib. xix. adversus Faustum cap. 14. & 15. Sacramenta illa erant prænuntiativa rerum nondum impletarum, & figuræ Christi passuri, & resurrecturi; hæc verò Sacramenta signa sunt Christi, qui passus est, ac resurrexit.

Hinc inferitur, quod sicuti eadem est fides veterum Patrum, ac  
nostra,

nostra, quemadmodum demonstavi lib. xxv. cap. 7. ex eo quod antiqui iusti salvi fierent eadem fide, quæ fuerat suo tempore revelanda; & sicuti idem est Mediator qui olim expectabatur, & qui ad nos redimendos advenit, quoniam juxta Apostolum, *unus est qui justificat circummersionem ex fide, & præputium per fidem*: ita una eademque est definitio Sacramentorum utriusque legis, licet virtus omnino impar. Hinc subscribimus iis, qui censent utraque Sacramenta *univoce* hoc nomine designari. Quod si per *signum gratiæ*, intelligas signum efficiens, & practicum, quoniam, ut paulo antea diximus, Sacramenta vetera non propriam sanctitatem vi sua impertiebantur, sed legalem tantum, atque prænuntiativam, apertum est *analogice* tantum, non *univoce* Sacramenta utriusque legis insigniri uno eodemque vocabulo. At quod signum practicum esse debeat, aliqua alia voce exprimentum est; ut nos fecimus sequentibus verbis ad evitandam illam parvi momenti & inutilem quæstiunculam, num Sacramenti definitio *univoce* utriusque legis *Sacramentis* conveniat.

Præquam verò ceteras allatæ definitionis particulas prosequamur, animadvertendum est triplicem gratiam Sacramentalibus symbolis designari: ac primum gratiam præsentem, quæ animam exornat & sanctificat, scilicet, justitiam, remissionem peccatorum, aliaque dona Dei, quibus cumulatur dignè *Sacramenta* recipiens: deinde gratiam jam acceptam Dominicæ Incarnationis, passionis, redemptionis, resurrectionis; & si loquamur de veteribus Sacramentis, initium fœdus, Dei promissionem, ac liberationem de domo servitutis: gratiam denique futuram, scilicet gloriam, & sempiternæ vitæ consecutionem. Quare *Sacramentum* dici potest cum beato Thoma quæst. lx. art. 3. signum *demonstrativum*, *commemorativum*, *prænuntiativum*. Quod ut facilius percipiatur, quædam producam ex utriusque legis *Sacramentis* exempla. Et primum sit circumcisio, quæ commonestabatur fœderis a Deo initi cum Abrahamo, Gen. xvi. 7. erat signaculum justitiæ & fidei, Ad Rom. iv. 11. atque prænuntiabat Christum ex semine Abraham oriturum, & gratiam Evangelii, per quam sumus filii promissionis, ad Galat. iii. 29. Ita Levitarum sacrificia, præsertim Agni paschalis immolatio, erant commemorativa beneficiorum, quæ Deus filiis Israel ex Aegyptoeductis contulerat, Exod. xii. 5. immundorum purgatio, ad Heb. ix. 13. & typus Agni in cruce pro nobis immolandi, 1. ad Corinth. x. 3. Ad hunc plane modum *Sacramentum* baptismatis signum est Christi passionis ac sepulture, ad Colossens. ii. 12. ablutionis peccatorum, & renovationis, ad Titum xii. 5. nec non arrha future resurrectionis, & pignus hæreditatis, ad Roman. vi. 5. Hoc denique pacto dum Eucharistiæ suscipitur *Sacramentum*, annuntiatur, & in memoriam revocatur Christi mors 1. ad Corinth. xi. 26. atque recipitur unâ cum Corporis Christi communio-

munione pignus æternæ vitæ, Joan. vi. 51. & 1. ad Corinth. x. 16. *Sacramentum* itaque est signum *demonstrativum* præsentis gratiæ, *commemorative* præteritæ, *prænuntiativum* futuræ. Adhæc *Sacramenta* sunt etiam muneris officique nostri commonitoria; circumcisio enim admonebat unumquemque, ut cor suum circumcideret, & victimarum immolatio, ut supremam Dei pertineret potestatem, quemadmodum nunc baptismus nos commonet veterem hominem cum Christo simul crucifixum esse, ut destruat corpus peccati, nec peccato ultra serviamus; & communicatione corporis Christi excitamur ad gratias pro accepta redemptione agendas, fovendamque inter nos, qui de uno pane participamus, mutuam caritatem & dilectionem.

Ut revertamur modo ad *Sacramenti* definitionem, oportet, ut sit *signum divinitus institutum*. Diximus enim, habere quidem *Sacramenta* aliquam similitudinem rerum, quarum signa sunt; at non esse signa talis generis, qualia sunt naturalia, quæ absque ulla institutione commonstrant id, quod significant, cujusmodi est vestigium in pulvere impressum. Et quoniam virtus *Sacramenti*, cum sit spiritualium donorum effectrix, habet solum Deum auctorem; idcirco *Sacramenta* non humanæ institutionis sunt, sed supremæ ac divinæ. Quamobrem S. Pater de Doctrina Christiana lib. 111. cap. 1x. num. 13. *Sacramentum* appellat *utile signum divinitus institutum*. Verùm de *Sacramentorum* institutione plura paullo infra.

Quum hæc communia sint cuilibet *Sacramento*; hoc proprium habet *Sacramentum* novæ legis, ut Christi nomine suscipientibus administretur: sive enim baptizet improbus minister, sive justus; gratia baptizato confertur, eo quod non tribuatur gratia baptismatis, nisi illi, de quo dictum est, Joan. 1. 33. *Hic est qui baptizat in Spiritu sancto*. Potestatem quippe sanctificandi Christus Jesus in neminem ministrorum transfudit, quamvis per ministros suos baptizare dignatus sit, ut dum baptizant ministri inæqualis meriti, unum tamen & par & æquale baptismum reciperet unusquisque, nec tot baptismata essent, quot ministri: sed staret unitas Baptismi, unitas Ecclesiæ, unitas Fidei. Hinc Paulus compescens scissuras & schismata Corinthiorum, orta ex magistrorum, a quibus initiati fuerant, præcellentia, in priori Epistola cap. 1. inquit: *Unusquisque vestrum dicit, Ego quidem sum Pauli: ego autem Apollo: ego verò Cepha: ego autem Christi. Divisus est Christus? Nunquid Paulus crucifixus est pro vobis? aut in nomine Pauli baptizati estis?* Lege etiam Augustinum Tract. 1x. in Joan. num. 6. 7. 8.

*Sacramenta* denique novæ legis sunt signa gratiæ & sanctificationis efficientia, cum vetera, ut diximus, gratiam tantummodo prænuntiarent, nec aliam conferrent sanctitatem, nisi legalem. Id ex iis, quæ

quæ infra de *Sacramentorum* vi & energia disputabuntur , perspicuum erit . Interim negari nequaquam potest , quin per baptismum abluantur peccata , homines regenerentur , & renouentur Spiritu sancto : cum Act. xx. 16. Ananias dixerit Saulo : *Exurge , baptizare , & ablue peccata tua* ; ac Paulus ipse scripserit ad Titum 111. 5. *Salvos nos fecit per lavacrum regenerationis & renovationis Spiritus sancti* . De Confirmatione pariter legimus Act. viii. 17. *Tunc imponebant manus super illos , & accipiebant Spiritum sanctum* . De Ordine manifestus est locus 1. ad Timoth. iv. 14. *Noli negligere gratiam , quæ in te est , quæ data est tibi per prophetiam cum impositione manuum presbyterii* . At de istorum , aliorumque Sacramentorum gratia , agendum est proprio in loco .

Repudiata superiori definitione *Sacramenti* , alias proprio marte Novatores compingunt . Ac primo Lutherani contendunt nihil aliud *Sacramentum* esse , quam *promissionem gratiæ annexam externo signo* : ita Lutherus in lib. de captiv. Babylonica cap. ult. & Kemnitius in 2. P. Examin. Si Lutherani intelligerent *externum signum* gratiæ , & sanctificationis *efficiens* ; posset recipi istiusmodi definitio , quamquam minus accurata & impropria . Nam Georgius Cassander in Consultatione de Articulis inter Catholicos , & Protestantes controversis , art. xii. r. producit librum ad compositionem Religionis Ratisponæ propositum , atque in hoc capite etiam ab Eckio probatum ; in quo habetur , *Sacramenta duobus potissimum de causis divina auctoritate instituta esse : una , ut essent signacula & veluti tessera quædam huius magnæ congregationis , quæ est Ecclesia ; altera , ut sint certa & efficacia signa voluntatis , & gratiæ Dei erga nos , & proinde non signa ut tantum significent , sed ut sanctificent , utque in nobis fidem excitent , & ad mutuam dilectionem , moresque Christianos provocent & hortentur* . Et Grotius in Annotatis ad Consultationem Cassandri , eodem art. fatetur , *Sacramentis non significari tantum gratiam collatam , sed & conferri* . Neque enim nos negamus *Sacramenta* habere annexam gratiæ promissionem : quis enim ignorat de Baptismo legi Marci ult. 16. *Qui crediderit & baptizatus fuerit salvus erit* , & de Cæna Domini- ca Joan. vi. 55. *Qui manducat meam carnem , & bibit meum sanguinem , habet vitam æternam* ? Fatemur etiam *Sacramenta* magnam vim habere ad fidem in animis nostris excitandam , & exercendam , & ad caritatem inflammandam , ut in Catechismo Romano legimus P. 2. num. 18. sunt enim , ut supra diximus , signa commemorativa quoque beneficiorum præteritorum , nec non futurorum prænuntiatiua .

Verùm in illa Lutherana *Sacramenti* definitione principio notandum est , quod improprie dicitur *Sacramentum ipsa promissio gratiæ* , quam alioquin habet adnexam ; non enim per verba , quibus *Sacramenta* conficiuntur , revera insinuat promissio ; neque dum sacram

crum impertitur lavacrum, dicimus, *Promitto tibi regenerationis gratiam*, sed, *Ego te baptizo*, &c. quod & in aliis *Sacramentis* fervatur; propterea quod *Sacramenta* novæ legis non sanctitatem promittant, sed conferant. Deinde in ea definitione latet perfidia hæresis; nam cum novatores autument hominem justificari per solam fidem *divinarum promissionum*, & per solam in Christum fiduciam seculis operibus, & denegata efficacia *Sacramentorum*; consequenter præmissa, aut consimili alia definitione incautis animis insinuant, a suscipientibus *Sacramenta* per solam fidem arripere justitiam & sanctitatem. Vide quæ diximus lib. xix. cap. 5. Hinc Confessio Lutheranorum exhibita invictissimo Imperatori Carolo V. in Comitibus Augustæ anno 1530. profitetur, *attendum Sacramentis, ut fides accedat quæ credat promissionibus, quæ per Sacramenta exhibentur, & ostenduntur; damnatque illos, qui docent quod Sacramenta ex opere operato justificent*. Ea ergo, quæ postea dicentur de *Sacramentorum* efficientia, etiam repellunt, oppugnantque Lutheranam *Sacramenti* definitionem.

At Calvinus lib. iv. Instit. cap. 14. ad rationem *Sacramenti* præter promissionem divinam addit divinæ benevolentiae oppignorationem, ita, ut juxta Calvinianos *Sacramenta* nihil sint aliud, quàm *signa quædam & sigilla divinitus instituta ad obsignandos in nobis, & confirmandas divinas promissiones, ad fidem nostram corroborandam, & ad pietatem nostram erga Deum palam significandam*. Quæ definitio & falsæ est, & eodem vicio laborat, quod *Sacramentis* nullam producendi gratiam vim tribuat, nisi quatenus fidem excitant, *externisque objectis*, ut inquit Theodorus Beza de summa Rei sacrament. q. 2. *interiores sensus moventur*. Ceterum falsitas definitionis Calvinianæ inde eruitur, quod Divina promissio magis certa est in sacris literis, quàm sit certa justitia, & sanctitas in *Sacramentis* collata, ideoque fieri nequit, ut per *Sacramenta* certiores reddamur promissionum divinarum. Præterea illa definitio ipsorum Calvinistarum doctrinam evertit; cum enim profiteantur solos prædestinatos justificari, & divinarum promissionum pignus accipere; atque aliunde negare non audeant plerisque reprobos suscipere *Sacramenta*; aut dicendum est *Sacramenta* non esse illam divinæ benevolentiae oppignorationem, aut nunquam recipi a reprobis, aut omnes, qui *Sacramenta* recipiunt, esse prædestinatos. Reprobis namque, juxta Calvinianos, gratia denegatur, non ob pravam illorum dispositionem, sed quia Deus ipsam gratiam solis prædestinatis sempiterno decreto paravit, sacris in literis repromisit, & reapse impertitur.

Nihil autem juvat Calvinistas, quod circumcisio dicatur ab Apostolo ad Rom. iv. *oppeyis*, idest, *signaculum*, aut, *sigillum*: siquidem nemo nostrum negat circumcisionem fuisse initi fœderis oppignorationem, necnon impressum in carne signaculum filios Abraham ab  
alie.



alienis discriminans; quemadmodum nec illud negamus; per *Sacramenta* homines sese Deo mancipare, eique suam servitutem obstringere: negamus tantum in *Sacramentis* vel oppignorationem istam, vel divini fœderis commemorationem solummodo esse spectandam, & non potius internam, occultamque subministracionem gratiæ, quam in nobis ritè dispositis efficiant. Ostendimus quippe non eadem ratione a profanis Scriptoribus, & ab Ecclesiæ Patribus *Sacramenti* vocabulum usurpari; ideoque ex quo apud litigantes *sacramentum* dictum fuerit oppignoratio pecuniæ, nonnisi imperite inferitur apud Ecclesiæ Doctores *Sacramenta* primariò esse signacula fœderis a Deo cum hominibus initi, aut promissæ fœderatis gratiæ oppignorationem. Vidit id etiam heterodoxus Vossius, qui de vi, & efficacia Sacramentorum pag. 248. scripsit: *Infirmo igitur tibicine nituntur qui sic argumentantur: Sacramentum fuit pecuniæ oppignoratio ex pacto litigantium proveniens. At in Sacramentis Ecclesiæ homo se oppignorat Deo, ut consequatur gratiam fœderatis promissam. Ergo Sacramenta primariò sunt signa pacti, & fœderis inter Deum & nos.* Adde, quod supra commemoravimus, tam in Circumcisione, quam in *Sacramentis* novæ lcgis non solum fœdus initum spectandum esse, cujus sunt signum *commemorativeum*; verum etiam præsentem justiciam, cujus sunt signum *demonstrativum*, & efficiens.

Ex dictis corruunt aliæ definitiones hæreticorum, quæ omnes eo spectant, ut *Sacramentis* auferant vim spiritualis gratiæ effatricem. Nos ergo concedemus Zuvinglianis *Sacramenta* esse quamdam initiationem, qua Christo homines, ut milites imperatori, obstringuntur. Haud insiciabimur Anabaptistis *Sacramenta* esse signa, quibus ut rectè vivamus admonemur. Fatebimur Socinianis per *Sacramenta* Christifideles a Judæis & a Paganis secerni. Calvinique, & Lutheri gregariis ultro dabimus, *Sacramentis* fidem nostram excitari, & exerceri pietatem. At negamus id primò in *Sacramentis* attendi: sive negamus *Sacramenta* esse tantum signa, quæ vel præstitum beneficium in memoriam revocent, vel Dei gratiam promittant, vel nos officii nostri commonefaciant, non verò signa spiritualium donorum efficientia. Atque hinc a ratione, numeroque *Sacramentorum* excludimus tum ea signa, quæ crant futurarum rerum symbola duntaxat *speculativa*, nec sanctitatem præsignabant, aut conferebant, ut serpens æneus, virga Moïsis, Arca fœderis, transitus maris rubri, aliæque veteris testamenti figuræ; tum ea, quæ nulla alia ratione gratiam impertiuntur spiritualcm, nisi quatenus in iis devotè nos gerimus exhibentes Christianæ humilitatis pietatisque argumenta, ut sunt aspersio lustralis aquæ, benedictio Sacerdotalis, ablutio pedum, & quæ consueto vocabulo nuncupantur *Sacramentalia*; de quibus tamen iterum pertractabitur.

To. VI.

C

CA-

## CAPUT II.

*Quandonam Sacramenta, quæ sunt signa spiritualis gratiæ, primitus fuerint instituta.*

**E**xplicata Sacramentorum *essentia* quæritur quando primum existere inceperint; cumque prior hominum status fuerit protoparentum, dum brevi originale iustitiam in paradiso voluptatis servaverunt, principio a Scholasticis controvertitur, num in eo felicitatis statu *Sacramenta* extiterint, vel, si Adam perseverasset, fuissent saltem instituenda. De hac verò quæstione, cum inde parum utilitatis possimus percipere, agendum puto absque prolixitate verborum. Itaque in statu innocentie *Sacramenta* nequaquam extitisse, nec, si Adam perseverasset, fuisse futura, tradit S. Thomas q. 61. art. 2. ejusque Commentatores clarissimi, Dominicus Soto in iv. dist. 1. q. 2. art. 2. Gonet disp. 2. art. 1. Cardinalis Gotti quæst. 1. dub. 3. aliique omnes; neque oppositum censent cum Subtili Doctore Mastrius disput. 1. q. 8. art. 1. & Frassen art. 1. q. 4. necnon cum Romano Aegidio nostrates, Argentinas dist. 1. q. 1. art. 2. Gibbon disput. 3. dub. 2. Gavardi q. 1. art. 2. His verò quamplures alii subscribunt.

Innititur hæc sententia momentis istis. Principio *Sacramenta* signa sunt in religione stabilia ac permanentia, ideoque locum non habent in eo statu, qui ad brevissimum tempus perduravit. Deinde, ut S. Thomas citato loco ratiocinatur, repugnare videtur rectissimo, & bene instituto creaturæ rationalis statui, in quo superiora nullo modo ab inferioribus pendent, si anima vel quantum ad scientiam, vel quantum ad gratiam per signa sensibilia perficiatur. Præterea *Sacramenta* ad remedium, & medicinam animæ sunt instituta, ideoque locum habere nequeunt in eo statu, in quo nullus animi morbus irrepserit. Insuper *Sacramenta* vel ad gratiam recipiendam, vel ad servandam, vel ad augendam instituuntur: in statu autem originalis iustitiæ jam gratia absque ullo *Sacramentorum* adminiculo collata fuerat. Tunc etiam nil homines fuissent passi noxiæ cupiditatis, sensuumque luctaminis, ideoque potuissent absque sensibilibus elementis acceptam iustitiam custodire. In hac quoque proficere potuissent, ut fecerunt angeli sancti, per liberum arbitrium perseverando. Cui ergo bono tunc instituta fuissent *Sacramenta*, si nec ad divinarum gratiarum conservationem, nec ad augmentum, quidquam conferre potuissent? Tandem neque ex scriptura, neque ex traditione, quæ duo in rebus ambiguis facem nobis præferunt, probari potest *Sacramentorum* pro statu innocentie, vel necessitas, vel institutio. Atque hæc sunt pro communiore sententia triæ argumentationes.

Qui-

Quidam censent etiam in statu innocentie quædam *Sacramenta* existisse : quam opinionem amplectuntur nonnulli Ordinis nostri Scriptores cum Fulgentio Bellelli lib. 1. Mentis Aug. cap. 29. his argumentis innixi. Primo juxta Augustinum lib. xix. contra Faustum. cap. 11. *In nullum nomen religionis coagulari homines possunt, nisi aliquo signaculorum, vel sacramentorum visibilium consortio colligentur*. Cum itaque in statu innocentie futurus esset Dei cultus, & vera Religio ; oportuit, ut pro eo statu instituerentur ipsius religionis signacula, & tessere, qualia profecto sunt *Sacramenta*. Extitissent præterea in eodem innocentie statu oblationes, & sacrificia : quamquam enim id neget Dominicus Soto, eumque postea secutus sit Du-Hamelius, refutatur jure ac merito a Gonet, quoniam offerre Deo sacrificia, illumque tum interiori, cum exteriori actu colere tenemur jure naturæ, ex D. Thoma 2. 2. q. 85. art. 2. Cum autem sacrificia alicujus meriti fuissent, vel gratiæ contulissent incrementum, vel saltem ad illud conferendum fuissent idonea : quod ad rationem veri *Sacramenti* videtur sufficere. Præterea Augustinus rationem *Sacramenti* agnoscit in ligno vitæ, scribens lib. viii. de Gen. ad lit. cap. 4. num. 8. *Nec sine mysteriis rerum spiritualium corporaliter presentatis voluit hominem Deus in paradiso vivere. Erat ei ergo in lignis ceteris alimentum, in illo autem Sacramentum*. Proximo etiam capite v. num. 10. ait S. Pater, potuisse per lignum, idest, per corpoream creaturam, tanquam Sacramento quodam, significari Sapientiam in paradiso corporali, Sapientiam utique, qua recte vivimus, & de qua Prov. 111. 18. legimus, *Lignum vitæ est amplectentibus eam*. Insuper Augustinus eodem capite num. 11. affirmat lignum vitæ non solum fuisse sapientiæ visibile symbolum, verum etiam immortalitatem primo homini contulisse occulta gratiæ inspiratione, scribens : *Illud quoque addo, quamquam corporealem cibum, talem tamen illam arbo-rem præstitisse, quo corpus hominis sanitate stabili firmaretur, non sicut ex alio cibo, sed nonnulla inspiratione salubritatis occulta* : ac de homine è paradiso ejecto lib. xi. cap. 40. num. 54. ait S. Doctor, *Separari utique debuit a ligno vitæ, sive quod ex ipso illi subsisteret felix ille ipse status corporis, ex re visibili, virtute invisibili ; sive quod in eo esset & sacramentum visibile invisibilis sapientiæ*. Ex quibus omnibus constat lignum vitæ & fuisse corporale signum rei sacræ, & contulisse corporis immortalitatem ; quam fuisse donum gratiæ, non vero naturalem innocentis hominis conditionem, & definitum est adversus Bajum, & nos demonstravimus lib. xi. cap. 9.

Utraque sententia potest absque ullo fidei discrimine propugnari : sed ut verum fatear, mihi non videntur producta utrinque argumenta penitus inconcussa. Primum enim pro communiori sententia facile solvitur, si reponas non fuisse innocentie statum diuturnum ac per-

manens ob liberam primi hominis prævaricationem; habuisse tamen ea adminicula, quæ congruunt statui permanenti; quemadmodum in eo non defuerunt ad servandam corpoream vitam salubris ligni alimenta, etsi transgressor homo iis promernerit spoliari. Nam congruum fuit a sapientissimo Conditor omnia rationalibus creaturis suppeditari, quæ vel ad sui cultum & religionem, vel ad spiritalem vitam liberali munificentia suppeditantur. Ad secundum dicimus pugnare cum innocentie statu sensuum rebellionem, & corporalium rerum imagines, quæ in errorem inducant, non autem signa sensibilia, quæ animam corpori insitam in cognitionem rerum spiritualium pertrahant: unde Thomistarum rationem refutant Suarez, Florentius de Cocq, Isambertus, Tournely, & alii. Alterum nil probat, si quidem *Sacramenta* status innocentie non fuissent utique animorum medicamenta, nec liberassent a patratum scelerum lue; sed potuissent tamen gratiam impertiri, quæ hominem custodiret, aut gratiam jam acceptam augere. Ad quartum respondeo disparem esse de Angelo, & de homine primo rationem; ille enim cum sit spiritualis, nec habeat animum confertum carni, non debuit spiritaliter vivere mysteriis rerum intelligibilium corporaliter exhibitis: quod non valet de homine etiam innocente, ut inquit sapientissimus Augustinus. Ad postremum dicimus nec ex scriptura, aut traditione colligi posse quale *Sacramentum* extiterit in lege naturæ pro delendo originali peccato, cum tamen aliquod consensu fere omnium extiterit; neque necessum est ea, quæ ipsa religionis, & congruentiæ ratio commonstrat, divina auctoritate comprobari, præsertim si ad fidem, cujusmodi est præsens questio, non spectent. Quod si secunda sententia ardeat; dices in Scripturis commemorari lignum vitæ, quod juxta Augustinum habet *Sacramenti* rationem.

Ceterum nec secundæ sententiæ argumentationes invictissimæ sunt. Ad primum enim responderi potest, quod Augustinus vel loquitur de mysteriis & ritibus, quibus una religio ab alia secernitur, vel saltem non instituit sermonem de statu innocentie. Quod loquatur de mysteriis & ritibus, quæ sæpenumero *Sacramenta* non sunt, liquet; nam indiscriminatim verba facit de qualibet religione, sive vera, sive falsa, dicens, *In nullum autem nomen religionis seu verum, seu falsum, &c.* Quis autem in falsa religione vera *Sacramenta* potest excogitare? Intelligendus est ergo Augustinus de sacrificiis, quæ in unaquaque religione offeruntur, maxime quod disjunctive loquitur, *nisi aliquo signaculorum, vel sacramentorum, &c.* Quod vero Augustinus non sit de statu innocentie accipiendus, patet ex eo, quod perseverante statu innocentie omnes homines, unum Deum adorassent, eandemque rempublicam constituissent, ideoque non opus fuisset, ut certis *signaculis* homines coadunarentur, & fideles corpora-

libus

libus signis fecernerentur ab idololatriis. Alterum facilis est solutionis; sacrificia enim in statu innocentiae essent religiosi cultus protestativa, sed non symbola gratiae; nec ipsam gratiam promerissent, nisi per modum meriti, sicut illam promerentur virtutum opera; *oblaciones enim*, inquit Dominicus Soto, *non aliter sunt causa gratiae, quam eleemosynae, & jejunia*. Quod sequitur, hac ratione diluitur. Augustinus lib. vii. de Gen. ad lit. cap. iv. num. 8. appellat lignum vitae *Sacramentum*, quatenus *Sacramentum* latè acceptum rem arcanam designat, docens *in ligno vitae* figuratum Christum, qui vera Sapientia est, ut in petra, de qua fluxerunt aquae. Ait enim: *Erat ergo & lignum vitae, quemadmodum Petra Christus; nec sine mysteriis rerum spiritualium, &c.* At Petra verum propriumque *Sacramentum*, ut in praesentia accipitur, nequaquam fuit: ideoque nec lignum vitae. Afferit eo loci num. 10. Augustinus etiam exemplum matrimonii; quod certe *Sacramentum* erat lato modo, in quantum scilicet praesignabat Christi & Ecclesiae unionem, ut inquit Apostolus ad Ephes. v. 31. nam in lege duntaxat Evangelica ad *Sacramenti* dignitatem a Christo Domino evectum est, cum olim institutum fuerit *non secundum quod est Sacramentum, sed secundum quod est officium naturae*, ait S. Thomas 2. p. q. 60. art. 2. ad 3. Ergo ut matrimonium, ita lignum vitae fuit per Augustinum *Sacramentum* eo tantum sensu, quod *mysterium* aliquod praesignabat. Dum vero ait cap. v. num. 11. tribuisse stabilem sanitatem *occulta salubritatis inspiratione*, non significat gratiam collatam animae, sed firmitatem tributam corpori; non vi aliis cibis communi, sed occulta, & mirabili, qualis apparuit in subcinericio pane, quo Elias quadraginta dierum itinere pervenit ad montem Horeb, 3. Reg. xix. 8. aut in farina, & oleo Sareptanae viduae, 3. Reg. xv 11. 16. Hæc enim exempla producit ibidem Doctor eximius. Quis verò aut panem illum subcinericio, aut farinam, oleumque *Sacramenta* significatione propria appellaverit?

Hæc utriusque sententiae argumentis repono: & quantum ad me attinet, subscribo primùm Theologis asserentibus nullam repugnantiam habere *Sacramenta* cum statu innocentiae, propterea quod homo corpore animoque constatus per corporalia signa potest in quocunque statu devenire in cognitionem rerum spiritualium, ut non obscure docet citato loco Augustinus, ipsaque ratio demonstrat. Possent etiam iisdem signis conferri gratia, non quæ vulnera animae sanaret, sed quæ gratiam pristinam foveret, vel ejusdem tribueret incrementum. Nec singularis est hæc sententia, sed Durandi in 1v. dist. 1. q. 2. Alexandri de Ales q. 1. memb. 2. Florentii de Cocq de Sacram. sect. x. aliorumque. Ad hæc affirmo exitura etiam in statu innocentiae sacrificia, quoniam tenetur creatura rationalis animo, & copore constans Factorem suum exterioribus, interioribusque actibus colere. Constitu-



stituissent quoque homines innocentes Ecclesiam visibilem; quæ sanè colligata cerneretur *signaculis* sensibilibus. Affero tandem in statu innocentiae nequaquam futura *Sacramenta*, quæ vim conferendi gratiam habere intuitu meritorum Christi, aut instituta essent in peccatorum medelam: quoniam sententia nostra Christus non venisset, nisi Adam peccasset, neque *est opus valentibus medicus, sed male habentibus*, Mat. 1x. 12. Atque hæc de statu innocentiae.

Sequitur status naturæ ab Adæ lapsu usque ad legem per Moysen latam, comprehendens annos, juxta communioem Chronologiam, 2513. In quo statu, præsertim ante circumcisionem, nulla fuisse *Sacramenta* nonnulli Scholastici docuerunt, quod fat esset ad justificationem, protestatio fidei absque signo ullo sensibili, & si aliquando patriarchæ signum istiusmodi exhibuerint, determinatum non esset, neque divinitus institutum. Atque hanc sententiam tenuerunt Durandus in 1v. dub. 1. q. 2. Dominicus Soto dist. 1. q. 2. art. 3. concl. 5. Ledesma, Maurus, Basilius noster Legionensis, Vasquesius, alii. Quidam verò etiam ante circumcisionem extitisse putant *Sacramentum* aliquod pro parvulis originali culpa expiandis, at non pro adultis, quibus fat erat fides in futurum Liberatorem, quocunque tempore ad salutem necessaria, ut alibi definivimus: idque tenent Suarezius disput. 1v. sect. 4. in articulum 3. quæstionis Lxi. 3. partis, Juenin in Comment. q. 2. cap. 2. Perrimezzi dif. 305. Qualem autem ante circumcisionem fuerit pro parvulis remedium, & an determinatum ex divina institutione, an ex hominum arbitrio, ambiguum est, asserentibus Scotistis determinatum fuisse, negantibus aliis; tamen Mastrius disput. 1. q. 2. num. 51. demonstret nec Subtilem doctorem affirmasse signum illud institutum sub aliqua cæremonia, sed tantum, ut inquit, *formaliter*, nimirum fuisse signum sensibile fidei, non alterius virtutis, *materialiter* tamen indeterminatum, & ab hominum pendens arbitrio: quod videtur solo nomine discrepare ab aliorum sententia. Complures denique tam pro parvulis, quam pro adultis in statu naturæ *Sacramenta* extitisse propugnant, inter quos Canus Relect. de Sacram. p. 3. Gonet disp. 2. art. 2. Gavardi Quæst. 1. art. 3. Cardinalis Gotti q. 1. dub. 4. Tournely q. 2. art. 3. concl. 2.

In hac opinionum discrepantia primum affirmo in lege naturæ aliquod pro parvulis gratiæ signaculum, & *Sacramentum* extitisse: quod ostenditur auctoritate, & ratione admodum probabili. Etenim Innoc. III. cap. *Majores*, lib. 3. decret. tit. 42. indiscriminatim de parvulis cujusque status ait: *Absit enim, ut universi parvuli pereant, quorum quotidie tanta multitudo moritur, quin & ipsis misericors Deus, qui neminem vult perire, aliquod remedium procuraverit ad salutem.* Ubi *remedii* nomine intelligit proculdubio *Sacramentum*, cum ibidem de circumcisione, & de Baptismo disputationem instituat. S. Pater  
Au-

Augustinus lib. v. contra Jul. cap. xi. num. 45. ait: *Nec ideo tamen credendum est, & ante datam circumcisionem famulos Dei, quando quidem eis inerat Mediatoris fides in carne venturi, nullo Sacramento ejus opitulatos fuisse parvulis suis, quamvis quid illud esset aliqua necessaria causâ scriptura latere voluerit.* Item Auctor de Cardinalibus operibus Christi, inter opera Cypriani, cap. de ratione Circumcisionis, inquit: *Sane originale peccatum, quod a primis parentibus in totam generis hujus successionem defluxit, omni tempore aliquibus remediis oportuit expiari; licet vim plenam significantia non haberint, donec ad rem ipsam ventum est, quæ figurarum operiebatur velamine.* Accedit & ratio: quocumque enim tempore necessaria fuit ad salutem fides in Christum, quæ salvos faciebat antiquos pusillos cum magnis, ut Augustinus ait lib. 2. de nuptiis & concupisc. cap. xi. num. 24. cumque parvuli nequeant fide propria ætuali justificationem percipere; ut modo in iis qui baptizantur supplet defectum ætatis Ecclesiæ fides, ita olim fides parentum signo aliquo visibili significata a damnatione eripiebat infantulos: *Omnia namque exordia parvulorum, totaque illa principia necdum rationalis infantie sub arbitrio jacent voluntatis aliena, nec ullo modo eis nisi per alios consuli potest;* ut inquit lib. 2. de vocat. Gent. Cap. 23. fidelissimus Augustini interpres beatus Prosper, aut quisquis auctor est ejusmodi Operis. Ut ergo fides Mediatoris opitularetur infantibus, aliquo signaculo erat iisdem applicanda. Potestatio enim fidei interior, non videtur esse sufficiens ad salutem remedium, tum quia parvulis in utero matrum decedentibus tanta gratia impensa non est, ut ad regenerationem per alienam fidem pervenerint, cum tamen & iis asserre posset salutem parentum, aut extraneorum fides, nisi applicandum iisdem esset sensibile *Sacramentum*: tum quia visibilibus signis ad Deum redeundum est, quemadmodum ab invisibilibus per visibilia cecidimus, *ut quo casu anima venit ad infima, eo gradu revertatur ad summa; atque iisdem, quibus corruit, passibus surgat,* ait lib. xxvi. Moralium cap. 8. nunc xii. num. 18. magnus Gregorius: ex quo capite necessitatem *Sacramentorum* inferunt præclari Theologi, Hugo Victorinus p. 9. cap. 3. Dominicus Soto in iv. dist. 1. q. 2. & alii.

Adversus id opponitur, quod nonnulli Patres asserant in lege naturæ per solam fidem tam pueros, quam adultos fuisse justificatos. Scribit enim Tertullianus de Baptismo cap. 13. *Pueris salus retro per fidem nudam ante Domini passionem & resurrectionem: at ubi fides aucta est credendi in nativitatem, passionem, & resurrectionem ejus, addita est ampliatio sacramenti, obsignatio baptismi, vestimentum quodammodo fidei, quæ retro erat nuda.* S. Gregorius Magnus lib. 4. Moralium cap. 3. *Quod vero apud nos valet aqua baptismatis, hoc egit apud veteres, vel pro parvulis sola fides, vel pro majoribus virtus sacrificii,*

vel

*vel proiis, qui ex Abraha stirpe prodierant, mysterium circumcissionis. S. Bernardus Epist. 77. ad Hugonem de S. Victore cap. 1. num. 4. At vero quis nesciat & alia præter baptismum contra originale peccatum antiquis non defuisse temporibus? Abraha quidem & semini ejus circumcissionis Sacramentum in hoc ipsum divinitus traditum est; In nationibus verò quotquot inventi fideles sunt, adultos quidem fide & sacrificiis credimus expiatis, parvulis autem solam profuisse, imò suffecisse parentum fidem. S. Thomas 3. p. q. 70. art. 4. ad 2. Ante institutionem Circumcisionis, sola fides Christi futuri justificabat tam pueros, quam adultos, ita etiam & Circumcissione data: sed antea non requirebatur aliquod signum protestativum hujus fidei, quia nondum homines fideles seorsum ab infidelibus ceperant adanari ad cultum unius Dei.*

Perdifficilibus hñce testimoniis, post Canum Releñt. de Sacram. in gen. p. 3. respondent complures, etiam Juenin, Tournely, Frassen, alique recentiores, affirmari a Patribus olim suffecisse solam fidem exteriori signo manifestatam, absque sacrificio quod necessarium erat pro justificatione adultorum; ac solam fidem justificasse, quoniam signum illud erat egenum infirmumque elementum, nullam ex se interiorem gratiam efficiens. At quomodo fides visibili expressa signo appellari queat *sola, nuda, absque vestimento*; quomodo, si stet hæc responsio, recte scribat S. Thomas ante circumcissionem necessarium non fuisse *signum fidei protestativum*, fateor me nequaquam percipere. Respondendum ergo est, latere prorsus, quale sensibile signum ante Abrahamum ad peccatum originale delendum homines adhibuerint, scribente Augustino de peccato Originali cap. xxx. num. 35. *Et ante Abrahamum quidem utrum aliquo corporali, & visibili Sacramento justis, & eorum parvuli signarentur, Scriptura non exprimit; & lib. 11. de nuptiis & Concup. cap. xi. num. 24. Superioribus temporibus omni modo latuit Sacramentum justificationis ex fide.* Deinde assero Sacramenta eandem semper rem significasse, quamquam ipsa fuerint *mutabilia & temporalia*, ut S. Pater Augustinus tradit contra Faustum lib. xix. cap. 16. Quamobrem in quolibet statu ea *Sacramenta* obtinuerunt, quæ ipsimet statui congruebant, ita, ut in lege scripta, latis a Deo ritibus, certisque præceptis, eadem *Sacramenta* determinata essent, & peculiaria religionis *signacula*, at in lege naturæ, cum homines solo interiori instinctu ad Deum colendum moverentur, ex ipsomet Dei instinctu, nulla lege exterius lata, ipsi homines determinabant res sensibiles, quibus in Dei cultu, & ad expianda peccata uterentur: atque hæc est doctrina doct. Angelici 3. p. q. 60. art. 5. ad 3. egregie ex præcitato Augustini testimonio deducta. Quare ubi S. Thomas q. 70. art. 4. ait ante circumcissionem justificasse *solum Christi fidem* absque *signo protestativo*, excludit signum lege determinatum, atque



atque præscriptum, non quod interiori instinctu ducti homines, in fidei sui protestationem adhiberent: nam eo loci fatetur parentes vel preces, vel benedictionem aliquam etiam pro parvulis adhibuisse, sicut adulti pro seipsis offerebant preces, & sacrificia; atque id fuisse *Quoddam signaculum fidei*. Eodem pacto Tertullianum, Gregorium, ac Bernardi excipienda sunt verba; negant nimirum extitisse ante Circumcisionem fidei *signaculum*, lege definitum: sive affirmant sufficientem fuisse fidem cum aliqua sensibili protestatione.

Ex his vero inferitur quomodo *signaculum* iustitiæ in lege naturæ fuerit, & non fuerit determinatum, quæ erat difficultas secundo loco proposita: erat namque determinatum interiori instinctu protestantium fidem suam ejusdem *signaculi* exhibitione; non erat determinatum præscriptione legis, latoque præcepto. Quod si objicias, igitur *signaculum* illud non erat a Deo institutum, ideoque nec *Sacramentum*; eadem ratione respondeo minime institutum fuisse præscripto legis, fuisse tamen institutum interiori instinctu, quo ad Religionem, cultumque sui eo temporis Deus homines permovebat; idque sufficere ad rationem *Sacramenti* pro statu legis naturæ; quemadmodum ad *Sacramenta* legis scriptæ, vel Evangelicæ, requiritur divina institutio expressa in tabulis fœderis, librisque, vel traditionibus Apostolicis. Neque tollitur ratio *Sacramenti* essentialis per hoc quod vigente statu naturæ possent prohibito homines fidem suam protestari *signaculo* isto, vel illo: determinatio enim signi pertinet, ut Suarez advertit sub finem sect. 3. ad causam extrinsecam, non ad naturam, rationemque *Sacramentorum*. Neque etiam inferitur fuisse tunc temporis salutis remedium facilius, quam modò sit; quoniam nunc & in elemento obvio communique positum est, & cum sit a Christo determinatum, omnibus innotescit, & denique ex se efficientiam habet, non ex applicantium dispositione.

At enim opponis: Sententia est Augustini de nat. & grat. cap. viii. num. 9. parvulos, quibus per *Sacramentum* regenerationis non subvenitur, non admitti in regnum cælorum, ea damnatione, qua per universam massam currit: & de Dono persever. cap. ix. num. 21. *inscrutabilia esse judicia Dei*, cur ex duobus parvulis originali peccato pariter obstrictis, *iste assumatur, ille relinquatur*, propterea quod gratia post Adæ lapsum est beneficium indebitum; atque, ut S. Pater ait capite ejusdem lib. xii. num. 28. ostenditur Deus *bonus in beneficio certorum, justus in supplicio caterorum*. Cur ergo affirmare non possumus parvulos omnes in lege naturæ periisse, cum in iis adinventetur manifesta causa reprobationis, nimirum originale peccatum?

Ad hæc respondeo, Deum *voluntate antecedenti*, cujus effectus, est remedii ad salutem necessarii institutio ac præparatio, velle hominum universorum salutem; quamvis *voluntate sequenti*, cuius effe-

To. VI.

D

ctus

Etus est applicatio remedii, regeneratio, & consecutio salutis, velit duntaxat salvos fieri prædestinatos; in quorum numero quinam sint, pertinet ad inscrutabile Dei iudicium. Ut ergo in hoc Evangelicæ gratiæ statu institutum pro singulis est *Sacramentum* baptismati, quod tamen ineffabili Dei iudicio ita disponente, non omnibus applicatur; ita in statu legis naturæ voluit adesse ad originalem maculam expiandam commune paratumque remedium, tametsi eodem singuli nequaquam liberarentur. *Sive igitur novissima contemplentur sæcula, seu prima, seu media, rationabiliter & pie creditur omnes homines salvos fieri Deum velle semperque voluisse: & hoc non aliunde monstratur, quam de iis beneficiis, eaque providentia Dei, quam universis generationibus communiter atque indifferenter impendit. . . . Deo autem placuit, & hanc multis tribuere, & illam a nemine submovere, ut ex utraque appareat non negatum universitati, quod collatum est portioni, sed in aliis prævaluisse gratiam, in aliis resluisse naturam, inquit explicata generali, ac speciali Dei benignitate, Auctor librorum de vocatione Gentium lib. 2. cap. 25.*

Præterea affirmo, etiam pro adultis fuisse in statu naturæ aliqua *Sacramenta*. Et quantum spectat ad sacrificia, consentiunt à Schola omnes semper extitisse; quod probat tum divina historia commemorans sacrificia Abelis, Cain, Abrahami, Melchisedeci, aliorumque; tum exterior Dei cultus, & forma visibilis religionis, in qua certis *signaculis* homines colligantur. At sacrificia, (quicquid censeant nonnulli,) nonnisi lata significatione *Sacramenta* appellantur, cum non sint signa invisibilis gratiæ, sed oblationes factæ Deo in signum supremi ejusdem domini. Ad summum *Sacramentum* fuit sacrificium Melchisedech, ut existimat Suarezius, ac censet probabile Dominicus Soto, negant tamen quamplurimi, tametsi constet fuisse symbolum, ac typum Eucharistiæ ex iis, quæ diximus lib. xxvii. cap. 7. Ratio ergo ex sacrificiis, externoque Dei cultu deprompta non videtur evincere pro statu legis naturæ existentiam *Sacramentorum*. Admittenda sunt tamen, quandoquidem etiam adulti, ac præsertim in eo statu, in quo pœnalis cæcitas grassabatur, essent ad intelligentiam invisibilium signis visibilibus excitandi, quam ob rem dictum supra instituta fuisse *Sacramenta*. Accedit quod actus fidei, & contritionis, neque in statu legis gratiæ semper ad justificationem sufficiunt absque adminiculo *Sacramentorum*: inverisimile est autem majorem tunc habuisse, quam habeant modò, vim, & efficaciam ad peccata expianda. Ceterum quænam fuerint hæc *Sacramenta*, ut supra cum Augustino dictum est, incertum penitus: nec probabilitate caret, nullam aliam habuisse institutionem, præter divinum instinctum intimè proborum virorum menti inspirantem quo signaculo fidem propriam protestarentur.

Gaspar Juenin, qui de *Sacramentis* edidit eruditum Commentarium,

tarium, opponit verba Gregorii, ac D. Thomæ producta superius, quibus asserunt in lege naturæ adultos *sola fide* iustificatos, nec pro illis aliam *virtutem* extitisse, nisi sacrificium. Eminentissimus Gotti dub. 4. paragrapho 3. Jueninum revincit pluribus D. Thomæ testimoniis, in quibus Anglicus Doctor *Sacramenta* appellat sacrificia, oblationes, & decimas. At doctissimus Cardinalis supponit sacrificia esse vera, *Sacramenta*, quod adversarius inficiabitur; cum non sint signa gratiæ, sed nostri erga Deum cultus, ac religionis. Nihil itaque respondendum arbitror, nisi quod supra explicavi, per D. Thomam in statu naturæ sufficisse *solam fidem*, quoniam præscriptum non erat determinatum signaculum, quo homines fidem protestarentur suam, ut sese explicat S. Thomas q. 6. art. 5. ubi ait: *Sicut in statu legis naturæ homines nulla lege exterius data, sed solo interiori instinctu movebantur ad Deum colendum, ita etiam ex interiori instinctu determinabatur eis, quibus rebus sensibilibus ad Dei cultum uterentur.* Sane magnus Gregorius ait, etiam parvulis *solam* tunc sufficisse *fidem*, nec tamen Juenin pro iis negat extitisse aliquod *Sacramentum*. De statu autem naturæ disputatum est hæcenus.

In lege scripta extitisse *Sacramenta* aliqua, & quidem a Deo instituta, extra controversiam positum est. Fuerunt enim tunc instituti multi ritus, ac cæremoniæ sensibiles, quibus gratia, & animarum sanctificatio præsignabatur: cujusmodi fuerunt Paschalis Agnus, inunctio Levitarum, expiationes ac lustrationes, quæ gratiam per Christum conferendam sub figurarum velamine prænuntiabant; obtinuitque eo temporis Circumcisio, de qua plura sequenti capite. *Sacramenta* quoque vetera commemorat Florentinum Concilium in Decreto Eugenii ad Armenos, & Tridentinum sess. v. can. 2. ubi agitur de differentia inter *Sacramenta* novæ legis, ac veteris. Juenin, Cardinalis Gotti, alique agunt hoc in loco de veterum *Sacramentorum* duratione: de qua nos prolixè egimus lib. xx. cap. 10. Nihil difficultatis ingerit, quomodo institui potuerint *Sacramenta*, quæ sunt peccatorum remedia, ante adventum Christi, ejusque passionem: in quantum enim erant futuri Reparatoris signa, debebant præcedere adventum ejus, nec passio Salvatoris erat *Sacramentorum* illorum causa *efficiens*, quæ effectum antecedit suum; sed causa *finalis*, quæ effectum præcedit sola intentione: gratia vero, quam Deus impertiebatur præstolantibus Redemptorem, non efficiebatur ab ipsis *Sacramentis*, sed illam impertiebatur Deus intuitu meritorum Christi, & passionis ejus futuræ; ideoque antiqui patres ejusdem gratiæ, ac redemptionis complementum tantummodo consecuti sunt, quando Christus adventit, pretium solvit, & omnem gratiam post Adæ prævaricationem collatam hominibus, teterrima morte, ac summa personæ suæ dignitate promeruit.

## C A P U T III.

*Agitur de origine Circumcisionis, & quaeritur an fuerit  
Sacramentum divinitus institutum ad delendum  
originale peccatum.*

**S**unt, qui negant circumcisionem primùm a Deo institutam, atque ab Abrahamo originem habere suam. Sanchuniathon in Theologia Phœnicum apud Eusebium Præp. Evang. lib. 1. pag. edit. Vigeri 38. ait Saturnum omnium primum sibi, & commilitonibus suis pudenda circumcidisse. Herodotus lib. 2. cap. 36. & 104. & Diodorus Siculus lib. 1. pag. 17. tradunt circumcidendi ritum ab Aegyptiis primitus institutum, inde verò ad Colchos, Arabes, Indæosque derivatum. Idem arbitratus est Celsus, qui Origeni objecit circumcisionem Judæos mutuatos fuisse ab Aegyptiis, ut scribit idem Origenes lib. adversus Celsum primo pag. 17. edit. Cantabrig. Amplexatus est sententiam eandem in Canone Chronico p. 73. Joannes Marshamus Angelus. Abrahamum primum omnium circumcisum fuisse communis opinio est; eamque adversus Herodotum propugnat cum ceteris Judæis Joseph Historicus lib. v. 111. Antiq. cap. 10. num. 3. ac libro 1. contra Apionem num. 22. Origenes cit. loco, Eusebius Præp. Evang. lib. vii. pag. 309. Patres paullo post laudandi, Interpretes omnes Catholici, ac Protestantes. Singillatim verò de hoc argumento pertrahant Salianus ad annum M. 2179. num. 8. & 2138. num. 20. Natalis Alex. dissert. 6. in 3. M. ætatem, Augustinus Calmet dissert. 1. pag. 17. Honoratus a S. Maria Tom. 2. lib. 3. dis. 3. & in Opere de Festis D. N. J. Christi edito eodem anno, quo ad summum Ecclesiæ regimen divinitus eversus est, Prosper Cardinalis Lambertini, nunc BENEDICTUS XIV. Addo Richardum Montacretium Originum Ecclesiasticarum P. prima n. 49. & 50. & Abrahamum Scultetum lib. 1. Exercit. Evangel. cap. 13. Problematicè hac de re disputat Joannes Spencerus de legibus Hebræorum lib. 1. cap. 3. sect. 4.

E Schola Theologi nulla de Circumcisionis institutione, & origine permoti difficultate, ac supponentes primum mortalium omnium circumcisum Abrahamum jubente Domino, inquirunt an circumcisio instituta fuerit tanquam signum secernendi hebraicum populum a nationibus ceteris, num vero tanquam gratiæ symbolum, vel *Sacramentum* ad delendam maculam originarii reatus. Propugnant priorem sententiam, ac tenent circumcisionem nequaquam institutam ad peccatum originale delendum, Bellarminus lib. 2. de Sacramentis in Gen. cap. 17. Vasquez 12. disput. 184. cap. 3. & ne antiquiores recessseam, L'Herminier de Peccato Originali, & de Sacram. in gen. Tour-

Tournely q. 111. de Sacramen. art. 3. Natalis Alex. in Hist. vet. Test. tom. 1. pag. 163. Angelus Maria Canali lib. 2. de Sacram. q. 1. Institutam tamen circumcissionem in remedium originalis peccati propugnat S. Thomas 3. p. q. 38. art. 3. ad 3. & q. 70. art. 4. & cum illustri discipulorum ejus caterva Gonet Tom. v. disp. 5. & Cardinalis Gotti q. 4. de effie. Sacrament. dub. 5. §. 3. Subscribunt huic sententiæ cum Scholæ suæ principe Mastrius disp. 1. q. 2. art. 3. Brancatus disp. 5. art. 1. Frassen disput. Proem. q. 4. & cum nostri Ordinis universis Theologis, Estius in 1v. dist. 1. §. 29. Du-Hamellius de Baptismo cap. ult. Juenin de Baptismo q. 1. & memoratus BENEDICTUS XIV. qui singulis opinionibus recitatis num. xii. doctrinam divi Thomæ tandem amplectitur. Tanta nihilominus sententiarum diversitas videtur potius spectare ad efficaciam gratiæ, quàm ad institutionem, & necessitatem circumcissionis: nam qui negant fuisse circumcissionem institutam ad delendum peccatum, fatentur tamen fuisse *Sacramentum*, quatenus circumcissione ipsa, tanquam signo, filii Abraham protestabantur fidem suam in venturum Reparatorem, atque ita non vi circumcissionis, sed fidei justificabantur. Qui autem tenent circumcissionem fuisse originalis culpæ remedium, non eodem tramite incedunt, sed quidam contendunt contulisse gratiam *ex opere operato*, alii id negant. Quare nonnulli utramque sententiam ad concordiam revocare student, asserentes circumcissionem quidem ex se institutam non esse in peccati medelam, sed ad filios Abrahæ a gentibus exteris secernendos, parentes autem illam in parvulis adhibuisse, ut olim in statu legis naturæ signum quodlibet fidei protestativum; in quam sententiam descendit tandem Suarezius disp. v. sect. 1. in q. 61. tertiæ partis, & Cardinalis de Lugo disput. v. de Sacram. in gen. sect. 3. Nos ergo investigabimus hoc in loco, num revera Circumcisio in remedium originalis peccati sit instituta; an vero istud deleat suamet efficacia, erit postmodum disquirendum.

PROPOSITIO I. Abrahamum omnium primum circumcisum, certa argumenta commonstrant.

Ac primum argumentum promitur ex Scripturis: nam Genes. xviii. 7. Deus Abrahamo circumcissionem præcepit in signam fœderis, dicens, *Et statuiam pactum meum inter me & te, & inter semen tuum post te in generationibus tuis fœdere sempiterno: ut sis Deus tuus, & seminis tui post te*. Circumcisio itaque signum erat a Deo institutum, quo in Abrahami femine divinum fœdus dignosceretur. Respondet autem Spenceus pag. 77. circumcissionem quidem, quatenus fœderis divini signum, a Deo habuisse principium; at non quatenus est stigma corporeum, medium fecunditatis; aut morbi antidotum. Sed facillimè responsio hæc refutatur; cum enim signum fœderis fecernat fœderatos ab aliis, ac sit signaculum religionis, quo in unum nomen plurimi coadunantur; si Deus pro signo fœderis instituisse *signaculum*, quod

quod alii vel ad puritatis speciem, vel ad sanitatem ferebant in corpore, nec filii Abraham Deo fœderati visibili signo secreti fuisset a gentibus, neque religio in familia Abrahami persistens sensibili Sacramento ab idololatrarum cœtu fuisset distincta. Præterea idem Spencerus non aliam discriminis animalium ciborumque causam in veteri lege agnoscit, nisi remedium idololatriæ; quod pariter affirmat de Sacrorum victimis, certisque locis, atque temporibus, demonstrans, quomodo iis omnibus Dei populus a superstitione arceretur, diversas adhibens cœremonias, diversamque vitæ rationem. Videatur Spenceri de legibus Hebræorum ritualibus liber 1. cap. 5. & 6. Cur ergo pari ratione non existimat in obfignanda Abrahami progænie aliam tesseram a Deo institutam ab ea, qua etiam superstitioni uterentur? Ad hæc idem Spencerus de Circumcisione sect. 6. contendit hanc plurimum valuisse ad idololatriam coercendam, cum Judæi etiam antiqui ad Gentilium partes transcentes omni arte studerent præputia reducere, & abolere circumcisionis vestigia; nec matrimonia cum alienigenis inirent, quod nefas esset commiseri cum incircumcisis populum Dei hoc peculiari charactere signatum: atque id a præscæ ætate, ut colligitur ex rebus gestis a filiis Jacob cum Sichimitis, de quibus legendum est caput tricesimumquartum Geneseos. Insuper non tantum Philisthim in sacris litteris appellantur *incircumcisi*, ut visum Montacutio pag. 57., verum etiam ethnici ferme omnes: cum Exodi xii. præcipiatur circumcidendos servos emptitios, advenas, & mercenarios, nec non peregrinos omnes, qui in Hebræorum coloniam ad celebrandum Phasæ Domini transire vellent, quod præcepit Dominus, quando exierunt filii Israel de Aegypto: & Jeremias cap. ix. 26. ita loquatur, *Omnes gentes habent præputium, omnis autem domus Israel incircumcisi sunt corde*. Et quamquam nonnulli ethnici, ut innuit ibidem Propheta, ex Abrahami posteris derivati, & etiam Aegyptii, inter quos Hebræi diu commorati fuerant, præputium postea circumciderint, id nullatenus agere potuerunt ante Abrahamum, cui circumcisio præscripta fuit in signum, quo secerneretur a gentibus. Adhæc cum jam Abraham cum Sarai uxore sua, longe ante initum cum Deo fœdus, in Aegyptum descendisset, Genes. xii. 10. vero nequaquam est simile, accepisse in fœderis signum id, quod novcrat a superstitionisima gente usurpari. Insuper cum præcepisset Deus, ut circumciderentur Israelitæ nati in deserto, Josue v. 9. ait: *Hodie abstuli a vobis opprobrium Aegypti*. Circumcisione itaque præstitit Deus, ne ulterius haberentur tanquam Aegyptiorum mancipia, ne viderentur nati in domo servitutis, ne fœderis cum Abrahamo initi essent expertes; sed oblitteratæ cum præcisione præputii Aegyptiacæ nationis maculâ dignoscerentur filii Abraham, & terræ promissionis hæredes: quod ob parentum suorum incredulitatem nondum fuerant consecuti. At cir-

circumcisio non fuisset filiorum Abrahamæ signaculum, pristinae captivitatis solutio, & ablatio opprobrii Aegyptiorum, si & hi, atque inter eos commorantes captivi circumcidissent præputia. Me non latet respondere Marshamum, dictum a Domino. *Abstuli opprobrium Aegypti a vobis*, quoniam tam Aegyptiis, quam Judæis opprobrio erant incircumcisi. Sed fallitur. Primum enim eo loci refertur Hebraeos per quadraginta annos non fuisse circumcisos, *dones consumarentur qui non audierant vocem Domini, & quibus antea juraverat ut non ostenderet eis terram lacte, & melle manantem*. Per circumcisionem ergo probum istud, idest, Aegyptiacæ servitutis tessera, ablatum est, signatis iterum filiis Abraham, & ab impiorum cœtu segregatis. Deinde phrasi hebraica, מִצְרַיִם הָרְפָּת, *opprobrium Aegypti*, significat id, quod, cum sit in consuetudine apud Aegyptios, ab Judæis usurpatum est illis nota probri atque dedecoris; ut constat ex libro Exodi vii. 26. ubi pecudes, quas Aegyptii colunt tanquam numina, hebræi autem mactant & immolant, appellantur מִצְרַיִם הוֹצֵאת, *abominationes Aegyptiorum*. Præputium ergo dictum est *opprobrium Aegypti*, non quod incircumcisi Aegyptiis probro essent, sed quoniam esse incircumcisum, ut erant Aegyptii tunc temporis, opprobrium erat in filiis Israel. Vide Genesis xxxiv. 14.

Alterum argumentum petitur ex profanorum Scriptorum, ac Patrum auctoritate. Ac primo Iosephus lib. vii. Antiqu. cap. 10. num. 3. Herodotum refellit scribentem Phœnices, & Syros, qui sunt in Palæstina, didicisse ab Aegyptiis circumcisionem vicilium, affirmatque tanquam rem omnibus compertam, nullos alios in Palæstina circumcidi, nisi Judæos: *Ceterum*, inquit, *constat quod nulli alii circumcidantur in Palæstina Syri, praterquam nos. Sed de his singuli ita loquantur, prout ipsis visum fuerit*. Libro autem primo cap. x. num. 5. ait, præcepisse Deum Abrahamo, ut pudenda circumcideret, *quod molles genus ipsius cum aliis commisceri*. Justinus in Dialogo cum Tryphone pag. edit. Sonni 236. *Abraham*, inquit, *primus circumcisionem carnis accepit*. Origenes in 1. contra Celsum p. 17. ait: *Post hæc circumcisionem pudendorum non reprehendens Celsus Judæis usitatam, ait eam mutuatos ab Aegyptiis, malens Aegyptiis credere, quam Moysi, qui refert primum mortalium circumcissum Abrahamum*. Joannes Chryso. Hom. xxxix. in Gen. pag. 566. scribit Abrahamum ejusque natos jubente Deo circumcisos, *ne gentibus se commiscerent in Aegypto, ut esset assignatus & sibi segregatus populus, ut Patriarchæ semen impermixtum maneret*. Idem affirmant Patres alii, inferius laudandi, ubi de causis institutæ Circumcisionis disputabo. Si ergo apud Aegyptios extitisset circumcisionis consuetudo; quo pacto fuisset illa repagulum ne Israelitæ iisdem Aegyptiis commiscerentur? quomodo ipsius circumcisionis notâ Dei populus permanisset segrega-

tus.

tus a gentibus? qua ratione semen Abrahami servatum esset impermixtum? Futilis est responsio Spenceri pag. 78. non eo præcipue consilio institutam circumcissionem, ut filii Abraham segregarentur a gentibus, tunc enim distinctionis notam Judæi gestassent in fronte, aut in alia visibili parte corporis, non in ea, quam insitus pudor jubet esse velandam. Addit modum, tempus, & ritus latum discrimen inducere inter circumcissionem Judaicam, & Aegyptiam, scribente Origene non eandem esse Judæis, quæ Colchis, aut Aegyptiis, circumcissionis causam, ac proinde nec eandem circumcissionem: *Propositum enim, & lex, & voluntas circumcisci facit, ut sit aliud negotium*. Ita contra Celsum lib. 5. p. 263. At Spencerus absque labore ullo revincitur. Cur enim circumcisio facta fuerit in occulta corporis parte, ostendit Doctor præstantissimus Augustinus serm. 160. num. 6. dicens: *Signum veteris Testamenti circumcisio in latenti carne. Signum novi Testamenti crux in libera fronte. Ibi enim occultatio est, hic revelatio: illud est sub velamine, hoc in facie*; & lib. xxv. adversus Faustum, cap. 2. *Isti autem, (Abrahamo) signum in parte corporis congrua divinitus datum, quo carnis exspoliatio figurata est*. Quod vtro ex Origene Spencerus assert, non alio auctore, quam Spencer ipso, retundam. Demonstravit enim sect. 2. præcedenti, circumcissionem non solum fuisse *signum distinctivum*, quo populus Israel discerneretur a reliquis mundi gentibus, verum etiam *signum religionis initiativum*, quo homines Judaicæ stirpis profitebantur se unius summi Numinis cultui, non gentium superstitionibus, esse devotos. Ubi ergo ait Origenes Colchorum, aut Aegyptiorum circumcissionem ex proposito, lege, & voluntate circumcisci discrepare a Judaica, spectat circumcissionem, ut signum religionis initiativum; non ut distinctivum Judaici populi, five, ut idem Origenes inquit, *circumcisorum dogmata*, non impressum in pudendis *signaculum*: exemplumque proferet similis sacrificii, quod non eidem a diversæ religionis sacrificantibus immolatur, & nominis *justitiæ*, quod aliam apud Epicurum rationem habet, aliam apud Stoicos, aliam apud Platonicos. Igitur si Spencerus fatetur circumcissionem Judaicam inter filios Abraham, & Aegyptios posuisse discrimen, non tantum religionis, & dogmatis, quantum nationis ac seminis; concedat necessum est, Aegyptios olim non habuisse in carne *signaculum* Judæorum, quemadmodum in religionem non profitebantur illorum *dogmata*. Accedit quod Origenes ibidem ait fortasse Colchos, & Aegyptios juxta Hebræorum consuetudinem postea circumcisos, *propter aliquem infestum Judæorum genti angelum, qui posset non circumcisos ledere, circumcisos non item: quod colligi potest ex libro Exodi, ubi angelus ante circumcissionem Eliazari contra Moysen valuit: quo circumciso irrita facta est illius potentia*.

Argumentum tertium erit demonstratio erroris, in quem Herodotus,



dotus ; & Diodorus Siculus impegunt : nam horum testimonio innititur Joan. Marshamus . Herodotus itaque lib. 2. cap. 36. pag. 103. scribit : *Virilia alii talia relinquant qualia natura sunt, præter eos qui ab istis didicerunt : Aegyptiis circumcidunt .* Et cap. 104. pag. 127. *Soli omnium hominum Colchæ & Aegyptii, & Aethiopes ab initio statim pudenda circumcidunt . Nam & Phænices & Syrii, qui sunt in Palaestina, didicisse id ab Aegyptiis & ipsi consentunt .* Diodorus vero lib. 1. pag. 17. de Colchis, Syrisque ait , *per antiquam traditionem in usu his gentibus esse, ut pueros apud se natos ritu ab Aegyptiis derivato circumcidant .* Verum facillime revincuntur falsitatis . Primo namque æquum est , ut Mosis magis , quam Herodoto fidem præbeamus , cum is floruerit temporibus Darii Hystaspidis , & Xerxis circa annum mundi 3500. jam nato Thucydide , qui illum in Olympiis historias suas recitantem audiens fertur lacrymas profudisse . Deinde Artapanus apud Eusebium lib. 1x. Præp. Evang. cap. 27. pag. 433. testatur *Aethiopes, tametsi hostes, tam propenso tamen in Moysen animo fuisse, ut ipsius quoque Circumcisionis ab eo ritum acciperent : ideoque nec ab initio circumcisi sunt, neque id moris acceperunt ab Aegyptiis, ut Herodotus comminiscitur .* Præterea non caret probabilitate , Aegyptiorum complures circumcidisse pudenda , non antiquo gentis instituto , sed timore angeli , quem circumcisis audierant infestum , prout ex Origene paulo supra laudato conjiciunt præclari viri Alexander Natalis , & Calmet . Ad hæc Diodorus ait accepisse Circumcisionem ab Aegyptiis etiam Troglodytas , lib. 111. pag. 115. quo loco utitur quoque Marshamus , ut originem Circumcisionis vindicet Aegyptiis . Atqui Troglodytæ non aliunde circumcidendi ritum habuere , quam a nepotibus Abrahamæ : cum enim ipse Diodorus ibidem scribat Troglodytas esse , quos *Græci Nomades vocant* , Arabes scilicet , & incolentes Maris rubri vicinias ; quemadmodum Marshamus negare non audebit in Troglodytarum , Arabumque regiones a filiis , ac nepotibus Abrahami deductas fuisse colonias ; ita fateri debet non ab Aegyptiis , sed a posteris Abrahami Troglodytas , Arabes , ceterasque nationes Circumcisionem accepisse . Atque id ex eo confirmatur , quod Arabes non octavo die pueros circumcidunt , sed tertio decimo ætatis anno : nam *Ismaelus princeps eorum gentis, Abramo à concubina natus, ea ætate est circumcissus* , inquit Joseph Flavius lib. 1. antiq. cap. x11. num. 2. & Origenes cap. 23. Philocaliæ pag. 77. cohærenter ad Gen. xx11. 25. Insuper Philistiim incircumcisos fuisse constat ex Judicum xiv. 3. & ex 1. Regum xiv. 6. Originem autem Philistiim trahunt à Chasluim filiis Mizraim , ideoque ex Aegyptiis , ex Genes. x. 4. Si ergo Aegyptii antiquitus circumcidebantur , cur non circumcisi Philistiim , ex Chasluim trahentes genus suum ? Mitto quod Bochartus lib. 1v. *Pbaleg* , & Natalis Alex. asserunt Chasluim esse Colchos ; ex quo sequetur

Tv. VI.

E

retur

retur in hoc quoque mentiri Herodotum & Diodorum, quod scripserint Colchos ab initio, & antiqua traditione circumcisos: de origine enim Colchorum non idem sentiunt eruditi omnes. Insuper apud Aegyptios non universi sese stata lege subjecere circumcisioni, sed Sacerdotes duntaxat: alii verò tam viri, quam mulieres nonnisi prohibito, & causa abscindendæ cutis turpiter excrescentis, annis quoque pubertatis exactis, & juxta Ambrosium lib. 2. de Abraham, cap. xi. num. 78., anno quartodecimo ætatis suæ. Refert enim S. Clemens Alexandrinus lib. 1. Strom. pag. edit. Morelli 302. Pythagoram iecirco fuisse circumcicum, *ut adyta ingredients Aegyptiorum mysticam discerret Philosophiam*; unde apparet apud Aegyptios præscripto legis circumcisos solum initiandos, & sacrorum ritibus imbuendos. Hinc ortam consuetudinem illam, quod scirent Deum familiarius, quam nationibus reliquis, sapientiam suam patefacere circumcisis, ut viderant, aut a majoribus acceperant, contigisse in Abrahamo, Moyse, & Ioseph, probat ex Origene in Epistolam ad Romanos, in Conjectaneis de Dodone cap. 6. Triglandius. Ad hæc S. Thomas 1. 2. q. 102. art. 5. ad 2. inter causas institutæ circumcisionis assert *sugillationem sacrorum Veneris & Priapi, in quibus illa pars corporis honorabatur*. Et quidem ipse Diodorus Siculus lib. 1. pag. 12. scribit a Typhone in 26. frustra Osiride dilancinato, Isidem, cum non posset pudenda illius invenire, effictam virilium Osiridis effigiem in templis adorandam locasse, unde ad Græcos primum, deinde ad gentes alias, Phallorum, Orgiorumque sacra turpissima pervenerunt. In carne ergo præputii mutilanda admonuit Deus detestandam impurissimam Aegyptiorum superstitionem, præcisis in Dei populo iis corporis membris, quæ Aegyptii in memoriam Osiridis venerabantur, & quæ idolorum Mystæ in suis initiationibus præcidebant. Coluerunt quoque Aegyptii Cynocephalum, sive animal *Canicipite*, de quo S. Pater Augustinus lib. 2. de Civit. Dei cap. 14. & lib. vi. cap. 12. & Tertull. Apolog. cap. 6. quod cum fuerit Osiridis simulacrum, commentis sunt quidam esse animal, quod prodit ex materno utero circumcicum; ideoque Sacerdotes Aegyptii ad honestatem quamdam, & similitudinem profani numinis affectandam, veretra sibi circumcidere. Cum igitur soli sacris mysteriis initiati apud Aegyptios circumcisione uterentur, mares reliqui, ac feminae neque omnes, neque cogente lege, neque die post nativitatem octava, decepti sunt Herodotus, & Diodorus, qui asseruerunt Judæos, ceterosque Palæstinos, pueros apud se natos circumcidere, *rita ab Aegyptiis derivato*.

Postremum argumentum sit, quod licet post Abrahami tempora gentes plurimæ adhibuerint circumcisionem, ut colligitur ex Jeremiæ 1x. 26. cæ tantum ab initio præputia secuerunt, quæ ex Abrahamo per Ismaelem, & Ceturæ filios derivarunt, ut Idumæi, ita dicti  
ab

ab Esavo ; quem etiam Edom appellarunt , vel *rafum* , & eorum pars Homoritæ , quos circumcisos scribit h. xxx. 30. Epiphanius : Ismaelitæ ab Ismaele filio Agar , atque posterioribus temporibus illinc exorti Turcæ , & Saraceni , de quibus produximus illustrem locum Josephi : Aethiopes , & Afrorum permulti , quos è Cethuræ filios progenitos probant Alexandri Polyistoris testimonio Josephus lib. 1. Antiq. cap. 16. nunc 15. pag. 44. & Eusebius Præp. Evang. lib. 1x. cap. 20. pag. 422. Colchi etiam , ( si damus Herodoto ab initio circumcisos ) sunt ex decem tribubus , quas transtulit Salmanasar , ut Grotius ait in Annot. ad lib. 1. de Verit. Rel. Christ. num. 68. & si cum Bocharto asserantur Chasluim , uti Philisthiim , dictum supra non circumcisos . Aethiopes ex Cethuræ posteris natos evincit Grotius ibid. num. 75. Quotquot ergo mortalium recepere circumcisionem , vel sunt ex Abrahami posteritate , vel ab hac edocti leges , & instituta , pro libidine tamen & veritate religionum a prisco ritu immutata. Aegyptiis circumcisionem tradidisse Aethiopes , ipse Herodotus in Euterpe cap. 104. pag. 127. negare non audet , sed ait : *Aegyptii verò atque Aethiopes , non quo dicere utri ab utris didicerint .* At in Aegypto commoratos olim patriarchas , quod Herodotus ignoravit , satis constat . Moyfi Aegyptios referre acceptas artes complures , ipsiusque philosophiæ inventionem , atque illum dicere Orphei magistrum , divinumque Mercurium , tradit ex Artapano lib. 1x. Præp. cap. 27. pag. 432. eruditissimus Cæsariensis . Si apud Americanos , & novi orbis incolæ circumcisio , ut ferunt , inolevit ; illuc potuisse appellere Abrahami posteros , diximus disputantes adversus Præadamitas lib. x11. cap. 1. Eo quoque profectas naves Salomonis haud improbabiler scribit in Tabulis sacris Geographicis Augustinensis Lubinus , affirmans regionem Tharsis , de qua legimus in Pl. xlv11. 8. *In spiritu vehementi conteres naves Tharsis* , esse regnum Peruvianum ; in quo & magna invenitur auri , argenticque copia , quam fuisse in *Tharsis* ait Jeremias x. 9. & fuerunt certis annorum spatiis venti adeo vehementes , ut naves etiam in portibus conterant ac disperdant . Circumcisionem itaque adhibuit primus omnium Abrahamus , eamque ab ejus posteris acceperunt gentes reliquæ ; quamvis illam non religionis causa , neque urgente præcepto usurpaverint , sed vel ad evitandum morbi genus , quod *ordpuna* , aut *carbunculum* vocitant , & quod excruciat solos incircumcisos ; vel ad profanam quamdam sacerdotum initiationem , vel ob fecunditatem , corporeamque munditiem ; cum apud Judæos universos tanta religione servata sit , ut illos ad contemptum Gentes semper *Kerpos* , *Apellasque* appellarint , & ipsi vicissim homines ceteros , *incircumcisos* . Postremo ad ebd Judæorum propria est circumcisio , ut veterum Imperatorum legibus eis tantum fuerit permissa , interdicta autem ceteris omnibus , etiam Samaritanis , ut 2. lib. contra Celsum

pag. 68. scribit Origenes, confirmatque ex Modestino J. Consulto in suis ad Epiphanium animadversionibus pag. 400. vir literatissimus Dionysius Petavius. Atque hæc adversus Marshamum de origine Circumcisionis; quam a Deo præscriptam Abrahamo narrat historia Genesios, & apud Eusebium lib. ix. Præp. Evang. cap. 22. pag. 428. Theodotus poeta Phœnicus hæc versibus a Vigoro latine redditus:

*Qui magnum patriis Abrahamum eduxit ab oris,  
Cælitus hunc tota jussit cum stirpe recurvo  
Glande sub extrema, præputia demere ferro:  
Paruit, atque Dei verbis immotus in hæsit.*

PROPOSITIO II. Negari non potest, quin circumcisio fuerit data in signum distinctivum seminis Abrahamæ a reliquis mundi gentibus.

Id & profani Scriptores, & Ecclesiastici Patres unanimi consensu asserunt. Josephus lib. i. Antiq. cap. x. num. 5. *Præcepit*, inquit, Deus Abramo, quod nollet genus ipsius cum aliis commisceri, ut pendenda circumciderent, idque octavo die a nativitate. Tacitus lib. v. Histor. paulo post initium de Judæis scribit: *Circumcidere genitalia institueret, ut diversitate noscantur*. Justinus in Dialogo cum Tryphone pag. 234. at: *Nam circumcisio, quam ab Abrahamo accepistis secundum carnem, in signum notamque data est, ut sitis ab aliis gentibus, & a nobis discreti. Non enim alia nota est, per quam præ ceteris mortalibus agnoscamini, quam ista in carne vestra circumcisio*. Irenæus lib. iii. adv. Hæres. cap. 12. num. 11. pag. 198. inquit, *Semen Abrahamæ servatum manifeste per circumcisionem*: & lib. iv. cap. 16. num. 1. pag. 246. *Quoniam autem & circumcisionem non quasi consummatricem justitiæ, sed in signo eam dedit Deus, ut cognoscibile perseveret genus Abrahamæ, ex ipsa scriptura discimus*. Tertullianus in 3. contra Judæos ad hunc modum de Abrahamo loquitur: *Acceperat enim circumcisionem, sed quæ esset in signum temporis illius, non in salutis prærogativam*. Joannes Chrysostomus Hom. xxxix. in Gen. pag. 566. de causa institutæ Circumcisionis ait: *Hoc injunxit, non alterius cujuscumque gratia, quam ut esset assignatus, sibi que segregatus populus*: & infra, *Vide sapientiam Domini, quomodo cum sciret imperfectas, & parvas eorum mentes futuras, signum circumcisionis quasi frantum quoddam imposuit, ad indomitos eorum impetus colibendos*. Addit Chrysostomus, *ut sua gente contenti essent, & patriarchæ semen impermixtum maneret, ut sic & promissa in eis compleri possent*. Ambrosius Epist. 74. num. 4. pag. 1081. Tom. 2. & lib. 11. de Abraham cap. xi. num. 70. Tom. 1. pag. 347. appellat Circumcisionem *signum carnis sensibile*. Hieronymus lib. 1. in Epist. ad Galatas, pag. 252. Tom. iv. ita eloquenter, ac more suo, *Quia enim ex semine ejus erat Christus oriundus, in quo universarum gentium* suc-

*fueraſt benediſtio repromiſſa; & ab Abraham uſque ad Chriſtum multa erant ſacula tranſitura, providens Deus ne ſoboles dilecti Abraham ceteris nationibus miſcerentur, & paulatim familia ejus fieret incerta, gregem Iſraeliticum quodam circumciſionis cauterio denotaviſſet: ut vi-ventes inter Aegyptios, inter Aſſyrios, Babylonios, atque Chaldaeos, hoc ſignaculo diſtinguerentur.*

Collegimus accuratè hæc teſtimonia, quoniam ex his Scholaſticorum plures putant evidentiffime demonſtrari, circumciſionem in ſignum diſtinctivum ſeminis, non ad delendum originale peccatum fuiſſe inſtitutam. Cujus ſane conſecutionis vim non pereipio; cum enim Sacramenta, quæ gratiam aut ſignificant, aut conferunt, ſint etiam ſignacula religionis, & Eccleſiam ab infidelium cœtu ſe-  
junt; quid prohibet, ne aſſeramus idem ſignum ſenſibile ſegreſſe ab idololatriæ progeniem Abrahami Deo vero devotam, ac ſimul gratiam aut ſuamet efficacia, aut virtute fidei, notatiſ ipſo viſibili ſigno contuliſſe? Quare S. Thomas cit. art. 5. q. cii. 1. 2. ſcribens Abrahamum accepiſſe circumciſionem, quoniam omnium primus exiens de domo ſua *ſe ab infidelibus ſeparaviſſet*, docet, etiam inſtitutam ad concupiſcentiam frenandam, & in ſignum ablationis culpæ & pœnæ, *quæ in nos per carnalem originem ex peccato primi parentis derivat*. Atque hæc eſt Auguſtini ſententia poſt eam, quæ modò conſequitur, propoſitionem, ad trutinam revocanda.

PROPOSITIO III. Alucinantur, qui cenſent circumciſionem duntaxat ad ſecernendum ſemen Abraham ab aliis gentibus fuiſſe inſtitutam.

Enimvero negari in primis non poteſt, quin circumciſio fuerit ſignum commemorativum ſæderis initi Deum inter, ac ſemen Abraham, & ſignaculum juſtitie fidei, *quam habuit in præputio*: cujus fidei gratia, *credens in ſpem, contra ſpem*, futurus erat pater multarum gentium, effœta quamvis ætate, & vetulæ uxoris maritus; ideoque circumciſam progeniem Abraham ad hanc fidem excitandam, ad ſe devovendam cultui ſupremi Numinis, & ad promcrendam paternam benediſtionem. Sat eſt ad hoc percipiendum, in cap. xvi. Geneſis, & in iv. Paulinæ ad Romanos Epiſtolæ oculos conjicere. Hinc per circumciſionem ita in unum populum Iſraelitæ coaleſcebant, ut ſimul religioni ſe manciparent, ac fidem proteſtarentur, eratque proinde præputii mutilatio non tam ſignum politicum, quam religioſum. Hinc Joſeph Flavius in vita ſua l. om. 2. num. 23. pag. 11. narrat, cum Judæi vellent per vim Trachonitas quosdam circumcidere, id ſe noluiſſe, *quod hominem quemque oportet ex animi ſui voluntate Deum colere*. Erat ergo circumciſio ſignaculum commemorativum ſæderis, proteſtativum fidei, initiativum religionis. In hoc verò nulla eſſe poteſt, ut arbitror, difficultas.

Præ-

Præterea circumcisio erat signum commonens, ut carnis voluptates frenentur, iccirco in illa parte corporis impressum, quæ vehementius titillat, ut inquit citatis in locis Augustinus, & Thomas. Vidit id etiam Judæorum disertissimus Philo scribens de Circumcisione pag. edit. Antwerp. 557. inter alias marem circumcidendi causas esse *excisionem voluptatum, quæ mentem fascinant. Quoniam inter omnium voluptatum illecebras principatum tenet viri congressus cum muliere, instrumentum ejus legistores mutilari jusserunt, innuendo refecandas voluptates superfluas, non unius tantum hujus generis, sed omnes per unam subindicantes.* Hinc est, quod consuetudo divinarum Scripturarum phrasi, *circumcisio* dicitur etiam turpium voluptatum cohibitio, Deut. x. 16. xxx. 6. Jerem. iv. 4. ad Rom. 11. 29. Videatur Cyprianus lib. 1. Testimon. adversus Judæos cap. vii. pag. 536. Rectè itaque Augustinus Tract. xxx. in Joan. num. 5. *Significat ergo ista circumcisio expoliationem a corde cupiditatum carnalium. Non ergo sine causa data est, & in eo membro jussa fieri: quoniam per illud membrum procreatur creatura mortalium.* Similia docet S. Pater lib. 11. de nupt. & Conc. cap. xi. num. 24. & lib. xvi. contra Faustum cap. 29.

Ad hæc circumcisionem fuisse signum baptismatis, regenerationis, & etiam immortalitatis prænuntiativum, non uno in loco demonstrat sapientissimus Augustinus. Nam adversus Julianum lib. vi. cap. 7. num. 18. id asserit, & ex verbis Pauli ad Colossenses 11. 10. ita commonstrat: *Sacramentum circumcisionis in figura præcessisse baptismatis, quis vel mediocriter sacris literis eruditus ignoret; cum apertissime de Christo dicat Apostolus, Qui est caput omnis principatus & potestatis, in quo etiam circumcisi estis circumcissione non manufacta, in expoliatione corporis carnis, in circumcissione Christi, consepulti ei in baptismo, in quo & consurrexistis per fidem operationis Dei, qui suscitavit illum a mortuis, & vos cum essetis mortui in delictis, & præputio carnis vestra, vivificavit cum illo, donans nobis omnia delicta? Hujus ergo circumcisionis non manufacta, quæ nunc fit in Christo, similitudo præmissa est illa circumcisio manufacta, quæ data est Abraham.* Brevi lib. 2. de Anima, & ejus origine cap. xi. num. 15. *Circumcisio quippe fuit illius temporis sacramentum, quod præfigurabat nostri temporis baptismum.* Sententiam hanc non esse Augustini peculiarem, sed Patribus communem, facili ratione demonstrabo. Justinus enim pag. 260. cum Tryphone disputans inquit: *Porro præceptum circumcisionis octava die omnino circumcidere jubens infantes natos, nota erat vera circumcisionis, quæ circumcisi sumus ab errore & pravitate, per eum qui a mortuis resurrexit una sabbatorum die Jesum Christum Dominum nostrum.* Auctor Quæst. ad Orthodoxos inter Julini opera pag. 458. q. 102. *Circumcidimur, inquit, & nos circum-*  
cissione

*cisione Christi per baptismum, exuentes Adamum, per quem peccatores facti mortui eramus, & induentes Christum, per quem iustificati resurreximus a mortuis. In quo, ait Apostolus, circumcisi estis circumcissione, qua fit sine manibus, dum exuistis corpus vestrum. Irenæus lib. iv. adversus hæres. cap. 16. aliàs 30. num. 1. ait: In signo ergo data sunt hæc: non autem siue symbolo erant signa, idest, siue argumento, neque otiosa, tanquam qua a sapiente artifice darentur; sed secundum carnem circumcisio circumcisionem significabat spiritalem. Etenim nos, ait Apostolus, circumcisi sumus circumcissione non manu facta. Auctor opusculi de Sabbato & Circumcis. quod circumfertur sub Athanasii nomine, 2. p. Tom. 2. pag. 58. ait: Ideo enim octavo die circumcidi lex iussit, & mandatum erat numquam violandum, quo significabatur post septimam diem omnium fore regenerationem. Nihil enim aliud circumcisio indicabat, quam nostram nos exuere naturam: & productis Apostoli verbis ad Coloss. addit: Nam exspoliationis per baptismum figura erat circumcisio, quam in illis membris fieri præcepit, quibus corpus generatur; ut qui circumcidebantur, adverterent illud esse exuenda vetustatis signum. Abraham enim cum credidisset, accepit circumcisionem, qua signum erat regenerationis per baptismum. Cyprianus Martyr Epist. 59. ad Fidum pag. 212. Nam quod in carnali circumcissione, inquit, octavus dies observabatur, sacramentum est in umbra atque in imagine ante præmissum, sed veniente Christo veritate completum. Nam quia octavus dies, idest, post sabbatum primus dies; futurus erat quo Dominus resurgeret, & nos vivificaret, & circumcisionem nobis spiritalem daret, hic dies octavus, idest, post sabbatum primus & Dominicus præcessit in imagine. Loquitur eodem prorsus modo Auctor de Cardinalib. operibus Christi in Appendice Operum Cypriani pag. 75. Ambrosius denique lib. 2. de Abraham cap. xi. num. 79. scribit, in circumcisis altiori interpretatione illud pandi, quod si mens purgata & circumcisa sit, exuta superfluis voluptatibus & cogitationibus restringit animam ad sui castimoniam, purisque sensibus infusam bonorum facit partum generatricem; mox proximo num. 79. Octavo autem die, inquit, circumcidi puerum lex jubet: mystico utique præcepto; quia ipse est resurrectionis dies; paucisque interjectis causam reddens, cur una cum Abrahamo circumcidendi forent vernaculi, emptitii, & alienigenæ, inquit: Et domesticus, & alienigena, & justus, & peccator circumcidatur remissione peccatorum, ut peccatum non operetur amplius, quia nemo ascendit in regnum cælorum, nisi per Sacramentum baptismatis.*

Atque ex his propositio perspicue demonstratur. Non est enim signum duntaxat unius populi distinctivum, quod signum est fœderis cum Deo initii, quod monet sensum illecebras comprimendas, quod baptismi regenerationem, Christi gratiam, & spiritus nativita-

tem

tem prænuntiat. Id verò convenire Circumcisioni Ecclesiæ Patrès disertissime affirmant. Circumcisio itaque non fuit signum tantùm hebraici populi distinctivum. Hinc colliges, ex Patrum antiquorum sententia circumcisionem posse duplici modo considerari: primo, quatenus est signaculum in carne impressum, & hoc pacto est tessera feminis Abrahæ, seu signum populi distinctivum; secundo, quatenus est symbolum regenerationis, atque hoc sensu est veteris legis sacramentum: unde meridiana luce perspicuum est, Scholasticos, qui testimoniis Patrum præcedenti propositione productis conantur probare Circumcisionem institutam non esse ad delendum peccatum, & maximum Ecclesiæ doctorem Augustinum antiquioribus adversari; Patrum sensa non fuisse affectos, in signo carnali religionis signaculum & gratiæ symbolum non advertisse, & commentos summam Augustini ab aliis Patribus, ubi nulla prorsus est, discrepantiam. Sed ad reliqua procedendum.

PROPOSITIO IV. Sententia affirmans circumcisionem fuisse institutam ad peccatum originale delendum, non est ab Augustino primum excogitata.

Addo theorema istud contra eos, qui argumentum Augustini probantis peccatum originale ex textu Genes. xvii. 14. *Masculus, cujus præputii caro, &c.* autumant nihil penitus habere roboris, quod juxta univerforum Patrum traditionem circumcisio non fuerit instituta ad delendum peccatum, & Augustinus a communi sententia recesserit: quam opinionem ex recentioribus adoptarunt Nicolaus L'Herminier Tom. vi. pag. 29. & Tournely de Sacram. in gen. pag. 98. Quamquam si occasione exortæ hæresis Pelagianæ Augustinus omnium primus in Scripturæ textu ad hæreticos refellendos vim deprehendisset, cujus alii ea hæresi nondum exorta non meminissent; id quidem cederet in præclarissimi Doctoris laudem, nec sententiam novam induceret, sed antiquam pluribus adhuc ignotam promeret, & explicaret; quemadmodum novum non est dogma de originali peccati existentia, & de gratia Reparatoris, tametsi Patres ante Augustinum nulla tali quæstione pulsati non tanta perspicuitate dogma ipsum tradiderint. Atque id Augustinus ipse respondit traduentibus, ut novam, suam de Prædest. Sententiam, de Præd. SS. cap. xiv. num. 27. & Juliano adversus originalis culpæ transfusionem opponenti quædam verba Chrysostomi, libro 1. contra eundem Julianum cap. vi. num. 22.

Itaque circumcisionem institutam in remedium peccati, novit etiam Judæorum Synagoga. Moses enim Majemonides, in more Nevochim P. 3. cap. 49. Interprete Jo. Buxtorfio, enumeratis Circumcisionis causis aliis, ait præcipuam ac primam fuisse, ut circumcisi *per fidem in unitatem Dei* participes fierent fæderis Abrahæ, atque Deus illos in veram religionem suscipiens, prioris nativitatæ defectus abji-



abjiceret . In Thalmud Tract. Sanhedrin cap. 11. interprete Josepho de Voisin Bardigalensi , lib. de Lege divina cap. 6. legitur : *Queritur , quando infans particeps esse possit futuri sæculi ? R. Machman filius Isiac respondet , statim ac circumcissus est .* In Zoar ad Gen. xv 11. 13. *Et erit sœdus meum in carne vestra ,* legitur : *Traditio est , quando filius hominis signatur hoc charactere sancto , tunc eum fieri dignum visione Dei .* In Tzeror hammor , sect. Berefchit , habetur consuetum Hebræis in circumcissione apponere vas cum pulvere , ut in eo recondant præputium , quod præciditur , *Ad significandum serpentem , idest , Dæmonem impulisse hominem ad peccandum , & in causa fuisse cur moreretur , & in pulverem reverteretur .* Vide præcitatum Voisinum cap. 7. pag. 49. Rabbīnorum itaque testimonia , & ipse peragenda circumcissionis ritus evincunt persuasum esse Judæis aboleri cum præputio vetustatem carnalis generationis .

At veniamus ad Patres . Firmissima horum sententia est , illorum etiam , qui Augustini tempora præcessere , institutam circumcissionem in signum abolitionis carnis peccati , & regenerationis per Christum . Demonstratum id est præcedenti assertione . Quid ergo juxta antiquos Patres in circumcissione desideratur , ut sit *Sacramentum* institutum ad abolitionem peccati ? Adest divina institutio : adest ratio signi : adest renovationis , & gratiæ symbolum . Hoc unum reponere possunt adversarii , *Sacramentum* istud gratiam præsignasse , non contulisse , seu fuisse naturæ suæ elementum egenum , è sola fide Christi , non vi suæ justificationem impertiens . Verùm hoc interim concessio ( de circumcissionis quippe efficacia agendum est postmodum ) non consequitur circumcissionem minime fuisse institutam in remedium peccati . Major siquidem Theologorum pars , & ipsemet Tournelius q. 2. art. 3. concl. 1. propugnat in lege naturæ extitisse adversus peccatum originale remedium , quamvis non absque fidei venturi Messiæ noxam culpæ expiaret ; ac docet Patres , ubi fidei tribuunt pro eo statu justitiam , nequaquam excludere signum *Sacramenti* sensibile . Eadem ergo ratione , quamvis circumcisio regenerationem , quam juxta veteres præsignabat , non effecisset , sed hæc opus fuisset solius fidei signo visibili circumcissionis manifestatæ , esset nihilominus originalis peccati remedium . Quod si audiat S. Thomas docens 3. p. q. 60. art. 5. determinanda fuisse signa , & *Sacramentorum* elementa post coadunatum Dei populum , & facta Messicæ promissione , *ad expressiorem significationem gratiæ Christi , per quam humanum genus sanctificatur ;* nemo jure negabit , quin segregata familia Abraham in cultum summi Dei , percussio fœdere , ejusque semini promisso Reparatore , determinatum non sit , & vel scripto , vel traditione manifestatum remedium illud , & *Sacramentum* justificationis , quod , ut Augustinus ait , *superioribus temporibus omnimodo latuit .* Nullum verò , C nisi sit

T6.VI. F cir-

circumcisio,) post segregatum Abrahæ semen, expressum ac determinatum remedium pro parvulis potest excogitari.

Ut ad Patres revertatur oratio, S. Basilus hom. xiii. pag. edit. Morelli 477. circumcisionem baptismati comparans inquit: *Circumcisionem Judæus minime differt ob comminationem; quoniam omnis anima, quæ die octava non circumciditur, à populo suo exterminabitur: at tu circumcisionem non manufactam, quæ per baptismum in depositione carnis perficitur, differe quæris? Ipsam audisti Dominum: Amen dico vobis, nisi quis renatus, &c.* Quo testimonio producto sub Chrysostomi nomine lib. 2. adversus Jul. cap. 6. num. 18. ita S. P. Augustinus prosequitur: *Cernis quemadmodum circumcisionem circumcissioni, comminationem comminationi vir Ecclesiastica doctrina præditus comparavit? Quod ergo est octavo die non circumcidi, hoc est in Christo non baptizari; & quod est perire de populo suo, hoc est non intrare in regnum cælorum.* S. Ambrosius lib. 2. in Lucam num. 56. *Videt, inquit, omnem legis veteris seriem fuisse typum futuri. Nam & circumcisio purgationem significat delictorum: & lib. 2. de Abraham. cap. xi. num. 81. Egregiè autem infantia in primis vagitibus circumcidi mares lex jubet, etiam vernaculos; quia sicut ab infantia peccatum, ita ab infantia circumcisio. Nullum tempus vacuum debet esse tutela, quia nullum est culpa vacuum. Et infans revocandus à peccato est, ne idololatria polluatür contagio, & ne adorare adulescat idolum, & exosculari simulacrum, parentis violare nidum, pietatem ledere. Simul ne quisquam infletur, quod sibi justus videatur, atatis maturioris processu Abraham circumcidi jubetur. Nec senex ergo proselytus, nec infans vernaculus excipitur, quia omnis ætas peccato obnoxia, & ideo omnis ætas sacramento idonea.* Isychius denique Ierosolymitanus, quem floruisse ajunt imperantibus Arcadio & Honorio, lib. 3. in Levit. pag. 246. scribit: *Ergo hic est modus, propter quem infantem octavo die jubet circumcidi. Incircumcismus autem perire de populo suo ostendit, quia ante circumcisionem abominabilem habet carnem & immundam. Mundatur autem per circumcisionem, quæ imaginem gerit resurrectionis mortuorum.* Profecto Isychius per immunditiam carnis intelligit peccatum originale, quod carnali propagatione contrahitur, statim enim quærit, cur cap. xi. Levit. 2. mulier, non puerulus, vocetur immunda; & respondit, *Quia inobedientiæ causa Eva seducta extitit, transgresso autem, sive inobedientia immunditiam nobis, sordemque contraxit, idè hoc legislator in mulierem convertit.*

Hæcenus dicta hæc nobis argumentationem suppeditant. Augustinus non est illius sententiæ primus auctor, quam etiam Synagoga tenet ex Majorum traditione, & quam Patres Augustino antiquiores docuerunt. Quod circumcisio instituta sit in remedium origina-

lis peccati, arbitratur ex vetusta traditione Judæorum Synagoga, & docuerunt antiqui Patres. Eiusdem ergo sententiæ Augustinus non est adinventor, & auctor.

PROPOSITIO V. Quod Circumcisio sit a Deo instituta ad delendum originale peccatum est expressa sententia Augustini, valide sacris literis confirmata, & recepta a posterioribus Patribus, & Scholasticis illustrioribus.

Hanc esse S. P. Augustini opinionem, firmissimamque sententiam, extra controversiam positum est. Scribit namque S. P. Epist. 57. ad Dardanum, nunc 187. cap. xi. num. 34. *Circumcisio antiquis sanctis pro baptismo fuisse creditur*. Lib. 2. contra litteras Petiliani, cap. 72. num. 162. *Certe antiquus populus Dei circumcisionem pro baptismo habebat*. Libro tertio contra Julianum, cap. 18. num. 34. *Sed ad hoc responde, si potes, cur ipse Isaac nisi baptismatis Christi signo circumcisus fuisset, perisset anima ejus de populo suo?* Infra: *Quid meruerat, ut anima ejus de populo suo periret, nisi circumcisio subveniret?* Et lib. vi. cap. 7. num. 19. de originali vitio, inquit, *Quod nisi esset in semine, ad parvulos, quibus circumcissione illa corporis auferendum esset, nullatenus perveniret*. Plura alia subjiciam infra. Interim hac Augustini mentem satis patefaciunt.

Innixam esse hanc sententiam sacris literis; sic demonstro. Genes. xviii. 14. Legitur, *Masculus, cujus præputii caro circumcisa non fuerit, delebitur anima illius de populo suo: quia pactum meum irritum fecit*. Quorum verborum sensus est, Qui circumcisus non fuerit, perditionem nequaquam evadet, quoniam reus est transgressionis Adæ, in quo omnes peccaverunt, neque in eo observatum est pactum Circumcisionis institutæ ad illius transgressionis abolitionem; quemadmodum illorum verborum, *Nisi quis renatus fuerit ex aqua & Spiritu sancto, non potest introire in regnum Dei*, sensus est, Qui non susceperit baptismum institutum in originalis culpæ remedium, evadere non poterit damnationem. Sicut ergo baptismus, ita circumcisio (salva utriusque Sacramenti discrepantia) in originalis reatus medelam fuit instituta. Utitur hac argumentatione Augustinus adversus Pelagianos lib. 2. de Nuptiis, & Concupisc. cap. xi. num. 24. scribens: *Sed ipse jam dicat, quare interiret anima ejus de genere suo, si circumcisus die non esset octavo: quid ipse peccasset, quid offensusset Deum, ut de aliena in se negligentia tam severe puniretur, si nullum esset originale peccatum?* De circumcidendis enim Deus sic mandavit infantibus: *Masculus, &c.* Ex quo enim instituta est circumcisio in populo Dei, quod erat tunc signaculum justitiæ fidei, ita ad significationem purificationis valebat & in parvulis originalis veterisque peccati, sicut & baptismus ex illo valere cepit ad innovationem hominis, ex quo est institutus. Vide eundem Augustinum de Peccato Originali

cap. 30. num. 35. de Civit. Dei lib. xvi. cap. 27. lib. 2. Operis imperf. cap. 201. & quæ nos diximus lib. xiii. cap. 1.

Quamvis loco mox laudato Augustini interpretationem vindicaverim ab adversariorum objectis; non abs re tamen erit, si eadem hoc loco iterum retundam. Inquiunt ergo primo, Augustinum in eam sententiam ductum, quod citato in loco Geneseos legerit *octavo die*, ex Versione lxx. Interpretum, ex quibus consequi existimavit comminationem illam spectare ad parvulos, cum revera pertineat ad adultos duntaxat, qui circumcisionem negligendo irritum faciunt *passum* initum cum Abrahamo. Ita Bellarminus lib. 2. de Sacram. cap. xvi. pag. postremæ edit. 80. Tournely de Sacr. pag. 306. Nat. Alex. Tom. 1. pag. 113. & præter oppositæ sententiæ omnes, etiam Augustinianus Coquerus (si hoc in loco Augustinianus dicendus est) Comment. in cap. 27. libri xvi. de Civit. Dei pag. 1041.

Verum nil facilius, quam istam responsionem explodere. Do enim Bellarmino, aliisque in *octavo die* desiderari in Hebraicis Codicibus, in Chaldæa paraphrasi, in Vulgata Latina Versione, addantque, si lubet, Arabicam, & Syriacam. Ergone in Versionem lxx. Interpretum voculæ illæ dæ per errorem irrepsērunt? Nequaquam. Nullus enim Græcus codex proferri potest, qui illis careat, nec emendatissimus jussu Sixti V. Romæ editus anno 1588. & recusus Parisiis an. 1628. Ita ergo Seniores illi scripsere. Aetate etiam Augustini lectio illa obtinebat; nam aliàs hoc testimonium non adeo frequenter inculcasset adversus hæreticos Pelagianos. Adde in hoc loco producendo maximam Augustini diligentiam. Citato libro 2. de Nuptiis & concup. cap. xi. ita locum hunc recitat, *Masculus, qui non circumcidetur carnem præputii sui octavo die*, & eadem orationis syntaxis legitur in Sixtina, cohærenter ad Græcum, & ὁ περιτομίζων τὸ σαρξ. Augustinus itaque usitata lectione usus est, vera, & quoniam hostes oppugnabat versutissimos, diligenter examinata. Cum itaque lxx. ita scripserint, quare erroris insimulantur? Cur non dicuntur potius expressisse sensum hebraici textus, quam illum adulterasse? Sensum vero hebraici voluminis, num poterant Bellarminus, & qui ex eo scripserunt, Scholastici juniores, felicius assequi, quam lxx. viri sapientissimi, ex omnibus tribus selecti, divinoque numine afflati? Optimè idem Bellarminus Tom. 1. lib. 2. cap. 6. pag. 41. de Versione lxx. protulit judicium istud: *Certissimum esse debet lxx. Interpretes optime transulisse, & peculiari modo Spiritum sanctum assistentem habuisse, ne qua in re errarent, ut non tam Interpretes, quam prophetae fuisse videantur*: additque nihil posse in hac Versione reprehendi, nisi vitia, quæ in eam postea irrepsērunt, negligentia, vel malitia, aut etiam ignorantia aliorum. Atque id quidem sentiendum erat de ea Versione, quam laudarunt Patres omnes, & usu suo con-

consecrarunt fidei conditores Apostoli. Retinendæ sunt ergo voculæ illæ, *octavo die*, quoadusque non demonstrentur malitia, aut ignorantia aliquorum intrusæ. Hinc videor mihi haud male Volum. 3. pag. 6. scripsisse Græcam versionem falsam non esse, sed suppeditare commodam interpretationem verborum. Vidit hæc & Suarelius scribens laudata disput. v. sect. 1. *Unde potest sumi indicium, antiquam Judæorum Synagogam ita hunc locum intellexisse, & Septuaginta Interpretes ad explicandum amplius sensum suo tempore, & in sua Ecclesiæ receptum illam partientulam addidisse.* II. Afferui citato volum. 2. *in octavo die* haberi etiam in Pentatheuco Samaritano, quod nemo hætenus observarat: ex quo quantum Augustinianæ sententiæ accedit roboris per se constat. Pentatheucus enim Samaritanus scriptus est antiquis hebraicis literis, si fides habeatur Joanni Morino, a temporibus Esdræ; si Walton, aliisque, saltem ante Christum natum. III. Præcitatus textus Geneleos, ut habetur in Vulgata, & supra recitatus est, comprehendit propositionem indefinitam, & non solum de adultis, qui circumcisionem negligunt, verum etiam de parvulis accipiendam, non minus ac verba Evangelii, *Nisi quis renatus, &c.* Ut ergo comminatio hoc loco expressa non solum excludit a regno celorum adultos contemnentes baptismum, sed etiam parvulos non baptizatos, quia absolute excludit *non renatos*: ita verba Geneleos comminantur perditionem tam adultis negligentibus circumcisionem, quam puerulis non circumcisis, quoniam perditionem minantur indefinitè masculo non *circumciso*. Nec a nobis cuditur primum hæc ratiocinatio, sed illam nobis præmonstravit Innoc. III. cap. *Majores*, scribens: *Sicut enim sine distinctione qualibet Mosaica lex clamabat: Anima, cujus præputii caro circumcisa non fuerit, præibit de populo suo: ita nunc indistincte vox intonat Evangelica: Nisi quis renatus fuerit ex aqua & Spiritu sancto, non intrabit in regnum Dei, ab hac generalitate nec sexum, nec ætatem excludens.* Similia Prosper inferius laudandus. Atque his prior adversariorum responsio eliditur, & profigitur.

Secundo respondent per illa verba, *delebitur anima ejus de populo suo*, designari duntaxat mortem temporalem insignendam ei, qui adultus circumcisionem omiserit carnis suæ; aut excisionem legalem, sive a cœtu posterorum Abrahamæ expulsionem. Enim verò, inquirunt, id significat hebraica phrasis, *perire de populo suo*, hebraicumque verbum כרת, *excindere*. Videbis Exodi xxi. 5. xxxi. 14. Levit. vii. 21. Num. xix. 20. Hæc exempla ex Bellarmino opponit nobis Tournelius. Addiderat præclarissimus Controverfiarum Scriptor exemplum Moïsi, quem Deus voluit occidere Exodi iv. 24. quoniam non circumciderat filium suum. Quamquam enim Augustinus q. xi. in Exodum, & lib. iv. de Baptism. cap. 24. num. 31. conatur ostendere filium

filium Moſis in periculo fuiſſe, non ipſum Moſen; apertum tamen eſt ex contextu, mortis periculum ſubiſſe Moſem, non puerum: quippe legitur, *Cumque eſſet in itinere in diverſorio Moſes, occurrit ei Dominus, & volebat occidere eum. Quem* (inquit Bellarminus) *niſi Moſem, de quo verbis proximis loquebatur?* Sephora quoque Moſi dixit, *Sponſus ſanguinum tu mihi eſt*, maritum, quem amiſſura fuerat, allocuta, quaſi diceret, Redemi te ſanguine filii mei. Moſes ergo, non filius ſubierat pericula, ut in cap. 5. ad Galat. affirmavit Hieronymus. Hæc Bellarminus, & laudato in loco noſter Coquæus.

Reſpondeo verbum כרת, idem eſſe, ac, *ſcindere, & exterminare*; & aliquando ſignificare mortem corpoream, aliquando ſeparationem a cœtu ſanctorum. Quid hoc in loco ſignificet, videndum eſt. Eſti Rabbīnorum quidam, ut R. Samuel, & R. Menahem autumaverint, eum, qui carnem præputi ſui non circumcidit, moriturum abſque libris ante annum quinquageſimum, vel ſexageſimum, hæc tamen opinio inutilis eſt, nec a Rabbīnis omnibus recipitur. Quod iſtic accipienda ſit mors corporis violenta, nemo dixerit; omnibus quippe fatentibus, nemo ob prætermiſſam circumciſionem ſubiit præcepto legis pœnam capitis. Igitur accipianus oportet hunc locum, ut incircumciſus intelligatur abſciſſus, & ſegregatus a filiis promiſſionis, & a ſemine Abrahæ; quod fit aut per ſempiternam mortem, aut per ſeparationem a viſibili Eccleſia. Si primum dixeris, in partes Auguſtini deſcendis: ſi alterum affirmas, etiam Auguſtino ſubſcribis; quiſquis enim in Eccleſiam Sanctorum non recipitur, etiam a cœlorum beatitudine excluditur. Si quis dicat, Abſque baptiſmo non connumeramur inter Chriſtiſideles, verum ille dicit: & ſi quis ait, Sine circumciſione olim nullus reputabatur in ſemine Abrahami, verum & iſte pronuntiat. At excludi a numero fidelium eſt etiam excludi a regno cœlorum; ſegregari a ſemine Abrahæ erat promiſſis benediſtionibus exſpoliari. Confirmant ergo, non oppugnant Auguſtini ſententiam, qui contendunt ſenſum illorum verborum, *Peribit anima ejus, eſſe, Segregabitur a cœtu Judæorum*. Ita etiam peribat Exodi xii. 15. qui ſeptem diebus azymorum comedebat fermentatum, & Exodi xxxi. 14. qui non cuſtodiebat ſabbata, ita, ut non ſolum tanquam fraſtor legis puniretur, verum etiam contraheret maculam tranſgreſſionis. Pœna enim non infligitur abſque culpa. Recte itaque Auguſtinus in parvulo, cujus anima ob incircumciſionem peribat, inferi peccati maculam; recte ait: *Quid meruerat, ut anima ejus de populo ſuo periret, niſi circumciſio ſubœniver?* II. Præterea Aben-Ezra in cap. xvi. 1. Genef. fatetur Hebræorum plurimos ſentire, quod anima pueruli incircumciſi *in futuro ſæculo puniatur*; & licet iſ ſententiam iſtam non ſequatur, habet tamen hæc aſſertores Rabbīnos alios clariffimos ſupra laudatos. Porro Gloſſa interlinearis habet:

bet: *Non computabitur inter Sanctos, & alia, Delebitur de cœtu Sanctorum.* Negare id non potuit vulgatissimus interpres A Lapidè, scribens in Pentatheucum pag. 136. *Per mortem corporalem significatur, & intentatur mors spiritualis animæ, & æterna damnatio illi, qui circumcissionem vel infans non suscepit, (infanti enim mors animæ infligi potest a Deo, non vero mors corporis a iudice) vel adultus neglexerit; quod scilicet hac de causa excindatur a familia Abrabæ, populo, & Ecclesia Dei, ac consequenter ab hereditate cœlesti.* III. Apponi ad populum suum est connumerari cœtui sanctorum, Gen. xxv. 17. xlii. 32. Machab. i. xiv. 30. aliisque in locis. Igitur deleri de populo suo, crit idem ac à Sanctorum cœtu sejungi, ut diximus lib. xiii. cap. 1.

Quod ad Mosen attinet, fatcor illum, non puerum Eliezer positum Exodi iv. in vitæ discrimine; propterea quod non tantum pœnam mereantur pueri non regenerati ob culpam originalem, verum etiam adulti ob negligentiam in *Sacramentis* ministrandis, maxime Ecclesiæ principes, qualis tunc Moses eligebatur. Nihil ergo valet exemplum Moysi adversus Augustini sententiam. Immo egregie illam confirmat, si expendantur quæ propositione 4. produximus ex Ambrosio, circumcissionem scilicet præstitisse, *ne semen Abrahæ idololatriæ pollueretur contagio.* Peccato quippe originali inquinati, utpote mancipia Diaboli, sunt in idolorum cultum ceteris priores. Eam ob rem Mosi in Aegyptum proficiscenti Deus non circumciso Eliezer mortem comminabatur, quia ille contra idololatrias dimicaturus patiebatur in filio idololatriæ fomentum, & labem originalem. Hæc nostra, si cui ardeat ratio, poterit illinc stabiliri, quod circumcisio iterum indicta fuerit Exodi xii. 48. cum populus Israel ex idololatriarum finibus educeretur, & in deserto prætermissa ab incredulis adhuc additis Aegyptiorum superstitioni. Ceterum Augustinus, (quicquid Bellarminus afferat,) opinionem illam de Eliezre non putat inconcussam, sed addit, *Quamquam & si de Moyse accipere quisquam voluerit, non est magnopere resistendum.* Non amplectitur tamen communem sententiam in serm. 86. de Temp. ut scribit in hunc locum A Lapidè pag. 344. Sermo enim ille supposititius est Verlino, Vindingo, Maurinis Patribus. Duas etiam oppositiones è contextu petitas non fabricarunt aut Bellarminus, aut Coquæus, sed eadem Q. xi. attulit, & solvit ipsemet Augustinus. Hujus autem responsiones, quoniam iisdem oppositionibus nullo pacto percellor, ac sum cum adversariis liberalissimus, perquirat Lector apud Doctorem Ecclesiæ præstantissimum. Posset etiam reponi, ea verba Sæphoræ, *Sponsus sanguinis tu mihi es*, non ad Mosen dicta, sed ad filiolum, ita, ut sensus sit, Per circumcissionem datus es mihi sponsus, idest Ecclesiæ, quasi conjugii fœdere copulatus: puer enim circumcissus ab

Hebræis

Hebræis appellatur כֶּהֱנִי, *Sponsus*, eodem vocabulo, quod occurrit Exodi iv. 25. ubi legitur כֶּהֱנִי וְהָיָה, *Sponsus sanguinum*: unde Targum legit, *Per sanguinem circumcisionis istum datus es nobis sponsus*, si fides habenda est Schindlero in Lexico, voc. כֶּהֱנִי, & Spencero de Legibus Hebr. lib. 1. cap. 4. sect. 5.

Tertio loco adversarii respondent, Augustinum in eo lapsum, quod ea verba, *Pactum meum irritum fecit*, acceperit de pacto a Deo inito cum Adamo, Gen. 11. 17. *In quocumque enim die comederis ex eo, morte morieris*; cum referenda proculdubio sint ad pactum initum cum Abrahamo, de quo eodem cap. xvi 1. Gen. *Hoc est pactum meum, quod observabitis inter me, & vos. Circumcidetur ex vobis omne masculum*: cumque officis ibidem pactum hoc memoretur, nequit ad pactum cum Adamo initum detorqueri, ideoque nihil istic de peccato originali, quod parvuli trahunt ex Adam, in quo omnes peccaverunt. Hinc ubi Vulgata legit, *Masculus, cujus caro praputii circumcisa non fuerit*, habet Chaldaicus Paraphrastes, *Masculus, qui non circumciderit carnem praputii sui*, commonstrans hunc locum pertinere ad adultos fractores illius pacti, non ad puerulos.

Resp. neminem latere, quin verbum הִפְרָה, *Irritum fecit*, quod in conjugatione *Kal* activum est, si accipiatur in conjugatione *Hipbil*, sensum reddere passivum, & idem esse, ac *in eo irritum fuit*. Hoc supposito, quod nec diffitetur A Lapidè in Pentath. pag. 136. ita adversarios alloquor. In qua conjugatione verbum illud accipiendum nobis est? In *Kal*? Quoniam sive recipias versionem lxx. Interpretum, sive accipias *Masculum* indefinite, sive referas versum 14. *Masculus, cujus praputii caro circumcisa non fuerit*, ad præcedentem versum 12. *Infans octo dierum circumcidetur in vobis*, nomine masculi venit etiam recens natus puerulus; cum is nequierit frangere fœdus initum cum Abrahamo, quomodo pactum Domini dissipavit? Rectè itaque Augustinus de Nuptiis & Concup. lib. 2. cap. xi. num. 24. *Dicatur iste, si potest, quomodo puer ille testamentum Dei dissipavit, octo dierum, quantum ad ipsum propriè attinet innocens infans; & tamen nullo modo Deus vel sancta Scriptura id mendaciter diceret. Tunc ergo dissipavit testamentum Dei, non hoc de imperata circumcisione, sed illud de ligni prohibitione, quando per unum hominem peccatum intravit in mundum, & per peccatum mortis, & ita in omnes homines pertransiit, in quo omnes peccaverunt*. Idem repetit S. Doctor lib. 111. contra Julianum cap. 18. num. 34. & de Civit. Dei lib. xvi. cap. 27. Si verbum הִפְרָה accipias in conjugatione *Hipbil*, sensus erit, ideo perire incircumcisi pueruli animam, quoniam in illa servatum non fuit pactum circumcisionis, qua potuisset evadere perditionem: quam sententiam fateor communiores esse, & literæ magis consonam. At Augustinus, quamvis linguæ hebraicæ vim non attenderit, attamen hanc



hanc etiam responsionem ( tanta erat ingenii ejus acies, tanta in scripturis enodandis libratio ) adhibuit loco nuper laudato, scribens: *Si autem quisquam hoc non nisi de ista circumcissione dictum esse contendit, quod in eo testamentum Dei, quoniam non est circumcissus, dissipaverit parvulus, quærat locutionis aliquem modum, quo non absurde possit intelligi ideo dissipasse testamentum, quia licet non ab illo, tamen in illo est dissipatum. Verum sic quoque animadvertendum est, nulla in se negligentia sua injuste interire incircumcisi animam parvuli, nisi originalis obligatione peccati.*

Quod dixi de duplici Hebræorum conjugatione, elidit cavillulum alterum. Jonathas quippe, & Onkelos accepit verbum לא־יִמֹר, *circumcisa non fuerit*, quasi sit futurum *Kal* a verbo יָמַר, *circumcidere*, cum sit futurum *Niphal* a verbo, יָמַר, *circumcidi*; nam lxx. Hieronymus, Interpres Latinus, Arabs, Syriacus reddidere, *circumcisa non fuerit*, &c. nec sine ratione valida, cum idem futurum יִמֹר occurrat præcedenti versu 12. in significatione passiva. Retinenda est ergo lectio Vulgatæ: ac puderet Scholasticos nonnullos inania hæc objecta, si animadvertissent Sixtinum Amamam in Antibarbaro, pag. 413. aliosque Heterodoxos hoc in loco Vulgatam nostram reprehendere. Verum his opponam Joannem Drusium, qui Notis majoribus Volum. 1. Criticorum sacrorum pag. 429. inquit: *Aliter cateri: nam lxx. & ἡ ἁγία πνεύματος τῆς σαρχὸς τῆς ἀρσενείας αὐτοῦ.* Et Hieronymus: *Cujus præputii caro circumcisa non fuerit.* Et Santes: *Cum non circumcidetur caro præputii ejus.* Hoc sensu erit futurum *Niphal* a יָמַר. *Videtur hæc interpretatio melior esse: nam masculus non circumcidebat seipsum, sed alius id faciebat.* Atque his, ni fallor, constat Augustini sententiam valide sacris litteris communiri.

Jure itaque ipsam Augustini sententiam Patres, qui subsecuti sunt, propugnarunt: inter quos Aquitanus Prosper lib. de Prædicationibus Dei P. 1. cap. 14. pag. edit. Lovanii 7. ait indictam circumcissionem, *ut per integritatis decus id repararet, quod fuerat vitiatum*: & in Epistola 84. in antiquiori editione Ambrosii pag. 188. ( quæ Epistola a Suaresio, Frassen, aliisque tribuitur Prospero, ) de originali peccato differens, *Propter quod, inquit, sicut nunc in Ecclesia manet constitutio Salvatoris dicentis: Nisi quis renatus fuerit ex aqua, & Spiritu sancto, non intrabit in regnum cælorum: ita sacratissime erat in lege præcavum, ut natus puer, nisi die circumcideretur octavo, exterminaretur anima ejus de populo suo, nullum in hereditate Israel habitura consortium.* Gregorius Magnus lib. iv. Moralium cap. 3. pag. nunc 102. *Quisquis, ait, regenerationis unda non solvitur, reatu primi vinculi ligatus tenetur. Quod vero apud nos valet aqua baptismatis, hoc egit apud veteres vel pro parvulis sola fides, vel pro majoribus virtus sacrificii, vel pro his, qui ex Abraham stirpe prodierant.*

*rant, mysterium circumcissionis. Quæ verba a Gratiano inter Canonones relata fuere 111. P. decreti, de Consecrat. dist. 1v. can. 5. Sanctus etiam Ildorus in Genes. exscriptus cap. 17. a Glossa, Quæritur, inquit, quomodo pueri incircumcisi, qui pactum Dei irritum non fecerunt, perire debeant. Sed pactum Dei non secundum opus, sed secundum originem in primo homine irritum fecerunt, in quo omnes peccaverunt. Accedit Bernardus, qui serm. 1v. de Circumcisione num. 1. scribit: Duritiam duris bene congruam servis, filiis commutavit in mansuetudinem, ut rubiginem originalis peccati, quam vix cultellus eradere poterat, ex hoc jam cum unctione gratiæ facile lavet aqua. Nihil ergo mirum si pro diversitate temporum mutata sint sacramenta: ut daretur utrisque quod congruum erat eis. Et Serm. 1. de Cœna Domini num. 2. Quæ est ergo gratia, unde per Baptismum investimur? Utique purgatio delictorum. Hujus quidem gratiæ sacramentum prius erat circumcisio, ut originalis rubiginem culpæ, quæ manaverat a parentibus primis, cultellus eraderet. Legatur & Epistola ad Hugonem, nunc inter Tract. Tom. 1v. pag. 119. His subscribit Innoc. III. cap. Majores, ubi post verba superius laudata, innuens discrimen inter circumcisionem, & baptismum, inquit: Etsi originalis culpa remittebatur per circumcissionis mysterium, & damnationis periculum vitabatur, non tamen perveniebatur ad regnum calorum, quod usque ad mortem Christi fuit omnibus obseratum: sed per Sacramentum baptismi Christi sanguine rubricati culpa remittitur, vitatur periculum, & ad regnum calorum etiam pervenitur, &c.*

Hæc, cum non ignorasset Tournely pag. 106. respondet Augustinum in hanc sententiam adductum, & quia cum lxx. Interpretibus legebat in textu Gen. octavo die, & quia disputans adversus Pelagianos undique argumenta, ad eos revincendos colligebat. Ceteros omnes tacitè omnino dimittit. At de Augustino quam inscite sententiam proferat, paullo supra demonstravi. Modò addo Augustini argumenta undique collecta, posterioribus Patribus fuisse probata, idque adversariorum aut confessione, aut silentio. De Innoc. III. reponit cum aliis B. A. M. Canali pag. 57. respondere eo loci ad interrogationem sibi factam, num parvulos tenella ætate congruum sit baptizare, atque in ea responsione assumere rationem invalidam, nec opus esse, ut in aliqua re definienda firmæ duntaxat rationes adhibeantur, quemadmodum in 2. Nicæno Concilio definitum est Angelos pingendos esse, cui definitioni addita est a Sophronio hæc ratio, *quia corpore constant*, quæ tamen a Theologis non probatur. At primum nemo nostrum hanc sententiam propugnat tanquam fidei decretum; & illud tantum in præsentia affirmamus, quod satis liquet, hanc probatam fuisse Innocentio. Deinde eo loci Romanum Antistitem asserre fractam, infirmamque rationem demonstrari debet, non temerè pronuntia-

nuntiari . Præterea cum nihil aliud in eo Capite occurrat , quod non sit libratum ac ponderosum , immerito ratio ex circumcissione petita , tanquam invalida refutatur . Postremo neque exemplum allatum est ad rem ; quamvis enim fateamur aliquando inconcussas non esse rationes omnes in fidei definitionibus insertas ; discrimen tamen est maximum inter Romani Pontificis rescriptum , & Joannis Theſſalonicenſis ſermonem Act. v. ſeptimæ Synodi recitatum ; puto ſiquidem hunc , non Sophronium , a viro dicto fuiſſe commemorandum ; nec ſecundum Nicænum concilium allatam a Joanne rationem probavit , quemadmodum Innocentius protulis , probavitque Auguſtinianam de Circumcissione doctrinam . Sed legendum de hac re caput 2. libri x. noſtrarum lucubrationum , & v. i. Volumen Conciliorum Labbei pag. 354.

Aliter Auguſtini ſententiam illuſtriores Scholaſtici exceperunt . Magiſter ſiquidem in iv. diſt. i. num. 6. indubitatum cenſet , *per circumciſſionem ex quo inſtituta fuit , remiſſionem peccati originalis , & actualis par-  
tialis & majoribus a Deo præſtitam , ſicut nunc per baptiſmum datur .* Carpunt quidem in magiſtro nonnulli , quod num. 10. ſcripſerit , *Ibi ſo-  
lum peccata dimittebantur , ſed nec gratia ad bene operandum adjutrix ,  
nec virtutum poſſeſſio , vel augmentum præſtabatur :* quod , inquit Eſtius , abſurdum eſt , & ad perverſa dogmata hæreticorum pertinens , ſi dicatur remitti peccatum abſque infuſione gratiæ , ſeu mentis reno-  
vatione . At quod Magiſter ait num. 6. a nemine reprehenditur : quod vero ait num. 10. falſum eſt , ſi accipiat de gratia habituali ; verum , ſi de gratia , *qua pervenitur ad regnum ,* ut inquit Innoc. III. ſive , ut olim Irenæus , *conſummatrice* virtutis : idque innuere vi-  
dentur ipſa Magiſtri verba . S. Thomas 3. p. q. 62. art. 6. *in circum-  
ciſſione ,* inquit , *conſerebatur gratia , in quantum erat ſignum paſſio-  
nis Chriſti venturi :* & q. 70. art. 4. *Ab omnibus communiter ponitur ,  
quod in circumciſſione peccatum originale remittebatur .* Divus Bona-  
ventura in iv. diſt. i. art. 3. q. 3. *In circumciſſione delebatur culpa ,  
& conſerebatur gratia , & ad utrumque ordinabatur circumciſſio .* Scotus ibidem q. 6. *Supponendum tanquam certum , quod per circum-  
ciſſionem peccatum originale delebatur , quod patet per auctoritates San-  
ctorum .* Et ne reliquos proferam ; fuit hæc in Scholis , ut inquit beatus Thomas , ab omnibus recepta communisque ſententia : quod & liquet ex Durando in 4. diſt. 1. q. 7. Alex. Alenſi q. 4. in 7. art. 3. Argentina diſt. 1. q. 3. art. 2. Paludano q. 5. art. 4. concl. 2. Soto diſt. 2. q. 1. art. 2. aliſque innumeris . Hinc in Tridentina Synodo hæc ſententiam è ſuggeſſu tradidit vir conſpicuus Robertus Fornierius his verbis : *Quoniam circumciſſio populo Iſrael ea poſſimum cauſa  
præcepta eſt , ut haberet ad manum præſens aliquod efficaciffimumque  
remedium adverſus culpam illam , qua a primo parente ducta , atque  
in univerſum genus humanum tranſuſa cum ſemine , in ipſo noſtro ortu  
natura*

*natura contrahitur &c.* Vide Tom. xiv. Concil. Labbei pag. 1494. Atque his demonstrata est propositionis pars quælibet, nimirum ex mente Augustini institutam circumcisionem ad abolitionem peccati, id ex sacris litteris colligi, probatum denique Ecclesiæ Patribus, & Scholasticis illustrioribus.

## C A P U T IV.

*Expenduntur, quæ adversus superiorum doctrinam  
solent opponi.*

**C**ONTENDUNT adversarii Augustinum Apostolo, ceterisque Patribus repugnare, plura adversus illum testimonia ex Epistola ad Romanos, atque ex Justino, Irenæo, Epiphanio, Tertulliano, Chrysostomo, aliisque deprompta, nec non ratiocinationes quasdam per vulgatas objicientes. At non discrepare Augustinum ab aliis, hac una adnotatione suadetur, quod hi vel Judæos profligantes, vel discentes de fide Christi, locuti sint de circumcisione nuda, in se tantum inspecta, carnali, Judaica, legali; ille verò circumcisionem spectaverit tanquam signum exspoliationis carnis, & tanquam sacramentum justificationis ex fide. Nam & ceteros Patres aliquando de Circumcisione, quatenus symbolum & sacramentum est, tractasse in tertia propositione demonstravimus. Atque id tantum valere plurimum potest ad Patres alios cum Augustino conciliandos.

Quoniam tamen de hac quæstione (absit invidia verbo) accuratius, quàm alii fecerint, disputavimus; posteaquam adnotationes quasdam ex Doctore præclarissimo delibavero, testimoniorum, quæ videntur opposita, scopum ac sensum conabor investigare. Itaque cum Judæi legem, & circumcisionem per se, & absque fide Christi ad salutem conducere falso sibi persuadeant; illud primum notandum est, circumcisionem non fuisse peccati remedium nudè acceptam, sed quatenus erat, inquit S. Pater, *Sacramentum justificationis ex fide*, nec vi legis justificabat, sed per fidem in Christum & gratiam Reparatoris. *Eadem quippe fides Mediatoris salvos justos faciebat antiquos, pusillos cum magnis; non vetus testamentum, quod in servitutem generat, non lex quæ non sic est data, quæ posset divificare, sed gratia Dei per Jesum Christum Dominum nostrum. Quia sicut nos Christum in carne venisse, sic illi venturum: sicut nos mortuum, ita illi moriturum: sicut nos resurrexisse, ita illi resurrecturum. & nos vero & illi, ad judicium mortuorum, vivorumque venturum.* Alterum huic affine, & animadversione dignum est, quod circumcisio licet in carne impressa, symbolum erat tamen circumcisionis cordis, & exspoliationis carnis; quod Patres omnes asserunt, & Augusti-

gustinus scribit in Psalmum LXXIV. num. 12. *Circumcisio carnis magni sacramenti res est, & intelligitur inde circumcisio cordis*: ideoque, quemadmodum signa quælibet spectari possunt & quatenus res sunt, & quatenus symbola rerum aliarum, ita circumcisio potest considerari, ut sectio præputii, atque ut symbolum abolitionis antiqui reatus. Tertio notandum est, pro vario hominum statu immutata, quoque fuisse *Sacramenta*, & circumcisionem, aliasque omnes figuras, quibus Christus prænuntiabatur, post ejus adventum, & post redemptionem peractam, fuisse abrogatas: unde Augustinus lib. 2. de Anima & ejus origine cap. XI. num. 15. ait: *Circumcisio fuit illius temporis sacramentum, quod præfigurabat nostri temporis baptismum*; & lib. XIX. contra Faustum cap. 9. *Non circumciditur Christianus, quia id quod circumcissione promittebatur, jam Christus adimplevit*. His prænotatis audiamus adversarios peracute ratiocinantes.

Primo loco opponunt: Genesis XV. ubi de Circumcisionis institutione agitur, non legimus fuisse præceptam, nisi in signum fœderis inter Deum & semen Abraham, atque in pactum ejusdem fœderis. Versu enim 11. legitur: *Circumcidetis carnem præputii vestri, ut sit in signum fœderis inter me & vos*, & versu proximo, *Eritque pactum meum in carne vestra, in fœdus æternum*. Non ergo instituta fuit in remedium peccati.

Resp. 1. nego antec. nam versu 14. dicitur, quemlibet masculum circumcidendum, *ne deleatur anima illius de populo suo*: quæ verba eo pacto commonstrant circumcisionem fuisse remedium peccati, quo illa, quæ leguntur Joan. 111. *Non intrabit in regnum celorum*, ostendunt eodem fine institutum esse baptismum: quod post Augustinum tradiderunt Prosper, Bernardus, Beda, Innocentius. Dico præterea, Deum nunquam iniisse fœdus cum impiis, sed cum Noe, cum Abraham, cum Jacob, cum David; fœderatis enim suis, nisi legem transgrediantur, Isaïæ LV. 5. sempiternum nomen, æternamque vitam promittit. Ut ergo fœdus Deus cum hominibus ineat, opus est justitiam habeant, aut ipso signo fœderis justificentur. Abrahamus quidem ante circumcisionem justus erat, ideoque accepit, ut ait Apostolus ad Romanos IV. 11. *signum circumcisionis, signaculum justitiæ fidei, quæ est in præputio*. At parvuli ex Abraham semine procreati nascebantur, ut ceteri omnes, *filii iræ*, & originali peccato inquinati. Cum iis quomodo poterat Deus in circumcissione inire fœdus? Quomodo circumcisio erat *signaculum justitiæ*? Non ob justificationem & gratiam, quam, ut Abraham, habuerint in præputio; igitur ob justificationem, & gratiam, quam eis impertiebatur signum circumcisionis, tanquam signum protestativum illius fidei, quam habuerat Abraham præputiatus, & incircumcisus. Non enim absque fide Christi circumcisio justificabat, ut diximus paulo supra cum Augustino.

Præ-

Præterea obijciunt: Apostolus in citata Epistola ad Rom. cap. iv. versu 1. ait: *Quid ergo dicemus invenisse Abraham patrem nostrum secundum carnem?* Circumcisio itaque nihil gratiæ conferebat. II. In eodem cap. versu 11. inquit Paulus: *Signum accepit circumcisionis, signaculum justitiæ fidei, quæ est in præputio.* Præsignabat ergo circumcisio justitiam præexistentem in Abraham, non conferebat spiritalis gratiæ decorem. III. Præcedenti cap. 111. versu 1. differens de Circumcisionis utilitate, affirmat Apostolus præcipuum emolumentum, quod inde Judæi capebant, fuisse legem scriptam, notitiamque Prophetarum vaticiniorum, dicens: *Quid ergo amplius Judæo est? aut quæ utilitas circumcisionis? Multum per omne modum. Primum quidem, quia credita sunt illis eloquia Dei.* Igitur circumcisio non debebat peccatum: quod opus est prophetia & lege præstantius. IV. Ad Galatas v. 6. definitè concludit: *In Christo Jesu neque circumcisio aliquid valet, neque præputium.*

Resp. Hæc nullius esse momenti, si idem, quod nuper dictum est, attendatur, idest, nec legem Moysi, nec circumcisionem, nec vetera Sacramenta aliquid ad salutem contulisse, nisi per fidem Christi, & gratiam Reparatoris: de qua fide & gratia pertractare Apostolum in Epistola ad Romanos, tradit Augustinus in Ep. ad Sixtum 105. nunc 194. num. 1. & manifestum est cuique legentium. Priori ergo loco docet Paulus Abraham justificatum non ex circumcisione, neque ex operibus, sed per gratiam Dei, & per fidem, *Ne circumcisio gloriaretur, gentemque incircumcisam ad fidem Christi nollet admitti*, inquit Augustinus de Civit. Dei lib. xvi. cap. 23. Et quidem cohærenter ad Apostolum è vestigio hæc proloquentem: *Si enim Abraham ex operibus justificatus est, habet gloriam, sed non apud Deum.* Ut ergo eo loci Paulus non denegat justitiam operibus fidei conjunctis, ita nec inficiatur circumcisionem ex fide Mediatoris justificasse. Idem est sensus verborum, quæ secundo loco opponuntur, ubi Paulus demonstrat circumcisionem nudam, & independentem a fide Christi non fuisse regenerationis signaculum, quandoquidem Abraham justificatus fuerat adhuc præputiatus; ideoque ex fide, posteaquam indita fuit, expiasset peccata. Propterea addit: *Non enim per legem promissio Abraham, sed per justitiam fidei.* Tertio quoque loco demonstrat, etiam gentes præputiatas, præter Judæos circumcisos, ad Christum invitandas: nec Judæis gloriandum, quod legem, & circumcisionem acceperint; quoniam circumcisio carnis, & lex, quatenus spectant ad vetus testamentum, ritusque Judaicos, absque fide Christi, & absque circumcisione cordis in spiritu, nihil aliud conferunt utilitatis, nisi notitiam præceptorum, & eloquiorum Domini, quæ peccatum redarguunt, non tollunt: ideoque semper, & in uno quoque statu Justitia repetenda est a fide Christi, sine qua lex fuisset inutilis,

tilis, & circumcisio carnis vulnus, non iustitiæ signaculum. Hinc eodem capite inquit Apostolus: *Iustitia autem Dei per fidem Jesu Christi in omnes, & super omnes qui credunt in eum: non enim est distinctio. Omnes enim peccaverunt, & egent gloria Dei.* Quarto denique loco agit Apostolus adversus eos, qui legem Moysi non a Christo abrogatam, sed ad salutem necessariam esse autumabant; cum lex defierit obligare, & circumcisio fuerit sacramentum quidem, sed *illius temporis*, & quæ adimpletis, quæ prænuntiabat, remanet nuda, & nihil valet; quemadmodum nihil valet præputium; idest, sine fide, quæ per caritatem operatur, nec Judæus circumciscus consequi potest salutem, nec gentilis præputiatus. Brevi dicam: Apostolus pertractat de necessitate fidei, de vocatione gentium, & de legis abrogatione, minime negans Judæos ex fide Mediatoris fuisse circumcissione purgatos, & observatione legis salutem affecutos; cum Israelitarum fuerit *adoptio filiorum, & gloria, & testamentum, & legislatio, & obsequium, & promissa.* Ad Rom. ix. 4.

Nota, quod si quis de Baptismo, quem institutum in peccati medelam nemo unus ambigit, assereret saluum facere, quatenus est ablutio carnis externa, non verò in quantum est *iniputatio bonæ conscientie*, hoc est, *arrabo*, pignus, ac demonstratio interioris fidei expressa ipsâ externa baptismatis cæremonia; adversus id sentientem, asserendum nobis esset in baptismate salvos nos fieri, sed non per aquæ abluionem; nam id docet Apostolorum Princeps Epistola 1. cap. 111. 21. illis verbis, *Quod & vos nunc similis formæ salvos facit baptisma: non carnis depositio sordium, sed conscientie bonæ interrogatio in Deum.* Ubi per depositionem sordium carnis intelligi externam abluionem aquæ, sive lavacrum corporis docent Lyranus, Estius, Menochius, A Lapide, alii. Quid ergo mirum, si Judæis de circumcissione, & lege superbientibus, inquit Apostolus, *Lex non justificat, circumcisio nil valet?* Etiam baptismus nil valet, quatenus est corporis lavacrum; valet tamen plurimum, in quantum est fidei signaculum, & Sacramentum, quod, tanquam res typo, circumcissioni succedit.

Tertio loco opponuntur nobis Patres, qui unanimiter tradunt circumcissionem datam in signum Judaici populi. Horum vero testimonium produximus prop. 2. At quoniam postea demonstravimus, agnosci ab iisdem Patribus institutæ circumcissionis causas alias; diluenda ea loca remanent, in quibus videntur apertè affirmare, quod nullo pacto circumcisio fuerit in originalis culpæ remedium. Itaque Iustinus in Dialogo cum Tryphone pag. 241. de Abrahamo inquit, *Circumcisionem in signum, non in iustitiam accepit*; postea circumcissionem non justificasse probat ex quo circumcisæ non fuerint mulieres his verbis: *Et quod genus muliebri circumcissionis carnalis capax non est,*

est, satis ostendit in signum datam circumcisionem istam, & non ut iustitia opus. Atque Justinum docuisse, circumcisionem minime datam Judæis, ut iusti inde fierent, & originale eorum deleteretur peccatum, indubitatum esse contendit in Apparatu ad Bibliothecam maximam. Tom. 2. cap. 6. §. 23. Cl. Nicolaus Le Nourry. 11. Irenæus lib. IV. cap. 16. pag. 246. ait: *Quoniam autem circumcisionem non quasi iustitiæ consummationem, sed in signum eam dedit Deus, &c. & infra: Non per hæc justificabatur homo.* Chrysostomus hom. 27. in Genesim pag. 331. statutam docet circumcisionem, non quod ad animæ salutem proficere posset aliquid, sed ut hoc grati animi indicium, quasi signum, & sigillum circumferrent Judæi: & hom. 29. in Genesim pag. 568. Cur enim, inquit, octo dierum infans circumciditur? *Tempus autem definitum a benigno Deo duobus de causis opinor: una, ut in ætate immatura facilius circumcisionis in carne molestiam ferre queat; alia ut rebus ipsis disceremus, quod id animæ nihil conducatur, sed hoc fiat signi gratia.* Adde Tertullianum adversus Judæos cap. 2. & 3. Epiphanium hæresi 8. ac 30. Ambrosium epist. 74. ad Irenæum, & alios.

Resp. laudatos Patres nequaquam adversari Augustino: quippe dum inquirunt, circumcisionem fuisse signum ea causa datum Judæis, ne gentibus commiserentur, illam tantum considerant, ut carnis signaculum, ut sequestratam a fide Mediatoris, ut aliquando abrogandam; haud denegantes circumcisioni, quatenus erat religionis symbolum, fideique in promissum Reparatorem signum protestativum, ac Sacramentum, prærogativas alias complures: alioqui iidem Patres quomodo tam diserte affirmassent, ipsammet carnis circumcisionem fuisse fœderis cum Abraham initi, divinarumque promissionum symbolum, typum baptismi, signum innovationis spiritus circumcisionis cordis, exspoliationis carnis, quæ nonnisi ex divina institutione possunt rei sensibili convenire? quomodo etiam asseruissent, circumcisionem fuisse signum illius temporis, cum etiamnum Judæi in tesseram gentis suæ illam circumferant? Aliter ergo de circumcisione nuda, & legali, aliter de ea, ut symbolo ac sacramento, ratiocinandum est nobis; & antiqui Patres recentioribus eodem lumine pro divinarum gratiarum mensura collustratis, hac ratione conciliandi.

Singillatim verò hæc repono. De Justino ait eo loci Le Nourry, aliter vidum Augustino, aliisque Patribus. Potest hæc responsio adhiberi. Nunquid enim Justino subscribimus, ubi in 2. Apologia adstruit Angelorum cum mulieribus concubitus, ubi in Apologia prima pronuntiat dæmones nondum sempiterno igne torqueri, ubi in Dialogo cum Tryphone adhæret Millenariis, quæ dogmata tunc temporis nondum explorata, posterius diligentius discussa abjecerunt? At responsio nostra est, Justinum ibidem contra Judæos disputantem duo demonstrare: unum quod circumcisio salutem non contulerit



natura sua, nec sit proinde quolibet tempore necessaria; alterum, quod etsi plura in ea latebant mysteria, adimpletis tamen figuris erat omnino abroganda. Ut primum ergo demonstret, eadem pag. 241. inquit: *Videtisne elementa, & primordia rerum non cessare, neque sabbata agere? Manete sicut generati estis. Si enim ante Abraham non fuit usus circumcisionis, neque ante Moysen celebrationis sabbati & feriarum & oblationum; neque nunc quidem post filium Dei Jesum Christum consimiliter eis est opus. Ut alterum evincat, ait: Atque illud etiam, o viri, ego ostendere possem diem octavum circumcisionis arcanum quoddam præ septimo sacramentum habuisse, quod per hunc a Deo promulgatum sit: verum ne in præsentia in alterum divertere sermonem videar, intelligite quod clamo, sanguinem circumcisionis illius abrogatum esse, & sanguini nos salutariter credidisse: aliud nunc esse fœdus & testamentum, & aliam exivisse ex Sion legem, Jesum Christum. Ex quibus constat Justinum de circumcisione nuda, & abroganda contra Judæos disputasse.*

Ad Irenæum respondet Evardentius, eidem refragari universas Patrum Scholasticorum scholas cum suo Principe B. Thoma. Verum scopus Irenæi est adversus Marcionem demonstrare vetus testamentum non fuisse opus diaboli, neque contrarium novo: quod Irenæus probat ex quo cæremoniæ legis fuerint Evangelicæ gratiæ symbola; & circumcisio non conferret consummationem gratiæ, sed gratiam, cujus plenus effectus adimplendus erat a Christo; nec justificaret tanquam cæremonia legalis, sed ut symbolum Christi venturi: unde aperte refutatur Marcion, quoniam Diabolus Christi adversarius non instituit vetus testamentum tanquam typum novi, & venturi Salvatoris prænuntium. Præterea ibidem Irenæus non ait circumcisionem non contulisse gratiam, sed non fuisse consummatricem justitiæ, id est, non effecisse, ut circumcisi pervenirent ad regnum: quod præstat, referatis a Christo cælorum januis, baptisina; negatque illam fuisse signum otiosum & absque symbolo; quia significabat exspoliationem carnis, tenebat locum baptismi, & per fidem Mediatoris justitiam impetiebatur.

Quod attinet ad Chrysostomum, priori loco sermonem instituit de Circumcisione nuda, & a Christi fide sejuncta. Sequitur enim, *Quid igitur superbis, Judæe, in circumcisione? Disce, quod ante hanc fuerint justi multi: productisque exemplis Abel, Henoch, Noe, & Abrahami, Sic ab initio, inquit, humanum genus salutem per fidem affecutus est.* Ex quo autem Chrysostomus justitiam attribuat fidei, non sequitur quod excludat circumcisionem, tanquam symbolum fidei protestativum; quemadmodum ex adversariorum sententia, (plurimorum saltem, ac recentiorum,) in statu naturæ ita imputabatur justitia fidei, ut non excluderentur Sacramenta, & signacula sensibilia.

To. VI.

H

Eo-

Eodem pacto excipiendus est locus alter; nam aliàs Chrysostomus absurda ibidem doceret. Probans enim circumcisionem ad salutem non conducere, immediatè sequitur: *Puer enim immaturus, cum ea quæ fiunt ignorat, neque sensum eorum habet, quam inde in anima sua utilitatem accipere poterit? Illa enim sunt verè bona animæ, quæ ex electione fiunt: animæ quippe bonum opus est virtutem eligere, & malitiam fugere.* Ergo ne baptismus, dum suscipitur a parvulo, quia ignorat quæ fiunt, nec sensum habet, nec ipsum baptismum eligit, nihil ei affert utilitatis? Affert utique, nisi sit ablutio carnis profano ritu, & præter Christi institutionem administrata: atque ita sine ulla arbitrii electione potuit circumcisio parvulis opitulari, non tamen ut abscissio præputii est, & nunc sit a Judæis carnaliter, & absque ullo ad Christum respectu. Rectè Bernardus cap. 2. ad Hugonem: *Sane parvulis & necdum ratione utentibus, quia sola nocere creditur peccati contagio, non etiam mandati prævaricatio, tandiu credendum est antiqua valuisse sacramenta, quamdiu palam interdicta non fuisse conspexerit.*

Eadem responsione cliduntur, quæ ex aliis Patribus produci possunt. Tertullianus enim demonstrat adversus Judæos circumcisionem fuisse abrogandam, quoniam in se inspecta non erat in salutis prærogativam, sed in signum temporis illius. Idem est sensus Epiphani, qui hæresi viii. scribit, tandiu fuisse in usu, quoad subsequeretur circumcisio altera spiritalis, idest, baptismus. Hæresi autem xxx. primò docet, quod circumcisio olim *non erat perfecta*, quia erat futurorum signum: deinde ait non fuisse effectricem gratiæ se ipsa, & *jure quodam hæreditario*, quia sine circumcisione justificabantur mulieres: tandem ex his contra Ebionæos infert, modo circumcisionem non prodesse ad salutem: *Nihil igitur modo (inquit) illa carnis circumcisio prodest.* Græce; οὐδὲν ἀπὸ τοῦ νόμου τὸ σώζειν. *Modo*, ait, *non*, ante abrogationem. Ambrosius denique ad Irenæum scribens affirmat tantum circumcisionem fuisse sensibile signum circumcisionis spiritus. Cum hi ergo facile possint cum Augustino, magno Gregorio, aliisque conciliari, perperam affirmatur inter utrosque magnum versari dissidium: quamquam si foret; Augustino subscribendum esset, quoniam contra Pelagianos decertans hanc in rem totus incubuit, ejusque sententiam posteriores Patres, & Scholarum duces amplexi sunt; nec defunt, qui asserant *inter Ecclesie Catholice decreta jamdudum relatam*, ut inquit Fevardentius in Irenæum pag. novæ edit. 153. Ceterum licet hæc sententia contineatur in c. *Quod autem*, & can. *Ex quo*, 111. P. decreti, de Consecrat. dist. iv. n. 5. & 6. necnon cap. *Majores*, 111. Decretalium Gregorii IX. tit. 42. n. 3., ad fidem nequaquam spectat.

Opponunt ultimo, Etiam post institutam circumcisionem parvuli,

vuli, qui ante diem octavum decedebant, per remedium legis naturæ eripiebantur a damnatione, juxta communioſorem Theologorum ſententiam. Idem aſſerendum de ſœmellis. Præterea quadraginta annis in deſerto, Joſue v., non fuerunt pueruli circumciſi, quod in ſolitudine incluſi diſtinguerentur etiam præputiati a nationibus reliquis, ut inquit Theodoretus q. 3. in Joſuen, & Damascenus lib. 1v. cap. 26. Demum circumciſio Abrahæ juſtitiam non contulit: ergo nec Abrahæ poſteris.

Reſp. *Sacramenta* vim juſtificandi habere juxta voluntatem Inſtitutoris. Cum itaque Gen. xvi 1. circumciſio indiſta ſit tantum masculis, & die octava; & parvuli ante hanc diem decedentes, & ſœminæ per ſolum legis naturæ remedium, ſive per fidei proteſtationem factam aliquo ſigno ſenſibili, ſalutem conſequebantur. Neque dicas, Si circumciſio non erat neceſſaria puerulis ante octavum diem, nec ſœmellis, nec extra hebraicum populum ſervantibus naturæ legem; ecur fingitur inſtituta in remedium peccati? Dura enim remedia, ut inquit Bernardus, congruebant ſervis, quemadmodum facilia redemptis. Demonſtrandum quoque erat commune omnibus eſſe gratiam, non legem. Quia duro remedio uti ſine vitæ diſcrimine non poterant Judæi in pupulis nuper natis; in his indultum eſt per dies octo. Fœminæ item exemptæ, quoniam ætate provectiores dolore partus, & calamitatibus plurimis erant extruciandæ: iſtis propterea pro circumciſione deſerviffe ſacrificium partus, vulgata eſt Judæorum opinio. Diſpenſatum cum gentibus, ne Judæi gloriarentur ſalutem haberi per legem; & quoniam ii, qui participes non erant eloquiorum Domini, adhibere non poterant præſcriptum lege remedium, & pro ſolis Judæis inſtitutum. Si tamen gentiles voluiſſent accedere Judaïſmo, aut Phaſe Domini celebrare, ſubeunda illis erat circumciſio præputii. Hæc reſpondere malumus, quàm cum Magiſtro in 1v. diſt. 1. §. ult. reſpondere, parvulum ante diem octavam demortuum periſſe, aut forte ingruente neceſſitate ante præfixam diem præputio mutilatum: primum namque videtur abſurdum, ac nimis rigidum; alterum reſutatur perpetua Judæorum conſuetudine.

Natos in deſerto non fuiſſe circumciſos ex divina diſpenſatione tradunt permulti, quoniam ad Dei nutum Hebræis caſtra movenda erant: ſed hujus diſpenſationis nullum extat veſtigium. Ratio a Theodoreto, & Damasceno producta neque omnibus adverſariis noſtris probatur; quippe circumciſio data fuit etiam in ſignum ſœderis initi a Deo cum Abrahamo, in typum circumciſionis ſpiritualis, & in ſymbolum, ac promiſſionem Chriſti: unde nec in ſolitudine debebat omitti; aliàs omitenda quoque fuiſſet, ſi omnes habitatores terræ Chanaan religionem ſuſcepiſſent Judaicam, aut aliqua Hebræorum familia ſolitariam vitam egiſſet. Opinio Talmudiſtarum aſſerentium

prætermiffam circumcifionem, quoniam in deserto flabat borealis ventus, vulnera exasperans, adeo infufa est, ut confutatione non egeat. Subfcribendum est ergo Auguftino docenti in deserto prætermiffam circumcifionem negligentia, culpa, & incredulitate parentum. *Quidam enim de Aegypto exeuntium filii*, (inquit S. P. q. iv. in Iofuem) *in illo populo incircumcisi erant, quos potuit circumcidere Iesus; illorum fcilicet filios qui genuerunt in deserto, & contempserunt eos circumcidere, quod inobedientes erant legi Dei.* Hanc fententiam non rejicit magnus Aquinas 3. p. difp. 70. art. 4. ad 3. probabiliorem cenfet Eftius in iv. dift. 1. §. 31. veram effe demonftrat Vafq. in 3. p. difp. 164. cap. 2. Inconcufla apparebit legenti librum Numerorum capite xlv. 3. & Iofue v. 6.

Quod poftremo loco dictum eft de Abraham, his verbis diluitur ab Auguftino lib. iv. de Baptifmo cap. 24. num. 31. *Sicut ergo in Abraham præceffit fidei iuftitia, & acceffit circumcifio fignaculum iuftitiae fidei; ita in Cornelio præceffit fanctificatio fpiritalis in dono Spiritus fancti, & acceffit facramentum regenerationis in lavacro baptifmi. Et ficut in Ifaac, qui oétavo fuæ nativitatæ die circumcifus eft, præceffit fignaculum iuftitiae fidei; & quoniam patris fidem imitatus eft, fecuta eft in crefcente ipfa iuftitia, cujus fignaculum in infante præcefferat: ita in baptizatis infantibus præcedit regenerationis facramentum; & fi Chriftianam tenuerint pietatem, fequetur etiam in corde conversio, cujus myfterium præceffit in corpore.* Hactenus de Circumcifionis institutione, & origine.

## C A P U T V.

*Pertraétatur de numero Sacramentorum Legis gratiæ.*

**I**N nova quoque lege fuiffe instituenda *Sacramenta* nullus five Catholicorum, five hæreticorum negat, fi eos excipias, qui fe agi folo interiori fpiritu autumantes nullis vifibilibus fignis utuntur. Coadunari liquidem in veram Chrifti religionem debemus fignaculis fenfibilibus; egemusque ob naturæ infirmitatem, ac vulnera divinæ gratiæ instrumentis, quibus fanemur, erigamur, & perficiamur. Ablati itaque facramentis veteribus, quoniam impletum eft quicquid prænuntiabant; *alia inftituta funt*, inquit lib. xix. contra Fauftum fapientiffimus Auguftinus, *virtute maiora, utilitate meliora, actu facilia, numero pauciora.* Maiora virtute, quia gratiam non folum promittunt, fed etiam conferunt: meliora utilitate, quia non folum a perditione fubtrahunt, verum etiam perducunt ad regnum: facilia actu, quoniam non perficiuntur mutilatione carnis, mafcatione pecudum, oblatione munerum; fed humilitate cordis, comuni-

munibus elementis, liberali dispensatione; pauciora numero, quoniam innumeris expiationibus Pœnitentia una successit, tantisque Arcæ, & mensæ mysteriis Panis duntaxat Eucharisticus.

De *Sacramentorum* numero nunc dicturis bellum intentant Novatorum phalanges, qui modò unicum *Sacramentum* admittunt, ut Lutherus; modò duo, ut Calvinus, & Philippus Melancthon; nunc tria, ut Brentius, & idem Philippus in Apologia Augustana, & Confessio Vitthembergensis: aliquando quatuor, ut Lucas Lossius in Catechismo: nonnunquam sex, ut Wilhelmus Postellus in principio libri, quem inscripsit *Pantbenosian*. Collegit varias hæreticorum sententias Lindanus lib. iv. Panopliæ cap. 6. Jacobus Latomus adversus Tindalum pag. 193. Bellarminus lib. 11. Sac. cap. 23. Merbesius 3. P. q. 2. Cardinalis Gotti Tom. xiii. q. 3. dub. 2. &c. Verum communis, & magis recepta hæreticorum sententia est, *Sacramenta* propriè dicta esse tantum duo, idest, *Baptismum*, & *Cœnam*, ut scribunt Lutherus sub finem libri de Cap. ivit. Babyl. & Calvinus in Antidoto adversus Sessionem septimam Tridentinæ. At contra hanc perversam, hæreticamque sententiam propugnant Catholici omnes, (uno excepto Durando, qui in iv. dist. 26. q. 3. etsi aliquo sensu Matrimonium esse Sacramentum pronuntiet, negat tamen in producendo gratiam convenire eam Sacramentis ceteris) *Sacramenta* esse septem, videlicet, *Baptismum*, *Confirmationem*, *Eucharistiam*, *Pœnitentiam*, *Extremam-Uctionem*, *Ordinem*, & *Matrimonium*, ut fancivit die 3. Martii anno 1547. sess. v. canone primo Oecumenica Synodus Tridentina.

PROPOSITIO I. Septem sunt, nec plura, nec pauciora, Ecclesia *Sacramenta* nuper commemorata.

Catholica hæc veritas demonstratur primo à Scripturis; quæ de Baptismo agunt Matt. ult. 19. *Euntes docete omnes gentes, baptizantes eos in nomine Patris*, &c. item Marci xvi. 16. Ad Ephes. v. 26. ad Colofs. 11. 12. prima Petri 111. 21. &c. De Confirmatione legimus Act. v. 11. 27. *Tunc imponebant manus super illos, & accipiebant Spiritum sanctum*. De Eucharistia Mat. xxv. 26. & 1. ad Corinth. xi. 23. *Accipit panem, & benedixit, ac fregit, &c.* atque Joannis vi. 41. *Ego sum panis vivus, qui de cælo descendi*. Pœnitentiæ institutionem, & vim gratiam conferendi ostendit quod legitur Joan. xx. 22. *Accipite Spiritum sanctum, quorum remiseritis peccata, remittuntur eis*. Spectat ad Uctionem - extremam quod in Epistola Cath. ait Jacobus cap. v. 14. *Infirmatur quis in vobis? inducat presbyteros Ecclesiæ, & orent super eum ungentes eum oleo in nomine Domini*. Ordinis meminit Paulus 1. ad Timoth. iv. 14. *Noli negligere gratiam, quæ in te est, quæ data est tibi per prophetiam, cum impositione manuum Presbyterii*; & 2. Epist. cap. 1. 6. *Admonco te, ut resuscites gra-*

*gratiam Dei, quæ est in te per impositionem manuum mearum.* De Matrimonio denique Matth. XIX. 6. scriptum extat, *Quod Deus conjunxit, homo non separet:* & ad Ephesios v. 32. *Sacramentum hoc magnum est, ego autem dico in Christo, & in Ecclesia.* Hæc autem scripturarum sanctarum loca, ubi singillatim disputabitur de quolibet Sacramento, vindicabimus ab ineptis, perversisque cavillationibus hæreticorum.

Corroborant deinde Ecclesiæ dogma sanctorum Conciliorum definitiones. Ac missis Constitutionibus Ricardi Poorefarum Episcopi, de quibus vide Tom. XI. Concil. Labbei pag. Paris. edit. 250. Londoniense Concilium celebratum anno 1237. auctoritate Ottonis Apostolicæ Sedis Legati, eodem Volum. XI. pag. 532. hæc habet: *Sacramenta principalia, quæ sunt, & quot, propter simpliciores duximus exprimendas, sunt enim Baptismus, Confirmatio, Pœnitentia, Eucharistia, Extrema-unctio, Matrimonium, & Ordo.* Constantiense Concilium celebratum anno 1415. eundem numerum Sacramentorum agnoscit, ubi sess. XV. damnat articulum VII. Joannis Hus asserentis, *Sacerdotes quomodolibet criminosè viventes Sacerdotii polluant potestatem, & sicut filii infidelium sentiunt infideliter de septem Sacramentis Ecclesiæ, de clavibus, officiis, &c.* Vide memoratæ Collect. Tom. XII. pag. 130. At Concilium Florentinum, & Romanus Pontifex Eugenius IV. in Decreto unionis edito anno 1439. Tom. XII. pag. 534. ita definit: *Novæ legis septem sunt Sacramenta, videlicet, baptismus, confirmatio, Eucharistia, pœnitentia, extrema unctio, ordo, & matrimonium.* Recensentur eodem ordine septem Sacramenta in Tridentino Canone paullo supra citato, Tom. XIV. pag. 776. hunc in modum: *Si quis dixerit, sacramenta novæ legis non fuisse omnia a Jesu Christo Domino nostro instituta, aut esse plura, vel pauciora, quam septem, videlicet baptismum, confirmationem, eucharistiam, pœnitentiam, extremam unctionem, ordinem, & matrimonium, aut etiam aliquod harum septem non esse verè, & propriè Sacramentum, anathema sit.*

Tertiò probatur Ecclesiarum traditione: ut enim scribit Tertulianus de Præscript. cap. 21. *Sine dubio tenendum est, quod Ecclesiæ ab Apostolis, Apostoli a Christo, Christus a Deo accepit: omnem verò doctrinam de mendacio præiudicandam, quæ sapiat contra veritatem Ecclesiarum, & Apostolorum, & Christi, & Dei.* Traditionem hanc esse in Ecclesia Romana omnium aliarum Magistra, commonstrant quæ nuper produximus œcumenicorum Conciliorum, Florentini, ac Tridentini decreta: quæ etsi post sæcula multa fuerint celebrata, numerum tamen *Sacramentorum* non primo invexerunt, sed tanquam omnibus compertum recensuere, ita, ut nihil haberent hac in re quid Florentinis Patribus opponerent ipsi Græcorum schisma-  
tum

tum Auctores. II. Longe ante memoratas Synodos de baptismo, pœnitentia, matrimonio, & reliquis Sacramentis emittit decretalem, *Ad abolendam*, lib. v. Decret. Greg. tit. 7. cap. 9. Lucius III. qui anno Domini 1181. iniiit summum Pontificatum. III. Floruit paullo ante, & circa annum Domini 1140. Magister sententiarum Petrus Lombardus, qui septenarium *Sacramentorum* numerum adstruit in iv. dist. 2. Is verò non semel ab adversariis erroris insimulatus est circa alia doctrinæ capita: articuli enim ejus sex ac viginti, ut constat ex additione ad iv. sententiarum libros rejiciuntur: nec defuere, qui ipsum. hæresis nomine detulcrint ad Alexandrum III. Illum quoque exagitavit Joachim Abbas circa Sanctæ Trinitatis dogma orthodoxum; tametsi sententiam Lombardi. probavit sub Innocentio III. Lateranense Concilium. Quod tamen spectat ad numerum *Sacramentorum*, in nullo Commentariorum, quorum supra duo millia in lucem feruntur prodiiisse, illius sententia refellitur. Traditionis autem antiquæ indicium est omnium conspiratio, ut diximus. iv. Volum. pag. 437. Idem asserendum de Hugone Viëtorino, qui floruit circa annum 1130. & tertio suorum operum Volumine de omnibus septem *Sacramentis* eruditè pertractat. Floruerunt quoque ante Florentinum percelebres alii viri, qui tradiderunt eundem *Sacramentorum* numerum, ut Lucas Tudenſis, qui vixit circa annum 1240. & de septem *Sacramentis* scripsit libro 2. adversus Albigenſes Tom. xxv. Biblioth. PP. pag. 214. & Paschasius Ratbertus, qui obiit anno 1351. & septem *Sacramentorum* novi Testamenti meminit lib. iv. in Lament. Jeremiæ Tom. ejusdem Biblioth. xiv. pag. 812. IV. Eamdem Romanæ Ecclesiæ traditionem comprobant testimonia veterum suis quæque locis producenda.

Africana Ecclesiæ Romanæ contermina, ac dogmate conjuncta, septem *Sacramentorum* usum adstruit, ut differt. 2. de Ecclesiâ Africana demonstrat eruditus Schellstratenus. Tertullianus enim illius Ecclesiæ antiquissimus cap. 40. de Præscript. commemorat baptismum, confirmationem, & Eucharistiam: quæ tria in idolorum mysteriis diabolus æmulatur. Cyprianus de baptismo pertractat epist. 23. de Confirmat. ep. 70. de Eucharistia epist. 63. ad Cæcilium. Optatus quoque Milevitanus baptismatis meminit libro adversus Parmenianum primo, & Eucharistiæ lib. 2. De Sacramento pœnitentiæ agunt Tertull. de Pœnit. Cyprianus de lapsis, Viëtor Vitenſis lib. 2. de Persecut. Vandalica. De Sacramento Ordinis Concilium Carthaginense iv. De Matrimonio Tertullianus de Monogamia cap. 5. De Unctione extrema Auctor libri de beatitudine Catholicæ conversationis. De omnibus verò Sacramentis fulgidissimum Africanæ Ecclesiæ lumen Augustinus: de quo nonnulla infra, quoniam Calvinus autumat Sanctum Patrem duo tantum *Sacramenta* agnovisse. Profecto quæ hic in-

innuimus, erunt locis distributa suis, ac interim sat erit legere eo loci Schelstratenum.

Orientalis Ecclesias perpetuò septem *Sacramenta* agnovisse, facillimum est demonstrare. Primò enim singulorum inveniuntur apud eos Ritualia, quorum pleraque edidit Jacobus Goar, & Isaac Habertus; collegitque illustriora Edmundus Martene. Rectè Allatius contra oppugnantes Ecclesiæ Orientalis & Occidentalis consensum, pag. 820. *Si cæci non sunt*, inquit, *Græcorum rituales libros, Menæa, Tyrodia, Pentecostaria, Paracleticas, Eucbologia sibi comparent, percurrant, examinent*. II. Eandem Ecclesiæ Græcorum traditionem inferimus ex illius Ecclesiæ conspicuis, clarissimisque Scriptoribus. Photius primùm, quamvis a Romana Ecclesia schismate separatus, in Biblioth. cod. 222. pag. 595. præter baptismum, & Eucharistiam, alia sacramenta commemorat. Simon Thessalonicensis, cujus opera extant Tom. xxii. Biblioth. PP. plura de Eucharistia de Ordine, & de Pœnitentia pertractavit. Plura de septem Sacramentis Epiphanius Græcus in libro de Religione Christiana a Petro de Monte Brixienfi latinitate donatus. Gabriel Philadelphiensis de septem *Sacramentis* prolixè agit, inter opuscula a Simonio collecta de fide Orientalis Ecclesiæ pag. 32. Joannes Paleologus septem Sacramenta profitetur in Confessione fidei: quam vide apud Raynaldum Tom. xvi. Annal. Eccles. ad annum Ch. 1369. n. 2. III. Exortis recentioribus Lutheri & Calvini hæresibus, accepta a Vitthembergensibus Confessione Augustana, anno 1576. Hieremias Patriarcha Constantinopolitanus gravissimam Censuram rescripsit latinitate, & luce donatam a Stanislao Socolovio: in qua cap. vii. pag. 59. legitur ex Patrum traditione, *unam sanctam Catholicam, & Apostolicam totius populi Christiani Ecclesiam esse: eorum hominum, qui ea omnia, quæ legibus antiquis perscripta sunt, a sacrisque canonibus definita, ab ipso denique Spiritu Dei per sanctos Patres sancita & firmata, & sanctè servant & tuentur: in ea item ipsa Catholica & orthodoxa Ecclesia septem divina Sacramenta esse, baptismum scilicet, sacri unguenti unctionem, sacram communionem, ordinem, matrimonium, pœnitentiam, & extremæ unctionis oleum*, & pag. 65. *Hæc igitur sunt Ecclesiæ Dei Sacramenta, totque numero, hocque modo, & ratione, quod dictum est, nobis tradita*. Memoratus Gabriel Philadelphiensis Metropolitæ in libro de Sacramento Pœnitentiæ edito Venetiis anno 1600., & 1651. a Morino in Appendice ad Commentarium de sacris Ordinibus, pag. 151. tractans de iis, quæ Sacerdos exquirere debet a Pœnitente, ait: *Præterea interrogabit eum, num dubitet de septem jam dictis Ecclesiæ Sacramentis*. V. Anno 1642. a Parthenio Constantinopolitano Archiepiscopo celebratum est Concilium, cujus acta extant apud Labbeum Tom. xv. pag. 1714. ibique num. xv. de Calvino ita



ita legitur : *In decimoquinto negat Ecclesiæ Sacramenta quinque, Sac-  
cerdotium, sacram unctiōnem, sacram oleum, confessionem cum pœ-  
nitentia, & honorabiles nuptias; quæ omnia, ut sacra, & divinam  
gratiam conferentia, antiqua nobis traditio reliquit.* Proximo num.  
xvi. asseritur, Calvinum nec de aliis duobus, *Baptismo* scilicet, &  
*Eucharistia* recte sentire, quoniam tenet justificatum in baptismo non  
posse justitiam amittere, in Eucharistia autem negat verum Christi  
corpus adesse. Coptos Jacobitas recipere Sacramenta septem demon-  
strat eruditus Sollerius in Appendice ad Patriarchas Alexandrinos,  
sect. 111. pag. 140. ex Vanslebīo, Coptorumque Ritualibus. Adeas  
Aët. SS. Boll. Tom. v. Junii; necnon Goarium in Eucholog. Græca  
pag. 367. Leonem Allatium de Ecclesiæ Occiden. & Orientalis perpetua  
consensione lib. 111. cap. 17. pag. 1297. Petrum Arcudium de Sa-  
cramentis lib. 1. cap. 2. pag. 5. Emmanuelem a Schelstrate de Disciplina  
Arcani cap. vii. art. 1. pag. 105. Franciscum nostrum Farvacques  
de Sacram. in gen. cap. 3. §. 3.

Clarissimus Estius in iv. dist. 1. §. 13. scribit hunc numerum *Sa-  
cramentorum* teneri etiam ab Ecclesiâ Aethiopica, ut patet ex Da-  
miano a Goes, qui de eorum religione scribens singulorum memi-  
nit. At lapsus est Theologus accuratissimus; nam in libro de Fide  
Aethiopum edito Lovanii anno 1540. & 2. Volumine Hispaniæ illu-  
stratæ pag. 1307., habetur Aethiopes, *neque confirmationem, ne-  
que extremam unctiōnem olei habere pro Sacramentis.* Verum in eo  
fidei Aethiopum libello permulta continentur absurda, ut, animam  
univerſorum hominum semine generari, & esse lucernam ex anima  
Adæ ab initio orbis succensam; servandam ex Apostolorum instituto  
circumcisionem; infantes in uteris matrum existentes *Sacramento* cor-  
poris Christi enutrirī, & sacrari, aliaque id genus inepta & puerilia.  
Sciendum tamen est illam de fide Aethiopum narrationem esse cujus-  
dam Aethiopis, cui nomen Zaga-Zabo, legati ad Joannem III. Lusita-  
niæ regem, & labefactæ religionis; nam David Aethiopum imper-  
ator in literis ad Clementem VII. Pontificem Romanum datis anno  
1524. eundem verum Dei vicarium, Romanam Ecclesiam sanctam, &  
Apostolicam, hujusque dogmata inconcussa esse fatetur. Davidis epi-  
stolam profert eo loci Damianus a Goes. Eiusdem meminit Raynaldus  
Tom. xix. ad annum 1533. n. 23. Lique etiam ex Opusculo Petri Ab-  
batis Aethiopis, cuso Romæ anno 1549. continente *Notas in Ritum  
baptismi*, fol. 19. Aethiopes agnoscere *Sacramentum* confirmationis,  
sed illud conferre statim post baptismum: quod, & comprobatur *Ordo  
confirmationem administrandi*, Tom. xxvii. Bibl. PP. pag. 643. At-  
que hinc patet, cur præcitatus Zaga-Zabo erraverit dicendo Aethiops  
Confirmationem inter *Sacramenta* non recensere; quod nimirum una  
cum baptismo, non separatim, illam noverit ministrari. Postremo Ae-

thiopes Orthodoxi recipiunt professionem fidei ipsi ab Urbano VIII. præscriptam, in qua continetur septenarius Sacramentorum expressus numerus. Atque his satis arbitror manifestam Ecclesiæ universalis in hoc catholico dogmate consensionem.

Quarto loco producam ipsorum hæreticorum assensum. Ac primo Hussitæ, dum ipsos ministros septem *Sacramenta* non conficere dogmatizabant, (ut constat ex sess. xv. Concilii Constantinensis) illorum profecto numerum universis, singulisque compertum minime inficiabantur. Anglos sub Henrico VIII. septem *Sacramenta* retinuisse, manifestum est, & ex confessione hæreticorum demonstratum a Bossuet lib. vii. Hist. Variat. num. 37. Lutherani in Apologia Confess. Augustanæ ad art. xiii. tria Sacramenta recipiunt, *baptismum, confirmationem, absolutionem*. Ordinem inquit non esse rejiciendum, si accipiatur pro verbi Dei ministerio. Haud negant confirmationem, & unctionem extremam sacras cæremonias esse, à Patribus derivatas: in matrimonio divinam institutionem agnoscunt; ideoque numerum *Sacramentorum* non rejiciunt, nisi quatenus sententia nostra vim habent gratiam efficiendi. De numero ergo *Sacramentorum* frustra blaterant. Videtis illustrem Bossuetium præcitati Operis lib. iii. num. 48. Valdenses, quos plurimum reformatæ, ut dicuntur, Ecclesiæ commendant, nullum *Sacramentum* inveniuntur negasse, sed cæremonias duntaxat. Lutherus de Captivitat. Babylonica, & in Respons. ad articulos inde extractos, scripsit se *non damnare septem Sacramenta*, quamvis existimaverit non posse ex scripturis probari. Philippus Melancthon in locis suis communibus posterioribus inquit se *non rixaturum cum quocumque de numero Sacramentorum*. In Conventu Ratiponensi nulla fuit hac de re controversia. Adeas Consultationem Cassandri ad articulum 13. Confessionis Augustanæ. Demum Grotius in discussione Rivetiani Apologetici Tom. iv. pag. 698. ait: *Sacramentorum vides, quamquam per se latius patet, potuit tamen strictius sumpta ad septem illos actus externos interna significantes referri, quorum augustinior in Scripturis est mentio, ut Baptismi, Matt. xxviii. 19. Marci xvi. 16. Confirmationis, Act. viii. 17. Eucharistiæ, Matt. xxvi. 26. Marci xiv. 22. Lucæ xxi. 18. 1. Corinth. xi. 23. Ordinationis, 1. Timoth. iv. 14. v. 22. 11. Tim. 1. 6. Pœnitentiæ, Matt. xxviii. 18. 1. Corinth. v. 11. 11. Corinth. 11. 7. Matrimonii, Ephes. v. 32. unctionis infirmorum, Marci vi. 13. Jacobi, v. 14. Eminere inter ea, quæ veterum more Sacramenta dici possunt, illa septem agnoscant & Lutherus, & Melancthon.*

Tandem etiam probabili ratione confirmatur prædictus numerus Sacramentorum. *Per baptismum enim*, inquit Florentinum Concilium cit. pag. 534. *spiritualiter renascimur; per confirmationem augemur in gratia, & roboramur in fide: renati autem & roborati, nutri-*

*trimur divina Eucharistia alimonia . Quod si per peccatum agritudinem incurrimus anima , per penitentiam spiritualiter sanamur ; spiritualiter etiam , & corporaliter , prout anima expedit , per extremam Unctionem : per ordinem vero Ecclesia gubernatur , & multiplicatur spiritualiter ; per matrimonium corporaliter augetur . Confimilis est ratio D. Thomæ 3. p. q. 65. art. 1. exemplo earum rerum , quæ temporali vitæ necessaria sunt , confirmata : & quam profert Catechismus Romanus P. 11. cap. 1. num. 20. Gabriel Philadelphienfis paulo supra laudatus cap. v. demonstrat septem esse sacramenta ex Theologalium , & Moralium virtutum numero , deinde ex septem donis Spiritus sancti , tum ex septem columnis , quas Sapientia excidit ad Ecclesiæ falcimentum , ex septem buccinis , quæ muros urbis Jericho funditus everterunt , ex septem lucernis , quas vidit Propheta Zacharias , ex septem Naaman Syri lavationibus in Jordane , ex septem gradibus eorum , qui vitam agunt spiritualem , ex septem denique donis præcipuis resurgentium . Plura in his digna lectu . Hieremias Patriarcha in Censura Calvinianæ hæresis hujus septenarii numeri hanc ex Simone Thessalonicense profert congruentiam , petitam ex incommodis , quæ ex Adæ lapsu promanaverunt : *Baptismus* ( inquit ) *nos per Spiritum sanctum regenerat , cum mundam illam & impassibilem generationem nostram vitio primi parentis perdiderimus , & iniquitatibus concipiamur . Sacrum porro Chryisma , sive confirmatio , primum illud sigillum imprimit , ipsamque imaginem divinam in nobis renovat , roburque animæ auget , quæ omnia inobedientia primi nostri parentis vel deperdita , vel labefacta fuerunt . Sacra vero communio nos cum Christo jungit : per eamque veri corporis , & sanguinis ejus participes efficiamur . Et ut per illam lethalem escam omnes mortui sumus , ipsoque paradiso ejecti , ita per corporis & sanguinis Jesu Christi spirituale alimentum vitæ æternæ restituimur , & corruptionem , item deponentes cum ipso immortali Deo conjungimur , qui propter nos in carne nostra mortalis fieri voluit . Sacer autem ordo ea potestate , & facultate nos donat , quæ est ipse præditus qui fecit & creavit nos . Et quemadmodum a principio omnium rerum , quæ sub aspectu cadunt , nos Dominos & principes constituit ; ita nunc longe excellentius per Sacerdotium principes nos & præsidēs esse voluit : cæli enim ipsius claves Apostolis , illisque omnibus , qui perpetua successione in eorum loca suffici debebant , credidit . Nuptia vero condescensionis cujusdam , & indulgentiæ divinæ in hac mortali vitæ esse videntur , ob liberorum successione , donec universitas hac sua corruptione consistat . Neque enim voluit Deus , ut more belluarum ex fluxu & sordibus homo concipiatur , sed ipse benedixit nuptiis , ut non sine celesti benedictione ortus nostri initia , & principia jaciantur . Penitentia vero correctionem , & re-stauracionem a lapsu efficit : quandoquidem post sacrum baptismum**

nulla jam alia curatio superet, præter eam quæ fit per conversionem; per lacrymas, eorumque delictorum quibus Deum offendimus plenam detestationem, ac per ipsam peccatorum fugam: in quo solo remedio, & curatione remissionis peccatorum nobis relictum est donum. Sacrum vero oleum, sive ultima unctio nobis divinitus tradita, & ipsa est divinum Sacramentum, atque ceremonia, divina nobis misericordia typum representans; proptereaque & ipsa remissionem peccatorum præbet, & ex multis infirmitatibus nos sublevat, eosque, qui digne illa utuntur, sanctificat. Et hæc quidem omnia salutis nostræ remedia ipse Jesus Christus, & Dominus noster nobis tradidit, & sancti ejus Apostoli. Ita pag. 60. & seq. Hæc nos ex industria collegimus, tum quia Scholastici de hoc Ecclesiæ dogmate generatim perpauca tractant, & monumenta hæc fere omnia prætermittunt, tum quia mire commostrant Occidentalis, & Orientalis Ecclesiæ consensum, tum denique quia videntur nobis pulcherrima, & quæ legantur dignissima.

PROPOSITIO II. Falsum est Augustinum agnovisse, quemadmodum heterodoxi autumant, duo tantummodo Sacramenta.

Quoniam Calvinus, Melancthon, & hæreticorum alii, ut adstruant numerum *Sacramentorum* binariam, abutuntur quibusdam Augustini testimoniis infra explicandis; non abs re erit, si demonstremus sanctum protoparentem plura *Sacramenta*, & quidem propria, agnovisse: quod cum jam eviderint Wilhelmus Lindanus in Panoptia lib. IV. cap. 7. Hieronymus Torrensis in Confess. Augustiniana lib. III. cap. 1. num. 5. Ruardus Tapperus in Explicat. Articulorum, quos jussu Caroli V. edidit adversus hæreses an. 1544. sacra Facultas Lovaniensis, art. 1. Farvacques noster Insulensis, ac Theologi alii clarissimi, brevi nos ad hunc modum confirmamus. I. Principio Sanctus Pater, etsi alicubi duo tantum Sacramenta commemorat, idest, Sacramentum Baptismi, & Eucharistiæ, alia tamen minime excludit, nam scribens ad Januarium ep. 118. nunc 54. num. 1. & de Sacramentis novæ legis pertractans ait, *Sicuti est baptismus Trinitatis nomine consecratus, communicatio corporis & sanguinis ipsius, & si quid aliud in Scripturis Canonice commendatur*. Ubi, si duo tantum noverat *Sacramenta*, cur non ait, *Quæ sunt baptismus, &c.* sed plurimum exemplum proferens, inquit, *Sicuti est Baptismus?* cur etiam addidit, *Et si quid aliud, &c.* 2. Eadem phrasi, *Sicuti est baptismi Sacramentum, & celebratio corporis, & sanguinis Domini*, utitur Augustinus lib. III. de Doctr. Christ. cap. IX. num. 13. ideoque frustra hunc locum obijciat Calvinus. II. Augustinus supponit, dum fideles alloquitur, Ecclesiæ Sacramenta plura esse, quam duo, nec expresse recenset illorum numerum, quoniam putat iisdem fidelibus esse notissima; nam in Psalmum 141. num. 9. ait: *Multa Sacramenta aliter, atque aliter accipimus, quadam sicut nobis ore accipimus, quadam*  
per

*per totum corpus accipimus* . Dum ait , *Malta* , profecto plusquam duo supponit : dum inquit , *sicut nosis* , ostendit se de re notissima habere sermonem : dum addidit , *quadam ore accipimus* , loquitur de corpore , & sanguine Domini : dum sequitur , *quadam per totum corpus* , innuit non solum baptismum , verum etiam Unctionem . extremam , quæ duo Sacramenta olim per totum corpus accipiebantur . III. Libro 2. adversus Parmenianum cap. xiii. num. 28. aperte Augustinus sacram ordinationem inter Sacramenta recenset , scribens : *Utrumque enim Sacramentum est ( Baptismus , & Ordo ) & quadam consecratione utrumque homini datur , illud cum baptizatur , istud cum ordinatur* . Docet ibidem Augustinus , sicuti Baptismus , ita ordinationem non iterari , *ne ipsi Sacramento fiat injuria* . Ut ergo Baptismus , ita Ordinem Augustinus inter Sacramenta connumerat . IV. Idem Augustinus lib. 2. contra litteras Petiliani cap. 204. num. 139. scribit : *Et in hoc unguento ( de quo Lucæ xxiv. 47. ) Sacramentum Chrifti vultis significari ; quod quidem in genere visibilium signaculorum sacrosanctum est , sicut ipse baptismus* . En dilucide ab Augustino assertum etiam Sacramentum Confirmationis . V. In libro v. contra Donatistas cap. xx. num. 28. probans Sacramenta etiam per improbos administrata suos producere effectus ita ratiocinatur : *Si ad hoc valet quod dictum est in Evangelio , Deus peccatorem non audit , ut per peccatorem Sacramenta non celebrentur ; quomodo exaudiat homicidam deprecantem , vel super aquam Baptismi , vel super Oleum , vel super Eucharistiam , vel super capita eorum , quibus manus imponitur ?* Quo in loco distincta singulorum materia Augustinus quatuor scilicet Sacramenta enumerat , idest , Baptismus , Confirmationem , Eucharistiam , Ordinem , atque ut Lindano placet , etiam Pœnitentiam , quam Veteres promiscue impositionem manuum , & Absolutionem appellaverunt . Loca , quibus Augustinus de quolibet Sacramento speciatim pertractat , ubi & nos peculiariter de singulis disputabimus , data opera explicabuntur .

AD ARGUMENTA HARRETICORUM RESPONSO .

Opp. 1. Nullibi divina Scriptura septem enumerat *Sacramenta* , nisi forte Apocalypsi xvii. 7. ubi *Sacramenta* dicuntur septem capita bestiarum . Non ergo alicubi , nisi in Ecclesia Antichristi , septem *Sacramenta* connumerantur .

Resp. heterodoxos nihil è Scripturarum silentio adversus nos concludere , quippe contendimus , non sola Scriptura , verum etiam Apostolicis Traditionibus Ecclesiæ inconcussa dogmata contineri ; quod etiam ex hoc capite evincitur : nam cum de numero *Sacramentorum* Scriptura fileat ; qua norma hunc definiemus , nisi ex traditione majorum ?

rum? Deinde negamus in Scripturis Canonicis singula *Sacramenta* minime commendari. Illud præterea ab adversariis petimus, ubi *Sacramenta* in divinis Scripturis esse duo, vel tria tantummodo, declaratur? Scire etiam cupimus, quare hæretici credant quatuor esse Evangelia, cum in sacris literis nullibi scriptum sit, num sint quatuor, vel plura? Futilis ergo, fracta, atque nimium infirma est prior hæc impiorum hæreticorum argutatio. In ea vero parte, qua repetit *Sacramentorum* numerum tanquam excogitatum, fictumque e septem bestiarum capitibus, olet singularem dementia, & maximam temeritatem. Principio enim, (ut Bellarminus notat lib. 2. cap. 27.) eo loci non septem *Sacramenta* dicuntur bestiarum capita, sed unum *Sacramentum mulier, & bestia, quæ portat eam, & habet capita septem, & cornua decem*; ideoque, si nugari fas est, eadem bestia est Lutherana hæresis, septem polluta vitiis, & quæ aliquando asseruit unam duntaxat dari *Sacramentum*, idest, Baptismum. Deinde septenario numero magna in Scripturis significari mysteria, diximus paulo supra cum Gabriele Philadelphensi quibus adde, quæ Bongus eruditus Bergomas de mystica numeri VII. significatione, pag. 223. assert ad probandum septeno numero perfici omnem munditiam; quoniam septimo die emissæ est columba, septem diebus a Moyse expiatum altare, septies sanguis contra sacrarii velum aspersus, diebus septem præscripta in Levitico immundorum purgatio; alique innumera, ingeniose quidem explicata, sed religiose tamen, ac temperanter.

Dices: Joannes cap. xix. 34. ait de Christo, postquam tradidit spiritum, *unus militum lancea latus ejus aperuit, & continuo exiit sanguis & aqua*. In quem locum scribit Augustinus Tract. 120. in Joan. num. 2. *Ut illic quodammodo vitæ ostium panderetur, unde Sacramenta Ecclesiæ manaverunt*. Similia Augustinus docet lib. xxii. de Civit. Dei cap. 17. in Psalmum 103. serm. 4. num. 6. & alibi. Singillatim Græci PP. in sanguine, & aqua expressam asserunt *Eucharistiam*, atque *Baptismum*; scribit enim Cyrillus Alex. lib. xii. in Joan. pag. 1074. *Lancea latus ejus perfodiant, unde cruor aqua missus fecerunt, quod Eulogiæ Mystica, & sancti Baptismatis imago quadam erat, atque primitia*.

Respondent Theologi, Augustinum, & Cyrillum præcipua *Sacramenta* commemorare, quibus magis deprehenditur Ecclesiæ unitas, & communio, at non excludere *Sacramenta* reliqua. Verum quantum ad Augustinum attinet, apertè sermonem instituit de Ecclesiæ ex latere Christi ædificatione, ad quam concurrunt, *sanguis redemptionis*, per quem ille diaboli mancipia soluto pretio redemit, & sacrum *baptisma*, per quod filii Adæ regenerantur; alia autem *Sacramenta* sunt necessaria ad Ecclesiam hanc roborandam, nutriendam,

dam, purgandam. Et quidem Augustinus citatis in locis exemplum affert arcæ Noë, in qua factum est ostium, *quo intrarent animalia, quæ non erant diluvio peritura*, nec non primæ mulieris de latere viri dormientis productæ : unde ait in Joannem, *Hinc secundus Adam inclinatus capite in cruce dormivit, ut inde formaretur ei conjunx, quæ de latere dormientis effluxit*; ac de Civit. Dei: *In cruce pendens latus lancea perforatum est, atque inde sanguis, & aqua profuit: quæ Sacramenta esse novimus, quibus AEDIFICATUR ECCLESIA*. Idem docet Theophylactus in Evangelia pag. edit. Morelli 828.

Opp. 2. Adversatur statuto *Sacramentorum* numero Patrum traditio. Primò enim nunquam apud veteres septenarium hunc numerum adinvenies, nunquam primæva Ecclesia catalogum istum contexit. Deinde cum antiquis consuetum esset fidei mysteria gentibus occultare, duo tantum ex Patribus novimus occultata, Baptismum, & Eucharistiam; nam Augustinus in Ps. 103. num. 14. ait. *Quid est, quod occultum est, & non publicum in Ecclesia? Sacramentum Baptismi, Sacramentum Eucharistia. Opera enim nostra vident, & pagani; Sacramenta verò occultantur illis*.

Resp. ad 1. neque olim Ecclesiam definivisse *Sacramenta* esse duntaxat duo. Præterea idcirco non definivit, quoniam res erat cuique fidelium notissima. Insuper hunc numerum servasse dicenda est, quando anathemate percussit *Sacramenta* aliqua denegantes, ut sæculo tertio Novatianos non confirmantes neophytos, quarto Manichæos damnantes nuptias, quartodecimo Wiclefistas Unctionem abjicientes extremam. Tandem Ecclesia, uti Scripturarum sanctarum canonem, ita *Sacramentorum* numerum definivit, quando id opportunum esse judicavit ad reprimendam hæreticorum audaciam. Quod addebatur de Sacrorum mysteriorum occultatione, adversus hæreticos retorquetur. Enimverò ex D. Basilio de Spiritu sancto cap. 27. Tom. 2. pag. edit. Morel. 211. patet inter arcana, quæ scripto non produntur, connumerari τὸ ἑλάν τῶν χειρῶν, olei unctionem: Chrysostomus hom. xv 111. in 2. Epist. ad Corinth. inter arcana solis initiatis manifesta recenset sacram ordinationem, precesque, & ceremonias in illa adhibitas, ἡ ἐπίθεσις ἀπὸ ἱερέων ἐν μυστηρίῳ. ἡ γὰρ δὴ διὰ τοῦ ἐπὶ τῶν ἀμύητων ἐκκαλύπτουσα πάντα, pag. edit. Commel. 872. idest, *Et acclamant ea, quæ nota habent initiati. Neque enim fas est coram profanis cuncta detegere*. Hunc locum vidit etiam Casaubonus Exercit. xvi. in Baronium, num. 43. pag. 404. atque hinc CL Schelstraetenus de Arcani disciplina pag. 18. demonstrat contra Tentzelium olim nondum initiatis plura, quam duo *Sacramenta* fuisse occulta. S. P. Augustinus eodem sermone in Ps. 103. num. 9. scribit: *Manus Sacramentorum in Baptismo, in Eucharistia, in ceteris sanctis Sacramen-*

sis.

tis. Numero itaque 14. duo commemorans, reliqua non excludit.

Opp. 3. Patres antiquiores, & celebriores ignorarunt septenarium numerum *Sacramentorum*. Justinus in Apologia ad Antoninum, quæ secunda dicitur, pag. 54. mentionem facit baptismatis, & pag. 97. Eucharistiæ: nullum aliud *Sacramentum* commemorat. Tertullianus lib. 4. contra Marcionem cap. 34. Baptismi quidem, & Eucharistiæ meminit, ceterorum *Sacramentorum* nequaquam. Cyrillus Jerosolymitanus in Catechesibus Mystagogicis de tribus tantum *Sacramentis* pertractat, nempe prima, & secunda de Baptismo, tertia de Chrismate, quarta de Eucharistia. In eundem numerum consentit Ambrosius lib. vi. de Sacram. cap. 2. postquam de his tribus prolixè egerat, concludens, num. 5. Tom. 2. pag. 381. *Ergo accepisti de Sacramentis, plenissimè cognovisti omnia*. Tenet eundem numerum Gregorius Magnus relatus in cap. *Multi secularium* 2. p. decreti q. 1. causa 1. num. 83. ubi ait: *Sunt autem sacramenta, Baptisma, Chrisma, Corpus, & Sanguis Christi*. Igitur duo, vel ad summum tria *Sacramenta* sunt ex Patribus retinenda.

Resp. falsam esse hæreticorum consecutionem. Laudati enim Patres, duo, vel tria *Sacramenta* commemorarunt, prout postulabat suscepti operis ratio. Justinus de baptismo egit, ut retunderet impetam Christianis calumniam, quod malefica superstitione initiarentur; ac reponit, *etiam Dæmones cum lavationem hanc audissent per Prophetam promulgatam, effecisse, & ut ingressuri in delubra eorum, & accessuri ad illos, atque libationibus, & adipis nidoribus offerendis operaturi seipsos aqua aspersione lustrarent*. Unde consequitur non posse in Christianisdamnari regenerationis lavacrum ab iis, qui suis in mysteriis adhibebant corporum lustrationes. Pertractat & de Eucharistia ad repellendam illorum accusationem, qui arbitrabantur in Ecclesiarum conventibus, & in sacra Altaris mensa trucidatas infantium carnes apponi, narrans distribui illic panem, & vinum, ac demonstrans non posse id redargui a paganis, quoniam & similia in mysteriis, atque initiationibus Mithræ fieri docuerunt per imitationem pravi dæmones. In sacrificiis enim Mithræ apponebant qui initiabantur panem, & aquæ poculum. In Apologia ergo pro Christianis elaborata Justinus ea vindicat, quæ opponebantur: sicetera irrisoribus manifestasset, nec se gessisset prudenter, nec servasset arcanorum disciplinam, nec Apologiam suos intra fines continuisset. Tertullianus in iv. contra Marcionem commemorat Baptismum, & Eucharistiam, quoniam hæc duo *Sacramenta* admittebat etiam Marcion, quem ita eo loci perstringit, *Si omnino negas permitti divorcium a Christo, quomodo tu nuptias dirimis? Nec conjungens marem & feminam, nec alibi conjunctos ad Sacramentum Baptismi, & Eucharistiæ admittens, nisi inter se conjuraverint adversus fructum nuptiarum?*



rum? Ceterum Tertullianus de præscriptionibus cap. 40. meminit quoque ceterorum *Sacramentorum* de spiritu nequitia scribens, *eiusdem esse partes invertendi veritatem, qui ipsas quoque res Sacramentorum divino- rum, idolorum mysteriis amulatur. Tingit & ipse quosdam, utique credentes & fideles suos; en amulatio baptismi: expositionem delictorum de lavaero repromittit; en pœnitentiæ imitatio: Mithra signat illic in frontibus milites suos; vides Chrismatis usurpationem: celebrat & panis oblationem; id Eucharistiæ amulatio quædam est: Quid? quod & summum Pontificem unius nuptiis statuit? quasi scilicet ad consecrandam matrimonium, & Sacerdotum Hierarchiam commonstrandam. Vide Carolum Moreau Tom. 3. Tertull. pag. 573. Cyrillus, & Ambrosius docentes Catechumenos, quibus simul tria illa *Sacramenta* conferebantur, de his plenissime tractant, cetera tamen non expungunt. Numquid enim Ambrosius negat *Sacramentum* Pœnitentiæ, de quo duos libros exornavit adversus Novatianos? Asserendum idem est de C. *Multi secularium*, in quo ideo trium *Sacramentorum* fit mentio, quoniam nonnulli temere affirmabant sanctificata non esse, dum conficiuntur eorum officio, *quorum vita aliorum oculis apparet ignobilis*: quamquam sententiam illam frustra inter opera Gregorii requires.*

Opp. 4. cum Joanne Calvino lib. 1v. Institut. cap. xviii. num. 2. Augustinus quum de iis signis loquitur, quæ divinæ in nos gratiæ testimonium esse debent, duo ista enumerat, Baptismum, & Eucharistiam. Ad Januarium Epist. 118. nunc 54. *Primo, inquit, tenere te volo, quod est hujus disputationis caput, Dominum nostrum Christum, sicut ipse in Evangelio loquitur, leni iugo nos subdidisse & sarcina levi. Unde Sacramentis numero paucissimis, observatione facilissimis, significatione præstantissimis, societatem novi populi colligavit. Sicuti est baptismus Trinitatis nomine consecratus, & communicatio corporis, & sanguinis Domini, & si quid aliud in scripturis canonicis commendatur. Item de Doctrina Christiana, lib. 111. cap. 9. A resurrectione Domini quadam pauca signa pro multis, eademque factu facillima, intellectu augustissima, observatione castissima ipse Dominus, & Apostolica tradidit disciplina: sicut est baptismus, & celebratio corporis, & sanguinis Domini. Cur nullam hic sacri numeri, hoc est, septenarii, mentionem facit? An verisimile est prætermissurum fuisse, si tunc fuisset in Ecclesia institutus? Imo cum Baptismum, & Cœnam nominat, alia subicit; anon satis inauit hæc duo mysteria singulari dignitate præstare, alias cæremonias inferiori loco subsidere? Ita Calvinus.*

Resp. non solum Augustinum aliis in locis plura *Sacramenta* connumerare, verum etiam in iis, quæ Calvinus opponit, ipsius Calvini hæresim, & pervicaciam refellere; quippe, ut supra diximus, qui ex omnibus aliqua exempla producit, is cetera non excludit.

26. VI.

K

Augu-

Augustinus ad Januarium, & de doctrina Christiana, ad explicanda *Sacramenta* omnia profert exemplum Baptismi, & Eucharistiæ. Igitur Augustinus *Sacramenta* reliqua non excludit. Quid igitur, inquit Calvinus, ea subicit? Respondet Lindanus p. 176. quod de signorum non agebatur numero, sed natura, sed vi, sed efficientia, quibus novi populi societas a Christo est colligata: quod cum ista duo Baptismus, & Eucharistia præ ceteris præcipue præsentent atque efficiant, his duobus in præsentia contentus, alia silentio præteribat. Sed cur non omnia accensuit, cum sit aliàs, inquit Calvinus, in observandis numeris curiosior, quam necesse foret? Quia hominibus in Catholica Apostolicæ fidei doctrina institutis, & perseverantibus scribens, rauca nondum audierat murmura contra saluberrimum *Sacramentorum* numerum obstrepentia. *Cur putamus nisi quia disputans in Catholica Ecclesia, non se aliter intelligi arbitrabatur, tali questione nullus pulsabatur, vobis nondum litigantibus securius loquebatur?* Hæc Lindanus respondens Calvino iisdem verbis, quibus Augustinus reprimat objectionem Juliani, lib. 1. cap. 6. num. 22.

Opp. 5. Vetustissimus Scriptor Dionysius Areopagita in libro de Ecclesiastica Hierarchia prolixè de *Sacramentis* pertractat. De Baptismo cap. 2. pag. edit. Plant. 251. de Euch. cap. 3. p. 282 de sacro unguento, sive Chrismate, cap. 4. p. 329. & cap. 5. pag. 355. de sacrorum ordinum consecrationibus. Obiter cap. 7. pag. 415. etiam reconciliationis, & absolutionis sacerdotalis facit mentionem. Frustra in Dionysii libro requires unctionem extremam, ac matrimonium. Nullum de his duobus extat verbum in libro quoque de Cardinalibus Christi operibus in Appendice Cypriani, serm. de Ablutione pedum, & serm. de Unct. Chrismatis, pag. novæ edit. 103. & 107. Sunt ergo ista duo de *Sacramentorum* albo expungenda.

Respondent Theologi cum D. Thoma 3. p. q. 65. art. 1. ad 3. Dionysium (quisquis sit illius operis Auctor) de iis tantum *Sacramentis* pertractare, quæ in actionibus officiisque hierarchicis potissimum considerantur, idest, quæ in Ecclesia exercentur quadam consecratione: unde nec reconciliationis speciatim meminit, nisi obiter, ac per transennam. Hunc esse illius operis scopum, apertum est ex priori capite, pag. 230. De Pœnitentia autem, quæ vix hoc in opere innuitur, manifestius loquitur Epistola ad Demophilum Tom. 2. pag. 108. Addo quarto capite de Ecclesiastica Hierarchia agi de Consecratione τοῦ μύρου, sacri olei, quo nomine significari non tantum Chrisma, & Oleum catechumenorum, verum etiam oleum infirmorum, animadvertit pag. 341. Balthasar Corderius. Et quidem dum ait Dionysius pag. 339. sacri unguenti non solum usum esse in consecrationibus, & in confirmatione baptizatorum, verum etiam in aliis divinæ benignitatis operationibus, videtur etiam commonstrare gratiam

tiam in unctiõne extrema collatam. Auctõr autem de Cardinalibus Chrifti operibus in ferm. de Ablutione Pedum pertractat de *Sacramentis*, quæ iterari non debent. *Nam baptifmum*, inquit, *repeti Ecclefiaftica prohibent regulæ: & femel fanctificatis nulla deinceps manus iterum confecrans præfumat accedere: nemo faeros ordines femel datos iterum renovat; nemo facro oleo lita iterum linat, aut confecrat*. In fermone autem de Unctiõne Chriftmatis agit de iis, quæ facro oleo peraguntur, & de fractione panis, & de menfa Euchariftica: quæ feria quinta majoris hebdomadæ speciali ritu celebrantur, & confecrantur. Verùm quid hæc juvant Novatores denegantes *Sacramenta* sacræ ordinationis, & Chriftmatis?

Opp.6. Primus omnium invexit numerum feptenarium *Sacramentorum* Magifter Sententiarum in 1v. dift. 2. quem tamen nec omnes Scholaftici fecuti funt, nam Durandus, ut diximus, matrimonium rejicit è numero facrorum myfteriorum. Deinde Hugo Viñtorinus de Sacramentis Parte 1x. pag. 291. ad illa feptem addidit Sacramenta, quamplura, idelt, afperfiõnem aquæ cum fale benediñtæ, fufceptionem facrorum cinerum, benediñtionem palmarum, cereum, qui in Sabbato fancto benedicitur, & agnos, qui benedicuntur in folemnitate Pafchali. Neque dici poteft Hugonem loqui de *Sacramentis* latè acceptis, quippe iis explicatis cap. 10. ait: *Sunt alia quedam in Ecclefia facra, non tamen Sacramenta*. Ea ergo, quæ antecederent commemoraverat, facramenta funt propriè diñta. Præterea fi *Ordo* inter Sacramenta recenfeatur, cum feptem fint ordines, erit facrorum myfteriorum numerus feptenario major duplo. Poftremò cur in *Sacramentorum* catalogo non connumerabitur etiam profeffio Monaftica, & Martyrium, quæ duo faltem magnam habent fanctificandorum hominum efficaciam?

Refp. Magiftrum sententiarum ex pervulgata traditione, non è cerebro fuo tradidiffe *Sacramentorum* numerum; aliàs quomodo mortalium nemo in dogma nuper excogitatum, & quidem in re graviffima, acuiſſet ſtylum, quum diñta quæque Magiftri Scriptores innumerum vellicaverint? De Durando respondent Juenin, & Card. Gotti Ecclefia mentem non fuiſſe affecutum. Verùm Durandus, tametſi affirmaverit Matrimonium non habere cum aliis *Sacramentis* rationem *univocam*, neque gratiam efficienter conferre, qua in re plurimum aberravit a veritate, hanc tamen theſim præmittit in 1v. dift. 26. q. 3. *Tenendum eſt abſolutè, quod matrimonium eſt Sacramentum, cum hoc determinet Ecclefia, Extra, de hæreticis, Ad abolendam, ubi enumerat matrimonium inter alia Sacramenta*. Hugo autem Viñtorinus 1x. P. de illis Sacramentis pertractat, quæ non funt *Sacramenta* præcipua, & gratiæ per ſe efficientia, ſed de iis, quibus fanctitas augetur per exercitationem devotionis; nam cap. 1. inquit,

*Sunt quedam sacramenta in Ecclesia, in quibus etsi principaliter salus non consistet, tamen salus ex eo augetur, in quantum devotio exercetur.* Atque in horum numero recenset asperersionem aquæ, sacros cineres, & alia superius enumerata. Quæ omnia propria *Sacramenta* non esse, ex iis, quæ docet Hugo, inferri potest. Cap. enim 2. ex ritu benedicendi aquam demonstrat ea contra spirituales nequitias, fideles eorumque habitacula communiri; idque etiam S. Thomas citata q. 65. art. 1. ad 6. Esius dist. 1. §. 15. & unanimis traditio Scholasticorum. At, inquis, nonne Aqua benedicta remittit venialia peccata? Negat id eo loci Esius, quoniam aliàs propriè conferret gratiam, & esset *Sacramentum*: affirmat tamen S. Thomas loco nuper citato, & Joannes Stephanus Durantus lib. 1. de Ritibus Eccl. cap. 21. pag. 71. Verum sententiam mediam arbitror tenendam esse, scilicet, lustralem aquam valere contra peccata venialia, non ex institutione Christi, & tanquam signum efficax gratiæ, sed ex precibus Ecclesiæ, & devotione eorum, qui asperguntur: quam sententiam docuit Joannes a Turrecremata S. R. E. Cardinalis in Opusculo de Aqua benedicta cap. 6. Atque hinc liquet aquam benedictam Sacramentale quoddam esse, non *Sacramentum*, cum gratiam ex opere operato, & ex Christi institutione non conferat. Idem asserendum de sacris cineribus, quæ ut cap. 3. inquit Hugo, *feria quarta quando jejunium votivum suscipitur, capitibus fidelium imponuntur, ob recordationem mortalitatis nostræ.* Vide de Sacris cineribus Angelum Rocca Tom. 1. pag. 217. & orationem Adeodati nostri Senensis habitam anno 1552. in Tridentino Concilio, Tom. XIV. pag. 1524. Idem de Cereis, palmarum ramis, aliisque Sacramentalibus est asserendum. Scite Londoniense Concilium supra laudatum *Sacramenta principalia* ab his docet esse distincta. Dum Hugo Victorinus cap. 10. scribit, alia esse in Ecclesia sacra, quæ tamen non sunt Sacramenta, *Sacra* ea dicit, quæ nec per se, ut Sacramenta septem, neque exercitatione virtutum conferunt sanctitatem, ut sunt ornamenta Templorum, & possessiones Ecclesiarum, & alia, quæ *sacra* appellantur, quoniam Divinis ministeriis, & clericorum sustentationi deserviunt. Professio Monachalis non alia ratione a quibusdam Græcorum dicitur *Sacramentum*, nisi quatenus per eam sacris mysteriis viri religiosi initiantur, aut saltem devovent se sacræ cuidam militiæ, cum nullam talis professio largiatur sanctitatem, nisi ratione devotionis, & humilitatis votentium. Quid vero Martyrium? Istud quidem ob caritatem, fidem, ac patientiam Martyrum largitur eis sanctitatem; sed non habet institutionem Christi, neque sanctificationem verborum, neque significationem gratiæ, ut inquit in IV. dist. 4. Sanctus Bonaventura, ideoque non est *Sacramentum*. Omnes denique Ordines ad unum Sacerdotium, tanquam ad sui complementum, ac terminum referuntur.

runtur, ideoque simul cum presbyteratu unicum Sacramentum, constituunt.

## C A P U T VI.

*Ostendit lotionem pedum inter vera Sacramenta  
non esse connumerandam.*

**H**Aereticorum quidam obijciunt adversus statutum numerum *Sacramentorum*, quod semel *Sacramentis* aliis præter baptismum, & Eucharistiam admisis, necessum sit adstruere alia complura, præsertim verò Pedum lotionem, de qua videtur Joan. xii. haberi divinum mandatum, & promissionem gratiæ sanctificantis; cumque ex alia parte sit visibile signum, & ritu peragatur externo, videtur omnia comprehendere, quæ requiruntur ad veri *Sacramenti* rationem. At lotionem pedum non esse *Sacramentum* propriè dictum tenent Catholici omnes, Bellarminus maximè lib. 2. cap. 24. Tournely q. 2. art. 4. Boucat art. ult. sect. 1. qui argumentum istud stilo fusiori prosequuntur, atque ante hos omnes Lucas Tudcusi lib. 2. adversus Albigenses, Tom. xxv. Bibl. PP. pag. 215.

Antequam nos aliquid statuamus, præmittimus ablutionem pedum fuisse in quibusdam Ecclesiis in usu, dum conferretur baptismus. De Ecclesia Mediolanensi testem habemus S. Ambrosium lib. de Mysteriis cap. 6. & lib. 3. de Sacram. cap. 1. necnon in Ceremoniali Ambrosiano Beroaldum. Eandem consuetudinem obtinuisse olim in Gallicanis Ecclesiis, ex antiquis Missalibus editis in *Codice Sacramentorum* a Jos. Thomasio, & in Museo Italico a Mabillonio, observarunt Monachi Benedictini in notis ad Ambros. Tom. 2. pag. 362. & Martene lib. 1. de Eccles. Rit. cap. 1. art. xv. num. 8. Addimus viguisse olim eandem consuetudinem in Aegypto, ut colligit Jos. Vicecomes de Antiq. Baptismi rit. lib. 3. cap. 17. pag. 243. ex vita Serapionis Sindonitæ scripta a Palladio in Hist. Lausiaca cap. 83. sect. 79. Tom. 2. Bibl. Vet. PP. pag. 1006. ubi narratur Serapionem *avulsis a theatro mimis, & Christiana religione imbutis lavasse pedes, ac ministrasse baptismum.*

Verum consuetudo ista nec semper viguit, neque ubique locorum. Enimvero extat canon 48. Iliberitanus apud Aguirre Tom. 1. pag. 605. *Neque pedes eorum (qui baptizantur) lavandi sunt a Sacerdotibus, vel Clericis.* Inverisimile autem non est loco lotionis pedum substitutum *capitilavium* in Ecclesiis Hispanicis, ut idem Aguirre ex Isidoro lib. 6. Etymol. cap. 17. conjectat. S. Ambrosius citato lib. 111. de Sacram. cap. 1. num. 5. ait in Romana Ecclesia consuetudinem hanc

hanc non haberi : cumque præcedenti num. 4. scribat, *Succinctus summus Sacerdos pedes tibi lavit*, idest, Episcopus, qui eo sæculo summi Sacerdotis nomine vocabatur ; non caret probabilitate morem illum lavandi pedes baptizatorum manasse ex ritu Romanæ Ecclesiæ, in qua ex antiqua consuetudine summus Pontifex ad lavandos pauperum pedes se Christi exemplo demittit . S. P. Augustinus epist. ad Januarium 118. nunc 54. num. 10. lavandi baptizandorum pedes consuetudinem ortam putat, ex quo eorum corpora per observationem quadragesimæ sordidata, ad fontem absque offensione sensus non possent trahi, nisi aliqua die lavarentur . Non tamen Augustinus ibidem docet hunc ritum fuisse omnino profanum ; addit enim ad hanc lotionem dicim illum fuisse electum, 'quo cæna Dominica anniversariè celebratur ; & proxima Epist. 55. cap. xviii. num. 33. cur iste dies electus fuerit, docet his verbis : *De lavandis verò pedibus, cum Dominus hoc propter formam humilitatis, propter quam docendam venerat, commendaverit, sicut ipse consequenter exposuit, quæsitum est quonam tempore potissimum res tanta etiam factio doceretur, & illud tempus occurrit, quo ipsa commendatio religiosius inbaretur*. Manifestum est ergo lotionem pedum humilitatis causâ, & ad Christi imitationem exerceri . Inquirendum remanet, an sit proprie Sacramentum, vel saltem pars Sacramenti baptismatis .

Prop. Loto pedum neque Sacramentum est, neque ad Sacramentum baptismi essentialiter pertinet .

Demonstratur prima pars . Quod est institutum ad exemplum, & exercitium humilitatis, non ut efficax symbolum sanctificantis gratiæ, non est Sacramentum propriè dictum . Loto Pedum peracta a Domino est ad exemplum, & exercitationem humilitatis . Igitur lotio pedum non est Sacramentum propriè dictum . Prob. minor; nam ipse Dominus Joan. xxi. 14. peractæ lotionis causam demonstrans, ait : *Si ergo ego lavi pedes vestros Dominus, & Magister ; & vos debetis alter alterius lavare pedes : exemplum enim dedi vobis, ut quemadmodum ego feci vobis, ita & vos faciatis*. Quibus proculdubio docet impendendum esse proximo quodlibet humanitatis officium, neque, ubi id aliorum salus postulet, fugienda esse ministeria infima, atque vilissima ; quum Dominus ac Magister præcinctus linteo laverit, & exterferit pedes discipulorum . Rectè Cyrillus Alex. in Joan. pag. 727. *Ex his docet non debere quemquam contra aliorum honorem insolenter efferri, sed exilimare conservum superiorem esse, & quavis in re præponendum*. Nota per id temporis factam inter discipulos contentionem, *quis eorum videtur esse major*, Lucæ 11. 24. & S. P. Augustinus Tract. lvi. in Joannem num. 4. *Didicimus, fratres, humilitatem ab excelso : faciamus invicem humiles, quod humiliter fecit excelsus*. Præterea per lotionem pedum nulla gratia collata est ;

fed

sed demonstratum duntaxat homines etiam iustos habere quotidiana peccata venialia, quorum in Dominica oratione veniam petimus, & quæ delentur pietatis, humilitatisque exercitio. Enimvero versu 10. ait Christus: *Qui lotus est, non indiget nisi ut pedes lavet, sed est mundus totus: & vos mundi estis, sed non omnes*. Si Apostoli, Juda excepto, mundi erant, & quidem toti; quare indigebant lotione pedum? Respondet Augustinus Tract. 57. num. 4. *pedum nomine significari humanos affectus, sine quibus in hac mortalitate non vivitur*, & quibus subrepentibus aliqua labe inquinamur, ob quam debita nostra in Oratione Dominica confitemur, atque hoc pacto *quotidie pedes lavat nobis, qui interpellat pro nobis*. Vide in hunc locum edit. Morel. 754. *Lavacrum non facit, ut intelligamus purificationem peccatorum Apostolorum (mundi enim esse perhibentur) sed symbolum est, quod mittendi sint in prædicationem, & transuebant etiam ad alios homines puritatem, quæ ipsi data est per verbum Dominicum. Ideo & Petrus inquit: Non solum pedes meos laves, sed & caput, hoc est, non ad prædicationem tantum mittas me, sed & caput meum per martyrium purifica*. Ex quibus ita ratiocinamur: Aut *lotio pedum* significet purgationem venialium peccatorum, quæ oratione, & humilitate expiantur, aut Apostolicam prædicationem, non est efficax signum gratiæ sanctificantis, sed symbolum earum rerum, quæ ad ipsam gratiam disponunt. Atqui ex Evangelico textu, ac Patrum interpretamentis *lotio pedum* significat expiationem venialium per orationem atque humilitatem, sive missionem Apostolorum ad Evangelium prædicandum. Igitur *lotio pedum* non est gratiæ sanctificantis signum efficax. Insuper si gratiæ promissio esset in lotione pedum, maximè quoniam versu 8. legitur, *Si non laverò te, non habebis partem mecum*. Verùm hæc verba, si remissionem peccatorum significant, non significant remissionem factam vi externæ illius ablutionis, sed exercitatione humilitatis, & quotidiana oratione, ut loquitur Augustinus; neque enim aqua illa in pelvim missa ad pedes lavandos dicitur aut *lavaerum vitæ, aut regenerationis, aut renovationis, aut remissionis peccatorum*, quemadmodum appellatur baptismus; sed asseritur tantum minima quoque peccata purganda esse, ut regnemus cum Christo. Si verò eadem verba commonstrent Petrum non habiturum fuisse cum Christo partem, nec ulterius futurum familiarem & amicum Domini, ob inobedientiam, non ob aliqujus *Sacramenti* contemptum, idest, ut inquit Cyrillus pag. 723. *nisi inusitatum hanc, & insolitam humilitatem didicisset*, futurum regni cælorum expertem; nec etiam hoc sensu *lotioni pedum* annexa est gratiæ iustificantis certa promissio, sive virtus effectrix. Nequit ergo ob sententiam illam Dominicam inter principalia *Sacramenta* con-

connumerari. Postremo, ut aqua, sive elementum, aut materia alia naturam induat *Sacramenti*, & gratiam producat, opus est, ut verbis, quæ formæ vicem gerunt, determinetur ad gratiam ipsam producendam. At neque Christus dum lavit pedes discipulorum, neque Sacerdotum quispiam exemplo Christi hanc lotionem exercens, determinavit unquam verbis *consecratoriis* aquæ elementum ad gratiam efficiendam. Ergo nunquam lotio pedum ad *Sacramenti* dignitatem eveſta est.

Pars secunda propositionis demonstratur: nam quod neque in Ecclesia Romana servatur, neque in aliis Ecclesiis ubique, neque eadem die, quo baptismum confertur: nequit esse pars essentialis baptismi. Atqui *lotio pedum* neque in Ecclesia Romana cum baptizandis servatur, neque post Illiberitanos canones in Hispanica, & in quibusdam Ecclesiis alia die, ab ea qua tinguntur catechumeni, solita fuit adhiberi. Ergo *lotio pedum* non est essentialis pars *Sacramenti* baptismatis. Egregiè Augustinus ad Januarium Epist. 55. num. 33. *Sed ne ad ipsum Sacramentum baptismi videretur pertinere, multi hoc in consuetudine recipere noluerunt. Nonnulli etiam de consuetudine auferri non dubitaverunt. Aliqui autem, ut hoc & sacratori tempore commendarent, & a baptismi sacramento distinguere, vel diem tertium octavarum, vel etiam ipsum octavum, ut hoc facerent elegerunt.* Præterea aqua ad lotionem pedum adhibenda hauriebatur ex fontibus ante Ecclesiæ fores constructis, quos in antiqua Ecclesia positos ut ingressuri in templum manus, pedesque lavarent, constat ex historia Eusebii lib. x. cap. 4. pag. edit. Valesii 380. Ad hunc finem constructum fontem in atrio Basilicæ Felicianæ scribit S. Paulinus Episcopus Nolanus epist. 12. ad Severum, pag. edit. Plantin. 153. quod de fonte Vaticano accepit lib. 3. de Rit. Bapt. cap. 18. Vicecomes. Neque adhibita ad lotionem pedum aqua aliquo ritu consecrabatur, cum nullibi extet hujus consecrationis vestigium. At si *lotio pedum* ad *Sacramentum* baptismi pertinuiſſet, aqua ex eodem fonte fuisset hausta, & ritu aliquo consecrata. Insuper si *lotio pedum* pertinuiſſet ad baptismatis *Sacramentum*; cur non etiam lotio capitis, quam baptizandis factam liquet ex Isidoro lib. 6. Etymolog. cap. 13. & lib. 1. de Eccles. Off. cap. 27. nec non ex Rabano lib. 2. Instit. Cleric. cap. 35. aliisque monumentis productis a Martenio lib. 1. de Antiq. Rit. cap. 1. art. 17. num. 1. atque longe ante a præcitato Vicecomite lib. 111. cap. 15. *Capitolavium* verò, uti appellabant, *Sacramentum*, aut *Sacramenti* partem fuisse, quis prudens existimabit? Adhæc post Concilium Moguntinum celebratum anno 813. omnes ferè Ecclesiæ tam pedum, quam capitis lotionem prætermiserunt: ut neque a Romana Ecclesia dissentirent, neque rudes aliqui ea ablutione contenti negligerent salutare regenerationis lavacrum. Singuli itaque traditionum custo.



eustodes Episcopi testati sunt lotionem pedum ceremoniam tantummodo esse, non *Sacramentum* . Postremo S. Ambrosius lib. 3. de Sacramentis cap. 1. haud obscurè docet lotionem pedum ceremoniam quamdam esse receptam consuetudine Mediolanensis Ecclesiæ, ac pertinentem ad disciplinam, non *Sacramentum* proprie dictum, aut rem spectantem ad dogma, aut ad integritatem baptismi . Primò namque ait se qui se in omnibus Romanam Ecclesiam, quæ hujus lotionis non habet consuetudinem : *Non ignoramus* (inquit num. 5.) *quod Ecclesia Romana hanc consuetudinem non habeat, cujus typum in omnibus sequimur, & formam : hanc tamen consuetudinem non habet, ut pedes lavet* . Postea inquit se in lotionem pedum adhibenda ab Ecclesia Romana recedere, scribens : *In omnibus cupio sequi Ecclesiam Romanam : sed tamen & nos homines sensum habemus, ideo quod alibi rectius servatur, rectius custoditur* . Quid est autem Ecclesiam Romanam in omnibus esse typum, & formam, eamque sequi beatum Ambrosium, sed circa lotionem pedum ab ea dissentire, nisi eandem lotionem ad disciplinam spectare, non ad dogmata, & ceremoniam esse, non *sacramentum* ? Enim verò in iis, quæ disciplinam spectant, non violata Romanæ Ecclesiæ auctoritate suprema, possunt Episcopi Ecclesiarum suarum, tenere consuetudinem ; quum juxta Augustinum citata ad Januarium Epist. num. 34. *Saluberrima regula retinenda sit, ut quæ non sunt contra fidem, neque contra bonos mores, & habent aliquid ad exhortationem vitæ melioris, ubicunque institui videmus, vel instituta cognoscimus, non solum non improbemus, sed etiam laudando, & imitando sectemur, si aliquorum infirmitas non ita impedit, ut amplius detrimentum sit* . Recte itaque Ambrosius retinuit Ecclesiæ suæ consuetudinem ; recte etiam Carolo Magno imperante, dum corrigendæ essent dissensiones Ecclesiarum, in Moguntiaca Synodo, canone 4. To. VII. Concil. pag. 1242. statutum fuit, ut *Sacramentum baptismatis concorditer atque uniformiter in singulis parochiis secundum Romanum ordinem celebraretur* . Quoniam juxta Augustini regulam saluberrimam consuetudines, quæ habent exhortationem virtutis, ut lotio pedum facta ad imitationem Dominicæ humilitatis, servantur utiliter ; & ubi subrepant dissidia, ac detrimenta plebis, abrogandæ sunt, sive ad normam universalis, & Apostolicæ Ecclesiæ sunt reformandæ . Atquæ ex his liquidd constat lotionem pedem nunquam ad *sacramentum* baptismatis pertinuisse, sed ad consuetudinem, ad disciplinam, ad ritum, ad ceremoniam .

Unum videndum restat, quo sensu aliqui Patrum appellaverint eandem lotionem *Sacramentum*, eamque dixerint sanctificationis mysterium, quod visum quibusdam explicatu difficile, licet sit obvium ac planum . Ac primò videtur difficultatem ingerere quod S. Ambrosius scribit lib. de Mysteriis cap. 6. num. 32. *Mundus erat Petrus,*  
*To. VI.* *sed*

*sed plantam lavare debebat; habebat enim primi hominis de successione peccatum: quando eum supplantavit serpens, & persuasit errorem. Ideo planta ejus abluitur, ut hereditaria peccata tollantur; nostra enim propria per baptismum relaxantur. Et in 3. de Sacram. cap. 1. num. 5. refellens eos, qui asseriebant, non in mysterio lavari pedes baptizatorum, sed in signum humilitatis, veluti dum hospites excipiuntur, ait: Aliud est humilitatis, aliud sanctificationis. Denique audi quia mysterium est, & sanctificatio: Nisi laveris tibi pedes, non habebis mecum partem. In fine ejusdem capituli num. 7. Lavas ergo pedes, ut laves venena serpentis. Videtur ergo Ambrosius tribuere pedum lotioni rationem mysterii ac Sacramenti, & virtutem sanctificandi.*

Auctor etiam sermonis de Ablutione pedum inter opera Cypriani pag. cv. i. scribit: *Ait Dominus, Nisi laveris te, non habebis partem mecum. Paulatim mysterii hujus declaratur necessitas, quam conditio propofita inevitabilem reddit: paucisque interjectis, Supra diximus semel lotos baptismate, eodem lavacro ulterius non egere: sed hoc lavacrum quotidianis est excessibus institutum. Accedit S. Eligius Noviomensis Episcopus, qui floruit sæculo vii. obiitque juxta Chronicon Sieberti, an. 665. Is hom. iv. in Cæna Domini Tom. xii. Bibl. PP. pag. 375. hæc habet: Ut igitur audivitis vestro dilectio; hæc omnis pedum lotio, nostrorum peccatorum est purgatio: unde non incongrue hæc ipsa die, sicut Ecclesia tenet consuetudo, pœnitentium fit reconciliatio.*

Difficiliora videntur quæ leguntur in sermone 1. de Cæna Domini Tom. ii. Ep. S. Bernardi pag. 75. Eo loci primùm Bernardus lotionem pedum connumerat inter Sacramenta, scribens num. 2. *In hunc itaque modum appropinquans passioni Dominus, de gratia sua invisibiliter curavit suos, ut invisibilis gratia signo aliquo visibili præsisteretur. Ad hoc instituta sunt omnia Sacramenta, ad hoc Eucharistia participatio, ad hoc pedum ablutio, ad hoc denique ipse baptismus initium Sacramentorum omnium.* Deinde num. 4. affirmat Bernardus pedum lotionem revera fuisse Sacramentum significans peccatorum remissionem, hisce verbis: *Nam ut de remissione quotidianorum minime dubitemus, habemus ejus sacramentum pedum ablutionem.* Deinde probat lotionem pedum non fuisse solum factam ad humilitatis exemplum, verum etiam ut Sacramentum ad peccatorum expiationem, ad hunc modum: *Vis autem nosse quod pro sacramento illud est, non pro solo exemplo factum? Illud attende quod Petro dictum est, Si non laveris te non habebis partem mecum. Aliquid igitur latet, quod necessarium est ad salutem, quando sine eo nec ipse Petrus partem haberet in regno Christi & Dei. Paulo infra: Et unde scimus quia ad diluenda peccata, quæ non sunt ad mortem, & a quibus plene curare non possumus.*

*sumus ante mortem, ablutio ista pertineat? Ex eo planè, quod offerenti manus, & caput pariter ad abluendum responsum est: Qui lotus est, non indiget, nisi ut pedes lavet. Quibus S. Bernardus aperte demonstrat, pedum abluionem pertinere ad abluenda venialia peccata.*

Verùm hæc omnia facilè diluuntur, si animadvertamus, quæ supra ex Augustino diximus, pedum abluionem, ut factam a Christo, atque ad ipsius exemplum ab Ecclesiæ pastoribus, non esse officium humanitatis, quo hospites urbane excipimus & honoramus, sed ritum sacrum, ac mysticum, quo significatur indigere nos præter gratiam, quam conferunt principalia sacramenta, quotidianâ oratione, ut nobis venialia in pulvere pedum expressa divinitus condonentur, atque infirmitas humani arbitrii adjuvetur gratiâ reparato-  
ris, nè concupiscentia nobis vitio primi hominis infeminata, & in-  
regeneratis permanens ad agonem, in graviora flagitia, æternamque perditionem nos trahat. Vide Augustinum 2. p. Tom. 3. pag. 657. Re-  
ctè Augustini mentem affectus est Lucas Tudenſis Tom. xxv. Bibl. PP. pag. 215. scribens: *Ille pedum ablutio non inter præcipua computatur Ecclesiæ Sacramenta, quia tantum per eam venialium indulgetur venia peccatorum, & humilitatis obsequia commendantur. Testis namque Domino, qui lotus est non indiget nisi ut pedes lavet; ac si diceret, qui mundus est a majoribus delictis, ut perfectus sit, abluatur etiam a superfluis cogitationibus, ociosis sermonibus, & minoribus culpis: quia dum sancti in vita præſenti degunt, difficillimum est ita caute vivere, quin saltem tenui venialium pulvere respergantur. Pes enim cum per terram graditur, ipsius terræ vel atomis in toto, aut in parte respergitur. Qui nisi abluantur frequenter, parvissimi pulveris sordidantur resperſione frequenti. Non ergo minima negligenda peccata, quæ plerumque contemptum generant, qui ducit ad mortem. Hoc itaque sensu ablutio pedum dicitur Sacramentum, atque mysterium, in quantum significat remissionem peccatorum venialium, quæ quotidie lavari debent oratione, humilitate, aliisque remediis in ipsa lotionem pedum expressis. Si enim ipsa lotio pedum ad venialia expianda. requireretur, non quod ea lotionem significatum est; non semel in anno, nec in sola ceremonia baptismatis pedes sacro ritu lavandi essent, sed omni prorsus die: quotidianis quippe peccatis quotidiana remedia sunt adhibenda.*

Ac nihil aliud profectò docent Ambrosius, Arnoldus Bonæ-Vallis, auctor, ut fertur, sermonis Cypriano tributi, Eligius Noviomî in Belgio Antistes, & mellissimus Ecclesiæ Doctor Bernardus. Sanctus enim Ambrosius per baptismum omnia peccata dimitti docuit, non solum in libro de Philosophia, qui non extat, laudatur tamen ab Augustino lib. 2. contra Julianum cap. 5. num. 14. ubi legitur, *Ille iustificatur a peccato, cui per baptismum peccata omnia remittuntur, nec*

non lib. 3. Offic. cap. 18. num. 103. in Psalmum xxxvi. num. 63. & lib. 2. in Lucam num. 79. verum etiam in iis locis, quæ obliuiscuntur: nam in lib. de Mysteriis ait *nostra peccata per baptismum relaxari*, & in 111. de Sacramentis, *In baptismo*, inquit, *omnis culpa diluitur*. Quomodo ergo juxta Ambrosium in lotionem pedum est mysterium sanctificationis, quomodo abluuntur planta pedis ut tollantur hæreditaria peccata, quomodo lavantur pedes, ut laventur venena serpentis? Profecto non alio sensu, nisi quatenus concupiscentia, serpentis fraude ingenerata, per quam quotidie in plura peccata prolabimur, lotionem pedum, & exercitationem humilitatis frenatur, atque ita pedum ablutionem non delet inquinamenta peccati, sed tribuit aliquod sanctificationis subsidium. Explicat enim Ambrosium Ambrosius ipse scribens in Ps. 48. num. 9. Tom. 1. pag. 948. *Lavemus & pedes, ut calcanei lubricum possimus auferre, quo fida statio possit esse virtutis, & ne paterno quis errore labatur, qui suo paratus est stare proposito: & non metuat lubricum hæreditatis, qui cupit vestigium tenere virtutis*. Atque eodem lib. 111. de Sacram. num. 7. *In baptismo omnis culpa diluitur. Recedit ergo culpa: sed quia Adam supplantatus a Diabolo est, & venenum ei effusum super pedes, ideo lavas pedes, ut in ea parte, in qua insidiatus est serpens, majus subsidium sanctificationis accedat, quo postea te supplantare non possit. Lavas ergo pedes, ut laves venena serpentis. Ad humilitatem quoque proficit ut in mysterio non erubescamus, quod dedignamur in obsequio*. Ob eandem rationem quod lotio pedum significet auferendum calcanei lubricum, & corroborandam exercitationem virtutum hæreditariam infirmitatem, scripserat Ambrosius præced. num. 5. in lotionem pedum latere mysterium sanctificationis, nec esse illam eodem loco tenendam, quo habetur ablutio hospitum facta ad solam honestatem hospitii.

Idem planè docet Auctor sermonis de Ablutione pedum, commendans *mysterii hujus necessitatem*, quatenus necessarium nobis est, ut exemplo Magistri non dedignemur humilitatis officia in alterutrum exercere, quoniam *ad expiationem proficit humilis pietas, & pia humilitas*, & per ablutionem pedum rectè cognitam & intellectam adherentes anima sordes quotidiana satisfactione lavantur. Ubi non ait, lavari sordes ipsa pedum materiali ablutione, sed *ablutione rectè cognita & intellecta*, id est, quotidiana satisfactione, sive humilitate quotidie exercenda. Explicat sese apertius ita Deum alloquens: *Propter hoc, benignissime Domine, pedes lavas discipulis, quia post baptismum, quem sui reverentia non patitur iterari, aliud lavaerum procurasti, quod nunquam debet intermitteri: tamen ipse quod doces facis, ut quanti questus hoc opus sit, ex tua bonitate discamus, & inelinata ad pedes nostros altitudine tua, stans adversus proximum, & erigens se contra Deum confundatur superbia hominum*.

minum,

*minum, & ad humilitatem Dei noverit de se humilia sapere Intum.*

Docet idem prorsus Sanctus Eligius, & quoniam eo temporis fiebat Feria v. in Cœna Domini *reconciliatio pœnitentium*, ut patet ex Epistola Innoc. I. ad Decentium, ex Epistola Hieronymi ad Oceanum, ex canone 1x. Conc. Agathensis, & ex Pontificali Romano P. iiii. tit. 3. notisque in hunc titulum Josephi Catalani, viri plurimum eruditi; ideo beatus Eligius in homilia de Cœna Domini monet lavandos esse pedes ad reconciliationem obtinendam, idest, dimittenda peccata alterutrum, atque in signum reconciliationis fraternæ invicem pedes abluendos. *Nos quoque*, ait, *Christi exemplo, & mandato commoniti, & corporaliter hoc agere, & multo magis spiritualiter debemus invicem pedes lavare: hoc est, alterutrum peccata dimittere, & pro eisdem a Deo dimittendis invicem exorare, sicut & Apostolus admonet: Donantes vobismetipsis, si aliquis adversus aliquem habet culpam, sicut & Dominus donavit nobis, ita & nos invicem.*

Eadem denique est sententia divi Bernardi: qui loco citato ait quidem abluionem pedum esse sacramentum, sed non *Sacramentum* proprie dictum conferens remissionem peccatorum, sed sacramentum late acceptum significans remissionem peccatorum quotidianorum, & asperisionem pravarum affectionum, quæ non lotione pedum purgantur, sed largitate divina, quam in Dominica oratione quotidie petimus. Quare etsi Bernardus recenset abluionem pedum inter *Sacramenta* simul cum Eucharistia & baptismo; innuit tamen inter hæc discrimen, quod ista duo sint signa gratiæ efficacia, ideoque propria *Sacramenta*, lotio autem pedum significet, non operetur vniusalium peccatorum remissionem. Et quidem eodem sermone de Baptismo ait: *Quæ est ergo gratia, unde per baptismum investimur? Utique purgatio delictorum: & infra, Lavamur igitur in baptismo, quia deletur chiographum damnationis nostræ. De Eucharistia etiam inquit: Duo illud Sacramentum operatur in nobis: ut videlicet & sensum minuat in minimis, & in gravioribus peccatis tollat omnino consensum. At nihil tale asserit Abbas Claravallensis de lotionem pedum. Ait quidem in hac latere sacramentum, scilicet quotidianorum peccatorum remissionem. Verum ait ne, remissionem istam produci ipsamet pedum abluione? Minimè: quotidiana enim remissio nequit unius annuæ abluionis opus esse. Sed audi Bernardum: *Et unde scimus*, inquit, *quia ad diluenda peccata, quæ non sunt ad mortem, & a quibus plene cavere non possumus ante mortem, ablatio ista pertineat? Ex eo planè, quod offerenti manus & caput ad abluendum responsum est: Qui lotus est, non indiget, nisi ut pedes lavet. Lotus enim est, qui gravia peccata non habet, ejus caput, idest, intentio, & manus, idest, operatio, & conversatio munda est: sed pedes, qui sunt animæ affectiones, dum in hoc pulvere gradimur, ex toto mundi esse non possunt,*  
quin*

quin aliquando vanitati, aliquando voluptati, aut curiositati plusquam oportet, cedat animus, vel ad boram. In multis enim offendimus omnes. Postremo Bernardus innuens horum peccatorum remedium concludit: *Nemo pernicioſa ſecuritate dormitet, declinans in verba malitiæ ad excuſandas excuſationes in peccatis: quoniam, ut audiuit Petrus, niſi laverit ea Chriſtus, non habebimus partem cum eo. Nec ideo tamen pro eis neceſſe eſt nimis eſſe ſollicitos: ignoſceſ facile, imo & libenter, ſi tantum modo nos agnoſcamus: in bujuſmodi namque quaſi inevitabilibus & negligentia culpabilis eſt, & timor immoderatus. Hinc eſt, quod in oratione, quam ipſe conſtituit, quotidie pro peccatis illis voluit nos orare. Non audio venialia peccata expiari lotione pedum, ſed agnitione infirmitatis propriæ, & aſſiduitate orationis. In ampliori ergo ſignificatione Bernardus, Eligius, Arnoldus, atque Ambroſius ſacramentum appellavere lotionem pedum; de qua ad hunc modum ſe habet noſtra diſſertatio.*

## C A P U T VII.

*De ordine, neceſſitate, ac dignitate  
ſeptem Sacramentorum.*

**N**On omnes eodem ordine *Sacramenta* ſeptem recenſent. Londinenſe quippe Concilium, fortasſe quotidianæ neceſſitatis rationem habens, recenſet Pœnitentiam ante Euchariftiam, & Matrimonium ante Ordinem; probare enim ſe debet homo, priuſquam ad Angelorum menſam accedat, præceditque carnalis generatio Eccleſiaſticum miniſterium. Ioannes Paleologus in Confeſſione fidei Pœnitentiam, & Unctionem extremam ſtatuit poſtremo loco. Græcorum Patriarcha Hieremias Ordinem locat poſt ſacroſanctam Communionem. Magiſter ſententiarum, S. Thomas, alii Scholaſtici, Eugenius IV. & Tridentinum Concilium docent ſeriem, ordinemque ſingulis ſatis notum. Vide cap. v. prop. 1. Maniſteſtum eſt autem ordinem hunc eſſe optimum, & comprobatum ex his, quæ in ſerie humanæ vitæ contingunt, quemadmodum eo loci verbis Eugenii, & comuni ratione demonſtratum eſt.

De *Sacramentorum* neceſſitate extat canon iv. ſeſſ. 7. Trid. *Si quis dixerit Sacramenta novæ legis non eſſe ad ſalutem neceſſaria, ſed ſuperflua, & ſine eis, aut eorum voto per ſolam fidem homines a Deo gratiam juſtificationis adipiſci, licet omnia ſingulis neceſſaria non ſint, anathema ſit.* Quo in canone perſtringitur hæreſis Novatorum aſſerentium homines juſtificari per ſola fidem, idcoque *Sacramentis* gratiam juſtificationis non conferri, ſed fidem duntaxat excitari, atque nutri-

nutriri; unde majoris perspicuitatis gratia addidit Tridentina Synodus proximum canonem v. *Si quis dixerit, hæc Sacramenta propter solam fidem nutriendum instituta esse, anathema sit*. Firmissime itaque tenendum est, quod licet fides ad justificationem disponat, causæ tamen aliæ ad justificationem ipsam concurrunt, a nobis lib. XIX. enumeratæ, inter quas instrumentalis causæ rationem habent *Sacramenta*, quæ indita sibi virtute sanctitatem efficiunt, ut infra demonstrabimus. Si enim *Sacramentis* virtus ipsa deesset; nequaquam ad salutem forent necessaria, quum etiam verbum Dei, & Sacrorum librorum lectio possint fidem excitare, & nutrire; præsertim quum Novatores autument verba in *Sacramentorum* administratione adhibita eandem prorsus habere vim, quam habet prædicatio Evangelii. Illud ergo, quod Tridentinum Concilium definit de *Sacramentorum* necessitate, ex aliarum controversiarum enodatione redditur manifestum.

Verùm non omnia *Sacramenta* sunt singulis necessaria, ut præcitato canone definitum est: quippe Baptismus, & Pœnitentia, quæ duo *Sacramenta* instituta sunt pro his, qui lethali culpa inquinati nequeunt, nisi sanctificentur æternæ vitæ fieri participes, unde & vulgari sermone dicuntur *Sacramento mortuorum*, necessaria sunt necessitate mediæ, idest, sunt medium necessarium, sine quo neque gratiam Sacramentalem, neque cælestis regni hæreditatem consequimur: baptisus quidem puerulis, aliiisque adhuc originali labe inquinatis; ac pœnitentia iis, qui acceptam in baptismo sanctitatem, actualibus transgressionibus pessumdedcrunt. Cetera Sacramenta, *vivorum* dicta, atque instituta ad gratiam augendam, necessaria sunt necessitate præcepti; idest, suscipienda eo tempore, quo præscribit Ecclesia, & facultas suppetit suscipientibus: ita tamen, ut Ordo, si Ecclesia universim spectetur, habeat quoque absolutam necessitatem, quam appellant *mediæ*, quoniam absque sacra ministrorum ordinatione neque consecrari possit corpus Dominicum, neque in hac rerum divinarum constitutione lapsus beneficium absolutionis impendi. Verum nec Ordo, nec matrimonium singulis sunt necessaria, cum homo libertate præditus nequeat, nisi causa impellente, sive Ecclesiæ ministerio, sive vinculo conjugali constringi. Matrimonium quoque eatenus necessarium est, quatenus Ecclesiæ filii debent cum facultate nuptiarum dare operam filiis procreandis. Rectè S. Thomas 3. p. q. 65. art. 4. *Dicendum, quod necessarium respectu finis, de quo nunc loquimur, dicitur aliquid dupliciter. Uno modo, sine quo non potest haberi finis, sicut cibus est necessarius vitæ humanæ: & hoc est simpliciter necessarium ad finem. Alio modo dicitur esse necessarium id, sine quo non habetur finis ita convenienter, sicut equus necessarius est ad iter: hæc autem non est simpliciter necessarium ad finem. Primo igitur.*

*igitur modo necessitatis sunt tria Sacramenta necessaria: duo quidem personæ singulari, baptismus quidem simpliciter & absolute; penitentia autem supposito peccato mortali post baptismum: Sacramentum autem Ordinis est necessarium Ecclesiæ, quia ubi non est gubernator, populus corrumpit, ut dicitur Prov. x. 14. sed secundo modo sunt necessaria alia Sacramenta: nam confirmatio quodammodo perficit baptismum, extrema unctio penitentiam: matrimonium vero Ecclesiæ multitudinem per propagationem conservat. Hactenus S. Thomas.*

Quantum denique ad *Sacramentorum* attinet dignitatem, sanctum est ab eodem Tridentino sess. vii. canone 3. Sacramenta non ita esse inter se paria, ut nulla ratione aliud non sit alio dignius. Hæretici enim, præsertim Calvinistæ, æqualia inter se *Sacramenta* esse autumant, ut confirmationem, & alia, quæ ut Baptismus, & Eucharistia in sacris novi Testamenti libris non commendantur, e *Sacramentorum* numero extrudant, ut in Antidoto Concil. Trid. ad hunc Canonem scribit his verbis hæresiarcha Calvinus: *Quis non malit Neptunium sustinere fulmen, quam æquare Christi institutis hominum inventa? Baptismum legimus a Christo commendatum: similiter, & sacramentum. De aliis nihil tale.* Eo quoque fine putant quidam Calvinum *Sacramenta* fecisse paria, quoniam æquiparando Eucharistiam baptismum poterat facilius negare realem Christi in *Sacramento* præsentiam. At, cum etiam Lutherus in hoc dogmate adversarius Calvini, æqualitatem *Sacramentorum* commentus sit in Epist. ad Fragensem Senatum, arbitror tum Calvini, tum Lutheri dogma eo collineare, ut asserant *Sacramenta* inter se paria, quoniam eodem Dei verbo fidem excitando, ratione consimili ad salutem proficiunt, nullumque *Sacramentum* operatur in anima sanctitatem: nam Lutherus eo loci haud obscure id prodidit scribens: *Nullum Sacramentum alio dignius est, quod omnia eodem verbo nituntur.* Qua in re quantum a veritate Novatores aberrant, ea monstrabunt, quæ dicuntur de *Sacramentorum* effectibus. Sacratissimam verò Eucharistiam, *Sacramentum Sacramentorum* a Patribus nuncupatam, mysteriis ceteris præferendam demonstrant rationes plurimæ a D. Thoma productæ citata q. lxxv. art. 3. At modo eam tantum proferam, quam suppeditat sess. x. 11. cap. 3. Synodus sacrosancta, dum ait: *Commune hoc quidem est sanctissima Eucharistia cum ceteris Sacramentis, symbolum esse rei sacræ, & invisibilis gratiæ formam visibilem: verum illud in ea excellens & singulare reperitur, quod reliqua Sacramenta tunc primum sanctificandi vim habent, cum quis illis utitur: at in Eucharistia ipse sanctitatis auctor ante usum est: ex quo etiam sequitur in hoc Sacramento non solum a digne accedentibus suscipi gratiam, verum & Dominum Jesum, fontem gratiarum omnium.*

Esti autem Eucharistia longe reliqua *Sacramenta* præcedit: singula



gula tamen peculiarem habent effectum, quo tantum considerato præstantiora sunt reliquis; ut baptismus præstat in ablucenda macula originali, pœnitentia in reconciliatione lapsum, ac ita de ceteris ratiocinando. Quare prælaudatus canon tertius ad hunc modum post exactam limam, ac ponderationem redactus fuit: *Si quis dixerit, hæc septem Sacramenta ita esse inter se paria, ut nulla ratione aliud sit alio dignius, anathema sit.* Ubi notandum est adjectam eam vocem, *nulla ratione*, propterea quod placebat quibusdam canonem hunc esse prætermittendum, cum sit in quovis Sacramento quædam propria, excellentia, ob quam secundum aliquam rationem possit ceteris æquiparari. Videfis Eminentissimi Pallavicini Historiam lib. 1x. cap. 7. num. 4. Hæc verò de iis, quæ in hujus capituli titulo proponuntur, sint dicta.

## C A P U T VIII.

*Agitur de Sacramentorum novæ Legis institutione.*

**S**cribit doctissimus Bellarminus lib. 1. de Sacram. in gen. cap. 23. olim quosdam Scholasticos existimasse, non omnia *Sacramenta* a Christo fuisse *immediate* instituta; nam, inquit, Hugo Viç. lib. 2. de Sacram. p. 15. cap. 2. & Magister lib. 1v. dist. 23. negant a Domino institutum Unctionem extremam. Alex. Alensis q. 9. m. 1. ac S. Bonaventura in 4. dist. 7. art. 1. qu. 1. tenent *Sacramentum* Confirmationis institutum post mortem Apostolorum in Concilio Meldensi: idem Alensis q. 14. memb. 3. Bonav. dist. 17. art. 1. q. 3. & Marfilii in 1v. q. 14. asserunt non a Christo, sed ab Apostolis institutum *Sacramentum* Pœnitentiæ. Id quidem de Confirmatione, ac de Unctione extrema verissimè dictum est: sed quantum ad Pœnitentiam attinet, Alensis q. 14. art. 3. aperte docet institutam a Domino tam quantum ad *materiale*, quod se tenet ex parte pœnitentis, quàm quantum ad *formale*, quod attenditur in absolutione, & potestate clavium. Bonaventura autem ait *formale* confessionis, idest, potestatem absolvendi, per se institutum a Christo, *materiale* autem, & accusationem peccati, insinuatum tantummodo. Verùm id parum refert. Profecto neque Confirmationem a Concilio Meldensi, neque Unctionem extremam a Divo Jacobo institutam valido momento antiqui illi Scholastici demonstrabant: enimvero in Concilio Meldensi, (quod ignoro cur Gregorius de Valentia Tom. 1v. pag. 529. scripserit non reperiri,) canone 44. 45. & 46. agitur de consecratione, & injunctione Chriftmatis, non autem de institutione. Vid. Tom. v. 11. Conc. pag. 1833. Divus autem Jacobus inunctionem infirmorum cap. v. 14. commendavit, præcepit, acque, ut loquitur Trid. sess. xiv. *promulgavit*, sed non instituit.

To. VI.

M

Post-

Postquam verò eadem Tridentina Synodus sess. vii. can. 10. *omnia Sacramenta novæ legis a Jesu Christo Domino nostro instituta esse definiuit*, nemo prorsus est, qui audeat oppositum litteris mandare, aut sentire. Ex Tridentina etiam definitione colligitur Christum fuisse *Sacramentorum* omnium immediatum Auctorem, quod adversus communem sententiam audax nimium esset, errorisque plenissimum impugnare. Verum an *immediata* hæc institutio spectet ad fidei decreta, non consentiunt Scholasticis celebriores: affirmant quippe non posse illæsa fide negari quod Christus *immediate* ac per se ipsum *Sacramenta* omnia instituerit, citato loco Bellarminus, Becanus de Sacramentis in communi cap. 5. Vasquesius in 3. p. disput. 135. cap. 1. Gonet disput. v. art. 1. Joan. Bapt. Duhamel dissert. 2. cap. 2. Puteanus noster in 3. p. q. 64. dub. 1. Gavardi q. 1. art. 5. §. 1. Ifambertus q. 64. disput. 1. art. 1. Frassen disp. Proemial. art. 2. q. 1. concl. 3. & Canali disp. 3. q. 1. ad 2. objectionem. At sunt viri alii doctissimi, qui licet fateantur *Sacramenta* omnia immediate a J. Christo instituta, idque censeant Tridentinis Patribus, & rationi magis conforme, nihilominus affirmant id nequaquam definitum fuisse; inter quos connumerantur viri doctissimi, Estius in 1v. dist. 1. §. 16. Suarez in 3. p. q. 64. art. 4. disp. 12. sect. 1. Florentius de Cocq. Tract. vii. sect. 2. Gaspar Juénin q. 4. concl. 2. Cardinalis Gotti q. 6. dub. unica §. 2. Tournely q. 5. art. 1. atque ex Nostratibus Farvacquez cap. 2. q. 1. & Leonardus Vanroy cap. 2. q. 1. Atque hos omnes laudandos existimavi, ut ex ipsa Doctorum dissensione constaret in hac secunda questionis parte non esse judicium adversus Farvacquesium nostrum temerè pronuntiandum.

Et quoniam vagum Scholasticorum ingenium non tantum in iis, quæ facta sunt, occupatur, sed etiam erigit se ad investiganda quæ possent aliquando contingere; istud etiam ad concertationum acervos traxere, num potestas instituendi *Sacramenta* possit nudis creaturis communicari: qua in re negantem partem tenuerunt Scotus in 4. dist. 1. q. 3. Gabriel q. 2. art. 3. Durandus dist. 1. q. 1. num. 4. Vasquesius 3. p. disp. 135. cap. 2. Mastrius disp. 1. q. 6. & Frassen art. 2. q. 1. concl. 1. affirmativam verò propugnant Thomistæ, & Aegidiani omnes, Suarez in 3. p. q. 64. art. 4. disput. 12. sect. 2. Valentia disput. 111. q. v. puncto 3. Joannes Puteanus disput. v. art. 2. alique quamplurimi. Tria itaque erunt nobis disquirenda: primum, an Christus immediate instituerit *Sacramenta* omnia: alterum, an id a Tridentina Synodo sit definitum; tertium, an simplici creaturæ possit istiusmodi institutionis communicari potestas.

PROPOSITIO I. Christus Jesus *immediate* omnia legis novæ *Sacramenta* instituisse dicendus est.

Id namque, etsi non adeo aperte, haud difficulter tamen ex Scri-

Scripturis colligitur . Primùm quoniam Apostoli *Sacramentorum* non auctores, sed dispensatores in Apostolicis litteris appellantur . Paulus enim in priori ad Corinth. 111. 5. retundens eorum zelum & contentionem, qui in partes eorum, a quibus *Sacramenta* recipiebant, factò schismate abibant, inquit: *Quid igitur est Apollo, quid verò Paulus? Ministri ejus, cui credidistis.* Et initio proximi capituli: *Sic nos existimet homo, ut ministros Christi, & dispensatores mysteriorum Dei.* Petrus quoque epist. 1. cap. 1v. 10. omnes Ecclesiarum rectores appellat *dispensatores multiformis gratiæ Dei.* Si autem cuiuspiam tanta collata esset dignitas & facultas, ut dici posset *Sacramentorum* institutor, & auctor, nonne id potius, quam mortalibus ceteris, datum fuisset Apostolis? At hi mysteriorum fuisse tantummodo dispensatores. Præterea in Apostolicis Actis cap. 1. v. 3. testatur Lucas, Dominum Jesum post resurrectionem suam per dies quadraginta cum discipulis conversatum, fidei veritatem multis argumentis confirmantem, & loquentem de Regno Dei, idest, aperiendo discipulis sensum divinarum Scripturarum, exponendo Ecclesiasticam hierarchiam, nec non formas ritusque Sacramentorum. Nisi enim de iis, quæ in Ecclesia præcipua sunt, ac plurimum necessaria, divinus Magister postremis illis diebus sermonem habuit cum Apostolis paullo post ad fidem propagandam profecturis, de qua re putabimus confabulatum? Recte itaque S. Leo Serm. 1. de Ascensione cap. 2. pag. 71. scribit: *Non ergo ii dies, dilectissimi, qui inter resurrectionem Domini, ascensionemque fluxerunt, otioso transiere decursu: sed magna in eis confirmata Sacramenta, magna sunt revelata mysteria.* Insuper *Sacramenta* omnia, ut vidimus supra, & accuratius demonstrabimus de singulis pertractantes, testimonio aliquo sacrorum Evangeliorum commendantur, ideoque, antequam Christus ad cæleste solium conscenderet, fuerant instituta.

Probat 2. traditione. Nullum quippe traditionis validum magis, ac veraciorem testem in medium proferre possumus, quam Synodum Oecumenicam a Romano Pontifice confirmatam, & ab universa Catholica Ecclesia receptam: de qua infra. Deinde, ut mittamus Dionysium Arcopagitam, qui in cap. 1. de Eccl. Hierarch. pag. 235. ait primos sacri ordinis nostri moderatores, supersubstantialis principatus munere plenos, tradidisse nobis in sensibilibus figuris supercælestia, & in materiis immateriata, idest, traditione a Christo derivata Sacramentorum symbola exposuisse; ut inquam, hunc missum faciam, S. Ambrosius lib. 1v. de Sacramentis cap. 1v. num. 13. Ergo, inquit, auctor Sacramentorum qui est, nisi Dominus Jesus? De calo ista Sacramenta venerunt. S. P. Augustinus de Doctr. Christ. lib. 111. cap. 9. num. 13. de Sacramentis ait, Ipse Dominus, & Apostolica tradidit disciplina, productis exemplis Baptismi, &

Eucharistiæ, quæ duo *Sacramenta* immediate a Christo Jesu instituta neque ullus negat heterodoxus. Idem docet in Epistola ad Januarium 118. nunc 54. num. 1. Perspicuè autem de vera Religione cap. 17. num. 33. *Ab ipsa Dei Sapientia homine assumpto, a quo in libertatem vocati sumus, pauca Sacramenta saluberrima constituta sunt, quæ societatem Christiani populi, hoc est, sub uno Deo liberæ multitudinis continerent.* Vide Hieronymum Torrensem Confess. Augustin. lib. 3. cap. 1. parag. 2.

Tertio probatur definitione Tridentini: cujus sess. VII. canon primus est: *Si quis dixerit Sacramenta novæ legis non fuisse omnia a Jesu Christo Domino nostro instituta, &c. anathema sit.* Ubi non definitur quidem *Sacramenta* a Domino instituta *immediate*, sed istud tamen firma hinc argumentatione deducitur. Principio namque quid est *instituere*, nisi aut decernere, aut erudire, aut inchoare, aut proponere, aut dirigere, aut promulgare? Quocunque ergo sensu dicatur Jesus Christus *Sacramentorum* institutor, ipse eadem *Sacramenta* determinavit, proposuit, & de iis discipulos imbuivit: ideoque omnia per semetipsum, priusquam celos conscenderet, instituerat: statuere enim & inchoare est prima institutio; promulgare autem atque erudire, primam institutionem supponit. Deinde Tridentina Synodus aperte inter institutionem, ac promulgationem distinguit, dum sess. XIV. Canone 1. decernit Extremam unctionem esse *vere, & proprie Sacramentum a Christo Domino nostro institutum, & a beato Jacobo Apostolo promulgatum.* Præterea eadem sacrosancta Synodus sess. XXI. cap. 2. ita Apostolis & Ecclesiæ tribuit potestatem instituendi ritus, & cæremonias, quæ servari solent in sacrorum mysteriorum celebratione, ut videatur illis denegare facultatem immutandi, quæ pertinent ad horum substantiam, ideoque hæc a Christo fuit constituta, atque determinata: etenim declarat, *hanc potestatem perpetuo in Ecclesia fuisse, ut in Sacramentorum dispensatione, salva illorum substantia, ea statueret, vel mutaret, quæ suscipientium utilitati, seu ipsorum Sacramentorum venerationi, procerum, temporum, & locorum varietate, magis expedire judicaret.* Id autem Apostolus non obscure visus est innuisse, cum ait: *Sic nos existimet homo, ut ministros Christi, & dispensatores mysteriorum Dei, atque ipsum quidem hac potestate usum esse satis constat, cum in multis aliis, sum in hoc ipso (Eucharistiæ) Sacramento, cum ordinatis nonnullis circa ejus usum, Cetera, inquit, cum venero, disponam.* Atque his etiam roboratur momentum primum ex verbis Pauli depromptum.

Probatur tandem ratione. Ac primo, quum Deus per se, & immediatè instituerit *Sacramenta* legis veteris, tamen essent elementa egena atque infirma, nec non plurium Doctorum opinione, *Sacramentum* quoque legis naturæ: cur *immediate*, ac per se non instituit

tuit *Sacramenta* perfectiora, & symbola cœlestium munerum efficiëntia? Adhæc tribuere vim sanctificandi sensibili elemento, atque ad producendam spiritualem gratiam, aquam, oleum, triticeumque panem elevare quisquam potest, nisi supremus Dominus? Insuper si Christus Ecclesiæ ædificator est, Fidei Conditor, & animarum Sanctificator; quomodo non ipse instituit *Sacramenta*, quæ sunt Ecclesiæ compago, fidei symbola, animarum remediâ? Tandem Apostoli, eorumque successores possunt quidem articulos fidei a Christo traditos explicare ac proponere, sed nova dogmata, & novos articulos condere nequeunt. Pari ergo jure potuerunt tradere nobis instituta a Christo mysteria; nova autem *Sacramenta* instituere non potuerunt.

Adversus hanc priorem thesim militant quæ sequuntur. Primum Augustinus cum lib. 3. de doct. Christiana, tum Epist. ad Januarium, ubi ait *Sacramenta* a Christo instituta, duo tantum commemorat, Baptismum, & Eucharistiam; reliqua igitur vel *Sacramenta* non sunt, vel instituta fuerunt ab Apostolis, aut ab Ecclesia. Deinde Auctor Sermonis de Ablut. Pedum, de quo non semel mentionem fecimus, pag. ciii. scribit: *Ipse summus Sacerdos sui est Sacramenti institutor & auctor: in ceteris homines Spiritum sanctum habuere doctorem; & sicut par est Spiritui sancto, & Christo divinitas, ita in suis institutis æqua est auctoritas & potestas: nec minus ratum est, quod distante Spiritu sancto Apostoli tradiderunt, quàm quod ipse tradidit, & in sui commemorationem fieri præcepit.* Ex quibus videtur solum Eucharistiæ *Sacramentum* habere Christum auctorem, reliqua autem ab Apostolis fuisse instituta. Ad hæc ex Scripturis demonstrari nequit, quando Christus Dominus instituerit *Sacramenta* septem, præsertim verò, quando Matrimonium ad *Sacramenti* everexit dignitatem. Præterea quæ scripta non sunt, retinentur tanquam ab *Apostolis vel plenariis Conciliis, quorum est in Ecclesia saluberrima auctoritas, commendata atque statuta*, juxta Augustini regulam, citata ad Januarium Epist. Tom. 2. pag. 124. Cum itaque institutionem omnium *Sacramentorum* non possimus è Scriptura sacra colligere, consequens est nonnulla instituta fuisse ab Apostolis, vel a Synodo aliqua universali. Tandem, ut in prænotatis dictum est, nonnulli doctores Catholici a Christo *immediate* instituta negant *Sacramenta* Confirmationis, & Unctionis extremæ.

Resp. ad 1. S. P. Augustinum uti eo loci particula *sicuti*, ex omnibus aliqua proferens exempli causâ, ut diximus cap. 5. quare sicut ibidem alia *Sacramenta* non denegat, ita non denegat institutionem aliorum *Sacramentorum* immediatam. Quod sequitur nullius momenti est, siquidem illius sermonis Auctor, dum ait homines in ceteris habuisse Spiritum sanctum doctorem, non affirmavit ab hominibus instituta cetera *Sacramenta*, sed ea tradita, quæ ad *Sacramenti* Eucha-

Eucharistiæ pertinent celebrationem, puta sacram lyturgiam, jejunium, & alia, quæ Apostolica traditione didicimus. Ait enim non minus ratum esse, *quod Christus Jesus in sui commemorationem fieri præcepit*, quam ea, quæ dictante Spiritu sancto Apostoli tradiderunt: eodem ferme pacto, quo Apostolus in priori ad Corinth. x1. posteaquam præceptum Domini, *Hoc facite in meam commemorationem*, luculenter exposuit, inquit versu ult. *Cetera autem, cum venero, disponam*. Vide quæ supra diximus ex Tridentino, nec non Augustinum scribentem citata Epist. 54. ad Januarium num. 8. institutum ab Apostolis, & quidem Spiritu sancto dictante, ut Dominicum corpus fumatur a jejunis, productis ad hoc comprobandum Apostoli verbis. Proximum hac ratione diluitur: quamvis in scripturis expressa non esset institutio *Sacramentorum*; hinc tamen nihil erueretur propositioni nostræ contrarium; quippe præter Scripturam agnoscimus tanquam fidei normam, & irreformabilem regulam, *verbum traditum*. Ast nihilominus etiam sacræ literæ instituta a Christo *Sacramenta* commonstrant, & Matrimonium quidem Matt. xix. 4. aut Joan. 2. 1. ut alibi discutietur. Illud verò, quod additur, hanc exigit responsionem. Augustinus in citata ad Januarium Epistola tria distinguit, primum *Sacramenta* a Domino instituta, sicuti est baptismus, & Dominici corporis communicatio; deinde ea, quæ ab universa Ecclesia servantur, ut anniversaria solemnitas resurrectionis, ascensionis Christi, & adventus Spiritus sancti: tertio loco, quæ per loca terrarum, regionesque variantur, ut jejunium sabbati. Apertissimum est autem in verbis, quæ obijciuntur, sanctum Patrem loqui de iis, quæ secundo loco posita sunt, ideoque nihil inde concluditur, nisi in Ecclesia præter *Sacramenta* retineri *alia commendata & statuta*, quæ si servantur ab universa, quacunque se diffundit Ecclesia, cujusmodi sunt solemnitates prædictæ, quamvis scripta non sint, retinenda sunt tamen, quoniam ex illorum universali consuetudine apparet, aut tradita fuisse ab Apostolis, aut definita in Synodis Oecumenicis. In diluenda objectione postrema non immorabimur; quum paucorum Doctorem placitum nequeat esse locus Theologicus ineluctabilis, pateatque innixos illos fundamento labili & arenoso; quoniam, ut diximus in prænotationibus, ex Jacobi Epistola inferitur hunc Apostolum promulgasse, non præscripsisse infirmorum unctionem, & constat Melitensem Synodum anno tantum 845. coactam, quum permulti Patres Confirmationis meminissent, definire duntaxat, ne Chorepiscopi Christma consecrent, neque Episcopi alio tempore, quam majoris hebdomadæ quinta feria, illud conficiant, neque ipsis, sive illorum ministri exigant denarios, vel munuscula quælibet a confirmandis. Ceterum ex hac eadem objectione adversus heterodoxos perspicue inferitur Tridentinos Patres non ad normam eorum, quæ Petrus Lombardus,

hardus, aut Scholasticorum quispiam privata sententia docuit, sed juxta traditionem in Romana Ecclesia custoditam, fabricasse decreta, & canones edidisse.

PROPOSITIO II. Non est tanquam dogma fidei a Tridentina Synodo definitum, *Sacramenta* omnia esse a Christo *immediate* instituta.

Prob. 1. In definitione enim Tridentini particula *immediate* non reperitur, & licet a nobis inferatur Theologica ratiocinatione, quia institutor propriè dicitur, qui idem auctor est, & quia Ecclesiæ collata est potestas immutandi ritus, non verò *Sacramentorum* substantians; hæc tamen ratiocinatio idonea non est ad fidei decretum constituendum. Enimvero si potest dici Christus miraculorum patrator, quamvis miracula plura patrata sint per Apostolos, necnon baptizans & consecrans, licet in ejus nomine consecrent, baptizentque ministri; ac si Deus non minus est princeps causa eorum effectuum, qui ab ipso immediate producantur, quam illorum, qui causas habent secundas: non repugnat dici etiam Christum Dominum *Sacramentorum* institutorem, tametsi per Apostolos, sua in eos potestate translata, *Sacramenta* quædam instituisset. Dixi autem, non repugnat; ego quippe in hujusmodi comparatione non arbitror tantam inesse vim, quantam putant Tiletanus, De-Cocq, & Farvacquez: siquidem dum efficientem causam nomino, non exprimo *immediatum*, aut *mediatum* principium; dum verò dico *Institutorem*, intelligo eum, qui statuit, qui determinat, qui est auctor *immediatus*. Non enim de iis ritibus, E.G. quæ Ecclesia mutat, ut Tridentinum loquitur, *pro rerum, temporum, & locorum varietate*, proprie dicimus, *Christus ritus istos instituit*, sed, *instituit Ecclesia*; tametsi Ecclesia hoc præstiterit facta sibi a Domino potestate. Atque id monui, ne argumentum istud videretur oppugnare superiorem propositionem. II. Jodocus Ravestein Lovaniensis Theologus, & ad Tridentinam Synodum missus a Maria Regina Belgii Gubernatrice, & qui tantæ fuit existimationis, atque doctrinæ, ut in reformando canone primo de Confirmatione præcipuam habuerit partem, ex Historia Conc. lib. xii. cap. 12. num. 11. in Apologia edita contra Martinum Kemnitium, qui canoni 1. sess. vii. inferuit particulam *Ipso*, legens, *Si quis dixeris non omnia ista septem Sacramenta a Christo ipso instituta esse, anathema sit*: scribit, *Hanc cavillationem studiose & circumspiciendè Patres Synodi excluderunt, dum decreverunt, quod omnia novæ legis Sacramenta instituta quidem sint a Jesu Christo, non autem quod omnia sint a Christo immediate instituta*. Ruardus Tapperus Theologus alter Lovaniensis in Explicat. articulorum adversus hæreticorum dogmata, a se exornatâ, postquam a Tridentina Synodo reversus fuerat, pag. 3. inquit: *Inquiri posset, si hæc potestas instituendi Sacramenta fuerit apud Apostolos, an fuerit solum Apostolica, an in Eccle.*

*Ecclesia manserit apud eorum successores; sed nihil bonum requirit articulus, qui solum habet, quod omnia Sacramenta sunt a Christo instituta: non autem quod ab eo sunt instituta immediate.* Et in altera declaratione breviori edita ante præcedentem, anno 1554. pag. 9. probabilem esse pronuntiat sententiam Magistri Sententiarum, & Hugonis, determinationem materiae, aut etiam formæ Sacramentorum fieri potuisse ab Apostolis, imo factam esse reipsa in nonnullis Sacramentis ex instinctu Spiritus sancti. Quod sane vir eximius non asseruisset, si compertum ei esset, visum aliter Tridentinis Patribus, præsertim cum ipse præcedenti pag. 8. sententiam exponens suam, scripserit: *Christus, in Sacramentorum institutione, res certas elegit, certamque verborum formam præscripsit.* IV. Quum Tridentini PP. adeo cautè se gesserint, ne definitionibus suis aliquem ex Catholicis Scriptoribus læderent, quemadmodum in articulo Iustificacionis factum narrat Pallavicinus lib. viii. cap. 9. num. 10. in articulo de intentione ministri, lib. ix. cap. 6. num. 2. & in articulo de Attritione, lib. xii. cap. 10. num. 25. haud probabile est damnaſſe sententiam Magistri Sententiarum, Hugonis, Alensis, Divique Bonaventuræ, qui affirmant aliqua Sacramenta non esse a Christo immediate instituta; cumque hæretici asseverent, Dominum Jesum instituisse duntaxat Baptismum, & Eucharistiam, reliqua verò Sacramenta tanquam figmenta hominum esse explodenda; longe probabilius est, Synodum Occumenicam ad hæreses extirpandas coadunatam, eo sensu definiſſe Sacramenta quælibet a Christo instituta, quatenus auctoritate detinentur divina, non autem ex arbitraria hominum inventione.

Oppones cum Bellarmino lib. 1. de Sacram. in gen. cap. 23. Nisi Tridentina Synodus statuisset singula Sacramenta fuisse a Christo immediate instituta, frustra canonem istum posuisset, cum nemo unquam dubitaverit, quin saltem mediata Sacramenta instituta sint a Deo. Præterea sefs. xiv. can. 1. Concilium sese explicat, dum Sacramenti extremæ unctionis tribuit institutionem Christo, & B. Jacobo Apostolo promulgationem. Tertio sefs. xxi. cap. 2. declarat, Ecclesiam habere potestatem immutandi ritus Sacramentorum, salva tamen eorum substantia. Hæc etiam nos produximus supra ad priorem theſim ſtabiliendam.

Ad primum respondetur, hæreticos affirmare Sacramenta quædam, nec mediata, nec immediate fuisse a Christo instituta; siquidem Melancthon in Locis communibus Confirmationem appellat *otiosam ceremoniam*, Calvinus in Antidoto §. 11. ait se *ne unius quidem stercoris Christum facere*, Wicleſus longe antea scripserat lib. iv. Trialogi cap. 14. Confirmationem ipsam a *Diabolo introductam*. Pœnitentiam Calvinus lib. iv. Instit. cap. 19. §. 17. appellat *mendacium & imposturam*; Kemnitius effutiit hoc Sacramentum, *factum a Petro*  
Lom-



*Lombardo*, idem affirmant ceteri Novatores. Unctionem extremam Lutherus in libro de Captivit. Babil. vocat *deliramentum*, Philippus in locis *ceremoniam fuperftitiofam*, Calvinus cit. loco §. 18. *Sacramentum fictitium*. Itaque adverfus iftiusmodi blaſphemias definitum eſt, omnia *Sacramenta* eſſe a Chriſto inſtituta; nullum eſſe inutile figmentum, nullum impoſturam, nullum ritum ſuperſtitioſum. De inſtitutione autem *immediata* nullam habemus fidei definitionem. His diluitur obſectio ſecunda; cum enim Lutherus ſcripſerit unctionem extremam inſtitutam a Jacobo Apoſtolo, aut ab Eccleſia, *propria auctoritate*, optime definiunt Tridentini PP. inſtitutam a Chriſto, & a Jacobo promulgatam, quoniam nec Jacobus, nec quiſpiam alter auctoritate propria *Sacramentum* iſtud invenit. Hæretici enim, ut Extremam unctionem facilius eliminarent, Magiſtro hanc affixere calumniam, quod opinatus ſit, Jacobum ſuomet libito, non Spiritu ſancto diſtante Unctionem ipſam induiſſe: quam calumniam expungit Controv. x. Albertus Pighius, demonſtrans quomodo veteres Scholaſtici, qui putarunt *Sacramenta* aliqua ab Apoſtoliſ inſtituta, numquam exiſtimarunt, quod hoc præſtiterint ſeipſis, nullaſque ſuffulti a Domino poteſtate. Denique ſeſs. xxi. declarat Tridentina Synodus, in *Sacramentis*, poſteaſque inſtituta ſunt, non poſſe immutari ſubſtantiam, ſed ceremonias rituſque tantummodo, ipſis *Sacramentis* permanentibus; quæ tamen, cum ſint plurimum neceſſaria, nequeunt in defectuſtudinem, cum ritibus antiquitatis, abire: num vero primum *Sacramenta* inſtituta ſint a Chriſto *immediate*, hoc in loco Tridentina Synodus, expreſſa ſaltim definitione, nequaquam affirmat.

Propoſitio III. Facile poſſunt conciliari diverſæ Theologorum ſententiæ circa quaſitum tertium, an communicari queat creaturæ *hypotaſtice* Deo non unitæ poteſtas inſtituendi *Sacramenta*.

Triplex enim poteſtas diſtinguenda eſt, *auctoritatis*, quæ propria eſt Dei, importatque virtutem conferendi ſenſibilibus ſignis vim effectricem producendi gratiam: *excellentiæ*, quæ poteſtas convenit humanitati Chriſti, atque in eo ſita eſt, ut Chriſtus promeruerit eam gratiam, quæ per *Sacramenta* conferitur rite diſpoſitis; ut poterit ipſam gratiam conferre etiam abſque ſenſibilibus Sacramentorum ſignaculis, atque ut eadem *Sacramenta* in Chriſti nomine adminiſtrentur: tertia eſt poteſtas *miniſterii*, ſive delegata Eccleſiæ miniſtris, quæ *Sacramenta* a Domino Jeſu inſtituta parant, efficiunt, diſpenſant. Atque de hac poteſtate nulla oriri poteſt dubitatio.

Quantum ergo attinet ad poteſtatem *auctoritatis*, affirmandum eſt, non poſſe creaturæ alicui communicari; ſola enim ſuprema Cauſa poteſt talem virtutem tribuere ſenſibili elemento, ut corpus tangat, & ſanctificet animam. Quum enim gratia ſanctificans animam ſit divini naturæ participatio, artha Spiritus ſancti, & pignus cæ-

Iestis hæreditatis : quis , nisi Deus summus , potest nos evehere ad divinitatis consortium , nobisque Spiritum sanctum , & gloriæ , quæ pendet a Dei beneplacito ac promissione , pignus , arrhamque tribuere ? In hoc ergo subscribendum est Scoto : quamvis enim creatura a Deo talem nata esset facultatem , ut symbola *Sacramentorum* statueret , atque pro suo arbitratu determinaret materiam , formamque præberet ; semper tamen virtus supernaturalium donorum effectrix esset divini muneris opus .

At si loquamur de potestate *excellentiæ* , tametsi hæc nequeat ea ratione creaturis communicari , qua competit Salvatori , cuius meritum ob *hypotheticæ* unionis prærogativam infinitum est , omniaque gratiarum præstantissima dona potuit *de condigno* universis Adæ posteris promereri , potest tamen creaturis concedi , ut cum D. Thoma q. 64. art. 4. tenent Scholastici fere omnes . Neque enim in hac potestate aliquid apparet , quod vel contradictionem importet , vel rerum creaturarum superet conditionem . Nam si creatura accepta a Domino potestate institueret *Sacramenta* ; gratiam ipsa non efficeret , sed Deo largiente illam sensibili signo alligaret , quod sufficere videtur ad *Sacramentorum* institutionem . Posset etiam creatura absque visibili *Sacramentorum* adminiculo gratiam ceteris impertiri , non quidem tanquam causa princeps , sed tanquam a suprema dependens : qua in re quid contradictionis eluceat , ego quidem non video . Neque absolute potestas instituendi *Sacramenta* exigit meritum infinitum ; cum Deus gratiarum suarum Dominus , eas possit , quando , & quomodolibet ei libuerit , dispensare . Sicut ergo poterat per *nudam* hominem universos redimere , non tamen præscripta rigorosa illa satisfactione , quam exhibere non valebat , nisi Deus-homo , Christus Jesus : ita potuisset puræ creaturæ largiri facultatem instituendi *Sacramenta* , non ita tamen , ut creatura illa gratiam ceteris conferendam eo promeretur pacto , quo illam Dominus Jesus , Deus-homo promeruit . Quamquam enim S. Thomas citato art. 4. scribat potuisse Deum ministris communicare *tantam gratiæ plenitudinem* , ut *ad invocationem nominum ipsorum conferrentur Sacramenta* , & ut *ipsi possent Sacramenta instituere* , & *sine ritu Sacramentorum effectum Sacramentorum conferre solo imperio* ; attamen existimandum non est beatissimum Thomam tribuere creaturæ possibili potestatem *excellentiæ* , qualem præcedenti articulo tribuit humanitati Redemptoris , tanquam *instrumento conjuncta in eadem persona divinitati* .

Posse etiam Deum tantam dignitatem impertiri creaturæ , ut in hujus nomine *Sacramenta* conferantur , diserte scribit S. P. Augustinus Tract. v. in Joan. num. 7. quamquam ibidem sapientissime animadvertit , magis congruum fuisse , ut unus Dominus Jesus Christus esset *Sacramentorum* institutor & auctor , quo facilius teneretur Ecclesiæ unitas ,

unitas , & quisque perciperet unum esse Mediatorem nostrum , in quo spes nostra locanda est . Quare si creatura tantam obtinisset prerogativam , ut in ejus nomine aliquis baptizaretur , aut alia *Sacramenta* reciperet ; ad servandam Ecclesiae unionem esset quotidie singulis inculcandum , creaturam ipsam , non propria auctoritate , sed delegata vim tantam communicasse elementis , ejusque nomen , tanquam illius , qui vicem gereret supremi Auctoris , in Sacramentali ministracione proferri . *Potuit autem* ( inquit Augustinus ) *Dominus Jesus Christus , si vellet , dare potestatem alicui servo suo , ut daret baptismum suum tanquam vice sua , & transferre a se baptizandi potestatem , & constituere in aliquo servo suo , & tantam vim dare baptismi translati in servum , quantum vim haberet baptismus a Domino . Hoc noluit ideo , ut in illo spes esset baptizatorum , a quo se baptizatos agnoscerent . Noluit ergo servum ponere spem in servo : ideoque clamabat Apostolus , cum videret homines volentes ponere spem in seipso : Numquid Paulus pro vobis crucifixus est , aut nomine Pauli baptizati estis ?* Atque his præclarissimi Doctoris Augustini verbis dissertationi modum , finemque constituo .

## C A P U T IX.

*An Sacramenta novæ legis rebus , & verbis , tanquam materia , & forma perficiantur .*

**D**E partibus , quibus perficiuntur *Sacramenta* , pertractandum est modo . Illas pervulgata nunc Scholarum consuetudine *materiam* , & *formam* appellamus , ducta a rerum naturalium principiis comparatione : nam quemadmodum in corporibus adinvenitur subiecta res indifferens ad constituendum unum , vel alterum , & quod rem illam determinat ad peculiarem quamdam rationem ; quorum unum Philosophi *materiam* dicunt , alterum *formam* : ita in *Sacramentis* adinvenitur *elementum* , sive res aliqua subiecta sensibus , & *verbum* rem ipsam determinans , & in ratione *Sacramenti* constituens . Sensibile ergo elementum insignitur *materia* nomine , verba *forma* vocabulo denotantur . Consuetudinem explicandi *Sacramenta* per materiam & formam permulti derivatam putant a Peripatetica philosophia , quæ per materiam , & formam explicat naturalem corporum generationem . Verum num ita res se habeat , incertum . Enimvero si omnium primus *Sacramenta* hisce vocabulis explicavit circa annum 1215 . Guilelmus Antisiodorensis in Summa , ut animadvertit Jo. Morinus 111 . P. de Sacris Ordinationibus Exerc. 1. cap. 1. & ex Morino Juenin . q. 3. cap. 2. Vanroy cap. 1. q. 3. ac Tournelius q. 1. art. 4. obtinuerat

longe antea disputatrix illa, & sermonis barbari, ac tumescens Philosophia, initio 1x. sæculi una cum Arabum tyrannide restituta, priusquam Scriptores Aristotelicis imbuti dogmatibus suas de *Sacramentis* lucubrationes vocabulis istiusmodi contexerent. Neque inusitata sunt in Philosophicis aliis sectis *materia* vel *forma* nomina; quamvis in Arabum physiologia intelligant his nominibus incompletam quandam substantiam; in aliis verò certam elementorum congeriem, atomorumque combinationem. Meminit quoque *forme* baptismatis S. P. Augustinus lib. 1. de Peccat. meritis cap. 34. tametsi videatur eo vocabulo designare potius ritum ac ceremonias, quam verba, quibus perficitur salutariferum regenerationis lavacrum. Rerum tamen, verborumque Sanctum protoparentem meminisse, & utraque necessaria existimasse ad *Sacramenta* conficienda, dubitari non potest.

In hac itaque disquisitione refellendus nobis erit error Pauli Sarpi, qui in Hist. Concilii Trid. lib. 2. cap. de Articulis Baptismi, scribit antiquitatis studiosis notum, numquam priscis temporibus materiam & formam *Sacramentorum* innotuisse; cum Stephanus Papa opinaretur neminem a quacunque hæresi venientem rebaptizandum; Concilium verò Nicænum statuerit, ut denuo tingerentur Paulianistæ, & Montanistæ, non autem Cathari; quamquam illi, qui tunc temporis vigeabant hæretici, exceptis paucis Montanistis, insolitis uterentur baptismi formis, propter insolentes, quas tam de divinitate, quam de persona Christi tuebantur opiniones. Atque hinc Suaevis methodum explicandi *Sacramenta* per *materiam*, & *formam* carpit & vellicat, tanquam veteribus incompertam. Deinde quoniam multi magis, quam æquum sit, contentiosi, spectato munere, quod in corporibus exercetur a materia, & forma, simul dum corpora, constituunt existentibus, ac permanentibus in composito, frustra tale munus in *Sacramentis* perquirunt; explicanda est etiam differentia, quæ intercedit inter principia physici corporis, & inter materiam, formamque *Sacramentorum*.

PROPOSITIO I. *Sacramenta* rebus, tanquam materia, & verbis, tanquam forma, perficiuntur.

Probat ur primo. Eugenius in Instrucl. Armenorum, in Concilio Florentino Tom. xiii. pag. 535. *Sacramentis* omnibus novæ legis enumeratis, inquit: *Hæc omnia Sacramenta tribus perficiuntur, videlicet rebus tanquam materia, verbis tanquam forma, & personæ ministri conferentis Sacramentum, cum intentione faciendi quod facit Ecclesia*. Synodus pariter Bituricensis Tom. xv. pag. 1067. *Omnia etenim Sacramenta tribus constant ac perficiuntur, rebus ut materia: verbis, ut forma: ministro ut conferente Sacramentum, & communem Ecclesiæ intentionem habente*. Deinde probatur traditione. Et Occidentalis quidem Ecclesiæ apparet ex memoratis Synodis univer-

falis

salis affenfus: Orientalis vero Ecclefie traditionem commonftrat in fua Cenfura ad Wittembergenfes directa Hieremias Patriarcha Conftantinopolitanus fcribens cap. vii. pag. 60. *Quæ quidem omnia Sacramenta facra fanciuntur Scriptura, certamque ac definitam materiam & formam habent: uti baptifmi materia eft aqua, forma autem verba Sacerdotis illa, Baptizatur fervus Dei in nomine Patris, & Filii, & Spiritus fancti.* Præterea Sacramenta conftare materia, aut re aliqua fenfibili indubitatum eft; quum enim fint figna gratiæ, debet in his adhiberi fenfibile aliquod *elementum*, quo effectus designari queat fpiritualis. Quare diximus præced. cap. v. etiam Diabolum in fuperftitiofis initiationibus, five ad affectationem divinitatis, five ad æmulationem, five ad contemptum myfteriorum noftrorum, aquam luftralem, panem, oleumque non femel adhibuiffe. Eandem materiam haud obfcure divinæ literæ manifeftant, aquam baptifmatis, impositionem manuum, facram unctionem, ac panem vinumque Eucharifticum commemorantes, mutuam quoque conjugatorum conventionem, affenfumque reciprocum, ac peccatorum deteftationem: quæ hoc loco innuere fat eft. Formam autem *Sacramentorum* comprobant momenta complura. Ac primo S. P. Auguftinus Traët. lxxx. in Joan. n. 3. inquit: *Unde ifta tanta virtus aqua, ut corpus abluit, & cor tangat, nifi faciente verbo?* Et infra: *Mundatio igitur nequaquam fluxu, & labili tribueretur elemento, nifi adderetur in verbo: atque ibidem: Detrahe verbum, & quid aqua, nifi aqua? Accedit verbum ad elementum, & fit Sacramentum:* quæ verba relata funt in canonem a Gratiano, 2. p. caufa 1. q. 1. c. *Detrahe*. Lib. etiam vi. de Baptifmo cap. 17. aliisque in locis fcribit Auguftinus baptifmum *verbis Evangelicis* confecrari. Deinde veteres, quemadmodum dictum eft alibi, occultabant gentibus Religionis noftræ myfteria: non ipfas res tantum, quæ fpectatæ in fe communes funt, nulloque teëtæ velamine, fed ritus, confecrationes, & præfertim verborum formam. Innocentius enim Primus in priori fua decretali volumine Sacrorum Conciliorum 11. pag. 1245. differens num. 3. de *Sacramento* Confirmationis, facro commemorato Chrifmate, *Verba autem, inquit, dicere non poffum, ne magis prodere videar, quam ad confultationem respondere:* & num. 8. explicata materia Unctionis extremæ, ait: *Reliqua vero, quæ fcribi fas non erat, cum adfueris, interrogati poterimus edicere.* Legi poteft Scheleſt. de Arcani difcipl. cap. 2. art. 2. Eftius in iv. diſt. 1. §. 18. & caput hujus diſſertat. quintum. Tandem difcrimen iſtud inter vetera ac nova *Sacramenta* intercedit, quod illa gratiam promittebant ac præſignabant; hæc verò illam efficiunt, & conferunt, non ſolum exhibitione ſignaculi ſenſibilis fidem excitando, ut delirant hæretici, verum etiam propria energia ac virtute operando ſanctificationem. Quamquam verò rationem ſigni

signi ac promissionis habere queant nuda *elementa* per solam Auctoris institutionem atque determinationem, quemadmodum sponforum promissa demonstrat anulus, aut futuram hæreditatem rite conditum testamentum, ideoque ad constituenda vetera *Sacramenta* non fuerit necessaria, formæ prolatio: ut tamen aqua, aut res alia subiecta sensibus suamet energia exornet spirituales animus sanctitate, debet consecratoriis verbis vim quamdam eximiam supra materialia nanciſci: & consequenter aiebat paullo supra benè, sapienterque Augustinus, *Unde ista tanta virtus, nisi faciente verbo?* Et, *Detrahe verbum, quid aqua nisi aqua?* Quod itidem valet de *Sacramentis* reliquis, videlicet, si detrahatur forma verborum, quid oleum nisi oleum? quid panis nisi panis? quid sacrorum ministrorum manus, nisi manus? quid postremo conjugum contractus, nisi contractus? Ut ergo res sensibilis tantam acquirat virtutem, ut habeatur signum gratiæ efficiens & practicum, ut constituatur *Sacramentum* novæ legis præstantius veteribus; accedere debet verbum ad elementum, forma ad materiam: idque priori hac positione erat commonstrandum.

PROPOSITIO II. Materia & forma *Sacramentorum* non habet cum principiis rerum corporalium æquabilem analogiam.

Quum soleant nonnulli è Schola inutiliter, ut puto, circa propositionem præcedentem objectare, quod verba proferantur, non permancant, quemadmodum in compositis physicis perficitur forma; & quod aliquando definat ipsa materies, perseverante *Sacramento*, ut in Eucharistia substantia panis & vini, aliquando autem nec sit materia aliqua, ut dum impenditur absolutio probis Christianis subito, gravissimoque morbo correptis: necessario commonefaciendum est, Ecclesiam non profiteri in *Sacramentis* materiam & formam propriè, & quæ omnino intrinsecis corporalium rerum principiis possit æquiparari. Primum namque præcitata Synodus Florentina non ait *Sacramenta* perfici *materia*, & *forma*, sed rebus *tanquam materia*, & verbis *tanquam forma*: qua loquendi ratione, accuratissima quidem, & consulto usurpata, utitur etiam Tridentina Synodus ubi sess. xiv. cap. 3. appellat actus pœnitentis *quasi materiam* Sacramenti Pœnitentiæ, non vero *materiam* simpliciter, & absolute. Theologi quoque poliores subscribunt beato Thomæ affirmanti q. 60. art. 7. in *Sacramentis* verba se habere per modum formæ, res autem sensibiles per modum materiæ. Præterea cum *Sacramentum* non sit compositum aliquod physicum, sed morale, nec etiam ejus partes cum partibus physicis habent omnimodam similitudinem: & sat est, si quemadmodum partes physice ad rem naturalem constituendam physice coexistunt, physice uniuntur, & physice participant materiæ, ac formæ naturam; ita res & verba Sacramentorum moraliter coexistant, ut actus pœni-

pœnitentis & forma Sacerdotalis abfolutionis; *moraliter* uniantur, ut fubjectus panis, & confecrationis verba; *moraliter* etiam fiant fenfibiles, ut contritio pœnitentium, five fponforum affenfus quafi materialis evadit, & fenfibus fubjicitur per nutus, per verba, per figna alia corporea.

Materiam itaque, & formam *Sacramentorum* idcirco appellamus res, atque verba; quoniam ficut *materia* ad conftituendum corpus unum, aut aliud fuapte natura indifferens, accedente *forma*, idelt, tali fubftantiali actu, vel tali elementorum affectione, ad unum fpecie compositum determinatur, & coarctatur: ita res fenfibiles, quarum multiplex potelt eſſe uſus, per *formam* verborum determinantur ad ſacrum myſterium conſtituendum, efficiendamque gratiam, quæ ſupergreditur naturalem facultatem rerum quarumlibet fenſibilem. Ceterum inter *Sacramenta*, & compositum phyſicum intercedit diſcrimen multiplex: ac primum eſt, quod principia corporum eidem inhærent, permanentque ſimul; at in *Sacramentis* pertransit *forma* verborum, nec ſemper *materia* coeſiſtit, ſed illam ſæpenumero ſequitur poſt aliquod temporis intervallum. Diſcrimen alterum eſt, quod phyſica materies eſt ſolida, & permanens: quorundam vero *Sacramentorum* materia eſt actio pertransiens, nec per ſe, ſed tantum adminiculo externorum motuum ſenſibilis. Tertium diſcrimen in eo ſitum eſt, quod ſi materia ſubelle definat, phyſicum compositum perit atque diſſolvitur; perſeverat autem *Sacramentum* quamquam materia nonniſi *moraliter* percipiatur adeſſe, uti contingit in venerabili Euchariftiæ *Sacramento*, quod permanentibus duntaxat rerum ſubjectarum accidentibus, diu perſiſtit. Atque horum diſcriminum rationem paullo antea produximus: quoniam ſcilicet *Sacramentum* non phyſicum compositum eſt, ſed morale, neque proprie *materia* & *forma* conſtituitur, ſed rebus *tanquam materia*, & verbis *quafi forma* perficitur.

Reſtat ergo, ut Pauli Veneti refutemus futilem, & inanem objectionem. Principio certum eſt nomina quamplurima quotidiano uſu probari, quamvis fuerint antiquis inuſitata; idque utiliter, dummodo ad comprobanda fidei dogmata adverſus profanas novitates exiſtimentur idonea: quod lib. vii. cap. 13. & 19. oſtendimus recte factum de vocabulo *Omooniſon*, & particula *Filioque*; lib. xxvi. cap. 14. de voce *Deipara*: nec non libro, in quo verſamur, cap. 1. de nomine *Sacramenti*. Deinde quod nos affirmamus, illud idem ſacri tradidere Doctores, ubi docuerunt non perfici *Sacramenta*, niſi verbum accedat ad *elementum*, & res ſenſibiles nullam habere vim ſanctitatis effectricem, niſi determinatione verborum. Deinde in eo ſuaſis turpiter alucinatur, quod ad oppugnandam materiam, formamque *Sacramentorum* utitur exemplo baptiſmi ab hæreticis col-

lati,

lati, cum baptismi tam materia, quam forma in Evangelio sit expressa. Sapientissime itaque Pallavicinus lib. 1x. hist. Concil. Trid. cap. 6. num. 8. his verbis Suavem refellit: *Næ ille nimis crassam comminiscitur tunc in Ecclesia ignorantiam, etiam Evangelii, quo aperte docemur & baptismi materiam, hoc est aquam, & formam, qua baptismum conferimus, hoc est, Baptizantes in nomine Patris, & Filii, & Spiritus sancti. Quin unquam accidere potuit, ut in universa Christiana Republica tam cito evanuerit traditio de iis, quibus constare debet Sacramentum maxime necessarium, maxime universale, maximeque nominatum præ reliquis, quæ sunt in Ecclesia. At vero ubi etiam id accidisset, quid cause erat, quod aliqui baptismi ab hæreticis collati, sicut ipse fatetur, sufficere credebantur, aliqui non sufficere, ideoque illos tunc iterare mos erat? Quanam alia poterit excogitari ratio, nisi quod in illis, non in his cernebatur Sacramenti substantia? Nulla sunt rerum genera tam opposita, quam falsum & verum; unde qui semel falsum protulit, postea ne falsi convinceretur, opus foret nunquam quidquam veri proferre. Porro quando immutatio formæ irritet Sacramentum, & quid de baptismo hæreticorum asserendum sit, disquirendum est postmodum.*

## C A P U T X.

*An penes Ecclesiam sit immutare formam, ac materiam Sacramentorum?*

**P**Arum, ut opinor distat hæc quæstio ab illa, quam supra definivimus, num Carissus Dominus sit *Sacramentorum* omnium immediatus Auctor & Institutor, an verò *Sacramentorum* aliquorum materiam & formam determinaverit Ecclesia Apostolica, facta sibi a Domino potestate. Nam si Dominus Jesus instituit ac determinavit quorumlibet *Sacramentorum* res, atque verba; certum est non posse Ecclesiam hæc adversus Christi institutionem immutare. Ad majorem tamen hujus argumenti notitiam, quoniam de materia, & forma *Sacramentorum* nunc singillatim pertractamus, propositam quæstionem curabimus expressius dirimere. Discipuli itaque Pauli Samosatensis in solis Evangelicis verbis, spreto sensibili elemento, *Sacramenta* constituerunt, quamquam liberos suos aliquando vellent salutari aqua lustrari, ut ex Photio scribit 2. p. Panopliæ tit. 21. pag. 696. Euthymius Monachus Zigabenus. Ita Paulitiani *materiam* Sacramentorum tanquam non præscriptam, & inutilem abjicere. At Novatores, cum velint usurpata in *Sacramentis* verba, quasi ad concionem adhiberi ad fidem excitandam, formam consequenter negant, quæ  
Sacra-



*Sacramenta* perficiat : supinus ac portentosus error insequenti capite discutiendus . Nonnulli ex Catholicis putant , non quidem præsentem Ecclesiam omnibus institutis plene formatam , sed quæ fuit tempore Apostolorum , præterminasse materiam & formam quorundam *Sacramentorum* , præsertim Confirmationis , & Ordinis : a qua sententia alienus non est Franciscus Farvacques de Sacramentis in genere cap. iv. q. 3. Franciscus Amicus Tom. vii. sect. iv. num. 45. ait potuisse Ecclesiam pro materia Ordinis adhibere usum sacrarum vestium , quas modo adhibet ut ceremonias tantummodo . Ejusdem *Sacramenti* Ordinis essentiali materiam esse solam porrectionem sacrorum instrumentorum censuit in iv. dist. 24. q. 1. art. 4. Dominicus Soto : cumque Apostolorum ætate sacri ordines collati fuerint per solam manuum impositionem , ut demonstrant Franciscus Hallier pag. 427. Morinus 3. P. Exercit. 7. pag. 131. Juenin de Ordine cap. 2. q. iv. consequitur ex sententia Soti immutatam fuisse sacræ ordinationis materiam . Juxta doctrinam vero illorum Doctorum , qui censent tam impositionem manuum , quam instrumentorum traditionem esse sacrarum ordinationum *materiam essentiali* , ut visum Bellarmino de Ordine cap. ix. , laudatis ab ipso Theologis , & præcitato Doctore Sorbonico Hallier pag. 439. saltem consequitur additam ab Ecclesia ad materiam antiquitus institutam materiam aliam partialem . Nonnullæ aliæ circa materiam confirmationis , & matrimonii occurrunt dubitationes : quibus tamen minime obstantibus , proximam pono assertionem communiori Scholasticorum assensu firmatam .

Prop. Non est penes Ecclesiam materiam formamque Sacramentorum immutare .

Prob. i. Dominus Jesus , juxta præcedens cap. viii. ita est *Sacramentorum* auctor , & institutor , ut penes Ecclesiam sit quidem potestas statuendi , & mutandi pro temporum & locorum varietate ceremonias & ritus , sed non eorundem *Sacramentorum* substantiam . Si autem Ecclesia posset statuere ac mutare materiam , formamque *Sacramentorum* , mutare , & statuere posset non tantum ipsum *Sacramentorum* ritus , verum etiam substantiam , quæ in rebus & verbis , sive in materia & forma sita est . Igitur Ecclesia materiam formamque *Sacramentorum* mutare non potest . Præterea Dominus Jesus non solum Baptismum , & Eucharistiam instituit , sed etiam *Sacramenta* reliqua ; & quamvis non omnia instituta a Christo invictè demonstretur e sacris literis , inconcusse tamen inferitur ex Apostolicis traditionibus . Atqui Baptismum & Eucharistiam ita Christus instituit , ut determinavit materiam & formam , aquam scilicet , panem , & vinum , & Evangelica verba Matt. xxviii. 19. & xxvi. 26. 28. descripta . Ergo eodem pacto , idest , materiam & formam determinando , instituit *Sacramenta* reliqua . Insuper , quod citato cap. 8. dictum est , con-

To. VI.

O

gruum

grum fuisse, ut Christus per se *Sacramenta* institueret ad unionem Christiani populi, & ad maiorem gratiæ significationem, illud valet etiam de certa determinatione rerum, atque verborum; semel enim determinatione ista relicta in Ecclesiæ potestate, uti in cæremoniis & ritibus, ita in rebus essentialibus sensim inducta esset variatio; & omnes hæreticorum sectæ, quæ temere gloriantur veram apud se Ecclesiam servari, nova *Sacramenta* auderent intrudere, adeoque non solum exteriorem Christi vestem, sed interiorem quoque, inconfutilem, & desuper contextam, Ecclesiæ scilicet fidem, unionem, caritatemque discinderent. Ad hæc num Christus dedit Ecclesiæ suæ potestatem immutandi materiam, aut formam *Sacramentorum*, quæstio facti est, & pendens a Christi voluntate. Dum vero facti agitantur quæstiones, nihil est absque valido momento definiendum. At Ecclesiæ collatam prædictam auctoritatem nequit è Scripturis facris evinci, nequit comprobari ex traditione; nulloque oraculo Romanorum Pontificum, nullo SS. Conciliorum decreto fulcitur. Sententia ergo, quæ potestatem illam concedit Ecclesiæ, tanquam commentitia rejici debet. Rursus mutatio materiæ & formæ *Sacramentorum* nullatenus ad Ecclesiæ regimen est necessaria, quemadmodum necessaria esse potest quarundam cæremoniarum abolitio; quid enim commodi accederet Ecclesiæ, si E. G. pro manuum impositione substitueret solum calicem, aut sacras vestes? imo quot in Ecclesia non orirentur dissidia, quot non excitarentur tumultus? At Christus Ecclesiæ illam tantummodo facultatem concessit, quæ optimo ipsius regimini congruere poterat. Non ergo dedit ei potestatem statuendi, & mutandi materiam & formam *Sacramentorum*. Postremò Ecclesia non potest condere novum aliquem fidei articulum, non divinam legem abrogare, non vim gratiæ effectricem signaculo tribuere sensibili. Igitur nec potest instituere novum aliquod *Sacramentum*, nec statutam abolere materiam, nec pro libito alicui rei impertiri sanctificandi virtutem; æqua enim in his omnibus, & quidem summa & divina requiritur auctoritas. Quamobrem Hadrianus VI. in 1v. pag. 6. columna 4. hujus argumentationis vim assecutus, ait: *Ecclesia non posset novam formam baptismi, aut alterius Sacramenti instituere aut institutam quovis modo mutare: quia ut solius Dei est animam a labe peccati emundare, juxta illud Isaia 43. Ego sum, qui deleo iniquitates tuas propter me: ita solus quæ sanctificant animam potest instituere: unde novit se Ecclesia non esse dominam Sacramentorum, sed ministram; nec posse magis formam aliquam Sacramentorum destituere, aut novam instituere, quam legem aliquam divinam abolere, vel ad tempus ab obligatione dominum suspendere, vel novum aliquem articulum fidei instituere, qui aliter non est de fide.*

Opp. 1. Ecclesia quorundam *Sacramentorum* materiam reipsa mutavit:

tavit: quod sane non fecisset, nisi collata sibi a Domino potestate. Ac primo statuit materiam *Sacramenti* confirmationis esse sacri chrismatis inunctionem, cum ætate Apostolorum baptizati sola impositione manuum confirmarentur, ut liquet ex Act. Apostol. cap. viii. 18. Deinde per septem priora sæcula Ordinatio Sacerdotalis absque porrectione calicis peracta est, ut liquet ex Ordine Romano ab Alcuino, ut fertur, conscripto: & tamen Eugenius IV. in Florentino Concilio Tom. xiiii. pag. 538. ita definit: *Sextam Sacramentam est Ordinis, cujus materia est illud, per cujus traditionem confertur Ordo, sicut presbyteratus traditur per calicis cum vino, & patena cum pane porrectionem. Diaconatus vero per libri Evangeliorum dationem. Subdiaconatus vero per calicis vacui cum patena vacua superposita traditionem: & similiter de aliis, verum ad ministeria sua pertinentium assignationem.* Circa materiam itaque sacrarum Ordinationum aliter ab Ecclesia statutum est, quam servaverit primæva Apostolicæ Ecclesiæ consuetudo. Tertio ante Tridentinam Synodum contractus etiam clandestinus erat *Sacramenti* Matrimonii materia: at sessione 24. cap. 1. Tom. xiv. pag. 876. eadem venerabilis Synodus decrevit, *eos, qui aliter quam præfente Parocho, vel alio Sacerdote, de ipsius parochi, seu Ordinarii licentia, & duobus, vel tribus testibus matrimonium contrahere attentabunt, ad sic contrahendum omnino inhabiles reddi, & hujusmodi contractus irritos & nullos esse.*

Resp. falsum esse, quod Ecclesia *Sacramentorum* aliquorum materiam mutaverit. Atque ad momentum primum fateor baptizatos ex Apostolica traditione confirmari impositione manuum, & nego aliquando non adhibitum sacrum Chrisma, quod antiquitus usu receptum, & ad sanctificationem applicatum, scribunt SS. Martyr Cyprianus Epistola 70. ad Januarium, Cyrillus Jerosolymitanus Catech. 3. Mystagogica, aliique suo loco afferendi. Qui autem in sola impositione manuum constituunt sacræ confirmationis materiam, respondebant chrisma materiam esse tantum *accidentalem*, & sine qua etiamnum valide *Sacramentum* Confirmationis conficeretur. Ad alterum hæc sit responsio. Eugenius IV. non solum Armenios instruxit circa orthodoxæ fidei veritatem, verum etiam circa alia tunc discussa, & in Romana Ecclesia servata, *ne ulla in futurum apud ipsos Armenos basitatio esse valeat, atque idem per omnia sapiant cum sede Apostolica, unioque ipsa stabilis & perpetua sine ullo scrupulo perseveret*; ita namque legitur in decreto Eugenii pag. 530. *Quemadmodum verò in ea instructione non tradit Eugenius omnes fidei articulos, sed illos tantum, in quibus Armenii aut errabant, aut dubitabant, ut sapienter Spondanus ad annum 1439. num. 18. ita non docuit materiam essentialem sacrarum Ordinum, quam nec Græci, nec Armenii, nec Latini ignorabant, sed materiam accidentalem adhibitam in Ec-*

clesia Romana, traditionem nempe sacrorum Instrumentorum; non quidem necessariam ad *Sacramenti* substantiam, (nam alioqui Romana Ecclesia haberet tanquam cassas, irritasque consecrationes Græcorum,) sed perutilem ad servandam cum Apostolica fede stabilem unionem. Quod si contendas, porrectionem instrumentorum materiam esse sacræ ordinationis *essentialem*; nihil reponendum est aliud, nisi utramque materiam, hanc nempe, & manuum impositionem a Christo institutam, facta Ecclesiæ potestate ut una, vel altera, aut utraque simul adhiberetur, ita, ut Romana Ecclesia non ex Alcuino, neque ex Ritualibus Gallicanis, sed ex Apostolica traditione etiam instrumenta in usum assumpserit. Ad tertium verò habeto responsum istud: ut liquet ex præcitatis Tridentini verbis, Ecclesia non mutavit materiam *Sacramenti* matrimonii, sed *destravit* irritum contractum clam & sine testibus celebratum. Perpendens enim *gravia peccata quæ ex clandestinis conjugis ortum habent, præsertim vero eorum, qui in statu damnationis permanent, dum priore uxore cum qua clam contraxerant relicta, cum alia palam contrahunt, & cum ea in perpetuo adulterio vivunt*; huic malo remedium adhibens, statuit ut clandestinus contractus, quo in animarum suarum perniciem plurimi abutebantur, in posterum esset nullus & irritus: quod non est immutare *Sacramentorum* materiam, sed iusta de causa ad validitatem contractus præscribere conditionem, ad gravissima scelera vitanda, summo opere necessariam.

Opp. 2. Multiplex materia potest habere analogiam cum effectu *Sacramentorum*: nam ut significetur, E. G. baptizatum mundari a peccatis, perinde est, si aqua, aut liquore alio ablatur. Ad effectum vero spiritalem producendum sufficienter ipsa materia determinatur prolatione verborum. Non ergo necessum fuit, ut Christus omnium *Sacramentorum* determinaret materiam. Resp. materiam *Sacramentorum* habere quidem cum effectu aliquam similitudinem: *si enim Sacramenta quamdam similitudinem earum rerum, quarum Sacramenta sunt, non haberent, omnino Sacramenta non essent*, inquit Augustinus Epist. 118. ad Bonif. num. 9. at, quemadmodum observatum est cap. 1. hanc analogiam non habet *Sacramentorum* materia suapte natura, sed ex divina institutione: eodem quippe Augustino docente lib. 111. de Doct. Christ. cap. 1x. num. 13: *Sacramentum est utile signum divinitus institutum*; ideoque Christus statuit determinavitque materiam *Sacramentorum*, ut manifestius invisibilis gratiæ sanctificationem exprimeret, ut per allegoricam significationem institutione Christi manifestatam, ut idem Augustinus docet Epist. ad Januarium 119. nunc 55. num. 21. *plus moveat, plus delectet, plus honoretur*. Si dixeris ad institutionem satis esse, si Christus determinaverit materiam *Sacramentorum* in genere, repetam quæ scripsi cap. 8. prop. 1. verum

verum Institutorem illum esse, qui statuit, definit, præscribit; neque Ecclesiæ aliam potestatem fuisse concessam, nisi statuendi ac mutandi ritus Sacramentorum *salva illorum substantia*, uti declarat Oecumenica Synodus Tridentina sess. xx1. cap. 1.

Opp. 3. Si forma *Sacramentorum* certis verbis ac syllabis esset determinata, non cælestis esset ac divina, sed supersticiosa & magica. Christus ergo nequaquam formam *Sacramentorum* definivit. Atque hinc est, quod Ecclesia Græca alia in conficiendis Sacramentis forma utitur, quam Latina: illaque, ut plurimum, deprecativis verbis, hæc autem indicativis.

Resp. magicam superstitionem in eo sitam esse, quod improbi utantur *quibusdam rerum signis humana præsumptione institutis*, & ex his effecta quædam expectent *ad eandem illa quasi quædam cum demonibus pacta & conventa*: ut rectè monet Augustinus lib. 2. de Doct. Christ. cap. 22. num. 33. Audacter ergo, & sacrilege quidam hæretici in *Sacramentorum* forma ad certas syllabas coarctata subesse iniquiunt crimen superstitionis, cum ipsa verba non *humana præsumptione* instituta sint, sed auctoritate divina; nec inde expectetur effectus ad pacta & conventa cum dæmonibus, sed ex Dei omnipotentia, ex Christi meritis, atque ex orthodoxæ religionis signaculis. Sane si superstitio esset uti certis signis divinitus præscriptis ad effectum consequendum, nonne superstitiose hebræi linissent postes sanguine agni ad eandem vitandam, nonne superstitiose serpentem æneum adspexissent ut a venenatis moribus sanarentur, nonne superstitionem redoleret septena lotio Naamani ad lepræ maculam abstergendam, ut mittam alia plura, quæ literæ sacræ commemorant? Idcirco autem dæmon ad certa signa effectus producit suos, quoniam divinitatem affectans lis insigniter tangitur & delectatur, quæ cum sacris mysteriis institutis ad cultum summi Dei habere videntur aliquam proportionem, juxta præclaram doctrinam S. P. Augustini lib. xx1. de Civit. Dei cap. 6. Quod autem postremo loco addebatur de forma, quam Græci adhibent diversa a forma Latinorum, nullius est momenti; cum inter utramque sit solum *accidentale* discrimen, minimè verborum *substantiam* immutans, ut ostendemus pertractantes de singulis *Sacramentis*.

## C A P U T XI.

*An verba, quæ Sacramentorum forma sunt, idem, ac præstat Evangelium, munus tantummodo exerceant.*

**M**odicum fermentum, inquit in priori ad Corinthios cap. quinto Apostolus *totam massam corrumpit*. Ex pravo enim hæreticorum

rum dogmate, quod sola fides iustificet, inficitur universarum ferè veritatum complexio: illinc derivata est damnata assertio, *Sacramenta* gratiam non conferre spirituales, illinc *Sacramentorum* verba efficaciam non habere, sed significationem duntaxat: illinc eadem verba nihil præstare aliud, quam nos instruere, divinas promissiones confirmare, atque nos certiores reddere, quatenus per fidem Deo intime jungimur: illinc præterea eos, qui non credunt, non recipere *Sacramenta*, neque corpus Dominicum manducare: illinc *Sacramenta* conficienda vernaculis verbis, quæ ad instruendum videntur esse magis idonea: illinc denique hæreticorum dogmatum portentosa colluvies. Rectè auctor controversiarum, quæ inter Doctores Sorbonæ & ministros Calvinianos habitæ sunt Parisiis an. 1566. pag. 196. has imptas consecutiones animadvertit scribens: *Le total fondement sur le quel les ministres baptesient toute leur doctrine, est ceste proposition: La seule foy nous unit, & conjoint avec Dieu; duquel principe ils inferent les propositions qui ensuyvent. Que es Sacremens ne nous unissent point avec Dieu. Que par iceux il ne nous est conferre aucune grace spirituelle. Que la parole de Sacremens n'est effective, mais significative seulement. Que l'office d'iceux Sacremens n'est autre, que nous faire certains & asseurer d'avantage de la parole & promesses de Dieu. Que telle office n'est, que per nous donner aussi plus ample asseurance, que nous sommes joints avec Dieu per la seule foy. Que c'est abus & superstition de penser, que par certaines paroles il se face aucune consecration de la materia du Sacrement, &c.*

Hinc arbitror perspicuum esse propositæ quæstionis sensum. Cum enim heterodoxi omnem iustificandi vim tribuant fidei, tenent consequenter verba in *Sacramentis* conficiendis prolata perinde se habere, ac prædicatio Evangelii, nimirum nobis Christi gratiam proponere, illam polliceri, ad Christi fidem nos excitare, non autem immutare at consecrare materiam illam sensibilem: sive, ut aliis verbis quæstio proponitur, *Sacramentorum* verba *concionis vel promissionis* esse, non autem *consecrationis*. Et quamquam aliquando fateantur hæretici verbo tenus signa *Sacramentorum* sensibilia consecrari verbis; *consecrationis* nomine non intelligunt sensibilis materiæ ad vim conferendi gratiam elevationem, sed ejusdem materiæ translationem de usu communi & profano ad sacrum: quemadmodum etsi proferant verba, non tamen ea putant partem *Sacramentorum* essentialem, sed puram, putam conditionem ad fidem ingenerandam. Quamobrem Calvinus lib. 1v. Instit. cap. 14. §. 4. consuetudinem nostram proferendi submissa voce verba consecrationis appellat demurmurationem, ingentemque sacrorum mysteriorum profanationem: & Turretinus Minister Genevensis q. 6. de Sacram. n. 3. admittit verbum *consecratorium*, non autem *operativum*, sed alta pronuntiandum voce, ut in *Sacra-*  
*mentis*

*menta* suscipientibus fidem excitet. Quod sedulo notandum est , ne dum commendantur a quibusdam hæreticis verba *consecratoria* , aliquid aliud credantur admittere præter verba concionis & promissionis . Nos itaque cum Bellarmino lib. 1. de Sacramentis cap. 19. Estio dist. 1. §. 8. Suarezio Tom. 3. in 3. P. pag. 25. Du Hamel Tom. 7. pag. 39. Frassenio Tom. x. pag. 35. Tournely de Sacramentis in gen. pag. 33. Juenin in Comment. Hist. q. 3. cap. 4. Canali pag. 19. Auctore præclari operis de Re Sacramentaria lib. 1. q. 3. cap. 1. §. 2. quos tantum in hac quæstione sat erit perlegere , nec non cum Theologis omnibus orthodoxis affirmamus verba *Sacramentorum* non *promissoria* , aut *concionalia* esse , sed *consecratoria* , nec eo duntaxat sensu , quatenus iisdem verbis elementa , ac symbola sensibilia de profano usu convertuntur in sacrum ; verum etiam quatenus ipsorum verborum virtute redduntur ad productionem gratiæ efficacia . Verum , quoniam hæc quæstio , ut constat , ab ea , quæ inferius agitanda est , de gratia *Sacramentorum* pendet tota ; illam breviter , & ad hunc modum resolvimus .

PROPOSITIO. Verba , quæ formam *Sacramentorum* constituunt , non sunt promissionis , aut concionis , sed tantummodo consecrationis .

Demonstratur pars prima . Verba , quæ effectum præsentem , commonstrant , eumque divina operante virtute producant , *promissoria* non sunt juxta sensum hæreticorum : promissio enim , non est actualis gratiarum largitio , sed gratiam offerentis pollicitatio . Atqui verba , quibus *Sacramenta* conficiuntur , sit in exemplo , *Ego te baptizo* , &c. non exprimunt gratiæ conferendæ pollicitationem , sed designant , efficiuntque præsens animarum lavacrum , atque regenerationem spiritus . Ergo prædicta verba non sunt *promissoria* , ad sensum hæreticorum . II. Idcirco autumant hæretici verba *Sacramentorum* solam innuere promissionem , quoniam censent solam fidem nos Deo conjungere , hujusque conjunctionis *Sacramenta* esse nudum sigillum , & arrham . Atqui falsum est solam fidem nos Deo conjungere , cum id potiori jure caritati , & ipsorum *Sacramentorum* participationi sit tribuendum , affirmante Christo , Joan. XIV. 23. se apud eos permanfurum , qui ipsum diligunt , ejusque sermonem servant , & Joannis 6. 57. pollicente , ei daturum se vitam æternam , & in eo commoraturum , qui ipsius carnem manducat , & bibit sanguinem . Igitur verba *Sacramentorum* non eo sensu promittunt gratiam , quod hæc soli fidei , non caritati , non observationi mandatorum , non ipsorum *Sacramentorum* virtuti , quemadmodum comminiscuntur hæretici , sit tribuenda . III. Promissio gratiæ non est in sacris literis facta credentibus tantum , sed credentibus qui *Sacramenta* recipiunt : non enim Marci XVI. 16. legitur *Qui crediderit , salvus erit* ; sed , *Qui*

*Qui crediderit, & baptizatus fuerit, salvus erit.* Et si alicubi non credentibus sacrosancta Evangelia minitantur damnationem æternam, ut Joan. 111. 36. & v111. 24. eandem æternam pœnam iis præscribunt, qui negligunt *Sacramenta*: quippe de Baptismo legitur Joan. 111. 5. *Nisi quis renatus fuerit ex aqua & Spiritu sancto, non potest videre regnum Dei*, & de Eucharistia Joan. v1. 54. *Nisi manducaveritis carnem filii hominis, & biberitis ejus sanguinem, non habebitis vitam in vobis*. Verba itaque *Sacramentorum* nequeunt esse promissoria gratiæ ad sensum hæreticorum; ita, ut soli fidei, non *Sacramentorum* virtuti a Deo largitore alligata sit ipsa gratia. IV. Si quis hæreticum his verbis interpellaret, Baptizatus qui non crediderit, salvari ne poterit? responderet utique, *minimè; non enim scriptum est: Qui baptizatus fuerit salvus erit*, sed, *Qui crediderit, & baptizatus fuerit*. Igitur si interrogetur, *Qui credit*, at non baptizatur, salvus ne erit? respondere debet, *Non*; cum scriptum sit, illum salvum fore, *qui crediderit, & baptizatus fuerit*. Salus ergo non tam fidei, quam *Sacramento* conjuncta est; neque verba *Sacramentorum* sunt *promissoria* gratiæ collatæ credentibus, sed collatæ credentibus qui digne suscipiunt *Sacramenta*. V. Christus non absolute, non absque apposita conditione promisit credentibus æternam vitam, sed dummodo ipsius præceptis obtemperent, dummodo baptizentur, dummodo Corporis sui *Sacramentum* digne suscipiant. Mentitur ergo, maximamque Domino irrogat injuriam, quisquis censet Evangelicis verbis, quibus *Sacramenta* consecrantur, gratiam fide sola arripiendam, promitti.

Probatum modo verba *Sacramentorum* non esse *concionalia*. Ac primum, quidquid Calviniani effutiant, forma baptismi sita non est in concione sive institutione catechumeni, quæ sacræ ablutioni præmittitur, sed in verbis, quæ pronuntiantur, dum baptizati lavacro tinguntur sacro, nempe, *Ego te baptizo, &c.* enim vero non solum catholici, nisi hæc verba proferantur, aut *substantialiter* immutentur, tenent baptismum nullum esse, ac integre iisdem verbis pronuntiatis validum putant baptismum ab hæreticis collatum: verum etiam ipsi Calviniani eadem verba pronuntianda fatentur, probantque collatum sive a nobis, sive ab aliis a secta sua hæreticis *Sacramentum*. Quis vero dubitat, quin concio, institutio, catechismus apud nos & hæreticos discrepent, ac norma nostra credendi inutilis, & irrationalis videatur hæreticis, conciones verò hæreticorum complurium puta Samosatenium, Arianorum, Ebionitarum, aut sacrosanctum Trinitatis mysterium, aut Verbi divinitatem, aut susceptæ ab ipso carnis œconomiam denegantium, tum nobis, tum iisdem Calvinianis tanquam sacrilegæ existimantur? Si ergo in hujusmodi concione locaretur *Sacramentalis forma*, quemadmodum nos institutiones hæreticas,

hæret.



hæretici institutiones nostras repudiant, ita nec nos baptismum hæreticorum probaremus, neque hæretici baptismum probarent nostrum. Quapropter non in concione præmissa baptismo, sed in iis verbis, *Ego te baptizo*, &c. Sacramentalis forma locanda est. Hæc autem verba nullam profecto concionem, nullam catechesim continent, sed significant duntaxat spirituales animorum inquinatum abluionem: quod pariter dicendum est de forma ceterorum *Sacramentorum*. Hæc itaque verbis *concionatoriis* nequaquam constat. Deinde admittunt Calviniani *Pædobaptismum*. At in baptizandis infantibus nulla apparet sacræ concionis necessitas. Quid enim in his efficere potest prædicatio Evangelica, quam paucorum dierum nati nequeunt ulla ratione percipere? Num adeo simplices erimus, ut præbeamus fidem hæreticis comminiscensibus puerulos sacræ regenerationis tempore nascisci divino movente spiritu sensuum perspicacitatem, & acumen ingenii? non adeo stolidi sumus, ac male sani, ut isthæc credamus. Tam mira, & supra naturæ leges perceptio nullo fulcitur loco Scripturarum sanctarum, ad quas tantum heterodoxi nos provocant. Quotidiano etiam experimento comperimus, dum sacræ perficiuntur ceremoniæ, puerulos vagitibus, lacrymis, ceterisque indiciis commonstrare quomodo non dignoscant quid in ipsis salutaris unda operetur. Quare Augustinus de Peccatorum meritis lib. 1. cap. xxxvi. num. 66. *Illas*, inquit, *consideremus tenebras mentis atque rationalis, in quibus, & Deum profusi ignorant, cujus Sacramentis etiam cum baptizantur obsequuntur*. Lib. quoque xxi. de Civit. D. cap. 16. commendat Dei misericordiam, ex quo infantibus Sacramenta Mediatoris salutem afferant, quando *nondum est præcepti capax infirmitas mentis*. In baptismo itaque parvulorum verba concionatoria ad excitandam fidem non adhibentur. Præterea verba concionalia nequeunt producere effectum aliquem, nisi percipiantur; *fides* enim, inquit Apostolus, *ex auditu*: unde & hæretici errorem ex errore trahentes ajant proferenda esse verba *Sacramentorum* vernacula lingua. Atqui verba *Sacramentorum* effectum produciunt, etiamsi illorum verborum sensus a suscipientibus non percipiatur. Igitur verba *Sacramentorum* concionalia nequaquam sunt. Minorem hæc argumenta commonstrant. Primò, ut Dei verbum producat supra naturalem rerum virtutem effectum aliquem, necesse non est, ut effectus hujus subjecta percipiant ejusdem verbi significationem; dum enim Josue præcepit Soli ne moveretur contra Gabaon, dum Elias imperavit igni, ut de cælo descenderet, dum Dominus Jesus clamavit quatruiduano Lazaro, *Veni foras*, aut dixit viduæ filio, *Adolescens, tibi dico surge*, aut verbo ventos, ac tempestates maris cohibuit; numquid sol, ignis, elementa, mortui, sensu & cognitione erant præditi? At hisce exemplis Patres virtutem *Sacramentorum* explanant, ut dicam alibi. Non ergo necessum est

To. VI.

P

ad

ad gratiam in *Sacramentis* producendam, ut significatio verborum percipiatur. Rursum in Eucharistia idem præstant consecrationis verba, quod sermo Dei vivus & efficax, quo Dominus omnia quæcunque voluit, fecit. Hinc Damascenus lib. 1v. de fide cap. xiv. pag. 278. ait: *Si dixit, Fias lux & facta est, Fias firmamentum & factum est, si verbo Domini cali firmati sunt, & spiritu oris ejus omnis virtus eorum, si calum & terra, aqua item, & ignis, & aer, & omne eorum ornatum Domini verbo completum & absolutum est, atque hoc etiam nobilissimum animal quod homo nuncupatur: si ipsemet Deus Verbum, posteaquam ita voluntas ipsius tulit, homo factus est atque ex puris & immaculatis sanctæ, ac semper virginis sanguinibus carnem sibi ipsi sine semine condidit; quid tandem offerri potest, quin ex pane corpus suum, ex vino, & aqua sanguinem suum efficere queat?* Ut ergo divinum Verbum in rerum productione independentem a creaturarum sensu condidit universa; ita in *Sacramentis* independentem ab audientium perceptione materiam consecrat, perficit, immutat, & gratiam spirituales producit. Postremo, quum Evangelium aperte affirmet Sacerdotes a peccatis absolvere, ex Calvinî doctrina sequitur illos nullam aliam habere potestatem, nisi prædicationis & catechismi, ita, ut ipsi dicantur animas solvere, quoniam *testes Christi, ac sponsores constituti de remissione peccatorum certiores reddunt conscientias*. Atque ita docet Calvinus lib. 111. Instit. cap. 1v. num. 12. Quis autem ferat talem sacrarum Scripturarum depravationem? quis dixerit Dominum Apostolos alloquentem, Jo. xx. 23. *Quorum remiseritis peccata, remittuntur eis*, improprie locutum, & dicendum ci potius, *Quibus prædicaveritis Evangelium, remittentur peccata?* Sacrorum itaque ministrorum verba in *Sacramentis* conficiendis aliam, quam catechismi & concionis vim habent, & splendide mentiuntur Calviniani, affirmantes nihil eadem valere, nisi ad promissionem gratiæ, & fidei externam excitationem.

Demonstratur modo propositionis pars tertia. Principio ex dictis Sacramentorum verba non sunt promissoria; non sunt conacionalia ad sensum hæreticorum: sunt ergo consecratoria. Deinde veritatem hanc sacræ literæ, Patres, & manifesta ratio confirmant. Sacræ quidem literæ; enimvero describunt verba, quibus Sacramenta perficiuntur, vel tanquam prolata super symbola, ut in Eucharistia, vel tanquam expressiva spiritalis effectus, ad quem producendum symbola sensibilia adhibentur, ut in baptismo. Ea igitur verba symbola, sive elementa consecrant, elevantque ad gratiam efficiendam. Addunt Theologi post Bellarminum Sacramentorum verba esse verba benedictionis, scribente Apostolo in 1. ad Corint. x. 14. *Calix benedictionis, cui benedicimus, & esse verba vitæ, eodem Apostolo scribente ad Ephesios 5. 26. Mundam Ecclesiam lavacro aquæ in verbo vitæ: quæ tamen duo*  
loca

loca (patiatur Lectoris humanitas iudicii mei libertatem) non videntur ad revincendos hæreticos prorsus invicta . Quantum ad Patres attinet , Dionysius de Ecclæs. Hierarchia cap. 111. pag. 234. ait a Pontifice , & Sacerdote *divinissima consecrari mysteria* , idem repetit pag. 296. consecrationis nomine significans verba ante hostiæ elevationem prolata , ut liquet ex textu , & ex scholiis S. Maximi pag. 386. edit. Plant. & cap. v11. pag. 417. appellat verba Sacramentalia , *Invocationes consecratorias* , quas ait *nefas esse scripto interpretari , & arcanum earum sensum & virtutes , quas in iis Deus operatur , e secreto in publicum efferre* ; ubi sermonem instituit de verbis ab Episcopo prolatis in sacris ordinationibus , ut ibidem animadvertunt S. Maximus , & Pachymeras . S. Ambrosius lib. 1v. de Sacram. cap. 1v. num. 14. de Euch. inquit : *Panis iste panis est ante verba Sacramentorum : ubi accesserit consecratio , de pane fit caro Christi . Hoc igitur adstruamus . Quomodo potest qui panis est , corpus esse Christi ? Consecratione . Consecratio autem quibus verbis est , & cujus sermonibus ? Domini Jesu . Nam reliqua omnia , quæ dicuntur in Superioribus a Sacerdote dicuntur , laudes Deo deferuntur , oratio petitur pro populo , pro regibus , pro ceteris : ubi venit ut conficiatur venerabile Sacramentum , jam non suis sermonibus utitur Sacerdos , sed utitur sermonibus Christi . Ergo sermo Christi hoc conficit Sacramentum .* In his Ambrosii verbis declaratur formam Sacramentorum sitam non esse in verbis aut historicis , aut deprecatoriis , aut instructivis , quæ premituntur , sed in iis , quibus symbola consecrantur : hisce Sacramentum confici : hisce in Eucharistiæ mysteriis effici quod antea non erat : hisce denique commonstrari , quomodo Sacramentorum verba operatoria sint , utpote sermo Christi , *quo facta sunt omnia* . Illustrius sanè locus , quo omne Calvinianis subterfugium præcluditur , ac jure meritoque relatus inter Canones , de Consecrat. dist. 2. c. *Panis est* . S. P. Augustinus Tract. lxxx. in Joannem num. 3. docet primum verba spectare ad Sacramentum constituendum . *Accedit , inquit , verbum ad elementum , & fit Sacramentum* . Docet posthac ipsum verbum conferre sensibili aquæ elemento vim abluendi peccata , *Unde , ait , ista tanta virtus aquæ , ut corpus tangat & cor abluit , nisi faciente verbo ?* Addit hoc verbo consecrari baptismum , ut animum mundare queat , *Quo sine dubio ut mundare possit consecratur & baptismus* . Verba itaque juxta Augustinum elementum consecrant ; perficiunt , & sanctificationis virtute locupletant . In libro quoque contra Faustum x1x. cap. 15. scribit non consecrari baptismum , nisi dicantur *ille syllabæ celeriter sonantes & transeuntes* : & denique lib. vi. de Baptismo cap. 25. num. 47. docet baptismum *consecrari Evangelicis verbis* ; neque haberi baptismum Christi , *nisi verbis Evangelicis consecratum* . Ratio tandem manifesta est , verba quippe

Sacramentalia applicantur symbolis, & proferuntur, etiam si suscipientes Sacramenta sensum illorum non percipiant; neque proferuntur duntaxat ad excitandam in his fidem, Deique promissiones obsignandas. Deserviunt ergo ad consecranda symbola, supernamque virtutem eis tribuendam.

Nollem Scholasticorum quempiam mihi subirasci, quod scripserim, non satis invicte refelli hæreticos pervulgatis testimoniis, *Calix benedictionis, cui benedicimus*, &, *Mundans eam lavacro in verbo vite*. Nihil enim veritati fidei orthodoxæ detraxit, qui validiora suppeditat arma, & quid cetera habeant vitii, ut hostiles impetus caveantur, præmonstrat. Ergo prior locus haud recte ad oppugnandos hæreticos adhibetur. Benedictio etenim calicis, non est facta. Verbis Dominicis consecratio, sed beneficentiæ divinæ in vocatio super symbola, ut inquit Jansenius in Concordia cap. 131. demonstratque Estius in Paulum Tom. 1. pag. 300. Revera Evangelistæ narrantes Eucharistiæ institutionem, docent benedictionem panis præmissam fuisse consecrationi. Idem constat ex canone Missæ. Quomodo ergo *benedictionis* nomine intelliguntur verba consecrationis, quibus perficitur Eucharistia? Id falso affirmari probat citato loco Estius, Interpres sanè orthodoxus, accuratus, præclarus. Non sunt autem valida, contra hæreticos tela, quæ etiam catholicorum interpretamentis possunt eludi. Argumentationibus Estii, quas poterit quisque eo loci perlegere, accedit quod Patres calicis *benedictionem* non consecrationem vini intellexere, sed eulogiam, & gratiarum actionem factam Christo, qui pro nobis pretiosissimum effudit sanguinem. Aperta sunt verba Jo. Chrysostomi hom. xxiv. in 1. ad Corinth. pag. edit. Commel. 532. Oecumenii pag. 514. ac Theophylacti pag. 244. Alia verba depronipta ex Epistola ad Ephesios v. 26. sunt paullulum validiora. Enimvero *verbum vite* interpretantur formam baptismi Chrysostomus in Paulum pag. 1160. scribens: *In verbo, inquit, quonam? In nomine Patris, & Filii, & Spiritus sancti*. Similiter Theophylactus pag. 557. Theodoretus Tom. 111. pag. 315. Oecum. tom. 2. pag. 53. atque ex Latinis Anselmus pag. 558. S. Thomas in cap. 5. ad Ephes. lect. viii. Accedunt interpretes subscilii non infimi, Hugo a S. Victore, Salmeron, Lyranus, A Lapide, Calmet. Hoc itaque loco in hac questione, haud irrationabiliter uti possumus. At non est, ut vulgo creditur, ineluctabilis. Hieronymus quippe Tom. iv. pag. 390. *verbum vite* interpretatur *verbum doctrinæ*. Respondent quidam cum Bellarmino a Hieronymo sensum exponi tropologicum. Verum apparet tropologiam non in *verbo vite* a Hieronymo observari, sed in nomine *viri*, & *uxoris*: ait namque, *Quia vero secundum tropologiam viros animas, & uxores corpora dixeramus, sic diligit anima corpus, quomodo Christus Ecclesiam, ut semetipsum tradat pro salute ipsius, & eam sanctificet*

*ficet verbo doctrinæ.* Videtur quoque Apostoli scopum esse, hortari viros ad diligendas uxores exemplo Christi, ut quemadmodum is Ecclesiam sibi in baptismate desponsatam, erudit monitis saluberrimis, ita mariti non solum copulentur uxorum corporibus, verum etiam verbo doctrinæ illas purificent. Hoc sensu Apostolum explicarunt Primasius Tom.x.Bibliot.PP. pag.222. Sedulius in Paulum pag.edit.Basil.325. Non rejicit hanc interpretationem Augustinus Calmet: Estius vero Tom. 2. pag. 63. genuinam esse contendit, & alteri præferendam, proluetis Scripturarum locis compluribus, in quibus prædicatio Evangelii dicitur verbum veritatis, verbum vitæ, verbum fidei. Contendit etiam hanc esse mentem Augustini Tract. lxxx. in Joannem num. 3. nec tamen inde consequi formam *Sacramentorum* sitam in verbis concionalibus: nam mundatio tribuitur Sacramento, & fidei: Sacramento quidem tanquam signo efficaci, fidei tanquam dispositioni. Verum de mente Augustini infra.

Opp. 1. Matthæi xxv 111. 19. mittens Dominus Apostolos in universum terrarum orbem, inquit: *Euntes ergo docete omnes gentes, baptizantes eos in nomine Patris, & Filii, & Spiritus sancti: docentes eos servare omnia, quæcunque mandavi vobis.* Nulla itaque verba, præter concionalia, & quibus audientium animis fides insinuetur, adhiberi debent mandato Christi in administratione baptismatis.

Resp. triplicis generis verba istic commendari, ea nempe, quibus Evangelicæ doctrinæ baptizati imbuuntur, & hæc præcedere debent sanctæ regenerationis lavacrum: quoniam nullus, nisi credat, dum rationis pollet exercitio, mancipari potest Christo, qui neminem in sui cultum compellit invicem. Deinde ea verba, quibus consecratur baptismus, expressa scilicet sacrosanctæ Trinitatis invocatio. Tum illa, quibus initiati inflammanur ad observantiam mandatorum, sine quibus æternam vitam, minimè consequentur, *quia non sufficit baptizari, sed etiam bene operandum est post baptismum*, inquit Theophylactus in Evangelia pag. 164. & Marcus Asceta in Catena Græcorum Corderii pag. 816. Verba prioris generis sunt *concionatoria* expressa præcepto Domini, *Docete omnes gentes*: altera sunt *consecratoria*, determinata in sequentibus, *Baptizantes eos in nomine Patris, & Filii, & Spiritus sancti*: postrema *hortatoria* sunt, & mandatorum observationem præscribentia, videlicet, *docentes eos servare omnia, &c.* Præclare Hieronymus in Mat. Tom. iv. pag. 144. *Ordo præcipuus: Fuisse Apostolis, ut primum docerent universas gentes; deinde fidei intingerent Sacramento, & post fidem ac baptismum, quæ essent observanda præciperent.* Ut ergo, hæreticis fatentibus, verba quæ præcipiunt observanda, non pertinent ad Sacramenti constitutionem, utpote ordine consequentia; ita quæ fidei præbent rudimenta, quum præcedant sanctæ renovationis lavacrum, ad istum tanquam formam

forma minime spectant; sed quemadmodum Marci ult. 17. dum legitur, *In nomine meo demonia ejicient*, &c. & in nomine, refertur ad signa a credentibus patranda, ita hoc in loco, ubi legimus, *Baptizantes eos in nomine Patris*, &c. & in nomine, ad actum baptismi, non ad præcedentem Evangelii prædicationem est referendum. Atque ex his apparet falsitas consequentiæ.

Opp. 2. Ambrosius lib. de Mysteriis cap. 111. num. 14. scribit: *Aqua enim sine prædicatione Dominicæ crucis ad nullos usus futura salutis est*. Igitur verba, quibus consecratur aqua baptismatis, sunt mysteriorum crucis prædicationes.

Respondent Theologi quidam cum Frassenio disput. Proem. q. 3. art. 1. Ambrosium commemorare verba prædicationis, quatenus per ipsum baptismi ritum prædicatur Crux Christi. Du-Hamelius inquit, ad hunc modum loqui Ambrosium, quoniam nulla inesset aquæ vis sanctificationis, nisi nobis applicarentur Christi merita. At respondendum puto, eo loci Ambrosium sermonem instituere, non de verbis, quibus ministratur baptismus, sed de benedictione aquæ fontisque baptismalis: immediate enim sequitur: *Cum verò salutaris fuerit crucis mysterio consecrata, tunc ad usum spiritualis lavacri, & salutaris poculi temperatur*. Neque aliquis moveri debet, quod etiam sine benedictione aqua possit esse materia baptismi; Ambrosius verò scribat, aquam sine Dominicæ crucis prædicatione nullius salutaris usus esse: quippe loquitur S. Antistes de usu & consuetudine, non de jure & validitate. Vide not. PP. Bened. tom. 2. pag. 328. Ceteram ex hoc eodem Ambrosii capite invicte refelluntur hæretici. Nam primum num. 9. docet aquam baptismatis habere divinam sanctificandi virtutem, & ab initio temporis fuisse præfiguratam in aqua rerum universarum elemento, super quam spiritus Domini ferebatur. Addit num. 10. figuram columbæ, quæ super aquas diluvii cum ramo oleæ legitur advolasse. Profert num. 14. immutationem aquarum, in quas Moyses lignum immisit. Assert insuper num. 16. exemplum Naamani, quem aqua Jordanis mundavit a lepra: quibus sane exemplis non fidei tantum, sed ipsi elemento verbis Evangelicis consecrato vim sanctificationis fatetur inesse. Proximo demum capite num. 20. ostendens fidem sine aqua non mundare, ait: *Nec iterum sine aqua regenerationis mysterium est. Nisi enim quis renatus fuerit ex aqua & Spiritu sancto, non potest introire in regnum Dei. Creditur autem etiam Catechumenus in crucem Domini Jesu, qua & ipse signatur: sed nisi baptizatus fuerit in nomine Patris, & Filii, & Spiritus sancti, remissionem non potest accipere peccatorum, nec spiritualis gratia munus habere, concludens insequenti numero, Crede ergo, quia non sunt vacuæ aquæ.*

Opp. 3. Tract. lxxx. in Joannem num. 3. ait Augustinus, verbum,

hum, per quod in Sacramento mundamur, illud esse, de quo Joan. xv. 3. inquit Christus, *ſam vos mundi eſtis propter verbum, quod locutus ſum vobis*. De hoc enim verbo accipiendus eſt S. Pater, dum ibidem docet, accedere verbum ad elementum ut fiat Sacramentum, tantamque virtutem tribuere aquæ, ut corpus tangat, & cor abluat. Atqui verbum illud juxta Auguſtinum eſt duntaxat concionatorium. Igitur concionatoria ſunt verba, quibus ſacra adminiſtrantur myſteria. Prob. minor. Etenim Auguſtinus ad hunc modum loquitur: *Vnde iſta tanta virtus aquæ, ut corpus tangat & cor abluat, niſi ſaciente verbo, non quia dicitur, ſed quia creditur?* Paucis interjeſtis: *Hoc eſt verbum fidei quod prædicamus, ait Apoſtolus, quia ſi confeſus fueris in ore tuo quia Dominus eſt Jeſus, & credideris in corde tuo, quia Deus illum ſuſcitavit a mortuis, ſalvus eris. Corde enim creditur ad juſtitiam, ore autem confeſſio fit ad ſalutem*. Ac rursus. *Hoc eſt verbum fidei, quod prædicamus: quo ſine dubio ut mundare poſſit confeſcratur & baptiſmus*. Quis autem ignorat verbum fidei, quod prædicatur, quod creditur, quod Chriſtus Apoſtoliſ annuntiavit, eſſe verbum *concionatorium*? Auguſtinus ergo manifeſtè hæreticis ſuffragatur.

Reſp. non deeſſe, quibus hoc argumentum videatur perdiſſicile, unde Scholaſtici, ut illud ſolvant, varias adinvenere reſponſiones. Bellarminus lib. 1. cap. 20. cenſet S. Patrem nunc locutum de verbo concionali, nunc autem de Sacramentali. Du-Hamelius, Fraſſen, Juenin, alique reponunt, Auguſtinum velle duntaxat Sacramentali verbo vim inſeſſe, non quatenus eſt ſonus materialis, ſed prout eſt fidei myſterium continens divinæ virtutis invocationem. Tournely cum recentioribus aliis inquit, S. Patrem pertractaſſe univerſum de omni verbo, per quod fit mundatio; ſive enim mundatio fiat in Sacramento, ſive extra, viſ mundandi ſemper oritur a verbo. Id ego reſpondendum cenſeo. Doctrina eſt Auguſtini, verba Evangelica, quibus confeſcratur baptiſmus, non eſſe præcedentem concionem, ſed invocationem Trinitatis a miniſtro factam, dum corpus abluit. Inquit enim lib. 111. de Baptiſmo cap. xv. num. 20. *integrum eſſe Sacramentum, ſi conſtet Evangelicis verbis, In nomine Patris & Filii, & Spiritus ſancti, quamvis ejus fides ſub eiſdem verbis aliud opinantur, quam catholica veritas docet, non eſſet integra, ſed fabuloſis falſitatibus inquinata*. In hiſ Evangelicis verbis, *In nomine Patris, &c.* demonſtrat Auguſtinus eodem opere de Baptiſmo lib. vi. cap. 25. num. 47. contineri ſymbolum Apoſtolicum, quod tribus conſtat partibus, de Patre, Filio, & Spiritu ſancto pertractans. *Ceterum, inquit, quis neſciat non eſſe baptiſmum Chriſti, ſi verba Evangelica, quibus ſymbolum conſtat, illic deſuerint?* atque hiſ verbis Evangelicis baptiſmum confeſcrari, & confeſcratum valere ad ſalutem, nullaſque violari hominum perverſitate, ibi S. Pater luculenter demonſtrat.

Hæc

Hæc mihi videtur penitus objectionem elidere, & enervare. Enimvero Augustinus Tractatu 80. in Joannem loquitur de Christi prædicatione, & demonstrat vi hujus mundari homines in baptismo a labe peccati, quoniam Evangelica verba, quibus consecratur baptismus, sunt illa, quibus Symbolum constat, & contingent fidei nostræ mysteria, quæ necessum est corde credere, & ore confiteri. In his autem quid difficultatis emergat, quid præsidii accedat Refractoriis, non video. Inquiunt, per Augustinum habet baptismi aqua virtutem *tantum faciente verbo, non quia dicitur, sed quia creditur*. Respondeo, ita est: habet hanc virtutem baptismus, quia consecratur non verbis quibuscunque, sed Evangelicis, quæ continent fidei symbolum. \*At Augustinus addit: *Hoc est verbum fidei quod prædicamus*. Et recte, quoniam verba, quibus confertur baptismus, Evangelicæ prædicationis summam continent, exprimuntque mysteria quæ corde credimus, & profitemur.

Nil ergo S. Patris testimonia difficultatis præferunt; nil juvant hæterodoxos, quin illos refellunt, expugnantque invictissimè. Primo, quia *hoc verbum fidei* tantam tribuens virtutem aquæ, integrum conficit Sacramentum, tametsi non sit integra fides ministri, ut Augustinus docet lib. 3. de baptismo: ac tantum valet in Ecclesia Dei, *ut tantillum mundet infantem, quamvis nondum valentem corde credere ad justitiam, & ore confiteri ad salutem*; ut scribit eodem Tractatu 80. in Joannem; igitur *hoc verbum fidei* mundat, etiamsi fidem non excitet; ideoque non est verbum *concionatorium*, ut hæretici autumant, quoniam verbum concionatorium, nisi credatur, nullum producit effectum. Deinde Augustinus ait verbum accedere ad elementum, tribuere aquæ vim mundandi, consecrare baptismum, & alia ejuscemodi, quæ aliud profecto indicant præter verbi prædicationem.

## C A P U T XII.

*Varie circa materiam, formamque Sacramentorum  
diluuntur quæstiones.*

**I**N his de *Sacramentis* dissertationibus, etsi præcipuam operam in refutandis hæreticis curabimus impendere, prætermittere tamen nequaquam possumus quæstiones plurimas ad morum doctrinam spectantes, cum ad *Sacramentorum* dignitatem, ac sanctitatem custodiendam apprime sint necessariæ. Horum vero quæstionum prima est num in *Sacramentis* conficiendis fas sit uti materia, aut forma tantum probabili, certa, vel tutiore relicta. Atque huic quæstioni incessanter respondemus, id nefas esse. Nam præter ea, quæ uni-  
versum



versum disputavimus adversus probabilium opinionum delectum Volum. 1v. lib. xx1. dum agitur de *Sacramentis*, si extra necessitatis casum adhibeantur materia, & forma tantum probabilis, virtus caritatis, & religionis labefactatur. Et de violata quidem caritate consentientem habeo Probabilistam, ut vocant, antesignanum Vasquesium: qui 1. 2. q. 63. cap. 3. num. 10. & 3. p. disput. 146. cap. 4. num. 27. ctsi contendat non lædi debitam *Sacramentis* reverentiam, si in iis ministrandis probabiliter utamur opinione, fatetur tamen violari caritatem, si in re tanti momenti sententiam certam posthabeamus. Atque hujus assertionis suæ profert validum istud momentum, *Quoniam obligatio caritatis & misericordiae hoc postulare videtur, ut si proximo possumus certum remedium & sine ullo periculo adhibere, non adhibeamus illud, quod fors in re nullius est momenti: qui autem minus tutam eligeret partem ministrans Sacramentum, etiamsi ea pars probabilior esset, huic periculo reipsa proximum exponeret, ut fors reipsa careret remedio: vel quia reipsa nullum esset illud Sacramentum, vel quia careret effecta gratia.* Hæc Vasquesius.

At longe probabilius est, non solum caritatem labefactari, si in *Sacramentis* præferatur opinio probabilis, quod fatetur Vasquez; verum etiam injuriam sacris mysteriis inferri, & parvpendi religionem, quod Theologus ille negat. Ut enim caritas proximorum saluti prospicit, ita religio Christi institutionem, & constituta ab ipso mysteria humillimè reveretur. Si ergo, haud diffidente Vasquesio, violatur fraternæ caritas, quando culpa nostrâ fieri potest, ut salus proximi certo destituatur remedio; pessumdatur etiam religio, quando clectione nostra potest contingere, ne in sacris conficiendis mysteriis adhibeatur statuta a Christo, & prædefinita materia. Enimverò sicut nuda probabilitas non recte consulit proximorum periculo, ita exponit discrimini *Sacramentorum* validitatem. Accedit quod præcipuus *Sacramentorum* ministrator est Christus, homines verò vicem ipsius gerunt, & legatione funguntur. At censeretur ne vicem supremi domioi illum gerere reverenter, qui sponte, & data opera ejus mandata ambiguis verbis exponeret? Quid si Pontificis Maximi constitutionem apocryphius scienter adulteraret? quid si Orator regiam postulationem sponte irritam cassamque redderet? quid si præco regis nomine falsa ultro, suoque judicio, nuntiaret? Hi profecto regiam læderent majestatem. Cur ergo non erunt in Christum dominum injuriosi, qui ejus verba ipsis angelis formidanda in periculum falsitatis adducunt, & gratiæ pignora suo carcere effectu, voluntaria perversitate permittunt? At plura de his Augustinenfes eximii doctores, Franciscus Farvacques in disquisitione Theologica de Confess. peccatorum dubiorum cap. vi. §. 2. & de *Sacramentis* in genere q. 1v. pag. 63. Leonardus Vanroy de Confess. q. 7. & de *Sacram.* cap. 1. q. 6. Aurelius Piet-

te de Actibus hum. q. viii. §. 2. aliiq. unanimi consensione.

Videtur demum hæc quæstio definita ab Innocentio XI. in proserptione primæ propositionis: *Non est illicitum in Sacramentis conferendis sequi opinionem probabilem de valore Sacramenti, relicta tutiore; nisi id vetet lex, conventio, aut periculum gravis damni incurrendi. Hinc sententia probabili tantum utendum non est in collatione baptismi, Ordinis Sacerdotalis, aut Episcopalis.* Neque enim damnata thesis agit solummodo, ut quidam commenti sunt, de probabilitate, *speculativa*: nam quod spectat ad collationem *Sacramentorum*, ad praxim, non ad solam speculationem, reducitur. In hac verò proscripta thesi sermonem institui de opinione probabili, qua aliquis uteretur in *Sacramentis conferendis*, manifestè ipsa verba declarant: ac præterea, ut lib. xi. cap. 13. demonstravimus, fieri nequit, ut cum falsa speculatione probabili rectum iudicium practicum componatur. Vide Tom. iv. pag. 273. & seq. Porro quod obijciunt de Attritione, quæ est Sacramenti Pœnitentiæ materia probabilis, eodem libro, pag. 307. commodam habet solutionem, & accuratiùs proximo volumine discutietur.

Hæc dicta sint, nisi extrema urgeat necessitas: hac enim ingruente, certum est licitè adhiberi materiam & formam tantùm probabiliter validam: nam baptizandum catechumenum, si desperatus jacuerit, nec pro se potuerit respondere, etiamsi viventi conjugii copulatus retineat adulterina consortia, (quem tamen sanum corpore nemo admitteret ad baptismum,) docet magnus Augustinus lib. 1. de Conjugiis adult. cap. 28. num. 35. Ibidem ait, eandem baptismatis & reconciliationis esse causam, si forte pœnitentem finiendæ vitæ periculum præoccupaverit. Et quidem rectè; nam cum *Sacramenta* pro salute hominum sint instituta, atque in extremo laboranti, nisi præstò sit exquisitum medicamentum, denegari non debeat præsens, quod probabiliter noscitur profuturum; cur animam agentis puerulo, dum limpidam aquam habere ad manus non possumus, nequaquam unda vino permixta, aut alio liquore vitata sacrum baptismum conferendum est? Atque id de aliis *Sacramentis*, si necessario conficienda sint, par ratione affirmamus. Neque hoc in casu Institutori *Sacramentorum* irrogatur injuria: qui enim jussit periclitantium animarum saluti afferri remedium, vult etiam, ubi efficacissimum deest, suppeditari opportunitum, neque ullatenus patitur ut negligatur, siue imminet peccatorum perditio, siue scandalum pusillorum. Eam ob rem propriis manibus distribuit proditori Corporis sui *Sacramentum*: quamvis inhibuerit ne sanctum daretur canibus, ut citato loco animadvertit Latinorum Patrum præstantissimus Augustinus.

I I.

Sequitur quæstio altera, an, & quæ mutatio materiæ, vel formæ

mæ reddat irritum Sacramentum : in qua Doctores omnes conveniunt, Sacramentum invalidum fieri, si in materia, aut forma mutatio *substantialis* contingat ; secus, si *accidentalis* tantummodo, elementi, verborumque substantiam minime immutans. De qua re præter Scholasticos legi potest Algerus Leodiensis lib. 111. de Sacramento Corporis, & Sanguinis Domini cap. 13. Tomo Biblioth. PP. XXI. pag. 290. Est autem mutatio *substantialis* materiæ, cum altera diversæ speciei substituitur, ut si pro aqua in baptismo vinum adhibeatur, aut pro naturali unda, ex floribus, herbisve expressa è lambico : *accidentalis* autem, si ejusdem materiæ permaneat substantia, sit in exemplo, si aqua calefiat, aut aliquo afficiatur odore. Cum tamen Sacramenta materiam habeant, quæ est spiritualis effectus signum sensibile ; aliquando censenda est materia *substantialiter* commutari, quando pristina remanente natura omnino signi rationem perdit : sic glacies, tametsi est naturalis aqua frigore condensata, quoniam caret symbolo ablutionis internæ, a materia baptismi, non quatenus elementum physicum, sed quatenus Sacramenti pars est, dicenda erit differre *substantialiter*. Pari ratione *substantialiter* mutatur forma Sacramentorum, quotiescunque variatur legitimus, & quem ex publica institutione habent, verborum sensus, ut si quis baptismum conferens unius Trinitatis personæ nomen omittat : *accidentaliter* verò, dum vel incuria, vel ignorantia, vel negligentia verba aliqua, eodem permanente sensu, pronuntiantur paululum immutata, aut a communi Ecclesiæ usu discrepant sola grammaticali syntaxi, veluti dum obstetrix baptizat infantem lingua vernacula, ignarus latinam adhibet cum barbarismo, Græcus deprecandi modo utitur aliquando pro indicativo.

Itaque dicendum est cassum irritumque fieri Sacramentum, ubi interfit materiæ aut formæ *substantialis* mutatio. Enimverò, ut dictum supra, Sacramenta signa sunt gratiæ ex libera Christi Domini institutione, qui eorundem materiam & formam determinavit. Si ergo alia materia, aut alia substituatur forma ; Sacramentum nullum erit, quoniam non erit divinæ auctoritatis, atque institutionis, neque constabit materia, & forma a Christo præscriptis.

At si occurrat accidentaria mutatio, docent Theologi consensu unanimi validum confici Sacramentum, quod hisce momentis evincitur. Primo Zacharias summus Ecclesiæ Pastor cap. *Resulerunt*, de Consecrat. dist. 4. num. 86. definiit non esse iterum baptizandum, qui tinctus fuerat a Sacerdote, *pro ignorantia Romana locutionis* linguam infringente, & ad hunc modum pronuntiante consecratoria verba, *Baptizo te in nomine patris, & filii, & Spiritu sancto*. Deinde Augustinus lib. vi. de Baptismo cap. 25. num. 47. scribit sanctificari aquam cum aliqua erroris verba per imperitiam peccator effundit, quod & habet.

habetur cap. *Si non sanctificatur*, eadem dist. iv. num. 72. Præterea nunquam Romana Ecclesia repudiavit Sacramenta a Græcis collata verbis deprecativis, (si deprecativa sunt tamen) quæ a forma a nobis usurpata *accidentaliter* discrepant.

Observandum autem hic est, quod si integra permanente Sacramentali forma alia adderentur verba, quibus præcedentium sensus immutaretur, mutatio non esset accidentalis, sed substantialis, ideoque Sacramentum redderetur invalidum. Ita si quis Basilidis, aut Marcionis imbutus errore his verbis azymum consecraret: *Hoc est corpus meum, quod aerium & umbraticum est*, nefario hoc additamento perverteret significationem, quam præfert vocabulum illud *corpus*. Idem asserendum est, si Arii, aut Macedonii infectus hæresi baptismi formam hac impietate proferret: *In nomine Patris, & Filii, & Spiritus sancti, qui alterius sunt a Patre substantiæ*: quoniam postrema hæc verba id, quod Filii, ac Spiritus sancti nomina indicant, præfraete negant, verbisque Evangelicis pravam sensum affigunt: quod tenet de simili forma adhibita ab Eunomianis apud Epiphanium hæresi LXXVI. num. 9. & ab Evangelicis verbis plurimum discrepante, atque Filium ad illorum ordinem redigente, quæ ab ipso fuerunt procreata. Idem censeo, si pestilentissimus Calvinianus, aut Jansenista calicem Domini consecrando arcana verba ita sacrilege effunderet: *Hic est calix sanguinis mei, qui pro reprobis nullatenus effusus est*, intendens relativum pronomen *qui* esse præcedentis vocabuli *sanguinis*, ut Scholæ loquuntur, determinativum: similis quippe mutatio innueret ibidem non contineri pretiosissimum illum sanguinem, quem pro universis hominibus piissimus Jesus effudit. Atque hoc pacto mutatio quælibet inducens præcedentium verborum pravam intelligentiam, reddit nullum, atque irritum *Sacramentum*.

### I I I.

Affinis est quæstio tertia, num saltem mutatio *accidentalis* verborum, facta eo fine, ut inducatur aliqua hæresis, cassum reddat Sacramenti valorem: quod quidam affirmavere ducti supracitato Zachariæ rescripto, ubi decrevit Pontifex valere baptismum ab ignaro latinæ linguæ, eâ pronunciatione collatum, *In nomine Patriæ, &c.* non quidem absolute, sed, *si ille, qui baptizavit non errorem inducens, aut hæresim, sed pro sola ignorantia Romana locutionis infringendo linguam, ut supra fati sumus, baptizans dixisset*. Si ergo adhibuisset formam illam animo errorem, vel hæresim inducendi, de quo conferendus erat, Zacharia auctore, baptismus. Etiam S. Thomas 3. p. q. 56. art. 8. hanc conclusionem ponit: *Si intendat* (is, qui verba profert) *per additionem, vel diminutionem alium ritum inducere, qui non sit ab Ecclesia receptus, non videtur perfici Sacramentum, quia non videtur, quod intendat facere id, quod facit Ecclesia.*

*eleſia*. Videtur eſſe eadem ſententia Algeri, qui loco ſupra laudato, pag. 291. ſcribit : *Sed è contra ſciendum eſt, quod non eſt Sacramentum Chriſti, quod in errore poſiti contra inſtitutionem Eccleſia faciunt: nec eſt vera divini nominis invocatio, qua contra Chriſti præceptum Chriſtiana fidei periclitatur perfectio: nec ipſum nomen Domini, vel Dei verum eſt, quod perfidia proferentis adulteratum, verbotenus quidem Deum ſonat, ſed ſecundum hæreſim aliud ſonat; cum ergo verba Eccleſiaſtica mutantur, & error, vel hæreſis introducitur, ubi nec fides eſt, nec fidei forma, quomodo credenda eſt ſubſiſtere veritas Sacramenti?*

Verum, cum fides miniſtri ad Sacramenti valorem minime requiratur, ut Catholicorum profitetur doctrina; indubitatum eſt, Sacramentum valere, niſi Evangelica verba deſuerint, & hæc dummodo ſubſtantialiter integra proferantur, nullatenus hominum quorumlibet perverſitate vitiaſi. Si tamen qui Sacramenta conficit, intendens novum ritum, vel errorem inducere, data opera utatur verbis ambiguis, eaque intentionis ſuæ perverſitate ad ſenſum pravum, detorqueat, conſeo nullum haberi Sacramentum; quoniam ſignificatio verborum æquivocorum non ex eorum inſtitutione pendet, ſed ex determinatione proferentis. Ita, ſi ſolemnia verba non mutantur, ſed rite proferantur & ipſa executio Sacramenti rite perficitur, nec hæreticorum perfidia Sacramenti impedit veritatem, inquit eo loci Algerus. Non enim proferentis malitia poteſt immutare ſignificationem publico hominum inſtituto vocabulis inditam. At æquivoca verba receptam illam, ac præſinitam ſignificationem non habent.

Hæc explicant Zachariæ reſcriptum, & D. Thomæ doctrinam. Qui enim pro nomine Filii, ſilia ſubſtituit, ſi id fecit latini ſermonis ignorantia confecit utique *Sacramentum*; non enim ambiguum illam, & fraſte pronuntiatam vocem prava animi ſui determinatione ad contrarium ſenſum detorſit: at ſi propoſito conſilio id præſtitit, quaſi *Filiam* in divinis perſonis commiſcens, ut gentes Minervam procreatam è Jovis cerebro, aut conſimili perverſitate doctrinæ; minime baptizavit, quia ambiguum vocem abſurdæ ſignificationi alligavit. Atque eo pacto exponendos arbitror Algerum, & D. Thomam. Is tamen non eſt accipiendus de quolibet ritu hæretico, & Eccleſiæ fidei labefactante; nam ſi quis baptizando, E. G. preces adderet impias, quales fabricarunt Gallica lingua miniſtri Calviniani apud Marloratum de Orthodoxo baptiſmate pag. 84. ſervaret tamen præſcriptam formam, proculdubio Sacramentum conficeret, *Quia* ut Magnus Auguſtinus ait libro VI. de Baptiſmo tom. 9. pag. 176. *certa illa Evangelica verba ſine quibus non poteſt baptiſmus conſecrari, tantum valent, ut per illam evacuentur quæcumque in prece vitioſi contra regulam fidei dicuntur, quemadmodum demonium Chriſti nomine excluditur.*

Atque

Atque hanc esse germanam D. Thomæ sententiam, potest ex eodem articulo comprobari. Ibi namque Doctor Angelicus scribit eum, qui in *forma* salutiferi baptismatis adderet nomen Deiparæ, dicendo: *Ego te baptizo in nomine Patris, & Filii, & Spiritus sancti, & beata Virginis Mariæ*, non certe baptizare, nisi quod addit, *In nomina beata Virginis*, ita intelligatur, ut intercessio Virginis profit baptizato ad gratiam baptismalem servandam: nam si intelligeretur nomen Virginis id in baptismo efficere, quod nomen Patris, & Filii, & Spiritus sancti, omnino Sacramentum esset irritum, quoniam non possumus baptizari in nomine alicujus creature, juxta Apostolum in priori ad Corinthios 1. 13. Manifestum est ergo in ambigua verborum Sacramentalium mutatione, quæ posset Evangelicorum verborum, ac præstitutæ formæ sensum pervertere, explorandum esse animum proferentis: secus, si mutatio, vel additio obviæ sensum Evangelicorum verborum nequeat inficere; non enim malicia proferentis perspicua, inditamque verborum significationem potest corrumpere. Legi poterunt Theologia Moralis ad usum Seminarii Petrocorenensis Tom. 3. pag. 19. Juenin q. 3. cap. 6. art. 1. Salmaticenses Tract. xxi. 1. disp. 1. dub. 6. num. 90. Guerrero Tom. 1. pag. 377. &c.

## I V.

Proxima est quæstio, quid asserendum sit de Sacramentorum forma conditionali, E. G. *Si nondum baptizatus es, ego te baptizo in nomine Patris, &c.* Ad hanc verò quæstionem respondent primo eruditi Theologi, præsertim Juenin q. 2. cap. 5. Cardinalis Gotti Tom. 13. q. 2. dub. 4. Tournely de Sacram. in gen. pag. 40. & illustris Scriptor Operis de Re Sacrament. Tom. 1. pag. 9. antiquis temporibus, & ad sæculum usque octavum hanc conditionalem formam fuisse penitus inauditam. Quod sequentibus momentis ostenditur. I. Exorta sæculo 111. quæstione, an valeret baptismus per aspersionem collatus *Clinicis*, idest, in lecto decumbentibus, S. Cyprianus in Epistola ad Magnum lxxv. 1. pag. novæ edit. 322. ait se quidem existimare, *Clinicos* istos divinam gratiam consecutos, verum inquit: *Si aliquis existimat eos nihil consecutos, eo quod aqua salutari tantum perfusi sint, sed inanes & vacui sunt, non decipiantur, ut si incommodum languoris evaserint, & convalescerint, baptizentur.* Ubi, ut liquet, nulla conditionalis forma præscribitur. II. Concilium Arelatense I. celebratum anno 314. apud Lab. Tom. 1. pag. 1428. canone viii. mandat, ut baptizati ab Arianis, si ignorent an invocato Trinitatis nomine baptizati sint, & interrogati non responderint hanc Trinitatem, baptizentur, nulla pariter conditione commemorata. Extat de Consecrat. dist. 4. can. *de Arianis*. III. Eodem sæculo, anno scilicet 398. in Concilio Carthaginensi v. canone 6. qui insertus est eadem dist. 4.

dist. 4. cap. *Placuit*, statutum fuit, ut absque ullo scrupulo baptizentur infantes, *si certissimi non inveniuntur testes, qui eos baptizatos esse sine dubitatione testentur, neque ipsi sunt per aetatem idonei de traditis sibi Sacramentis respondere*. IV. Eadem distinct. cap. *Cum itaque*, & cap. *Si multa*, habentur definitiones duæ S. Leonis; una est deprompta ex Epistola ad Leonem Ravennatensem Episcopum, data anno Christi 451. & in 111. Vol. Concil. pag. 1316. ordine xxxv 11. ubi baptizandum illum præcipit, qui regenerationis est cupidus, *si baptizatum se nec ille recordetur, nec alter attestari de eo possit*; petitur altera ex Epistola ad Rusticum Narbonensem, data proximo anno 452. & in præcitato volumine ordine x11. in qua pariter sancitum est formidandum non esse iterationis crimen, si ille ad consequendam gratiam accedat, *cujus in se nullum seis esse vestigium*. V. Idem sæculo vi. exeunte tradidit magnus Gregorius Epistola 32. nunc 17. libri xvi. ad Felicem Messanensem Episcopum, quam epistolam, licet olim in controversia positam, nunc tamen Gregorio tribuendam optimæ notæ Codices commonstrarunt; & in qua Doctor egregius ex antecessorum traditione declarat, absque iterationis periculo tum homines baptizari & confirmari tum consecrari Ecclesias, quoties *nec scriptis nec testibus ratio certa habetur anrum baptizati vel confirmati, sive Ecclesia consecrata sint*. VI. Eadem anno Leonis Isauri X. ideoque Ch. 726. scripsit ad IX. Consultationem S. Bonifacii Gregorius II. non, ut Gratianus, Hincmarus, & Ivo putarunt, 111. quemadmodum rectè observarunt Sirmondus apud Labb. Tom. iv. pag. 1450. & Pagius Tom. 3. pag. 209. extatque Gregorii definitio in prælaudata dist. iv. de Consecrat. c. *Parvulos*, n. 110. His ergo constat ad plura sæcula conditionalem formulam fuisse incompertam; enimvero si octavo ineunte sæculo, aut elapsis tunc temporibus obtinisset; ejus utique mentionem fecissent aliquam, qui de conferendo baptismate in casu hæsitationis, num re vera, aut rite collatum fuerit, propriam sententiam pronuntiaverunt. At hi, summa licet eruditione conspicui, ac suprema in Ecclesiis auctoritate præditi, de hac questione interrogati formæ sub conditione prolatae minime verba fecere. Hæc itaque conditionalis forma ad octavi usque sæculi adolescentiam fuit incomperta.

Deinde eruditi Theologi affirmant conditionalem formam verentente sæculo octavo alicubi obtinuisse, servatam quoque nonnullis in locis, ac ab Alexandro III. probatam sæculo x11. communiter tamen in Occidentali Ecclesia receptam sæculo x111. sedente Romano Pontifice Gregorio IX. Primum constat ex Capitularibus Caroli Magni, quæ ab Ansegiso Abbate collecta fuerunt an. 807. in his enim lib. vi. num. 181. pag. 1007. legitur: *De quibus dubium est, utrum sint baptizati, an non, omnimodis absque ullo scrupulo baptizentur: his tamen verbis præmissis, Non te rebaptizo, sed si nondum baptizatus es, bapti-*

*baptizo te in nomine Patris, & Filii, & Spiritus sancti.* Alterum constat ex rescripto Alexandri III. quod extat cap. *De quibus*, Extra. De baptismo, n. 2. in quo præscribitur, baptizandos eos esse, de quibus dubium est an baptizati fuerint, his verbis præmissis: *Si baptizatus es, non te baptizo: sed si nondum baptizatus es, ego te baptizo, &c.* Laudari solent etiam Synodicæ Constitutiones Odonis Parisiensis Episcopi, qui successit Mauritio denato circa annum 1196. in Appendice Tom. x. Concil. Labbeanæ Collectionis, cap. 3. de Capitulis baptismum tangentibus, num. 4. ubi eadem formula Alexandri III. præscribitur, *Si es baptizatus, non te baptizo, si non es baptizatus, ego baptizo te, &c.* Tertium constat ex quo sæculo xiii. omnes Latinarum Ecclesiæ receperint *Yus Canonicum*, Gregorii IX. auctoritate promulgatum, in quo lib. 3. cap. 2. reperitur præcitatum rescriptum Alexandri III. ad Pontium Episcopum Claromontanum, ut coniectat Tom. 111. pag. 831. Em. Gonzalez.

Postremo consentiunt omnes fas esse uti formula conditionali in Sacramento baptismi, non ob quamcumque suspensionem, sed ob moralem certitudinem, quod antea non sit collatus baptismus, & post diligentem, accuratissimamque rei inquisitionem. Quod de aliis Sacramentis characterem imprimentibus est proculdubio asserendum. De Pœnitentia, si quis subito morbo correptus, nec voce nec signo peccata animique dolorem manifestare queat, idem dicendum est, nam & Clemens VIII. referente Homobono in Commentario Resolutorio de Examine Ecclesiastico Tom. 1. Tract. vii. cap. 18. labentem à fabrica Templi Vaticani, his verbis absolvit, *Si es capax, absolvo te &c.* At si pœnitens compos sit sui, & certam absolutionis materiam ponat, absque conditione absolvi debet, quoniam forma absolutionis innovatæ confessioni, & iterato contritionis actui applicata, non iterat Sacramentum numero idem, sed aliud constituit. Licet enim peccata eadem sint, innovantur actus pœnitentis, qui Pœnitentiæ vera materia sunt, & novæ materiæ novam formam absque ullo scelerere Sacerdos applicat. Quod si audita Confessione pœnitentem prolixis verbis doceat & commonefaciat, hæsitetque animo an absolutionis verba protulerit: tunc, ne hæc irrita sit & nulla, neque Sacramentum irreverentia aliqua polluat, consultum crit, sub conditione absolutionem impendere, hoc pacto, *Si non es absolutus, absolvo te, &c.*

## V.

Ex his inferri potest, quam facile sit in prolatione Sacramentalium verborum se nefario sacrilegii crimine maculare. Rectè Valentina Synodus 111. celebrata Lothario imperante an. 855. definiit canone 5. *nihil in Ecclesiæ Sacramentis esse cassum, nihil ludificatorium, sed prorsus totum verum, & ipsa sui veritate ac sinceritate subnixum.*

Vide-



Videfis Tom. v. 111. Conc. Gen. pag. 138. S. Carolus Mediolanenfis Antifites in Synodo an. 1565. Volum. Conc. xv. pag. 254. ex uberrimo fructu demonftrat , *quanta diligentia , & intima animi pietate , & externo cultu , ac veneratione tractanda ac percipienda funt .* Synodus pariter Burdigalenfis anno 1583. celebrata , eodem Vol. p. 953. inculcat *erga omnia Sacramenta religionem , & reverentiam , quorum contemptus , ut ait Divus Auguftinus , homines facrilogos facit : impie enim contemnitar , fine quo pietas conftare non poteft .* Hinc primo concluditur facrilégii reum effe , qui *ſubſtantialiter* immutat verba Sacramentalia : ſi enim id de ritibus , precibusque ab Eccleſia ſtatutis jure meritoque ſancivit ſeſs. vii. canone 13. Oecumenica Synodus Tridentina , ne quis audeat quidquam , aut mutare , aut contemnere , aut pro libito omittere ; quid aſſerendum putas de omittentibus , contemnentibus , & mutantibus effectricem gratiæ , & divinitus inſtitutam formam verborum , ſine quibus Sacramentum eſt Judificum ; & caſſum ? Neque a gravi reatu immunis eſt , qui formam hanc accidenti mutatione corrumpit , niſi ignorantia labore ineluctabili ; quippe non minori veneratione digna ſunt Sacramentalia verba , ac ſint divinx Scripturæ , quibus Deuteronomii cap. iv. lege cautum eſt , ne quidpiam addatur , vel detrahatur : immo , cum utraque divina ſint , non habent tamen Scripturæ verba vim illam ſanctificandi , quam placuit liberrimo largitori gratiarum univerſarum adnectere verbis Sacramentariis . Tertio ſequitur graviffimè etiam delinquere qui nulla adaectus neceſſitate repetit verba Sacramentalia , quandoquidem tali repetitione , utpote effectu vacuâ , ſacroſancta myſteria redduntur nulla , atque ludifica , excepto , ut diximus , Sacramento Pœnitentiæ , in quo poteſt nova materia ſubſterni . A gravi tamen culpa hac in re excuſandi ſunt ſcrupuloſi propter mentis perturbationem , in qua eis videtur haud rite Sacramentalia verba pronuntiaviſſe ; quamquam & iis præmiſſa ratione omnis abjicienda eſt hæſitatio , & animi anxietas prudenti ratiocinio diſcutienda . Sequitur quarto loco eum , qui baptiſmum ritè collatum repetit abſque hæſitatione validis momentis innixa , & unde conſurgat certitudo moralis illum nequaquam fuiſſe validè peractum , ſeſe execrando crimine innectere , nec non irregularitate innodari , cui ſubjicitur iterans validam Sacramentum : atque ratio evidens eſt , quia in definitionibus præcedenti numero productis præcipitur conferendum baptiſmum , ubi nec puer reſpondere poteſt de tradito ſibi Sacramento , nec alter eſt quiſquam , qui atteſtari valeat , an ille ſit baptizatus . Adeas Dominicum Sotum in 1v. diſt. 3. art. 6. Eſtium diſt. 4. §. 15. Joſephum Gibalinum de Irregularit. cap. 5. pag. 300. Eman. Gonzalez in 111. Decretal. tit. 42. cap. 2. & Chriſtianum Lupum in canonem 84. Trullanum , Tom. 3. pag. novæ edit. 152. Irregularem fieri etiam qui ite-

rat Sacramentalia, scripsit lib. 111. cap. 15. pag. 139. Simon Majolus, *ceteris tamen omnibus repugnantibus*, ait pag. 313. Gibalinus. Atque hæcenus de materia & forma Sacramentorum.

## C A P U T XIII.

*De Sacramentorum ministris.*

**P**roxime sequitur, ut de Sacramentorum ministris dicere institueremus, quæ in re nec Protestantes concordant invicem, neque nos cum illis convenimus. Lutherus enim in libro de abroganda Missa impudentissime, ac mendacissime scripsit: *Ego non dicam quod Papiæ dicunt, nullum Angelum, nec Mariam quidem ipsam consecrare posse: sed contra dico, si Diabolus ipse veniret, & ego postea nescirem Diabolum sic irrepsisse in officium pastoris Ecclesiæ specie hominis vocatum ad prædicandum, & publice in Ecclesiâ docuisse, celebrasse Missam, & absolvisse a peccatis, & tali munere functum esse juxta institutionem Christi, tunc cogeremur fateri Sacramenta ideo non esse inefficacia, sed verum Baptismum, verum Evangelium, verum Sacramentum corporis, & sanguinis Christi nos accepisse.* In quibus sane verbis non una continetur fraudulentia mendacissimi, improbilissimi scriptoris. Primo namque Theologi, quos Papiæ Sectarii vocant, distinguunt inter ordinarium, & extraordinarium ministrum Sacramentorum, nec negant posse per angelos bonos peculiari delegatione perfici Sacramenta, subscribuntque omnes Divo Thomæ 3. p. q. 64. art. 7. asserenti, *quod sicut Deus virtutem suam non ita alligavit Sacramentis, quin possit sine Sacramentis effectum Sacramentorum conferre, ita etiam virtutem suam non ita alligavit Ecclesiæ ministris, quin etiam Angelis possit virtutem tribuere ministrandi in Sacramentis.* Immo Scotus in 1. v. dist. vi. q. 1. docet validum fore baptismum si diabolus illum ex Dei præcepto conferret, quamvis scite monet non esse absque divina revelatione ratum habendum Sacramentum a spiritu mendacii collatum, propterea quod de Angelo perditionis supponitur fraudulenter se gerere, omniaque moliri, ut homines in errorem inducat; quod de sanctis angelis nefas est suspicari: atque hoc postremum tradidit etiam loco citato Doctor Aquinas. Permixtè itaque & confusè recitat catholicam sententiam hæresiarchæ, ut illam cruento sævoque dente dilaniet. Deinde baptismum, absolutionem, & Eucharistiam ministrandi potestatem tribuit unicuique, quasi omnis homo indiscriminatim possit consecrare singula Sacramenta, eademque sit singulorum ratio, sitque Sacerdotalis unctio, ut pestifero illo opusculo molitur, penitus abroganda. Hunc etiam honorem defert diabolo pestilentissimus assentator, ut veteranosum serpentem æquiparet Ecclesiæ Pastoribus, utpote qui validum com-

comminifcitur Sacramentum etiam irrifione collatum . Peccat quoque permiffcens Evangelium , & Sacramenta , quafi idem munus fit utrorumque ; & quemadmodum veritas illius pendet ex promulgatione doctrinæ , ita horum virtus innixa fit exhibitioni fignorum : nec aliud hæc virtus fit , quam plebis rudimentum , fideique excitatio . Vah improbum , fceleftiffimumque confarcinatorem errorum !

Contra Calvinus lib. iv. Inftit. cap. xv. num. 20. iis tantum , quibus Chriftus ministerium commiffit , non folùm in Euchariftia , verum etiam in baptifmo competere autumat legitimi difpenfatoris officium , adeo , ut nec laici , nec mulieres , etiam in periculo mortis , baptizare queant , nec poffit contraria confuetudo firma ratione defendi , ac perperam fiat , fi privati homines baptifmi adminiftrationem fibi ufurpent : *Eft enim* , inquit , *pars Ecclefiaftici ministerii , tam hujus , quam cœnæ difpenfatio* . Ita quaquaverfùm vergitur ferpens hærefis : unus apoftata & diabolus connumerat inter Sacramentorum miniftros ; alter fideles quoque laicos , & mulieres prohibet baptizare . At quoniam pertractare de difpenfatione baptifmatis fpectat ad librum proximum , declinantes interim a Calvino aggredimur monitrofum alterum hærefiarcham . Prænotamus tantùm , non pertractare nos de principali Sacramentorum miniftro , quem nemo unus ignorat effe Dominum Jefum , de quo Joannes i. 33. inquit , *Hic eft qui baptizat in Spiritu Sancto* , agnofcens , ut Auguftinus ait Tract. vi. in Joan. num. 12. *propriam quamdam poteftatem in Domino ad baptizandum* : fed inftituimus difputationem de iis , qui non poteftate primaria , fed ministerio , fibique commiffa difpenfatione perficiunt facra myfteria , quique confueta fermonis confuetudine *miniftri* appellantur ; funt enim facri miniftri etiam apud Ciceronem pro Cluentio perorantem , qui Deo veteribus inftitutis , religionibusque funt confecrati .

PROPOSITIO I. Solus homo viator eft ordinarius *Sacramentorum* minifter .

Probatum primò ex Scripturis : enimvero hominibus duntaxat Chriftus in ultima cœna ait : *Facite in meam commemorationem* , Lucæ xxii. 19. hominibus , *Euntes in mandum univerfum docete omnes gentes , baptizantes eos* , &c. Matt. xxv. 11. 19. hominibus , *Accipite Spiritum Sanctum , quorum remiferitis peccata , remittuntur eis* , &c. Joan. xx. 23. atque de hominibus inquit Paulus ad Hebræos v. *Omnis Pontifex ex hominibus affumptus* : de hominibus idem Apoftolus in Aët. Apoft. xx. 28. *Pofuit Epifcopos regere Ecclefiam Dei* : de hominibus Jacobus v. 14. *Infirmatur quis in vobis ? inducat presbyteros Ecclefia* , &c. Nullibi hæc de Angelis , folutisque a corpore animabus dicta comperimus . Soli itaque homines , & quidem in corpore viventes , funt ordinarii Sacramentorum miniftri . II. Pro-

batur ex Patribus, qui Sacerdotes plurimum honorandos esse demonstrant, ex quo eorum potestas neque Angelis, neque Archangelis collata sit, ut scribit homilia 17. Nazianzenus, & lib. 111. de Sacerdotio Chrysostomus. III. Probatur, quoniam cum Ecclesia visibilis sit, & signis etiam sensibilibus ad populi Christiani unionem fovendam Christus Dominus alligavit virtutem sanctificandi; congruum erat, ut etiam Sacramentorum ministerium hominibus in corpore viventibus committeretur. IV. Revincitur Lutherus ex suismet principiis, ut mox dicam; nam ad Sacramentum conficiendum exigit Dei mandatum, & Christi institutionem, quæ duo putat nobis ex scriptura sola innotescere. At ex quo scripturæ loco docemur commissum dæmoni, aut sanctis Angelis baptizandi, & consecrandi ministerium? Ubinam extat hujus mandati vestigium? Perperam ergo ille adstruit ministerium hocce solis hominibus non competere.

Opp. Sacramenta confecit Judas membrum Diaboli; curnam nequit idem præstare Diabolus caput hominum reproborum? II. Saltem Angeli, qui sunt *administratorii spiritus*, ad Hebr. 1. 14. poterunt ad animarum salutem conficere Sacramenta. III. At sanctis vita sanctis non videtur istiusmodi potestas deneganda, utpote qui retinent sacri Ordinis characterem.

Resp. hæc nullius esse momenti. Judas enim non habuit potestatem consecrandi, ut membrum Diaboli, sed ut Christi discipulus. Angeli vero sunt *administratorii spiritus*, quatenus sunt nuntii Dei, hominum custodes, & inferiores Filio, cujus eo loci Apostolus majestatem commendat; atque nos juvant precibus, monitis, patrocinio, non autem fungentes munere sacerdotum. Sancti demum, si corpore destituti sunt, ad visibilem Ecclesiam non spectant, ac retinent sacri Ordinis characterem ad ornatum, non ad ministerium. Si divinitus resurgant, aut in assumpto corpore huc descendant, esse Sacramentorum ordinarios ministros tenent Ledesma, Sotus, Gonet, Suarez, Salmaticenses: negat Aleusis, Vasquez, de Lugo, sed innixi probationibus parum firmis; in quibus discutiendis nolumus tempus trere.

PROPOSITIO II. Possunt Angeli sancti, & beati in cælo regnantes extraordinaria potestate Sacramenta conficere.

Quod Augustini verbis, ratione, & Ecclesiasticis exemplis ostenditur. Augustinus namque lib. 2. contra Epistolam Parm. c. xv. num. 34. 4. *Nemo, inquit, accipit sine dante, sed quod pertinet ad baptismi sanctitatem, adest Deus qui det, & homo qui accipiat, sive per seipsum donante Deo, sive per angelum, sive per hominem sanctum, sicut per Petrum, sicut per Joannem, sive per hominem iniquum, &c.* Et quidem, ut veniam ad alteram probationem, Deus non ita alligavit gratiam signis sensibilibus, ut nequeat illam alia

alia ratione impertiri: igitur, inquit loco citato S. Thomas, non ita alligavit Sacramentale ministerium hominibus viatoribus, ut non valeat illud angelis, animisque beatis committere. Insuper aliquando Angeli non solum Sacramenta dispensarunt, verum etiam confecerunt. Nam sacrâ synaxi refecerunt, præter alios complures, sanctimonialem Ordinis nostri Veronicam de Binasco, Divam Agnetem Politianam, Marcum Eremitam, Bonaventuram eximium Ecclesiæ Doctorem, &c. Adeas Sanctorum Acta Tom. 1. Jannarii p. 88. & 926. Tom. 2. Aprilis pag. 798. Tom. 3. Julii pag. 827. & Sozomenum lib. v.1. cap. 29. pag. edit. Val. 681. Idem de Thoma Apostolo singulis annis propria manu Indorum populis Eucharistiam porrigente retulit Joannes Patriarcha Callisto II. Romano Pontifici, ann. 1120. ut narrat Thomas Stapletonus in Collectaneis: cui tamen insigni, & pluries repetito miraculo aliqua alia præter unius Indorum præfatis necessaria foret auctoritas. Sanctum Amphilochem Iconii Episcopum fuisse consecratum ab Angelis narrat Nicephorus Callistus lib. x.1. cap. 20. pag. 138. Etiam Divum Protoparentem Augustinum aliquando de coelis descendentem sacra peregrasse, scribit probatus Auctor apud Antonium Guerrero Tom. 1. Theolog. moralis pag. 391. Sacris ergo literis, ratione, historiisque proposita thesis suffulta est.

Opp. Angeli propriè non loquuntur; ergo proferre nequeunt sensibilem formam Sacramentorum. Resp. dist. ant. propriè non loquuntur, spectata causa effectrice soni, & articulationis verborum; transf. considerata verborum significatione, eorumque sono sensibili; id nego.

PROPOSITIO III. Non sunt singuli prorsus homines quorumlibet Sacramentorum ministri.

Spectat assertum istud ad fidem, ac primum demonstratur canone 10. sessionis v.11. Tridentini: *Si quis dixerit Christianos omnes in verbo, & omnibus Sacramentis administrandis habere potestatem, anathema sit.* Deinde probatur ex quo in Ecclesia admitti debeat presbyterorum ministerium & Sacramentum Ordinis, scribente Apostolo in corpore Ecclesiæ diversorum officiorum exercitium diversis hominibus committi, *ut non sit schisma in corpore*, 1. ad Corint. x.11. 25. ob eam rem constitutos in Ecclesia pastores, & doctores a plebe diversos, *in opus ministerii, in edificationem corporis Christi*, ad Ephes. iv. 12. eumque duntaxat sibi hunc honorem jure vindicare, *qui vocatur a Deo, tanquam Aaron*, ad Heb. v. 4. At si quilibet homines haberent eandem potestatem in verbo, & in Sacramentis administrandis, non foret in Ecclesia discrimen istud, omnia membra haberent eundem actum, nulla esset compago corporis, omnesque tanquam Aaron sumerent sibi honorem. Tertio nunquam Ecclesia Christi passa est, ut Sacramenta promiscue ab omnibus conficerentur, sed

sed commisit id muneris pastoribus, & sacerdotibus, solo baptismo a communi regula excepto; ideoque Osius Cordubensis apud Athanasium per literas ita Constantium allocutus est: *Ne te immisceas rebus Ecclesiasticis, nec nobis his de rebus praecepta mandes: sed a nobis potius hac edifcas: tibi Deus imperium tradidit, nobis Ecclesiastica concedidit*: & Nazianzenus praecitata Orat. xvii. praecipit curam, studiumque erga plebem, *tametsi*, inquit, *obeunda legationis munere nobis cedat*. Revincuntur postremo Lutherani ipsius Augustanae Confessionis art. xiv. ubi *de ordine Ecclesiastico docet, quod nemo debeat in Ecclesia publice docere; aut Sacramenta administrare, nisi rite vocatus*. Et quamquam hujus vocationis potestatem adscribant populo, aut magistratibus; tribuendam tamen esse Ecclesiae Restoribus, (nisi verbis fucum faciant) profitentur hujus articuli Correctores in altera Confessione anni 1540. in qua adduntur haec verba, *Sicut Paulus praecipit Tito, ut in civitatibus presbyteros constituat*. Quibus sane verbis, velint, nolint, fatentur administrationem Sacramentorum ad presbyteros, presbyterorum verò institutionem ad Episcopos, non ad plebem, vel ad saecularem politiam pertinere. Accedit quod fratres Bohemi sacerdotibus destituti, ut Sacramenta reciperent, adacti necessitate clanculum ad Ecclesias Catholicorum miserunt consecrandos; quamquam id ægre ferret hæresiarca Lutherus. Vide Bossuetium Hist. Variar. lib. xi. num. 178. Illud etiam notandum est, quod Philippus Melancthon in Apologia Confessionis scribat a se, suisque rejectam Ecclesiasticam politiam, & Sacerdotale ministerium, ob Episcoporum nostrorum tyrannidem, atque improbitatem presbyterorum: cujus temeritatis Philippum jure redarguant Cochleus, & Hoffmeisterus Harm. Confess. pag. 306. & seq. æquiparantque Novatorum Capita Michæ, Jezebeli, & Jeroboamo, qui sanctis inunctionibus spretis instituerunt ministerium saeculari auctoritate, atque illud Aaronico prætulere. Adde eò amentia amentissimos pervenisse, ut sacerdotale ministerium spernentes probarint tamen collata a Diabolo Sacramenta. Recte ergo talia errorum portenta execramur.

Oppones: In nova lege omnes, qui Christo nomen dederunt, sunt sacerdotes; possunt ergo omnes fungi sacrorum ministerium officio. Prob. ant. I. quoniam Christus in ultima cæna omnibus fidelibus in persona adstantium Apostolorum ait, Lucæ xxii. 19. *Hoc facite in meam commemorationem*. II. Matthæi xxviii. 19. inquit: *Euntes docete omnes gentes, baptizantes eos, &c.* Sed baptismi sunt idonei ministri omnes prorsus fideles; ergo & verbi, omniumque Sacramentorum. III. In nova lege quilibet fidelis est sacerdos, scribente Apostolorum principe in priori Epistola i. 5. *Ipsi tanquam lapides vivi superedificamini, domus spiritalis, Sacerdotiam sanctum, offer-*

*offerte spirituales hostias, acceptabiles Deo per Iesum Christum: & versu 9. Vos autem genus electum, regale Sacerdotium, gens sancta, populus acquisitionis, &c. Ioannes pariter Apoc. 1. 6. scribit: Fecit nos regnum, & Sacerdotes Deo & patri suo.* IV. In Ecclesia sua non patitur Christus discrimen istud pastorum ac plebis, sed præcipit Matt. xx. 25. *ut quicumque voluerit maior fieri, sit minister, &c. V. Nulla inter fratres admittitur graduum disparitas; quum igitur Christus sit Sacerdos, & eos, qui regenerantur, in suorum fratrum numerum recipiat, poterit quilibet baptizatus fungi Sacerdotio, & conficere Sacramenta.*

Resp. inter regulas interpretandi sacras literas hanc enumerari a magno Angustino lib. 111. de Doctrina Christiana cap. 17. num. 25. *Ut sciamus alia omnibus communiter præcipi, alia singulis quibusque generibus personarum:* ex qua regula S. Pater infert, *in suo genere curandum esse, quod ad melius genus non potest erigi, E. G. quod omnibus parentibus dicitur Eccl. vii. 27. Trade filiam, & grande opus perfeceris,* si quis statuit servare innuptam Virginem suam, tanquam figuratam locutionem conatur interpretari. Si ergo concedamus prædicta omnia Scripturæ loca de omnibus fidelibus accipienda, dicendum erit non eadem ratione ad singulos pertinere, sed ad Sacerdotes consecrationem & communionem Eucharistiæ, ad laicos communionem tantummodò: ad illos munus docendi & baptizandi, ad istos baptizandi tantum necessitate impellente; ad eos proprium Sacerdotium, quo externum sacrificium peragitur, ad hos verò internum, quo unusquisque supremo Domino offert semetipsum; ad illos denique fraternitatem Christi secundum missionem & potestatem sanctificandi, ad istos autem secundum gratiam adoptionis, &, nisi ab hac decident, secundum participationem hæreditatis. Atque ita nullum ex adductis locis juvat heterodoxos.

At est quod in singulis perpendamus. Si quod legitur Lucæ xxii. *Facite in meam commemorationem,* de consecratione Eucharistica accipiendum esse contendas, nego dirigi hæc verba ad omnes promissæ fideles. Tunc enim Christus cum solis Apostolis segregato in loco cœnabat: neque Apostolis universa Christianorum multitudo successit; nam cum esset, damnato Juda, ipsorum numerus integrandus, non patuit cuique ad hanc dignitatem aditus, sed suffragiis Apostolorum designati sunt duo, idest, Barfabas & Matthias, & is tantum accepit Apostolatam, de quo prævaricatus est Judas. Paulus & Barnabas non humano iudicio, sed per Spiritum sanctum ad exercendum Apostolicum ministerium fuerunt segregati. Ab Apostolis, non a cœtu fidelium, crescente numero credentium, ordinati fuerunt Presbyteri, Diaconi, alique ministri, necessarii ad Ecclesiasticam Hierarchiam. Videbis Alphonfi Virvesii Philippicam 111. in Melan-

chtho-

chthonem. Deinde verbum *Facite* referri potest ad omnes actiones, quæ Christus peregit, ita, ut sensus sit, sacrificate, offerite, sumite, frangite; idque spectat ad discipulos, eorumque successores, nec non etiam ad laicos quatenus offerunt, & sacrificant per Sacerdotes, quo sensu dicimus in Canone Missæ, *Pro quibus tibi offerimus, vel qui tibi offerant*: vel potest referri ad solam Eucharistiæ perceptionem, quo sensu ait Apostolus in prima ad Corinth. x. 26. *Quotiescunque enim manducabitis panem hunc, & calicem bibetis, mortem Domini annuntiabitis, donec veniat*. In neutro autem sensu, ut liquet, sequitur laicis demandari ministerium consecrationis, sed ad illos tantum pertinere præceptum accipiendi & edendi in memoriam Dominicæ passionis. Præterea verborum illorum, *Hoc facite*, potest sensus esse, Quemadmodum ego panem consecro, offero, vobisque distribuo; ita vos, quos modò Sacerdotes novi Testamenti constituo, consecrate, offerite, ceteris distribuite, ac vos item Sacerdotes constituite, ut consecrent, offerant, distribuant: atque huiusmodi sensus adeo planus est, ac perspicuus, ut jure meritoque sacrosancta Tridentina Synodus sess. 22. cap. 1. affirmarit, Christum Dominum per hæc verba, *Hoc facite in meam commemorationem, Apostolis suis, quos tunc novi Testamenti Sacerdotes constituebat, eorumque in sacerdotio successoribus, ut offerrent præcipisse, &c.* Hinc verbò nonne laici a sacrificandi ministerio evidentissimè arcentur?

Quod attinet ad 2. illis verbis, *Euntes docete, &c.* significatur duo munera pastoralis officii, scilicet, potestas doctrinæ, & administratio Sacramentorum, quæ duo esse omnibus Episcopis & Pastoribus communia, ultro fatemur; sed non posse ministerium alterius, quod summæ necessitatis est, ab Episcopis & Pastoribus etiam laicis committi, aut è contra utrumque munus singulis commissum esse, non video, qua ratiocinatione istinc eruatur. Non enim dictum est, *Baptizate, & nemo alius baptizet*, neque, *Baptizent, & doceant promiscuè omnes*: sed comprehendit Dominus in docendi munere, & in administratione Sacramentorum functionem Apostolicam, non expressis, neque denegatis ceteris, quæ Apostolorum auctoritati commiserat. Enimvero priusquam Christus discipulos mitteret in universum mundum, Petro tradiderat claves regni cælorum, & ligandi atque solvendi plenissimam auctoritatem, Ecclesiasticam. Hierarchiam instituerat, contulerat sacerdotibus potestatem remittendi peccata, formaverat Ecclesiam optimis institutionibus; quæ simul ad memoriam revocans inquit, *Docentes eos servare omnia, quaecunque mandavi vobis*. Adde tunc affuisse cum Apostolis omnes discipulos; & quemadmodum Dominus servos, aut Imperator milites dimittens his verbis, *Ite, jussu exequimini, facite imperata*, non singulis singula, sed unicuique officium præscribit suum; ita Redemptor



ptor extremo illo colloquio singulos universali jussione ita commonefecit, ut non debeant tamen inferiores jura superiorum invadere. Uterius eo loci præscribitur, ut Apostoli baptizent gentes fidei rudimentis imbutas, nec tamen fatentibus Lutheranis prohibet *pædobaptismum*, idest, baptismum puerorum, qui per ætatem percipere nequeunt Evangelii doctrinam. Ergo nec prohibet aliis baptizandi ministerium: quamvis non extendat ad omnes verbi potestatem, ministeriumque ceterorum Sacramentorum.

Ad alterum optima est Catholicorum omnium responsio, appellari fideles omnes *Sacerdotes*, quatenus Christo nomen dantes sese in Dei cultum consecrant, segregantque ab idolorum cultoribus; non in quantum externo ritu possint omnes sacrificare, & exercere officia pastorum. Si enim hoc sensu credentes omnes fungerentur Sacerdotio, quomodo recte scripsisset Apostolus ad Hebræos v. eos tantum, *qui vocantur a Deo tanquam Aaron*, vindicare sibi met hunc honorem? quomodo assereret ad Ephes. iv. in corpore Ecclesiæ diversos gradus statutos, *ad consummationem Sanctorum in opus ministerii*? quomodo Apostoli per manuum impositionem Presbyteros & Diaconos ordinassent? quomodo solis Apostolis Christus largitus esset potestatem remittendi peccata? quomodo quælibet Christi membra non eundem actum haberent? Sapientissime itaque Augustinus exponens verba Apocalypsis, *Erunt Sacerdotes Dei, &c.* in vicesimo libro de C. D. cap. 10. inquit: *Non utique de solis Episcopis & Presbyteris dictum est, qui proprie jam vocantur in Ecclesia Sacerdotes; sed sicut omnes Christianos dicimus propter mysticum chrisma, sic omnes Sacerdotes, quoniam membra sunt unius Sacerdotis: de quibus Apostolus Petrus, Plebs, inquit, sancta, regale Sacerdotium.* Huic pervulgatæ responsioni duo notatu dignissima addam. Unum est, quod verbis Petri simillima sunt, quæ per Moysen Dominus ait ad progeniem Jacob, & universos filios Israel, Exodi xix. 6. *Et vos eritis mihi in regnum Sacerdotale, & gens sancta*; & tamen non hinc eruitur in lege veteri omnes promiscuè ad Sacerdotale ministerium electos; immo divinitus corruerunt laici, qui sacra attentarunt, ut contigit Ozæ, quem Deus percussit, *quod tetigisset arcam Domini*, 2. Regum vi. 7. Ex verbis itaque Petri fictitia illa, communisque potestas sacra tractandi minime infertur. Alterum notatione dignum est, eo loci Petrum non tantum Sacerdotii meminisse, sed etiam regni; inquit enim, *Regale Sacerdotium*, idque ex interpretatione Acatolici Grotii, *ut intelligantur Christiani per Christum ita facti Sacerdotes, ut simul & reges sint ad Christi exemplum*. Quid ergo? Nonne sunt in lege nova reges, qui ceteris præstant? Si reges sunt aliqui; dicendum est, quod sicuti Christiani omnes sunt reges, quatenus non subijciuntur legis servituti, animique sui tenent imperium,

non quatenus rempublicam modcrentur, omnesque præditi sint summorum principum auctoritate: ita dicendum erit, quod omnes Christiani sunt Sacerdotes, in quantum caste viventes corpus suum sacrant in Dei templum, preces offerunt, & exercent opera sanctitatis; non in quantum evecti ad Ecclesiasticam hierarchiam habeant potestatem verbi, sacrorumque mysteriorum, ac sint omnes Sacerdotali characterè insigniti. Si verò nulli sint reges; non solum Ecclesiastica hierarchia, verum etiam politia secularis erit abjicienda, omniaque perturbata erunt, & Reipublicæ exitiosa: quod haud vereor attentaturos hæreticos, nisi eorum licentiam cohiberet auctoritas Magistratum. Quare Andreas Fabricius animadv. ad art. xiv. Conf. Augustinæ pag. 304. *Videant, inquit, Principes, quibus aures ad ejusmodi novitates praviunt, ne per simile argumentandi genus multorum animos adversum se excitent. Nam si verè ex eo Petri loco concluditur omnes Christianos ita esse Sacerdotes, ut non sit agnoscendum in Ecclesia peculiare aliquod Sacerdotum genus, qui ceteris Christianis & functione & dignitate præstent; cur non ex eodem loco auge vere & efficaciter concludatur nullos apud Christianos esse reges, aut principes ceteris superiores? Si illa machina Sacerdotes suo gradu jure dejiciunt, suisque sedibus propellunt; cur non eodem tormento & reges suis solis deturbent, ac in ordinem revocent? Utrumque enim eo loco Petrus conjungit, nec tantum Sacerdotii, sed etiam regni meminit.*

Quod sequitur proximo loco, nullius est momenti. Ibi enim Christus humilitatem præcipit, non evertit Ecclesiasticam hierarchiam, demonstratque quomodo principes mundi ideo fiunt ut dominantur minoribus suis, ut servificent eos, & spolient eos, & comedant, & usque ad mortem abutantur vita eorum ad suas utilitates & glorias: principes autem Ecclesie fiunt, ut serviant minoribus suis, & ministrent eis quacunque acceperint a Christo, ut suas utilitates negligant, & illorum procurent, &c. ita cum ceteris Græcis Auctor hom. xxx. pag. 901. inter Opera Chrysostomi: nec aliter cum Latinis reliquis Hieronymus in Matth. Tom. iv. pag. 93. & Augustinus serm. 111. in Psalmum c111. num. 9. Eo namque loci increpat Dominus filiorum Zebedæi immodicam cupiditatem. In postremo autem non immorabor; neque enim in bene instituta domo tenent singuli fratres eundem locum; neque adoptio gratiæ, per quam Christo coaptamur, tribuit omnibus cum jure ad hæreditatem potestatem regiminis: sed, ut singuli fratres mensæ simul accumbunt, eisque patresfamilias, aut majores natu alimenta distribuunt: ita omnes Christi fideles in una Ecclesia, tanquam in eadem domo degentes Dominico Corpore saginantur; sed laicis Episcopi, ac presbyteri porrigunt Sacramentum. Verum de his plura ubi de Eucharistia, & de Sacris ordinationibus disputabitur.

## C A P U T XIV.

*De conditionibus, quæ requiruntur in ministro,  
ac primum de probitate.*

**N**ON valere Sacramentum ab improbis ministris collatum docuerunt Donatistæ, qui non solum hæreticos, verum etiam peccatores quoslibet arcebant ab administratione Sacramentorum, ut lib. 2. contra Cresconium cap. xxviii. num. 34. aliisque in locis docet Augustinus, & lib. v. de Schismate Donatistarum S. Optatus. Prolapsi sunt in eundem errorem Pseudo-Apostoli, de quibus ferm. 66. in Cantica S. Bernardus. Idem propugnarunt Valdenses, Albigenes, Hussitæ: hæseruntque eodem in luto Anabaptistæ etiam a Kemnitio, & a Bullingero refutati. De Hussitis hæsitat Bellarminus lib. 1. de Sacramentis in genere cap. 26. manifestus est tamen articulus ille Joannis Hus de decimis: *Si Episcopus existat in peccato mortali, non ordinat, non conficit, non baptizat.* Novatores, tam Lutheri, quam Calvinii addicti partibus fatentur Sacramenta, quamvis a malis ministrantur, esse efficacia. Enimverò Jo. Calvinus lib. 1v. Inst. cap. xv. n. 16. scribit Sacramentum ex ipsa Dei manu æstimandum, a quo haud dubiè perfectum est, non è manu ejus, a quo administratur, asserens exemplum epistolæ, de qua minime refert quis aut qualis fuerit tabellarius, modo satis & manus & signum agnoscatur: quo exemplo putat Donatistas, Anabaptistas, & Catabaptistas pulchre refutari. At vides inter herbas venenatam viperam latitare, dogma scilicet exitiosum, quod Sacramenta sint divinæ promissionis sigillum, & eatenus signacula justitiæ, quatenus, tanquam chirographum sigillo signatum, fiduciam nostram corroborant. Kemnitius quoque in 2. p. Examinis non reprobatur canonem 12. sess. vii. Tridentini: *Si quis dixerit ministrum in peccato mortali existentem, modo omnia essentialia, quæ ad Sacramentum conficiendum, aut conferendum pertinent, servaverit, non conficere, aut conferre Sacramentum, anathema sit.* Articulus denique viii. Confess. Augustanæ hæc habet: *Et Sacramenta, & verbum Dei, propter ordinationem, & mandatum Christi sunt efficacia, etiamsi per malos exhibeantur.* Non videtur tamen huic articulo coherere quod in libro de Potestate Papæ scripsit Lutherus, eum solum recipere claves, qui sit paternæ revelationis auditor: sed frustra in hæreticorum libris quærimus harmoniam. A Novatoribus ceteris dissentiant Zuvigliani ea ducti ratione, quod Christus prius dederit Spiritum sanctum, deinde vero clavium potestatem, unde inferendum putant ibi non esse potestatem, ubi non est spiritus Sanctificator. Ita scribit in Epistolam Canonicam Oecolampadius. Præscindimus modo

ab ea quæstione, num hæretici, qui extra Ecclesiam sunt, valide Sacramenta conficiant; ne quæ dicenda erunt libro proximo de Rebaptizantibus, huic loco inferantur: sed instituiamus disputationem de ministris in Ecclesiæ sinu degentibus, & pollutâ conscientiâ sacra tractantibus, posito quoque inter validam, & illicitam sacrorum ministrationem discrimine.

PROP. I. Valet Sacramentum ab improbo, scelestissimoque ministro collatum, modò nihil eorum desit, quæ ad illius constitutionem sunt necessaria, idest, aut materia, aut forma, aut intentio.

Prob. 1. Ex scripturis Joannis. 1. 33. de Christo legitur: *Hic est qui baptizat in Spiritu sancto*. Nequit his verbis demonstrari solum Christum esse ministrum baptismatis, cum sacra narret historia, etiam discipulos baptizasse. Demonstratur ergo tantummodo ad solum Christum pertinere potestatem baptismatis, ad discipulos ministerium. Atqui malus minister nequit impedire Domini potestatem. Igitur ministrorum peruersitas impedire nequit baptismi, aliorumque Sacramentorum validitatem. *Joannes didicit per columbam*, inquit Augustinus Tract. v. in Joan. num. 11. *potestatem Domini baptismi in nulum hominem a Domino transituram, sed ministerium plane transiturum: potestatem a Domino in neminem, ministerium & in bonos & in malos. Non exhorreat columba ministerium malorum, respiciat Domini potestatem. Quid tibi facit malus minister, ubi bonus est Dominus? quid te impedit malitiosus præco, si est benevolus Juxta?* II. Post baptismum Joannis fideles jubente Paulo susceperunt baptismum Christi; post baptismum autem Christi, nec qui a Juda fuerant baptizati, jussi sunt iterum ad baptismum accedere. Habet ergo ex se baptismus Christi, ut sit validus, quamvis collatus ab improbo, quoniam semper est baptisma Christi, qui baptizat in Spiritu sancto, qualiscunque sit illius Sacramenti minister. *Baptismum Christi das*, ait eodem Tract. num. 18. S. Pater, ideo non post te baptizatur: post Joannem ideo baptizatum est, quia non Christi baptismum dabat, sed suum: quia sic acceperat, ut ipsius esset. Non ergo tu melior, quam Joannes: sed baptismus qui per te datur, melior quam Joannis. Ipse enim Christi est, iste autem Joannis. Et quod dabatur a Paulo, & quod dabatur a Petro, Christi est: & si datum est a Juda, Christi erat. Dedit Judas, & non baptizatum est post Judam: dedit Joannes, & baptizatum est post Joannem: quia si datus est a Juda baptismus, Christi erat: qui autem a Joanne datus est, Joannis erat. Et infra, Sic ergo quos baptizavit ebriosus, quos baptizavit homicida, quos baptizavit adulter, si baptismus Christi erat, Christus baptizavit. Non timeo adulterum, non ebriosum, non homicidam: quia columbam attendo, per quam mihi dicitur, *Hic est qui baptizat*. Transcripta sunt Augustini verba in canones, 1. quæst. cap. Dedit. Et de Consecrat. dist. iv. cap.

cap. *Baptismus*. III. Ne Corinthii intumescerent, quod habuerint præ ceteris pastores probitate exornatos, hoc argumento eos coercet Apostolus in priori Epistola cap. III. 4. *Cum enim quis dicat : Ego quidem sum Pauli . Alius autem , Ego Apollo : nonne homines estis ? Quid igitur est Apollo ? quid vero Paulus ? ministri ejus , cui credidistis , & unicuique sicut Dominus dedit . Ego plantavi , Apollo rigavit : sed Deus incrementum dedit . Itaque nec qui plantat est aliquid , neque qui rigat : sed , qui incrementum dat , Deus .* Quibus verbis Apostolus evincit, nemini gloriandum esse in hominibus, quoniam vniuentibus gentibus ad gratiam, homines solum ministerium exercent, neque ab eorum opere pendet regenerationis effectus. Præclare Optatus lib. v. de Schismate Donatistarum pag. 87. *Ut ostenderet , quia hoc totum Sacramentum , baptismatis Dei est , ut illic sibi nihil vindicaret operarius , sic ait : Ego plantavi , hoc est , de pagano catechumenum feci : Apollo rigavit , hoc est , ille catechumenum baptizavit : sed ut crederet quod plantatum & irrigatum est , Deus fecit . Nam & qui vis hodie volens vineam suam pastinare , operarium placita mercede conducit ; qui curvato dorso , & desudatis lateribus fines terra faciat , ubi deponat electa plantaria , & aquam calcatis scrobibus superducatur : scrobem fodere , & plantaria ponere potest , aquam inducere potest ; imperare ut teneat non potest : est enim hoc solius Dei , de medullis palmitum producere radices coalescentes in terram , & gemmantes oculos , incrementa frondium provocare , &c. IV. In Dei nomine ejiciuntur demonia , & in nomine Trinitatis consecratur baptismus , Marci xvi. 17. & Matth. xxvi. 11. 19. At in nomine Christi etiam improbi demonia ejiciunt . Igitur in nomine Trinitatis mali quoque ministri conficiunt Sacramenta . Denique lectum est in Evangelio ( inquit eodem loco Milevitanus Episcopus ) Joanne dicente , Magister vidimus quemdam in nomine tuo expellentem demonia , & prohibuimus eum , quia non sequitur nobiscum , sic Christus ait , Nolite prohibere : qui enim non est contra vos , pro vobis est , Luc. ix. 37. Nam & ipsis sic mandatum est , ut opus esset illorum , sanctificatio Trinitatis ; nec in nomine suo tingerent , sed in nomine Patris , & Filii , & Spiritus sancti . Ergo nomen est quod sanctificat , non opus . Hæc collustrare possunt pervulgatam probationem scholasticam , quod potestas conficiendi Sacramenta sit gratia gratis data , non gratum faciens , ideoque non requiratur ad Sacramenti valorem sanctitas operantis .*

Demonstratur 2. Catholica thesis Ecclesiasticis definitionibus . I. Nicolaus I. primus ad Consulta Bulgarorum cap. xv. Tom. VII. Concil. pag. 523. docet validum esse baptismum collatum ab eo , qui se finxit presbyterum , productis Anastasii II. ad coequivocum Augustum literis , verbisque Joannis , & Pauli supra explanatis , atque in hanc sententiam concludens , *Malus bona ministrando , non aliis , sed sibi detri-*

*detrimēti culpam ingeris.* II. Concilium Constantiense celebratum anno 1415. sess. viii. proscripsit hunc articulum Joannis Wiclefi ordine 4. *Si Episcopus, vel Sacerdos est in peccato mortali, non ordinat, non conficit, non consecrat, non baptizat.* Tom. xii. Com. pag. 45. Wiclefi errores pertinaciter in civitate Pragensi propugnasse Joannem Hus simul cum magistro damnatum, patet ex eodem Concilio Constant. eodem volum. pag. 131. & ex libro de Decimis ejusdem hæretici supra citato. III. Non requiri vitæ integritatem in ministro, ut Sacramentum validum sit, sancivit prælaudato canone xii. Oecumenica Synodus Tridentina.

Tertio probatur auctoritate Majorum: ex quorum scriptis ut perpauca delibemus, Nazianzenus Orat. in S. Baptismum, *Quamvis, inquit, aliis alium vitæ probitate antecellat, eadem tamen baptismi vis est.* Chrysostomus Hom. viii. in priorem ad Corinthios: *Nunc autem etiam per indignos Deus solet operari, nec baptismatis gratia quicquam leditur a vita Sacerdotis.* Et hom. xi. in Epist. ad Thessalonicenses: *Gratia Dei per indignos operatur, non propter ipsos, sed propter eos, quibus opitulandum est.* S. P. Augustinus lib. 2. contra Epist. Parmeniani cap. x. num. 21. *Hic enim dici non potest, quod solent ineptissime, & impudentissime dicere, (Donatistæ) tunc posse a malo baptizari quemquam, si lateat malitia baptizantis. Qui enim fictus est, tanto magis fictus est, quanto magis latet. Ab hoc ergo cum se auferat Spiritus sanctus, quæ spes erit baptizati, si baptizantis hominis meritum in illa Dei gratia cogitandum est?* Idem Augustinus lib. 2. adversus Petilianum cap. 37. num. 88. *Redite ergo prævaricatores ad cor, & nolite ex hominum moribus & factis divina Sacramenta pensare. Illa enim per eum sancta sunt, cuius sunt: sed dignè tractata offerunt præmium, indignè autem tractata judicium. Et quamvis nunc non sint qui Dei Sacramenta digne, & qui indignè tractaverint: unum est tamen illud sive digne, sive indignè tractetur, non ut ipsum melius, vel deterius fiat, sed ad vitam, mortemve tractantium.* Ildorus Pelusiota lib. 3. Epist. 304. *Nullo detrimento, inquit, qui suscipit sacrosancta mysteria afficitur, etiamsi qui tribuit indignus esse videatur; neque incontaminata mysteria conspurcantur, etiamsi sacerdos omnes mortales superet improbitate.*

Producam quarto loco aptissima exempla, quibus Patres dogma istud explanaverunt. Principio Nazianzenus præcitata Orat. pag. edit. Morel. 656. bonum, ac malum ministrum comparat duobus anulis, quorum unus aureus est, alter ferreus, at ambo eandem Imperatoris imaginem inculptam habent, ac ceram imprimunt: discrimen enim in materia est, non in signo. *Sic tibi, inquit, omnes, qui baptizandi munere funguntur, idonei habeantur: quamvis enim alius alium vitæ probitate antecellat, eadem tamen baptismi vis est.* Augusti-

Augustinus lib. 3. de Baptismo cap. x. num. 15. comparat Sacramenta luci, *quæ cum per canosa diffunditur, nihil inde sordidum contrahit* : & lib. 111. contra Cresconium cap. viii. num. 8. femini, quod spargit infidelis colonus, a quo fieri nequit ut fecunditas terræ, cælique temperies efficaciam germinandi divinitus non acceperint. Addit Tract. v. in Joannem num. 15. comparationem canalis lapidei, per quem transit aqua ad areolas, quæ tamen in hortis plurimum fructum affert. Ita de superbo ministro sermonem instituens, *Non contaminatur*, inquit, *donum Christi, quod per illum fuit purum, quod per illum transit liquidum, venit ad fertilem terram*. Euthymius in cap. xi. Joannis Sacerdotem improbum æquiparat scelestissimo Caiaphæ, qui tamen vaticinatus est, id assecutus non propria virtute, sed propter Pontificis dignitatem. Theophylactus ad cap. xx. Joannis utitur comparatione asinæ Balaami, loquens ad hunc modum : *Nam quamvis Sacerdotes indigni sunt, quid hoc? Divinorum donorum sunt ministri, & gratia operatur per eos, sicut & per asinam Balaam locutus est*. Atque his, aliisque exemplis evincitur non pendere virtutem Sacramenti a sanctitate ministri.

Tandem conclusionem ductis a Theologica ratione argumentis confirmo. Sit autem primum. Sacrorum mysteriorum ministri sunt dispensatores, Christi ministerio fungentes ex Apostolo 1. ad Corinth. iv. 1. idest, non conferunt Sacramenta, *tamquam Potestas, sed tamquam servi, in quos voluit Deus transferre potestatem suam, ut in illo spes esset baptizatorum, nec servus poneret spem in servo*, inquit Aug. Tract. v. in Joannem num. 7. sive, ut Scholastici loquuntur, sacri ministri non sunt Sacramentorum causæ principes, sed instrumentales, quæ non operantur secundum propriam virtutem, sed juxta virtutem illius, a quo moventur, quemadmodum præco operatur mandato judicis, & officialis auctoritate principis : his namque exemplis utitur Augustinus eodem Tract. v. num. 13. Atqui minister operarius, & instrumentalis causa, cum solummodo exterius proferant opus principalis agentis, nequeunt hujus actionem cassam reddere, quantumvis pravis moribus affecti sint. Ergo ministeriorum scelus & pravitas nequit irritum reddere Sacramentum. II. Sacra ministrantes non deperdunt propter scelerum demerita potestatem & characterem : quod Augustinus demonstrat adversus Donatistas lib. 1. de Baptismo cap. 1. num. 2. ex quo & ipsi Donatistæ recipere baptizatos, aut consecratos antequam ab unitate discederent : unde S. Pater ita ratiocinatur, *Sicut acceptatur baptismus, quem non potius amittere, qui ab unitate discesserat; sic acceptandus est baptismus, quem dedit ille, qui Sacramentum dandi cum discederet non amiserat*. Et quidem si grave scelus, quale est recedere ab unitate, & schismate se pollueri, non delet characterem baptismatis in com-

communione suscepti, ita nec delet characterem Ordinis, & consequenter qui in schismate aut tingit, aut consecrat, verum conficit Sacramentum. Idem proximo cap. v. num. 7. S. Pater demonstrat, ex quo iidem Donatistæ reciperent baptismum Maximianistarum, quos in Synodo Bagaitana tanquam sacrilegos extra eorum communionem eiecerant. Unde S. Pater ita exagitat adversarios: Si valet baptismus a Feliciano collatus in schismate; quare non tenet collatus a Catholicis, quos Donatistæ tanquam impios, fures, & sacrorum codicum traditores execrantur? *Nihilominus, inquit Augustinus, inter nos, & eos Donatistas, qui Primiano communicant, dereliquit, &c.* Primianus enim Maximianistas a sua communione separavit; vid. lib. III. contra Epistol. Parmeniani cap. 3. num. 18. Urget Augustinus idem argumentum lib. III. contra Cresconium cap. 24. num. 27. & lib. IV. cap. 16. num. 18. & seq. III. Inter bonos ministros unus est melior altero, & nihilofecius non est melior baptismus qui per meliorem confertur. Igitur, insert S. Pater cit. lib. 3. adversus Cresconium cap. vi. num. 6. *Nullo modo est malus, qui etiam per malum datur, quando idem baptismus datur: & ideo per ministros dispares Dei munus æquale est, quia non illorum, sed Dei est.* IV. Baptismus est unus ex Apostolo ad Ephes. IV. 5. Ministri autem baptismatis (Quod de ceteris Sacramentis intellige) sunt multi. Baptismus unus est, quoniam sive baptizet Petrus, sive Judas, non conferunt baptismum suum, sed Christi. Ministri autem plures sunt, quoniam Petrus non est Judas, nec Judas Petrus. Ergo, inquit S. Pater in Epistola contra Donatistas, sive de unit. Eccl. cap. XXI. num. 58. *eum tantum distaret inter Petrum & Judam, nihil tamen distabat inter baptismum qui dabatur per Petrum, & qui dabatur per Judam. Illud enim quod per eos dabatur, unum erat, eum ipsi non essent unum.* Similia lib. IV. de Schismate Donatistarum num. 4. Optatus Milevitanus. V. Si valeret Sacramentum, duntaxat quando a sanctis probisque ministrantibus datur, ac recipienda foret illa nimium severa sententia Donatistarum, *Quisquis peccator inter omnes homines fuerit, jus sibi baptismatis non usurpet:* quum omnes probi viri peccatores se fateantur, nec ipsi unquam audent Sacramenta petentibus ministrare, nec quisquam ab ullo homine peteret Sacramenta: quo argumento ita Augustinus vellicat Cresconium lib. 2. cap. XXV. III. num. 35. *Si ergo jam baptizatus es, vellem scire quem repereris, qui contra Joannem Apostolum diceret, Peccatum non habeo. Si enim, talem quemquam reperiri potuisti, quomodo baptizatus es ab eo, qui seipsum decipiebat, & in quo veritas non erat? Si autem qualiscumque humilitatis non immemor peccatorem se esse dicebat, quomodo sibi secundum tuam sententiam jus baptismatis usurpabat? Tu enim dixisti, tu etiam minime scribere timuisti, ut quisquis peccator inter homines fuerit, jus sibi baptismatis non usurpet.*



*pet . Si autem nondum baptizatus es , aut hanc vanissimam sententiam corrige , aut a quibus baptizeris angelos quære .* Hactenus dogma catholicum stabilivimus : diluamus modò hæreticas argutationes .

Oppones I. Si ad Scripturarum sanctarum oracula converteerimur animum , liquidò constabit scelerosos ministros pollucere sacra , eaque dispensandi auctoritatem amittere . Primò namque Ecclesiastes initio x. capitis inquit : *Musce morientes perdunt suavitatem unguenti* ; ministrantes itaque criminibus polluti , muscis utique comparandi , sacrorum chrismatum egregiam virtutem , & efficientiam sacramentum unctionum corrumpunt . II. Legimus Sapientiæ 1. 5. *Spiritus enim sanctus disciplina effugiet fictum* . Quomodo ergo Spiritus charismatum largitor operabitur in iis , qui , dum sacra peragunt , divinum ministerium latente crimine dehonestant ? III. In Ecclesiastici xxxiv. 4. scriptum est : *Ab immundo quid mundabitur ?* Et versu penultimo : *Qui baptizatur a mortuo , & iterum tangit eum , quid proficit lavatio ejus ?* Itaque nec mundat , nec baptizat quisquis mortuus est , atque immundus . IV. Ait Dominus per Jeremiam , xxxiii. 28. *Quid paleis ad triticum ?* Impii ergo , quoniam paleæ sunt , triticum , idest , Eucharistiam nequeunt consecrare . V. Testatur Aggæus cap. 11. 14. *contaminari quidquid tetigerit pollutus in anima* . Ideoque contaminantur Sacramenta , quæ tangit , ac tractat improbus ministrator . VI. *Si non potest arbor mala bonos fructus facere* , quemadmodum legitur Matth. vii. 18. quomodo malæ arbores , quomodo criminosi ministrantes , sacra , eorumque uberrimum fructum perficiunt ? VII. Ut habetur Joannis ix. 31. *Peccatores Deus non audit* ; & consequenter peccato inquinati nec sanctificant , nec Deum ad sanctificationis gratiam impertiendam ullatenus movent . VIII. Liquet ex eodem Evangelista præced. cap. versu 44. improbos , mendaces , invidos , *ex patre diabolo esse* ; Christus autem Ecclesiæ caput operatur duntaxat in membris suis : quare in scelestis nullam spiritalem actionem exercet . IX. Idem Joannes cap. xx. 22. narrat Dominum tradidisse Discipulis potestatem absolvendi a peccatis dicendo : *Accipite Spiritum sanctum , quorum remiseritis peccata , &c.* At grave aliquod scelus perpetrantes deperdunt cum justitiæ decore Spiritum sanctum . Itaque deperdunt quoque absolvendi a peccatis auctoritatem . Ex hisce Scripturæ locis Donatistæ inferebant sanctos tantum , probosque viros , qui sunt *juxta cor Domini* , (quales ipse spondit per Hieremiam , lxxv. 15.) esse verbi Dei , sacrorumque Mysteriorum ministros : a ceteris autem contaminari sacra , nec rem aliquam confici , nisi immundam atque profanam ; nil propterea efficere aut baptismum , aut sacram ordinationem ab impio collatam , & malorum Sacramenta a fidelibus rejicienda esse verbis Davidicis , Psalm. cxl. 5. *Oleum autem peccatoris non impinguet caput meum* .

To. VI.

T

Prin.

Principio adversus Donatistas, qui hæc objecerunt; possunt argumenta ista retorqueri, quum probarint baptismum, & sacras ordinationes Maximianistarum, quos in Bagaitana Synodo a communionem sua segregaverant. Deinde ad omnia ex Optato Milevitano, & Augustino, Donatistarum flagellis, hæc reponimus. Ideo Ecclesiasticis x. affirmatur muscas morientes perdere suavitatem unguenti, quia cum probi viri sint *Christi bonus odor*, teste Apostolo 2. ad Corinth. 11. 15. idest, per eos laudibus celebretur Dei nomen, *effusa oleo* in canticis comparatum; per impios Christiana religio afficitur dedecore, atque, ut Isaias ajebat 111. 5. *nomen Dei blasphematur*. Impii ergo exterminant olei suavitatem, scilicet bonum odorem; qui est *in optima fuma viventium*, non gratiæ præstantiam, quæ adinvenitur in Sacramentorum virtute. Hæc Augustinus lib. 2. contra Parm. cap. x. num. 22. S. Optatus lib. 111. num. 4. hunc locum de Sacramentis interpretatus respondet confici *Christum* per invocationem nominis Christi, quo suave fit, & quadammodo conditur: cum autem etiam apud nos, qui a Schismaticis existimamur sacrilegi, remaneat oleum cum tali invocatione, & sic a nobis servetur, quomodo ab illis dimittitur, frustra dici possumus muscæ corruptentes olei suavitatem. His addo loqui Ecclesiastem de fama, & gloria viri sapientis, quam modicum stultitiæ pestumdat. Quod sequitur, ab Augustino lib. 2. contra Epist. Parmen. cap. x. num. 21. primum contra adversarios ejaculatur. Donatistæ quippe impudentissimè dicebant, *tunc posse à malo baptizari quemquam, si lateat malitia baptizantis*. Et tamen, inquit Augustinus, *qui scitus est, tanta magis scitus est, quanto magis latet*. Quomodo ergo occulti mali apud Donatistas baptizare potuerunt? Deinde S. P. respondet deesse quidem Spiritum sanctum dantibus, ac fingentibus, sed non deesse acceptantibus & credentibus, illos culpare, istos mundare, effugere nempe iniquitatem ministrantium, & ineffabili efficacia potentiae suæ sanctificare suscipientes. Ad tertium habeto responsum istud. Ab illo baptizamur a mortuo, neque ab immundo. Ita Augustinus lib. 2. contra lit. Petilianæ cap. 111. num. 15. & lib. 2. contra Cresconium Donatistam. cap. 27. num. 33. Addit frequenti num. 34. non prodesse lavationem factam ab Hæretico, & a Schismatico baptizato, nisi transeat ad Corpus Christi, quod est Ecclesia Dei vivi. Adde Ecclesiasticum 2. loco agere de iis, qui iterum in eadem scelera prolabantur, & quibus nihil prodest expiatio præcedens; quemadmodum in lege adhuc censebatur immundus, qui post purgationem cadaver denuò contrectasset. Quartum, quod Donatistæ causam separationis suæ prætexebant, sic diluitur ab Augustino lib. 111. contra Epist. Parmen. cap. 111. num. 19.

Num.

*Numquid in agro dici potest, quid paleis ad triticum, quando eadem radice portantur? Nunquid in area, ubi pariter triturantur? Sed utique in horreo, quid paleis ad triticum? Quo exemplo Evangelicis parabolis comprobato demonstrat S. Pater Ecclesiam hujus temporis esse bonis, malisque permixtam. Similia Augustinus repetit in Breviculo Collat. cum Donatistis cap. VII. num. 10. Certum est Jeremiam sententiam illam protulisse, ut ipsa indicat lectio, *adversus eos, qui divinis oraculis sua somnia coaquabant*: nec fugit id Augustinum lib. IV. contra Cresconium cap. LXXXI. num. 93. Verum hæc ad unitatem potius Ecclesiæ, quàm ad præsentem disputationem. Ad proximum responderet S. Optatus lib. VI. num. 3. contaminata esse quæ tangit pollutus, *si solus sit tactus, & non interveniat invocatio nominis Dei; nam si sit invocatio nominis Dei, ipsa invocatio sanctificat & quod pollutum esse videbatur*. Augustinus autem in libro ad Donatistas post Collat. n. 31. inquit: *Spiritualem* (Aggæas) *prohibebat accessum, consensio nemque factorum*. Animadvertit Hieronymus in Aggæam Tom. III. pag. 1697. immundum in anima dictum, *qui corpus hominis mortui attingerat*, juxta legem Num. XIX. 22. Quod opponitur ex cap. VII. Matthæi facilem habet expeditionem, quum enim *malus verbum Dei predicat, & Dei Sacramentum ministrat, non de suo predicat, aut ministrat*; idest, non conficit Sacramenta tanquam arbor mala, sed tanquam Christi operarius: nec fructus baptizantium sunt baptizati, alioqui tot Optati pullulassent, quot baptizavit Optatus. Atque hæc est responsio Augustini lib. 2. contra Epist. Petiliani cap. VI. num. 13. Ad septimum idem Augustinus primum respondet, etiam verba impiorum exaudiri a Deo, quando ipsius instrumenta sunt, quemadmodum adimpleta fuere vaticinia Balaam, Num. XXIV. Deinde ait sententiam illam, *Peccatores Deus non audit*, esse hominis, *qui oculos corporis jam quidem restitutos habebat, sed ei oculi cordis nondum patebant*. Demonstrat postea, nunquam peccatorem ad bonam frugem rediturum, nisi prius a Domino exaudiat peccator. Vide lib. 2. contra Epist. Parmen. cap. VIII. num. 17. Diluitur eadem responsione objectatio proxima, non enim tanquam membrum Diaboli, sed tanquam minister Christi, Sacerdos & tingit, & absolvit, & consecrat. Ad IX. sunt qui per *Spiritum sanctum* accipiunt eo loci spiritale donum, ac potestatem remittendi peccata, ut Ammonius in Cat. Corderii pag. 459. nec non Theophylactus in Joannem pag. 459. Et quidem per Spiritum sanctum dari hominibus charismatum munera, & pleraque communia improbis, constat ex 1. ad Corinth. XI. 8. Augustinus Tract. CXXI. in Joannem. num. 4. ait utique per Spiritum sanctum remitti peccata, & peccata eorum retineri, qui ejusdem Spiritus non sunt participes; at inde non consequitur scelestos ministros non absolvere, quoniam non ipsi, sed Christus communicat dona Spiritus. Similia habet Cyrillus LXI. r.*

in Joannem pag. 1093. Tandem non sequitur, Christus elegit ministros sanctitate illos exornans, ut digne fungerentur commisso officio; igitur scelere inquinati non sunt ministri: aliud enim ad dignitatem pertinet, aliud ad potestatem: sanctitas adauget meritum ministrantium, potestas tribuit salutem fuscipientibus; atque, ut Augustinus scribit contra Cresconium lib. 1v. cap. 18. num. 21. *inter fidelem, perfidumque plurimum distat; non ad Sacramentum si hoc uterque habet, sed ad meritum*. Quo in loco etiam urget discrimen inter Primianum, & Felicianum, quorum alter appellatus in Synodo Donatistarum *was sordidum, famosi criminis reus, & habens sub labiis venereum aspidum*, ideoque maculosus, immundus, sordidus, postea cum Primiano sedit Episcopus, & quos baptizaverat, nunquam postea lotos, cum ceteris Donatistis in communione comprehendit. Ex quibus colliges debere sacrum ministrum esse secundum cor Dei, ne sacra tractet in sui perniciem, non autem ne Sacramentum suum careat efficientia, quandoquidem non in eo spem locat accedens ad sacra, sed in Domino; nec ille habet sacrorum mysteriorum potestatem, sed ministerium. Profecto verba Psalmistæ, *Oleum autem peccatoris, &c.* de blanda adulatione accipienda esse lectio ipsa declarat, viditque id perspicax Augustini ingenium lib. 2. contra Epist. Parmeniani cap. x. num. 22. lib. 2. contra lit. Petiliani cap. 103. num. 237. nec non Epist. 147. ad Proculejanum, nunc xxxiii. ubi narrat de homine, quem falsæ blanditiæ faciunt arrogantem, dici, *Crevit caput*. Vide Ecclesiastem vii. 6. Hieronymus in cap. 111. Aggæi pag. 1699. *oleum peccatoris* interpretatur dogmata hæreticorum, quæ illi de veteris, & novæ scripturæ testimoniis violenter exprimunt. Si *oleum* intelligas sacrum Chrisma; istud non est olcum peccatoris, sed Dei: de quo idem Psalmist. ps. 44. 8. *Unxit te Deus, Deus tuus, &c.* Adeas Milevitanum Præsulem lib. 1v. num. 7. pag. 76.

Opp. 2. Adversantur propositioni nostræ nonnulli Patres. I. S. Ambrosius lib. de Mysteriis cap. 1v. num. 23. inquit: *Non sanat baptismus perfidorum, non mundat, sed polluit*. II. Hieronymus in cap. 3. Sophoniæ pag. 1671. *Sacerdotes quoque qui Eucharistiæ serviunt, & sanguinem Domini populis ejus dividunt, impie agunt in legem Christi, putantes Eucharistiæ imprecantis facere verba, non vitam, & necessariam esse tantum solemnem orationem, & non Sacerdotum merita, de quibus dicitur: Et Sacerdos, in quo fuerit macula, non accedet offerre oblationes Domino*. III. Augustinus lib. 111. de Baptif. cap. 18. num. 23. de avaris Sacerdotibus inquit: *Tales tamen ipsius Cypriani temporibus baptizabant, quos Coepiscopos suos fuisse cum magno gemitu confitetur, & cum magna tolerantia mercede perpetitur. Remissam tamen peccatorum non dabant, quæ per orationes Sanctorum, idest, per columbæ gemitus datur. Non enim raptoribus & fœ-*  
nera-

neratoribus diceret Dominus, Si cui dimiseritis peccata, remittuntur illis, si cui tenueritis, tenebuntur. Foris quidem nec ligari aliquid potest, nec solvi, ubi non sit qui aut ligare possit, aut solvere: sed solvitur qui cum columba fecerit pacem, & ligatur qui cum columba non habet pacem, &c. Et lib. v. cap. 22. num. 30. Proinde, inquit, consentimus Cypriano, hereticos remissionem dare non posse, baptismum autem dare posse, quod quidem illis & dantibus & accipientibus valet ad perniciem, tanquam tanto munere Dei male utentibus: sicut etiam maligni & invidi, quos & intus esse ipse testatur, remissionem peccatorum dare non possunt, cum eos baptismum dare posse omnes fateamur. III. Innoc. I. ut habetur 1. q. 1. cap. Qui perfectionem, in Epist. 22. ad Episcopos Macedoniæ cap. 3. inquit: Qui perfectionem spiritus, quam acceperant, perdiderunt, non ejus dare plenitudinem possunt, (quæ maxime operatur in Ordinationibus) quam per suam perfidiam perderunt. IV. Pelagius Papa relatus a Gratiano cap. Schisma, xxiv. q. 1. inquit: Non est Christi corpus, quod schismaticus conficit, si veritate duce dirigimur.

Resp. ad 1. *Perfidorum* nomine intelligere Ambrosium eos, qui per hæresim a mystico Christi corpore sunt segregati, & qui nequeunt mundari, nisi per fidem sese ad obtinendam gratiam disponant: explicat enim ibidem baptismi virtutem comparatione piscinæ, in qua movebatur aqua propter incredulos; quod *Judeis signum erat, nobis fides*. Unde comparatione facta concludit: Ergo & illa piscina in figura, ut credas, quia in hunc fontem vis divina descendit. Significat ergo Ambrosius baptismum non prodesse iis, qui oblatum fidei lumen repudiant. Ad 2. liquet Hieronymum alludere ad etymon vocabuli *Eucharistia*, & significare quomodo Sacerdotes nefariam vitam agentes, non Deo gratias agant, sed sibi judicium, & damnationem arceffant; quemadmodum S. Doctor se explicat sententia deprompta ex Levit. xx. 1. 6. juxta Vers. lxx. Imo expresse ait ibidem Hieronymus istiusmodi Sacerdotes *servire Eucharistia, & sanguinem Domini populis ejus dividere*; quamvis dum sacra peragunt, non Deo placeant, sed ei potius insultent. Ad Augustinum responderi solet cum Estdio in 1v. dist. 1. §. 26. non pertractare de ministerio remittendi peccata per Sacramenta, sed de alio quodam peculiari remissionis modo, per Orationes sanctorum in Ecclesiæ communione: quæ responsio aptari potest quibusdam ex præcitatis verbis a toto orationis complexu divulsis; at non videtur argumentationem penitus enervare. Ceterum Augustinus Augustinum diserte explicat. Docet enim lib. 2. adversus Cresconium, cap. xxviii. num. 34. *Nihil prodesse homini baptismum Christi, si apud hereticos, vel schismaticos baptizetur, eis tribuens baptismum quo baptizatur, sed tunc eis prodesse incipere, cum transsit ad Corpus Christi, quod est Ecclesia Dei vivi*. Et lib. vi. de Baptis-

ptismo cap. iv. num. 6. ait malum, *sicut perniciose habet* (baptismum) *ita etiam perniciosè tradere, non quia tale aliquid tradit, nec quia talis tradit, sed quia TALIS tradit*. Ita legendum, non *talis*, uti legunt Lovanienſes, reſuſtantibus omnibus editis, & MSS. obſervarunt Maurini Patres. Et rectè, quis enim adeo pinguis Minervæ eſt, ut ſcriptum cenſeat, *Malus pernicioſe tradit baptismum, non quia talis tradit, ſed quia talis tradit*, ubi expenderit quæ ſequuntur? *Nam cum malus tradit bono, ideſt, in unitatis vinculo, veraci converſione mutato, inter bonum Sacramentum quod traditur, & bonum fidelem cui traditur, tradentis malitia non ſeparat*. Itaque Auguſtinus lib. 111. cap. 18. ait a ſchiſmaticis, hæreticis, maliſque miniſtris remiſſam non dari, etiamſi detur baptiſmus, ſi ad columbæ pacem, ideſt, ad unitatem Eccleſiæ non pertineant illi, quibus datur, quoniam remiſſio peccatorum *per columbæ gemitus datur, quicunque baptizet* (ſive bonus, ſive malus) *ſi ad ejus pacem illi pertinent, quibus datur*. Ait quoque non ſolvi peccata ejus, *qui cum columba non habet pacem*, ideſt, non tenet unitatem Eccleſiæ; quoniam *ſolvitur qui cum columba fecerit pacem, & ligatur qui cum columba non habet pacem*. Valet ergo juxta Auguſtinum Sacramentum a quocunque miniſtro collatum, tametſi non tribuat remiſſam iis, qui nolunt Chriſto, & Eccleſiæ adhærere. Atque hæc reſponſio adèò eſt perſpicua, & certa, ut ſi præcitatum caput xvi. perlegas, de ea hæſitare non valeas. Excipitur eadem reſponſione teſtimonium alterum, quo S. P. affirmat baptizari in animarum ſuarum perniciem, qui male abutuntur Dei munere, & ſoventes ſchiſmata *fratres a quibus diliguntur oderunt, & in ipſo odio baptizantur; quibus tamen poſtea correſtiſ non ruruſus baptiſmus datur, ſed ipſa venia, quam tunc accipere non meruerunt, in vera converſione præſtatur*. Hæc proxima periodo Auguſtinus. Ad Innocentium reſpondet Eſtius, Sacramenta extra Eccleſiam non prodeſſe ad obtinendam gratiam Spiritus ſancti: addunt alii, ob contemptum, ſi ſuſcipiantur citra neceſſitatem, aut poſſint recipi a miniſtris legitimis. Eam ob rem Magnus Gregorius lib. 111. Moralium cap. xxxi. Tom. 2. pag. 345. laudat Hermenegildum, qui percipere noluit e manu Ariani Epilcopi *ſacrilega conſecrationis communionem*. Sapienter hæc dicta ſunt: ſed in cap. *Qui perfectiorem voce plenitudinis*, intelligenda eſt tantùm executio Ordinis; nam ordinatus ab Epilcopo hæretico recipit quidem Ordinis characterem, ſed ejuſdem Ordinis executione privatur. Ita in hunc Canonem. ICC. In cap. *Schiſma*, corpus Chriſti non appellatur Euchariliæ Sacramentum, ſed Eccleſia, additur ſiquidem è veſtigio: *Nec enim diſiſam eſſe Chriſtum poterit quiſquam ſine Apoſtoli reprobatione conſingere. Unam, ut ſæpe dictum eſt, quæ Chriſti Corpus eſt, conſtat eſſe Eccleſiam: quæ in duo, vel in plura dividi non poteſt*. Si-

*mal enim cum ab ea quisque recesserit, esse destitit in Ecclesia.*

Opp. 3. Qui sedo simoniæ flagitio ad sacram Ordinationem promoveantur, nullatenus recipiunt Ordinis characterem. Ergo irrita sunt & invalida Sacramenta quædam a probroso ministro consecrata. Ant. probatur ex Canone v. Concilii V. Romani S. Pontificis Gregorii VII. *Ordinationes, quæ interveniente pretio, vel precibus, vel obsequio alicujus personæ ea intentione impenso, vel quæ non communi consensu Cleri, & populi, secundum canonicas sanctiones fiunt, & ab his, ad quos consecratio pertinet non comprobantur, infirmas & irritas esse dijudicamus.* Vide Lupum Tom. vi. pag. 71. Extremam quoque unctionem simoniacè collatam esse nullam docuit Ugolinus. de Simonia cap. 17. §. 1. num. 4.

Resp. Simoniacos ex antiqua & nova Ecclesiæ disciplina plecti condignis pœnis, quarum prima est ab Ordinis executione suspensio: eamdemque pœnam confirmarunt Martinus V. scfs. penult. Concilii Constant. Paulus II. in Extrav. commun. cap. *Cum detestabile*, alique Pontifices. Consequuntur aliæ pœnæ merito inflictæ, depositio ab ordine, excommunicatio, debitum restitutionis, exilium, vel carceri mancipatio, & infamia dedecusque perpetuum; quæ omnia commemorant Canones. a Gratiano collecti t. q. 1. & Extra. 1. de *Simonia*, Theologi omnes, sacrorumque Canonum Expositores. At validas esse Simoniacas ordinationes, quantum ad substantiam Sacramenti attingit, inde constat, quod gratis a Simoniacis ordinati, non tam *causura justitiæ, quam intuitu misericordiæ in acceptis Ordinibus permanere*, anno 1059. ante Gregorium VII. permiserat in Romano Concilio Nicolaus II. Tom. ix. Concil. pag. 1100. Itaque Gregorius declaravit ordinationes a Simoniacis factas *infirmas, & irritas*, quantum ad executionem Ordinis, non quantum ad substantiam. Verum tamen est, quod Theologi complures, animadvertentes quàm vehementer simoniæ crimen sacri canones infestentur, Gregorii VII. ætate scripserunt simoniacorum Sacerdotum sacrificia, & Sacramenta esse irrita; quam sententiam amplexus est in libro adversus Guibertum Antipapam Episcopus Lucensis Anselmus, adversantibus tamen permultis, & utrinque Scholasticis disceptantibus, donec universa Ecclesia veritatem a D. Thoma invictè propugnatam, ut ibidem docet Lupus, admisit. Quare Gregorius opinionem tunc probabilem minime definiens, & acerrime simoniacos, & intrusos compescens, simoniacas Ordinationes *infirmas & irritas* declaravit, haud exprimens. an quoad substantiam, an quoad solam executionem id esset accipendum; dummodo gradu, ad quem tanta impietate conscenderant, juxta Ecclesiasticas sanctiones dejecterentur simoniacè promoti, & reprimeretur perniciose labis eluvio. Ugolinus nullam appellavit extremam unctionem a Simoniaco receptam, quatenus caret effectu, ut in-

ut inquit Suarez de Simonia cap. 57. num. 4. & Gabalinus Q. xxiii. Confess. 1. pag. 431.

Opp. 4. Juxta pervulgatum adagium, *Nemo dat quod non habet*. Impii Sacerdotes non habent gratiam. Hanc itaque conferre nequeunt, Rursus Sacramentum est actio ministri. Igitur si actio sacrilega & immunda est; Sacramentum erit immundum. Insuper mali non habent jus administrandi Sacramenta; non ergo ratum est quod faciunt.

Resp. ad 1. dist. m. Sacerdotes impii non habent gratiam in se permanentem, concedo: non habent gratiam annexam signo sensibili, & divinitus instituto, nego. Aut dist. majorem, nemo dat quod non habet, si agat cum potestate primaria & proprio nomine, concedo: si agat ministerio duntaxat, & in nomine alterius, nego. Nonne medicus, quamvis infirmus, confert ægroto sanitatem, si illi porrigat efficax phar-macum? Nonne famulus reddens debitori, Domino committente, chirographum remittit debitum? S. Optatus ad proloquium illud inculcatum a Donatistis respondet lib. v. num. 7. p. 85. *Vox est de vico collecta, non de libro lecta. Hac verba in lege scripta non sunt: nam si (ut vultis) homo dat, Deus vacat.* Ad secundum dicimus actionem ministri improbi esse malam in genere moris, non in genere signi a Christo instituti, in quo propriè ratio Sacramenti consistit. Ad ultimum respondemus cum Elio sæpenumero subsistere quod sit ab illis, qui non habent jus faciendi, ut matrimonium contractum ab eo, qui habet simplex continentie votum: quare Augustinus lib. v. de baptismo cap. xv. num. 19. ait: *Et si jus baptizandi non habuit, tamen Christi est quod dedit, & ille Christi est qui accepit. Multa enim contra jus dantur, nec tamen ideo vel nulla, vel non data dicuntur.* Hinc crucitur responsio altera; mali non habent jus administrandi Sacramenta, & administrando dant quod suum est, nego: quod Christi est, concedo.

PROPOSITIO II. Sacerdos lethalis culpæ sibi conscius, etsi validè Sacramenta conficiat, impiè tamen, & illicitè eadem conficit, atque administrat: quod de aliis sacrorum ministris, præsertim Diaconis, dicendum est, necnon probabiliter etiam de verbi divini concionatoribus.

Probatur prima pars literarum sanctarum testimoniis: legimus quippe Exodi xix. 22. *Sacerdotes qui accedunt ad Dominum sanctificentur, ne percussat eos.* Levit. xxiii. 3. *In quo est immunditia, peribit coram Domino.* Ps. c. 6. *Ambulans in via immaculata, hic mihi ministrabat.* Is. lxi. 11. *Mundamini qui fertis vasa Domini.* Apost. 1. ad Tim. iii. 10. *Probentur primo, & sic ministrent nullum crimen habentes.* Ad Titum 1. 7. *Oportet enim Episcopum sine crimine esse, sicut Dei dispensatorem.* Probatur 2. Catholicæ Ecclesiæ monitis ac definitionibus, Etenim Tridentina Synodus sess. xlii, cap. 7. produ-

ctis;



Etis verbis Apostoli ex 1. ad Corinth. xi. 28. *Probet autem, &c.* ex Ecclesiastica consuetudine declarat, *eam probationem necessariam esse, ut nullus sibi conscius mortalis peccati, quantumvis sibi contritus videatur, absque præmissa Sacramentali confessione ad sacram Euchari- stiam accedere debeat: quod a Christianis omnibus, etiam ab iis Sacerdotibus, quibus ex officio incubuerit celebrare, hac sancta Synodus perpetuo servandum esse decrevit, modo non desit illis copia confessio- ris; quod si necessitate urgente Sacerdos absque prævia confessione ce- lebraverit, quamprimum confiteatur.* Idem præscribitur de Consecr. dist. 2. cap. *Sicut Judas*, & cap. *Quotidie*, nec non cap. *Qui scele- rate*, &c. Catechismus Rom. p. 2. cap. 1. num. 17. ait *Sacramenta impure ministrantibus æternam perniciem & mortem asserre*: & Ri- tuale Romanum §. 1. *Impure*, inquit, & *indigne ea ministrantes in æternæ mortis reatum incurrunt.* Probatur tertio auctoritate Sancto- rum. Augustinus lib. xxxi. contra Faustum cap. 14. *Si quis (ait) Sacramenta novi Testamenti fuerit ausus sacrilega temeritate violare, penas divinitus constitutas rectissimo iudicio perfolvet*: & lib. 2. contra Epist. Parmen. cap. x. num. 22. *Omnia Sacramenta cum obsist indigne ministrantibus, profunt tamen per eos digne sumentibus.* Magnus Gre- gorius in Epistola ad Patriarchas xxiv. nunc xxv. Tom. 2. pag. 508. *Necesse est, ut esse munda studeat manus, quæ diluere sordes curat, ne tacta quæque deterius inquinet, si sordida ipsi insequens lutum tenet. Scriptum namque est, Mundamini qui fertis vasa Domini.* Insuper probatur ex Romanorum Pontificum, Leonis IX. Gregorii VII. & Nicolai II. decretis, quibus provide sancitum est, ut presbyteri habentes concubinam, aut superinductam mulierem eliminentur ab Ecclesiis, excant de sacrario, missas celebrare non audeant, nec po- pulus recipiat ullo modo eorum officia; quæ decreta recenset, & vindicat in disert. de Latin. Episc. & Cler. contin. cap. vii. Eximius Lupus. Postremo probatur ratione deprompta ex Augustino lib. xi. contra Faustum cap. 11. *Contemptus enim Sacramentorum facit sacrile- gos; quippe violantur sacra per irreverentiam*, ut rectè probat S. Thomas 2. 2. q. 99. art. 2. exemplo perforantis regale indumen- tum, qui censetur agere adversus regem. Atqui scelestus ministrator contemnit Sacramenta. Igitur est sacrilegus: & quantum est in se, Christi vestimenta confodiendo iterum gloriæ Dominum affigit cruci.

Hæc argumenta valent de omnibus ministris etiam Sacerdote in- ferioribus, quamquam nonnulli eam adhibent distinctionem, ut di- cant se novo scelere contaminare, qui pro administrandis Sacramentis speciali indigent consecratione: secus si administrent Sacramentum, quod consecrationem non exigit peculiarem, ut dum laici urgente- necesse baptizant. Et quidem universim Tridentina Synodus cita- to cap. 7. definit, *Non decet ad sacras ullas functiones quempiam ac-*  
*To. VI.*

*cedere nisi sanctis.* Et S. Thomas in iv. dist. 24. q. 1. art. 3. in solut. quæst. 5. haud hæsitante pronuntiat peccare mortaliter, quisquis *quod sibi competit ex ordine, facit indignè.* Hinc rigidiore quidam cum Juenin. q. v. cap. 3. art. 2. inferunt peccare lethali ter etiam inferiores ministros minoribus ordinibus initiatos, dum in peccato mortali solemnè ritu officiis funguntur suis, supposito quod etiam minores ordines sint Sacramenta, quod apud Theologos controvertitur. S. enim Thomas, inquit Juenin, dum utitur termino illo universali, *Quicumque homo quod sibi competit ex ordine facit indignè*, de singulis Ordinibus intelligitur. Verum licet sedulo curandum sit, ut quisque sanctè & inculpate proprio ministerio fungatur; attamen quum officia, quæ præstant inferiores ministri, sint imperfecta, nec tam propè accedant ad Eucharistiam, neque excedant Sacramentalia, quæ fiunt citra peccati mortalis culpam, imò aliquando exerceantur a laicis; arbitror functiones minorum Ordinum, nisi adsit summa irreverentia, & contemptus, etiam in statu peccati mortalis absque lethali culpa exerceri. Quod præter Toletum, Sylvium, ac Tractatores Moralium, tenent quoque Merbesius in Summa III. parte q. xv. ref. 3. Farvacques quæst. VII. §. 3. alique ad sæviora placita declinantes. De Subdiaconis gravior est controversia, de qua interim judicium suspendimus. At Diaconi, sententia quidem nostra, si exerceant indignè officium ministerii sui, sacrilegio innectantur: quippe proxime Sacerdoti inserviunt, & de his Augustinus Epist. 148. nunc 21. num. 1. scribit, *Nihil apud Deum miserius, & tristius, & damnabilius*, quam si ab illis, aut ab Episcopis ac Presbyteris, *perfunctoriè atque adulatoriè res agatur*: additque nihil in hac vita esse *difficilius, laboriosius, periculosius, Episcopi, aut Presbyteri, aut Diaconi officio.*

Gravius est de Sacerdote concionante dissidium. Quod reus fiat sacrilegii, si Dei verbum prædicet conscientia impurà, tenent eruditi Theologi Merbesius, Farvacques, & Juenin loco paullo supra citato, nec non Cajetanus in 3. p. S. Thomæ quæst. 64. ad 1. & ex recentioribus Tournely q. VII. art. 3. concl. 2. Frassen dis. Proem. art. 3. q. 2. Boucat tom. XIII. pag. 460. prolixius autem omnibus Andreas de Saussay in Panoplia Sacerdotali p. 2. lib. IV. de munere prædicandi, art. 2. Nititur hæc opinio primum sacrarum literarum auctoritati: legitur enim in Ps. XLIX. 16. *Peccatori autem dixit Deus: Quare tu enarras justitias meas, & assumis testamentum meum per os tuum?* Et Matth. XXI. Christus insectans Phariseorum perversitatem versu 3. inquit: *Dicunt enim, & non faciunt; alligant enim onera gravia, &c.* Lucæ etiam IV. 23. extat sacrum proloquium, *Medice, cura teipsum*: atque de iis, qui alios corripunt, nec se emendant, Matt. VII. 13. *Quid autem vides fæstucam in oculo fratris tui, & tra-*

*trabem in oculo tuo non vides? Quadrat etiam in concionatorem illud Apostoli ad Rom. 11. 1. In quo judicas alterum teipsum condemnas, & versu 21. Qui ergo alium doces, teipsum non doces: qui predicas non furandum, furaris, qui dicis non mæchandam, mæcharis: qui abominaris idola, sacrilegium facis. Facit insuper ad hanc rem quod scribit Augustinus lib. 111. contra lit. Petiliani cap. lvi. num. 68. Forma Sacramenti datur per baptismum, forma justitiæ per Evangelium, ubi videtur non minus in baptizante, quam in concionante requirere probitatem. Atque Gregorius Magnus protulit in Pastoralis præclaram sententiam istam: *Neesse est, ejus vita despicitur, ejus prædicatio contemnatur*. Id verò minimè fugit Ethnicum Philosophum scribentem Eth. x. *Dum sermones moribus dissonant, contemnuntur, & veritatem interimunt*. Addit Cajetanus rationem, quoniam sacræ conciones inter opera consecrata computantur, ac sub specie actuum Ordinis comprehenduntur. Videtur esse eadem sententia D. Thomæ in 1v. dist. 19. q. 1. art. 2. in solut. quæst. 2. ad 4. & lect. 1. in cap. 6. epist. 2. ad Corinth.*

Ut tamen hæc sententia sit probabilis, vera non est, nisi concionator aut notorio crimine pollutus sit; aut si est in peccato occulto, nullatenus se ad humiliationem & penitentiam excitet: sed vel in aliis dedecore vitæ suæ, vel in se simulatione & hypocrisi impediat fructum sanctæ prædicationis. Ceterum si lateat scelus, nec illud dum alios arguit, in se concionator parvipendat; quamvis gratiam remissionis nondum obtinuerit, licitè habet conciones sacras; neque in hac hypothesi per se agit ne verbum Dei fructum afferat. Neque enim tunc despicit oculis suis infixam trabem, aut audacter assumit testamentum Domini per os suum cum plebis scandalo, animarumque perniciem. At si publico vicio notetur, negligatque pro sui medela remedium, quod aliis suppeditat; tunc graviter illum delinquere, incunctanter pronuntio. Nego autem ordini presbyteratus adjunctum *jure divino* munus prædicandi, quod visum Cajetano: cum id incumbat Episcopis, ceteris autem non vi ordinis, & consecrationis, sed vel ex Episcopi licentia, & mandato, vel ex adjuncto officio pastoris, animarumque regimine. Atque hac distinctione eo libentius utor, quod illam noverim a probatis Theologis adhiberi, etiam ab insigni Thomista Dominico Soto in 1v. dist. 1. quæst. v. art. 6. Du Hamelio cap. v. num. 8. ceterisque quamplurimis.



## CAPUT XV.

*Solvuntur nonnullæ quæstiones circa improbos  
Sacramentorum ministros.*

**Q**Uæritur hoc loco, an fas sit a facinoroso ministro petere Sacramenta. Hanc autem quæstionem perspicuitatis gratia ad hunc modum distinguimus. Principio improbum & malum non dicimus, quem certis indiciis talem esse nobis non constat: sed si quem novimus prolapsum in flagitium aliquod, credimus dum sacra ministrat, patratum crimen Sacramentali confessione, vel contritione vehementi expiasse. A tali ergo ministro Sacramenta suscipere minimè dubitamus. Si autem certo nobis constet vita Sacerdotis facinorosa, dicimus observandum esse, an Sacramenta, ad quæ cogitamus accedere, sint necessitatis extremæ, qualia sunt poenitentia & baptismus in proximo mortis periculo, an verò nulla sit necessitas istiusmodi: & insuper an Sacerdos, ad quem confugimus, sit Parochus, cui jure incumbat regimen animarum, an Sacerdos solutus a tali munere; postremo an Sacerdos ille sit excommunicationis vinculo innodatus, an degat in sinu Ecclesiæ, an se a cœtu fidelium hæresi, aut schismate segregarit.

Itaque priori loco affirmamus, nefas esse extra necessitatis casum Sacramenta petere ab impio Sacerdote, qui non sit parochus, aut gerat vices ejusdem, ac multo minus ab excommunicato, aut ab hæretico, sive schismatico. Probatur I. quoniam nemo debet esse offendiculo alteri, cique præbere occasionem patrandi sacrilegium, nec etiam volenti, atque in seclum prono absque causa subministrare materiam. *Digni sunt enim morte*, inquit Apostolus ad Rom. 1. 32. *non solum qui ea faciunt, sed etiam qui consentiunt facientibus*. II. De Simoniaco, & in crimine fornicationis-jacentibus scripsit Gregorius VII. epist. 45. lib. 2. ad Rodolphum & Bertholdum, *Vos officium eorum nullatenus recipiatis*: quod, ut diximus præced. capite, aliis Ecclesiasticis definitionibus roboratum est. Nec audienda sunt quæ de Gregorio ob istiusmodi decreta scribit ad annum 1074. Sigebertus in Chronico, quum is plus æquo sectatus fuerit partes Henrici IV. hostis in divum Gregorium iniquissimi. III. De hæreticis scripserat olim Innoc. I. epist. xli. cap. 3. *Dicimus ab hæreticis ordinatos, vulneratum per illam manuum impositionem habere caput*. Rationem vero tradidit Augustinus, quoniam quum hæretici non amplius sint in domo, idest in Ecclesia, *nec utiliter Sacramenta habent, nec utiliter conferunt; quæ ut utilia sint, ab hæresi, vel schismate recedendum est*, & il-

& illi domui cobarendum. Vide lib. v. de Baptismo cap. lxi. num. 100. Adde Ecclesiam esse congregationem fidelium eadem sacramenta participantium: ideoque sacramenta extra necessitatem cum hæreticis participare idem prorsus est, ac hæresim profiteri. IV. De schismaticis aperta est sententia ejusdem Augustini scribentis lib. i. de Baptif. cap. 2. num. 3. *Si quis autem cum possit in ipsa catholica accipere, per aliquam mentis perversitatem eligit in schismate baptizari: etiam si postea venire ad catholicam cogitat, quia certus est ibi prodesse sacramentum, quod alibi accipi quidem potest, prodesse autem non potest; proculdubio perversus & iniquus est; & tanto perniciosus, quanto scientius.*

## I I.

Deinde asserimus in casu necessitatis, licitè a quocunque ministro, etiam excommunicato & hæretico recipi sacramenta Baptismatis, & Pœnitentiæ. Probatur i. ex decreto Unionis Eugenii IV. tom. xlii. Concil. pag. 535. ubi hæc leguntur: *In causa autem necessitatis non solum Sacerdos, vel Diaconus, sed etiam laicus, vel mulier, imò etiam paganus & hæreticus baptizare potest, dummodo &c.* II. Tridentinum Concilium sess. xiv. cap. 7. habet: *In Ecclesia Dei custoditum semper fuit, ut nulla sit reservatio in articulo mortis, atque ideo omnes Sacerdotes quoslibet pœnitentes a quibuscumque casibus & censuris absolvere possunt.* III. Augustinus posteaquam lib. vii. de Bapt. cap. 52. scriperat inutiliter extra Ecclesiam suscipi sacramenta, excipit necessitatis casum, dicens: *Nisi forte accipiendi necessitas urgeat, & accipientis animus ab unitatis vinculo non recedat.* Diserte etiam libro 2. cap. 2. *Nam si quem forte coegerit extrema necessitas, ubi catholicum per quem accipiat, non invenerit, & in animo pacè catholica custodita per aliquem extra unitatem catholicam positum acceperit, quod erat in ipsa catholica unitate accepturus; si statim etiam de hac vita emigraverit, non eum nisi catholicum deputamus.* IV. Suffragatur manifesta ratio. Fidelis quippe non debet privari remedio summopere necessario ob ministrorum improbitatem; neque cedere debet in detrimentum suscipientium, quod est tantummodo pœna improborum ministrantium.

## I I I.

Tertio loco dicimus licitè a proprio Parocho, quantumvis flagitioso, dummodo toleratus sit, Sacramenta peti, ac recipi. Probatur primo, quoniam quisque utitur jure suo, non inducit alterum in peccatum. Dum vero quis petit Sacramenta a Parocho, utitur jure suo. Igitur non inducit ipsum Parochum ad peccatum. Valet hoc argumentum, si nullus alius minister commode haberi queat. Confirmant probationem istam Theologi variis exemplis, v. g. creditoris, qui pecuniam suam licite judicio repetit, tametsi sciat debitorem per-

jera-

jeraturum; pauperis, qui licite petit ab avaro pecuniam, quamvis non ignoret sibi cum usuræ onere commodandam: & ejus, qui gravi impellente causa exigit juramentum ab infideli, quem novit falsa numina invocaturum in testes. II. Probatur ex cap. *Sciscitantibus*, xv. q. 8. ubi Nicolaus ad consulta Bulgarorum cap. 71. respondet: *Idcirco ab eo* (idest presbytero in adulterio deprehenso) *usquequo judicio Episcoporum reprobetur, communio percipienda est.* Et infra, *Sumite ergo intrepidi ab omni Sacerdote Christi mysteria.* Idem habetur cap. *Vestra devotio*, Extra. de cohabitatione Clericorum, & mul. Vide & constitutionem Mart. V. *Ad evitanda scandala*, innovatam etiam a Concilio Basileensi sess. xx. 117. S. P. Augustinus præcit. cap. 211. libri vii. de Baptismo inquit: *Illi vero qui sic sunt in magna domo, tamquam vasa in contumeliam, & inutiliter habent baptismum, & se imitantibus inutiliter tradunt; illi porro ab eis utiliter accipiunt, qui non ipsi corde atque moribus, sed sanctæ domus copulantur.* Cum igitur ministri mali sint in sancta domo, & possint licite deponentes malitiam Sacramenta administrare, ac si Parochi sint, ad hoc munere suo teneantur, cur ab his Sacramenta petere non potest quisquis jus habet eadem petendi?

## I V.

Insuper affirmamus etiam a ministro concubinario imo, & excommunicato a jure, si justa adsit ratio, licite suscipi Sacramenta, quotiescunque sententia a Judice denunciata & publicata non constiterit ei sacrorum mysteriorum inhiberi dispensationem. I. Quoniam laudato cap. *Vestra devotio*, Lucius III. controversiam hanc dirimens, inquit: *Ceterum aliud crimen est notorium, aliud occultum. Notorium definitur, de quo presbyter canonice condemnatur: occultum quod adhuc ab Ecclesia toleratur. Item aliud est a talium officiis abstinere, ut peccandi licentia ceteris auferatur, & hujusmodi ad penitentiam fructum trahantur; atque aliud, si tanquam falsa in fornicatione jacentium talia mysteria respuantur. Sine dubitatione itaque teneatis, quod a clericis, & presbyteris, quamdiu ab Ecclesia tolerantur, nec est crimen evidens, licite audiuntur divina officia, & alia recipiunt Ecclesiastica Sacramenta.* II. De excommunicatis in prælaudata Constit. Martini V. definitur, nemini Christianifidelium ab eorum communionem, & Sacramentorum administrationem, vel receptionem abstinendum, *nisi censura, vel sententia fuerit facta contra personam, Collegium, Universitatem, Ecclesiam, Communitatem, vel locum certum, aut certam personam, a judice publicata, vel denunciata specialiter expressè.* Excipit Summus Pontifex sacrilegam manuum injectionem in clericum, *quæ nulla possit tergiversatione celari, nec aliquo suffragio excusari.* III. Idem constat ex cap. *Sciscitantibus*, de quo supra, ut liquet ex illa particula, *usquequo judicio Episcoporum reprobetur.*

V. Affe-

V.

Afferimus denique casum necessitatis, in quo fas est a quolibet ministro ab Ecclesia segregato sacramenta suscipere, esse proximum periculum mortis, nec alia Sacramenta licite in eo casu ab hæreticis peti, aut recipi, præter duo summopere necessaria, baptismum, & pœnitentiam. Pars prima traditur ab Augustino lib. vi. de Baptismo cap. v. num. 7. ubi quærens quando baptismus salubriter accipiatur a separatis, inquit, *aliqua necessitate mortis argenti*. Si tamen loquamur de ministro ab Ecclesia tolerato, sufficit quælibet necessitas, quæ censeatur gravis, ut constat ex præcedentibus, docentque cum Suarezio in 3. p. q. 65. art. 1. disp. xvi. 11. sect. 1. Theologi complures: cuiusmodi necessitas est E. G. in Paschate recipiendi Eucharistiam, cum alius Sacerdos probus non adsit, qui spiritualia subsidia populo exhibeat. Altera pars constat, quoniam sine aliis Sacramentis possumus e vita discedere absque ullo æternæ salutis dispendio. Hinc diximus supra lib. 3. Dialog. cap. 31. laudari a Magno Gregorio Sanctum Hermenegildum, qui accipere noluit ab Ariano Episcopo sacrilegè consecratam Eucharistiam. Pari constantia Moyfès Monachus recusavit manuum impositionem a Lucio Episcopo Ariano, ut narrat Sozomenus lib. vi. H. Ec. cap. 38. Socrates libro iv. cap. 29. ac Theodoretus lib. iv. cap. 15. Idem de Antiocho nepote Eusebii Samosatensis, qui renuit consecrari ab Arianorum Antistite Joviniano, scribit cit. lib. iv. cap. 15. Cyrensis Episcopus Theodoretus.

At non posse a quocunque ministro improbo, etiam parochò, & in casu necessitatis, peti, aut recipi Sacramenta, suadere videntur objectiones istiusmodi. Prima est: Qui a tali Sacramenta petit, illi est scandalo, eique præbet spiritualis ruinæ occasionem: ac propterea lædit caritatem. Afficit quoque gravi injuria Sacramentum, quod finit irreverenter, manibusque sacrilegis contrectari. Consimilis est quæ sequitur: Est impium & illicitum malo alterius cooperari, ut initio diximus cum Apostolo. Cooperatur autem ministrantis sacrilegio, qui sumit ab ejus manibus divina symbola. Tertia parum abmillis: Qui petit Sacramenta a facinoroso, ipsum inducit in peccatum. Id verò scelestissimum est, ac iniquissimum. Quarta: Pro vita temporali proximorum tenemur aliquando vacare ab operibus pietatis, V. G. sacrum omittere, ut non deferamus periclitantem infirmum. Igitur tenemur multo magis a Sacramentis abstinere, quamvis id fieret cum propriæ utilitatis dispendio, ut avertamus spirituale damnum a sacris ministris. Proxima ejusdemque generis: Spiritale bonum ceterorum propriæ utilitati præferendum est. Postrema: Eadem est parochi, & alterius sacrilegi ministri ratio, præsertim si paratus sit ad ministrandum, & quod ille agit ex officio, iste sponte exequatur; utrobique enim sacer minister sacrilega functione polluitur.

tur. Si ergo nefas est Sacramenta recipere extra necessitatis casum a facinoroso Sacerdote non parochio, ea neque a parochio sceleribus contaminato erunt suscipienda.

Resp. ad 1. scandalum, & occasionem spiritualis ruinæ non dari a petente Sacramenta, qui utitur jure suo, si petat a parochio; sed esse scandalum ab ipso acceptum, qui voluntaria perversitate sancta mysteria indigne contrectat. Quotiescunque enim aliquis æquum postulat, rei autem, quam petit annexum est crimen non suapte natura, sed ex voluntaria malitia alterius, non est scandalum impie oblatum, sed perversè acceptum; ut constat productis exemplis eorum, qui ab iniquo sceleratore flagitant urgente causa pecuniam, aut juramentum exigunt ab infideli. Petunt enim quod suapte natura æquum est, & habent jus petendi: crimen verò conjunctum actioni opus est alterius inique reddentis quod juste petitur. Ob eam rem qui utitur jure suo non lædit caritatem, non cooperatur per se & directe alterius culpæ, nec ministrantem in peccatum inducit. Atque his diluitur etiam secunda & tertia objectio. At ad quartam dicimus latum esse discrimen inter improbum ministrum, & hominem ægrotantem; ille enim voluntate sua improbus est, hic autem succumbit naturali imbecillitati: ille habet in suo arbitrio delinquentis animi medicinam, iste quærit ab altero ægrotantis corporis adjumenta: illius denique morbus malitia est, hujus autem naturalis conditio. Ad quintam eadem, ac ad primam, valet responso: siquidem spirituale damnum nullatenus intenditur a petente spiritualia subsidia; & si quid labis est in horum dispensatione, id pendet a ministrantis malitia. Ad postremam dicimus Parochum teneri ex officio ad Sacramenta gregi suo ministranda, & ab illo hæc jure peti; quod non tenet de Sacerdotibus aliis. Si tamen hi parati sint ad administrationem Sacramentorum, ad quam ex officio non adstringuntur, licet ab his Sacramenta recipi, scribunt nonnulli cum Hadriano quæst. 3. de Baptismo, quoniam tunc recipiens non inducit petendo ad sacrilegam actionem, sed ad hanc improbi Sacerdotes sese perversa voluntate determinant; ut in exemplis allatis. Verum eadem exempla, lex charitatis, & exhibenda sacris mysteriis reverentia postulant, ut si adsint ministri alii, nec urgeat necessitas, etiamsi ministri improbi præstò sint, utamur ministerio aliorum; ut docent Cajetanus, Soto, Suarez, & alii, quibus subscribimus.

## C A P U T XVI.

### *De intentione Ministri.*

**H**Aud levem, nec parvi momenti disputationem aggredimur, de necessariis in Sacramentis conficiendis ministrantium intentione: pro-



probitatis namque defectus reddit eos tantum sacrilegos; at si intentio desit, nullum, irritumque redditur Sacramentum. Neque cum hæreticis solis ineunda est disceptatio; verum etiam cum Orthodoxis nonnullis eruditionis ornatu, nominisque celebritate conspicuis, domesticis quoque, nobisque etiam singulari benevolentia conjunctis: at veritatis amor inter probos, honestosque in ipso opinionum conflictu non dissidia parit, sed vinculo tenaciori constringit necessitudinem. Exponendum est autem primò quid sit intentio, tum discrepantes sententiæ recitandæ sunt, pugnandum postea adversus heterodoxos, demum cum adversariis reliquis congregiendum.

*Intentionis* nomine nihil aliud hoc loco intelligimus, nisi voluntatis propositum, ac deliberationem; qua rem aliquam peragere volumus. Quamvis hæc deliberatio, utpote ex animo proficiscens, semper interior sit; eam tamen ob externam actionem, qua se prodit, *externam* aliquando appellamus. Externa hæc intentio forisfectus per actionem manifestata, aut sincera est, & tunc quod opus exercetur, intenditur animo: aut est simulata, & tunc aliud completur opere, aliud in cogitatione versatur. In hac præterea simulatione vel actio exercetur seriò, ut nemo latentem animum introspeciat, ut si hypocrita ostendet devotionem, atque pietatem: vel mimicè & irrisoriè, ita, ut quisque irridentis animum deprehendat, veluti dum histriones agunt in theatro personam regis, aut dum crucifixores Domini genu flexo ei illudebat, dicentes: *Ave Rex Judæorum*. Profectò fieri nequit, ut hæc exterior simulatio, five seriò peragatur, five irrisoriè, ab intentione interna, ac proposito animi non procedat: qui enim simulat, nisi vesanus sit, & absque ratione ac libertate operetur, ut pica vel simia, vult simulare; & qui irridet, vult irridere. Internam igitur intentionem, ut distinguatur ab externa, non possumus aliam percipere, nisi sinceram illam, per quam operans non tantum seriò exercet externum actum, verum etiam interno proposito vult agere quod exercet. Externam verò intentionem dicimus, quæ conjuncta est cum simulatione vel occulta & latente, ut in hypocrita, vel patente & externa, ut in irrisore, vel mimo.

Est ergo sententia hæreticorum, valere Sacramentum non solum cum simulatione collatum, verum etiam cum irrisione & subfannatione, & si fieri posset, absque ulla ministrantium deliberatione ac proposito, puta si baptizaret, aut consecraret demens, vel ebrius. Radix hujus perversæ assertionis est, quia in sententia Novatorum justificat sola fides suscipientium, & ideo quomodocumque exhibeantur signa excitantia fidem, ea suscipiens, si credat, eaque inspiciat tanquam oppignorationem & sigillum promissionum divinarum, adipiscitur justificantis gratiæ beneficia. Non male hac in parte in Hist. Con-

cilii Tridentini Paulus Sarpi lib. 11. pag. 275. scribit, *Lutheranorum non valde interesse, an vera Sacramenta percipiant, quod nullam aliam virtutem iis adscribant, quam excitandi fidem, quæ aliâ quoque ratione possit excitari, ideo asserere Sacramenta non esse necessaria, nec concedere malitiam impij ministri posse nocere, quando illi animus non est Sacramenta vere conferendi, cum ad id respiciendum sit quod fidelis recipit, non quod a ministra ei donatur.* Nec solus id asserit sublesta fidei scriptor Polanus: eadem confirmat apud Pallavicinum lib. 1x. cap. vi. num. 3. noster Seripandus. Hinc Lutherus in lib. de Captivitate Babilonica rationem proferens cur intentio ministri non requiratur, *Non enim, inquit, in conferentis tantum, quantum in suscipientis fide, vel usu sita est virtus baptismi, sicut legitur exemplum de quodam mimo per jocum baptizato.* Similia scribit Calvinus in Antidot. Concilii Trid. sess. v. 11. can. 11. Kemnitius in Exam. ejusdem canonis, & Novatores alii: & quamquam Kemnitius ibidem videatur execrari lusum, & mimicam subfannationem, in quantum est sacrorum mysteriorum profanatio; idem tamen Novatorum omnium sensus est, ludificationem & irrisionem non officere Sacramentorum virtuti, quoniam eorum singulis altè insidet pestilentissimum dogma, quo asserunt pendere virtutem illam a fide suscipientium, non ab intentione ministrantium. Atque adversus hanc sententiam Ecclesiæ anathemate reprobata pugnare Catholici omnes efficaciam gratiæ Sacramentis attribuentes.

At nonnulli, quorum princeps est Catharinus, Ordinis Prædicatorum insignis Theologus, Minorensis primum, deinde Compensis Præsul, verentes ne si dicatur ex prava intentione ministri posse irritari Sacramentum, quod ad producendam gratiam efficax est, & sine quo rarissime occurrit ut homines justificentur, consequatur ab insigni hypocrita & incredulo, fovente in animo intentionem aliud omnino faciendi quàm quod facit Ecclesia, nec baptizari puerulos, nec Eucharistiam consecrari, nec impendi pœnitentibus absolutionem; ad incommoda hæc evitanda affirmavere, nihil obesse Sacramentorum virtuti, si minister occulta mente gerat intentionem Ecclesiæ contrariam, & intendat animo irrisoriè sacramenta conficere, dummodo intendat facere externum ritum, idest, adhibere materiam & verba proferre, & dummodo exterius seriò, omnique semoto joco se gerat. Ita Catharini sententiam explicat strenuus illius vindex Hyacinthus Serry in Op. de intentione ministri cap. v. pag. 29. ejusque perpolitus & eruditus affinis de Re Sacramentaria lib. 1. q. 6. cap. 3. sect. 2. In hac sententia Catharinus, etiam si contendat valere Sacramentum, dum minister fovet animo oppositam voluntatem, qua intendit derisoriè illud peragere, nec vult sacrum esse quod facit; necessarium tamen agnoscit deliberatum animum, sive intentionem

nem ponendi actum illum externum ; quippe , ut præmonuimus , nemo , nisi sit pica , vel fungus , facit quod facere non intendat : quare ipsemet Catharinus in Opusculo de intent. ministr. inquit : *Quid ergo facit Ecclesia per ministros baptizando ? nisi quod legitima utitur materia adhibens suam verborum formam : hoc igitur si facit minister , profecto illud facere intendit , si sit mente sanus . Quis enim vigilans faciat aliquid , quod facere non intendat ?* Ita Catharinus profitetur se adstruere necessitatem intentionis faciendi quod facit Ecclesia , nec recedere a definitione Synodi Tridentinæ hanc intentionem adversus hæreticos præscribentis .

Non eadem est de sententia Catharini Scriptorum opinio . Arbitrantur quidam Theologum illum ratum habuisse Sacramentum , quod sit cum intentione illa externa celebrandi Ecclesiæ ritum , etiam si non intendat ministrans effectum baptismi spirituales , eosque irrideat , qui existimant ritum illum esse religiosum & sacrum ; nusquam tamen docuisse validum esse Sacramentum , quod perficitur per simulationem externam , aut etiam internam , qua minister retineat propositum animi sui , & intendat externum ritum fingere ac simulare . Enim verò , inquit , diserte Catharinus se explicat scribens : *Non alia intentio ministri requiritur , nisi ut intendat exterius facere quod facit Ecclesia , quamvis ipse neque credat esse Ecclesiam , neque ullam baptismi spirituales effectum .* Et quamquam Catharinus videatur asserere ratum Sacramentum , quod perficitur per internam irrisiōnem , *irrisiōnis* nomine , inquit , non significat intentionem , qua minister vult simulare actionem , quam exterius perficit ; sed intentionem , qua non intendit effectum Sacramenti , nec Sacramentum ipsum , ut rem sacram , ac religiosam , sive *formaliter* ut Sacramentum . Ac sententia Catharini sic a Vasquesio in 3. partem disp. 138. num. 20. explicata , tolerabilis est , ac parum distat a communi ; eamque moderatione ista adhibita propugnat Honoratus Tournely Quæst. vii. de Sacram. in genere , art. 1. concl. 2. pag. edit. Ven. 154.

At qui in partes Catharini descenderunt , eumque vindicandi suscipere provinciam , præsertim duo superius commemorati Dominicanæ familiæ viri celebres , & qui ante istos in hoc argumento stylum exercuit Vincentius Contensonius dissert. 2. de Sacram. pag. 159. ita intentionem externam propugnarunt , ut ratum Sacramentum illud dixerint , in quo ministrans seriò adhibens externum ritum , habet in animo contrariam voluntatem Sacramenti penitus irritandi , sive etiam si apud se decernat dicens , *Nolo baptizare , nolo consecrare , nolo absolvere , nolo facere hunc ritum ut sacrum , nolo esse Sacramentum ;* sive etiam si interius suam intentionem retineat , geratque in animo voluntatem omnino contrariam , modò occulta sit , nulloque externo signo se prodāt . Atque hæc est sententia expressa.

etiam nostri Farvacquesii cap. vi. de Sacramentis in genere, q. 3. Florentii de Cocq. Tract. vii. sect. 3. Du Hamellii differ. 11. cap. 4. Gasparis Juenin quæst. vi. cap. 2. art. 3. ne commemorem Joannem Mariam Scribonium, Alphonsum Salmeronem, & superioris ætatis quosdam alios. Profectò in horum sententia Sacramentum ratum est, quamvis perficiatur interna irrisione, & ministrans decernat in animo fingere ac simulare: quod, ni fallor, distat plurimum a sententia Catharini, prout exponitur a Vasquesio, & Tournelio, ut ex dictis conjicitur. Ego tamen quisnam horum melius Catharini mentem scrutatus fuerit, nec definire audeo, nec disputare existimo necessarium; tametsi ex ipso Catharino suaderi posset illum consentire vindictis suis, ac postremæ sententiæ assertoribus. Postquam enim in Opusculo de Intentione pag. Rom. edit. 205. definiit talem requiri in ministro intentionem, *ut intendat facere quod Christus & Ecclesia facit, etiamsi ipse nihil credat fieri*, quibus verbis a communi sententia nulla ratione discedit; proponit quæstionem, quam illo opusculo aggreditur, satis ne sit, ut completum dici possit baptismi Sacramentum, *si minister omnia exterius faciat, quæ jubet Ecclesia, in-  
tus autem aliud servet in animo, ita ut intendat derisorie baptizare*. Quibus sanè verbis non solum affirmat consistere Sacramentum cum mala fide ministri nihil credentis fieri, quod paulo supra rectè statuerat, verum etiam significat institui a se disputationem de ministro, in quo præter malam fidem de Ecclesiæ Sacramentis eorumque effectum, sit etiam simulatio, derisio, & contraria animi deliberatio. Dum etiam pag. 208. ait se probare duntaxat necessitatem intentionis illius, quæ ab externo ritu separari non potest, & quæ *impossibile est eum qui ex industria lavat puerum, non habere intentionem lavandi si lavat*, videtur asserere, quod non officiat Sacramentorum validitati quælibet intentio contraria, quæ cum externa administratione serio perfecta componi queat, ideoque nec propositum illud simulandi & fingendi, quod non se prodat exterius; istud namque potest simul esse cum externa functione, ac ludibrio, quod non se prodat forinsecus. Ex quo duo, me quidem iudice, consequuntur: unum Catharini placitum haud satis accurate a Tournelio exponi, & perperam emolliri; alterum quæstionem hanc non esse parvi momenti, & puram putam logomachiam, ut juniores quidam autumant, ea ducti ratione ab ipso Catharino deprompta, quod nemo sui compos facit externum opus, ni velit facere: potest quippe contingere, ut minister adhibeat materiam, & formam tali externo habitu, ut nemo deprehendat latentem perfidiam, qua sic statuatur in animo, *Nolo baptizare, nolo absolvere*; sitque in extrinseco opere actionis honestas, in corde autem jocularis ludificatio.

Sententia hæc ad mentem auctoris exposita notatur a quibusdam acerba

acerbâ censurâ . De illa Bellarminus lib. 1. de Sacramentis cap. 27. hæc habet: *Quæ opinio non video quid differat a sententia Kemniti & aliorum hæreticorum, nisi quod Catharinus in fine opusculi subijcit se Apostolicæ Sedi, & Concilio, illi autem rident utrumque.* Joannes Cardinalis de Lugo disp. v111. de Sacram. sect. 2. ait rejici illam ab omnibus Theologis, & ab errore damnato non multum distare. Franciscus Sylvius in 3. p. q. 64. art. 8. tamen non meminit Catharini, statuit thesim illi contrariam, *Non sufficit intentio operis externi, cum hoc titulo, Conclusio 11. etiam ad fidem pertinet.* Ipse Tournelius, *Si qui sint inter nostros Theologos (inquit) qui Catharini & Salmeronis mentem aliter interpretentur, ac existiment satis esse ad veritatem Sacramenti, quod minister serio exterius ritum Ecclesiæ observet; tamen interius nolit illum reipsa facere, sed tantum simulare ac fingere, eos rejicimus, eorumque sententiam ab errore Novatorum damnato vix distare arbitramur.*

Nobis autem ab hujusmodi judicio abstinendum omnino est, donec accedat expressa Sedis Apostolicæ definitio . Sunt enim plura, quæ ab istiusmodi criminatione nos remouent, inter quæ principem tenet locum tenuis nostra in Theologorum confensibus auctoritas . Accedunt adversariorum nomen percelebre, & Opera eruditionis plenissima, quæ si in hac parte ab omnibus non probantur, non tamen fuerunt hæcenus supremo judicio castigata & proscripta . Serrius præterea scribit pag. 33. sententiam hanc anno 1649. Romæ publicè propugnatam a Zacharia Pasqualigo in sacra morali Doctrina disp. 72. sect. 4. ac pag. 109. etiam jurejurando testatur sibi Consultores, ac Præfules primæ notæ, cum anno 1690. Alexander VIII. damnares propositionem, de qua infra, num. xxx1. semel iterumque affirmavisse ea propositione contineri aliud longe a Catharini systemate . Addimus judicium Pallavicini scribentis lib. 1x. Hist. Concil. Trid. cap. 6. *Equidem existimo Catharini sententiam falsam esse, sed non ideo per Tridentinos canones diserte damnatam: quapropter fas illi fuit affirmare eam Concilio non contradicere: quippe duos eximios scriptores Ordinis sui sequebatur, Petrum Paludanum, qui propensum animum in eam opinionem præstulit, & Sylvestrum Prieratem, cui pariter post Florentinam Synodum probata est.* Observat quoque Eminentissimus Scriptor non deesse, qui eandem opinionem adscribant Divo Thomæ: quod postea conati sunt data opera confirmare, Contensonius, Farvacques, Serry, Juenin, Le-Druin . Duo præterea sunt in ipsa dissertatione Catharini satis obvia, quæ manifestant ipsius a Novatoribus discrepantiam, videlicet, quod Catharinus admittit necessitatem intentionis faciendi ritum externum, Hæretici totum justificationis negocium tribuentes fidei, frustraneam putant qualemcumque ministri deliberationem; & quod Hæretici probent etiam Sacra-

Sacramentum externa subfannatione collatum, Catharinus verò id apertissime neget. Quare Catharini sententia nihil affinitatis habere cum damnato dogmate Novatorum evidenter convincitur: & si nos aliquando conabimur contrarium ostendere, attendenda erit vis ratiocinationis, non censorii iudicii severitas, & acrimonia. Etsi autem ab omni animadversione iudicii que censura abstinemus; indubitatum est Catharini sententiam, ut propugnatur a prælaudatis Scriptoribus, malè hac ætate audire, adversam communi approbatione teneri, theses solam intentionem externi ritus adstruentes, non solum per Ordinarios locorum, verum etiam per Romanos censes, ac Præsules dispungi, & cum hoc labente anno 1741. die 7. Aprilis quidam in Archigymnasio Romano in solutione objectorum ad art. 8. quæst. LXIV. 3. p. D. Thomæ eadem opinione uteretur, commotis Præsidibus, coactum in ipso actu Doctoralis laureæ capeffendæ ad communem receptamque confugere. Pro hac verò, quoniam illustriores adversarios nuper recensui, ex medii ævi Theologis legi poterunt Bellarminus, & de Lugo citato loco, Vasquesius, & Suarez in præcitatum art. D. Thomæ, Gonet Tom. v. disp. 6. art. 2. Salmon-tienenses disput. VII. de Sacram. dub. 2. §. 2. Merbesius in Summa. p. 111. q. 13. & Fridericus Gavardi Tom. VI. quæst. v. art. 2. Hi namque non solum de intentione singillatim pertractant, verum etiam data opera oppugnant Catharini systema. Eandem provinciam ex proximioribus ætati nostræ susceperunt Claudius Frassen Art. 3. q. 4. Antonius Boucat Tract. XI. art. 6. cap. 2. Ludovicus Habert de Sacram. in gen. cap. 13. Auctor Theologiæ Moralis ad usum Semin. Petrocorensis Tract. 1. de Sacram. cap. v. Card. Gotti Tom. XI. quæst. VII. dub. 4. Franc. Henno disp. IV. q. 2. & ex nostratibus Leonardus Vanroy Tom. IV. Tract. 1. cap. 4. q. 4. & Aurelius Piette Tom. v. quæst. 4. cap. 5. necnon alii, a quibus recensendis superfedeo.

His ego adhærens prænotandum censeo Theologorum neminem requirere, ut Sacramentorum minister credat actionem, quam peragit esse revera sacram, ac multo minus ut credat ea actione infundi gratiam, & remitti peccata. Si enim istiusmodi intentio foret necessaria, nunquam Pagani, & qui Sacramentorum virtutem aut ignorant, aut negant, validè baptizarent. Fides ergo ab intentione sedulò est distinguenda. Fieri enim potest, ut quis intendat sacram. administrare lavacrum, quomodo Christus instituit, & quomodo fit in Christi Ecclesia; nec tamen putet hoc lavacro deleri noxam originariam, ut non pòtât sectator Pelagii, imò nec existimet Christum esse Deum, & esse humani generis reparatorem, ut Arianus & Socinianus, necnon arbitretur Romanam Ecclesiam servare impiam superflitionem, quemadmodum Calvinus, & Lutheri gregarius; atque in hac hypothesi, quoniam licèt desit fides, adest intentio, & quidem

dem intentio faciendi quod facit Ecclesia Christi, ratum est Sacramentum. Contingere deinde potest, ut siue credat minister, siue non credat, tanta prædedit animi perversitate, ut intendat fingere ac simulare, ac celebrare tantum externam sacri lavacri functionem: idque etiam eveniet, aut externam hanc functionem simulando mimicè, & nota omnibus ludificatione, quo in casu valere baptismum affirmat solus hæreticus; vel simulatione occulta, & contraria voluntate latente; in qua hypothese irritum esse Sacramentum existimamus. At nunc controversiæ statu prolixè exposito, tribus assertionibus id, quod proposuimus, expediemus.

PROP. I. Ut Sacramentum ratum sit, necessaria est intentio Ministri, qua non irrisoriè & mimicè operetur, sed revera proponat in animo facere quod facit Ecclesia.

Assertio hæc principio demonstratur Ecclesiæ definitionibus. Ac primò Concilium Constantiense celebratum anno 1418. intentionis necessitatem supponit, dum sess. 45. & ult. Martini V. Constitut. præscribit, ut de hæresi Wiclefi suspectus specialiter interrogetur, *Utrum credat quod malus Sacerdos, cum debita materia & forma, & cum intentione faciendi quod facit Ecclesia, verè conficiat; verè absolvat, verè baptizet, & verè conferat alia Sacramenta.* Florentina Synodus, & Eugenius IV. in decreto Unionis anno 1439. communem ac veterem Ecclesiæ sententiam proponendo declararunt Sacramenta omnia tribus perfici, *videlicet, rebus tanquam materia, verbis tanquam forma, & persona ministri conferentis Sacramenta, cum intentione faciendi quod facit Ecclesia, quorum si aliquod desit, non perficitur Sacramentum.* Leo Decimus anno 1520. in Bulla edita adversus errores Lutheri, proscripsit cum ceteris articulum 12. *Si per impossibile confessus non esset contritus, aut Sacerdos non serid, sed joco absolveret, si tamen credat se absolutum, verissimè est absolutus.* Concilium Tridentinum anno 1547. sess. vii. canone 11. approbans Eugenii IV. & Florentinæ Synodi statuta, *Si quis dixerit (inquit) in ministris dum sacramenta conficiunt & conferunt non requiri intentionem saltem faciendi quod facit Ecclesia, anathema sit.* Sess. etiam xiv. cap. 6. & canone 9. damnat expressè præcatum Lutheri assertum. Concilium Bituricense anno 1554. doctrinam de Sacramentis juxta Eugenii decretum, & Tridentinas sanctiones exposuit: quod præstiterunt deinceps Synodi quæque, Catecheses, Moralis Theologiæ institutiones, & universorum Theologorum lucubrationes.

Confirmatur Catholica veritas traditione: quamvis enim veteres non adeò aperte de hac intentione locuti sint, quod nullus illam tam audaci temeritate negaret; Eugenius tamen IV. non doctrinam incompertam, atque nuper adinventam docuit Armenos, sed fidem orthodoxam & Apostolicam, neque oscitanter & perfunctorie, sed  
ut

ut idem Pontifex in procemio testatur, multis adhibitis disputationibus, colloctionibus, & tractatibus; postque non mediocrem testimoniorum inspectionem, quæ ex sanctis Ecclesiæ patribus, & doctoribus deducta sunt, & earum de quibus agebatur rerum discussionem. Est autem inviolatæ traditionis argumentum, ut vidimus lib. xxiii. cap. 5. quod tenet universalis Ecclesia, nec invenitur quando primum fuerit promulgatum atque institutum. Existimat quoque Sylvius hujus traditionis vestigium occurrere in Auctore sermonis de Cæna Domini inter Opera Cypriani pag. xcvi. Append. ubi de Euch. ejusque consecratione legitur: *Quotiescumque his verbis, & hac fide actum est, panis iste supersubstantialis, & calix benedictione solemniter sacratus, ad totius hominis vitam salutemque proficit, simul medicamentum & bolocaustum ad sanandas infirmitates & purgandas iniquitates existens.* Quo in loco Sylvius fidei nomine contendit intelligendam esse intentionem. Videtur tamen de proficua, non de valida Eucharistiæ benedictione ac sumptione loqui Scriptorem istum, atque hoc testimonio non adeo invictè retundi perfidiam hæreticorum.

Ad hanc frangendam deserviunt præterea novi Testamenti loca quædam. Unus depromitur ex Joannis xx. ubi legimus, *Quorum remiseritis peccata, &c.* quæ verba demonstrant Christum Apostolis suis dedisse potestatem absolventi a peccatis. Unde Theologi ratiocinantur: Christus non solum instituit Sacramenta, verum etiam illorum potestatem tribuit discipulis. At potestas non est in iis rebus, quæ deliberatione, ac proposito carent, sed in causis liberis cum ratione, atque intentione operantibus. Si ergo Ecclesiæ ministri potestatem habent conferendi Sacramenta, vel ea denegandi, etsi non habeant potestatem conferendi gratiam, ut cum Augustino dictum est supra; non conferunt eadem Sacramenta, nisi agant libere, & adhibeant deliberationem animique propositum. Eruitur illinc probatio altera; si enim judex absque ulla deliberatione proferat sententiam, aut dormitans & mente alienus, aut manifesta irrisione, & ironicè, nulla profectò est absolutio. Atqui in Sacramento pœnitentiæ minister judex est. Si ergo agat absque deliberatione animique proposito, minimè absolvit. Petitur locus alter ex Epistola prima ad Corinth. cap. iv. 1. ubi Apostolus ait: *Sic nos existimet homo, ut ministros Christi, & dispensatores mysteriorum Dei.* Quis autem dixerit dispensatorem atque ministrum, non serib, sed ludicrè, & citra judicium, mentisque propositum operantem? Quis dixerit se gerere ut ministrum Regis hominem illum, qui histriionis indutus veste, aut in theatro insaniens, aut inter pocula ludens Principis nomine dispenset munera, & jura pacis bellicque subfannatione pronuntiet? Revincitur itaque divinis quoque testimoniis hæreticorum inficitia.

Re-



Refellitur insuper monumentis Ecclesiasticæ Historiæ : Firmilianus enim Cæsareæ Cappadociæ Episcopus, qui obiit apud Tharsum Ciliciæ anno 272. in Epistola inter Cyprianicas LXXV. pag. 306. falsam suam de iterando hæreticorum baptismate opinionem confirmare nitebatur ex quo nemine Catholicorum renitente nullum fuerit baptismi collatum a muliere nequissimo spiritu exagitata, quamvis usitata & legitima verba ad deceptionem fidelium usurpasset . Cornelius Papa in Epistola ad Fabium Antiochenum, quem Hieronymus de Script. Eccl. appellat Flavianum, irritam ac nullam declarat ordinationem in Episcopum Novati, quod *homines simplicioris ingenii, temulentos & crapula oppressos, adumbrata quadam & inani manuum impositione, episcopatum sibi tradere per vim coegerit*. Scripta est Cornelii Epistola circa annum 250. ac de ea Eusebius lib. VI. H. E. cap. 43. pag. edit. Vales. 241. Baronius ad an. 255. num. 24. & Lab. Tom. 1. Conc. pag. 674. Anno quoque 963. damnata est in quadam Romana Synodo inter cetera Joannis XII. flagitia ordinatio Diaconi in stabulo equorum derisorie peracta. Doctissimus P. Le-Quen probat irritam ordinationem Matthæi Parkeri, qui anno 1559. invasit Archiepiscopatum Cantuariensem, eo quod in Londinensi taberna, clanculum & umbratili ceremonia fuerit ordinatus. Et quamquam Godvvinus in Comment. de Præsulibus Angliæ pag. 218. Parkeri consecrationem peractam asserat in Cappella palatii Archiepiscopalis Lamethensis, fatetur tamen oppositum narrare Hardingum, Fitzsimonium, aliosque, nec Parkerum consecratum negat *ritu in Ecclesia Protestantium recepto*. Sed de hac gravi controversia loco opportuniori.

Præterea demonstratur propositio argumentis ex Jure Canonico promptis. Primò enim Innoc. III. cap. *Majores*, de Baptismo, 3. definit, illum, *qui nunquam consentit, sed penitus contradicit, nec rem, nec characterem percipere Sacramenti*: unde patet requiri intentionem ex parte suscipientis baptismum; ideoque scholastica methodo ita ratiocinatur: Nemo adultus suscipit Sacramentum, nisi intendat illud suscipere: igitur nemo Sacramentum confert, nisi intendat illud conferre, exhibeatque assensum saltem interpretativum. Item cap. *Sicut tua*, de Sponsal. decernitur, nullum in foro interiori esse Matrimonium, *in quo defuit contrahentium consensus*.

Accedunt probationes Theologicæ: quarum prima est, quod Sacramentorum administratio, ut decet eorum sanctitatem atque institutionem, actu peragi debeat humano, ideoque requirit intentionem, sine qua actus humanus nunquam exercetur: qua argumentatione utuntur in IV. dist. VI. Scotus, Gabriel, Alexander Alensis, omnesque illis posteriores. Altera est ratio in 3. p. q. 64. art. 8. a D. Thoma producta, & ab omnibus recepta; quoniam quod est natura.

tura sua indifferens ad plura, debet per aliquod determinari. At baptismi lavacrum suapte natura indifferens est, ut sit ablutio ludicra aut seria, sacra aut profana. Itaque voluntate, aut intentione ministrantium debet determinari. Neque enim istiusmodi determinatio haberi potest per solam prolationem verborum; siquidem ipsa verba, quibus Sacramenta perficiuntur diversus usus, ac sensus habere possunt, E. G. *Baptizo*, potest significare naturalem abluitionem corporis, & mysticam, sacramque lotionem; ideoque ipsa verba per intentionem agentis debent ad unum determinari. Probatio tertia, eaque communis est, Ministros Sacramentorum esse quidem Christi instrumenta, sed non mortua, ac vitâ & ratione destituta, ut ferra, malleus, & alia artificum adminicula. Instrumenta viventia sunt, & quidem libera, ac prædita sensu & ratione. At instrumenta huius generis ita a causâ principe moventur, ut eadem quoque moveant seipsa. In conficiendis itaque Sacramentis ministri debent se intentione & consilio ad agendum movere. Quod urgere possent hæretici de verbi prædicatione, in qua ministri instrumenta Christi sunt, nec tamen ad verbi efficaciam ulla requiritur deliberatio prædicantis, id paullo post expeditur.

Denique corroboratur Catholica propositio absurdus è contraria sententia fluentibus. Nisi enim ad Sacramenti valorem necessaria esset ministri deliberatio, Pater ducens puerum ad balneum ob solam munditiam aut sanitatem corporis, si dum illum immergit, more Christiano, & invocato Trinitatis nomine eundem tingeret, Deum invocans ut bene ei cederet corporalis ablutio, nihil verò cogitans de baptismo; infans revera baptizatus esset. Idem contingeret, si in prætereuntem catechumenum stultus è fenestra profunderet ad hominem irrigandum lagenam aquæ, joco pronuntians baptismi formam. Sacerdos item mensæ assidens, atque, ut fit in Monachorum conventu, perlegens Evangelium, dum pronuntiaret quæ de institutione cœnæ ibidem scripta sunt, consecraret panes omnes appositos, vinumque in phialas profusum. Si quis etiam conducens ancillam, ea annuente diceret, *Accipio te in meam*, subintelligendo *famulam*, non uxorem, eandem duxisset in conjugem. Contingeret idem in theatro, dum soluti mimice celebrant matrimonia. At de his legendus Hugo a S. Victore lib. 2. de Sacram. p. 6. cap. 13. necnon Bellarminus lib. 1. cap. 27.

#### AD OBJECTA HÆRETICORUM.

Opp. 1. Liqueat, ex Ecclesiastica Historia, probatum fuisse ab Alexandro Episcopo Alexandriae baptismum a D. Athanasio adhuc puero, & prope litus maris pueriles lusus exercente, puerulis aliis cathe-

cathecumenis, ac nondum initiatis collatum. Nec dici potest functionem illam Athanasium serio animo, consilioque perfecisse, aut tum temporis juvenem fuisse, atque adultum ætate. Socrates enim lib. 1. cap. xv. pag. edit. Valesii 44. refert ex Rufino *admodum fuisse puerum, cum pueris aequalibus lussisse; hunc lusum fuisse imitationem Collegii sacrorum virorum, atque Athanasium ludo Episcopi dignitatem sortitum, alios Presbyteri & Diaconi partes.* Quæ si lusus non sunt, quid sit lusus ignoro. Probasse autem Alexandrum collatum a puero Athanasio baptismum narrat Sozomenus pag. ejusdem edit. 466. lib. 2. cap. 17. Et Niccphorus lib. viiii. pag. 44. pag. 635. Ipse Niccphorus lib. iiii. cap. xxxviii. pag. 277. narrat ævo suo contigisse, ut quidam pueri per ludum hebræum pariter puerum ad mare stantem baptizarent, pro cerco cum armantes tenui ligno, factoque ei imaginario amictu ex discissa extrema vestis textura. Atque hæc pariter ceremonia a Constantinopolitano Præsule fuit approbata. Addunt decantatum Genesii baptismum, ei collatum circa annum 286. dum quadam die vellet Diocletiano Imperatori ludum exhibere de Christianæ observantiæ mysteriis. Et quamquam Genesii factum in dubium revocent Critici; de eo dubitare non sinunt genuina Acta Martyrum a Ruinartio collecta, pag. Veron. edit. 236. Addunt nonnulli exemplum Dioscori cujusdam Architheatri, qui baptismum suscepit in theatro tota nugacitate ludens, sacrisque mysteriis sacrilegè insultans, ut colligitur ex Epistola Augustini 227. olim 67. ad Alipium.

Resp. nihil præsidii ex hisce historiis accedere heterodoxis. Ad Athanasium enim quod attinet, respondent quidam Alexandrum non fuisse inauguratum Episcopum Alexandrinum, nisi anno 321. ex Hieronymo in Chronico. Cumque Athanasius anno 325. jam consecratus Diaconus, & doctrinæ fama percelebris interfuerit Nicænæ Synodo, imò proximo anno 326. loco Alexandri jam vitæ functi ad Sedem Alexandrinam fuerit evectus; consequitur ipsum Athanasium initio Episcopatus Alexandri non fuisse puerum, sed adultum ætate; ideoque historiam hanc haberi ab eruditis pro puro putoque commento. Nos grandi quidem suspicione historiam istam laborare fatemur, sed miramur viros multæ eruditionis Chronicon Hieronymianum obtrudere. Quamquam enim eo in Chronico dicatur Alexander Ecclesiæ Alexandrinæ ordinatus Episcopus anno 1. Olympiadis 275. & Constantini xv. qui annus concurrit cum annq Christi 321. & cum sequenti 322. ut liquet ex edit. Scaligeri pag. 181. immo juxta editionem Auberti Miræ prædicta ordinatio non contigerit ante annum 324. inauguratio autem Athanasii anno 333. est nihilominus vera sententia eorum, qui scribunt Alexandrum renunciatum Episcopum anno 313. ut docent Pagius ad an. 311. num. 25. & PP. Mauro

Benedictini in Vita Ath. pag. 11. Etenim S. Petrus Alexandrinus ex Eusebio in fine lib. viii. H. E. pag. 290. capite truncatus est *anno persecutionis nono*, idest, 311. die 25. Novembris. At Ecclesia Alexandrina post martyrium Petri anno uno vidua permanfit: inauguratus post annum Alexandrinus Præful Achillas, qui mensibus duntaxat quinque supervixit; ac tum electus Alexander, ex Gelasio Cyziceno lib. 2. Hist. Conc. Nic. cap. 11. Potuit ergo Athanasius anno 313. ac primo Episcopatus Alexandri esse *admodum puer, ac impuber*, ut ex Rufino narrant Socrates, ac Sozomenus. Agebat tamen eo temporis Athanasius annum ætatis suæ duodevigefimum, quoniam consecratus est Episcopus anno 326. jam annorum saltim triginta, ex communi fere consensu; nunquam enim ei ab Arianis obiectum legimus, quod junior arripuisset Episcopatum, ut de Pauliniano Hieronymi fratre narratur; ac propterea Athanasium natum circa annum 296. rectè affirmant recentiores. Revera itaque factum Athanasii laborat suspicione. Si gratis admittatur, dico Alexandrum, qui sanè tali non erat ingenio, ut tam seriatim in re ludum puerorum ratum haberet, accitos ad se adolescentulos, eorumque perspecta indole, *putasse ex eo quod gestum fuerat aliquid singulis prænuntiari*; undè iussit pueros educari in Ecclesia, & literarum studiis erudiri, ac præcipue Athanasium. Hæc Socrates, nihil habens de probato ab Alexandro baptismo. Si istud approbatum contendas, dico Rufinum primum hujus historiæ Scriptorem narrare Alexandrum diligenti puerorum interrogatione comperisse, quomodo illi *omnia secundum religionis nostræ ritum* servassent; & licet omnia recreationis animo & puerilis oblectationis causa fecissent, habuisse tamen intentionem faciendi, *quæ per episcopum in Ecclesiis geri mos erat*. Quapropter prænuntiatus baptismus dicitur *per ludum* peractus comparatè ad pueriles oblectationes, & ad assumptam ab Athanasio dignitatem Episcopi, non comparatè ad ejus intentionem Catechumenos baptizandi.

Factum alterum ejusdem naturæ est; etenim Nicephorus ait puerum illum hebræum principio non fuisse invitum, & baptismo initiatum cum ceteris templum ingressum accepisse divinum munus. Constantinopolitanus antistes re per diligentem inquisitionem cognita pueros, etiam Judæum, ad se venire compulit, isto autem interrogato, decrevit, *ut etiam in illo quod deesset juxta mysterii executionem compleretur*. Ita Historicus: quorum verborum duplex sensus esse potest, decrevit ut baptizaretur, quia jam annuerat; aut, decrevit ut confirmaretur, quia pueri veram intentionem habuerant, tametsi tanquam suum ludum sibi, atque oblectationem proposuissent.

Ad Genesium quod attinet, ejus quoque baptismum critici accensent fabulis. I. ob Scriptorum in facto narrando dissonantiam; nam

nam Ado Viennenfis ait Genefium baptizatum a Chriftiano Sacerdote in fcenam inducto : alii baptizatum tradunt ab altero mimo ; alii denique ab Angelo . II. ob iftiusmodi narrationum ineptias ; inverifimile quippe eft Sacerdotem Chriftianum mimi rogato confcendiffe theatrum ac ludentibus operam fuam locaviffe ; nec minus eft inverifimile , angelum inter fcenicos ludos exercuiffe hiftrioniam , aut minimum admonuiffe , ut ferio baptizaret Genefium , cum potius admonendus effer , ut a re facra in theatro facienda abftineret . Hæc critici . Verum ex præcitatæ Actis martyrum Ruinartii conftat Genefium repente Deo inspirante credidiffe , & *evocato presbytero & exorcifta* baptizatum , completisque Sacramentorum myfteriis veluti per ludum raptum a militibus , & exhibitum Diocletiano , cum verè profiteretur Chriftianam fidem , fuftribus cæfum , & a Plautiniano præfecto decollatum . Si evocatum dixeris presbyterum & exorciftam in medium theatri , dico appellari *presbyterum & exorciftam* , qui mimicè horum induerant perfonam : quis enim evocaffet ad facrorum myfteriorum irrifionem imbutos Chrifti fide miniftros ? At in eo cafu affirmo Genefium non illa ablutione , fed fide , ac martyrio confecutum fuiffe falutem . Si evocatos arbitraris miniftros facros , five mala intentione tyranni , ut perciperent qua irrifione myfteria agerentur noftra , five ab ipfo Genefio , extra theatri locum profecto ; quid tali in cafu defideretur intentionis , non video . Ex æquivoco illo *presbyteri* vocabulo factum puto , ut quidam a mimo , quidam a sacerdote baptizatum Genefium exiftimaverint . Prudentiffime in Romano Martyrologio repentina Genefii converfio , ac martyrium defcribitur die 25. Augufti , fentio miffis baptifmi minifttris . Tenuit eundem ftylum Baronius ad annum CCCIII. num. 118. quamvis incaute Pagius ad hunc annum , num. x. fcribat Baronium in Annal. de hoc Genefio nullum prorfus habere verbum .

Diofcorus , de quo Auguftinus epift. 221. , non *Archibeater* erat , fed *Archiatr* , ut legendum ex mss. melioris notæ obfervant PP. S. Mauri . Eft autem Archiatr idem , ac Protomedicus . *Archiatros* , aut *Archiatr* apud JCC. ufitatiffimum nomen eft , ut liquet ex l. 9. & 10. *de Profef. & medic.* lib. 10. C. & l. 8. 12. 13. eodem tit. in Cod. Theodof. & l. unic. *de comitib.* *Archiatr.* in eodem Cod. *Archibeatram* ego quidem nufquam hætenus legi . Nec Diofcorus mimicè baptizatus eft , fed voto fe obligaverat Chriftianum fore , fi ægotantem filiam falvam videret ; quod autem voverat , accepto beneficio difsimulabat exfolvere ; quare excelfa Dei manu repentina , primum cæcitate , deinde paralyfi percuffus omnem depofuit nugacitatem , ac factus fidelis confecutus eft gratiam . Sed lege hujus converfionis narratorem difertiffimum Auguftinum .

Opp. 2. Joannes Chryfoftomus hom. LXXXV. in Joannem pag. edit.

edit. Com. 444. ait: *Neque Angelus, neque Archangelus quicquam in his, quæ a Deo data sunt, efficiunt; sed Pater, Filius, & Spiritus sanctus omnia facit. Sacerdos & linguam & manus præbet: neque enim iustum est propter alterius malitiam ad salutis nostræ symbola fide accedentes offendi.* Comparat etiam ibidem Chrysostomus sacerdotem impium afinae Balaam, per quam locutus est Dominus; eademque similitudine utuntur alii Patres, maxime epist. 37. libri 2. Isidorus Pelusiota. II. De Consecrat. dist. 4. cap. *Baptismus*, habentur hæc verba desumpta ex Augustino Tract. v. in Joan. num. 18. *Non timeo adulterum, non ebrium, non homicidam; sed columbam attendo, per quam mihi dicitur, Hic est qui baptizat.* III. Idem Augustinus lib. VII. de Baptismate cap. 53. num. 102. probat baptismum *cum simulatione & fallaciter* collatum: dubitatque utrum approbandus foret, *sitotum ludicre & mimice & joculariter ageretur.* Quis autem intentionem esse affirmaverit in eo, qui præbet solummodo linguam ac dexteram? quis intentionem excogitaverit in afina Balaami? quis intentionem adesse dixerit in homine opus aliquod peragente fallaciter, mimice, joculariter? Decretis itaque Patrum consonat hæreticorum assertum.

Resp. ad 1. scopum Chrysostomi esse demonstrare sacra ministrantium improbitatem non impedire virtutem Sacramentorum; *Quicquid enim* (inquit) *habet Sacerdos, solius Dei donum est.* Consulto tamen ait, *Præbet linguam*, ne quis arbitretur, se gerere omnino brutorum instar, nec sine deliberatione proferre verba. Comparatio itaque afinae Balaami eò tendit, ut commonstret, unde sint Dei munera, non ut excludat sacrorum ministrorum officia. In eadem homilia æquiparat Chrysostomus Sacerdotes ministris Principum, *inter quos sunt multi deteriores; & nihilominus ob reverentiam principis, qui eos proposuit, subditi nihil quales sint cogitant.* Hinc infert non esse vitam Sacerdotum a populis dijudicandam: at ex eadem comparatione inferitur, nulla esse illorum mysteria non humano more peracta; quemadmodum nulla sunt mandata ministrorum principis, facta in somniis, aut cum ludicra simulatione. Idem scopus erat Isidoro; qui eo loci, *Rescribendum*, inquit, *quam celerrime duxi, nimirum, quod is qui inititur, quantum ad salutaria symbola spectat, ex improba Sacerdotis vita nullo damno afficitur.* Quod opponitur secundo loco, nihil probat. In emendatis enim Decreti editionibus, ut in Romana anni 1582. in Lugdunensi an. 1717. in Rom. altera anni 1726. cap. *Baptismus*, non habet *ebrium*, sed *ebriosum*, atque ita legitur in Augustino: Glossa quoque decreti ibidem, *Consuetudinem*, inquit, *notat hoc nomen, non actum.* Cum vitiosa autem consuetudine minime pugnat intentio, animique propositum. At illud quod sequitur nescio quare fronte ab hæreticis opponatur, quum eo in loco S. Pater scribat progreduendum non esse aliqua temeritate sententiæ, ubi non est aliqua deter-

determinatio plenarii Concilii , & universalis Ecclesiæ consensio , adstruatque Sacramentorum efficaciam , & baptismi validitatem independentem a fide ; cum tamen Novatores adversus generalium Synodorum decreta audeant intentionem explodere , omnemque vim Sacramenti statuunt in fide fuscipientium . Deinde quantum ad fallaciam atque simulationem , dicimus Augustinum interpretandum de simulatione fidei & unitatis Ecclesiæ , non de simulatione intentionis , ut dicam proxima positione . Quantum vero ad actionem ludicram & mimicam ; primo Augustinus nihil definit , & ait implorandum esse *divinum judicium per alicujus revelationis oraculum concordi oratione , & impensis supplicii devotione gemitibus* . Atque judicium istud modo per Ecclesiæ catholicæ oraculum prodiit . Præterea S. Pater præcedenti num. quæstionem his verbis proposuerat , *An acceptandum sit (baptisma) quod in mimo datur , si quis existat , qui fideliter subito commotus accipiat* : ubi supponit intentionem in ministro , in fuscipiente tantum ludicram irrisionem ; quo in casu si mimus commotus accipiat , ut diximus de Genesio , & narratur de Ardalcione , ratum esse Sacramentum ultro concedimus .

Opp. 3. Innocentius IV. scribens in III. Decretal. cap. *Si quis puerum* , de Baptismo , pag. edit. Francof. 455. 2. ait : *Non est necesse , quod baptizans sciat quid sit Ecclesia , quid baptizatus , & unde sit , nec quod gerat in mente facere quod facit Ecclesia , imo si contrarium gereret in mente , scilicet non facere , quod facit Ecclesia , sed tamen facis , quia formam servat , nihilominus baptizatus est* .

Respondent qui sententiam Catharini propugnant , Innocentium IV. excludere tantum necessitatem intentionis internæ , quoniam immediate sequitur , *dummodo baptizare intendat* . At non eget Innocentius interprete . Statim enim hæc subjicit : *Unde si aliquis in casu necessitatis constitutus , vel etiam sine necessitate vadat ad Saracenum , & dicat , Baptiza me , & doceat eum formam , & ille Saracenus baptizet non credens per immersionem aliquid aliud fieri nisi madefactionem , & non intendat eum baptizare , vel etiam madefacere secundum intentionem petentis baptismum , idest : ut baptismum operetur quicquid operari potest , & ipse baptizans tanquam minister conferat , quod alii baptizantes conferunt , vere baptizatus est ; sed si hoc non intenderet , non baptizaret* . En aperte Innocentius declarat , quod Saracenus baptizans , si non intendat conferre , quod conferunt alii baptizantes , Sacramentum non conficit . Requirit ergo intentionem internam ; & quando ait ratum esse baptismum , etiam si baptizans non intendat facere quod facit Ecclesia , imo contrarium gerat in mente ; non est accipiendus de intentione conferendi baptismum , sed de intentione effectus baptismi , scilicet etiam si non intendat , *ut baptismus operetur quicquid operari potest* . Adde Commentaria Innocentii fuisse edita .

Lugdun-

Lugduni, cum erat privatus doctor, nec fuisse prædicta verba juris decretis adscripta, nec unquam inserta cap. *Si quis puerum*, et si opus contra omnium exemplarium fidem scribat nuperus Auctor de Re Sacram. pag. 102. Immo Hyacinthus Serry, cujus omnia argumenta prædictus Auctor in hac quæst. accurate collegit, & illustravit, de ministris int. pag. 19. scribit: *In primis ea Innocentii IV. sententia, quævis tandem illa sit, privati Doctoris est, non Romani Pontificis, nec in Juris Canonici partem venit.* Nec prætereundum est quod initio operis sui monet ipsemet Innocentius, non omnia, quæ scripsit, in scholis esse tradenda, sed studio Camera pro discussionibus & diffinitionibus causarum reservanda. Ceterum cum Innocentius fuerit *lumen limpidissimum decretorum*, quemadmodum eum appellat in suo Opere de nobilit. legum cap. 9. Florentinus Colucius; quisquis illum adierit, percipiet illico, num ejus sententia talis sit, quæ *nullo subterfugio possit eludi*, ut scribit memoratus, doctissimusque sententia Catharini patronus. At de hac sententia postmodum.

Opp. 4. Hæreticorum opinio Theologicis quoque ratiociniis corroboratur. I. Si ut Sacramentum ratum sit pendet ab intentione, quinsam justificationis suæ certus erit, & gravi timore non macerabitur, cum nulli fas sit introspicere consilium, atque intentionem latitantem in animo ministrantium? Docent Catholici Sacramenta gratiam conferre *ex opere operato*: nequit ergo intentione ministri impediri illorum efficientia. III. Sacerdotes sunt dispensatores non solum Sacramentorum, sed etiam divini verbi. At ad efficientiam verbi non requiritur ulla intentio; igitur nec requiritur intentio ad validitatem Sacramentorum. IV. Non requiritur intentio in dispensatione Eucharistiæ: ergo neque in consecratione. V. Elementum, si ei verba accedant, absque ulla ministrantium intentione est signum sensibile; & consequenter est Sacramentum. VI. Regis orator, ac minister officium explet suum per solam literarum exhibitionem: ergo & Sacerdos qui fungitur *legatione pro Christo*, ministerium suum adimplet per solam exhibitionem divinorum symbolorum.

Resp. ad 1. excerari nos dogma hæreticorum de certitudine gratiæ, refutatum lib. XIV. cap. ult. ac memoria repetere monitum Apostoli ad Philip. 1. 12. *Cum metu & tremore vestram salutem operamini.* Nimiam vero animi nostri anxietatem temperamus intuitu Divinæ misericordiæ, & passionis Christi, observatione præceptorum, & cura partes nostras implendi. Ita gradiendum esse contendimus, nec declinando ad dexteram inani fiducia, nec ad sinistram impia desperatione, sacris eloquiis edocti, prævum tenere iter superbia tumidos, & negligentia torpentes. Quod proxime sequitur, eluditur facillime; fateamur siquidem Sacramenta conferre gratiam *ex opere operato*, sed negamus fieri istiusmodi opus absque intentione ministri;

quo-



quoniam ex indifferenti materia ac forma nequit absque applicatione agentis opus aliquod perfici. Ad alterum respondemus inter ministrum verbi, & ministrum Sacramentorum latam esse disparitatem; verborum enim efficacia in sacris concionibus sita est in sola significatione verbis indita, neque effectum sortiuntur alium, nisi excitandi animum audientium ad fidem, ad contritionem, ad alias virtutes christianas; & ideo quomodocunque proferantur, habere possunt sibi propriam efficientiam, quoniam absque intentione proferentis idem significant. At verba, quibus Sacramentum conficitur, *practica* sunt; & præter significationem habent insuper efficientiam aliam, & gratiam producant; cumque verba istiusmodi, ut liquet in absolutione Judicis, aut in Edicto Regis, nulla sint, quando pronuntiantur absque libertate & consilio, sit in exemplo, a Judice temulento, a Rege somniante, iccirco verba Sacramentum constituentia proferri debent actu humano, animique proposito. In quarta etiam objectione dispar ratio deprehenditur; nam dispensare est exhibere symbola; conficere autem Sacramentum est symbola per applicationem verborum humano actu peractam efficacia reddere & consecrare. Proximum argumentum expeditum est, modò repetamus, Sacramenta non esse signa invisibilis gratiæ *speculativa*, sed *practica*; nam signa istiusmodi non tam prolatione verborum, quam animi intentione perficiuntur. Obsectio postrema diluitur facta ministrorum Principis distinctione. Quibusdam enim imponitur solum præceptum exponendi principis voluntatem, ut est nuntius, qui tantum nuntiat, & fisco prodit, de quo l. 1. §. ult. D. de jure fisc. legatus, qui pro Republica perorat, ut inquit Servius in 2. Acneid., orator propterea dictus; præco, qui Senatus consulta pandit, aut publice legit, a præcinendo appellatus: atque hi ministri, dummodo nuntient, orent, clament, officio funguntur suo. Alii cum mandato principis habent potestatem, & jurisdictionem aliquam conjunctam, ut Judex, qui accepta potestate jus dicit, & finit, juxta Varronem lib. v. de lingua Lat. Prætor, Proconsul, Vicarius, Præfectus, Magister populi, Dictator, aliique plurimi; & isti in proferenda sententia debent causam cognoscere, & operari cum intentione. Quis enim probaret sententiam judicis dormientis? Quis præfecto, aut prætori confecto crapula obtemperaret? Quis insanientis præfulis faceret imperata? Ministris suis Deum potestatem contulisse demonstratum est supra; ideoque non sunt de illo genere ministrorum, qui mandata tantum promulgant, sed de genere eorum, qui utentes ratione, & consilio, sententiis verbisque suis tribuant stabilimentum ac firmitudinem.

PROPOSITIO II. Si in Ministro sit sola intentio faciendi ritum eternum, geratque ille in animo suo latentem deliberationem non faciendi rem sacram, ut fieri solet in Christi Ecclesia, etiamsi mate-

riam adhibeat, & formam proferat, nec contraria deliberatio aliqua externa irrisione se prodat, nullum erit & irritum Sacramentum.

Probatur 1. Sacrosancta Concilia, ut diximus præcedenti propositione, præter materiam & formam, ad perficiendum Sacramentum necessariam requirunt *intentionem faciendi, quod facit Ecclesia*. Igitur præter positionem externi ritus exigunt interioris animi deliberationem diversam a deliberatione excrcendi ipsum ritum externum. Probatur consequentia; ut enim scribit Catharinus intentionem ponendi ritum externum ab actu, quo servatur Ecclesiæ forma, inseparabilis est. *Quis enim vigilans facit aliquid, quod facere non intendat?* inquit pag. 208. idem Catharinus. Concilia autem præter observationem ritus, & pronunciationem formæ, requirunt expresse intentionem faciendi quod facit Ecclesia; ait enim Eugenius in Istr. Arm. Tom. xiii. Conc. pag. 535. *In casu autem necessitatis, non solum Sacerdos vel Diaconus, sed etiam paganus & hæreticus baptizare potest, dummodo formam servet Ecclesiæ, & facere intendat quod facit Ecclesia*. Itaque Concilia præter intentionem a celebratione externi ritus inseparabilem, necessariam existimant intentionem internam, & peragendi rem sacram, quæ ab externo ritu seungi potest.

Respondent 1. adversarii cum Contentsonio pag. 187. decipi sententiæ nostræ assertores sophistica æquivocatione, & confundere id quod facit Ecclesia cum eo quod intendit Ecclesia; Ecclesiam peragere ritum externum sacrum in certa materia, & forma; intendere autem sanctificationem hominum, ad quam sacra signa fuere instituta. Qui ergo externum peragit ritum, habet intentionem faciendi quod facit Ecclesia, etsi non intendat facere quod intendit Ecclesia. Revera inquit præclarus Vindex Catharini pag. 87. *Si quis diceret, a Tridentina Synodo definitum est requiri intentionem faciendi quod facit Ecclesia; sed Ecclesia facit ritum externum, ut deleatur originale peccatum, ergo necessaria est intentio delendi peccatum originale; teneret ne istiusmodi illatio? Nequaquam. Aliud ergo requiritur ad reëstitutionem intentionis, aliud ad perfectionem Sacramenti: ad illam necessaria est intentio operis; ad istam vero intentio effectus, ut præclare Doctor Angelicus in iv. dist. vi. q. 1. quæstiunc. 2. ad 1. Similia eruditus Auctor Operis de Re Sacram. pag. 112.*

Vcrum hæc mihi homini pinguis Minervæ nullatenus satisfaciunt. Principia enim Ecclesia non facit ritum externum utcumque, atque ut in scholis loquimur, *materialiter*, sed ritum externum religiosum ac sacrum. Sacramentum enim, etiam *ut Sacramentum*, non fit a solo Deo, sed a ministris Ecclesiæ operantibus nomine principalis auctoris Christi Jesu, alioqui non se gererent tanquam Dei ministri. Si ergo fatentibus adversariis requiritur in ministro intentio faciendi quod facit Ecclesia; tametsi non requiratur intentio producendi effectum

Etum Sacramentorum, attamen erit necessaria intentio faciendi rem ut divinam & sacram, non duntaxat ut exteriorem ceremoniam. II. Quotiescunque intenditur aliquid, quod virtute sua producit effectum, non est necessaria explicita intentio ejusdem effectus, sed est tamen necessaria, (si actus humanus sit) intentio ponendi causam, ex qua idem effectus produciatur; quemadmodum si medicamentum aliquod, inquit Salmanticenses, ad sanitatem præstandam efficax sit, necessarium non est, ut sanetur ægrotus, medicum velle sanare; at necessarium est tamen, ut faciat exhibeatque medicamentum. Porro Sacramenta sunt signa efficacia gratiæ, eamque producant suapte virtute, non ut signa cujusque generis, sed ut signa sacra & divina: atque juxta sacrorum Conciliorum definitionem perficiuntur intentione ministri. Itaque in ministro requiritur intentio faciendi Sacramentum ut aliquod divinum, sacrumque signum, quamvis necessaria non sit intentio producendi gratiam, quam virtute sua Sacramenta tanquam signa sacra producant. III. Eadem est laudato in loco Angelici Præceptoris sententia; inquit enim: *Quamvis in Sacramento requiratur intentio faciendi quod facit Ecclesia; non tamen requiritur, quasi de necessitate Sacramenti facere quod facit Ecclesia propter quod facit Ecclesia. Quid ista, quæso, ad Catharini sententiam?* Planissimus sensus est, Ecclesia facit rem sacram, eamque facit propter delenda peccata; & in ministro requiritur intentio faciendi rem sacram, idque necessarium est ad perficiendum Sacramentum; quamvis necessaria non sit intentio delendi peccata, quod non ad Sacramentum pertinet, sed ad reformationem intentionis. Et quamvis D. Thomæ verba satis perspicua sint, majorem tamen habent lucem, si conferantur cum iis, quæ habet 3. p. q. 64. art. 10. ubi objicit sibi illud idem, quod nobis opponunt Adversarii, dicens: *Videtur quod intentio recta ministri requiratur ad perfectionem Sacramenti. Intentio enim ministri debet conformari intentioni Ecclesiæ; sed intentio Ecclesiæ semper est recta: ergo de necessitate ad Sacramenti perfectionem requiritur intentio recta ministri.* Huic autem objectioni ita respondet: *Ad primum ergo dicendum, quod Ecclesiæ intentio recta est, & quantum ad Sacramenti perfectionem, & quantum ad Sacramenti usum: sed prima reformatio perficit Sacramentum, secunda operatur ad meritum; & ideo minister qui conformat intentionem suam Ecclesiæ quantum ad primam reformationem, non autem quantum ad secundam, perficit quidem Sacramentum, sed non sibi ad meritum.* Ad perfectionem ergo Sacramenti, idem S. Thomas requirit, ut minister conformet se reformationi Ecclesiæ intendenti perficere Sacramentum, licet necessarium non sit, ut se conformet Ecclesiæ intendenti quoque Sacramentorum effectum, idest remissionem peccati.

At progrediamur ad alteram thesisi confirmationem. Tridentina

Synodus scfs. xiv. cap. vi. definit non perfici Sacramentum Pœnitentiæ, *si Sacerdoti animus serio agendi, & verè absolvendi desit*. Hoc sane in loco duo requirit in Sacerdote Synodus Oecumenica, videlicet, *animum serio agendi, & animum verè absolvendi*. Per *animum vero serio agendi* nequit sancta Synodus intelligere aliud, quàm intentionem peragendi serio ritum externum. Per intentionem ergo *verè absolvendi* intelligit intentionem aliquam diversam ab intentione peragendi serio ritum externum. Hæc autem intentio quænam erit, nisi intentio faciendi *Sacramentum, ut Sacramentum?*

Respondet Contensonius pag. 213. hoc argumento sententiam suam confirmari: etenim, inquit, sententia judicis sedentis pro tribunali serio prolata habetur ut valida, quicquid iudex interius intendat ac molitur. Idem ergo iudicium ferendum erit de Sacerdote absolvente. P. Serry pag. 90. & Auctor Operis de Re Sacram. pag. 112. inquit, non id a Concilio definitum, ut Sacerdos debeat intendere remissionem peccatorum, inde enim sequeretur requiri intentionem producendi effectum; sed a Tridentino confixum esse errorem Lutheri omnem efficaciam tribuentis fidei suscipientium, & asserentis ratum Sacramentum etiam mimicè collatum, datamque joco absolutionem; & consequenter nihil aliud a sacrosancta Synodo præscribi, quam formæ absolutionis rectam pronuntiationem. Adhibet idem responsum Gaspar Jucnin cit. art. 3. §. 1. quod confirmat verbis, quæ ibidem a Concilio subiiciuntur: *Is esset salutis suæ negligentissimus, qui Sacerdotem joco absolventem cognosceret, & non alium serio agentem requireret*.

Quamquam tamen hæc tanta confidentia reponant, ut scribant futilem esse argumentationem nostram, asserantque nos prava canonis intelligentia aut fallere, aut falli; utinam non ipsi potius fallantur, quos ab animo fallendi arbitror esse alienos. I. Enimvero quod respondet Contensonius, iudicio clarissimorum Theologorum absurdum est, errorisque plenissimum. Doctrina quippe est ineluctabilis nullum actum iudiciale esse validum in foro conscientiæ, si fiat absque interno consensu; tametsi in externo foro validus reputetur. Quid ergo habet similis comparationis valor sententiæ absolventis in foro fori cum valore sententiæ absolventis etiam in foro interno? In externo foro absolutio est valida, si serio proferatur sententia a Iudice; nulla est si proferatur ludicre & mimice. In foro igitur interiori valida erit, si sit interior deliberatio absolvendi; irrita ac nulla, si desit. II. Confixum a Tridentino errorem Lutheri, ultro fateor: sed quod spectat ad absolutionem joco datam, proscriptum est hæreticum dogma illis verbis, *si Sacerdoti desit animus serio agendi*; sequentibus autem aliquid aliud portenditur. Quid istud sit, videor mihi percipere ex ipso capite Tridentini, ubi definit absolutionem Sacerdotis *non esse*

*esse solum nudum ministerium, vel annunciandi Evangelium, vel declarandi remissa esse peccata, sed ad instar actus judicialis, qui ab ipso velut a iudice sententia pronuntiatur.* Duo ergo asserbat Lutherus, unum valere Sacramentum etiam collatum mimicè; alterum, Sacerdotem non exercere actum aliquem judicialem, sed tantum declarare remissa esse peccata; uterque namque error fluit ex impuro illo fonte nefarii dogmatis, fidei dumtaxat sanctificandi vim adscribentis. Itaque Concilium declarans nullum Sacramentum Pœnitentiæ, *si Sacerdoti desit animus serio agendi*, damnat errorem Lutheri affirmantis Sacerdotem etiam jocosè absolvere, & requirit intentionem serio peragendi ritum externum: dum verò addit, *si desit animus verè absolventi*, damnat dogma Lutheri asserentis Sacerdotem non habere iudicis auctoritatem, neque absolvere, sed tantum declarare remissa esse peccata; ideoque sancta Synodus præter intentionem illam externam, quæ sita est in seria pronuntiatione formæ absolutionis, exigit intentionem *verè absolventi*, sive intentionem internam exercendi actum judicialem. III. Revera si desit interior animus absolventi, non exercetur actus judicialis in foro interno: aliud quippe est velle exterius proferre verba, aliud est velle revera absolvere, & exercere in foro interiori actum judicialem. Si ergo Sacerdos velit exterius pronuntiare verba, interiùs autem dicat, *Nolo absolvere*; quo pacto actum judicialem exercebit, & verè absolvet? Nec nos proinde adstruimus necessitatem intentionis *explicitæ* remittendi peccata; sed necessitatem intentionis internæ conficiendi cum prolatione formæ absolutionis, & applicationis ejusdem ad actus pœnitentis, verum ac proprium Sacramentum, cujus virtute remittuntur peccata; ut explicatum est paullo supra. IV. Etiam si Tridentina Synodus hoc unum definisset, ratum non esse Sacramentum joco collatum; nescio quodnam effugium hinc eruerent Vindices Catharini. Non solum enim videtur Concilium damnare irrisionem, quæ se prodat exterius, ut autumant adversarii, sed qualemcumque irrisionem etiam internam; primò, quia absolutè inquit, *si desit animus serio agendi*; deinde, quia licet Lutherus eo arrogantia devenerit, ut dixerit ratum Sacramentum mimicè, & externo joco peractum; ceteri tamen Novatores emollientes Lutheranum deliramentum affirmavere non officere Sacramentis *subfannationem internam*; ut liquet ex Calvino in Antidoto Concil. Trid. ad can. xi. sessionis vii. & ex Kemnitio in Examine ejusdem canonis: postremo quia apud Deum non minus subfannator est qui irridet animo, quam sit qui ludit fictione externa; ac juxta doctrinam Catholicam *animus serio agendi* non requiritur ad excitandam fidem sono verborum, sed ad conficiendam rem sacram actu humano, consilioque rationis. Ergo Sacramento officit quoque subfannatio tantum interna. At qui

inatus

intus in corde suo statuit, *Nolo consecrare, nolo absolvere*, nonne intus simulat, nonne intus actionem sacram subannat? Itaque non habet intentionem & animum serio agendi. V. Postremo qui in corde suo ita statuit, *Nolo baptizare, nolo absolvere*, statuit quoque in corde suo simulare externo ritu quod facit Ecclesia. Qui autem statuit simulare, quod facit Ecclesia, non habet intentionem istud serio agendi. Igitur non habet intentionem serio agendi, qui ita in corde suo decernit, *Nolo baptizare, nolo absolvere*.

Prob. propositio etiam sacris literis thesi præcedenti productis, ex quibus liquet Sacerdotes esse ministros Christi, & tales, quibus collata est conficiendi Sacramenta potestas, ut legitur Joan. xx. 23. & in priori Ep. ad Corinth. iv. 1. Tales profecto ministri debent agere Christi nomine, debent exercere in aliquo Sacramento actum judicalem, debent consecrare subjectam materiam. Id verò cum sola intentione externi ritus quomodo consistat, profecto non video. Non ergo sufficiens est hæc tantum intentio. Minorem probo; quoniam opus peractum cum nuda intentione ritus externi est indifferens ut sit peractum nomine Christi, aut nomine alterius cuiuspiam, præsertim quando nullum Dei, aut Christi nomen in forma Sacramentali pronuntiatur, ut in Eucharistica panis consecratione: est præterea indifferens ut sit opus sacrum, aut profanum, uti ostendam infra; est denique indifferens ut sit actus judicialis exercitus tantum in foro externo, an in foro externo & interno. Si ergo in Sacramentis conficiendis necessaria est intentio, qua Sacramentum perficiatur nomine Christi, qua conficiatur res sacra, qua exerceatur judicialis actus; sufficiens non erit ad Sacramentum perficiendum nuda intentio ritus externi.

Resp. Hyacinthus Serry pag. 134. aliud requiri ad validam Sacramentorum dispensationem, aliud ad religiosam, & piam. Ad primum sat est, si serio prudenterque id velit homo minister, quod uti sacrum est institutum a Christo: ad alterum necessarium insuper est, ut quod fidelibus administrat, tale velit esse, quod Christus instituit; & ratio decretoria est, quia non habent ritus illi a ministrantium ingenio, quod sacri sint, quod Sacramentales sint, sed a Christo institutore, legislatore, atque magistro. At Pater Le-Droin pag. 99. non solum eadem reponit, verum etiam probatione nostra sententiam communit suam, quoniam solus Deus in celebratione sacrorum mysteriorum gratiam operatur, nec aliud sunt hominis ministrantis partes, quam illud exterius exequi, quod est divinitus imperatum. Addit seq. pag. esse merum ineptumque cavillum eorum, qui dicunt illum non esse ministrum Sacramenti, qui suam interius cohibet intentionem, suoque operi reluctatur; nam si ponit ritum externum, quomodo non vult conficere Sacramentum? Nonne insanien-

is esset ignem stuppæ admovere, & interius dicere, *Nolo ut ignis comburat stuppam?* aut semen mandare terræ, & interno animo id statuere, *Nolo semen esse fructiferum?* Ita penitus esset infans, qui seridè externum ritum celebraret, interius autem diceret, *Nolo conficere Sacramentum.*

His nos nequaquam possumus acquiescere. I. Falsum est externos ritus habere a solo Christo institutore, ut sint Sacramentales & sacri; non enim Christus per se, sed per ministros Sacramenta operatur, nec per ministros quoscunque, sed per ministros præditos potestate. Si ergo hi nolint conficere rem sacram, non efficiunt: quemadmodum si Christus det alicui potestatem miraculorum, quamvis miracula virtute Christi patrentur, si minister verbotenus diceret mortuo, *Surge*, in corde autem suo, *Ne surgas*, nequaquam uretetur potestate a Domino accepta, nec mortuus resurgeret, ut rectè animadvertit Suarezius. Ac præterea si sola institutio Christi sufficit, ut res sit sacra; cur sacra non est, si peragatur a mimo? cur non est sacra, si desint circumstantiæ, & quis mysteria celebret in theatro, in platea? Quia, inquirunt, Sacramenta perfici debent humano more, ideoque animo serio agendi. Rectè quidem: igitur etiam ab animo agentis, non a solo Christo legislatore pendet, ut externi ritus sacri, & Sacramentales sint. II. Dens quidem gratiam operatur in Sacramento, & huic sua divina virtus existit, nec necessaria est in ministro intentio producendi gratiam, quam Sacramentum efficit virtute sua. At Sacramentum non producit ipsam gratiam, ut est ritus tantum externus, sed *formaliter* ut est Sacramentum. Si ergo ad perficiendum Sacramentum requiritur intentio ministri, ut fides docet; ad hoc ut ritus externus sit Sacramentum, habens in se virtutem producendi gratiam, requiritur in ministro intentio faciendi ritum externum *formaliter* ut Sacramentum. III. Si combustio, segetumque procreatio esset opus aliquod *morale* habens efficientiam a consilio operantis; ignis applicatus stuppæ ab eo qui diceret, *Nolo ut comburas*, non esset elementum adurens, & granum tritici mandatum terræ ab agricola, qui diceret, *Nolo ut sis semen fructiferum*, non esset semen. Atqui Sacramentum est opus *morale*, quod perficitur proposito ministrantium: igitur si ministrans ponendo externum ritum, intus dicat, *Nolo Sacramentum conficere*, ritus externus non erit Sacramentum. IV. Si ratiocinatio nostra est merum ineptumque cavillum, & non est potius cavillatio allatum exemplum ignis ac seminis; nonne eadem ratione heterodoxi poterunt arguari, dicentes: si mimus stuppæ apponat ignem, comburitur, si joco agricola semen projiciat, illud germinat; igitur si minister ludicre profundat aquam, baptizat? Non id assentientur adversarii, & reponent disparera esse rationem, in applicando causam natura-

lem.

lem, & in efficiendo opus morale. Fateantur ergo se potius esse cæ-  
villatores, qui exempla adversus nos adhibent hujusmodi, & pa-  
tiantur & nos respondere, discrimen esse maximum inter ritum solum-  
modo externum, & ritum sacrum.

Insuper thesis nostra confirmatur propositione xxviii. inter  
damnatas ab Alex. VIII. die 7. Decembris anno 1690. *Valet baptis-  
mus collatus a ministro, qui omnem ritum externum formamque ba-  
ptizandi observat, intus verò, in corde suo, apud se resolvit, Non  
intendo facere quod facit Ecclesia.* Poterat ne expressius contraria  
sententia, ut a recentioribus propugnatur, rejici ac reprobari?

Gaspar Juenin primò respondet Canonistas Gallos, multosque  
alios in Christianis provinciis non habere tanquam ratum decretum  
ullum Transalpinum, nisi ab ipso Papa immediatè emanaverit, ju-  
dicia autem à Romana Inquisitione lata per se, etiam quoad forum in-  
ternum, Gallos non obligare. Deinde ait propositionem, prout jac-  
cet, falsam esse; pronuntiatur enim de quocunque ritu externo,  
sive serio, sive mimicè peractò, ideoque merito damnatam in sensu  
Lutheri, cujus prava dogmata quidam per Belgium temerè renova-  
bant. Hoc idem reponit expolitus Auctor Op. de Re Sacram. pag. 113.  
& Hyacinthus Serry in Vind. vind. pag. 109. Is ultro juramento testa-  
tur se nonnullos primæ notæ præfules consuluisse, qui affirmare in  
ea propositione longe aliud a Catharini systemate reprobari. Addit,  
si istud fuisset proscriptum, nequaquam ausos fuisse illud propugnare  
prædictum Jueninum Doctorem Sorbonicum in Commentario Histo-  
rico nunquam à Romana Sede damnato, nec Franciscum Genettum  
in Theologia Morali Clementi XI. nuncupata. Addit quoque pro-  
mulgatam anno 1725. jubente Benedicto XIII. Summam Alexandri-  
nam; in qua Tom. 1. pag. 32. expressè traditur sententia, quam ipse  
vindicat. Commemoraverat pag. 33. Natalem Alexandrum, qui  
etiam post damnatam propositionem, ac nostra serè ætate floruit in  
literaria Republica.

Verùm prior Juenini responsio facili ratione convellitur. Prin-  
cipio enim si ita fas est opinari Gallis theologis, non tale ingenium  
est nobis, qui Romana decreta æquiori veneratione prosequimur.  
Illud etiam a Theologis tali calamo utentibus scire peroptamus, un-  
denam sit, quod ubi decreta Romæ emanata pro se faciunt, eadem  
exscribunt, urgent, amplificunt; ubi autem adversantur sibi, ea-  
dem inofficiose dimittunt? Præterea, etsi in proscriptione illarum  
propositionum nullam Romanus Pontifex sententiam pronuntiavisset;  
non est tamen supremæ Inquisitionis Senatus aliquis confessus in-  
fimi subellii Theologorum, sed Purpuratorum Patrum, virorumque  
plurium doctrinæ laude præstantium; quorum decretis nulla compa-  
randa est cujusque privati Scriptoris auctoritas. Illius præterea Con-  
grega-



gregationis Præfex est Summus Pontifex, qui hoc præsertim in casu commisit quidem xxxi. propositionum examen *pluribus in sacra Theologia Magistris, & deinde Eminentissimis ac Reverendissimis DD. Cardinalibus contra hæreticam pravitatem generalibus Inquisitoribus*, sed, ut legitur in decreto, *idem Sanctissimus Pontifex, suffragiis Inquisitorum, & Consultorum maturè consideratis, prædictas propositiones proscripsit*. II. Non est melioris notæ responsio altera; siquidem cur iterùm ambiguo verborum complexu damnare hæreticam assertionem, tam perspicue ab Oecumenica Synodo anathemate confixam? Deinde figmentum singulare est, suspicari latentem Novatorum hæresim de mimica administratione Sacramentorum, ubi hujus hæresis nec minimum exstat vestigium. Ad hæc propositio ab Alex. damnata, non est, ut inquit, crudè prolata, æquivocis contexta verbis, & enuntiata de quolibet ritu externo etiam jocosè peractò; sed disertè, singillatim, appositè exprimit oblationem animi, oppositamque intentionem, non exteriori ludificatione apertam, sed secreta fraude conceptam, animoque delitescentem; & ne eludi queat futili cavillatione, non uno, sed vocabulis tribus, illa sola interior oblatio expressa est, INTUS. IN CORDE SUO. APUD SE. Insuper cum nonnulli ex Theologis nostris Lovanienfibus intentionem externam propugnassent, secuti Farvacquesium, quo nemo validius pro ea decertavit, emanato tamen S. Inquisitionis decreto, quamquam optimè noscerent doctrinam per Belgium manantem, qui postmodum scripta edidit, exuerunt penitus placitum Farvacquesii, tanquam ab Alex. VIII. eliminatum, ut constat ex Leonardo Vanroy Tom. IV. pag. 57. & Aurelio Piette Tom. V. pag. 257. Tandem Franciscus Henno Belga Theologus Tract. 1. de Sacram. disp. 1v. q. 2. art. 2. pag. edit. Ven. 258. *Dicta propositio*, inquit, *desumpta est ex thesi cujusdam Doctoris mihi cogniti, & familiaris, qui præcisè adversariorum sententiam sustinebat*. III. Nihil efficit responsio postrema. Qua enim libertate Juenin sententiam propugnet suam, apparet ex dictis. In Genetto Tom. 111. Tract. 1. cap. 4. nil traditur de intentione, quod communi opinioni repugnet: in Resolut. autem casuum in Append. pag. 35. ait ille quidem sufficere exteriorem consensum in collatione baptismatis, sed loquitur de intentione subjecti, non autem ministri: qua in re nulla est difficultas. Resolutionem aliquam juxta sententiam oppositam nostram, nisi cæcus sum penitus, in Veneta edit. non video. Si expuncta sit, in adversarios recidit objectatio. Natalis Alex. lib. 2. Theologiæ Moralis de Sacramen. in gen. art. 3. Regula 1. pag. edit. Parisiensis 186. postquam plura de sententia Catharini scripserat, *Cum tamen*, inquit, *alii sententiam Catharini rejiciant, in eaque hypotesi, quam exprimit regula, cujus in explicatione versamur, iterandum censeant Sacramentum, saltem sub conditione, quod*

*id tutius sit, nullique periculo obnoxium videatur, consultius esse existimo, si quando casus emerferit in regula expressus, ut Sacerdotes in hac ambiguitate questionis Episcopum rogent, quid facto opus sit, Episcopus vero si res moram patiatur, & necesse judicet, Sedem Apostolicam consulat.* Si Consultores aliqui significarent Patri Serry non peti anathemate sententiam Catharini; de ea illud idem protulere iudicium, quale diximus hujus disputationis exordio tulisse olim Vasquesium, nuperque Tournelium. Quantum ad Summam Alexandrinam, videtur nobis excludi eo loci necessitatem intentionis finis, non Sacramenti, & mentem perditissimi illius Sacerdotis exercentis magicas artes, & habentis *intentionem infantes sibi oblatos devovendi diabolo*, fuisse rectam, (ut verbis utar Divi Thomæ) quantum ad Sacramenti perfectionem, non quantum ad Sacramenti usum: supersticiosi quippe, & malefici abutuntur rebus, quas recte sciunt a nobis haberi ut sacras, & intendunt id facere in diabolicis initiationibus, quod nos in sacris mysteriis peragimus, Sacerdotaies vestes, lustralem aquam, Scripturæ verba sacrilegio usurpantes, non induimenta, quæ norunt esse profana, lymphasque, suffumigationes, ritusque communes. Atque ita intendunt simul Sacramenta conficere, iisque ad perniciem abuti. Quamobrem probatum minime inficiamur baptismum collatum ab homine hujus furfuris, Ludovico Gaufredo Parocho Massiliensi, cujus gesta nobis obsecrat illustris Serrius cap. vi. pag. 45. Ceterum haud inusitatum est probari, iterumque cudi Auctorum volumina, etsi aliquid comprehendant erroneum, ob alia plurima utilia, & castigatè conscripta: ob quæ fortassis (absit censura verbo) permittuntur Juenini Commentarius Historicus, & eruditæ quorundam aliorum elucidationes. IV. Uno denique verbo poterant prædicta dispungi, nulla siquidem accedit probabilitas libris junioris cujuslibet, ex quo non constet illius opinionem rejectam esse a Sede Apostolica, ut constat ex prop. 27. damnata ab Alexandro VII. die 24. Sept. anno 1665. ideoque non perinde Jucnini, aut alterius cujuspiam sententia censenda est improbabilis, quod illam expressè Sedes Apostolica non rejecerit.

Uterius accedit robur assertioni nostræ ex propositione 1. inter proscriptas ab Innoc. XI. die 2. Martii anno 1679. *Non est illicitum in Sacramentis conferendis sequi opinionem probabilem de valore Sacramenti, relicta tutiore.* At tutior est sententia, quæ propugnat necessariam esse ad valorem Sacramenti intentionem internam a nobis expositam. Illicitum est ergo sequi opinionem probabilem intentionis externæ (si probabilis est tamen,) tutiore, quam nos propugnamus, relicta. Movit argumentum istud etiam perinsignem Theologum Ludovicum Habert Tom. v. pag. 75. five Tract. de Sacram. in gen. cap. xiii.

Resp.

Resp. adversæ sententiæ patroni cum erudito Contensonio p. 216. imo opinionem nostram nec tutam esse, nec remotam ab iteratorum Sacramentorum sacrilegio. Quid verò, addunt alii, probabilius quàm sententia ab Augustino tradita, propugnata a D. Thoma, expresse ab Innoc. IV. definita, & quam secuti sunt viri omni exceptione majores, Magister sent. Paludanus, Javellus, Farvacques, aliique quamplurimi?

At persistit adhuc præcedens argumentatio. I. Tutiozem esse sententiam nostram hinc liquet, quod validum esse Sacramentum in-teriori intentione collatum nullus adversariorum negat, validum esse collatum cum sola intentione externa negat Theologorum pars major; nullo autem iterationis sacrilegio obnoxium est, quod majori consensione ratum existimatur. Deinde, ut liberalis sim, & aliquam tribuam sententiæ oppositæ probabilitatem; nonne vitaretur iterationis sacrilegium, si iterum conficeretur Sacramentum sub conditione, ut innuit paulo supra Alexander Natalis? Ex quo insuper idem Alexander satius putet consulere Episcopos, Sedemque Apostolicam, quod etiam asseruit Farvacques pag. 128. quid colligitur, nisi sententiam nostram ex adversariorum confessione esse revera tutio-rem? II. Quod gloriantur de Augustini, Thomæ, & Innocentii IV. patrocinio, eorum confidentia est: quippe Augustinus de fallacia ac simulatione intentionis, præsertim ministrantium, ut infra dicam, nec verbum quidem. De Divo autem Thoma rectius judicium proferunt Cajetanus, Soto, Gonet, Sylvius, & ne innumeris innuam, Collegium Salmanticensium. Quantum vero in explicandis verbis Innocentii alucinentur supra ostendi, & paulo post accuratius evincam. Magistri sententiarum vellem audire verba; si enim depromantur ex iv. dist. v1. §. *Solet*, loquitur eo in loco de intentione regenerationis & finis; quemadmodum ratiocinatur Estius dist. 1. §. 23. tanta verborum perspicuitate, ut mirum sit doctissimum Contensonium pag. 169. inter suos connumerasse ipsum Estium, illi apertissime repugnantem. Nego etiam Paludanum adversariis nostris penitus consentire, idem-que opinor de Angelo Clavasio; ac subscribo in hac parte Vasquesio cit. disput. 118. cap. 2. num. 21. quamquam revera nonnullos in Catharini partes descendisse haut inficiar. III. Quicquid Antiquiores fuerint opinati; præclusam contendimus sententiarum libertatem, posteaquam accessit Pontificæ, ac supra productæ definitionis auctoritas.

Præterea positionem nostram confirmo ex Innocentio IV. in eodem Comment. ad Cap. *Si quis puerum*, ubi adversarii indubitatum existimant Jurisconsultum illum clarissimum Catharino adhærere. Verum ego ex Innocentio ad hunc modum plecto syllogisticum ratiocinium. Si vera sit sententia quam oppugnamus, baptizans puerum, veramque formam pronuntians, quam adhibet Christi Ecclesia, sed per-

versa fide credens formam hanc falsam esse (quod facile sibi persuadere potest, hæreticus aut Arianus, aut Paulianista) ideoque dicens in corde suo, *Nolo pronuntiare veram formam, nolo consecrere Sacramentum*, baptizaret ne puerum illum? Quid dubitas, inquirunt adversarii? Baptizaret utique, si serio veram formam pronuntiaret. At Innocentius IV. sentit oppositum, docetque in hac hypothese nullum esse baptismum; neque ex alio capite, quam ex defectu intentionis adhibendi formam illam, qua baptizans putat perfici Sacramentum. Igitur Innocentius manifeste adversariis nostris repugnat. Constat hujus ratiocinii vis ex verbis Innocentii ita num. 2. scribentis: *Si veram formam dicat, & non credat illam veram formam, sed aliam, non erit baptizatus; & hoc ideo, quia non intendit baptizare, quod ex eo apparet, quia formam veram dicere non intendit*. Rursus, si omnia juxta Ecclesiæ ritum adhiberentur, minister vero ita statueret in animo, *Nolo facere rem sacram, sed ablucere tantummodo corpus, ut sit in thermis, vel balneis; validum ne erit baptismus? Validissimum*, inquirunt. At non ita Innocentius, qui eo loci num. 8. scribit: *Nota quod ad hoc quod aliquis baptizatus sit, necessarium est, quod baptizans intendat baptizare, non tantum balneare, vel carnes lavare*. Perperam ergo Innocentius in adversantium partes invitus trahitur.

Respondent Innocentium ibidem asserere ratum baptismum, quamvis minister *non gerat in mente facere quod facit Ecclesia; imo si contrarium gereret in mente, scilicet non facere quod facit Ecclesia, sed tamen facit quia formam servat, nihilominus baptizatus est, dummodo baptizare minister intendat*.

At hæ ineptæ sunt elusiones. I. quia Innocentius illis verbis, *dummodo baptizare intendat*, exprimit intentionem faciendi rem sacram; distinguit enim, ut constat ex dictis, inter *baptizare*, & *lavare*. II. quia dum ait necessariam non esse intentionem *faciendi quod facit Ecclesia*, loquitur duntaxat de intentione effectus, sive, ut loquitur S. Thomas, de intentione faciendi quod facit Ecclesia *propter quod facit Ecclesia*; explicans enim Innocentius seipsum ait valere baptismum, etiam si baptizans non intendat baptizare *secundum intentionem petentis baptismum, id est, ut baptismus operetur quidquid operari potest*. III. quia si Innocentius explicandus esset juxta adversariorum nostrorum sensum, nec necessaria esset intentio faciendi ritum externum. Ecclesia namque in eorum sententia peragit tantum ritum externum; ideoque si per Innocentium necessaria non est intentio faciendi quod facit Ecclesia, nec intentio faciendi ritum externum erit necessaria. IV. quia Innocentius addit ministrum non baptizare, *si non intendat conferre quod alii baptizantes conferunt*, ideoque necessariam putat intentionem *implicitam* etiam effectus, quamvis recte asserat non requiri intentionem effectus *explicitam*. Intentio autem

tem istiusmodi est sola intentio faciendi rem *ut sacram*, quia tantum *ut sacra* producit effectum . Vide quæ diximus ad probationem hujus thesisi priorem . V. quia adversantium aliqui, ac præsertim nuperus Scriptor, dum ajunt verba, quæ obijciuntur, esse Innocentii III. & ab Innocentio IV. adscripta solemnibus juris decretis, scilicet cap. *Si quis pueram*, nimiam fidem, aut oscitantiam præferunt: quippe cap. *Si quis puerum*, nec ex Innocentio III. nec ex Innocentio IV. depromptum est, sed ex Alexandro III. verba autem Innocentii IV. nunquam inserta fuere Juris decretis: unde lectorem merito, ne cuilibet fidem præbeat, sed ut adeat fontes, commonefacimus .

Ad hæc probatur conclusio ex Rubricis Missalis Romani de defectibus in celebratione Missarum occurrentibus §. VII. ubi legitur: *Si quis habeat coram se undecim hostias, & intendat consecrare solum decem, non determinans quas decem intendit, in his casibus non consecrat, quia requiritur intentio* . Sed in tali casu est materia, prolatio formæ, & intentio ritus externi, quæ intentio a prolatione formæ deliberate perfecta inseparabilis est . Ergo præter materiam, formam, & intentionem externam, alia intentio ad consecrationem est necessaria. Insuper, si determinet illas decem quas consecrare intendit, illæ decem consecratæ sunt; undecima autem, quamvis coram posita, non est consecrata . Determinatio itaque, per quam Sacerdos intus decernat, *Nolo consecrare undecimam illam hostiam*, facit ne consecrata sit, quamvis externus ritus juxta Ecclesiæ consuetudinem peragatur .

Respondet eruditus Auctor de Re Sacram. pag. 114. Missalis Romani Rubricas non esse leges Ecclesiasticas, utpote collectas ex Theologorum Scholasticorum opinionibus . Addit in iisdem Rubricis quædam haberi, quæ Theologorum judicio incerta, vel falsa sunt: incertum est enim quod §. III. legitur, non confici Sacramentum, *si panis non sit triticeus*: cum plures affirmant idoneam esse Eucharistiæ materiam, panem ex grano quolibet sub frumenti genere contento, ut ex spelta, hordeo, &c. Falsum vero, omnibusque Orientalium Euchologiis contrarium, quod legitur §. v. post verba consecrationis, quibus utimur in Ecclesia Romana, *Si quis autem aliquid diminueret vel immutaret de forma consecrationis, non conficeret Sacramentum*; cum indubitatum sit Orientales singula verba consecrationis Calicis non pronuntiare. Inquit præterea etiam in Breviario Romano plura recitari, quæ revocantur in dubium. Respondet tandem insanum fore, & perridiculum consilium illud celebrantis; nam si revera vult consecrare tantum decem, cur undecimam ab altari non removet? Si non removet, peragere vult externum ritum divinitus imperatum, & omnes undecim hostiæ sunt consecratæ .

Ceterum prior responsio infirmæ admodum est; quanta enim diligentia Rubricæ fuerint dispositæ, apparet ex constitutionibus Pontifici-

tificum, quæ Missali Romano solent præponi: easdemque Rubricas contineri in Missali Parisiensi edito ab Archiepiscopis Francisco de Gondi, Harduino de Perefis, Francisco de Harlay, & Cardinale de Noailles, necnon in plerisque Missalibus aliarum Diocesium, testatur pag. 76. Habertus. Quare videtur superior sententia, non alicujus Scholastici, sed Ecclesiæ; nec desunt qui illam inter fidei decreta connumerent, ut Sylvius, & Henno. Etsi detur autem, collectam esse ex placitis Scholasticorum; nemo saltem negabit inter Scholasticos sententiam nostram esse communioem, & sententiæ Catharini præpositam a Rubricarum Auctoribus. II. Non est melioris notæ responsio insequens: enimvero quod §. III. asseratur pro materia Eucharistiæ solus *panis triticeus*, id conforme est Florentino Concilio, & decreto Eugenii IV. Tom. XI. Conc. pag. 536. Non potest ergo hac in re incerta dici rubrica, nisi incertum asseratur decretum irreformabile: quod si aliquis opinetur cum Cajetano necessariam materiam Eucharistiæ esse panem cujusque frumenti, quicquid reponet pro explicatione memorati decreti, illud nos respondebimus pro rubricarum vindicatione. Quemadmodum etiam frumentum dicitur quicquid emittit aristas, ut triticum, hordeum, milium, panicum, hominum, sesama, appellatum a frumine, vel a fruendo: ita triticum ex Varrone est quicquid ex spicis teritur; unde ex Plinio lib. XVI. cap. 7. reperiuntur tritici plura genera. At in §. v. non asseritur quamcumque formæ diminutionem, aut imminutionem reddere consecrationem nullam, sed additur, *si in ipsa verborum immutatione verba idem non significarent*; idque caute, ne propriam obrueret machinationem, scriptor peracutus subituit. Quid vero discriminis sit inter recitationem dubiæ historiæ, morum probitati nullatenus repugnantis, & expositionem sententiæ de nullitate Sacramentorum, nec ignorare arbitror barbitonfores. III. Sed & responsio postrema futilis est; siquidem fieri potest ut Sacerdos determinet undecimam hostiam non consecrare, ut communicaturo, quem novit sacrilege ad angelorum mensam accedere, absque ceterorum scandalo porrigat particulam non consecratam, nec tamen hanc ex aliarum numero ablegat, ne id communicaturus deprehendat: quod certo scimus ex simplicitate & ignorantia fecisse Sacerdotem quemdam Diocesis Samminiatis. Ex superiori itaque Rubrica certo colligitur necessariam esse determinatam intentionem consecrandi talem, vel talem hostiam, nec sufficere celebrationem externi ritus; ut apertè demonstrat in notis ad Theaurum sacrorum Rituum p. 2. Tom. I. pag. 760. vir præclarus, & Sac. Rit. Congreg. Consultor, Cajetanus Maria Merati.

Tandem demonstratur propositio ratiocinatione communi: Externæ actiones ad varios usus sunt prorsus indifferentes; ideoque etiam ablutio, tametsi fiat cum invocatione Trinitatis, ex se est indifferens  
ut

ut sit divina vel naturalis, ut sit profana vel sacra . At quod sua-  
pte natura indifferens est, debet determinari ad unum per aliquid  
aliud . Ergo ritus externus, ut sit Sacramentalis, per aliquid debet de-  
terminari . Id verò quidnam est, nisi intentio peragendi rem sacram ?  
Nititur momentum istud auctoritati D. Thomæ scribentis 3. p. q. 64.  
art. 8. *Quando aliquid se habet ad multa, oportet quod aliquid deter-*  
*minetur ad unum, si illud effici debeat . Ea verò quæ in Sacramentis*  
*aguntur, possunt diversimodè agi; sicut ablutio aquæ quæ fit in ba-*  
*pismo, potest ordinari & ad munditiam corporalem, & ad sanitatem*  
*corporalem, & ad ludum, & ad multa alia huiusmodi: ideo oportet*  
*quod determinetur ad unum, idest, ad sacramentalem effectum per*  
*intentionem abluentis: & hæc intentio exprimitur in verbis, quæ per*  
*Sacramenta dicuntur .*

Respondent adversarii se totam hanc argumentationem probare,  
nullatenus ea Catharini sententiam concuti; determinatur quippe ex-  
terna actio ad constituendam rem sacram, per seriam formæ a Chri-  
sto institutæ prolationem: idque affirmat S. Thomas, dum ait, *Hæc*  
*intentio exprimitur in verbis, quæ per Sacramenta dicuntur* . Addunt  
determinari externum ritum ad actionem sacram etiam per circum-  
stantias locorum ac temporum, puta si ablutio fiat ad fontem Ba-  
ptismalem, ac præsentem patrino, non domi a muliercula infantem la-  
vante, aut si consecratio fiat a Sacerdote vestibus sacris induto, & ad  
altare accedente, non inter epulas, vel in commensatione profana .

Sed cum multum dicere se arbitrantur, nihil planè dicunt . I.  
Principio falsum est, per intentionem seriò agendi ritum externum,  
actionem indifferentem determinari, ut sit Sacramentum . Etenim  
externa ablutio, sicut indifferens est ut serio, vel mimicè peragatur,  
ita indifferens est ut sit profana, vel sacra . Sed quoniam est indiffe-  
rens ut serio, vel mimice peragatur, requiritur intentio faciendi rem  
seriò . Quia ergo est indifferens, ut sit profana, vel sacra, necessaria  
est intentio faciendi rem sacram . Hinc Estius, quem immerito pro se  
laudat Vinc. Contensonius, dist. 1. §. 23. inquit: *Ea porro dicitur in-*  
*tentio faciendi, quod facit Ecclesia, quæ quis intendit actionem, non*  
*ut est actio profana aut vulgaris, vel etiam mimica & derisoria, sed*  
*ut est singularis quadam actio, quæ in Ecclesia, id est, apud Christia-*  
*nos solemnè more fieri conspicitur* . Ex quibus verbis hoc pacto in-  
stauratur argumentatio . Dum minister abloquit infantem, vel inten-  
dit facere quod a Christianis solemnè more peragitur, vel quod fieri  
solet in balneis, nihil cogitans de Christianorum institutionibus . At  
si intendat facere quod a Christianis solemnè ritu peragitur, perfici-  
cit rem sacram . Igitur si efficere velit quod fieri solet in balneis, pe-  
ragit actionem tantum profanam . Rursus, ut ratiocinatur Eminen-  
tiss. Gotti Tom. xiii. pag. 106. ac nos diximus supra; sicut materia indif-

indifferens est, ita etiam est indifferens significatio verborum formæ. Necessè est autem, ut materia indifferens determinetur a forma. Necessum est igitur, ut indifferens significatio verborum determinetur ab intentione. Sed determinari nequit ab intentione serio peragendi exteriorem ritum *utrunque*, quoniam exterior ritus serio quoque peractus adhuc indifferens est, ut sit profanus, aut sacer. Ergo determinari debet per intentionem peragendi ritum externum ut sacrum.

II. Juxta D. Thomam intentio, *qua verbis exprimitur*, debet esse talis, qua minister *se subjiciat principali agenti*: ita Angelicus cit. art. 8. ad 1. *ut scilicet intendat facere quod facit Christus, & Ecclesia*. Per intentionem autem peragendi solum ritum externum, quomodo minister proposito mentis suæ subjicitur Christo? Quomodo agit nomine Christi? Quomodo exercet potestatem acceptam a Christo? Rursus S. Thomas proximo art. 10. docet perverti intentionem quantum ad perfectionem Sacramenti, *cum aliquis non intendit Sacramentum conferre, sed derisorie aliquid agere, precipue quando suam intentionem exterius manifestat*. Igitur quamvis derisio occulta sit, nec se prodat animus non conferendi Sacramentum, Sacramentum ipsum nequaquam perficitur. Ut enim inquit Sylvius, addens S. Thomas, *precipue quando suam intentionem manifestat*, indicare voluit defectum illum esse contra veritatem Sacramenti, etiam cum non manifestatur exterius: si vero manifestatur, non tantum Sacramentum esse nullum in se, verum etiam in Ecclesiæ judicio. Nec male loquitur Sylvius; siquidem ad hunc modum ratiocinamur: Derisio exterius manifestata reddit Sacramentum nullum exterius, & in judicio Ecclesiæ; igitur derisio latens in animo reddit Sacramentum nullum in se, intrinsecè, & in ratione Sacramenti; ideoque castigatissime S. Thomas ait excludi veritatem Sacramenti per *intentionem ludicram*, eodem art. 10. ad 2. Non ait, per jocum, ludumque patentem; intentio quippe ludicra potest in mente latere. Adde quæ supra ex eodem art. recitavimus, ad easque Sylvium, Salmaticenses, ac Thomistarum ceterorum notissima Commentaria.

III. Quod addunt externum ritum determinari, ut sit Sacramentum, a circumstantiis, est inane perflugium: nam primo loci ac temporis adjuncta non sunt illa tria, quibus Sacramentum perficitur, ideoque efficere nequeunt, ut actus exterior ad perfectionem Sacramenti confurgat. Deinde hujusmodi circumstantiæ commonstrant quidem intuitibus peractam ceremoniam haberi ut sacram; sed Sacramenta non debent esse signa duntaxat explicativa, ut hæretici autumant: debent esse efficientia, & practica, & præter externam imaginem, divinam continere virtutem, eis per ministrantium operationem a Christo institutore collatam. Præterea si mulier domi, etiam extra mortis periculum, cum intentione recta ac debita forma baptizaret infantem, validus esset bapti-



baptismus, & tantum baptizatus deferendus esset ad Ecclesiam, ut in illo sacræ adimplerentur ceremoniæ; circumstantiæ ergo fontis baptismalis, templi, loci, & istiusmodi reliquæ spectant ad sacrorum rituum celebritatem, non ad perfectionem Sacramentorum.

AD EA, QUÆ OBJICIUNTUR, RESPONSIO.

Plura adversus veritatem hæcenus propugnatam solent opponi, omniaque ad quatuor capita reducuntur, videlicet ad Ecclesiæ consuetudinem ac definitiones, ad Augustini adversus Donatistas disputantis quædam testimonia, ad S. Thomæ inconcussam, ac in materia præsertim ista probatam doctrinam, atque ad argumenta rationi innixa, quæ Catharinus primùm, & Salmeron, deinceps Contentonius, Juenin, Serry, alique contexuerunt. Ex priori itaque capite objiciunt primò: Constat ex veteri & perpetua Ecclesiæ disciplina, sæpenumero pronunciata fuisse nulla Sacramenta, in quibus debita materia, præscriptaque forma non fuerunt adhibita, necnon quæ administrata fuerunt ab ebriis & energumenis; nunquam tamen pronuntiatum legimus tale iudicium, si quis voluntatem contrariam in mente gesserit, serioque perfecerit externum ritum. Dummodo ergo ritus iste celebretur, Sacramentum est validum. II. Contra Donatistas iudicium tulit Ecclesia, Sacramenta *verbis Evangelicis consecrata* pollui non posse cujuscunque sceleribus, nec reddi nulla ob aliquorum ministrantium perversitatem, ut apparet ex libris Augustini, & Optati, atque ex Collationibus Carthaginensibus; id verò fancitum est, quia Sacramentis inest divina virtus, qualiscunque sit ministrator. Quamquam ergo is oblectetur animo, perficit tamen mysteria sacra. Nec juvat distinguere inter perversitatem intentionis, & morum improbitatem; non enim unquam Ecclesiæ statuta distinctionem illam adhibuerunt; immò *sub communi nomine improbitatis* comprehenditur ipsa latens infidelitas, animique oblectatio. III. Si Sozomeno, aliisque præstanda est fides, Alexander Episcopus Alexandrinus diligenti præmissio examine ratum habuit baptismum ab Athanasio inter ludendum collato; Alexander autem, inquit præcitatus Historicus, baptizatos pueros *accurate interrogavit quidnam illis dixisset, fecissetve ladi ipsius Episcopi, cumque omnia juxta ordinem Ecclesiasticum exacte in illis servata esse deprehendisset*, validum censuit baptismum: non legimus interrogatum Athanasium qua intentione id fecisset, sed tantum pueros de observatione ritus Ecclesiastici. Optime ergo noverat Alexander hanc observationem externi ritus sufficere, nec intentionem aliam requiri ad validitatem baptismatis. III. Nicolaus I. ad Consulta Bulg. cap. 104. definit ratum esse baptismum a Judæo collatum, si servavit præscriptam formam,

nam, nihil de intentione definiens: idem habetur apud Grat. de Consecrat. dist. 4. cap. *A quodam*. De Innoc. IV. ejusque Commentario in cap. *Si quis puerum*, dictum supra. In provinciali Synodo Rothomagenſi anno 1581. & in Aqueſi anno 1585. probatus fuit baptiſmus Calvinistarum, quoniam & hi servant Ecclesiæ ritum & formam. Denique Theologorum judicio, & Sorbonæ ſententiâ habitum fuit ut ratum ac validum baptiſma datum a Parocho Maſſilienſi, de quo ſupra, necnon approbatæ ordinationes Petri Lavardini, Episcopi Cœnomanenſis, qui teſtatus eſt nunquam ſe habuiſſe intentionem ordinandi, imò nec ſuſcipiendi Episcopatum; ut narrat Jacobus Samborius in ſolut. Caſ. Conſc. Tom. 2. caſ. 17.

Ref. Hucusque adverſarios nil prorsus, præter inania verba, produxiſſe. Ad primum namque affirmamus, dum Ecclesia decrevit nullum eſſe Sacramentum joco peractum, dum fancivit requiri intentionem faciendi, quod facit Ecclesia, dum proſcripſit propoſitionem, *Valeat baptiſmus*, &c. protuliſſe ſaltim consecutive judicium adverſus ſententiam, quam oppugnamus; quoniam ſententiâ noſtrâ nec eſt intentio recta, qua miniſtrans ſe Chriſto, & Ecclesiæ ſubjiciat, niſi proponat peragere Sacramentum; nec ſerio perſcicitur quod fit animi oblatione; nec valet baptiſmus cum apud ſe miniſter decernit non baptizare; nec denique Alexander VIII. proſcripſit Lutheranam doctrinam, ſed ſerpentem in Belgio novitatem; quæ omnia cum ſupra ſingillatim ſint a me commonſtrata, neceſſum non eſt modò cum lectorum faſtidio cadem repetere. Ad alterum primò dicimus, dum contra Donatiſtas approbatum eſt Sacramentum a quocumque miniſtro improbo collatum, *dummodo consecratum ſit verbis Evangelicis*, demonſtratam fuiſſe ſimul neceſſitatem intentionis internæ, quoniam verba, quæ diverſam ſignificationem patiuntur, ut *Baptizo, ſigno te*, &c. non conſecrant materiale elementum, niſi adſit intentio faciendi rem ſacram, ideſt, ut ſit ſolemni ritu a Chriſtianis: quamobrem ſi loquuntur de baptiſmo *consecrato* verbis Evangelicis, loquuntur de baptiſmo collato cum intentione peragendi rem ſacram; ſine qua intentione ablutio indifferens eſt, ut ſit proſana, vel *consecrata*. Deinde reponimus. controverſiam inter Catholicos, & Donatiſtas non fuiſſe de intentione miniſtrorum, ſed an valeret Sacramentum collatum ab improbis & hæreticis; nihil autem repugnat miniſtrantem eſſe improbum & hæreticum, imo paganum & ethnicum, & nihilominus proponere ſibi faciendum, quod novit a Chriſtianis haberi tanquam ſacrum & religioſum. Nec verum eſt perperam a nobis diſtingui inter perverſitatem fidei ac morum, & perverſitatem intentionis, cum Ecclesiæ Patres affirmant Sacramenta nunquam pollui ſcelere aliquo, & perverſitate miniſtrantium; primò quia officere Sacramentis aliquam perverſitatem, ipſi adverſarii fatentur, haud negan-

gantes nullum eſſe baptiſmum ludicra aſtione datum ; & ludicra ipſa aſtio continetur *ſub genere perverſitatis* : ſecundò quia dum iniquiunt Patres Sacramentis divinam virtutem ineſſe, neque contaminari ulla miniſtrantium improbitate, uti ſupponunt materiam & formam, quia ſine his non perficitur Sacramentum ; ita ſupponunt intentionem faciendi rem ſacram, quia ſine hac intentione ablutio eſt aſtio indifferens aut profana, non *Sacramentalis* & myſtica : tandem quia diſtinguendam eſſe perverſitatem intentionis reſpectu Sacramenti, & reſpectu effectus qui Sacramentum conſequitur, & primam perverſitatem eſſe *cum aliquis non intendit Sacramentum conferre*, eandemque perverſitatem tollere veritatem Sacramenti, expreſſè docet S. Thomas 3. p. q. 64. art. 10. ut ſupra vidimus . Quomodo ergo Patres docent Sacramentis nequaquam officere quicquid comprehenditur *ſub communi nomine improbitatis* ? Ad tertium principio ſummopere miramur, cur nobis opponatur factum Athanaſii, cum ipſi adverſarii noſtri fateantur illud laborare maxima ſuſpicionem, atque hæreticis idem obſectantibus reponant haud repugnare quin Athanaſius, niſi grandævus ætate, jam adoleſcens, & Chriſtianis rudimentis imbutus habuerit veram intentionem . Quod ergo omnes adverſus hæreticos reſpondemus de intentione ſerio agendi, id ego reſpondeo Catharini patronis de intentione faciendi rem ut ſacram, quam intentionem potuit quidem puer Athanaſius habere . Si autem non habuit ; cum intentione hac deficiente doceant illi externum ritum determinari ad eſſe Sacramenti *a circumſtantii* ; dico, quod in eorum potius ſententia nullum fuiſſet Sacramentum collatum ab Athanaſio . Non enim ludebant pueri ad fontem baptiſmalem, ſed ad litus maris, nec ſacras veſtes induerant, ſed inſignia cartacea . Deerant ergo circumſtantiæ, quæ in eorum ſententia determinant externum ritum ut ſacer ſit, non profanus . Si autem ſacer fuit, determinari debuit ab Athanaſii intentione . Præterea novit Alexander tinſtos ab Athanaſio ſolos impuberes Catechumenos ; optime ergo percepit Athanaſium voluiſſe ritum illum perficere, non quomodocunque, ſed ut fiebat ab Epifcopo, qui ſolos Cathecumenos baptizabat, ut animadvertit cit. §. 24. in reſponſione ad obſectionem poſtremam illuſtris Eſtius . Ad definitiones num. 3. productas reſpondeo inde nihil poſſe ab adverſariis inferri . Nam quod attinet ad reſcriptum Nicolai I. interrogatus fuerat tantum de conditione miniſtri, non de intentione, ideſt, *an ratus eſſet baptiſmus datus a Judo, vel pagano* : nec in eodem reſcripto ullum invenies verbum de ritu externo ſeridè peractò . Adeas Tom. VII. Conc. pag. 548. Immo ſi Nicolaus eo loci expreſſe Catharini ſententiam tradidiſſet, facile demonſtrarem ex ipſis adverſariorum notationibus nil roboris argumento ipſorum ineſſe . Ibi enim Nicolaus abſque ulla verborum ambiguitate docuit ratum eſſe baptiſ-

*mum vel in trium personarum, vel in solius Christi nomine consecratum* : quod ob Nicolai rescriptum præter Scholasticorum plurimos affirmat Glossa ad præcitatum caput, *A quodam*. At oppositum tenent celebriores adversarii, præsertim Juenin differt. 2. de Sacramentis q. 4. cap. 3. art. 3. & in expolita dissertatione contra virum Cl. Josephum Augustinum Orsi cap. 15. Catharini eruditissimus Vindex. Is autem ad Rescriptum Nicolai cum Bellarmino, aliisque respondet Nicolaum in illo ad Consulta Bulgarorum responso, tamquam privatum doctorem a præcedentium Pontificum decretis apertissime descivisse, in his maxime, quæ ad propositam quæstionem non pertinebant. Atque hujus generis esset, si quid Pontifex eo in loco de intentione discruisset adversus sententiam nostram. At cum nihil penitus de intentione proferat Nicolaus, plura de hoc rescripto dicta sunt, quam postulabat inanis objectatio. De Innocentio autem, verbosior ero quam oporteat, si addam aliquid. Merito in Synodo Rothomagensi sancitum est non esse rebaptizandos redeuntes a Calvinistis ad Ecclesiam Catholicam; sed hæc definitio facta est contra eos, qui dubitabant de valore baptismi ab hujusmodi hæreticis collati, eo quod non haberent intentionem baptizandi in remissionem peccatorum. Ita cap. iv. num. 2. Tom. xv. Concil. pag. 826. His autem verbis excluditur necessitas intentionis finis, non intentionis faciendi rem sacram; ut mirum sit adversarios doctissimos eruditionis apparatu nobis, ceterisque rudioribus fucum facere. At Rothomagensis canon Aqueensem eodem Vol. p. 1225. dilucide exponit. Et quidem Calvinistæ, licet non credant conferri gratiam per Sacramenta, nec putent Ecclesiam Christi esse Ecclesiam Romanam, (quod ad Sacramenti veritatem minimè est necessarium) intendunt tamen baptizare, ut baptizatur in Christi Ecclesia: atque ad id contestandum baptizant *in actu publico*, ut ibidem affirmat utraque Synodus. De Parocho Massiliensi dictum supra, ac sæpe repetitum, qualemcumque malam intentionem finis, etiam propositum devovendi dæmoni baptizatos, stare cum intentione peragendi rem sacram. Quantum verò attinet ad Episcopum Cænomanensem, distinguenda est intentio suscipiendi ab intentione conficiendi Sacramenta; intentio quippe, de qua loquimur, in suscipiente requiritur ad obtinendam gratiam, non ad Sacramentum perficiendum, nisi sermo sit de iis Sacramentis, in quibus intentio concomitatur materiam, ut in Sacramento Penitentiae, ac Matrimonii: intentio autem ministri necessaria est, non ad effectum, sed ad perfectionem Sacramenti. Itaque Petrus Lavardinus, etiam si animo simulaverit, verè fuit inauguratus Episcopus, modo promotus non fuerit per vim externam, & omnino relutans, de qua re est etiam inter Doctores contentio. Sacramenta autem ab eo collata, si habuit *perverſam intentionem finis*, adhuc fuerunt valida; si *perverſam intentionem non peragendi rem sacram*, fuerunt nulla.

Secun-

Secundo loco obijciunt auctoritatem Augustini, qui de Baptismo lib. vii. cap. 53. num. 101. permixte quæstiones varias proponit. Prima est, *Utrum approbandum sit baptisma, quod ab eo qui non accepit, accipitur, si forte hoc caritate aliqua didicit quemadmodum dandum sit.* 2. *Utrum nihil intersit, quo animo accipiat ille cui datur, cum simulatione, an sine simulatione: si cum simulatione, utrum fallens, sicut in Ecclesia, vel in ea quæ putatur Ecclesia; an jocans, sicut in mimo: & quid sit sceleratius in Ecclesia fallaciter accipere, an in hæresi vel schismate sine fallacia, idest, animo non simulato: & utrum in hæresi fallaciter, an in mimo cum fide, si quisquam inter agendum repentina pietate moveatur.* 3. *Si tradens & accipiens fallaciter agant in ipsa unitate Ecclesia, utrum hoc magis baptisma acceptandum, an illud quod in mimo datur, si quis existat, qui fideliter subito commotus accipiat: an quantum ad ipsos quidem attinet homines, plurimum distet inter credentem in mimo, & irridentem in Ecclesia; ad ipsius autem Sacramenti integritatem nihil intersit.* Hæ sunt quæstiones ipsis Augustini verbis propositæ. Quid autem S. Pater respondet? Ostendit primum suam in definiendo modestiam: deinde ad quæstionem primam respondet, *habere eos baptismum, qui ubicunque, & a quibuscunque illud verbis Evangelicis consecratum, sine sua simulatione, & cum aliqua fide accepissent: quamquam eis ad salutem spirituales non prodesset, si caritate caruissent, quæ catholica infereretur Ecclesie.* Ad secundam respondet ad hunc modum: *Sicut jam præteritis majorum statutis non dubito etiam illos habere baptismum, qui quamvis fallaciter id accipiant, in Ecclesia tamen accipiunt, vel ubi putatur esse Ecclesia ab eis, in quorum societate id accipitur, de quibus dictum est, Ex nobis exierunt.* Ad tertiam denique respondet: *Ubi autem neque societas ulla esset credentium, neque ille qui ibi acciperet ita crederet, sed totum ludicre & mimice, & joculariter ageretur, utrum approbandus esset baptismus qui sic daretur, divinum iudicium per alicujus revelationis oraculum concordè oratione, & impensis supplici devotione gemitibus implorandum esse censerem.* Nota hoc ordine Augustinum suas responsiones contexere: nam ego fideliter verba ab exordio ad finem usque, tam quæstionum propositarum, quam responsionum exscripsi. Hinc sibi mire plaudunt adversarii de reportata victoria. Apertissime enim, inquirunt, docet Augustinus *ex majorum statutis stare ratum validumque baptismum, seu in Ecclesia, seu extra Ecclesiam, fallaciter & cum simulatione suscipiatur.* Igitur Augustinus negat necessitatem intentionis, quam nos propugnamus.

Dabo ceterorum responsa, deinde proprium subijciam. Solet primo responderi Augustinum nihil definitive pronuntiare; ait enim num. 102. *Sed nobis tutum est, in ea non progredi aliqua temeritate.* sen-

*sententia, quæ nullo in Catholico regionali concilio cæpta, nullo plenario terminata sunt.* Insurgunt adversarii contententes interpretationem hanc esse a mente Augustini alienissimam; hæc enim pronuntiat sanctus Pater de baptismo, qui initio confertur joco, & repentina pietate jocans mutatur; de fallacia enim absque hæsitazione pronuntiat, *Sicut jam præteritis majorum statutis non dubito eos habere baptismum, qui quamvis fallaciter id accipiant, &c.* Ideo Juenin ait Bellarminum, qui responsionem illam adhibet, Augustini verbis abuti: maxime cum S. Pater ibidem asserat, fallaces, sive dantes, sive accipientes, si postea prodantur, pœnitentia quidem, non autem iterato baptismo sanari. Bellarminus tamen Augustinum meliori ponderatione legit: nam modesta illa S. Patris declaratio præcedit quamlibet responsionem ad præcedentia quæsitæ, ut constat legenti; & si quis totum caput nolit expendere, cernat quo in loco scriptum sit in margine, *Responsio.* Nec quemquam movere debent præcedentia verba: *Si postea prodatur, nemo repetit, sed aut excommunicando punitur illa simulatio, aut pœnitendo sanatur;* nam excommunicatur, qui tradit fallaciter, *si agat in unitate Ecclesiæ,* idest, si simulet se esse catholicum, cum sit hæreticus; quæ simulatio non est simulatio intentionis, sed simulatio fidei: & *pœnitendo sanatur,* qui simulat recipiendo, cum baptismus recedente fictione revivificat; sed hæc simulatio est in subjecto, non in ministro. Quare hæc prior responsio firma persistit.

Respondent alii, utique Augustinum firmiter asseruisse validum ratumque baptismum fallaciter acceptum, & fallaciter datum. Sed numquid Augustinus cum *fallaciter* dixit, exclusit intentionem conficiendi Sacramentum? Minime: *Fallaciæ* nomine intelligitur simulatio fidei, sive simulatio eorum, qui non inseruntur Ecclesiæ, in Catholica tamen Sacramenta aut conferunt, aut recipiunt. Juenin §. 2. subiraicitur Estio, ac Sylvio, quod *fallaciæ* nomine interpretentur affectum ad peccatum mortale, ita, ut fallaces illi sint, qui ad sacra mysteria sine præparatione accedunt. Verum id nec Estius, nec Sylvius somniant. Nam Estius ad argumentum petiit ex lib. vii. de Baptismo Tom. iv. pag. edit. Duacii 22. hoc unum respondet: *De quarto loco respondemus dubitationem Augustini jam, quod ipse optat, remotam esse non unius, sed duorum Conciliorum generalium definitione: nec aliter Sylvius in 3. p. pag. edit. Antuerpiæ 225. Estius quidem explicat quædam alia Augustini loca de intentione, quæ in bonum vel malum finem dirigitur;* & me quidem iudice rectissime; sed nihil aliud profert ad objectionem, in qua versamur, præter id, quod dictum est nuper. At communior responsio asserentium loqui Augustinum de simulatione fidei, frustra ab adversariis exeutitur. Principio enim proferant, quæso, unum verbum, quod exprimat *intentionis* simulationem.

nem. Deinde commonstrent de sententia Ipsorum sermonem instituere Doctorem maximum, dum ait loqui se *ex præteritis majorum statutis*. Ubi nam statuta ista leguntur? Hoc unum statutum fuerat, rata esse Sacramenta collata ab hæreticis, a schismaticis, ab improbis: ideoque Augustinus *fallaces* dixit, qui simulant fidem, qui simulant unitatem Ecclesiæ, qui simulant probitatem. Præterea dum Augustinus ait, *Sed arbitremur aliquem etiam fallaciter dantem, cum & tradens & accipiens fallaciter agant in Ecclesia*, & infra, *Quamvis fallaciter accipiant, in Ecclesia tamen accipiunt, vel ubi putatur esse Ecclesia* ab eis, in quorum societate id accipitur, de quibus dictum est, *Ex vobis exierunt*: nonne aperte innuit se illos appellare fallaces, qui cum sint extra Ecclesiam, simulantes societatem Sacramenta accipiunt in ipsa Ecclesia? De hac ergo fallacia, de hac simulatione accipiendus est S. Pater.

Tradidi hæc, & vindicavi aliorum responsa: sed nisi desipiam omnino, in Augustini verbis nihil deprehenditur difficultatis. Mirum hoc lectori videbitur post tot objectantium strepitum, si solum Augustinum legerit apertis oculis. Prima quæstio, ut liquet, est *de baptismo dato ab eo, qui non accepit, sed curiositate aliqua didicit quemadmodum dandum sit*. Hic est paganus, a Christiano quodam edoctus quid apud nos solemniter peragatur, idque tradens quod didicit. In hoc negamus deesse intentionem faciendi rem sacram, & ideo recte Augustinus ad hanc quæstionem respondit ratum esse *baptismum ubicunque, & a quibuscunque accipiat*. Altera quæstio est *de baptismo ejus, qui accipit cum simulatione, sive fallens in Ecclesia, sive jocans, sicut in mimo, si inter agendum repentina pietate moveatur*. Hic est, qui petit baptismum a Catholico, vel a Schismatico, fallaci simulatione; aut si petat mimice, subito commotus convertitur. In hoc casu dicimus esse *simulationem fidei* ex parte accipientis, non *simulationem intentionis* ex parte dantis; quo in casu validus est baptismus: ideoque ait S. Pater: *Sicut jam præteritis majorum statutis, non dubito illos, habere baptismum, qui quamvis fallaciter id accipiant, in Ecclesia tamen accipiunt, vel ubi putatur esse Ecclesia ab eis, in quorum societate id accipitur*: ubi nonne perspicuum est loqui Augustinum de simulatione sola fidei ex parte accipientis? Certe, præterquamquod aperta sunt verba, tam quæ recitata sunt modò, quam quæ præcedenti numero extant in propositione quæstionis; nec simulat minister qui est in Ecclesia, nec ille qui putat se esse in Ecclesia; idest, non simulat Catholicus, non hæreticus, non schismaticus baptizans; etiam si baptizatus fallaciter vel fidem, vel hæresim, vel communionem schismaticorum profiteatur. Tertia quæstio est, utrum approbandus sit baptismus, *ubi nulla esset societas credentium, sed totum ludicre, mimice, & joculariter ageretur*. Ad hanc vero quæstionem quid respon-

spondet Augustinus? Respondet *divinum iudicium per alicujus revelationis oraculum concordi oratione, & impensis supplici devotione gemitibus esse implorandum*; quod non ait hæsitans de fidei dogmate nunc adversus hæreticos definito; sed tantum in casu expresso in postrema quæstione, *si quis existat qui fideliter subito commotus accipiat*. Puto tam exacta laudati cap. 1111. analysi penitus comprimi adversantium conatus.

At enim, inquit, ex Augustini principiis oppositum omnino concluditur. Etenim S. Pater adversus Donatistas ait effectum baptismi non pendere ex conscientia baptizantis, nam aliqui baptizatorum salus semper penderet incerta: docet spem non esse locandam in homine, ideoque a ministrorum moritis petendam non esse efficaciam Sacramentorum: commonstrat solum Christum esse justificationis nostræ auctorem; vide supra cap. xiv.

Resp. bene sapienterque omnia dici: effectus enim baptismatis non pendet a probitate ministri, ut Donatistæ autumabant, sed a merito Christi, & a virtute Sacramentorum: quæ tamen Sacramenta, cum perficiantur per ministros, nulla sunt si desit ipsorum ministrorum intentio. Nec sequitur deberi nos ob salutis incertitudinem continuo tristari; quoniam nec firmissimam gratiæ certitudinem habemus, ut diximus contra hæreticos similia objicientes, propositione transacta: nec spes nostra est in eo qui signa applicat, & determinat, sed in eo, qui iisdem signis virtutem contulit: nec denique necessariam dicimus in ministro intentionem largiendi gratiam, sed tantum intentionem perficiendi Sacramenta, quæ ut semen fructiferum, sensu superius explicato, gratiam ipsam producant. Verum in his argutiolis audiemus iterum oppugnatores.

Ex D. Thoma duo objiciunt, ac tertium addit Farvacques. Primum petitur ex art. 8. cit. ubi ad secundum ait: *Dicendum quod circa hoc est duplex opinio: quidam enim dicunt quod requiratur mentalis intentio in ministro, quæ si desit non perficitur Sacramentum: sed hunc defectum, inquit, in pueris, qui non habent intentionem accedendi ad Sacramentum supplet Christus, qui interior baptizat; in adultis autem, qui intendunt Sacramentum suscipere, supplet illum defectum fides, & devotio. Sed hoc satis posset dici quantum ad ultimum effectum, qui est justificatio a peccatis: sed quantum ad effectum qui est res & Sacramentum, scilicet, quantum ad characterem, non videtur quod per devotionem accedentis possit suppleri, quia character numquam imprimitur nisi per Sacramentum. Et ideo alii melius dicunt, quod minister Sacramenti agit in persona totius Ecclesiæ, cujus est minister: in verbis autem quæ profert exprimitur intentio Ecclesiæ, quæ sufficit ad perfectionem Sacramenti, nisi contrarium exterius exprimitur ex parte ministri, vel recipientis Sacramentum*, Ex quibus  
ver-



verbis ita argumentantur: D. Thomas refellit opinionem eorum, qui putant ad perficiendum Sacramentum requiri intentionem *mentalem*. Ergo censet sufficere propositum seriò agendi ritum externum. Item ait Angelicus Doctor Sacramentum perfici, si minister exprimat verbis intentionem Ecclesiæ, cujus est minister, dummodo exterius contrariam intentionem non manifestet. Excludit ergo *internæ* intentionis necessitatem. II. In 1v. sententiarum dist. vi. quæst. 1. art. 2. quæstiuncula 1. ad 2. scribit S. Thomas: *In baptismo & in aliis Sacramentis, quæ habent in forma actum exercitum, non requiritur mentalis intentio, sed sufficit expressio intentionis per verba ab Ecclesia instituta: & ideo si forma servatur, nec exterius aliquid dicitur, quod intentionem contrariam exprimat, baptizatus est.* His verbis aperte S. Thomas docet ratum esse baptismum, dummodo minister seriò proferat verba ab Ecclesia instituta, nec exterius significet contrarium mentis suæ propositum. Id verò quid aliud est, nisi sententia ipsa, quam perperam vellicamus? Non tantum Contensonius §. vi. laudatæ dissertationis, Juenin §. 3. Serry cap. 7. & Farvacques arg. 3. post Catharinum sibi Beatum Thomam assentiri gloriantur; verum etiam eam esse Angelici Doctoris mentem fatentur nonnulli opinionis adversæ cum Vasquesio disput. 138. cap. 1v. num. 44. III. Ad dit Farvacques quæ de ministro scribit S. Thomas 3. p. q. 64. art. 9. ad 1. *Licet credat per id quod agitur exterius nullum sequi interiorem effectum, non tamen ignorat quod Ecclesia Catholica intendit per hujusmodi quæ exterius aguntur præbere Sacramentum. Unde non obstante infidelitate potest intendere facere quod facit Ecclesia, licet existimet id nihil esse. Et talis intentio sufficit ad Sacramentum, quia sicut supra dictum est, minister agit in persona totius Ecclesiæ.*

Respondent viri in Divo Thoma exercitatissimi, Cajetanus, Dominicus Soto, Gonet, Cardinalis Gotti, Sylvius, Salmanticenses, aliique quamplurimi, nequaquam D. Thomam excludere necessitatem internæ intentionis, nec sufficientem existimare solam expressionem verborum: quomodo enim hoc eodem loco, qui objicitur, affirmaret ministrum agere in persona totius Ecclesiæ absque interna intentione, cum juxta Divum Thomam in eadem q. 64. ille tantum se gerat ut Ecclesiæ minister, qui tanquam instrumentum animo præditum, Christo agenti principali se subjicit? quomodo potest in sola expressione verborum agnoscere intentionem Ecclesiæ, cum intentio sit interior actus ministrantis indifferentem actionem determinans? quomodo potest nunc excludere intentionem illam *mentalem*, cujus defectum tollere veritatem Sacramenti tam aperte docet proximo articulo nono? quomodo de mente Doctoris Angelici hæsitabimus, posteaquam Opusculo V. tam diserte necessariam asseruit intentionem non tantum faciendi quod facit Ecclesia, sed etiam intentionem *peragendi*.

ragendi rem sacram, scribens: *Si minister Sacramenti non intendit Sacramentum conficere, non perficitur Sacramentum?* Ita Tom. xvii. pag. 63. Quid his expressius, quid enucleatius proferri poterat? Itaque mentem D. Thomæ, inquit præclari disputatores, non aliunde, quam ex ipso Thoma debet quis expiscari. Obiecerat 2. loco neminem posse habere salutis certitudinem, *si necessaria sit ministrorum intentio*, propterea quod intentio alterius nequeat cuiquam mortalium patefcere. Quid ad hanc objectionem Angelicus? Respondit, non defuisse qui existimaverint necessariam quidem intentionem *mentalem*; haberi tamen hanc certitudinem, quoniam in parvulis defectum intentionis supplet Christus, in adultis autem fides & devotio suscipientium; sed hanc opinionem falsam esse, quoniam fides & devotio potest quidem supplere id quod requiritur ad justificationem, at non id, quod requiritur ad perficiendum Sacramentum; alioquin istiusmodi fides suppleret etiam defectum materiæ & formæ, & pueri sine lavacro regenerationis salvari possent. Ex illa itaque opinione, quod Christus, aut fides suscipientium suppleat quod deest, ut propugnarunt Alensis, Gabriel, Durandus, & alii, haberi nequit certitudo illa salutis. Unde ergo ad pacandam conscientie agitationem erit nobis confugiendum? quomodo de salute certi erimus? Præsumendum adeo non est, ut certi simus omnino, atque, ut hæretici dogmatizant, certitudine penitus inconcussa. Moralem tantum certitudinem habere possumus; & hanc quidem, modo conspiciamus sacros ministros serio agentes, nec verbis factisque commonstrantes animi reluctantiam, habet unusquisque baptizatorum; ideoque quantum attinet ad salutis sollicitudinem, unusquisque de suscepto a se baptismo certus est. Huic responsioni subscribo; etsi enim nuperus Scriptor post Catharinum & Contensonium, contendat violentam esse, & cum titulo, cum doctrina, cum ipsa objectione pugnantem: aliter tamen censent innumeri alii in D. Thomam studiosissimi. Et quidem merito; id enim quod in responso aliquo continetur, ad objectionis trutinam debet expendi. Præterquamquod ad argumentum, quod tanta facilitate in sententia adversariorum diluitur, non opus erat uti tali verborum complexu: sat erat uno verbo reponere, haberi certitudinem salutis, dummodo peragatur externus ritus. Immo videntur adversarii nostri adstruere certitudinem peracti Sacramenti plusquam moralem, atque ejusmodi, quæ visu & auribus comprobetur. Quod enim baptizans fundat aquam, & exterius serio gerat se, oculis adstantes omnes conspiciunt: quod utatur præscripta forma, istud percipiunt aures. Quis autem nobis persuadeat tam certum esse baptizatum percepisse characterem, quam certum est vera esse quæ vivido sensu percipiuntur? Servata itaque Syllogistica forma disjunctivam: Excludit S. Thomas intentionem

nem mentalem, ut habeatur moralis certitudo salutis, concedo : ut perficiatur baptismus, subdist. in se, nego : in iudicio Ecclesiæ, & conscientia suscipientis, concedo . Atque hæc responsio solvit etiam argumentationem secundam ; est enim utrobique idem scopus, eademque objectio .

Quamquam jure commune responsum selegi, neque illud adhibui sine aliqua ponderatione ; non desunt tamen, qui reponant, sanctum Thomam non rejicere opinionem eorum, qui requirunt intentionem *mentalem* absolutè, sed in quantum dicit ejus defectum suppleri in parvulis a Christo, in adultis verò a fide ac devotione eorumdem . Hanc responsum præfert alteri Aurelius noster Lovaniensis . At hæc responsio, licet primò aspectu videatur verbis D. Thomæ collineare, & revera S. Thomas non sentiat defectum intentionis posse suppleri ; contraria est tamen secundo testimonio, in quo ait : *In baptismo non requiritur mentalis intentio* : neque ulla est inter ea quæ leguntur in Summa, & in xv. sententiarum pugna contradictionis . Sunt & qui respondent excludi a S. Thoma intentionem *actuale* : sed hi, ut optimè adversarii observarunt, confundunt quæ S. Thomas ad tertiam, & quæ ad secundam objectionem tradit in Summa, sive ad 2. & ad 4. in dist. vi. laudatam . Parùm ab his recedunt, qui cum P. Nicolai censent non exclusisse Sanctum Thomam qualemcunque ministri intentionem, sed specialem, expressam, & cum attentata deliberatione conjunctam . Quare salvo aliorum iudicio existimo traditum a Cajetano, & in Schola Thomistica pervulgatum responsum, germanum esse, legitimum, & inconcussum,

At quod addit Farvacques ex art. ix. quæst. 64. ad 1. infirmissimum est, detegitque quorundam alucinationem . Infirmissimum quidem est, nam eo in loco S. Thomas affirmat necessariam non esse in ministro fidem, qua revera credat Sacramenta Divina esse, & per illam conferri gratiam : quo nihil sapientius dici poterat . Si enim hæc fides foret necessaria, numquam ratum esset baptisma datum vel a Judæo aut pagano, qui putant Sacramenta nostra nulla esse, vel a Calvinista, qui negant per ea inhærentem gratiam produci . Exigit tamen beatus Thomas, ut qui ea fidè destitutus est, non ignoret quod Ecclesia Catholica per ea, quæ agit exterius, intendit perficere Sacramentum, & quod se gerat tanquam hujus Ecclesiæ minister, ideoque non proponat facere qualemcunque ritum, sed religiosum & sacrum . Quare per D. Thomam tria sunt distinguenda, fides ministri, propositum conferendi gratiam, & intentio faciendi Sacramentum, ut sit in Ecclesia Christi, qualiscunque tandem sit Ecclesia ista, sive vera, sive falsa, sive apud Catholicos, sive apud hæreticos : quorum trium hoc postremum necessarium est, non primum, nec alterum ; & si hæc accuratius distinguerentur, causa finita esset. *Si verò,*

(inquit, S. Thomas) *patiat*ur, minister, *fidei defectum circa ipsum Sacramentum, quod exhibet, licet credas per id quod agitur exterius nullum sequi interiorem effectum, non tamen ignoras quod Ecclesia Catholica intendit per hujusmodi, quæ exterius aguntur, præbere Sacramentum: unde non obstante infidelitate potest intendere facere id, quod facit Ecclesia, licet existimet id nihil esse: & talis intentio sufficit ad Sacramentum, &c.* Tanta affulgente luce hæc ipse Farvacques scripsit pag. 157. *Angelicus Doctor non tantum requirit ritus externos, etiam non mimicè adhibitos, sed insuper ut minister sciat saltem confusè & generaliter Ecclesiam intendere per ejusmodi ritus præbere Sacramentum, seu aliquam rem sacram & utilem, non merè profanam.* Quid ergo tanta pro Catharino argumenta? Omnia perierunt. Debet minister *non ignorare quod Ecclesia Catholica intendit per ea, quæ exterius aguntur, præbere Sacramentum.* Ita S. Thomas. Debet minister *habere intentionem faciendi quod facit Ecclesia.* Ita decreta Conciliorum sanctorum. Ergo debet minister intendere *per ea, quæ exterius aguntur, præbere Sacramentum.* Ad quid enim scientia illa, saltim confusa, nisi ad dirigendam intentionem? Nonne ut intendamus tantummodò externum ritum, sat est materiam & formam non ignorare? Cur ergo, si Catharini sententia, vera est, necessum est insuper haud ignoret minister adhiberi in Christi Ecclesia exteriores ritus more quodam mystico, solemni, Sacramentali? At videor de mente Divi Thomæ satis superque dixisse.

Tenent quartum locum argumenta a ratione deprompta: decem profert Tom. xiii. disp. 2. Alphonsus Salmeron: quatuor Contentionis §. 7. ac totidem Juenin §. v. octo Serry cap. 9. & Auctor Op. de re Sacramentaria n. vii. sunt autem istiusmodi. I. Valet baptismus a Judæo, pagano, & atheo collatus: sed hi homines intentionem faciendi ritum sacrum nec habent, nec habere possunt: igitur hæc intentio ut baptismus ratus sit, non requiritur. Probatur minor: illi enim nequeunt ritum aliquem ut sacrum intendere, quem tanquam supersticiosum & sacrilegum execrantur: at Judæi & pagani execrantur ritum baptismatis tanquam sacrilegum: igitur nequeunt intendere ritum illum ut sacrum. II. Quamvis minister credat, ei Christus nihil aliud commisit quam nudum externumque ministerium: modò itaque Evangelicum ritum serio celebret, vere Sacramentum conficit, & huic divina virtus assistit: probatur consequentia, qui enim nudum ministerium exercet, agit tanquam instrumentum, quod a causa principali movetur; ideoque qualemcunque intentionem ille habeat, nequit labeſcieri opus, quod in rectum finem a principali agente dirigitur. III. Non est, quemadmodum omnes consentiunt, necessaria in ministro intentio producendi effectum; ergo nec intentio peragendi rem sacram: probatur consequentia; nam quemadmodum Christus

noluit gratiam & characterem pendere a secreta intentione ministrantium, ita noluit ex eadem intentione externum opus nancisci, ut sanctum sit, divinum, mysticum, sacrum. IV. Ecclesiæ ministri funguntur officio legatorum Christi; voluitque Deus, ut Ecclesia, quam acquisivit sanguine suo, formam haberet externæ & aspestabilis reipublicæ. Atqui acta ministrorum Reipublicæ valent, modo peragantur seria administratione quæ exterius pateat, quamvis interius minister detrectet se gerere tanquam ministrum. Reipublicæ; ita enim. Aman reluctans animo, & apparenter obsequium exhibens Mardochæo, vere illum affecit honore proferens jussu regis ea verba, *Sic honorabitur quem rex honorare voluerit*. Valet ergo pari ratione Sacramentum, dummodo ministrans celebret externum ritum, & præscriptam formam adhibeat. V. Ecclesia visibilis est, & Sacramentum signum, & res sensibus subjecta; nihil ergo quod non pateat sensibus, in Sacramenti definitione ponendum est; atque adeo latens intentio ministri Sacramento penitus est extranea: alioqui quoniam pacto propugnabimus Sacramentorum naturam sitam esse in sensibilibus elementis, & qua ratione contra hæreticos demonstrabimus Ecclesiam esse visibilem: num de fidelium baptismate, & de Sacerdotum consecratione aliquid certi statuere possumus, si necessaria sint baptizantium internum propositum, & conferentium sacros ordines voluntas sincera & intima? VI. Imo, si hæc sententia tenenda sit, nec sustinere possumus quod Ecclesia nequeat deficere: contingat enim Episcopum non habere intentionem initiandi statutos ante se clericos, hos vero missas celebrare, peccata absolvere; tunc quidem Clerus, pars Ecclesiæ præcipua, erit fictitius, nullaque sacrificia, & scelorum absolutio: & si parochus non intendat conferre baptismum, nec turba fidelium erit regeneratorum cætus & congregatio. VII. Episcopi nullam intentionem habent ordinandi excommunicatos, idque etiam in Ordinum collatione palam testantur; nihilo tamen minus si excommunicato cum prolatione verborum præbeant materiam, erit Ordo ratus ac validus. VIII. Si valor Sacramenti pendeat ab intentione ministri, nemo habere poterit moralem salutis suæ certitudinem; cum ergo Sacramenta instituta sint, ut ex his homines gratiam hauriant, ad ea autem accedentes non discrucientur importunis animi anxietatibus, non debent a ministrantium voluntate pendere. IX. Sacramentum est signum a Christo institutum; sed signa effectum produciunt, dummodo exterius ponantur: ergo & Sacramentum efficax in se est, modo celebretur exterius. X. Si minister interius sic decerneret, *Nolo conficere Sacramentum*, & tamen exerceret actum exteriorerem, haberet duas voluntates inter se mutuo pugnantes: at quando occurrunt duæ oppositæ voluntates, illa quæ effectum obtinet vera censetur, altera autem reputatur mera velleitas, id comprobatur exem-

exemplo mercatoris, qui licet merces suas servare vellet, si id posset incolumis, eas tamen actu projicit in mare, dum tempestate jactatur; atque ita voluntate servandi vitam superat voluntatem servandi merces. Ita in nostro casu voluntas, qua exercetur actus externus, superaret & irritam redderet voluntatem, qua minister apud se statueret, *Nolo conficere Sacramentum*. XI. Si materia applicetur formæ, coalescit compositum; si medicamenta præbeantur ægroto, conferunt sanitatem; si artifex attente se gerat exterius, perficit opus; igitur & Sacramentorum minister, si materiam formamque adhibeat, eadem conficit. XII. Ut Sacramentum ratum sit, necessum non est, ut is, qui suscipit, intendat recipere aliquid religiosum & sacrum: ergo nec requiritur, ut rem aliquam religiosam & sacram præbere & conficere intendat minister ac dispensator.

Resp. hæc omnia argumenta non solum talia non esse, quibus ultro cedat qui ea pensarent pacata mente, quemadmodum ajunt facundi Vindices Catharini; verum nec aliquid præferre dubitationis, quod non elidant conterantque præmissa & discussa momenta. In gratiam tamen tyronum singula objecta servato scholarum more dispellamus. Itaque ad primum, animadvertimus paulo supra paganus & Judæum dum baptizat haut ignorare, ut inquit S. Thomas, id quod peragit, haberi apud Christianos tanquam religiosum & sacram; quod licet ipse baptizans non credat, vult tamen se gerere tanquam Ecclesiæ nostræ ministrum, & consequenter *implicite* peragere externum ritum ut sacram. Distinguenda itaque est minor: Hi homines nequeunt habere intentionem faciendi rem sacram, *explicite*, & revera credentes rem illam esse sacram in se, concedo: *implicite*, & non ignorantes rem illam haberi sacram apud Ecclesiam, nego. Neque dicas, si ita res se habeat, etiam qui intendit serio peragere ritum externum, habebit intentionem *implicitam* faciendi rem sacram: nam ritus externus indifferens est, ut fiat more sacro, aut profano; quod autem sit ab Ecclesia tanquam sacram, non indifferens est, sed in aliquo genere determinatum: atque intentio *implicita* locum habet in iis, quæ determinata sunt, non in iis, quæ indifferentia permanent, ut supra exemplis demonstratum est, & mox repetam. Ad 2. negamus antecedens; non enim Christus commisit Ecclesiæ ministris nudum ministerium, sed eis etiam contulit Sacramenta conficiendi potestatem: nec instrumenta sunt mortua & inanimata, sed viventia, & ratione consilioque prædita, quæ nihil efficiunt, nisi principali agenti se deliberate subjiciant; & quemadmodum si hæc instrumenta joco, & ludicra actione moveantur, sat non est recta voluntas principalis agentis, ut ritus censetur serio peractus; ita si moveantur absque proposito faciendi rem sacram, non sufficit sola intentio Christi, ut sit vere solennis & sacra, uti supra enucleatus

cx-

explanavimus. In tertio est obvia, ac jam detecta disparitas. Quando enim causa aliqua determinata est ad producendum effectum, non requiritur ejusdem effectus *explicita* intentio; requiritur tamen ut causa determinata sit, quod tollatur ejusdem indifferentia: ideoque inutilis est tertia argumentationis illatio. Quarta eodem vitio laborat; quippe non distinguit inter ministros, qui exequuntur mandata, & inter eos, qui præditi sunt potestate: nec observant qui hæc obsecant, in temporali republica spectari duntaxat civilem politiam, & humanum commercium, in Ecclesiastica spiritale bonum intendi; magistratus institutos fuisse ad regimen civitatis, Sacramenta vero ad animarum medelam; ministros principum exercere in foro exteriori jurisdictionem, at Sacerdotes etiam cordium inquinamenta diluere. Profecto si attendenda esset in Reipublicæ politia latens quædam ac spiritualis potestas, recte diceretur, seditiosum legatum dum pacificetur de fœdere concitare ad bellum, & Aman obsequendo externa ceremonia Judæum virum, hunc ludibrio potius, quam honore affectisse. Adde legatorum officia, passionem, munera esse, ut plurimum, in suo genere determinata, non autem, ut sunt externi ritus, indifferentia. Ad quintum dicimus in signis *prædictis* non solum attendendam esse externam speciem, verum etiam latentem efficientiam, & utrumque designari in definitione Sacramenti N. L. a nobis tradita: ita in cœtu Ecclesiæ visibilis spectanda est professio ejusdem fidei, & participatio Sacramentorum, & fidei, Sacramentorumque latens veritas. Sicut ergo est in Ecclesia occultus hæreticus, qui profitetur fidem, & tamen hujus non est vera professio; & sicuti esset in Ecclesia visibilis participatio Sacramentorum, si panem non consecratum impius Sacerdos fidelibus dispensaret, & nihilominus non esset verum Sacramentum; ita, si minister absque intentione ulla faciendi rem sacram perageret externum ritum, esset Sacramenti imago quædam, & species exterior, non latens virtus & veritas. Proximum hac ratione refellitur: De fide est Ecclesiam non posse deficere, de fide est in ea offerri verum sacrificium, de fide est haberi in ea virtutem Sacramentorum. At non est de fide hunc puerulum esse baptizatum, hanc numero hostiam esse consecratam, in hoc, aut illo fidei non defecisse; quoniam certi scimus Christum Ecclesiæ in communi, ejusque supremo Reftori assensum suum spondisse, quam nequaquam in particulari promissit unicuique. Sicut ergo inepte ratiocinatur, qui ait: Potest contingere ut unus aut alter Sacerdos non præferat verba consecrationis, ideoque non offerat sacrificium, ergo in Ecclesia potest deficere quodlibet sacrificium; aut, Potest evenire ut aliquis non baptizatus promoveatur ad sacros Ordines; ergo deficere potest Clerus universus: ita insulse nimium, & inscite arguitur, qui, si contingat ratum non esse baptismum sæpio collatum, subin-

subinfert posse deficere Ecclesiam, & quælibet Sacramenta. Mirum præterea est Theologos viros ejusmodi scrupulis commoveri; quod enim potest contingere defectu intentionis, nonne evenire potest defectu materiæ vel formæ? Nonne minister improbus potest, dum puerum tingit, pro aqua naturali aliam effundere, & quod facilius est, formam corrumpere aut prætermittere? Quid ergo fiet postmodum, si puer iste, equidem non baptizatus, sit adoptatus inter Clericos, inunctus Sacerdos, inauguratus Episcopus? Deficiet ne Ecclesia Christi? Videant ergo, qui cum Lucino refellunt clarissimum Bellarminum confugientem in hac hypothesi ad providentiam Dei, permisumque Ecclesiæ suæ patrocinium, se ipsos iisdem fluctibus agitari; atque ad asylum, perfugiumque istud esse nobis, sibi que confugiendum. Ad VII. respondeo Episcopum in collatione Ordinum terrere, initiandos, ne accedant excommunicatione innodati: at ubi compertum habet nullum excommunicatum adesse, vult revera singulis conferre Ordines: quare hi rati sunt vi interioris propositi, non tantum ope functionis externæ. In solutione argumenti octavi non ero verbosus, cum supra explicaverim quomodo habeatur in scientia nostra moralis certitudo salutis: nec major haberi queat in systemate Catharini; cum sicut in intentione, ita in materia & in forma possint contingere defectus plures. Ab insequenti pariter brevissime expediar, cum identidem dixerim Sacramenta non esse signa qualiacunque, sed *practica*, nec talia esse sine intentione ministrantium; alioqui rata forent etiam mimicè administrata. Decimum hoc pacto solvitur. Duæ voluntates contrariæ sunt, quando idem habent objectum, ut voluntas servandi merces, & voluntas projiciendi merces; atque istarum voluntatum fateor illam esse inefficacem, quæ est conditionalis, & superatur ab alia voluntate absoluta; & ita inefficax est voluntas servandi merces nisi immineat vitæ periculum, & superatur a voluntate servandi vitam. At voluntas faciendi ritum externum, & voluntas non faciendi Sacramentum habent objectum diversum, illa nimirum opus indifferens, ista opus sacrum, adeoque possunt simul consistere, nec una superatur ab alia; quemadmodum stant simul voluntas conficiendi Sacramentum, & voluntas non conferendi gratiam, quia diversum habent objectum, illa scilicet causam, ista autem effectum. Quod sequitur exploditur quamfacillime: forma enim physica sive compositi naturalis, sive artefacti determinata est, forma autem Sacramentorum indifferens; ideoque, nisi ab intentione ministrantium determinetur, id quod exterius peragitur nec opus morale est, nec signum efficiens, nec sacrum aliquid, nec idoneum animarum medicamentum. Ad postremum principio negare possumus eum, qui animo reluctatur, vere & apud Deum suscipere Sacramenta: deinde asserimus firmum esse argumen-

tum



tum illud pro sententia Catholica contra hæreticos , non pro Catharini placito adversus alios Theologos . Quia enim opus humanum , procedere debet ex proposito voluntatis , & nullum est in reluctantem & invito , optime consequitur ad Sacramentum quod est opus humanum requiri deliberationem operantis , & non reluctantiam suscipientis . Et quia ad constituendum perficiendumque opus necessarium est ut determinetur ejusdem indifferentia , ad recipiendum autem in se operis effectum , sat est aliquando non contraniti , ac se operanti subjicere ; idcirco ad perficiendum Sacramentum necessaria est intentio , quæ determinare queat externum ritum indifferentem , atque ad recipiendum in se Sacramentum sufficit aliquando intentio interpretativa , ut cap. 18. explicabimus . At de propositione secunda dictum satis .

PROP. III. Ad hoc ut Sacramentum validum ratumque sit , necessarium non est ut minister intendat illius effectum , vel habeat in animo illud peragere quod sit solemniter ritu in Ecclesia Romana , vel explicite credat esse ritum illum revera sacrum & salutiferum ; sed sufficit , si id proponat facere quod solenni more perficitur in Christi Ecclesia , qualiscunque sit Ecclesia ista , sive apud Catholicos , sive apud hæreticos permanens , & qualiacunque sint illius Ecclesiæ mysteria , sive efficientia gratiarum , sive fidei argumenta , sive symbola prorsus inania .

Hanc assertionem , quam principio hujus dissertationis diximus esse communem , invicte quoque commonstrant producta superius monumenta . Quorum primum est , probari ab Ecclesia , ut ad Consulta Bulgarorum agebat Nicolaus , extatque in cap. *A quodam* , dist. 4. de Consecrat. baptismum a Judæo vel a Pagano collatum , modò se gesserint tanquam Ecclesiæ ministri . II. Constat etiam ex praxi Ecclesiæ , cui non adversatur definitio Synodi Rothomagensis , non esse rebaptizandos tinctos sacro lavacro a Novatoribus , *quomvis bi non habeant intentionem baptizandi in remissionem peccatorum* . III. Ratum esse baptismum sive in Catholica , sive ab iis qui se in Catholica esse arbitrantur , dummodo verbis Evangelicis consecratum sit , docet probatque contra Donatistas Ecclesiæ lumen splendidissimum Augustinus . IV. Nec unus inter Theologos invenitur , qui non subscribat Divo Thomæ 3. p. q. 64. asserenti , necessarium non esse ad Sacramenti valorem , ut minister credat per id quod exterius agitur produci interiorem effectum , habeatque intentionem rectam quantum ad fidem , & Sacramenti efficientiam vel usum . V. Dictum denique , ac interdum repetitum est , dum peragitur determinatum opus , quod suapte virtute producit effectum , non requiri ut agens perspectam habeat ejusdem operis efficaciam , neque *explicite* effectum intendat : quæ omnia superius explicata hanc postremam thesism satis apertam reddunt atque expeditam .

## CAPUT XVII.

*Solvuntur vulgares quædam quæstiones circa intentionem  
Sacramenta administrantium.*

**Q**Uærent primo Theologiæ moralis institutores, quotuplex sit intentio, & quænam necessaria sit in ministro ad Sacramenti validitatem. Respondent vero unanimiter, intentionem triplicem, assignari, actualem, virtualem, habitualem. *Actualis* illa dicitur, quæ operis executionem comitatur, idest, qua agens cum animi applicatione intendit facere quod actu facit: ut Sacerdos cum præsentis deliberatione mentis, nec aliò intentione distracta baptizans, aut consecrans. Intentio *virtualis* ea est, quæ perseverat virtute in actione ministri, quamvis is distractus sit animo: dicitur autem intentio perseverare virtute, quando actu antecessit, nec retractatur, nec inter actum præcedentem, & opus intercedunt longa temporis intervalla, nec media ad consecutionem finis omnino disparata, aut contraria. Ita est virtualis intentio in Sacerdote, qui baptizare, aut consecrare decernit, atque cum tali proposito adit templum, induitur sacris vestibus, accedit ad aram, aut ad salvificum fontem, sed vel rerum aspectabilium imagine, vel præterfluentibus cogitationibus mens ejus rapitur, divagatur, & avolat. *Habitualis* intentio appellatur, qua absque ulla præcedenti intentione, quasi ex consuetudine aliquis operatur; vel si aliqua præcessit intentio, aut per longum intervallum temporis, aut per media contraria, vel disparata, & cum fine nullo pacto connexa, disperit, & evanescit, ut si Sacerdos nulla deliberatione præmissa, ex quodam usu, vel habitu oret, vel missam celebret; aut si id proposuit in animo, posthac media posuit omnino impertinentia, ut venationem, aleam, & talem confabulationem, in qua antecedens propositum prudenter censeatur evanuisse.

Communis itaque sententia est, *actualem* intentionem esse omnium optimam, & unicuique sedulo curandum esse, ut cum hac intentione sacra perficiat mysteria; eam tamen non semper adesse, nec haberi absque singulari divini Numinis beneficio, neque necessariam penitus esse ad perfectionem Sacramentorum: *virtualem*, quamvis conjunctam cum aliqua animi divagatione, sufficientem tamen esse; *habitualement* denique nequaquam sufficere. Necessariam non esse intentionem *actualem*, demonstratur, quod absque tali intentione habeatur opus humanum, ac morale, a ratione & voluntate proficiscens; imperium quippe rationis, & voluntatis deliberatio, etsi actu pertranseat, dicitur virtute permanens, nisi aut animo retractetur, aut alia deliberatio ad opus disparatum effectricem causam infle-

inflectat. Ac præterea, ut dixi nuper, actualis illa & vigen præsentia animi, in tanto prætereuntium imaginum, & diverberantium cogitationum conflictu, est donum Dei speciale: quemadmodum Augustinus in Psalmum LXXXV. num. 7. gravissima oratione commonstrat. Demonstratum etiam a nobis est adversus Baji, & Janfenii nefaria dogmata, motus animi absque ulla deliberatione subrepentes carere omni libertate ac malitia, ideoque non posse inficere ac nullam reddere liberæ deliberationis efficientiam. Satis esse intentionem *virtualem*, ex hoc ipso colligitur, quod necessaria non sit actualis, & per illam duntaxat humana officia seernantur ab iis, quæ aut brutis communia sunt, aut sine consilio ac libertate patrantur; ut mittam Romani Ritualis præscriptiones, universorumque Theologorum consensum. At non sufficere intentionem *habitualement* consequitur ex eodem principio: intentio quippe istiusmodi est potius propensio quædam ex iterata Sacramentorum administratione proficiens: cumque locum habeat etiam in amente & in ebrio, qui absque consilio, & libertate operantur, sufficiens non est, ut opus dicatur liberum, morale, & humano more peractum. His non adversantur testimonia quorundam veterum asserentium sufficere ad Sacramenti perfectionem intentionem *habitualement*, ut loquitur S. Thomas 3. p. q. 64. art. 8. ad 3. nam intentionem *habitualement* illam appellant nonnulli, quam postmodum Scholæ dixerunt *virtualem*, neque ab ista aliam describit S. Thomas, dum intentionem *habitualement* tunc esse definit, cum Sacerdos accedens ad baptizandum intendit facere quod facit Ecclesia, & si postea in ipso exercitio actus cogitatio ejus ad alia rapiatur, ex virtute primæ intentionis perficitur Sacramentum. In quibusdam etiam antiquis editionibus in textu D. Thomæ pro intentione *habituali* legimus intentionem *actualement*, ut adnotatur in margine edit. Antwerp. Plantiniana pag. 229. Sed, ut ut vera lectio se habeat, ibidem explicari intentionem *virtualem* commonstrant citata verba, & argumentum eo loci propositum.

II.

Deinde in quæstionem vertitur, num in Sacramentis conficiendis sufficere queat intentio *interpretativa*. Dicitur autem intentio interpretativa, dum quis actu operans non est sui compos, ex ejus autem præcedenti deliberatione, quasi mentem ejus interpretatur, existimantes illum actioni, quam exequitur, minime reluctari; ut si aliquis baptizare, aut consecrare proponat, sed postea in somnum, in amentiam, aut in ebrietatem incidat, & dormiens, ebrius, amens, Sacramentum perficiat. Sed facillima est hujus quæstionis solutio: quippe cenferi nequit actus humanus, quod exercetur ab homine mente destituto; cumque Sacramenta more confici debeant humano, non est minister ad illa conficienda idoneus, quisquis sine consilio operatur.

Solet commovere tardiora quædam ingenia, quomodo si ita res se habeat, sufficere possit intentio *virtualis*, in qua dum sacri ministri operantur, & proferunt verba Sacramentalia, aliò distrahti non alia deliberatione utuntur, quàm ea, quæ pertransit. Si autem sat est intentio transacta, ut quod agitur reputetur humanum ac liberum; cur sufficiens non erit intentio *interpretativa*, si revera præconcepta fuit a ministrante? Difficilius videtur quod tract. De peccatis q. 71. disput. 24. urget peracutus Godoy, de homicidio, aut alio scelere in ebrietate patrato: quod sane voluntarium ac liberum est, si occisor priusquam vino se conficiat, crimen fuerit præmeditatus, quidve in temulentia soleat gerere animadverterit. Si enim præexistens propositum sufficit, ut opus in ebrietate patratum tanquam liberum humanumque dijudicetur; cur talis generis existimanda non est sacrorum mysteriorum administratio?

At sunt ista supra quam dici potest, futilia & inania. In intentione enim *virtuali* antecedens mentis deliberatio traxit operantem ad media propria illius muneris quod exequitur, movitque voluntatem ut ratio effectrix humani officii, idest, tanquam lumen mentis, & norma libertatis. At verò intentio *interpretativa* non permovet ministrantem ad media congrua & ad Sacramentum ordinata: nam, quid ad baptismum dementia, aut ebrietas? nec inebrio aut stultitia exierit antecedens propositum, tanquam lumen rationis, & regula libertatis, sed vi imaginationis, & impressione musculorum cerebri, ita, ut nil magis in baptismo ebrii ministrantis appareat deliberationis & humani officii, quàm in partu maculis inusto ob impressionem, quæ per gravidæ mulieris arterias ad certas fœtus partes dilabitur. Est tamen homicidium patratum ab ebrio, si illud præmeditatus est, crimen maximum; quoniam ad peccatum sufficit libertas in causa, juxta canones traditos lib. xxi. cap. 11. scilicet sat est, si peccatum sit prævisum ac volitum, cum oriatur ex mala voluntate, & delectatione perversa: Sacramentum verò non perficitur cupiditate duntaxat, sive, ut Scholæ loquuntur, *tendentia in obiectum*, sed applicatione formæ ad materiam facta libertate & consilio. Dicam brevi: ad peccatum sat est, si aliquo pacto sit liberum & voluntarium; ad Sacramentum requiritur, ut sit actus humanus, atque, ut dici solet, *exercitus*.

### III.

Tertia quæstio est de intentione *conditionali*; an scilicet subsistat Sacramentum tali intentione collatum. Condicio autem vel est præterita, ut dum baptizans gravi dubitatione percussus ait, *Si non es baptizatus, ego te baptizo, &c.* vel præsens, ut dum Sacerdos inquit, *Si es dispositus, ego te absolvo*; vel futura, ut si ad hunc modum loqueretur. *Ego absolvo te, si crastina die restitueris rem alienam*.

*nam*. Valet ergo Sacramentum sub conditione de præterito, vel de præsentī collatum, si conditio vera sit; secus, si falsa: quippe intentio *conditionata*, cum adimpletur conditio, transit in *absolutam*. Obiter nota, si baptizans intendat baptizare puerum, credens illum esse masculum, quamquam femella esset, ratum esset baptisma, cum rationalis homo, cujuscunque generis sit, ad suscipiendum baptismum sit idoneus. At si intendat baptizare cum hac intentione conditionata, *Si masculus sit, non femina*, statuens in animo feminam non baptizare; juxta præclaros Jurisconsultos baptismus est nullus, ut demonstrare nituntur Cardinalis Hostiensis in Summa 3. p. de Baptismo, & ejus effectu, num. 10. & inter JCC. *Singularia*, §. xc. num. 3. vernaculus nostras Petrus Gerardi: ex quorum placitis inferitur, interius propositum necessarium esse ad Sacramenti validitatem, ut supra ostendimus proluxa dissertatione. At si conditio sit de futuro, sub ea nequit perfici Sacramentum, quoniam dum adhibetur materia, & forma profertur, præsens intentio suspenditur; dum verò futuro tempore impletur conditio, non amplius adsunt materia, & forma quæ Sacramentum constituunt. Id tamen non valet de contractu matrimoniali, qui utique non subsistat statim ac apponitur conditio honesta de futuro, V. G. *Contrabo tecum, si pater assentiatur*, aut, *si talem præbeat dotem*; sed conditione adimpleta ratus & firmissimus est; propterea quod omnes contractus sub conditione initi, *cā*, ut inquirunt Jurisperiti, *verificatā*, perinde obligant, ac sic forent *absoluti*, atque pristinus consensus supponitur præsens, & perseverans. Quare ante conditionis eventum, si ille qui cum aliqua muliere contraxit sub conditione, contrahat cum alia *per verba de præsentī*, contractus iste ratus erit ac permanens, cum sponsalia conditionata ante conditionem extantem incerta ac suspensa sint, ut habetur in v. l. cap. unico *de Sponsalibus & Matrimoniiis*, atque a nobis proprio in loco iterum explicabitur. Quanta verò in apponendis conditionibus requiratur prudentia, ac diligens rerum perquisitio, capite xlii. præmonuimus.

## C A P U T XVIII.

*De iis, qui Sacramenta rite  
suscipiunt.*

**D**Iximus de ministrantibus Sacramenta; dicendum modò est de iis, qui a ministris ea recipiunt, sive, ut in Scholis loquimur, de Sacramentorum *subiecto*. Qua in re tria ad examen revocanda sunt: primum quænam suscipiendorum Sacramentorum sit capax; alterum num in eo, qui ad Sacramenta accedit, requiratur intentio, & cujus generis hæc esse debeat; tertium qua animi præparatione, ut  
è Sa-

è Sacramentis fructum percipiat, illa debeat quisque suscipere: quæ omnia brevissime resolventur, cum singillatim in unoquoque *Sacramento* disquirenda sint præcipua cum ministrantium, tum suscipientium officia.

PROPOSITIO I. Juxta præsentem ordinem Sacramenta pro solis hominibus viatoribus sunt instituta, ideoque nemo alius est, ordinariè loquendo, *subiectum* Sacramentorum.

Nulla in hac assertionem potest esse difficultas; primum quia liquet ex priori capite Sacramenta esse visibilia quædam signa, quibus homines in Dei cultum sub alicujus religionis nomine coadunantur. Deinde quia symbolis sensibilibus indigent soli homines corpore animoque præditi. Insuper gratiæ fanari, aut confirmari non debent, qui culpâ carent, adhærent incommutabiliter summo bono, vel contra in gehennam detrusi sunt.

PROPOSITIO II. In adultis ad Sacramenti characterem suscipiendum necessaria est intentio aliqua, saltim *interpretativa*.

Dixi in adultis: nam in parvulis nullam intentionem requiri satis constat ex Augustino lib. iv. de Baptismo cap. 24. num. 31. scribente: *In infantibus, qui baptizati moriuntur, eadem gratia omnipotentis implere credenda est, quod non ex impia voluntate, sed ex ætatis indigentia, nec corde credere ad justitiam possunt, nec ore confiteri ad salutem. Ideo cum alii pro eis respondent, ut impleatur erga eos celebratio Sacramenti, valet utique ad eorum consecrationem, quia ipsi respondere non possunt.* Ex quo loco apparet quantum distet sententia Augustini a figmento hæreticorum asserentium in parvulo, dum abluitur regenerationis lavacro, fidem rationisque usum divinitus excitari. Demonstratum quoque est a me libro xxviii., ubi adversus Socinianos de Christi redemptione disputavi, quam recto justitiæ ordine factum sit, ut quemadmodum pueri per generationem Adæ sine actu propriæ voluntatis nascuntur mancipia Satanz, ceteri autem captivi remanent propriæ voluntatis arbitrio; ita parvuli absque ullo voluntatis suæ proposito eruantur per lavacrum regenerationis a dæmonis potestate, quamvis adulti inde nequeant eripi inviti, & absque motu liberi arbitrii, eò vehementius se ad justificationem disponentis, quò majori cupiditate adhæret peccato. Adeas Volumen V. pag. 399. & 416.

Remanet ergo difficultas de adultis: in quibus generatim non requiri prævium aliquem consensum recipiendi Sacramentum; ac sufficere intentionem, ut appellant, *neutram*, eam scilicet, quæ Sacramenta suscipiens negativè se habeat, nec contranitat, nec præbeat positivum assensum, tenent Cajetanus in 3. p. q. 68. ar. 7. Ledesma in iv. p. 1. q. 9. & cum paucis aliis Farvacques cap. vii. q. 1. ac Vanroy cap. v. q. 1. Immo idem Vanroy Tom. iv. pag. 80. pu-

putat validum esse Ordinem collatum non solum indifferenter se habenti, verum etiam invito penitus & reluctanti.

Contraria tamen opinio affirmans requiri ex parte suscipientis intentionem aliquam, saltim *interpretativam*, nec valide Sacramentum recipi, si recipiens reluctetur, aut indifferenter se gerat, vera est, & sequentibus momentis corroborata. I. Ex Sacrorum Conciliorum definitionibus Cathecumeni ægrotantes, ac subito obmutescientes nequeunt baptizari, aut pœnitentiam accipere, nisi habeant voluntatis præteritæ testimonium in aliorum verbis, aut voluntatis perseverantis ac præsentis in suis nutibus. *Ægrotantes*, inquit Synodus 111. Carthaginensis cap. 34., *si per se respondere non possunt, cum voluntatis eorum testimonium ii, qui sui sunt dixerint, baptizentur*. Et Arausiana 1. cap. 1v. *Subito obmutescens, prout status ejus est, baptizari aut pœnitentiam accipere potest, si voluntatis aut præteritæ testimonium aliorum verbis habet, aut præsentis in suo nutu*. II. Innocentius III. cap. *Majores*, de Baptismo, principio expressè rejicit opinionem eorum, *qui dicunt quod Sacramenta, quæ per se sortiuntur effectum, ut baptismus & Ordo, ceteraque similia, non solum dormientibus & amentibus, sed invitis, & contradicentibus, etsi non quantum ad rem, quantum tamen ad characterem conferuntur*. Ducitur autem Summus Pontifex in hac opinione resellenda momento admodum firmo; quoniam, *qui fuissent invitæ, vel reluctantes immersi, saltem ratione Sacramenti ad jurisdictionem Ecclesiasticam pertinere: unde ad servandam regulam fidei Christianæ forent rationabiliter compellendi: verum id est religioni Christianæ contrarium, ut semper invitæ & penitus contradicens ad recipiendam & servandam Christianitatem aliquis compellatur*. Deinde ait Summus Pontifex censendos non esse absolute coactos & invitos, *qui ad suscipiendum baptismum terroribus atque suppliciis violenter attrahuntur, illumque suscipiunt, ne detrimentum incurrant, ut contingit temporibus Sisebuti; cujus ratio pariter apertissima est, quoniam coactio conditionalis, rationem voluntarii non tollit; non enim dicitur absolute mercatorem ad projiciendas merces cogi & impelli, dum procellis jactatus id facit, ne patiatur naufragium*. Definit præterea, *illum qui nunquam consentit, sed penitus contradicit, nec rem, nec characterem suscipere Sacramenti, quemadmodum, inquit, notam nullius reatus incurreret, qui violenter cogeretur idolis thurificare contradicens penitus & reclamans*. Declarat postremò characterem non suscipere Sacramenti *dormientes & amentes, si priusquam amentiam incurrerent aut dormirent, in contradictionibus persisterent, quia in eis intelligitur contradictionis propositum perdurare; secus autem si prius catechumeni extitissent, & habuissent propositum baptizandi*. III. S. Pater Augustinus cit. lib. 1v. de Baptismo post-

postquam docuit non requiri propriæ voluntatis deliberationem in parvulis, ita loquitur de adultis: *At si pro eo, qui respondere potest, alius respondeat, non itidem valet. Ex qua regula illud in Evangelio dictum est, quod omnes cum legitur naturaliter movet: Aetatem habet, ipse pro se loquatur.* IV. In Rituali Romano edito jussu Pauli V. in Rubr. de Baptismo adult. præscribitur, ne baptismus conferatur ei, *qui usum rationis habuit ante amentiam, & nunquam ostendit voluntatem baptismi, aut intentionem, aut petitionem illius.* V. Id manifestæ rationi consentaneum est, quoniam ad vitam, moresque Christianos nemo compelli potest invitus, ideoque nec ad baptismum, per quem initiati Ecclesiæ subjiuntur: quod tenet de Sacramentis aliis ad certum vitæ genus obstringentibus, scilicet Ordine, ac Matrimonio. Accedit quod supra de Redemptione innuimus, hujus lytrum ac pretium solum quidem pro omnibus a Christo, qui communem causam suscepit, sed non applicari adultis contrahentibus & invitis.

At adversus hanc propositionem objiciunt primò, nullibi Concilia, ubi pertractant de Sacramentorum perfectione, suscipientium voluntatem ac propositum commemorasse: Innocentium III. cap. *Majores* post verba superius producta, hæc addere, *Tunc ergo characterem Sacramentalis imprimit operatio, cum obicem voluntatis contraria non invenit obstantem.* Quibus in verbis aperte docet, satisfacere, si suscipiens non contradicat, habeatque indifferentiam, quam voluntatem *neutram* appellant: teneri eandem sententiam a Glossa in cap. *Soles*, de Consecrat. dist. 4. & in cap. *Majores*, de Bapt. Deinde opponunt exempla eorum, qui aut inviti, aut saltem nullam habentes suspicionem fuerunt ab Episcopis consecrati; ut Macedonius Eremita dicitur ordinatus a Flaviano Episcopo Antiocheno, apud Theodoretum in Monastica Historia cap. 13. Paulinianus frater Hieronymi a S. Epiphanio, ut narratur in Epist. inter Hieronymianas 100. alias 60. Augustinus a Valerio Hipponensi, apud Possidium in Vita Augustini cap. 4. Præterea objiciunt quod Augustinus narrat lib. 1v. Confess. cap. 4. de quodam amico suo febribus laborante, qui cum desperaretur, baptizatus est nesciens, mente atque sensu absentissimus. Objiciunt denique nonnulla argumenta a ratione, quorum primum est, intentionem, si non requiritur in parvulis, neque necessariam fore in adultis, quoniam in omnibus poni debet quicquid spectat ad Sacramenti validitatem. Alterum depromitur ex Unctione extrema, quæ subministratur etiam subito morbo correptis, nec illam petentibus aut voce aliqua, aut nutu. Tertium est hujusmodi; si non requiritur consensus ut homo generetur, si potest aliam recipere invitus; cur assensus necessarius est, ut regeneretur, ut Sacramenta suscipiat?

Resp. ad primum Concilia, ubi definiunt Sacramentum perfici  
mate-



materia, forma, & intentione ministri, loqui de iis, quæ ad omnia Sacramenta, cuicumque administrantur, sunt necessaria: certum est autem intentionem non requiri in pueris, qui baptizantur, nec in iis, quorum ori per vim Eucharisticus panis ingeritur, ut Augustinus scribit Tract. xxvi. in Joannem, num. 2. Innocentius III. sermonem eo loci instituens de iis, qui prius Catechumeni extiterunt, & habuerunt propositum suscipiendi baptismum, *per obicem voluntatis contrariæ*, non solum significat reluctantiæ, sed etiam exclusivam præcedentis consensu, ut constat ex verbis immediatè præmissis. Vide in III. Decretalium tit. 42. Innocentium IV. Gonzalez, alios. In Glossa ad cap. *Solet*, dist. 1v. de Consecrat., legitur recipi Sacramentum, *qualemcunque intentionem baptizatus habeat*, scilicet, qualemunque intentionem effectus, vel finis, non qualemunque intentionem Sacramenti; instituitur enim sermo de Judæis, qui Baptismum susceperunt ad mortem vitandam. In Glossa autem ad caput *Majores*, ubi habetur Sacramenti characterem recipi ab iis, *qui ore expriment, licet corde dissentiant*, fit sermo de cordis malitia, & de perseverante affectu peccati; enimvero citatur ibidem caput, *Tum valere*, de Consecratione dist. 4. ubi id expresse declaratur. Atque hæc est certa responsio, quamvis non teneatur Glossæ doctrinam festari. Qui enim cum Turnely pag. 256. reponunt Glossam hanc nullius ponderis esse, utpote expunctam jussu Gregorii XIII. non videntur, aut legere noluerunt, cum Decreti, tum Decretalium editionem Romanam anni 1581. una cum iisdem Glossis restitutam ipsomet Gregorio XIII. approbante.

Ad secundum reponimus eos, qui dicuntur inviti in presbyteros ordinati, fuisse viros pietate conspicuos, & singulari præditos humilitate, qui propterea non absolute *oblectabantur*, cum potius omnem obedientiam Ecclesiæ, ejusque Pastoribus devovissent; sed existimantes se impares ad onera Ecclesiastica subeunda, haud violata obedientiæ virtute præferebant specimen humilitatis; aut si revera fuerant inviti, adfuisse tandem eis *voluntatem suscipiendi operis boni*, ut Augustinus ait Epistola 173. ad Donatum, num. 2. Præclare Sanctus Pater prope finem ejusdem Epist. comparat potestatem Ecclesiæ Domino non solum invitanti, verum etiam compellenti ad convivium, juxta Lucæ parabolam cap. xiv. Enimvero *qui compellitur*, inquit, *quod non vult cogitur, sed cum intraverit, jam volens pastitur*. Ita nimirum qui reluctanti erant animo, dum incitantur mysteriis, sponte characterē condécorantur. Ortam Augustini repugnantiam ex quo sacrum *ministerium periculosissimum* judicaret, ipse affirmat in Epist. ad Valerium xxi. aliàs 148. num. 2. Sed de Ordine invititis collato differendum est alibi.

At in amico Augustini, quem imperite nonnulli dicunt fuisse  
*To. VI.* E e Ne-

Nebriidum superiori cap. III. num. 6. ab Augustino commemoratum; cum Nebriidius vixerit usque ad ejusdem Augustini baptismum, imo una cum illo fuerit Mediolani, & remearit in Africam, ex IX. Confess. cap. 3. num. 6. in amico, inquam, Augustini fuisse consensum saltim interpretativum hinc probatur, quod adolescens, etsi nondum *germanitus & penitus*, veram fidem tenebat; cumque Augustinus priusquam vita amicus defungeretur, baptismum, quem is acceperat, irrideret; *ita irridescentem exborruit ut inimicum, admonuitque mirabili & repentina libertate, ut si amicus esse vellet, talia sibi dicere desineret*. Quæ cum eo loci ab Augustino narrentur, mirum est doctissimum Augustinensem Farvacquesium asseruisse, quod nulla ratione præsumi possit Augustini amicum habuisse intentionem suscipiendi baptismum, quoniam deflexerat *ad supersticiosas & perniciosas fabellas*. Deflexit quidem, sed catechumenus fuerat, & desiderio baptismi aliquando flagravrat, in quo sitam diximus intentionem *interpretativam*.

Postrema denique argumenta nullius sunt roboris: quid enim inter parvulos & adultos interfit discriminis, non semel repetitum est; ac præterea si quid evinceret inanis illa argumentatio, uti in parvulis, ita in ratione utentibus, nullus motus liberi arbitrii necessarius foret ad justificationem, ut inquit hæresis excranda. At in infirmo, qui inviolatam servavit unitatem Ecclesiæ, supponitur in mortis articulo voluntas recipiendi ea Sacramenta, quæ omnes Catholici venerantur. Generatio autem est naturalis generis propagatio, non hujus accidentaria ac moralis perfectio: atque is, qui gignitur, aut cæditur, aut quicquam patitur, subiectum est operis, etsi nolit; quoniam ipso opere non immutatur, non perficitur, non obstringitur aliquo jure voluntatis arbitrium, quemadmodum in regeneratione, in justificatione, & in sacra ordinatione contingit.

PROPOSITIO III. Ut quis cum fructu Sacramenta *vivorum* recipiat, si adultus sit, & sibi sit conscius mortalis peccati, tenetur sacramentaliter confiteri: ut recipiat autem Sacramenta *mortuorum*, præter intentionem ac fidem, habere debet dispositiones libro XIX. cap. 4. ex Tridentina Synodo enumeratas.

Probatur prima pars, quia peccator non debet se exponere periculo patrandi sacrilegium. Deinde ipsum *Sacramenti vivorum* nomen satis indicat non esse ad illud accedendum habenti conscientiam peccati, quod est spiritalis mors animæ. Insuper etsi aliquando contingat hominem contritione perfecta justificari, antequam actu recipiat Sacramentum Pœnitentiæ; nemo tamen præsumere debet habere se perfectam istiusmodi contritionem, & negligere confessionem *Sacramentalem*, præsertim cum absque voto hujus confessionis vix, ac ne vix quidem perfecta contritio concipi valeat; ideoque si adfit

copia

copia confessorii, priusquam peccator ad Sacramentum accedat, debet Deo reconciliari, non tantum si accedendum ei sit ad Eucharistiam, de qua Apostolus in 1. ad Corinth. x1. Tridentina Synodus sefs. x111. cap. 7. & cap. *Sicut Judas*, alique de Consecrat. dist. 2. verum etiam si suscipienda sint Sacramenta cetera, ut de Confirmatione statutum legimus anno 1581. a Concilio Rothomagensi, anno 1583. a Rhemenfi, & Turonensi, anno 1584. a Bituricensi: quorum Conciliorum canones collegit Farvacques cap. 7. q. 2. Verum singuli a nobis suis in locis distribucuntur. De Sacramento matrimonii videtur Tridentina Synodus sefs. xxiv. cap. 1. de Ref. loqui modo hortatorio: sed primum exhortatio non est adversa præcepto: deinde alloquitur conjuges omnes, non eos singillatim, qui gravis peccati premuntur pondere: insuper non ad confessionem solam hortatur, sed & ad communionem, de qua fatemur non extarc in tali casu præceptum: præterea non de contrahendo tantum, verum etiam de consummando matrimonio verba facit: tandem noluit sancta Synodus de Scholarum opinionibus proferre iudicium; non desunt autem, qui, Eucharistia excepta, doceant confessionem in Sacramentis ceteris non requiri. De dispositionibus accedentium ad Sacramenta *mortuorum* suo loco.

## C A P U T XIX.

*Disputatur de primo Sacramentorum effectu,  
idest, de Gratia.*

**M**agnum nobiscum cum Novatoribus circa Sacramentorum *efficaciam* dissidium est, quod cum pluribus verborum involucris proponi soleat, principio est accurate exponendum. Novatorum capita, Lutherus, & Calvinus, eandem efficaciam veteris ac novæ legis Sacramentis attribuerunt, asserentes omne discrimen a Scholasticis propugnatum penitus esse explodendum. Ita Lutherus de Captiv. Babylon. cap. de Baptismo, & Calvinus lib. 1v. Instit. cap. 14. n. 23. Liqueat id intelligendum esse *de efficacia producendi gratiam*, quam contendunt per solam fidem divinarum promissionum apprehendi; nam alioqui fatentur Sacramenta Evangelica faciliora esse, & ad excitandam, obfignandamque fidem efficaciora veteribus. Imo quidam non tantum ajunt Sacramenta esse symbola gratiæ spiritualis, & ad hanc apprehendendam excitare sensibili repræsentatione; verum, etiam præter virtutem signorum extrinsecam, quæ est exhibitio cælestium donorum, confectio divini dilectionis, & admonitio de mortificatione veteris hominis, vivificatione novi, ejusque spirituali alimonia, adesse signis virtutem aliam occultam, & adfistentem,

ideſt, Spiritum ſanctum, qui gratiam, quam ſignum tribuere non poteſt, homini credenti *efficaciter* confert. Lege Voſſium de Sacramentorum vi, & efficacia Tom. v. i. pag. 254. Cum hæc paſſim in Confeſſionibus, librisque hæreticorum legantur; non deſuerunt viri etiam doctiſſimi, qui aſſerunt ſola loquendi methodo Proteſtantes a nobis diſſerre, maxime cum ſit inter complures Catholicos ſatis vulgata ſententia, quod Sacramenta ſint gratiæ cauſa *moralis* tantum, non *phyſica*, ad quorum nempe exhibitionem Deus gratiam juſtificationis impertiatur. Sed quamvis hæretici fucum faciant, aſſeruntque ſe tantummodo vim & energiam interioris gratiæ tribuere Spiritui ſancto, penes quem reſidet agendi virtus, in Sacramentis autem conſtituere ſolum miniſterium; non eſt tamen ſitum in hoc, in quo etiam diſſentiunt Scholaſtici, caput controverſiæ: ſed cum Novatores aſſerant ſolam fidem eſſe instrumentum apprehendendi gratiam ſalutarem, docent virtutem Spiritus ſancti comitari quidem externa ſymbola, at non horum ratione impertiri ſalutarem effectum, ſed intuitu fidei ſuſcipientium.

E contra Catholici negantes Sacramenta legis Evangelicæ producere gratiam ex fide, ac merito ſuſcipientium, nec alias partes exercere quàm verbi, aut ſymboli ſenſibilis fidem excitantis; docent, (quidquid ſit de modo & genere *cauſalitatis*) eadem Sacramenta gratiam producere *ex opere operato*, eaque, non fidem, nec meritum, aut ſuſcipientium, aut miniſtrantium, eſſe ejusdem gratiæ instrumenta, propterea quod aliquando ſine ulla fide ſanctificationem impertiantur, ut contingit in parvulis; in adultis vero fides ſit quidam ad juſtificationis gratiam diſpoſitio, ſed non apprehendendæ juſtitiæ ratio, aut instrumentum, aut menſura, aut cauſa, ut inquiunt Scholæ, *formalis*. Scholarum ſententia definita eſt canone ſeſſ. v. i. Tridentinæ: *Si quis dixerit per ipſa novæ legis Sacramenta ex opere operato non conferri gratiam, ſed ſolam fidem divini promiſſionis ad gratiam conſequendam ſufficere, anathema ſit*.

Ut ergo intelligas quid ſit producere gratiam *ex opere operato*; adverte primum ex præſcitato Concilio ſeſſ. v. i. cap. 7. plures ad juſtificationem cauſas concurrere: *finalem*, quæ eſt gloria Dei & Chriſti, ac vita æterna: *efficientem*, quæ eſt Deus miſericors, qui gratuito abluit & ſanctificat: *meritoriam*, ideſt, Unigenitum filium Dei, qui nobis juſtificationem promeruit, & pro nobis Deo Patri ſatiſfecit: *instrumentalem*, ſcilicet Sacramenta; *formalem* denique, nimirum juſtitiam Dei, non qua ipſe juſtus eſt, ſed qua nos juſtos facit, ſive juſtitiam inhærentem, aut gratiam, quam Scholæ appellant *habitualem*. Præter has cauſas eadem S. Synodus exigit in adultis diſpoſitiones, *fidei*, qua credentes vera eſſe, quæ divinitus revelata & promiſſa ſunt, libere moventur in Deum; *timoris*, quo utiliter con-

cutiuntur; *spei*, qua se in Deum erigunt fidentes ipsum Deum sibi, propter Christum, propitium fore; *amoris*, quo ipsum Deum tanquam omnis iustitiæ fontem diligere incipiunt; *detestationis* peccati, eum proposito inchoandi novam vitam, & suscipiendi baptismum: quæ disertissime sacrosancta Synodus ibidem enumerat, & nos de iustificatione disputantes profecuti fuimus lib. xix. cap. 4. Harum vero dispositionum necessitas ex iis, quæ sæpe diximus, aperte dignoscitur; nam cum peccatis homo adhæreat libere, perversa cupiditate, & voluntaria malitia; necessum est, ut divina gratia excitatus libero arbitrii motu ad iustitiam accedat.

Sacramenta itaque sunt *instrumenta gratiarum*: in quorum instrumentorum usu duas actiones distinguimus: una *externa* est, qua materiam a Deo præscriptam, certisque verbis consecratam exhibet dispensator, aut probus, aut improbus; eamque applicat subiecto, aut prædictis dispositionibus exornato, aut iis destituto: altera actio est *intima & occulta*, qua Deus, non intuitu probitatis ministri, aut dispositionis suscipientium, sed vi institutionis, in qua relucet Dei misericordia & Christi meritum, per signa sensibilia largitur gratiam, quæ, modò pravæ voluntatis obicem non inveniat, (ut autem non inveniat faciunt dispositiones prædictæ) suscipientes mundat, sanctificat, innovat, corroborat. Est itaque produci gratiam *ex opere operato* illam produci per Sacramenta, tanquam per causam instrumentalem, non vi exterioris actionis tantum, sed etiam intimæ, qua Deus dona spiritalia impertitur ob dignitatem institutionis, & applicationem meritorum Christi signis sensibilibus divina voluntate, & instituto Christi alligatam: sicuti produci gratiam *ex opere operantis* est illam produci, non ob rei exhibitæ institutionem, non ob dignitatem signorum, non ob merita Christi visibilibus symbolis alligata, sed intuitu probitatis ministrantium, & fidei suscipientium; quemadmodum duo minuta a muliere pauperrima in gazophylacium projecta *ex opere operantis* habuerunt meritum singularis, insignisque elemosynæ. Placet mihi plurimum hæc explicatio *operis operati* tradita etiam ab Andrea Fabricio Leodio Animadvers. in artic. xiii. Confessionis Augustanæ pag. 293. & a Cassandro ad art. viii. inter Opera Grotii Tom. iv. pag. 570. primum quia Fabricius videtur recte Catholicæ doctrinæ sensum assecutus; deinde quia ejus explanationi nullatenus repugnant variae Scholasticorum expositiones: postremo quia hac una præmissa eliminantur calumniæ, & fraudes omnes hæreticorum.

Philippus enim Melanchthon in Confessione Augustana anno 1540. reformata ait art. xiii. *Damnat igitur Pharisaicam opinionem, quæ obruit doctrinam de fide, nec docet fidem in Sacramentis requiri, quæ credat propter Christum nobis gratiam dari, sed fingit*

*git homines iustos esse propter usum Sacramentorum ex opere operato ; & quidem sine bono motu utentium : & in Apologia inquit nos sentire , quod per ceremonias iustificemur sine bono motu cordis , hoc est sine fide , & hanc opinionem magna auctoritate doceri in toto regno Pontificio : alii autem hæretici post Calvinum lib. iv. Iustit. cap. 14. nos immani verborum procacitate proscindunt , quoniam asserimus Sacramenta ex se gratiam conferre unicuique non ponenti obicem ipsi gratiæ , quamvis nec credat . Permulti etiam cum Vossio citato Opere num. 72. asserunt in hoc graviter Bellarminum , & Pontificios Doctores errare , quod asserant fidem ad salutem quidem concurrere , quatenus disponit , verbum ratione ejus , quod salutarem gratiam offerat , & Sacramenta , quia eandem conferunt vi actionis suæ , cum eam conferant virtute quidem signi dispositivæ , at effectivè immediatè Spiritus sancti virtute . Complures etiam nos arguunt , quod in re tam seria utamur profanis illis , ac barbaris vocibus *opus operatum* , & ignoremus etiam regulas verborum , quæ Grammatici appellant *deponentia* .*

Verùm in his omnibus gerunt se hæretici more suo , & sententiam nostram ignorant penitus , aut splendidissime mentiuntur . Primum enim cum iidem hæretici ad gratiam justificationis obtinendam *solum fidem* prærequirant ; nos etiam alias cordis dispositiones prædicamus , timorem , spem , dilectionem , & ceteras , quæ Tridentina Synodus enumerat sess. vii. cap. 6. & sess. xiv. cap. 4. ubi merito concludit : *Quamobrem falsè quidam calumniantur Catholicos Scriptores , quasi tradiderint Sacramentum Pœnitentiæ absque bono motu suscipientium gratiam conferre , quod nunquam Ecclesia Dei docuit , neque sensit* . Atque id non tantum adversus hæreticorum calumnias sancta Synodus sapienter animadvertit ; verùm etiam in articulum xiii. Confess. Augustanæ Andreas Fabricius , Joannes a Daventria , Alphonsus Virvesius , Georgius Cassander , noster Hoffmeisterus , nec non H. Grotius in adnotatis ad Cassandrum pag. 621. Placet nobis usurpare hæretici hujus verba : *Opus operatum* , inquit , *intelligitur de efficacia , ad honorandam Ecclesiam , & ejus unitatem nobis commendandam , Sacramentis attributa . Ceterum non negant Catholicis requiri ad salutarem usum in adultis fidem & Dei amorem : & hæc ita ajunt requiri , ut efficacia bonos Deo salvus sit . In his omnibus nihil est controversiæ , si dextera interpretatio accedat* . Atque ita expungitur primum hæreticorum mendacium , & in doctrinam Catholicam singularis calumnia .

Quantum ad secundam calumniam spectat , fatetur Philippica xii. pag. 301. Virvesius Scholasticos quosdam antiquiores verè asseruisse gratiam per Sacramenta conferri *non ponentibus obicem sine motu aliquo arbitrii sui* . At nihil habet incommodi hæc opinio , si loqua-

quamur de parvulis nondum ratione utentibus ; imò nisi admittatur , consequetur non esse baptizandos infantes qui non credunt , ut tenent Anabaptistæ etiam a Luthero refutati . Nam quod hæreticus iste autumat etiam in puerulis excitari fidem , somnium est delirantium . Occurrit Melanchthon dicens fidem infantium suppleri per fidem generalem totius Ecclesiæ , & per fidem specialem gestantium . Non deerunt e Schola Theologi , qui id annuant : ac nos omnium primi subscribemus Augustino dicenti lib. 1. de peccat. meritis cap. 24. num. 25. Infantes *propterea fideles vocantur , quoniam fidem per verba gestantium quodam modo profitentur* ; ac ex eodem Augustino lib. 1. contra duas Epistolas Pelagianorum cap. xx1 1. num. 40. & 1. Oper. Imp. n. 56. hanc proferemus rationem , quoniam *ita parvuli per alios credunt , sicut per alios peccatum traxerunt* . Verùm negamus per hanc fidem , & non per Sacramentum parvulos justificari ; cum hi , qui Sacramentum recipiunt , sed fidem non præsentiant , regenerentur & renascantur in Christo ; sive negamus alias in fide , quàm dispositionis , haberi partes . Atque ita Theologi illi , si qui sunt , qui scripserunt justificationem non pendere a bono animi motu , locuti sunt de gratiæ efficientia , & Sacramentorum virtute , non de dispositione suscipientium .

At quod Vossius ait , nos vim justificationis omnem ponere in signo , sive , ut ajebat Melanchthon , *in ceremonia* ; si id hæretici affirmant , quasi nos Christi institutionem , & Spiritus sancti efficientiam penitus excludamus , & quasi opinemur Sacramenta esse gratiæ causas physicas naturales , tam putida calumnia est , ut refutatione non egeat ; præsertim cum non omnes Catholici fatcantur Sacramenta physice gratiam producere , & qui oppositum docent , affirmant sensibilia clementia in producenda gratia supra energiam naturalem extolli .

Explodenda denique esset calumnia de barbarie , & novitate hujus vocis , *Opus operatum* ; nisi ad illam revincendam sat superque essent , quæ diximus cap. 1. de vocabulo *Sacramenti* . Nonnulla addamus tamen . Ac primum sit , nil ad nos pertinere *quid Grammatici velint* , ut de verbo *saneratur* inquit Augustinus serm. 3. in Ps. 36. num. 6. ac melius esse , *ut nos reprehendant Grammatici , quam non intelligant populi* , ut idem Augustinus ait in Psalm. 138. num. 20. Deinde asserimus ea verba *Opus operatum* non esse primum intrusa , cum Lutherus & Calvinus ad infestandam Ecclesiam eruperunt ; quamvis optimo consilio adversus nova hæreticorum commenta nova etiam vocabula adhibeantur : sed *opus operatum* ante Tridentinum Concilium commemoravit in 1v. dist. 1. q. 1. art. 5. Thomas Aquinas , & quinquaginta. fere annis ante Thomam lib. 111. de mysteriis Missæ cap. 5. pag. edit. Colon. 367. Innocentius III. Significationem

verò eorumdem vocabulorum occurrere in Patrum scriptis, rectè animadvertit in dissert. de quibusdam SS. PP. locis contra hæresim. Berengarii cap. 6. Christianus Lupus. Tandem negari potest esse verba aliqua *deponentia* juxta opinionem vulgarium Grammaticorum, cum Gaspare Scioppio lib. 3. cap. 2. & 3. Minervæ Sanctianæ. *Deponentia* enim sunt ea verba, quæ modo *depofuerunt* passivam, aut activam significationem, cum aliquando fuerint communia & habuerint utramque, aut potius in quibus aliquod nomen *deponitur*: ita consuetum est dicere, *utor bonis, obsequor amicis, ingredior janua, dominor libera civitate*; & verba *deponentia* hæc sunt, non quod activa, aut passiva esse nequeant, sed quia in Grammatica syntaxi *deponimus* vocabula, *usum, obsequium, ingressum, dominium*, utpote verbis ipsi *utor, obsequor, ingredior, dominor* satis expressa. Ceterum si dixerò activorum verborum servata syntaxi: *argentum abutar, abutitur operam, utor amicos, obsequor omnia, pontem ingredior, fungitur officia, pascuntur sylvas*, nemo me reprehendet, qui perlegerit Terentium, Plautum, Catonem, Virgilium. *Dominor* etiam passiva significatione usurpatur a veteri poeta, apud Ciceronem de Officiis, *ulciscor* a Memmio apud Sallustium in Jugurtha. Atque ita *opus operatum* non Schola tantum, sed etiam Latinissima Synodus retinuit absque labe orationis. Sed hæc ad Grammaticos. Collata, ut arbitror, in bono lumine controversia, expunctisque hæreticorum dictis, quæstionem distinctis thesibus nitari dirimere.

PROPOSITIO I. Non est Sacramentorum omnium, tam veteris, quam novæ legis eadem vis, atque efficientia.

Probatur 1. ex Scripturis; Sacramenta enim vetera appellantur ab Apostolo, ut vidimus cap. 1., *infirma, & egena elementa*, ad Galat. IV. 9. & dicuntur vim solam habuisse sanctificandi *ad emundationem carnis*, id est, conferendi *per se* sanctitatem tantum legalem, ad Hebræos IX. 13. è contra verò Sacramenta novæ legis dicuntur renovare hominem, sanctificare animam, & salvum facere, ut dicam infra. II. Si Sacramenta vetera habuissent cum novis eandem efficientiam, ab istis nulla alia ratione discrepant, nisi quia *ceremonia sunt alia, & alii ritus externi*; quod proscriptum est canone 2. sess. VII. Tridentini. III. S. Pater Augustinus antiquitatis fidelissimus testis lib. XIX. contra Faustum cap. 13. inquit: *Prima Sacramenta, quæ observabantur & celebrabantur ex lege, prænuntiativa erant Christi venturi, quæ cum suo adventu Christus implevisset, ablata sunt, & ideo ablata, quia impleta; non enim venit solvere legem, sed adimplere. Et alia sunt instituta, virtute majora, utilitate meliora, æstu faciliora, numero pauciora, tanquam justitiæ fidei revelata*. In Psalmum quoque LXXIII. num. 2. *Sacramenta*, inquit, *non eadem, quia alia sunt Sacramenta dantis salutem, alia promittentia*



*ventia Salvatore. Sacramenta novi testamenti dant salutem, Sacramenta veteris testamenti promiserunt Salvatore. . . Mutata sunt Sacramenta, facta sunt faciliora, pauciora, salubriora, feliciora. Vide & Epist. ad Jan. 54. aliàs 118. laudatam cap. v. hujus libri, adeasque Hier. Torrensensem in Conf. lib. 111. cap. 1. n. 4. & in Panoplia lib. 111. cap. 2. Wilhelmum Lindanum. III. Veteres iusti, quantumvis Sacramentis muniti, post mortem inferni carcere tenebantur, ut liquet ex Gen. xxxv 11. 35. Job. xv 11. 13. Psalm. lxxxv 11. 49. & ex Epist. ad Hebræos xi. 13. 39. At applicato nobis per Sacramenta merito passionis Christi, confertur jus proximum, cælestis regni, & sine culpa defunctis ipsius regni possessio, scribente Paulo ad Ephes. 11. 5. *Et cum essemus mortui peccatis, convivificavit nos in Christo, cujus gratia estis salvati, & conresuscitavit, & confortavit fecit in cælestibus in Christo Jesu, &c.**

Reponunt hæretici decipi nos magnificis Sacramentorum laudationibus. Augustinus enim nihil aliud contra Faustum contendit, nisi Sacramenta veteris legis Christum prænuñciare, nostra verò illum annunciare; illa fuisse promissiones complendarum rerum, hæc indicia completarum; & consequenter non in efficacia, & vi producendi gratiam differre, sed tantum in ratione significationis, ac promissionis, per quam Sacramenta novæ legis præsentem Salvatorem exhibentia facilius fidem excitant. Atque hanc esse mentem Augustini inferunt ex Q. xxxi 11. in Num. ubi de Sacramentis ait: *Eadem quippe sunt in veteri & novo Testamento: ibi obumbrata, hic revelata; ibi præfigurata, hic manifestata.*

Verum decipiuntur potius miserrimis hisce Calvinianis subterfugiis heterodoxi. Nam priori in loco contra Faustum disertè Augustinus Sacramenta nova appellat *virtute majora, utilitate meliora.* Quid sit autem hæc virtus, demonstrat proximo cap. xvi. affirmans eam non esse externam abluionem, aut verba celeriter prætereuntia, quibus, ut hæretici tenent, fides forinsecus excitetur; sed esse spirituale donum, & gratiam permanentem, & qua nobis æterna vitæ confertur. *Virtus autem (inquit) quæ per ista operatur, jugiter manet, & donum spirituale, quod per ipsa insinuat, æternum est.* Quod si hæretici reponerent hanc virtutem esse efficientiam Spiritus sancti; fateri deberent hanc efficientiam spirituale donum operari per Sacramenta, ut Augustinus affirmat, non per solam fidei excitationem. At dum hæretici vim Sacramentorum denegantes detorqueant verba Augustini; deprehendere debent sacrilegii notam, qua eodem libro cap. xi. a D. Parente inuruntur his verbis: *Quorum Sacramentorum vis inenarrabiliter valet plurimum, & ideo contempta sacrilegos facit: impie quippe contemnitur, sine quo non potest perfici pietas.* In secundo autem testimonio tam apertè Augustinus

To. VI.

F f

affir-

affirmat per nova Sacramenta *salutem dari*, ut nihil habeant hæretici quod reponant, nisi Augustinum per hyperbolen accipiendum! Ex præcitata etiam quæst. 33. in Num. Calvinus refellitur; ibi namque Augustinus n. 9. docet *in aqua dispersionis*, qua Iudæi mundabantur a contactu mortuorum, & a cineribus vitulæ, *significatum baptismum Christi Iudæis & gentibus profuturum*; & num. 11. ait, *Proinde qui Sacramento baptismi recte abluitur, quod illa ad dispersionis aqua figurabatur, mundatur & spiritualiter, idest, invisibiliter & in carne & in anima*. Quid ergo? In hoc per Augustinum sita est novorum Sacramentorum præstantia; quod non solum excitant ad Christi fidem, commonstrantque adimpleta, quæ in veteribus obumbrata, ac præfigurata fuerunt; verum etiam Sacramenta nova sunt *meliora, salubriora, feliciora*; & ubi antiqua adpersio aquæ mundabat *legaliter*, auferendo immunditiam carnis & vestium ortam ex contactu cadaveris; baptismus in adpersione illa præfiguratus *inenarrabiliter valet plurimum*, & mundat *spiritualiter & invisibiliter*, ut simus sancti corpore & spiritu. Vellem, ut prudens lector in hisce expendendis aliquantulum immoraretur.

PROP. II. Quamvis vetera Sacramenta *per se* non conferrent gratiam sanctificantem, sed tantum emundationem carnis, & sanctitatem legalem, tamen etiam illam gratiam contulerunt *per accidens*, & quatenus erant protestativa fidei suscipientium.

Videntur Theologi in hac propositione plurimum dissentire; nam Magister in 1v. dist. 1. ait Sacramenta vetera significandi tantum gratia fuisse instituta, neque illis unquam homines justificatos, etiam si in fide & caritate ea suscepissent. At Hugo Victorinus lib. 1. de Sacrament. fidei p. 8. cap. 11. & 12. scribit etiam illa Sacramenta instituta, ut illis Deus hominibus medicinam præberet, eundemque effectum habuisse cum Sacramentis legis novæ, & unam sanctitatem præstasse. S. Bonaventura in 1v. dist. 1. p. 1. q. 5. Hugoni adhærens, ait quidem Sacramenta antiquæ legis instituta in significationem futurorum, sed tamen per accidens justificasse; quatenus in eorum susceptione erat fidei protestatio. S. denique Thomas 1.2. q. 103. art. 2. & 3. p. q. 62. art. 6. negat Sacramenta Mosaicæ legis contulisse gratiam sanctificantem, & expiassè a peccatis. Posteriores autem Theologi quidam Hugoni ac Bonaventuræ adhæserunt, ut Estius in 1v. dist. 1. §. 28. quidam D. Thomæ, ut Bellarm. lib. 2. de Sacramentis cap. 13. At ego in primis, ut facilius refutentur hæretici, qui nobis hac præsertim in re scholarum dissidia objeçant, arbitror Magistrum, Hugonem, Bonaventuram, & Thomam, verbis tantum, non re discrepare; tamen si aliter unum, aliter alterum sentire scribant tales viri, quales sunt Bellarminus, Suarcius, Estius. Enimvero Magister scribens *quod vetera Sacramenta promittebant tantum & significabant*.

*facabant, non conferebant salutem, nec aliquis justificabatur ex operibus legis, etiam si in fide & caritate fierent, nihil habet quod Apostolo, Augustino, & Theologorum Scholæ adversetur, si plano obvioque sensu accipiatur, quod non per se, sed per fidem Mediatoris, quam præsignabant, ceremoniæ veteres justificationem impertiebantur; cum per se institutæ tantum sint gratiæ significandi, & in servitutum onusque populi pervicacis. Atque hunc esse Magistri sensum ex præcitata dist. 1. n. 1. & 2. perspicuum est. Non alia ratione accipiendus est Hugo, quippe lib. 1. de Sacram. p. 12. num. 5. primam inter Sacramenta nova ac vetera differentiam constituit, quod Sacramenta novi testamenti gratiæ spiritualis signa sunt, & ad ipsam gratiam conferendam infusa sibi benedictione principaliter instituta. Sacramenta autem vetera erant horum signa tantum, & gratiam conferebant non infusa sibi benedictione, sed mediantibus iis, quorum signa fuerant, ne sine salute essent, qui redemptionis tempora præcesserunt. Quare etiam Hugo censuit vetera Sacramenta per se fuisse nuda signa futuræ reparationis, & gratiam contulisse tantummodo ratione fidei in Christum, quem promittebant. Sanctus etiam Bonaventura iisdem Hugonis vestigiis insistens docet citato loco Sacramenta vetera non per se, sed per accidens justificasse, ratione scilicet fidei operibus legis conjunctæ; tametsi Bonaventura interpretatus sit Magistrum, quasi scripserit nunquam vetera Sacramenta, contulisse gratiam nec per se, nec per accidens: quod nescio, an apud Magistrum inveneris. Tandem Beatus Thomas laudato art. 6. ait quidem Sacramenta veteris legis non contulisse gratiam sanctificantem, sed addit, per se ipsa, id est, propria virtute, quatenus scilicet veteres iusti non per Sacramenta, eorumque usum justificabantur, sed ratione fidei in futurum Reparatorem, cujus fidei Sacramenta legis erant quædam protestationes. Atque his ipsorum Doctorum verbis & doctrina explicatis constat inter ipsos nullum, vel minimum interesse discrimen; cum singuli, sive dicant Sacramenta legis significasse duntaxat, non contulisse salutem; sive affirmant non contulisse gratiam per se, propriaque virtute; sive doceant justificasse ratione fidei adjunctæ; hoc unum intendant, gratiam non esse tribuendam virtuti antiquorum Sacramentorum, sed fidei: cujus tamen fidei virtute etiam per illa Sacramenta collatam esse iustitiam, nullus, si probe sentio, negare potest.*

Itaque præmissis veterum Scholasticorum vindiciis, eorumque conciliatis sententiis, ad hunc modum propositionem stabiliō . I. Ex Apostolo ad Hebr. v. omnis Pontifex, etiam Aaronici ordinis, constituitur in his, quæ sunt ad Deum, ut offerat dona & sacrificia pro peccatis. Et quidem sacrificia pro peccatis instituta, liquet ex libro Numerorum: oblata autem ad averterendam Dei indignationem, &

statutas scelerum pœnas, ex Regum historiis, librisque Machabæarum. Haud inficiamus præcipuam instituendorum sacrificiorum rationem esse obsequium cultumque præstandum supremo Domino: concedimus etiam sanguinem hircorum & vitulorum contulisse vi sua munditiam tantum legalem, nec Judæos a servitute legis immunes penitus reddidisse; sed cum omnia in figura contingerent, præsignabant, ita pro hominibus mactandum fore Christum, agnum Dei immaculatum, expiandamque hujus sanguine conscientiam univerforum, sicut hostiæ substituebantur pro transgressoribus, & lustrationes conferebant carnis emundationem. Id vero disputantes contra Socinum libro xxvi. demonstravimus. Hac ergo veterum figurarum umbra, patres ad fidem promissi liberatoris pertrahebantur; atque ita per hanc fidem & gratiam Christi emundabantur ab animi inquinamentis, ita, ut legis signa non quidem *per se*, sed *per accidens* gratiam sanctitatis conferrent. Conciliantur hoc pacto adversæ specietenus Scripturarum sententiæ, quod nempe ea Sacramenta egena fuerint, vacua, inutilia, infirma, umbræ futurorum, nec vim habentia auferendi peccata; & quod per ea homines Deo placuerint, supplicia evitarint, veniam patratum scelerum obtinuerint: quorum primum est aniquis Sacramentis *essentiale* & *intrinsecum*; alterum *adventitium* & *accidentarium* est, proveniens nempe ex fide, atque pietate creditum. II. Saltim sensu explicato Sacramenta vetera contulisse gratiam affirmant Ecclesiæ Patres: Ambrosius enim lib. vi. 1. in Lucam num. 166. scribit: *Venit ad Abraham, venit ad Moysen, venit ad Mariam, hoc est, venit in signaculo, venit in lege, venit in corpore. Adventum ejus ex beneficiis recognoscimus. Alii purificationis, alibi sanctificatio, alibi justificatio est: circumciso purificavit, sanctificavit lex, justificavit gratia. Sane Ambrosius non tribuit legi vim sanctificandi per se; nam præcedenti libro iii. in Lucam scripserat legem ab ea pietate, quæ secundum Deum est, decretorum difficultate prohibuisse, atque ideo fuisse utilem incredulis & necessariam infirmis, quia lubricos & errantes præcepti salutaris austeritate cohibebat: libro etiam vi. num. 35. docet eatenus legem sanctificare, quatenus peccata reprehendit, atque ita qui per legem pravaricationis crimen agnoscat, currit ad penitentiam, & consequitur gratiam. Atque hoc est, quod Scholæ Magistri appellaverunt, sanctificare per accidens. Consonat Augustinus, qui in Leviticum, q. 84. demonstrat nihil prodesse Sacramentum visibile sine invisibili sanctificatione, affirmatque Moysen sanctificasse visibilibus Sacramentis per ministerium suum, Dominum autem invisibili gratia per Spiritum sanctum. A visibilibus ergo Sacramentis, etiam antiquis, Augustinus minime gratiam sanctificationis disjungit. At non ait S. Pater vetera Sacramenta sanctificasse per se: immo discrimen maximum sta-*

statuit inter vetera & nova, ut vidimus præced. proposuit. & consequenter docet solum, Sacramenta legis justificasse *per accidens*, & merito fidei Evangelicorum mysteriorum, quæ præfignabant: atque id paullo post egregius Doctor affirmat de sacrificiis legalibus, scribens quæ st. 25. in Num. *Si per seipsa attendantur, nulli peccato possunt mederi; si autem res ipsæ, quarum hæc Sacramenta sunt, inquirentur, in eis inveniri poterit purgatio peccatorum*. Eadem est sententia Leonis Magni serm. 2. de Pentecost. cap. 4. quo in loco, *Omnes Sancti, inquit, qui prioribus fuere temporibus, ejusdem sunt Spiritus sancti sanctificatione vegetati: & sine hac gratia, nulla unquam instituta Sacramenta, nulla sunt celebrata mysteria: ut eadem semper fuerit virtus charismatum, quamvis non eadem fuerit mensura donorum*. Verum eo loci S. Pontifex docet quidem nunquam sine Spiritus sancti virtute, aut remissa fuisse peccata, aut instituta fuisse Sacramenta; sed minime Sacramentis omnibus tribuit eandem efficientiam. His assertum nostrum comprobatum est, ac demonstratum simul quo sensu nonnulli Patres vim producendi gratiam veteribus Sacramentis tribuerint, & quomodo fallantur hæretici, qui prædictorum Patrum auctoritate oppugnare nituntur præcedentem primam propositionem.

PROP. III. Sacramenta veteris legis gratiam conferebant *ex opere operantis*: de circumfisione tamen diversæ sunt Scholasticorum Doctorum sententiæ.

Prima pars sequitur ex dictis; si enim vetera Sacramenta per se valebant tantum ad emundationem carnis, & ad conferendam justitiam legale, peccatum autem auferre non poterant, nisi ratione fidei in futurum Reparatorem, quem promittebant; profectò non nisi *ex opere operantis* sanctificabant. Deinde confirmatur hæc propositio verbis Florentini Concilii in decreto unionis, ubi inter vetera ac nova Sacramenta hoc statuitur discrimen: *Illæ non causabant gratiam, sed eam solum per Christi passionem dandam figurabant: hæc verò nostra & continent gratiam, & ipsam digne susipientibus conferunt*: quæ verba consonant productis ex Augustino, *Sacramenta novi testamenti dant salutem, Sacramenta veteris testamenti promittebant Salvatorem*.

Opp. 1. Liquet ex Scripturis ac Patribus, etiam sacrificia vetera sanctificasse, & effecisse peccatorum expiationem. Deinde Petrus in priori Epistola 111. 20. comparat aquam baptismatis aquæ, per quam in diebus Noe salvæ factæ sunt octo animæ. Paulus etiam in 1. ad Corinth. x. 2. de Patribus Testamenti veteris ait: *Et omnes in Moyse baptizati sunt in nube & in mari: & omnes eandem escam spiritalem manducaverunt, & omnes eundem potum spiritalem biberunt, &c.* Si ergo aqua baptismi, & panis Eucharisticus *ex opere operato* produ-

cunt

cunt gratiam; idem, eodemque pacto præsterunt mare rubrum, & manna.

Resp. ex Scripturis ac Patribus manifestum esse, quod Sacramenta sanctificabant tantum per accidens, *per se* autem erant significativa gratiæ, quatenus aut conferebant sanctitatem legalem, aut eripiebant transgressores a morte corporis; quæ gratiæ redemptionisque a Christo perficiendæ erant symbola, ut explicatum est supra. Idem est sensus verborum Petri, qui scribens citato loco, *Quod & vos nunc similis formæ salvos facit baptisma*, demonstrat in arca Noe Ecclesiam, in aqua baptismum, in corporum a naufragio liberatione præfiguratam fuisse æternam animarum salutem. Ea enim verba *similis formæ*, non virtutis æqualitatem significant, sed figuram, similitudinem, ac typo respondens exemplar, extatque in Græco *ἐν τύπῳ*: quo vocabulo Apostolus ad Hebr. ix. 24. appellat *manu-facta sancta exemplaria verorum*, *ἐν τύπῳ τῶν ἀληθινῶν*. Eadem significatione alloquitur Corinthios Apostolus, nec aliud docet, nisi nubem ac mare fuisse typum baptismatis, manna Eucharistiæ, petram ex qua fluxerunt aquæ Christi ex cujus latere Sacramenta exiere, terram promissionis umbram cœlestis regni, prostrationem in deserto symbolum reprobationis. Hortatur enim Apostolus Corinthios ne sibi impunitatem polliceantur, si obsequentes sint illecebris concupiscentiæ, freti nimium baptismatis & Eucharistiæ virtutibus. Utitur autem hoc argumento. Quidquid priscis contigit Patribus, id in figura factum est nostri: omnes Judæi fuerunt sub nube ac transferunt mare, atque id præsignabat baptismum: omnes eandem escam spirituales manducaverunt, scilicet manna symbolum Eucharistiæ: omnes biberunt de petra, quæ erat figura Christi, & nihilominus qui vitulum adoraverunt & fornicati sunt, in solitudine perierunt. Hæc omnia nobis præbuerunt exemplum, ac præsignarunt fore ut miserime percamus, neque nos Sacramenta eruant a perditione, si improborum Judæorum sectemur scelera. Vide præclarum Apostoli Commentatorem Estium, nec non ex Acatholicis Cappellum, & Grotium. At quid interpretes adendum? Sese explicat Paulus scribens versu 5. & seq. *Sed non in pluribus eorum beneplacitum est Deo: nam prostrati sunt in deserto. Hæc autem in figura facta sunt nostri, ut non simus concupiscentes malorum, sicut & illi concupierunt.*

At inquit Calvinistæ: Si eandem ac nos escam manducaverunt, eundemque susceperunt baptismum; habuerunt etiam eadem, ejusdemque virtutis mysteria.

Respondet Bellarminus libro 2. de Sacramentis cap. xvii. sic intelligendum esse Apostolum, ut significarit patres manducasse eandem escam *inter se*, non eandem *nobiscum*: quam responsionem probant Scholastici, ut Cardinalis Gotti Tom. xiii. pag. 71. Habert

Tom. v.

Tom. v. pag. 29. Nec ego huic responsioni adversabor; primum; quia scopo Apostoli nuper exposito quadrat optime: deinde quia non ait Paulus, eundem cibum, eundem potum nobiscum, sed absolute eundem cibum, eundem potum; præterea quia Christus Joannis 6. 32. affirmat Moysen non dedisse *panem de Cælo verum*, manna ab Eucharistia distinguens. Ceterum non desunt Patres, qui ita Apostolum interpretantur, ut Judæi etiam eundem panem nobiscum manducaverint; non Augustinus tantum in Psalmum 7. 22. & Tractatu 45. in Joannem num. 9. sed etiam Anselmus, & Divus Thomas in caput x. Epistolæ 1. ad Corinthios. Hunc etiam sensum probat lib. vi. Biblioth. cap. 196. Sixtus Senensis; nec aliter sentiunt, auctore Estio in Paulum pag. 291. Græci Patres. Verum neque hæc interpretatio suffragatur Calvino. Augustinus enim in præcitatum Psalmum, ait, *Idem itaque in mysteria cibis & potus illorum, quò noster, sed significatione idem, non specie, quia idem ipse Christus illis in potu figuratus, nobis in carne manifestatus*. Quod proximum. 3. enucleatius exponens agnoscit in Sacramentis veteribus, non rem, sed figuram eorum, quibus nos fruimur, longa oratione persecutus, quæ nos paullo supra extremis delibavimus labris. Nec aliud Augustinus Tract. præcit. in Joannem, ubi docet veteres eundem cibum manducasse, eundemque bibisse potum, *si attendamus intelligibilem significationem*; nam inquit, *quid nos bibamus, novum fideles*: bibimus namque ac manducamus quod profanis consuetum non est revelare. Est autem utrobique Augustini scopus commonstrandi nobiscum Patres fidei societate fuisse conjunctos, nec aliud antiquis signis prænuntiatum, quàm quod apprehenditur novis, ita, ut veteres habuerint symbola earum rerum, quarum nos veritatem sumus assecuti. Ac idem tradere duo Ecclesiæ lumina, Anselmum, ac Thomam commonstrant eorum scripta: ille siquidem ait, antiquos Patres eundem nobiscum panem, potumque gustasse, quoniam manna & aqua habebant in se *figuram corporis & sanguinis Domini*: iste autem, *eandem*, inquit, *escam spirituales manducaverunt, idest, Christi corpus in signo spiritualiter intellecto*. Nos itaque hæreticis hac responsione, nec a Thomistis rejicienda, occurremus: Antiqui Patres eandem nobiscum escam manducaverunt, eandem *significatione ac symbolo*, concedo: eandem *reipsa, ac virtute*, nego.

Insuper oppones: Sacramenta novæ legis, ut dicendum est infra, gratiam conferunt *ex opere operato*, quoniam vim habent ex Christi passione: cur verò idem dicendum non est de Sacramentis veteris legis, cum omnes Sancti tam novi, quam antiqui fœderis, non nisi merito passionis Christi salutem sint consecuti?

Resp. S. Thomas q. 62. art. 6. ad 1. virtutem passionis Christi copulari nobis per fidem, & per Sacramenta; sed unionem, quæ fit per

per fidem esse per actum animæ, unionem verò quæ est per Sacramenta fieri per usum exteriorum rerum: & quoniam actus animi potest etiam futura apprehendere, ideo antiqui iusti salvi sunt per fidem Christi venturi; e contra quia id, quod nondum est, nequit movere secundum usum exteriorum rerum, passio Christi nondum perfecta non justificabat per usum visibilium Sacramentorum. Hanc responsionem non probat illustris Estius in 1v. dist. 1. §. 28. quia etsi tempore veteris legis mysterium passionis Christi nondum esset perfectum, Deus tamen respiciens in passionem Christi futuram potuit hominibus illius temporis conferre gratiam per Sacramenta, tanquam per signa, quibus divina virtus infallibiliter assisteret. Nec necessum est, inquit, ut quod movet in genere causæ efficientis existat, aliàs nec moveret id, quod jam esse desiit, atque ita nec Sacramenta novæ legis virtutem haberent a passione Christi transactâ profluentem. Hæc Estius. Propugnari tamen potest responsio Thomistica, si spectetur tradita a D. Thoma inter actum animi, & usum rei sensibilis differentia, & si attendatur juxta D. Thomam Sacramenta novæ legis esse instrumenta gratiæ physica, aut physicis similia, quæ non a prævisa Christi passione, sed a perfecta virtutem habent suam: atque ita vindicat S. Thomæ doctrinam Franciscus Sylvius in eundem articulum, pag. 207.

Quoniam tamen ipso Sylvio fatente talis Sacramentorum causalitas incerta est, eudam ingenio meo responsum alterum, & ne fallor, planissimum. Testamenta duo sunt, & utriusque Sacramenta diversa; fides autem est una. Vetus testamentum vitulorum & hircorum sanguine confirmatum est; novum Christi morte, præsignata in hostiarum veterum mactatione. *Es ideo*, inquit Apostolus ad Hebr. 1x. 15. *novi testamenti mediator est*; cumque vetus testamentum haberet umbram futurorum bonorum, Christus morte sua veterem legem, huiusque Sacramenta abrogavit, institutis Sacramentis salubrioribus. At fidem antiquam non eliminavit, sed confirmavit; quod enim veteres credebant futurum, id nos credimus jam completum. Hinc antiqui Patres ratione legis, ejusque symbolorum pertinebant *ad vetus testamentum*; ratione fidei pertinebant *ad testamentum novum*. Legito Augustinum lib. de Grat. novi Testam. ad Honoratum, sive Epist. 140. aliàs 120. num. 5. & seq. Puto in his nihil occurrere difficultatis. Respondendum est itaque, etiam antiquos Patres justificatos ex fide Christi, ejusque passionis merito: quia fides est una, & ad hanc confirmandam Christus profudit sanguinem; non fuisse autem justificatos per Sacramenta, quoniam hæc diversa sunt, nec Christus mortem subiit, ut confirmaret Sacramenta legis. Quare negandum est collatam fuisse veteribus Sacramentis vim justificandi *ex opere operato* intuitu passionis Christi.

PRO-



PROPOS. IV. Sacramenta novæ legis ex merito passionis Christi iustificandi vim habent .

Sequitur ex dictis , & confirmatur auctoritate Sanctorum . I. Hieronymus in cap. 43. Isaïæ , Tom. 111. pag. 326. ait in Baptismate dimitti peccata , & vetus chirographum deleri *in aspersione & sanguine novi testamenti* . Et in Epist. 82. ad Oceanum Tom. 1v. pag. 651. scribit *Latus Christi percutitur lancea, & baptismi atque martyrii pariter Sacramenta funduntur* . In Dialogo etiam adversus Pelagianos lib. 1. pag. ejusdem Volum. 504. *Redimitur* , inquit comparans Sacramenta urbi fugitivorum , *redimitur sanguine Salvatoris , aut in dono baptismatis , aut in pœnitentia* . Plura Schultingus Confess. Hieronymianæ pag. 654. Augustinus etiam Tract. x1. in Joan. 4. *Significabat mare illud rubrum baptismum Christi . Unde rubet baptismus Christi , nisi Christi sanguine consecratus ?* Ex latere Christi in cruce transfixo Sacramenta Ecclesiæ profluxisse tradit S. Pater lib. xv. de Civit. Dei cap. 26. in Psalmum 40. & 55. aliisque in locis . Hoc idem ab Augustino dictum esse , non solum quia sanguis & aqua significant baptismum ceterorum Sacramentorum januam , & Eucharistiam in qua pretium ipsum sanguinis continetur , verum etiam quia Sacramenta a morte Christi virtutem accipiunt suam , ex Tractatu cxx. in Joan. n. 2. sapienter in articulum v. q. 62. ratiocinatus est Sylvius . Tandem accedit ratio insinuata articulo eodem a D. Thoma ; etenim per Sacramenta nobis Christi passio applicatur , Christo jungimur , Christi gratia laetificur , ac *per baptismum cum Christo conscripti sumus in mortem* , ut Apostolus inquit ad Rom. vi. 4. & ad Coloss. 11. 12. Per Eucharistiam digne susceptam in Christo manemus , ac propter eum vivimus , Joan. vi. 57. 58. Per cetera Sacramenta aut gratiam , aut gratiæ recipimus incrementum : quæ passionis Christi effecta esse saluberrima , nemo non novit .

PROP. V. Eadem novæ legis Sacramenta *ex opere operato* producant gratiam .

Hæc propositio definita , ut diximus , Tridentino canone , præcedentium dissertationum confectarium est . Si enim in hoc sita est natura Evangelicorum Sacramentorum , quod sunt signum efficax gratiæ , si perficiuntur verbis , quorum non est munus præcipuum fidem promovere , sed subjectam consecrare materiam , & si , quod nuper vidimus , inter nova ac vetera Sacramenta discrimen est maximum , non tam in diversitate rituum , quam in derivata a merito Christi virtute ; necessario Sacramenta hujus legis debent ob gratiæ ubertatem & efficientiam præferri vetustioribus , & spiritualia dona impertiri *ex opere operato* ; quod nihil est aliud , nisi visibilibus signis vi institutionis , & merito passionis Christi conjunctam esse virtutem sanctificandi . Addamus tamen quædam pro Catholica veritate momenta .

Ro. VI.

Gg

Ac

Ac primo constat ex sacris litteris per Sacramenta nos salvos fieri, exuere veterem hominem, innovari spiritu, regenerari, renasci, peccatorum obtinere remissionem, sanctificari, mundari, donis spiritualibus exornari. Quid ad significandam vim & energiam, producendi gratiam potest proferri expressius? Assumptum, ut vocant, probatur: nam de baptismo legimus Joannis 111. 5. *Nisi quis renatus fuerit in aqua & Spiritu sancto*. Ad Titum 111. 5. *Salvos nos fecit per lavacrum regenerationis & renovationis Spiritus sancti*. Ad Galat. 111. 27. *Quicumque in Christo baptizati estis, Christum induistis, &c.* De Confirmat. Act. v111. 17. *Tunc imponebant manus super illos, & accipiebant Spiritum sanctum*. De Eucharistia Joan. v1. 55. *Qui manducat meam carnem, & bibit meum sanguinem, habet vitam aeternam*. De Pœnitentia Joan. xx. 23. *Quorum remisistis peccata, remittuntur eis*. De Ordine, gratiam conferri per impositionem manuum presbyterii ait Apostolus 2. ad Timoth. v1. 6. De Unctione extrema inquit Jacobus v.14. *Si in peccatis (infirmus) sit, remittentur ei*. De Matrimonio, etsi idem expresse in Scripturis non habeatur, ejus tamen gratiam commendat, quod Christus benedixit nuptiis, easque præsentia sua consecraverit, Joan. 11. 2. Utuntur his testimoniis Theologi omnes, Bellarminus lib. 2. de Sacram. cap. 3. Estius in 1v. dist. 1. §. 4. Tournely q. 3. art. 1. Habert cap. 4. q. 7. alique communiter.

Respondent hæretici. 1. figuratas esse locutiones, quæ baptismum comparant aquæ lavacro, ac demonstrare tantummodo Spiritum sanctum animam purgando, & irrigando, quasi aquarum munere fungi. 2. Sacramenta eatenus peccata dimittere, quatenus fidem excitant. 3. aperte Petrum epist. 1. cap. 111. 2. non aquæ abluenti fordes carnis, sed *bonæ conscientie interrogationi* tribuere gratiam salvificam. 4. etiam Jacobum non unctioni, sed orationi fidei adscribere ægrotantium levamen & gratiam.

Verum inania sunt hæc subterfugia. Primum quidem; nam etsi demus hæreticis loqui Christum & Apostolos de baptismo tropice, & figurate; in hoc patet positam figuræ rationem, ut sicut aqua nativa virtute sordes carnis extergit, ita salutare lavacrum virtute Spiritus sancti lavat peccatorum inquinamenta; & sicut qui nascitur, fruitur usura lucis, ita qui per baptismum regeneratur, splendore sanctitatis perfunditur. Deinde non Spiritui sancto tantummodo regenerationem & purgationem tribuunt Scripturæ, sed Spiritui sancto & aquæ, Spiritui sancto & baptismi lavacro, ut nempe in Spiritu intelligamus virtutem sanctificationis præcipuam, in aqua vero id, quo virtus ipsa sanctificat, sive causam, ut dici solet, instrumentalem. Ita, ut Sanctorum utar exemplis, dum voce Deus mundum condidit, dum Filius Dei verbo, contactu, spūto, digito, halitu patravit miracula, horum

horum effectricem causam fuisse divinitatem quis negat? verba autem, digitum, sputum, halitum fuisse ipsorum miraculorum instrumenta quis ignorat? Sed vide hujus libri caput undecimum. II. Nec Sacramenta sanctificant fidem excitando, primum quia in adultis fides Sacramentorum administrationem præcedit: non enim quis baptizatur ut credat; sed imbuitur fide ac baptizatur, ita, ut fides sit dispositio ad rite suscipienda Sacramenta, non apprehendendæ justitiæ instrumentum. Ut enim quando mulier viro desponsatur, notitia requiritur ut contractus sit rationalis & liber, conjugium, verò perficitur corporum traditione; ita dum anima desponsatur Christo, requiritur fides, ut sciat cui se devovet & copulatur, sed copulatio hæc peragitur usu visibilium instrumentorum. Si verò baptizandi sint parvuli, quis dicit in his per signa sensibilia excitari fidem, nisi insaniens Lutherus? III. Affirmans Petrus, quod nos *salvos facit baptisma*, non *carnis depositio sordium*, sed *conscientiæ bonæ interrogatio*, principio a baptisate salutem repetit, dicens, *Salvos facit baptisma*: deinde consequentium verborum, me quidem iudice, sensus est, baptisus salvat, non quatenus abluit corpus, sed quatenus remittendo peccata animum reddit sibi bene conscium. Etenim hæc expositio simplex & obvia est. Præterea, quemadmodum in hac phrasi *Baptisma non est depositio sordium carnis*, occurrit *metonymia*, quæ sensum reddit, Baptisma non salvat quatenus corporales maculas lavat; ita in phrasi ista, *Baptisma est interrogatio conscientiæ bonæ*, metonymicus sensus est, Baptisus nihil relinquit, quo aliquis facto sui ipsius examine torqueri debeat conscientia. Est etiam hæc expositio cohærens lectioni, quam habet Tom. II. pag. 514. Oecumenius: *Baptisma nos quoque salvat, quo non carnis sordes abijciuntur, sed quo fit ut bonæ conscientiæ responsio sit apud Deum*. Hac vero expositione præmissa, torquebit sese perperam serpens hæresis. Quod si placet magis per *interrogationem bonæ conscientiæ* intelligendam internam fidem externa professione expressam a baptizandis, nec ero repugnans; dummodo gratiæ effectus, ad quem fides disponit, ab externa ablutione minime separetur. At Græco vocabulo *ἐνδοξος*, *conscientiæ*, animum sibi conscium significari non dubito: idque recte expressit Arabs interpret Tom. V. Polygl. pag. 901. *Nunc baptisma salvat nos, non amovendo sordes carnis tantum, sed exhibendo conscientiam*. IV. Ultimum hæreticorum perfugium consimile est reliquis. Orationem a presbyteris factam super infirmos *formam* Sacramenti nos esse contendimus, quippe non sola adhibetur, sed cum *unctiōe*; & ad hanc perficiendam, non ad excitandam fidem deservire, illinc patet, quod *Unctio* extrema etiam iis, qui mente destituuntur, ex antiqua consuetudine administratur.

Sed de his instituenda rursus disputatio : legendus interim Estius in Epistolam Jacobi pag. 1144.

Præterea thesis confirmatur traditione Patrum. Justinus enim Apol. pag. 94. ait nos, quemadmodum progenerati sumus *liquido genitales fati*, ita per baptismum renasci, & remissionem antecessorum peccatorum consequi in aqua. Tertullianus de Baptismo cap. 4. *Supervenit statim Spiritus de cælis, & aquis superest, sanctificans eas de semetipso, & ita sanctificata vim sanctificandi combibunt*. Et infra: *Medicatis quodammodo aquis, & spiritus in aquis corporaliter diluitur, & caro in iisdem spiritualiter mundatur*. Ac sexto capite: *In nobis carnaliter currit unctio, sed spiritualiter proficit: quomodo & ipse baptismi carnalis actus quod in aqua mergimur; spiritualis effectus quod delictis liberamur*. De Resurrect. autem carnis cap. 8. *Caro abluitur, ut anima emaculetur. Caro angitur, & anima consecratur. Caro signatur, ut anima muniatur. Caro manus impositione adumbratur, ut spiritus illuminetur. Caro corpore & sanguine Christi vescitur, ut & anima de Deo suginetur*. Cyprianus Epist. lxx. Vngi, inquit, *neceffe est eum qui baptizatus sit, ut accepto chrismate, idest, unctione, esse unctus Dei, & habere in se gratiam Christi possit*. Gregorius Nyssenus Orat. in Baptismum Christi ait: *Baptisma peccatorum expiatio est, remissio delictorum, renovationis & regenerationis causa*. Ambrosius lib. 1. de Sacram. cap. iv. num. 11. in hoc præfert baptismum mari, per quod transiit Judæorum populus, quod Judæi mortui sunt in deserto, at qui regeneratur baptismo, per hunc fontem transit a peccato ad vitam, a culpa ad gratiam, ab inquinamento ad sanctificationem: *qui per hunc fontem transit, non moritur, sed resurgit*. Et proximo cap. num. 15. docet aquam illam sanare, quæ habet gratiam Christi; & talem esse aquam baptismatis, posteaquam Spiritus descenderit, & aquam illam consecraverit. Idem Ambrosius libro 2. de Pœnit. num. 12. exemplo Naamani, qui initio lepram suam per aquam mundari posse non credidit, demonstrat verissimum esse, quod nonnullis impossibile videbatur, ut peccatum ablueret aqua. Hieronymus prælaudata Epist. ad Oceanum pag. 650. prædicans baptismi laudes, comparat illum aquis, super quas Spiritus Domini in aurigæ modum ferebatur, & nascentem mundum parturiebat: ait baptismi figuram referre extructionem firmamenti, quod juxta hebraici sermonis etymologiam ex aquis fortitur vocabulum; egressionem pennatorum de aquis, in quibus præfigurabantur fideles, quos baptismus de terra levat ad cælum; fontem in medio paradisi scaturientem; diluvium, quo purgatus est mundus, mare in quo suffocatus est Pharaon, & cetera plura, quæ nunc prætermittimus, concludentes Hieronymianis verbis, *In lavacro omnia peccata merguntur*. Augusti-

gustini, præter ea, quæ producta fuere hujus disputationis decursu, præclara est sententia libro iv. contra Cresconium cap. 16. num. 19. ubi firmissimis argumentis, ipsorumque Donatistarum factis com-  
monstrat, *non eorum meritis a quibus ministratur, nec eorum quibus ministratur, constare baptismum, sed propria sanctitate, atque veritate, propter eum a quo institutus est.* Cetera, quoniam his recta-  
petitur hæreticorum jugulum, non proferam. Adefis Bellarminum lib. 2. cap. 6. & sept. ex cujus fontibus video. ferè omnes bibisse, nec non pervulgatas Confessiones Orthodoxorum, Tertullianam & Cyprianicam Carthusiensis Petrei lib. 111. cap. 1. Ambrosianam Nopelii lib. 111. pag. 183. Hieronymianam Schuldingi Tom. 111. cap. 1. art. 4. & 5. Augustinianam Torrensis pag. edit. Dilingæ 150. 2.

Frustra hæc Patrum testimonia eludent Sectarii: quippe quæ nobis suppeditant ratiocinium istud firmissimum. Sacramenta sanctificandi vim habent a Spiritu sancto: ipsorum spiritalis effectus est peccata remittere: id non a merito hominum pendet, sed ab ipsorum Sacramentorum virtute; & si mortalium animum pulsât hæc dubitatio, quomodo elementa corporalia gratiam conferri possint spiritalem, debemus acquiescere, credentes iisdem elementis inesse Spiritus sancti energiam. Hæc Patres. Atqui asserentes per Sacramenta gratiam *ex opere operato* produci, nihil affirmant aliud, nisi Sacramentis inesse vim sanctificandi, hac vi pollere ex Christi institutione, independentem a fide, meritoque mortalium; & si ab iis quætur quomodo signa sensibilia producere valeant munera spiritalia, respondent in iisdem signis divinam operationem latitare. Qui ergo asserunt gratiam per Sacramenta *ex opere operato* produci, hi a Patrum doctrina ac sensu nullatenus recedunt.

Tandem propositio vulgari hac ratione firmatur. Conferre gratiam *ex opere operato* est illam conferre per administrationem Sacramenti, non per fidem ministrantium, neque per dispositionem suscipientium. Sacramenta novæ legis gratiam non conferunt per fidem ministrantium, quandoquidem fatentur Novatores validum esse baptismum etiam ab hæretico, vel a pagano collatum, immo ab irrisore, a mimo, a diabolo: neque eam conferunt ex sola dispositione suscipientium; tum quia parvuli absque ulla dispositione lavacro regenerationis mundantur; tum quia juxta Evangelica eloquia, si quis credat, sed cum possit baptizari, id negligat, nequit salvari. Igitur Sacramenta novæ legis *ex opere operato* producunt gratiam.

Argumenta hæreticorum jam a nobis refutata fuerunt: quæ petuntur ex hujus vocis *ex opere operato* novitate ac barbarie, dirimuntur in prænotatis ad præsentem dissertationem: quæ suadere possent veteribus, novisque Sacramentis inesse vim eandem, prima & secunda propositione expunguntur; quæ verò asseruntur ad probandum.

dum solam fidem *instrumentum* esse justitiæ apprehendendæ; ea discussa fuerunt lib. XIX. cap. V. In hoc etiam libro cap. XI. ostendimus non solum fidei, verum etiam Sacramentorum usui gratiam reponi. Dari etiam fidem *informem*, ut vocant, idest, a remissione peccatorum sejunctam, diximus libro XXI. cap. I. Omnia modo ad syntaxim revocando dicimus *fidem* dispositionem esse ad justificationis gratiam obtinendam, & *sine fide* per opera legis nunquam potuisse, neque nunc posse hominem justificari; quoniam *fides*, ut Augustinus ait, *est humanæ salutis initium*; sed negamus fidei justificationem infallibiliter esse conjunctam: cujus rei prior ratio est, quia fides exigitur, ut quis ad gratiam baptismatis digne accedat; ut supra diximus, & infertur ex ultimo cap. Marci, nec non ex Actis Apostolicis: ubi legimus prius credendum esse, postea baptismum administrandum, non contra ad promovendam fidem, lustralem aquam fundendam; ideoque fides est *conditio*, ut quis baptizetur in remissionem peccatorum, propterea quod nemo invitus & ignarus, (si compos sit sui) Christo per visibilia Sacramenta conjungitur. Quare Philippus Eunuchum petenti baptismum, Act. VIII. 37. respondit, *Si credis ex toto corde, licet*. Atque in eodem cap. versu 12. legitur Samaritanos recepisse baptismum, *cum credidissent Philippo evangelizanti*. In justificatione ergo fides est præcedens *conditio*, nec gerit vices alias, quàm ad salutarem gratiam disponendi. Accedit, quod si quis credat, non tamen poenitentiam agat, & conteratur, nunquam gratiam consequitur: unde jam credentibus, & corde compunctis agebat Petrus Act. 11. 38. *Poenitentiam agite, & baptizetur unusquisque vestrum in nomine Jesu Christi, in remissionem peccatorum vestrorum: & accipietis donum Spiritus sancti*. Cur baptizandi erant in *remissionem peccatorum*, si hanc obtinuerant per fidem? Fides ergo ad justificationem *disponit*, non ipsa *justificat*.

Unus restat scrupulus, sed eximendus quamfaciliter. Si nempe Sacramentorum effectus pendet a dispositione suscipientium; quomodo verum est ea *ex opere operato* conferre gratiam? Aut contra, si *conditio* & *necessitas* fidei non officit, quin Sacramenta gratiam *ex opere operato* producant; ecur hoc pacto gratiam non contulerunt Sacramenta vetera, quæ justificabant ratione fidei? Verum hæc nullius momenti sunt, si dicta hastenus attendantur. A calce ad caput hujus differentiationis constat Orthodoxos ita gratiam conferendi virtutem tribuere Sacramentis, ut certas in subiecto dispositiones requirant, & jejuna esse prætexta, frigidaque calumnias autumantium nos excludere in magno justificationis opere *motus arbitrii*. Sane cohæret optime inesse Sacramentis *energiam* producendi gratiam, & hanc non recipi in subiecto nequaquam disposito. Ut enim a causa naturali petamus exemplum, inest aquæ vis abstergendi sordes, & igni subiectam.

ma-

materiam comburendi, et si nec laventur, nec comburantur corpora contrariis affecta dispositionibus, puta laterem crudum, lignum viride. Dicimus ergo Sacramenta novæ legis virtutem habere sanctificandi vi institutionis suæ, ac merito passionis Christi, nec tamen sanctificare invitum & incredulum; non defectu sui, sed *obiciis* subjectorum; uti aqua mundat, ignisque adurit indita sibi proprietate, quamvis id in quolibet corpore non efficiat. Cum autem Sacramenta legis non ad sanctificationem sint instituta, sed ad significationem futurorum, nec illis ex Christi morte accefferit gratiam producendi potestas; recte idcirco statutum est Sacramenta illa non *per se*, sive *ex opere operato* contulisse gratiam, sed *per accidens*, & *ex opere operantis*.

De *circumcisione* duntaxat difficultas est inter Scholæ Doctores, eamque ad statuendam æqualitatem Sacramentorum utriusque legis urget in 111. Instit. cap. 16. hæresiarcha Calvinus. Magister ergo Sent. Scotus, & qui eo sub duce militant, necnon Estius, Juenin, alique multi affirmant circumcisionem *ex opere operato* contulisse gratiam; negant id Thomistæ, ac nostratium complures. Ac prioris sententiæ momenta sunt, quæ sequuntur. I. Circumcisionem institutam esse ad delendum originale peccatum plura argumenta demonstrant, ex Scripturis, ac Patribus, Augustino præsertim petita: hæc a nobis cap. 3. prop. 1v. & v. collecta sunt, & contra Augustinianæ sententiæ oppugnatores vindicata. Profectò remissio peccati videtur circumcisionis finis præcipuus, quamvis etiam instituta fuerit ad populum obsignandum, ut nos eo loci prop. 1. demonstravimus; quippe in divinatorum mysteriorum institutione finis præcipuus est effectus nobilior. Circumcisio itaque ex vi institutionis suæ, adeoque *ex opere operato* peccatum originale delevit. II. Deletum peccatum originis per circumcisionem, quemadmodum nunc per baptismum deletur, docet pluribus in locis cit. cap. 3. productis S. P. Augustinus: & cum Augustino Ambrosius scribens lib. vii. in Lucam, *Circumcisio purificavit*: Magnus Gregorius, qui in 1v. Moralium ait hoc egisse pro iis, qui de stirpe Abrahamæ prodicunt, *Mysterium circumcisionis, quod apud vos valet aqua baptismi*. Innocentius III. scribens in cap. *Majores* remissam olim fuisse originalem culpam *per circumcisionis mysterium*: quæ testimonia, aliæque consimilia laudato cap. 3. afferuntur. III. Augustinus non tantum ait circumcisionem fuisse Judaico populo vice baptismatis; sed etiam docet valorem habuisse suum, quamvis a Samaritano collatam, ut apud nos tenet datus ab hæretico baptismus. *Namquid apud Samaritanos* (inquit Augustinus lib. 1. contra Cresconium cap. 31. num. 36.) *circumcisi si fieri tunc vellet Judæus posset iterum circumcidi*? Neque ergo ex fide suscipientium, quoniam, hæc non erat in octo dierum infantulo, neque ex dispositione mi-

ministrantium, quæ perperam fingitur in Samaritanis vaccas aureas colentibus, ut idem Augustinus ait q. 64. inter LXXXIII. n. 4. deiebat circumcisio labem originalem. Augustinus præterea in IV. contra Donatistas cap. 24. num. 3. asserit præceptum circumcisionis latum fuisse de puerulo dierum octo; quoniam etsi infans ille credere non valebat, ad iustitiam tamen *ipsum per seipsum Sacramentum multum valebat*. IV. Non discessit ab Augustino S. Thomas, in quarto saltim sententiarum dist. 2. q. 9. ubi ait: *Oportuit aliquod remedium dari, quod ex opere operato peccatum aboleret, & tale remedium fuit circumcisio*. V. Baptismi figura quædam, fatentibus omnibus, erat circumcisio: imo Christi nomine hæc etiam ministrabatur, scribente ad Rom. xv. 8. Apostolo: *Dico enim Christum Jesum ministrum fuisse circumcisionis*: ut ergo baptizmus, ita circumcisio *ex opere operato* contulit gratiam. Hæc sunt, quæ Scotistarum sententiam reddunt valde probabilem, partim a Mastrio disp. 1. q. 2. art. 3. ab Estio disp. 1. §. 30. & a Juenin dissert. 2. q. 1. art. 2. depromptæ, partim a me superaddita.

At suam quoque probabilitatem habet sententia opposita: pro qua militant proximæ argumentationes. I. Demonstratum est prop. 1. hujus cap. ex Apostolo, atque ex Patribus Sacramenta veteris legis fuisse *infrma, & egena*, umbram futurorum bonorum, & salutem promississe quidem, non contulisse. At inter hæc Sacramenta circumcisio quoque connumeranda est: quamvis enim sit *ex patribus*, ut rectè in IV. dist. 1. quæst. 6. ait Scotus, non sequitur ad legem non pertinere, aliàs nec ad legem spectarent sacrificia cruenta, a mundi incunabulis immolata. Nam quemadmodum sacrificia in lege Moysei præcipiuntur, ita etiam præcipitur circumcisio, Levit. xli. 3. ita, ut Christus Dominus Joan. vii. 22. dixerit: *Propterea Moyses dedit vobis circumcisionem*. Quare si cetera legis Sacramenta gratiam *per se* non contulerunt, nec eam *per se* contulit circumcisio. II. Apostolus ad Rom. iii. demonstrans quid utilitatis attulerit ipsamet circumcisio, hunc ei primarium effectum attribuit, quod per hanc Judæis *credita* fuerint *eloquia Dei*, prænuntiata nimirum futuri Salvatoris mysteria. De vi justificationis Apostolus nec verbum unum: immo ad Galatas v. 2. vi. 15. affirmat circumcisionem nihil prodesse. III. Tertio Florentinum Concilium supra citatum definit, quod Sacramenta veteris legis *non causabant gratiam, sed eam solum per Christi passionem dandam figurabant*: ubi universim de antiquis Sacramentis loquitur, uti & Tridentinum sess. vii. can. 2. nullatenus excepta circumcisione. IV. Patres laudati cap. iii. prop. 2., tradiderunt circumcisionem datam in signum distinctivum seminis Abraham, ideoque non ad originalem labem delendam. V. Quod Augustinus ait de Sacramentis Mosais, præsignasse gratiam, non eam contulisse, idem de Circumcisione affirmat.



firmant . Etenim Epistola 82. aliàs 19. ad Hieronymum n. 15. inquit : *Dico ergo circumcisionem præputii , & cætera hujusmodi , priori populo per testamentum , quod vetus dicitur , divinitus datam ad significationem futurorum , quæ per Christum oportebat impleri . In . Pl. lxxxv. num. 1. Sunt ergo Judæi , inquit , in circumcissione carnis , & sunt Judæi in circumcissione cordis . Patres nostri multi sancti & circumcissionem carnis habebant propter signaculum fidei , & circumcissionem cordis propter ipsam fidem . Quo in loco quemadmodum certum est Augustinum per circumcissionem cordis designare gratiam spirituales , ita videtur hanc fidei soli tribuere , non circumcissioni carnis , per quam patres ad vetus testamentum spectabant . Denique idem S. Pater lib. 2. de Nupt. & conc. cap. xi. demonstrans originale peccatum ex necessitate circumcissionis , videtur innuere illam habuisse vim justificandi ex sola fide Mediatoris , atque ideo appellatam fuisse ab Apostolo *signaculum justitiæ fidei* : ait enim , *Ex quo instituta est circumcisio in populo Dei , quod erat tunc signaculum justitiæ fidei , ita ad significationem purgationis valebat & in parvulis originalis veterisque peccati , sicut baptismus ex illo valere cepit ad innovationem hominis , ex quo est institutus ;* additque nec legem , nec vetus testamentum , quod in servitutem generat , sic datum ut posset vivificare , sed repetendam gratiam ex fide Mediatoris : quæ fides *salvos justos faciebat antiquos pusillos cum magnis* . Mitto S. Patrem lib. 2. contra lit. Periliani cap. xxxvii. num. 87. haud obscurè significare idem inesse discrimen inter circumcissionem & baptismum , quod interest inter pascha Judæorum ac nostrum , atque inter baptismum Joannis & Christi . At de hac sententia legi poterunt Sylvius in q. 70. art. 4. Soto dist. 2. q. 1. art. 4. Gotti q. 1v. dub. 5. §. 4. ex nostris vero Aurelius Piette de Sacram. in gen. q. 1. Vanroy cap. 3. q. 3. Gavaridi q. 2. art. 1. §. 6.*

Mihi , ut verum fatear , utraque sententia videtur probabilis ; ita tamen , ut persuasum habeam Sacramentum circumcissionis institutum fuisse propter originale peccatum , ut assentiuntur Thomistæ , & nos cap. 3. probavimus . Nec enim postrema sententia infringit argumenta Augustini contra Pelagianos : quippe S. Pater cum his disputans non pertractat *de efficientia Sacramentorum , sed de existentia peccati originalis* , quod optimè probatur ex præscriptione remedii , quocunque tandem modo istud inquinatos mundaverit ; quemadmodum S. Pater libro de Nat. & gratia cap. xvi. num. 19. aliisque in locis probat dari peccata ignorantie , ex quo in lege certis sacrificiis expiarentur ; tamen nullus dixerit eadem sacrificia *virtute sua , per se , & ex opere operato* fuisse peccatorum illorum expiationem . Quare invictissima Augustini contra Pelagianos argumenta perperam a quibusdam Theologis in hac de efficacia Sacramentorum quæstio-

ne eleventur, & jure meritoque ea vindicandi suscepī officiosam provinciam.

Qui ergo nostratium sententiæ vult adhærere, poterit ad argumentationes contrarias hæc adhibere responsa. Ad primum quidem dicit, utique circumcisionem institutam fuisse propter originalem noxam delendam, sed delendam tanquam *per signaculum justitiæ fidei*; & quoniam prænunciando *justificationem nostram, & expoliationem concupiscentiarum carnalium*, ut contra Petilianum inquit Augustinus, erat signum protestativum fidei in futurum Mediatorem: *quæ fides*, teste eodem Augustino de Nupt. & concup. *justos faciebat pusillos cum magnis*, idest, inquit Scholastici, circumcisio justificabat *dispositive*, non *effective*. Profecto præsignare gratiam Christi, circumcisionem spiritus, & hominis innovationem, res est perfectior, quam carnaliter obsignare progeniem Abrahæ: ideoque illud, non istud fuit instituendi circumcisionem motivum princeps. Quod sequitur eadem ratione diluitur: per mysterium quippe circumcisionis remittebatur peccatum *dispositive*, non *effective*; maxime quod Ambrosius eo loci ait etiam, *Sanctificavit lex*, & Gregorius, *Hoc egit pro majoribus virtutis sacrificiis*; cum lex, & sacrificia solummodo ad justificationem valerent *per accedens*, & fidem Mediatoris promovendo: quæ, auctore Apostolo, fuit utilitas circumcisionis, per quam Judæis *credita sunt eloquia Dei*, factaque Reparatoris promissio. Ad tertium quidam respondent, etiam Samaritanos, quamvis idololatras, ac ideo per leones a Deo insolito more punitos, in monte Garizitano sacra fecisse cultu veterum Patriarcharum consecrata, necnon credidisse Christum summum legislatorem ac doctorem venturum esse, Joan. 1v. 20. 25. At non arbitror hanc responsionem esse ad rem: nam Augustinus scribens adversus Cresconium de baptismo hæreticorum, de ea circumcisione consequenter pertractat, quæ data fuerit a Samaritano fide expoliato. Respondendum puto, Augustinum disputantem de non iterando baptismo, uti comparisonē istiusmodi: Quemadmodum circumcisio imprimebat in carne *signaculum fidei*, ita baptismus imprimit in anima *characterem*: sicut ergo iterari non poterat circumcisio facta a Samaritano, quia auferri nequibat *signaculum* illud impressum in carne; ita repeti non debet baptismus ab hæretico collatus, quoniam indelebilis est *character* baptismatis. Atque ita Augustinus scitè a figura ad figuratum ratiocinatur: quamvis in circumcisione solam typi virtutem agnoscat, prænuntiativam sanctitatis, non effectricem: *Circumcisionem præputii* (inquit) *in figura baptismatis Christi ab antiquis observatam esse negare, ut arbitror, non audentis. Numquid apud Samaritanos circumcisi, si fieri tunc vellet Judæi, posset iterum circumcidi?* &c. Quod verò S. P. ait cit. q. 64. in parvulis mysterium circum-

cumcisionis valuisse *per se ipsum*, id extra controversiam positum est; nam in parvulis nequit haberi interior fidei dispositio, sed eam tamen supplere poterant aut parentes, aut ministrantes: unde quidam Thomistarum scripsere circumcisionem in parvulis contulisse gratiam *ex opere operato passive*, non autem *active*, ut illustis Gonet disp. v. de Sacram. art. 2. Quod quarto obieciatur loco, nullius est roboris: quippe Angelicus Doctor retractavit priscam opinionem, scripsitque 3. p. q. 70. art. 4. *In circumcisione conferebatur gratia, non ex virtute circumcisionis, sed ex virtute fidei passionis Christi, cujus signum erat circumcisio*. Postremum quoque facili ratioque diluitur: quod enim circumcisio expresse figuram baptismatis, facit, ut præsignarit *innovationem hominis*, non ipsam effecerit; aliàs idem, ac baptisma, præstassent nubes, mare rubrum, aliaque novorum Sacramentorum vetusta symbola. Nec probant circumcisionem datam Christi nomine verba Apostoli ad Rom. xv. nam ibi *circumcisio* haud inusitata apud Paulum phrasi sumitur pro *circumcisis*, idest, pro Judæis, quemadmodum ad Galatas 11. 7. asseritur *creditum* Paulo *Evangelium præputii, sicut & Petro circumcisionis*; idque comprobat scopus Apostoli demonstrantis non esse a Gentibus contemnendos Judæos, quoniam *ad confirmandas promissiones patrum* venit Christus ad filios Israel, & etiam Gentes, quibus nulla promissio facta erat, Dei misericordia Evangelii gratiam sunt consecutæ. Legi potest Chrysostomus hom. xxv 111. in Epistolam ad Rom. & in Pauli Comment. Seripandus pag. 248. & Estius pag. 172, quamquam hic locus sola lectione Paulini textus pateat.

Si quis verò accedendum putat ad Scoti partes, respondere poterit ad argumenta contraria circumcisionem non esse ex Moyse, sed ex Patribus; & Apostolum, Concilia, ac Patres id tantum innuere, illam nihil valuisse ad expiationem peccati, quatenus erat signaculum carnis, pertinebatque ad ritus veteris testamenti, non quatenus huic signo meritis Christi, & institutione divina conjunctum erat peccati remedium: nam Paulus ac Patres de circumcisione pertrahant adversus Judæos justificationem statuentes in ritibus Moïsi, & Concilia pariter de iisdem ritibus loquuntur, aut circumcisione excepta, aut ea saltem considerata, ut ceremonia & symbolo antiqui fœderis. Et quidem, utut veteres vim circumcisionis ad reprimendam judaizantium perviciam studuerint deprimere, nequeunt illorum testimonia id evincere, quod circumcisio in remedium peccati fuerit indicta, ut ostendi cap. 111. & 1v. hujus libri, Illinc ergo peti poterunt etiam pro sententia Scoti valida munimenta, ac responsa ad propositas objectiones; aut si clypeo nostro sibi quispiam satis non videtur munitus; adeat Mastrium cit. quæst. art. 4. Estius dist. 1. §. 31. & Frassenium Tom. x. pag. 48. & seq. Interim nostra

sententia est, circumcissione institutam in originalis peccati remedium, Sacramenta vetera a novis plurimum discrepare, de circumcissionis efficacia posse unumquemque sentire pro libito: quorum primum postulat a nobis Augustiniana doctrina, alterum Catholica fides, tertium verò scholarum dissidium, & quod nos undique premit rationum pondus.

## C A P U T XX.

*Quomodo Sacramenta novæ legis gratiam producant.*

Quamlibenter disputationem hanc prætermitterem, ut percerent hæretici nequaquam nos pro opinionibus Scholæ, tanquam pro aris fociisque pugnare, ac intelligerent qui in opuscula hæc nostra conjiciunt oculos, quam ægre de rebus a cognitione nostrâ diffitis proferamus judicia, ubi subest periculum, ne detrahatur aliquid aut veritati, aut virtuti divinorum mysteriorum. Sed quoniam Scholæ morem geramus opus est, in hac etiam disquisitione paullulum ac temperanter versabimur. Quid sit causa, didicit quisque in Philosophiæ rudimentis: causarum quoque aliam esse *principem*, quæ propria virtute se movet, *instrumentalem* aliam, quæ a principali causa impulsam motumque recipit, arbitror neminem esse qui ignoret. Ac Sacramenta non esse causam gratiæ effectricem *principalem*, cum certum sit hanc a Deo creari & infundi, idque etiam definiat Tridentina Synodus sess. vi. cap. 7. nullus est, qui vertat in controversiam. Sacramentum itaque justificationis & gratiæ causam *instrumentalis* est, ejusdem Synodi definitione, atque Theologorum omnium consensu. Num causa sit *physica*, an duntaxat *moralis*, id unice parit in Scholis dissidium. Causam *physicam* cam esse, quæ reali influxu, ac motu, & reali actione attingit effectum, ut ignis calorem, sol lumen, semen plantas, fegetesque producit, id quidem compertum est singulis. Causa *moralis* est, quæ duntaxat *intentionaliter* movendo præstat, ut perficiatur effectus, sive moveat imperio, ut iudex ac princeps suo jussu hominem pleñit supplicio; sive consilio & suasionem, ut consiliarius & orator pertrahit regem ad bellum; sive merito, ut miles cicatrices ostentans impetrat beneficia; sive inito sædere, ut componitur res bellica congregientium pactione; sive denique signo aliquo, ut chirographo exigitur debitum. Posuimus hæc exempla, nam qui tenent Sacramenta esse *moralem* gratiæ causam, non consentiunt an hanc producant per modum impetrationis, an vi institutionis, qua Deus quasi pacto quodam se obstrinxerit ad gratiam largiendam Sacramenta suscipientibus, an ad instar chirographi, quasi Christi sanguine, meritoque obsignati.

Sacra-

Sacramentum esse causam gratiæ *moralis*, docuerunt ante Divum Thomam *omnes fere Doctores*, inquit in iv. dist. 1. q. 3. art. 1. Dominicus Soto, laudatis Alexandro Alensi, Bonaventura, Richardo, Scoto, Henrico, Durando, aliisque. Scotistarum nullus ab hac opinione recedit: videatur Mastrius de Sacram. disput. 1. q. 4. Frassen disput. Proem. art. 2. q. 2. F. Henno disp. vii. q. 2. His adhaerunt Vasquez disput. 132. in 3. p. & cum magno recentiorum numero Tournely quæst. 111. art. 2. Du-Hamelius cap. 2. de eff. Sacram. Juenin quæst. vii. art. 2. Habert cap. 18. Propugnant autem *physicam* Sacramentorum *causalitatem* cum D. Thoma 3. p. q. 62. art. 4. omnes ejus discipuli, vix uno, aut altero excepto; & accurate de hac quæst. disputant præcitatus Soto, Gonet disput. 111. art. 2. Contensonius differt. 1. cap. 2. spec. 2. Cardinalis Gotti quæst. iv. dub. 3. Auctor Operis de Re Sacram. lib. 1. q. 3. cap. 2. Accessere Thomistis individui eorum pedisequi Salmanticenses, ac Sylvius, nec non Suarez præcit. q. 62. disp. 9. sect. 2. & qui a Salmanticensibus commendantur Traët. xxi. disp. iv. dub. 4. ex posterioribus Florentius De-Cocq Traët. vii. sect. 6. & Auctor Theologiæ Petrocorensis Tom. 111. Traët. 1. cap. 4. In utramque partem egregie disputarunt Maldonatus cap. 2. de Sacram. pag. 24. & Estius in iv. dist. 1. §. 5. Hos ex multis laudavimus, viros omnes doctos, atque percelebres, nec instituto veterum, qui singulorum nomina recitant, nec more juniorum qui neminem aut perraro aliquem tantum commemorant, quasi nova proferant, nec sint antiquiorum expilatores: quod & ubique servavimus, ita enim fiet, ut qui libros pervolvatur, cum furta scribentium; tum impensam in scribendo operam recte dijudicet.

At quid sentiunt Augustinenses? Aegidius, & Argentina a Salmanticensibus ad Thomisticas trahuntur partes: num recte, mox dicam. Thomistæ certè sunt Gibbon Tom. vii. disp. iv. dub. 3. Joannes Puteanus in q. 62. 3. p. dub. 4. Antonius Guerrero Tr. vii. d. 1. Oppositum sentit cum aliis Lovanienfibus Farvacques cap. viii. q. 2. & Vanroy Tom. v. cap. 3. quæst. 2. Aurelius tamen Piette Tom. v. cap. 5. q. 2. nutat utrinque: solent quoque in Italia studiorum Moderatores in utramque disceptare partem. Priusquam aperiamus mentem nostram, præmittimus nostra saltim ætate non posse de hac quæstione affirmari quod lib. 2. Hist. Concilii Tridentini pag. 271. scripsit Polanus, *utrinque* scilicet *proferri rationes magna verborum prolixitate, nec minori acrimonia, Dominicanis affirmantibus alteram opinionem Lutheranis esse affinem, discitantis vero Scotistis Dominicanos impossibilia adstruentes hæreticis calumniandi Ecclesiam præbere ausam*. Laudandus mihi semper erit nuperus Thomista, qui de Re Sacram. Tom. 1. pag. 37. testatur, se nolle esse hac in re contentiosum, cum alia ratione cum amicis, alia cum hostibus sit con-

gre-

grediendum: eamque agendi rationem semper mihi servandam proposui; quamquam in nullo hactenus vel Thomista, vel Scotista Scriptore illam deprehendi acrimoniam, quam Polanus exaggerat.

Præmitto etiam eatenus Sacramenta per Thomistas esse gratiæ *instrumentalem causam physicam*, quatenus ut attingant eandem gratiam confertur Sacramentis *virtus quædam spiritualis ad inducendum Sacramentalem effectum*. Ita enim loquitur S. Thomas q. 62. art. 4. Quid sit autem hæc virtus, & an sit permanens qualitas, aut transiens, aut sola Dei motio elevans instrumentorum virtutem, quam appellant *obedientialem*; sicuti non est una Thomistarum opinatio, ita nec ego definiam. Arbitror tamen juxta beatum Thomam virtutem illam esse motum primæ causæ: quippe eadem quæst. art. 1. scribit: *Causa instrumentalis non agit per virtutem suæ formæ, sed solum per motum, quo movetur a principali agente... Et hoc modo Sacramenta novæ legis causant gratiam*. Profecto Aegidius Romanus in 2. dist. 1. q. 2. art. 5. & Quodlibet. v. q. 1. nec non Argentinas in 1v. dist. 2. q. 1. art. 1. concl. 2. negant posse Sacramenta esse talia instrumenta, quorum actio attingat, etiam per Dei motionem, effectum gratiæ. Quamobrem non idem, ac Thomistæ sentiunt Aegidius, & Argentinas: immo is tandem concludit Sacramenta esse causam gratiæ tantummodo *conditionalem*,

At Aegidius duplicem *instrumentalem* causam distinguit. Altera, inquit, est *causa instrumentalis directæ*, quæ per motionem principalis agentis attingit effectum, ut oculus est causa visionis, scalprium statuæ, dolabra scamni; & causa istiusmodi debet *per motionem* principalis causæ, aut influxu, aut contactu effectum attingere. Alia est *causa instrumentalis indirectæ*, quæ non attingit effectum, sed propria actione producit aliquid, cui, aut naturali virtute, si effectus sit naturalis, aut virtute supranaturali, si effectus supranaturalis sit, effectus ipse conjungitur: atque in hac causa non requiritur virtus, per quam attingat effectum. Hoc modo instrumenta agricolæ sunt causa segetum, cataplasmata sanitatis & vitæ: non enim illa vegetativam, neque ista vitalem energiam habent; sed illa id efficiunt circa terram, hæc id operantur circa corporis membra, unde proficiscitur vegetatio factorum, & valetudo animalium: sive, ut exemplum proferam spiritualium effectuum, quid præstiterunt manus Christi? quid clamor? quid verba? Tetigerunt duntaxat corporea membra, personuerunt ad aures: & tamen fuerunt *physica* instrumenta patratorum miraculorum, quia aliquid revera præstiterunt, cui divina virtute conjuncta erat rerum mirabilium operatio. Causa enim *moralis* nihil in subiecto operatur, neque principalem effectum, neque id cui effectus ipse conjungitur. Hoc pacto Aegidius contendit Sacramentum esse *causam gratiæ instrumentalem physicam*.

indi-

*indirectam*, cum Thomistæ requirentes in Sacramentis virtutem, per quam spiritalem gratiam attingant, eis consequenter tribuant rationem causæ *instrumentalis directæ*: sententiæ autem Aegidii post Fridericum Gavardi q. 3. de Sacram. in gen. art. 1. Benignum Sichrovsky, aliosque Ordinis nostri Scriptores, arbitror esse adhærendum.

Movet me ad sententiam hanc amplectendam, quod videatur satis perspicua, & possit Thomistarum, & Scotistarum argumentationibus confirmari, & ab harum neutris aliquid patiat incommodi. Primò enim *instrumentalem causam indirectam*, & quidem *physicam*, eam dicimus quæ aliquid *physice* producit, cui principalis effectus sit conjunctus. Ita Augustino docente in lib. 1x. de Gen. ad litteram cap. xv. num. 27. res creatæ sunt divinæ virtutis instrumenta, quamquam Dei opera perficiantur sublimiori virtute; dummodo creaturæ ipsæ aliquid operentur, quod divinæ operationi connexum sit. Quid enim præstat agricola? Hoc quidem unum, *ut furculus evellatur ex arbore, terræque mandetur, at non opus ejus est, ut succum imbibat, ut germen emittat, ut aliud ejus solo figat, quo radicem stabiliat, aliud in auras promoveat, quo robur nutriat, ramosque diffundat; sed illius qui dat incrementum*. Pari ratione medicus, ait S. Pater, *agro corpori alimentum adhibet, & vulnerato medicamentum: primum non de rebus, quas creavit, sed quas creatas opere Creatoris invenit; deinde cibum & potum præparare potuit, emplastrum formare, & medicamento inlitum opponere; nec etiam ex his quæ adhibet, operari & creare vires vel carnem potest? Natura id agit interiori motu, nobisque occultissimo*. Hæc Augustinus. Quamquam ergo agrorum cultor nulla præditus sit facultate, qua furculus terræ immissus figat radices, & crescat: quamquam opus medici non sit gignere erosam cicatricibus carnem, & vires morbo perditas restituere; quoniam tamen id præstat occulta naturæ vis ad culturam agricolæ, ad medici emplastrum, sunt hæc instrumenta *physica* vegetationis arborum, & sanitatis ægrotantium. Igitur si ad applicationem *physicam* Sacramentorum, ad ablutionem aquæ, ad inunctionem chrismatis, gratiam infundit occulta, & inenarrabilis virtus Spiritus sancti, tametsi elementa sensibilia spirituales virtutem non habeant, erunt nihilominus *physica* producendæ gratiæ *instrumenta*. II. Atque hæc ratio primum confirmatur, quoniam sicut statuta lege naturæ ad applicationem prædictorum instrumentorum vires suas exerit occulta vis naturalis; ita ad Sacramentorum administrationem virtus supernaturalis effectum operatur spiritalem; mundat enim Deus animam baptizatorum *lavacro aquæ*, confert charismata impositione *manuum presbyterii*, & absolutione Sacerdotali *peccata remittit*, ut nos capite præcedenti sacre litteræ docuerunt. III. Allata ex Augustino comparatione agricolæ utitur S. Paulus

lus in 1. ad Cor. 111. 6. ubi ad deprimendam illorum contentionem, qui ob merita eorum, a quibus baptizati fuerunt, superbè inflabantur, *Ego, inquit, plantavi, Apollo rigavit, sed Deus incrementum dedit*, commonstrans ita ad baptismi administrationem consequi opus gratiæ, ut ad ministerium agricolæ generatio plantarum: quo etiam in loco Apostolus concionatorem comparat ei, *qui plantat*, baptizantem verò illi, *qui rigat*, quoniam si Sacerdos evangelizet, & non conferat Sacramenta, Deus non iustificat; sicuti si agricola plantet, sed non riget, non germinat arbor infra. IV. Dum baptismus corpus abluit, gratia mundat animam, unde ait Augustinus Tract. lxxx. in Joannem: *Unde tanta virtus aquæ, ut corpus tangat, & cor abluat?* Consequitur ergo effectus gratiæ, & interior hominis regeneratio ad *physicam* aquæ abluionem: ideoque hæc est causa *instrumentalis* gratiæ sensu explicato. V. Non sequitur ex his Sacramenta esse causam gratiæ tantummodo *conditionalem*, utpote quæ agant ex institutione divina, ideoque *moraliter*: quando enim causa *conditionalis* movet tantum intentionaliter, *moralis* causa est, ut chirographum, quod modò exhibeatur, effectum sortitur suum; at si causa *conditionalis* effectum non inferat, nisi *physicè* aliquid operetur, ut se habet applicatio emplastri ad sanitatem, irrigatio soli ad vegetationem plantarum, tunc ita est causa *conditionalis*, ut sit etiam causa *instrumentalis* & *physica*, etiamsi virtute propria non attingat effectum, quemadmodum non vis emplastri, non vis irrigationis, sed occulta virtus naturæ sanat ægrotum, nutrit augetque arborem. Atqui Sacramenta ita sunt instituta, ut gratiam non conferant, nisi *physicè* aliquid operentur. Igitur Sacramenta ita sunt causa *conditionalis*, ita gratiam ex divina institutione producant, ut sint non tantum causa *moralis*, verum etiam *instrumentalis physica*, sensu explicato. Enim verò Sacramentis, quatenus gratiam conferunt ex meritis Christi & institutione, exhibentque passionis ejus chirographum, competere rationem causæ *moralis*, nec Thomistæ negant; sed ulterius propugnant *physicam* aliquam *causalitatem*.

At enim, inquis, Thomistæ ita contendunt Sacramenta *physicè* gratiam producere, ut virtute spiritali ipsam gratiam attingant: idque probant firmissimis argumentis. I. Sacræ literæ Sacramento- rum energiam enuntiant verbis, quæ maxime *physico* instrumento conveniunt; inquit enim hominem *renasci aqua, mandari lavacro, gratiam recipere per manuum impositionem*. Vide prop. v. præcedentis capituli. Aequum est autem, ut Scripturæ, ubi nulla occurrat contradictio, sensu obvio & litterali intelligantur. Reponunt utique adversarij etiam pretioso Christi Sanguini tribuere Scripturas, quod *lavet & emundet a peccato* 1. Joan. 1. 7. & Apoc. 1. 5. & tamen esse illum causam *meritoriam*. At id Thomistis nil negotii facessit, quip-



quippe præceptore Angelico 3. p. q. 49. art. 1. Christus non solum nos redemit pretium pro nobis offerens proprio sanguine, qua in re causa *meritoria* relucet; verum etiam instituendo Sacramentorum *remedia*, in quibus sita est ratio *instrumentalis causæ*: imo & Tridentina Synodus sess. vi. cap. 7. accuratè utramque causam distinguit. At in nostra sententia argumentum illud Thomisticum nil habet roboris: ut enim per aquam Jordanis verè mundatus est Naaman, quia ad ablu- tionem aquæ consecuta est divina operatio; atque seminibus sædatis propagatur generatione peccatum Adæ, quia his procreatur caro, cui infunditur anima, ut vidimus lib. xiii. cap. 6. ita per lavacrum baptismatis verè mundamur, verè innovamur & renascimur, quia aliquid baptismus præstat *physicè*, ad quod gratia a Spiritu sancto diffunditur: atque ideo apud Ambrosium lib. 2. de Pœnit. in aqua Jordanis præsignabatur virtus baptismatis; & juxta Apostolum ad Rom. v. 18. carnalis generatio per Adam, & spiritalis regeneratio per Christum habent invicem antilogiam. II. Stant pro Thomistis illustria testimonia Patrum. Tertullianus lib. de Baptismo cap. 1. *Nos pisciculi*, inquit, *in aqua nascimur*. Chrysostomus hom. 25. in Joan. *Quod est uterus embryoni, hoc est fidei aqua*. Cyrillus lib. 2. in Joannem comparat vim sanctificandi, quæ inest baptismo, virtuti ignis, quam concipit *aqua infusa lebetibus, si admoveatur igni vehementi*, & magnus Leo scr. v. de Nativ. *Virtus*, inquit, *altissimi, quæ fecit, ut Maria pareret Salvatorem, facit ut regeneret unda credentem*. Quamquam verò adversarii reponant, istiusmodi exemplis Patres asserere Sacramenta verè gratiam producere, modum autem non explicare, aliàs forent illa causæ *naturales* ipsius gratiæ, quod nullus dixerit; Fæstius tamen fatetur sententiam Thomisticam, si Patrum dicta attendantur, esse probabiliorē: nec sequitur objectum incommodum; quod enim Patres in hisce exemplis tribuunt naturæ vi, adscribunt in Sacramentis virtuti Spiritus sancti. Verùm hæc eadem exempla in opinionem nostram quadrant magnoperè; siquidem ut aqua ova piscium madefacit, sed hos gignit *vis occulta naturæ*; ut materna viscera explicant embryonem, cui in humana membra dis- posito animum inferit virtus creatrix; ut aqua in lebeate agitur, & ad hanc agitationem sentiens manus ustionem percipit: ita aqua baptismatis ablucens corpus, gratiam divina virtus infundit animo, III. Confirmat opinionem Thomistarum, quod Patres virtutem Sacramentorum cum admiratione suspiciunt: unde Augustinus Tract. lxxx. in Joan. num. 3. ait: *Unde tanta virtus aquæ, ut corpus tan- gat, & cor abluat*? Plura de hac virtute Catechismus Rom. p. 2. cap. 1. num. 27. Respondent utique adversarii, eo loci Augustinum pariter mirari, quod *verbum fidei per Ecclesiam credentem, offeren- tem, benedicentem, tingentem, tantillum mundet infantem*; ajunt &

hoc mirum esse quod signum Crucis fugat dæmones, quod ad nutum Josue sol steterit, nec tamen Ecclesiam, signum crucis, Josue nutum esse horum effectuum causas *physicas*. Alia tamen ratione de Sacramentis, alia de iis, quæ vim habent ex fide, ratiocinemur oportet. Ceterum sententia nostra hoc eodem argumento firmatur, quippe id summopere mirum est, quod *physica* ablutioni corporis conjuncta sit gratiæ operatio: atque, ut Augustinus scribit Epist. 23. nunc 98. num. 2. aqua exhibeat *forinsecus* Sacramentum, & Spiritus operetur *intrinsecus* beneficium. IV. Quartum argumentum petunt Thomistæ ex Sacramentorum novæ legis præstantia. Sunt enim hæc gratiæ *signum efficax*, & gratiam non solum *continent*, sed & *producunt*: ut definit Trid. Synodus, sess. vi i. can. 6. ac nos statuimus præcedenti dissertatione. Solet utique responderi hoc unum orthodoxos Patres decrevisse, gratiam sola fide non apprehendi, uti comminiscuntur hæretici: sed quod *moraliter* tantum movet, non excedere rationem signi probat exemplo *denarii plumbei* q. 62. art. 1. Doctor Angelicus, nec propriè contineri effectum in causa *moralis*, subtili argumentatione contendit Soto: nec omnino probatur quod post Hugonem §. 6. ait Estius contineri gratiam in Sacramento, *ut aqua in vase*; hæc enim continentia est rei in loco, non effectus in causa; idque etiam animadvertit Sanctus Thomas cit. quæst. art. 3. ad 1. Quod si *vas* sumatur pro *instrumento*, ut apud Ezech. 1x. 2. vas, quo propinatur venenum; etiam Thomistæ Sacramenta appellabunt *vasa gratiarum*. Ceterum nos dicemus, Sacramenta novæ legis gratiam & *continere* & *conferre*, quoniam infusio gratiæ conjuncta est Sacramentorum administrationi, non fidei suscipientium; quemadmodum Sacramenta vetera gratiam *nec continebant*, *nec producebant*, quod gratiæ largitio fidem, non symbolorum usum consequeretur. V. Tandem Thomistæ corroborant sententiam suam commemorando supremam Dei potestatem: quæ ut *instrumentaliter* rebus physicis, non voluntate tantum, aut jussu, sæpe visum cæcis, paralyticis motum, vitam demortuis, ægrotantibus largita est sanitatem; ita potest sanctificare animas *physicis* instrumentis. Addit Sylvius collatam divinitus vim igni inferorum, quo spiritus excruciantur, ut ait lib. xxi. de Civ. Dei cap. 10. Augustinus, *quamvis miris, veris tamen modis*. Cum ergo talis sit divina potestas, & causa *physica* sit etiam præstantior *moralis*, non videtur Sacramentis deneganda *physica* causæ proprietates. At contrarii respondent, se de rebus, quæ in exemplum adducuntur, idem sentire; ac interdum *moralem* causam esse *physica* nobiliorem, ut constat comparatione apparitoris & principis, tortoris & judicis: quæri demum, quæ vim Deus Sacramentis contulerit, non quam potuerit conferre. Verum nos neque supremam Dei potestatem comprehendentes angustiis nostri ingenioli, neque derogantes Sacramentorum dignitati,

tati, asserimus evinci his exemplis quomodo Sacramenta sint gratiæ *instrumenta physica*, sed *indirecta*: res enim a Christo in patrandis miraculis adhibitæ tangebant contactu physico corpora, & ad hunc contactum sequebatur occulta operatio divinitatis. Sententia quoque nostra, ut constat ex libro x. cap. 17. physice dæmones torquentur igne inferorum, quod huic alligati sint, & ad hanc alligationem consequatur pœna, & animi maceratio. Atque ita, ut diximus, Thomistarum argumentis confirmatur, non evertitur opinio nostra.

Idem nobis videtur de placito Scotistarum. I. Gratia, inquirunt, adeo sublimis est, ut nulla virtus creata possit illam producere; nam si virtus corporea sit, nullam habet cum spiritali effectû analogiam: si vero spiritalis, nequit corporeo elemento inhærere. Respondent quidem Thomistæ, hanc virtutem Sacramentis nequaquam *permanenter* inhærere, sed inesse tantum *transseunter*; quemadmodum *in voce sensibili est quadam vis spiritalis ad excitandum intellectum hominis*: quo exemplo utitur S. Thomas. Sed Mästius, sui que negant spiritali virtutem etiam *transseunter* recipi in re corporea, ac ullam quoque vim esse in voce sensibili ad excitandam mentis perceptionem. At ego reponam virtutem effectui proportionatam non requiri *in instrumentis physicis indirectis*, ut constat exemplis productis: quod & affirmo de voce sensibili, quæ *physice* causat intellectionem vellicando tendines aurium, ad quam vellicationem consequitur mentis perceptio. II. Deinde Scotistæ ratiocinantur: Gratia sanctificans, non repugnantibus Thomistis, creatur. At nulla creatura potest assumi tanquam instrumentum ad opera creationis. Ergo nec Sacramentum sensibile ad gratiæ productionem. Hoc argumentum Thomistis negotium facessere fatetur Soto, quamvis cum Cajetano, aliisque respondeat, gratiam non creari, sed concreari; accidens enim non producit, sed comproducit: illud autem quod præstat Sacramentum est reddere hominem Deo gratum, quod est esse causam gratiæ, *abstrahendo a qualitate*. At hæc doctrina arcanum mihi est, & Sphingis ænigma: nam esse Deo gratum sanctificantis gratiæ causa non est, sed effectus. Dico igitur creaturam posse creationis instrumentum esse *indirectum*, ut *in aqua* est causa gignendi humani corporis, cui infunditur anima; non vero instrumentum *directum*, cum istud non agat, nisi per contactum, & quod nihil est, tangi nequeat: atque hæc est sententia Aegidii Romani citatis in locis, nec non Magistri sent. in 1v. dist. 1. quem permulti Theologi interpretantes *de instrumento creationis directo*, perperam hætenus oppugnaverunt. III. Diluimus eadem facilitate argumentum alterum Scoti, quod nullum instrumentum sit aptum ad opus, nisi prius habeat aliquam formam, qua agat: aqua autem baptismatis ablucendis corporibus

ribus idonea sit, sed non animæ regenerandæ. At id quidem in instrumento *directo* requiritur, in *indirecto* non item. IV. Tandem Scotistæ utuntur hoc argumento: Non operatur causa *physica*, nisi actu existat; quod affirmari nequit de Sacramentis. In his enim cum syllaba profertur postrema, pertansit sonus præcedentium verborum, nec existunt partes integræ Sacramenta constituentes. Baptismus quoque fidei susceptus recedente fictione reviviscit. Ubi tunc aqua, ubi ablutio, ubi verborum prolatio? Quid denique de Sacramento Eucharistiæ, in quo & forma pertransit, & materia per consecrationem definit esse? Et si Thomistæ reponant per Sacramenta produci gratiam, quando ultimo perficiuntur, baptismum fidei susceptum imprimere *characterem*, & medio illo deposita fictione producere gratiam, in Eucharistia physice permanere in speciebus signum sensibile; patiuntur tamen hæc omnia oppositiones plurimas, quas recensere nimium foret molestum, atque operosum. Quare nos dicimus transeuntibus Sacramentis permanere divinam virtutem, quæ illorum administrationem consequitur; & hanc virtutem permanentem tunc effectum producere, quando nullum invenit obicem in subiecto; propterea quod non sunt Sacramenta causæ instrumentales *directæ*, quibus virtus spiritalis debeat inesse, sed causæ *indirectæ*, quarum *physicam* actionem virtus spiritalis consequitur, permanetque ea transacta; unde Augustinus de verbis Sacramentorum Tract. lxx. num. 3. in Joannem aiebat, *Aliud est sonus transiens, aliud virtus manens*. Atque ita opinio nostra etiam Scoti argumentationes evitat, ac propterea probabilior videtur ceteris; juxta quam Sacramenta vere conferunt gratiam, & hanc nihilominus producit virtus divina, atque ut aiebat Epigram. xlv. S. Prosper,

*Quod Deus omnipotens promittit, perficit ipse,  
Nec proprium externis viribus implet opus.*

## C A P U T XXI.

*Quid tradant de gratia Sacramentorum moralis  
Theologiæ Tractatores.*

**D**E gratia, cujus Sacramenta instrumentalis causa sunt; principio catholica fide tenendum est, esse *habitualement*, intrinsecam, inhærentem; cum non justificemur sola imputatione justitiæ Christi, aut non imputatione peccati; sed revera innovemur, perficiamur, & per Spiritum sanctum inhabitantem habeamus æternæ hæreditatis pignus & arrham. De hac gratia lib. xix. cap. 2. disputavimus. Ea quidem gratia aut confertur homini culpa lethali inquinato, & quodam-

dammodo spiritaliter mortuo, per Sacramentum baptifinatis ac Pœnitentiæ; vel superadditur homini juſto, vitamque viventi ſpiritalem per cetera Sacramenta: unde illa duo appellari ſolent Mortuorum, & alia quinque Viventium, ut diximus cap. vii. Et quoniam pueri mortui ſunt per Adæ prævaricationem generatione carnali, non requiruntur in his, ut revivifcant per regenerationis lavacrum, arbitrii diſpoſitiones ac motus: qui neceſſarii ſunt in adultis, propterea quod originali culpæ actualia crimina propriâ voluntate addiderunt, ac ſponte dæmonis captivitate gravantur. Atque ideo de Eunuchò reginæ Candacis fide Chriſti per Philippum imbuto in Actis Apoſtolicis canebat Arator:

*Conſpectis properanter aquis ardeſcere capis  
Eunuchi ſecunda fides, qui gurgite merſus  
Depoſuit ſerpentis onus.*

## II.

Deinde quæri ſolet, num Sacramenta *vivorum* primam conferant gratiam, ſi quis ad ea accedat abſque mortalis culpæ conſcientia. Id negant complures cum Vaſqueſio diſp. 205. in 3. p. cap. 5. ea ducti ratione, quod Sacramenta gratiam conferant ex vi divinæ inſtitutionis; ad conferendam autem gratiam primam duo tantum, non reliqua ſint inſtituta. Addunt in iis, quæ pendent à Dei voluntate, nihil aliud certo ſtatui poſſe, quàm id, quod nobis ait Eccleſia proponit, aut veneranda patrum traditio. Accedit, Euchariſtiam eſſe panem vitæ, ac præbere ſpiritale nutrimentum, mortuis vero nihil porrigi poſſe quod eos enutriet. At communior tamen, ac vera ſententia eſt, aliquando Sacramenta *vivorum* conferre primam gratiam, ſi ea recipiens ſe ipſum probet, nec habeat patrati ſceleris notitiam vincibilem; ſive id fiat ex Dei liberalitate, ut docuit S. Bonaventura diſt. 12. p. 2. art. 1. q. 2. non per ſe, & vi inſtitutionis; ſive quia continent merita paſſionis Chriſti, ut videtur innuere S. Thomas 3. p. q. 79. art. 3. ſive quia dant gratiam, per quam ad Sacramenta accedens ad contritionem excitatur, ut viſum Alenſi, Gerſoni, aliſque veterum. Nos vero, nequaquam ſemota virtute paſſionis Chriſti, nec Dei liberalitate, dicimus ideo in facta hypotheſi Sacramenta viventium etiam primam gratiam conferre, quia alioquin nec fortirentur effectum proprium, quem *ex opere operato* producunt dum nullum obicem humanæ voluntatis inveniunt. Ita etiam Pœnitentia delet peccata, quæ ignorantur invincibiliter, quia alias non poſſet remittere cetera, quæ pœnitens conſtitetur. Atque ita etiam ex vi inſtitutionis, *indirectè* tamen & mediâtè, in tali caſu conferunt primam gratiam Sacramenta viventium, corruuntque facile argumenta Vaſqueſii. Nec eſt inter panem, qui enutrit corpus & Euchariſtiam, nec inter mortuum corpore & peccatorem omnimoda comparatio.

paratio : nam panis ille nutrit tantum , & Eucharistia est panis vivus, dans vitam , & continens Christum , eos , in quibus manet , vivificantem : mortuus etiam vita corporis nil agit *vitaliter* , nec panem capit ; peccator vero actuali gratia præventus posset credere , diligere , & sumere panem vitæ , nec tantum premere dentibus Sacramentum , sed etiam cum animi præparatione illam carnem manducare , quæ est *pro mundi vita* , Joan. vi. 52.

## III.

Quærent præterea , an gratia Sacramentalis sit a gratia *habituali* distincta . Spectari potest gratia , & quantum ad suam , ut inquirunt , *entitatem* , & quantum ad effectum , sive virtutem homini collatam . Si consideratur gratia priori modo , non video necessitatem aliquam statuendi hujusmodi distinctionem ; sed sat est , si dicamus hanc gratiam exornare animam , illi inhærere , & pro diversa hominum dispositione minui , vel augeri : quæ fide tenenda sunt , ut lib. XIX. contra hæreticos demonstravimus . At si spectemus effectum , Gratia Sacramentalis *ad habitualem* addit supernum auxilium ad finem Sacramenti consequendum . Sic Baptismus præstat , ut homo confepultus Christo habeat in corpore mortis hujus adversus subsecuturas tentationes munimentum : Chrisma , ut non erubescat crucem Domini sui ; Eucharistia , ut adversus quotidianas culpas habeat antidotum : Pœnitentia confert conscientiæ pacem , animique tranquillitatem : Unctio extrema allevat animum ægrotantium , eosque communit adversus hostis insidias : præstat Ordo , ut decenter Ecclesiastica munia exercentur : efficit Matrimonium , ut conjuges vas suum possideant in sanctificatione & honore . At de his plura , cum ad singula Sacramenta explicanda elucubrationes nostræ pervenerint .

## CAPUT XXII.

*De altero Sacramentorum effectu , idest , Characterè .*

**A**Lter quorundam Sacramentorum effectus est *character* : de quo alia ratione cum hæreticis differendum est , alia autem cum Orthodoxis . Nam illi dogmatizant *characterem* nihil esse aliud , quàm commentum Scholasticum , excogitatum , ut inquit Kemnitius 2. p. Exam. Conc. Trident. ab Innocentio III. atque in hoc explodendo *characterè* Wiclephus primùm , deinde Lutherus , Calvinus , Tilmanus Heshusius , ac Novatorum reliqui intenderunt nervos omnes . At Scholæ Doctores , ut in ceteris rebus , quæ sensum subterfugiunt nostrum , extare tamen absque hæsitazione ulla creduntur , in investiganda potius *characteris* natura , quam in vindicanda existentia operam suam locaverunt . Etenim Durandus *characterem* dixit ens quoddam ratio-

rationis ; non fictitium tamen , quemadmodum hæretici comminiscuntur . sed quod situm sit in quadam denominatione extrinseca , quæ infit recipientibus Sacramenta ex divina institutione , uti est in numero ratio pretii , & in homine a principe delegato character ducis ac præsidis . Scotus verò *characteris* naturam constituit in relatione quadam reali , non tamen quæ in hærentem *formam* excludat : unde alucinantur qui cum Vasquesio 4. p. disp. 34. cap. 2. Scoto Durandi attribuunt opinionem . Theologi alii censent *characterem* esse physicam aliquam *qualitatem* ; ad quam tamen *speciem* ex iis , quæ in Aristotelicis categoriis traduntur , *character* pertineat , non consentiunt Scholastici disputatores . Horum tamen quamplurimi , ut de ceteris qualitatibus , ita de *characterere* stabiliunt rem esse aliquam distinctam ab anima , juxta dogmata Peripateticorum philosophorum ; quamquam id non esse omnino certum Dominicus Soto , Alphonsus a Castro , Farvacques , alique asseruerint ; dummodo quis fateatur , *characterem* tanquam signaculum animæ imprimi , eique in hærenter permanenter , quod tantum Tridentina Synodus sess. v. 11. can. 9. adversus hæreticos definivit . Atque his prænotatis ad quæstionem diluendam progredimur .

PROP. I. Certum est dari *characterem* , atque imprimi ab his Sacramentis , quæ iterari non possunt , Baptismo scilicet , Confirmatione , & Ordine .

Hanc propositionem a Tridentina Synodo sess. v. 11. can. 9. definitam probant Theologi pluribus argumentis , quorum singula afferemus & explicabimus . Primo loco insignis Polemicæ Theologiæ Scriptor , Eminentissimus Bellarminus lib. 1. cap. 20. imprimi *characterem* in Sacramentis quibusdam probat , ex quo Apostolus in 2. ad Corinth. cap. 2. 21. scribat : *Qui unxit nos Deus , & signavit nos , & dedit pignus spiritus in cordibus nostris* . Et ad Ephes. 1. 13. *In quo credentes signati estis spiritu promissionis* : nec non 10. 30. *Nolite contristare spiritum Dei , in quo signati estis in diem redemptionis* . Infirmitas putant hoc argumentum quidam Theologi , propterea quod possint hæc loca explicari de gratiæ unctione , & sanctificatione , ut revera Patres quamplurimi exposuerunt . Ac ita censent Ludovicus Habert cap. 19. q. 9. Tournely q. 4. art. 2. Ante hos verò Scotus in 1v. dist. 6. q. 9. docuit admittendum utique esse *characterem* ob Ecclesiæ auctoritatem , at non firmiter probari verbis Scripturæ , vel Patrum . Quo in loco Scotus minime abiecit Catholicam sententiam , sed eam asseruit satis munitam Ecclesiæ auctoritate , nec opus esse ad ambigua testimonia confugere pro explicanda *characteris* natura , ut dicam infra : atque idcirco Scotum vindicavit Cardinalis Pallavicinus in Hist. Conc. Trid. lib. 1x. cap. v. Ego tamen argumentum Bellarmini arbitror inconcussum , Primo quia omnia fere testimonia Patrum ,  
quæ





filii Orat. XIII. quæ est Exhortatio ad Baptismum, inquit ipsos homines obsignari, ut Angelus curam eorum gerat; alioqui, ait, quomodo id præstabit, quomodo eripiet ex hostibus, nisi impressum sigillum dignoscat? τὸς ἀντικεινὸν αὐτῷ ὁ ἀγγέλῳ; τῷ δὲ ἀντικεινὸν τῷ ἰχθύῳ ἡ μὴ ἰσχυρὰ τὴν ἐπαγγελίαν; Comparat etiam baptizatorum animabus domus Hebræorum in Aegypto sanguine linitas, & obsignatas, ἰσχυροποιήσας αἰνίας. & eas appellat thesaurum sigillum obsignatum, signatum oviculam. E contra non tinctos baptismate comparat domibus Aegyptiorum, τὰς ἀσφαγίας, ἀσφαγίαν δὲ καὶ ἀσφαγίαν ἀσφαγίαν, ἀσφαγίαν ἀσφαγίαν, non obsignatis, non obsignato thesauro, non signatis ovibus. Eadem comparatione utitur Nazianzenus scribens in Hortatione ad sacrum Lavacrum, Ovis enim, quæ sigillo insignita est, non facile patet insidit; ἀσφαγίαν γὰρ ἰσχυροποιήσας αὐτῷ ὁ ἀγγέλῳ, τῷ δὲ ἀντικεινὸν τῷ ἰχθύῳ. Circumcisio magna, idest, baptismatis signantis nos in Dei nomen. Augustinus verò pluribus in locis æquiparat characterem baptismatis notæ, quæ ab Imperatoribus solebant milites insigniri. Hinc Tract. vi. in Joannem num. 13. docens cur foris baptizatus recipiatur in Ecclesia absque novo baptismate, utitur comparatione militis desertoris, & inquit: Tene ergo quod accepisti; non mutatur, sed agnoscitur: character est Regis mei, non ero sacrilegus: corrigo desertorem, non immuto characterem. Idem exemplum, simulque comparationem ovium supra productam affert S. Pater lib. 1. adversus Cresconium cap. 30. num. 36. scribens: Neque enim propterea mutandus vel improbandus est regis character in homine, si erroris sui veniam, & militandi ordinem a rege impetaveris, quia eundem characterem, quo sibi satellites congregaret, desertor iuxxit; aut propterea signa mutanda sunt ovibus, cum Dominico gregi sociantur, quia eis Dominicum signum fugitivus servus impressit.

Obiter hic notandum, non tantum milites jurejurando selectos, ut diximus priori capite, verum etiam notis quibusdam distinctas, ut cingulo, quo ignominie causa exspoliabantur, quemadmodum refert in Licurgo Plutarchus, Livius libro Hist. xxvii. & in Augusto Suetonius; corolla etiam plumea, pennisque Paniceis, de quibus lib. x. Rom. Antiq. cap. 10. Dempsterus; nec non notis quibusdam, bullisque impressis baltheo, de quibus Virgilius prope finem Aeneidoni:

Caperat, infelix humero cum apparuit ingens

Baltheus, & notis fulserunt cingula bullis.

Oves quoque solent a Pastoribus notari, aut incisa auricula, aut juxta Calphurnii præcepta, Ecloga v.

.... vivi quoque pondera melle

Argenti coquito; lentumque bitumen abeno,

To. VI.

K k

Im-

*Impressurus ovi tua nomina; nam tibi lites*

*Auferet ingentes lectus possessor in arvo.*

Ex quibus Patrum comparationibus liquet *characteris* signaculum, revera animo imprimi, non secus ac olim in carne *nota* circumcisionis, ac sua militibus, gregibusque ovium τὰ σημεῖα.

Ratio autem, quam Patres proferunt, petitur ex quo Baptismus, Confirmatio, & Ordo nequeant absque sacrilegio iterari: unde & consequitur tria tantum hæc Sacramenta imprimere *characterem*, ut recte citato canone 1x. loquitur Synodus Tridentina. Et quidem Sacramenta illa tria iterari non posse, res est manifestior, quàm in ea comprobanda sit nobis hoc loco immorandum. Aperti sunt enim canon septimus secundæ Generalis Synodi, quadragesimus octavus Sardicenis, sexagesimus octavus Carthagenensis, ac innumera alia Conciliorum decreta, atque testimonia Patrum, a quibus producendis, quoniam alibi sunt expendenda, interim superledeo. Hujus autem vetitæ iterationis causam Græci apud Arcudium lib. 2. de Sacram. pag. 120. non aliam tradunt, quam ἀνεξάλκτου μυστηρίου ὀψαγίδις, ut loquitur Philadelphicnsis, *indelebiliū permanentium signaculorum*. Ac perspicua est inter Latinos auctoritas Augustini, qua in Tridentina Synodus Seripandus noster contendit, ut articulus iste statuens *characterem*, non tanquam probabilior, prout quidam sentiebant, sed tanquam certus reciperetur, ut narrat citato cap. v. num. 3. Cardinalis Pallavicinus. Repetit ergo Augustinus epist. 23. nunc 98. num. 5. causam, cur iterandus non sit baptismus, ex quadam permanente consecratione, per quam etiam baptizatus apud hæreticos spiritali nota insignitur scribens: *Nam si Christiani baptismi Sacramentum, quando unum atque idipsum est, etiam apud hæreticos valet, & sufficit ad consecrationem, quamvis ad vitæ æternæ participationem non sufficiat; quæ consecratio reum quidem facit hæreticum, extra Domini gregem habentem Dominicum characterem, corrigendum tamen admonet doctrina sana, non iterum similiter consecrandum*. Idem Augustinus docuit lib. 2. contra Epistolam Parmeni. cap. xiii. num. 28. non de baptismate solum, verum etiam de ordinatione; atque citato libro 1. adversus Cresconium, lib. v. de Baptism. cap. xv. num. 20. epist. 185. num. 43. tractatu vi. in Joannem n. 15. aliisque in locis. Atque tam aperta Augustini testimonia nequeunt aut de sola fidei professione, aut de gratia sanctificante explicari. Primo enim agnoscit S. Pater his in locis baptismatis *characterem* in desertore, & in eo, qui degit inter hæreticos; docetque non esse iterum baptizandum, sed corrigendum, quoniam probandus est *character* Imperatoris, non error desertoris. Deinde asserit *characterem* istum permanere, tamen si baptizatus ab Ecclesia separaretur, & in quodlibet profundum malorum, & in quàmlibet voraginem peccatorum

TUM

*rum irruat usque ad apostolicam ruinam*; ad hunc enim modum loquitur præcitato libro v. de Baptism. cap. 15. Ac tandem de eo *character* expresse verba facit, qui in hæretico quidem permanet, sed *ad vitam participationem non sufficit*, ut in citata Epistola ad Bonifacium. At quis *notam* hanc baptizato inhærentem, & quæ sine caritate, & *unitate columbæ* permanet, quæ valet ad signaculum animæ, non ad participationem salutis, & quæ persistit in qualemcunque peccatorum voraginem, ( sit crimen apostasiæ, sit hæresis ) prolabatur peccator; quis inquam, *notam* istam temere appellaverit aut gratiam, aut caritatem, aut fidei Catholicæ professionem? His ergo probationibus innixi dogma Catholicum propugnamus.

PROPOSITIO II. *Character* Sacramentalis revera animæ inhæret, atque indelebilis est.

Sequitur hæc propositio ex dictis: ac prior pars probatur I. quoniam Florentinum ac Tridentinum Concilium definiunt *characterem imprimi*: quo verbo significatur aliquid permanens, & inhærens. II. Patres præcitati *characterem* appellant *notam*, *sigillum*, *signaculum*: quæ vocabula exprimunt pariter aliquod inhærens signum. III. Augustinus *characterem* baptismatis ab hæretico collati vocat *Dominicum signum*, quod *fugitivus servus impressit*, quod *desertor infixit*. Secunda etiam pars constat, principio definitione Conciliorum, quæ *characterem* dicunt *signum quoddam spirituale & indelebile*: deinde auctoritate Patrum, tum Græcorum, qui cum Cyrillo ajunt recipi per baptismum *sigillum sanctum indelebile*; tum Latinorum, qui cum Augustino ideo rebaptizationem damnant, quoniam etiam in desertoribus & apostatis permanet Regis nostri *character*: postremo communi assertione Theologorum docentium *characteri* nihil esse contrarium, quo destruat; peccatum enim gratiæ opponitur, non *characteri*, tum quia potest etiam impius ferre Christi signaculum, quemadmodum desertor baltheum militis; tum quia *character* non confertur ad animarum sanctificationem, sed ad consecrationem quamdam, & spiritalem potestatem. Atque hinc est, quod tria tantum Sacramenta, videlicet Baptismus, Confirmatio, & Ordo imprimunt *characterem*, quippe his consecratione quadam effimur Ecclesiæ filii, milites, ac ministri; & sicut in aula Regis alii sunt domestici, alii militum charactere insigniti, alii arcanorum participes, judicique præditi potestate: ita in Christi familia sunt qui per baptismum cooptantur in domum, qui ulterius per chrisma ad fidem propugnandam redduntur idonei, & qui sacris initiationibus constituuntur divinorum mysteriorum dispensatores, suis quique signaculis condecorati. Ceteris verò Sacramentis, quæ potius ad suscipientium sanctificationem, quàm ad institutionem, munimentum, ac ministerium Ecclesiæ videntur pertinere, conferuntur quidem uberrima gratiarum mu-

nera; at non, ita Domino providè disponente, signaculum *characteris*.

Ex his consequitur non amitti *characterem* a quocunque homine impio, etiam in apostasiam, vel hæresim prolapsio: unde Augustinus inquit de apostata Tract. v. in Epist. Joan. num. 6. *characterem quidem impostum habet, sed desertor vagatur*. Et contra Epistolam. Parmeniani lib. 11. cap. 13. num. 29. *An forte minus hærent Sacramenta Christiana, quam corporalis hæc nota, cum videamus nec apostatas carere baptismo, quibus utique per penitentiam redeuntibus non restituitur, & ideo amitti non posse judicatur?* Quo in loco rectè PP. Maurini notulam apposuerunt, *Nec in Apostatis character deletur: hærens quippe Sacramentum non est ritus pertransiens, nec gratia, qua destituuntur apostatæ, ideoque est character*. Quærenti autem, cur in istis permaneat, idem Augustinus respondet de Symbolo cap. v. 111. num. 15. *Quomodo desertor habet characterem, ita & isti habent baptismum: habent, sed unde damnantur, non unde coronentur: & tamen, si desertor ipse correctus incipiat militare, nunquid audeat quisquam characterem mutare?* Quamobrem iis subscribimus, qui tenent etiam in beatis ad ornatum atque decorem, nec non in damnatis ad increpationis notam, & dedecus, spiritale hoc signaculum permanere. Arbitramur quoque, si quis ab hominibus demigraret, & rursus a mortuis evocaretur, nequaquam eum fore anabaptismo, novaque initiatione consecrandum, ob permanentia & indelebilia signacula; ut ex communi Græcorum sententia inquit apud Petrum Arcudium lib. 11. cap. 23. Gabriel Antistes Philadelphie: *οὐδὲ τις ἐξ ἀδρανῶν γίγνεται, ἐξ αὐτοῦ ἀναστὰς, ἢ ἐκ δίπτου ἀναβαπτισμῶ, ὥτε μὴ ἀναχρηστικῶς, ἀλλ' ἀληθινῶς μνησθῇ τῶν ἐκ' αὐτοῦ σφραγισθῶν*. Atque idem sentiunt Scholæ Doctores cum D. Thoma 3. p. q. 63. art. 5. Quamquam ad id probandum parum, vel nihil conferat argumentum petiitum ex eo, quod subiectum *characteris*, uti & fidei, sit intellectus, qui perpetuo viget in homine: sive enim subiectum huiusmodi sit animæ substantia, sive intellectus, sive voluntas; cum omnia hæc incorruptibilia sint, persistet *characteris*, qualecunque illud dixeris, *subiectum*; modò illud non sit dissolubile corpus. Imo cum animæ a facultatibus suis distinctionem negent in Schola complures, iisque nos libro x. cap. 10. subscripserimus; illam de subiecto *characteris* quæstionem, utpote aut falsis, aut incertis solum philosophorum decretis subnixam, scite prætermittendam existimamus.

PROP. III. Citra fidei periculum negari potest *characterem* esse rem distinctam ab anima.

Hujus thesæos hæ sunt probationes. Primùm cum sacrosancta Tridentina Synodus ad extirpandas hæreses intendens animum, plura de Sacramentis ceterisque fidei capitibus definierit, ea, quæ Scholastici disputant, salvis fidei decretis, nullo anathemate perstringit.

*Cha-*

*Charactèrem* verò distinctum non esse realiter ab anima docuerant omnes fere Nominales, quemadmodum refert Alex. Alensis in iv. q. viii. art. 1. & Dominicus Soto dist. xix. q. 1. art. 1. concl. 3. Deinde ipsi Theologi Tridentini testantur venerandam Synodum nequaquam hac de re protulisse sententiam: inter quos Alphonfus a Castro lib. vii. adversus hæreses, ait parum referre, an *character sit qualitas, sive relatio*, dummodo asseratur esse signaculum, quod Deus animæ imprimit, ut suum gregem discernat ab aliis. Atque præcitatus Dominicus Soto in iv. dist. 1. q. 4. art. 2. fatetur opinionem, quæ tenet *charactèrem* non esse rem distinctam a subjecto, nunquam visam sibi a veritate alienam, & dist. 19. quæst. 1. inquit a se haberi tanquam probabiliorem: ibique in uno *charactere* Ordinis distinguit plures potestates per solos respectus ad diversa munera, ut potestatem conficiendi Eucharistiam, & potestatem solvendi & ligandi, confugiens ad solam distinctionem, quam nos alibi appellavimus *connotatorum*. Præterea descenderunt in hanc sententiam etiam recentium Theologorum plurimi: non tantum ii, qui aliam ab Aristotelica physiologia sectantur, eliminantque *entitates* a substantia distinctas, verum etiam in illa philosophia cum moderatione versati, ut Habertus cap. 19. q. 7. nostrique Farvacques, Vanroy, alii. Insuper, ut ego lib. xix. cap. 1. disserui de gratia *habituali*, eam utique inhærentem debemus contra Sectarios propagare: sed cum Scripturæ ac Patres eam appellent *signaculam Spiritus sancti*, & comparent sigilli alicujus impressioni, cumque optime percipiatur signaculum, & figura per sigillum impressa, per accedentem *habitudinem* quamdam, & subjecti, ut inquirunt, *modificationem*; necessum non est gratiam ipsam constituere in spiritali *entitate*, & re, quæ distinguatur ab anima. Idem ergo possumus affirmare de *charactere*; & quidem potiori jure, cum ipsum Concilia, Patres, Theologi appellent *figuram*, *signum*, *sigillam*, *signaculum*. Postremo non video quid incommodi subeat, qui pervulgatam in Scholis de *characteris* natura abjiciat opinionem; quin potius faciliè, si amplectatur hanc nostram, eludet argumentationes cum Scoti, Durandi, Nominalium, recentiumque Philosophorum, tum etiam Protestantium, qui perperam objectis Scholarum dissidiis tentant nos penitus exanimare. Nihil enim nobis cum Durando, qui *charactèrem* constituit in *relatione rationis*; dummodo fateatur subjectum hujus relationis esse animam intrinsece Christi *charactere* signatam; ut ratio pretii in nummo *relatio* quidem est, non tamen argenti utcumque vel auri; sed argenti, aut auri quadam figura & caractere obsignati: Nihil cum Scoto, qui *relationem* illam *realem* statuminat; nam & Scoto annuemus, modo, ut fatetur Mastrius, hujus relationis inhærentem *formam* unanimi sensu recipiamus. Nihil denique cum op-

pugna-

pugnatoribus Peripateticorum accidentium: nostra enim nihil interest, si ut figuram a quantitate, & ceræ imaginem ab illius dispositione non secernunt, ita nec distinguant ab anima *characterem*; dummodo sicut figuram in circulo, & in sigillo formam vident inesse, ita *characterem* revera inhærere animæ fateantur.

Me non latet opinantes oppositum ista adversus me objectare: Inquiunt primò definitum a Conciliis, quod *character imprimatur*; id verò percipi nequit sine alicujus novæ *qualitatis* productione. Ad dunt ipsum *characterem* pertinere ad *secundam speciem qualitatis*; cum sit *signaculum indelebile, quo homini confertur spiritalis potestas*. Ajunt quoque *characteri* suam esse definitionem diversam a definitione animæ, ac suam proinde *entitatem*. Verùm hæc nullatenus quatiunt præmissam positionem. Respondemus enim figuram quoque recte dici corpori impressam, tametsi illam a quantitate distingui minime concedamus: fatemur *characterem* esse *qualitatem*, &, si id pugnaciter contendatur, etiam *secunda speciei*, quamvis illum ad figuram referat Marfilus, ad habitum Alensis, ad patibilem, ut vocant, *qualitatem* Altissiodorensis cum aliis; sed eatenus *characterem* dicimus *qualitatem* atque *potentiam*, quatenus est quædam animæ habitudo, sive ipsamet anima affecta spiritali signaculo, & connotans collatam sibi divinitus potestatem; quemadmodum intellectus & voluntas appellantur *potentia*, & nihilominus sunt ipsa animi rationalis substantia, non *formaliter*, ut inquiunt, considerata, sed *duntaxat connotative*. Negamus etiam definitiones diversas semper commonstrare distinctionem rerum; cum alia ratione definiatur res in se spectata, ut *Deus, anima, corpus*; alia autem ratione eadem res considerata *connotative*, ut *Pater*, ut *intellectus*, ut *figura*; quamvis nec Pater sit alia res a Deo, nec intellectus ab anima, nec figura a corpore. Ceterum nolumus de re nobis incomperta certum proferre iudicium: & quemadmodum dari *characterem* firmissime profite-mur, id Ecclesia definiente, & Theologis consentientibus; ita quid sit *character*, in Ecclesiæ silentio, ac inter Scholarum dissidia nolumus temere definire, & ingenue fatemur nos ignorare.

At opponunt hæretici. Principio cum Theologi plurimi fateantur *characteris* naturam esse nobis penitus incompertam, nonne sum-mæ dementiæ est, velle illum definitione describere, ac homines ratione præditos ad admittendam rem prorsus ignotam compellere? Deinde nec ipsi Scholarum duces ante Petrum Pictaviensem Magistri sententiarum auditorem, *characteris* meminerunt, altumque de eo silentium est penes ipsum Magistrum: ideoque non male eundem *characterem* appellavere quidam Innocentii Tertii figmentum, placitumque Scholasticum exortum labente sæculo tertiodécimo. Insuper si proxime subsecutos Theologos consulamus, quidnam præsidii ex iis  
ad

ad stabiliendum *characterem* haurire poterunt disputatores ? Durandus, ut dictum est, illum constituit *in sola relatione rationis* : quod perinde est, ac si dicas in denominatione quadam, per quam significatur collata dignitas ac potestas, qualis est character Regis, Ducis, Magistri : nec aliter sentire videntur recentiores Canonistæ apud Vannespen Juris Eccl. Univ. p. 2. tit. 1. cap. 1. Scotus propter auctoritatem Ecclesiæ utique *characterem* recipit, idest, propter Innocentii III. Rescriptum. At negat ex Patribus, aut Scriptura illum evinci. Cajetanus item in 3. p. q. 63. art. 1. agnoscendum *characterem* fatetur ex sola auctoritate Ecclesiæ, eaque non multum antiqua. Idem tradiderunt Albertus Magnus, & Gabriel Biel in 14. dist. 6. Hi autem Theologi quamvis videantur *characterem* ob Ecclesiæ auctoritatem admittere, (quemadmodum de Scoto in Hist. Conc. Trid. inquit Paulus Sarpi) illum *modesta sagacitate* repellunt : nulla quippe est Ecclesiæ auctoritas, nisi aut divinæ Scripturæ, aut Patrum testimoniis suffulta.

Quod vero nec Scriptura, nec Patrum auctoritate stabiliri queat Sacramentalis *character*, & istud facili negotio hæretici jactant se demonstrare. Enimvero nullum de *characteribus* in sacris libris exstare vestigium, permulti, ut diximus, Scholastici etiam postremæ ætatis fatentur. Patres autem *signaculi* quidem *baptismatis* alicubi meminere, & Augustinus *characterem* expresso quoque vocabulo nominavit ; sed nequaquam id, quod contendunt Scholastici, eo vocabulo designarunt. Nam Augustinus in sermone ad Cæsariensem plebem num. 2. dilucide ait nihil esse *characterem* baptismi præter Christianæ fidei professionem. Ego, inquit, *quando venio ad fratrem meum, & colligo errantem fratrem meum, adtendo fidem in nomine Patris, & Filii, & Spiritus sancti. Ille est character Imperatoris mei. De isto characterem militibus suis, vel potius comitibus suis, ut hunc imprimerent eis, quos congregabant castris ejus præcepit dicens, Ite baptizate gentes in nomine Patris, & Filii, & Spiritus sancti. Istum characterem a Domino dictum omnibus credentibus imprimendum, &c.* Dixerrat paulo supra Augustinus Donatum, si proprio in nomine baptizasset, suum quidem impressurum *characterem*, at non inviolabilem, & qui non posset deleri. *Nam si Donatus (inquit) quando schisma fecit, in nomine Donati baptizaret, desertoris characterem infingeret: ego quando vocarem ad unitatem, si invenirem desertoris characterem, exterminarem, delerem, abolerem, abjicerem, non approbarem, respicerem, anathematizarem, damnarem : nunc vero ille desertor characterem fixit Imperatoris sui. Quemadmodum ergo character desertoris nihil esset, quàm tessera ac professio illius sectæ ; ita character Dominicus nihil erit, præterquam sanctæ Trinitatis & Evangelicæ fidei confessio.*

De-

Denique ad stabilicndum *characterem* impares sunt & invalidæ ratiocinationes Theologorum. Hi *characterem* ex eo præsertim capite adstruunt, quod aliqua Sacramenta nequeant reiterari. At nec prima tonsura reiteratur, ne in iis quidem, qui de gradu deiciuntur: unde quidam Tridentini Theologi, si fides habenda Paulo Sarpi lib. vii. art. v. hoc nixi argumento existimarunt in prima etiam tonsura *characterem* imprimi: quod sane nullus dixerit, cum tonsura nec Ordo, nec Sacramentum sit. Circumaguntur quoque Scholastici, & implicentur vitioso circulo, dum probare nituntur tria Sacramenta imprimere *characterem* ex quo nequeant reiterari, & vicissim ajunt reiterari non posse, quoniam *characterem* infigunt. Infirma est etiam ratio altera, quod Baptismus, Confirmatio, & Ordo ideo *characterem* imprimant, quia conferuntur quadam consecratione, per quam homines in Dei cultum deputentur; id enim videtur proprium cujuslibet Sacramenti. Sed & quod inquirunt *characterem* esse figuram, notam, signaculum, ac signum quoddam distinctionis, futile admodum ineptumque videtur. Cui enim hoc signo innotescere debent ferentes τὸν αὐτὸν ἀπαράδωκτον, impressum sigillum istud? Deo ne? Noscit ille absque tali signaculo gregem suum? Hominibus vero? Horum intuitum latens illa obsignatio subterfugit. Atque hæc sunt, quæ adversus *characterem* ab hæreticis opponi hæcenus compcrimus.

Ad hæc omnia servato ordine respondemus. Dicimus ad primum, temere existentiam denegari rerum illarum, quarum naturam & essentiam percipere non valemus: supernaturalium quippe non sensus, aut ratio exhibet normam, sed fides, traditio, auctoritas. Alioqui si ea neganda sunt, quæ superant captum nostrum; nec Trinitas erit, nec Incarnationis œconomia, nec mysterium aliud absconditum. Verum non esse *criterium* rerum credendarum rationem humanam, pluribus argumentis demonstravi lib. xx. c. 2. Nec nos cogimus quemquam, ut credat *characterem* esse qualem aut excogitavit Durandus, aut delineavit Scotus, aut descriperunt alii scholarum Doctores; satis nobis est, si illius existentia non revocetur in dubium. At inquis Scholastici varias *characteris* tradunt definitiones. Quid inde? Fatentur tamen omnes esse illum indelebile quoddam signum impressum animæ; etsi in hoc signo explicando quisque pro sua opinione ratiocinetur. In eo ergo, in quo omnes consentiunt, nemini fas est dissentire, quia in hac re non humana ratione dicuntur, sed traditione majorum: in eo autem, quod quisque addidit ingeni sui adinventionibus, ego quidem neminem compello, ut uni præbeat assensum, vel alteri. Videmus in explanandis naturæ phænomenis alium ad athomorum effluvia confugere, alium ad triplex elementum Cartesii, alium ad leges motuum, alium ad occultas qualitates; & cum singuli diversa utantur physiologia, cui poteris relucere



Etari explicant tamen eadem phenomena, quæ evenire non ambigis. Si tam discordia sunt hominum placita in his, quæ cadunt sub oculorum adspæctum; haud mireris litigiosos fuisse Scholasticos, dum humana ratione de rebus occultissimis disputarunt. Tene quod explicare conantur, si probare non potes, vel forte non assequeris singulorum explanationes. At *characteris* nomen fuit antiquioribus incompertum. Sit, ut dicis: de re, non de nomine disputamus. Dictum sæpenumero, omnes hæreses novas intulisse quæstiones, easque profligatas fuisse usu novorum vocabulorum. Proba, quod nos explicamus vocabulo *characteris*, id nequaquam veteres significasse *signaculi*, ac *figilli* nominibus. Si id asseras, os tibi Græcorum, Latinorumque Patrum testimoniis conabor obtundere. Verum & *characterem* saltem ab Augustino sæpissime nominatum non ignoras. Falleris propterea qui autumas ab Innocentio III. fuisse confectum. Quis sibi met persuadeat hoc vocabulo usum omnium primum hunc Pontificem, dum rescripsit Archiepiscopo Arelateni quærenti, *an baptismus collatus dormientibus & amentibus imprimeret characterem*? Certe & qui de hac re interrogat, & qui respondet imprimi *characterem*, dum Sacramentalis operatio non invenit obicem voluntatis contrariæ, loquuntur de *characterem*, tanquam de re in Ecclesia Catholica satis comperta; nec pertractant quæstionem, *an baptismus characterem conferat*, sed, *an baptismus characterem conferat, si baptizentur amentes aut dormientes*. Inquirimus & nos, num *character* Ordinis imprimatur invito & reluctanti. In hac quæstione instituiturne disputatio, an Ordo imprimat *characterem*, an id tanquam certum supponitur? Id quidem supponimus. Itaque & baptismum imprimere *characterem*, sedente Innocentio, tenebant omnes, positumque erat extra aleam omnem dubitationis. Dicis, cur nec Magister meminit *characteris*? Respondent Theologi meminisse in 1v. dist. vii. ubi ait Baptismum, Confirmationem, & Ordinem iterari non posse, quia juxta Augustinum, dantur per consecrationem, *quod autem semel est consecratum, suam consecrationem nunquam amittit*: ut enim dictum supra, hæc consecratio non significat gratiam, quæ amitti potest. Addo Magistrum etiam expresse locutum de *characterem* in 1v. dist. 24. ubi ait: *Character ergo spiritualis, ubi fit promotio potestatis, Ordo vocatur*; ibique docet hunc Ordinis characterem esse *sacrum quoddam signaculum*. Scholastici demum, ubi asserunt *characterem* non posse probari ex Scriptura vel traditione, disputant de *characteris* natura, non de existentia: enim vero ex traditione saltem compertum est, *characterem* imprimi, quamvis inde nequeat inferri, an sit relatio, an qualitas, an habitudo. Atque hoc sensu Scotus in 1v. dist. vi. q. 9. inquirens an *character sit forma realis impressa in anima*, ait: *Nec Scriptura sancta istud exprimit, nec Sancti explicite*: unde liquet mentem

tem Scoti minime affectum Polanum, dum scripsit: *Anzi Giovanni Scoto disse, che per parole della Scrittura, e de' Padri, non era necessario farlo; ma solo per l'autorità della Chiesa: modo consueto a quel Dottore di negar le cose con maniera di cortesia*. Hist. Conc. pag. edit. Gen. 246. Et quidem si Scotus negasset *characteris* existentiam, cur questione proxima prolixè disputasset de hujus *characteris* natura, contendens sitam esse *in forma aliqua relativa*, non autem *in absoluta*? Quis tempus terat in nihili investiganda natura? Quod dixi de Scoto, idem de quibusdam aliis antiquis Scholasticis dicendum est; etsi non oportet, ut post Ecclesiæ decreta mentem cujusque Scriptoris tanta anxietate perquirere studeamus. Venio ad oppositionum partem alteram. Etiam ex Scripturis evinci existentiam *characteris* docuit, ut dictum est, Bellarminus, cui subscribimus. Quamvis tamen silerent Scripturæ, clamat antiquorum traditio, traditionisque custos, & perscrutatrix Ecclesia: quæ satis mentem Augustini, aliorumque Patrum expressit. Age tamen, dicamus perpauca de præcitato sermone ad plebem Cæsariensem. In eo inquit S. Pater Baptismi, & Ordinis *characterem* permanere in desertore, ac desertoris nomine intelligit schismaticum & hæreticum; agnoscit ergo *characterem* a fide, & a gratia sanctificationis distinctum. Addit non iterandum baptismam Donatistarum, quoniam etiam Donatus infixit dominicum *characterem*. Ait quoque hunc *characterem* imprimi credentibus, dum baptizantur in nomine Trinitatis. Nonne hæc perspicue traduntur in eodem loco, qui objicitur? Augustinus ergo docet in baptismo *imprimi characterem*, & hujus causa iterandum non esse baptismatis Sacramentum. Sed objicis: Augustinus ait *characterem* istum dignosci interrogatione baptizatorum, & esse fidem ipsam Trinitatis, cujus invocatione confertur baptismum. Respondco: Si ita res se habet, quomodo Augustinus ait *characterem* illum esse etiam in desertore, qui aliquando fidem Trinitatis perfundat & abnegat? Audias ergo Augustinum sese explicantem, & quidem apertius, quam fecerint quidam Scholastici. Petit infra S. Pater a Donatista, ut ostendat sibi, habere illum Sacramentum Christi; & ait, id Donatistam commonstrare profitendo fidem Trinitatis: non quod fides Trinitatis sit ipsum baptismatis Sacramentum; sed quia exponit *formam*, qua confertur Christi baptismum. *Es certe*, (expende Augustini verba) *videamus quod habes. Habeo, inquit, Sacramentum, habeo baptismum. Si dicam tibi, Proba: ostendis mihi quod acceperis, dicis quid confessus fueris, dicis quid teneas. Agnosco, non muto, non exsufflo. Absit, ut cum quæro salutem desertoris faciam injuriam imperatori. Ergo probasti mihi quod habeas Sacramentum, exponendo Sacramentum*. Quod supra Augustinus dixit de *charactere*, repetit modo, iisdemque fere verbis de Sacramento. Atqui juxta Augustinum ideo ex

con-

confessione fidei dignoscimus aliquem verum accepisse baptismum, quia istiusmodi confessio exponit *formam*, qua verus baptismus confertur. Igitur eatenus ex fide Trinitatis cognoscimus *characterem*, quatenus fides ipsa exprimit Trinitatem, cuius invocatione datus baptismus *characterem* figit & imprimit. Redeamus modo ad verba, quæ opponerentur: *Astendo fidem in nomine Patris & Filii & Spiritus Sancti. Iste est character Imperatoris mei. De isto characterē militibus suis, vel potius comitibus suis, ut hunc imprimerent eis, quos congregabant castris ejus, præcepit dicens, Ita baptizate gentes in nomine Patris, &c.* Ita ex fide cognoscis *characterem*, quemadmodum ex fide cognoscis Sacramentum; quoniam scilicet fides exponit quibus verbis & consecratur baptismus, & *character* imprimitur. Is mihi videtur verborum Augustini sensus obvius, atque perspicuus. Nam quod sequitur de *characterē* baptismatis in nomine Donati, *hypothetice* ab Augustino, non *absolute* profertur; quasi dicat, Si baptismus daretur in nomine Donati, iterandus esset, nec imprimeret *characterem* indelebilem, quoniam esset *character* desertoris: contra vero dum confertur in nomine Trinitatis, baptismus iterandus non est, figitque perenne signaculum, quoniam est signaculum Imperatoris. In hoc autem assendo Augustinus quemadmodum non ait baptismum a desertore collatum in nomine desertoris esse verum baptismum; ita non credit *characterem* Donati futurum in ea hypothese verum *characterem*: neque hypothese ipsam approbat; sed ex ea urget & vellicat Donatistas iterantes collatum *extra unitatem* in Christi nomine Sacramentum.

In diluendis iis, quæ postremo loco obijciuntur, non ero verborum: quippe ubi de rebus obscurissimis disputatur, irrefragabili auctoritati debet subijci ingenio nostri imbecillitas. Afferimus itaque opinionem eorum, qui in Tridentina Synodo dixerunt Tonsuram quoque, non quamlibet, sed sacro ritu ab Episcopo datam, Sacramentum esse, & imprimere *characterem*, non esse omnino improbabilem, ac propugnari a multis, maxime Canonistis. Enimvero Tonsuræ *επαγίδα* canon 33. Trullanus, & 14. Synodi II. Nicænæ commemorant. Ast quoniam vetus fuit consuetudo in collatione Lectoratus tondere comam, ut solet fieri etiamnum apud Græcos & Syros; probabilius existimamus appellari *characterem* tonsuræ, aut significatione ampliori, aut comparate ad Ordinem, in quo simul initiati tondentur; ita, ut fuerit olim *tonsura* ceremonia quædam annexa collationi minorum Ordinum, & quæ proinde gratiæ puerorum Ecclesiis inservientium etiam absque ullo Ordine conferatur. Fuit etiam tonsura aliquando apud veteres iterata, & auctore Morino p. 111. Sacr. Ordin. Exerc. xv. pag. 272. in cuiusvis Ordinis collatione; unde, ut modo non reiteretur, facit sola Catholicæ Ecclesiæ consue-

tudo. Corruit ergo ratio priori loco producta. Nec melioris notæ est altera: siquidem non est *viciosus circulus* dialecticorum probare existentiam causæ ex effectu, & vicissim; quando unum eorum certo dignoscitur. Cum ergo nobis compertum sit, baptismum, etiam confessione hæreticorum, non esse iterandum; inde opinamur id evenire ex peculiari quodam, ac permanente effectu ejusdem baptismi. Neque enim cur baptismus non iteretur, facit aut quod institutum sit ad delendum peccatum originale, quod semel remissum non redit; aut quod sit Sacramentorum janua, aut quod certam habeat promissionem æternæ vitæ; quod reponere solent heterodoxi. Etenim ille, qui sicte baptizatur, non consequitur originalis peccati remissionem, nec tamen iterum tingendus est. Apostata etiam & hæreticus foras exiit; nec iterum per lavacrum baptismatis eidem janua aperitur. Eucharistia insuper, quamvis frequentissime repetatur, conjuncta est æternæ vitæ promissio. Ineptas itaque hæretici causas afferunt, cur non iteretur baptismus, ut *characterem* eliminent. Hunc vero cur cætera Sacramenta non imprimant, præter Baptismum, Confirmationem, & Ordinem, dixi in secunda propositione. A postrema denique argumentatione facile me expediam: placuit quippe Domino fideles suos obsignare, ut dignoscerentur ab Angelis, ut electi in cælis Sacramentorum Christi decora præferrent, ut in gehennâ cum signaculo Imperatoris vehementius desertores confunderentur: quod licet Omnipotens potuerit alia ratione perficere, placuit ei præstare impressa spiritali notâ, quæ per comparisonem ad insculptam, vel inscriptam formam, recte appellatur *Χαρακτήρ*, *figura*, *insigne*, *lineamentum*, *signaculum*.

## C A P U T XXIII.

*Agitur de Sacramentorum ceremoniis, & nonnulla circa  
Sacramentalia adnotantur.*

**D**E *ceremonia* vocabulo, ejusque significatione non pertractant viri Theologi. Strabo, Valerius Maximus, Livius apud Vossium in Etymologico *ceremoniam* dici putant a *Cære* Thuscæ oppido, ubi quo tempore Galli Romam tenebant asservatum putant æternum ignem, commoratasque Vestales: unde Livius *Cærem* lib. vi. i. appellavit *Receptaculum Romanorum Sacrorum*. Scaliger derivat *ceremoniam*, a perantiqua dictione *cerus*, idest, *justus*, *bonus*; quemadmodum a *castus* castimonia derivata est, & a *sanctus* sanctimonia. Hinc multi *ceremonias* scribunt absque diphthongo: ita hi, qui a *Cerere* hoc nomen repetunt, ut Philoxenus; nec aliter qui cum S. P. Augustino lib. 2.

lib. 2. Retrahit cap. 37. & Isidor. lib. vi. Etymolog. cap. ultimo , *ceremonias* deducunt a *carendo* , eo quod observantes careant his rebus , a quibus abstinent . Nonnulli repetunt a *celo* , L. in R. commutato , ut in *earuleis* : perplacetque Vicecomiti , aliisque de hoc argumento pertractantibus prior etymologia ; nobis tradita ab Augustino . Sunt autem ceremoniæ *sacra omnia , quæ apud Græcos Orgia vocantur* , inquit eo loci Isidorus ; quamvis *Orgia* proprie essent sacra Liberi Patris , idest , Bacchi . At de nomine satis .

Quæcunque ad cultum Dei pertinent possunt generali appellatione dici *ceremonia* , easque recte partitur Bellarminus lib. 2. de Sacr. in gen. cap. 29. juxta quatuor genera causarum . In sacris enim actionibus quædam a Christo , quædam ab Apostolis , quædam ab Ecclesia fuerunt præscripta ; quædam etiam indita a natura , ut cælum respicere , manus tollere , tundere pectus . Atque hæc a causa efficiente , sive ab Institutore distinguuntur . Ea quoque , si rem , vel causam , materialem inspicimus , aut personam spectant , aut tempus , aut modum , aut rem ipsam , puta oleum , panem , aquam , vestes , &c. A causa *formali* dividit Bellarminus ceremonias in eas , quæ vel immediate sunt Dei cultus , ut sacrificium , oratio , adoratio : vel ad Dei cultum disponunt , ut jejunium , & cælibatus ; vel divini cultus sunt instrumenta , ut templa , calices , aræ . Sumitur denique ceremoniarum partitio ab effectu , vel fine : nam aliquæ institutæ sunt ad sanctificandum hominem , ut Sacramenta ; aliquæ ad quosdam spirituales effectus , ut exorcismus , & aquæ lustralis aspersio ; aliquæ ad ornatum , & mysticam significationem , ut cereorum lumina , alba Neophytorum vestis , Sacerdotum , clericorumque indumenta .

Hoc tamen loco ceremoniarum nomine intelligimus *Ecclesiasticos ritus vel a Christo , vel ab Apostolis , vel ab Ecclesia institutos , ut sacra decentius , & cum majori solemnitate peragantur* , ita , ut ceremonias non Sacramenta , aliæque sacra dicamus , sed modum , ordinemque res sacras decenter , accurate , magnifice , certis servatis regulis , rebusque adhibitis tractandi , atque perficiendi . Quæ vero ceremoniæ in unoquoque Sacramento servantur , singillatim suis in locis tridentur : nunc enim universim inquirendum est , num ceremoniæ recte sint institutæ , servantur utiliter , & inculpate possint omitti , adjectis quibusdam annotationibus circa ea , quæ in pluribus ac fere omnibus Ecclesiasticis functionibus assumuntur in usum , idest , sacris vestibus , Clericorum cantu , accensis cereis , thurisque fusu : nam hæc omnia hæretici vellicant , damnantque superstitionis . Perpauca etiam dicemus de Sacramentalibus , quæ a recentioribus sex numerantur , comprehensa vulgato carmine , *Orans , tintillus , edens , confessus , dans , benedicens* , idest , Dominica oratio , aqua benedicta , eulogiæ , scilicet panes sancti fidelibus distributi ,

buti, confessio pœnitentium, quæ, ut diximus pag. 85. olim feria v. in Cœna Domini fiebat, eleemosyna, & elargitio benedictionum. At improprie inter Sacramentalia connumerantur oratio & eleemosyna; quæ potius opera moralia sunt, quam ritus ab Ecclesia instituti, habentes aliquam cum Sacramentis *analogiam*, quod est proprium *Sacramentalium*. Confessio pariter peccatorum, & beneficium absolutionis, siue privatim, siue in conventu Ecclesiæ impendatur, pertinet ad Pœnitentiæ Sacramentum: ideoque inter Sacramentalia locum habet illa tantum confessio generatim facta, antequam a Sacerdote, vel Episcopo benedictio percipiatur. Benedictionis quoque vocabulum cum amplum nimis sit, a nobis coarctabitur ad sacros cineres, ad ramos palmarum, ad cereum Paschalem, ad sacras imagines cereas, quas *Agnos Dei* communiter appellamus, & ad candelas, quas Romana Ecclesia solet in Purificatione beatæ M. V. benedicere. His enim potissimum, tanquam superstitiosis ritibus, heterodoxi indignantur.

PROP. I. Ecclesia ceremonias instituendo jure suo minime abusa est, illasque recte, prudenterque præscripsit.

Demonstratur pars 1. Habere Ecclesiam auctoritatem ceremonias, ritusque instituendi, complura momenta suadent. Principio id evincunt Theologi ex Apostolo ad Corinthios scribente, Epist. 1. cap. xi. 34. *Cetera autem cum venero disponam*: quem in locum S. P. Augustinus epist. 54. aliàs 118. ad Januarium ait institutos ab Apostolis quosdam ritus toto terrarum orbe servandos; cujus generis sunt anniversaria solemnitas Dominicæ passionis, resurrectionis, & ascensionis ad cælum, & quidquid custoditur *ab universa quacunque se diffundit Ecclesia*: deinde inquit S. Pater, etiam post Apostolorum ætatem quædam instituta, *quæ per loca terrarum, regionibusque variantur*; cujusmodi sunt sabbati jejunium, & divinæ Eucharistiæ facta certis diebus frequentatio, productis etiam ad hoc stabiendum verbis Apostoli. Ex quibus Augustini præceptionibus tria adversus hæreticos consequuntur; unum scilicet, præter Sacramentorum institutionem, quam Scriptura sacra commendat, plura saluberrime retineri ad ipsorum Sacramentorum usum, dignitatemque spectantia: alterum, ex horum genere quædam esse, quæ ubique terrarum ab Ecclesia tenentur, nec variantur ulla morum diversitate, atque hæc tradita per Apostolos, & a nemine prorsus violanda: tertium denique, complura in particularibus tantum Ecclesiis vigere, quæ etsi comparate ad universam fidelium multitudinem liberas habeant observationes, servanda sunt tamen *pro eorum, inter quos vivitur, societate*. II. Sacrarum ceremoniarum institutionem comprobat traditio veterum. Martyr enim Justinus prope finem Apologiæ ad Antoninum Pium commemorat sacros diei Solis conventus, concionum

cionum precumque ordinem, benedictionem Antistitem, Diaconorum ministerium, aquæ vinique oblationes, præscriptamque Eucharistiæ consecrandæ rationem. Tertullianus pariter de Corona milit. cap. 3. abrenuntiationes, quæ sunt in baptismo, exhibitas Deo flexis genibus adorationes, signum Crucis fronti sæpissime impressum, standi a Paschate ad Pentecosten usque consuetudinem, aliaque per multa ex veterum disciplina recenset. Exorcismos baptismi laudant in Epistola ad Magnum Cyprianus, in priori Catechesi Cyrillus Hierosolymitanus, & in sermone ad Catechumenos 1. §. 2. atque in libris adversus Pelagianos præstantissimus Augustinus. De ceremoniis in Missæ sacrificio usurpatis laudatus Cyrillus Catechesi V. Magnus Basilii de Sp. sancto cap. 27. alique veteres pertractant. At peculiare ritus suis in locis curabimus vindicare. III. Omni prorsus ætate, naturæ instinctu, legis mandato, atque auctoritate majorum certa sacrorum mysteriorum ratio ad cultum Dei promovendum recepta est. Et quidem nondum lata lege, post pium Abelem Noë constructo altari Domino pecudes volucresque mactavit. Jacob non solum lapidem erexit in titulum, verum etiam sacrâ ceremoniâ fudit desuper oleum. Jethro Exodi xvi 11. 20. Moyse suadebat, ut populo ceremonias, ritumque colendi Deum præmonstraret. Quæ verò idem Moses Domino præcipiente constituit, non opus est describamus. Rituum autem veterum observationem ipsemet Moses Deut. xv. populum alloquens, & Rex David acturus animam Salomonem exhortans 111. Regum 2. summopere commendaverunt. Synagoga quoque Judæorum nova addidit festa, Judithæ, Estheris, & Machabæorum temporibus. In Evangelica demum lege statuerunt Apostoli quæ videbantur opportuna, abstinenciam a suffocato & a sanguine, solemnitates sabbati in diem Dominicum commutationem, Matthiæ electionem per sortes, institutionem septem Diaconorum, aliaque bene multa. IV. Hæretici ipsi quamquam rebelles lumini, aliquando coacti sunt veritatem hanc profiteri: siquidem in præfatione Confess. Helveticæ legitur, *Semper in ritibus & ceremoniis Christi Ecclesiæ usa sunt libertate: id quod in historia Ecclesiastica videre licet*; quibus verbis saltem *Reformati* concedunt dari ritus, qui a Christo instituti non sunt, & possunt pro libito Ecclesiæ, temporumque opportunitate immutari. In Confessione pariter Augustana art. xv. etsi impie asseritur complures Ecclesiasticos ritus servari non posse sine peccato, habetur nihilominus ritus plures, *qui sunt humana auctoritate instituti, servandos esse, ut certa seria, certa cantiones piæ, & alii similes ritus*. Bullingerus Decade v. ferm. 8. fateatur ritus, qui observantur in Ecclesia Romana, esse vetustissimos; idque de Baptismo comprobatur exquisitissimis Augustini testimoniis; nec aliter Calvinus, tametsi impudentissime eosdem ritus *incantationes* appellitet. Vide Joannis

Geor-

Georgii *Conversionem* pag. 38. Adiaphoristæ etiam, de quibus Hofius lib. 1. de hæres. & Præcolus de Sectis, idest, Lipsiensis & Witthembergenſes, ut dicuntur, Reformati, Sacramentorum ceremonias res indifferentes existimant: ideoque poterat illas Ecclesia præscribere, & recipere in usum, salva veritate Evangelii, & legitima Sacramentorum administratione. V. Apparet ex dictis omni prorsus jure Oecumenicam Synodum Tridentinam sess. xxi. cap. 2. declarasse, *Hanc potestatem perpetuo in Ecclesia fuisse, ut in Sacramentorum dispensatione, salva illorum substantia, ea statueret, vel mutaret, quæ sapientium utilitati, seu ipsorum Sacramentorum venerationi, pro rerum, temporum, & locorum varietate magis expedire judicaret.*

Quod verò Ecclesia in ceremoniarum institutione providè, prudenterque se gesserit, idem Tridentinum Concilium sess. xxi. cap. v. demonstrat, ex quo exterioribus ritibus commendatur divinorum mysteriorum majestas, & mentes fidelium per visibilia religionis, & pietatis signa excitantur ad rerum altissimarum contemplationem. Infinituat eandem rationem Catechismus Rom. de Sacram. in gen. num. 18. illamque corroborant quæ sæpe diximus, rationalem animam insertam corpori corporalibus imaginibus ad rerum spiritualium intelligentiam elevari; quemadmodum Hom. 25. in Matth. docet Græcorum eloquentissimus Joannes Chrysostomus.

Hinc nos subscribimus iis, qui sacras ceremonias, non ob ministrorum commodum, regionumque consuetudinem institutas pronuntiaverunt, sed qui in illis mysticam & symbolicam significationem agnoscunt. Pronuntiavit utique priorem sententiam bipartito Opere Gallica lingua conscripto Claudius de Vert Monachus Cluniacensis: quem ab errore vindicat illustris Tournelius, proptereaquod proficitur ille se nequaquam rejicere mysticam ceremoniarum rationem; idque ulterius testatur in Epistola ad Jurium ipsum Vertius. Hunc tamen errore magno deceptum censuit in Pastoralis Epistola anno 1720. Joseph Episcopus Augustæ Succionum; prodiitque adversus Claudium anno proximo egregium Opusculum apud Parisios materna Gallorum lingua. Nimidum scriptorem illum fuisse ausum censet quodque in eruditissimis Annotationibus de Sabbato sancto num. 393. & de Purificat. B. M. V. n. 22. Purpuratorum Patrum, Romanorumque Pontificum decus, BENEDICTUS XIV. Arbitror ego Claudium de Vert rationes quidem symbolicas in ceremoniis sacris agnoscere, sed quæ ipsarum institutionem sint consecutæ, ita, ut primitus naturalem habuerint causam, postea ob mysticum symbolum in illis excogitatum retentæ fuerint in usu. Quæ si vera sunt, de Vert a priori temperamento deseivit, & immerito a Tournelio excusatur; nam in priori sacrorum rituum institutione spectasse Ecclesiam rerum spiritualium mysteria, certa nobis argumenta suadent, nec ad respon-



pondendum Novatoribus superstitionis crimen objicientibus, necessum est ritus sacros, & mysticos ad seriem rerum naturalium, humanarumque deprimere.

Revera in sacris ritibus spiritalem significationem esse attendendam, constat ex quo Deus inspirat quomodo colendus sit non solum ob sui gloriam, verum etiam ob nostram maximam utilitatem, ideoque non sine occultæ rei significatione inspiravit Abeli, ut ei offerret primogenita gregis, horumque adipēs; ut quæst. 3. ad Deogratias, ep. 49. aliàs 102. docet S. Pater: quod repetit de omnibus aliis oblationibus, scribens adversus Faustum lib. vi. cap. 5. In Sacrificio etiam Abraham, de quo Gen. xv. liquet Deum præscripsisse victimarum conditionem, easque immolandi ritum, jubens ut fumeret *vaccam triennem, capram trimam, turturem atque columbam*, & universa hæc per medium divideret, partesque statueret *altriuscuius*; quod divini fœderis esse symbolum constat ex Jeremiæ xxxiv. 18. Quod etiam fecit Jacob erigens lapidem, & oleum fundens, non fuit duntaxat monumentum visionis, sed propheticum signum, pietatisque, ac *spiritualis pinguedinis* argumentum, teste Augustino de Civit. Dei lib. xii. cap. 32. & Auct. libri de Unct. Chrism. inter Op. Cypriani. Præterea in lege scripta ceremoniarum omnium Deum fuisse auctorem, & sub illis latuisse futurarum rerum figuras, demonstrat liber Levitici, & in 1. ad Corinthios cap. 16. affirmat eximium Vas electionis. In lege quoque Evangelica in ritibus singulis latere mysteria comprobant quæ de expurgatione fermenti scripsit Apostolus eadem Epist. cap. 5. & de participatione ejusdem panis; cap. 10. Nec mysterio caret, quod Christus insufflando dederit Spiritum Sanctum hujus a se processionem commonstrans, ut docuerunt Augustinus Tract. cxxi. in Joannem, & Cyrillus Alex. lib. xii. cap. 5. Incensum symbolum esse orationis, altare throni Dei, candidumque byssinum justificationis & gratiæ, legimus cap. vii. & xix. Apocalypseos. His ergo constat sacrarum ceremoniarum institutionem symbolicam esse, mysticam, spiritalem.

Persuasum id & Gentibus, quæ juxta præformatam profanorum Numinum ideam, diversis ea ritibus coluerunt. Templis principio idololatræ caruerunt, quod nondum immensi Numinis exuti penitus contemplatione, noscerent Deum nullo concludi loco: postmodum opinantes Jovem alto Olympi vertice confidere, ei primum in montibus Bithyniæ, juxta Arrianum, ædes construxerunt; quemadmodum in montibus Moab erectas Beelphegor diviniæ testantur literæ. Adhibuerunt & ipsi lustrationes religionis causa, pie sacrificasse opinantes, *si cutem lavissent*, inquit Lactantius. Cecinit sat. 3. Perlius:

*Hæc sanctæ ut poscas, Tiberino in gurgite mergis.*  
26. V. l.

M m

Non

Non soli Moyſes & Joſue calceos reverentiâ Numinis detraxere ; ſed & colentes idola Cybelis , & ingreſſuræ templum Veſtæ mulieres . Solent idem præſtare dantes operam magicis incantationibus . Eam ob rem dæmones his , aliſque ritibus delectantur , quoniam æmulantur ipſas res divinatorum Sacramentorum , ut inquit cap.40. de Præſcript. Tertullianus . Hinc illicituntur variis generibus lapidum , herbarum , carminum , rituum , *non ut animalia cibus , ſed ut ſpiritus ſignis* , juxta Auguſtini ſententiam lib. xx1. de Civit. D. cap. 6. quia nimirum dæmones ipſos non latet , externis ritibus religionis ſymbola contineri .

PROPOS. II. Sacræ ceremoniæ ab Eccleſia præſcriptæ ſedulo ſunt obſervandæ .

Definit id Tridentina Synodus ſeſſ. vii. can. 13. his verbis : *Si quis dixerit receptos , & approbatos Eccleſia Catholica ritus in ſolemni Sacramentorum adminiſtratione adhiberi conſuetos , aut contemni , aut ſue peccato a miniſtris pro libito omitti , aut in novos alios per quemcunque Eccleſiarum Paſtorem mutari poſſe , anathema ſit* . Hujus definitionis æquitas hiſce monumentis probatur . I. Veteri in lege ceremonias tranſgredi adeo grave ſcelus erat , ut Nadab , & Abiu ignem non ſacrum in oblationibus adhibentes fuerint Levit. 10. cœleſti ab igne conſumpti , & Oza tangens Dei arcam 11. Regum , 6. *Levitiſ Dei* , ut inquit Salvianus in vi. de Provid. *inofficioſus* , repentina morte corruerit . At non minori ſanctitate pollent novæ legis myſteria : quorum proinde ritus contemnere irritat ultricem ſupremi Numinis indignationem . II. Deinde aut ceremoniæ in univerſa Eccleſia receptæ ſunt , aut pro locorum , temporumque circumſtantia variantur . Si ubique ſint receptæ , eas parvipendere *inſolentiſſima inſania eſt* , inquit Auguſtinus laudata ad Januarium Epistoſa . Si verb in peculiaribus Eccleſiis obtineant , in eiſdem Eccleſiis commorantes earum ritus , conſuetudinemque ſervare debent *pro eorum , inter quos vivitur , ſocietate* . Hinc Stanislaus Hoſius in Conſut. Prolegomenum Brentii pag. edit. Antuerp. 143. recte contendit pro ſchiſmatico eum habendum , qui ſolemnes probatosque Eccleſiæ ritus rejicit & aſpernatur . III. Non auſi ſunt id negare vel Novatorum peſtilentiſſimi . In Confeſſ. namque Auguſtana juxta Reformationem anni 1540. de ceremoniis art. xv. legitur : *Sed illi peccant , qui eas cum ſcandalo violant , aut qui ſuarum Eccleſiarum tranquillitatem temere perturbant* . Ipſe Melanchthon in cap. xiv. Ep. ad Rom. *Non probō* , inquit , *petulantiam illorum , qui ritus & traditiones ſue probabili cauſa ubique violant , ſeu ſtudio novitatis , ſeu quadam contumacia* . *In his enim non ſolum pietas , ſed etiam humanitas deſiderari poſeſt . Quid enim eſt inhumanius , quam aſpernari publicos mores , præſertim ſi videantur diſciplinæ cauſa inſtituti ?* In Epistoſam etiam ad Coloſenſes appellat veterum ceremoniarum contemptores *ſtultos ac ſeditioſos* .

*tiosos* . Similia scripsit Oecolampadius in Epistola ad Erasinum Rit-  
terium , de qua legendus Jo: Hoffmeisterus in Harmonia Conf. Aug.  
pag. 325. In Confessione pariter Saxonica reprehenduntur qui cere-  
monias , quæ profunt ad disciplinam & ordinem regiminis in Eccle-  
sia , contumaciter , superbeque contemnunt , ut refert Consultatio-  
ne xv. Cassander . Grotius quoque in Annot. ad Cassandrum Tom. iv.  
pag. 622. scribit illos , qui constituendi ceremonias *Ecclesiis singulis ,*  
*aut universo corpori adimunt potestatem , adimere ei quod cognatum*  
*est omnibus societatibus* . Addit talia Deo esse grata , quia ordo & pax  
ipsi placent : partim etiam , quia in iis si non virtutes sunt sitæ , at  
certe preparatus quidam ad virtutem . IV. Ecclesiæ , in iis præsertim  
quæ spectant ad divinum cultum , omnino obsequendum esse , sum-  
ma illius potestas , Ecclesiasticæ disciplinæ ratio , vinculum commu-  
nionis , & jura quæque suadent . At ceremoniæ ad divini cultus di-  
gnitatem , regulam , uniformitatem , majestatemque plurimum con-  
ducunt . Sunt ergo , ut præcipit in Bulla , quæ Rituali Romano præ-  
figitur , Paulus V. & in ea , quæ legitur in fronte Missalis ac Brevia-  
rii , Pius V. *inviolatè observandæ* .

Nota tamen consulto Tridentinum Concilium mandasse sacrorum  
rituum observationem , *in solemnibus Sacramentorum administratione* ,  
quoniam necessitate urgente , sat est , si materia ac forma eorumdem  
Sacramentorum adhibeantur . Unde exploditur sollemnis calumnia  
hæreticorum , qui eo nomine ceremonias aspernantur , quod a no-  
bis servantur , quia existimamus promoveri illis gratiam & remis-  
sionem peccatorum . Ipsi quidem hæretici , cum asserant hominem  
sola fide justificari , necessaria consecutione docent nec observatione  
rituum , neque operibus satisfactionis conscientias esse onerandas ;  
sed nos diversas justificationis causas statuentes , Sacramentis quidem  
hoc tribuimus , ut justificantem gratiam in nobis efficiant ; nostris  
conatibus divino præventis adjutorio ad illam gratiam nos disponi  
affirmamus ; & sacris ritibus id inesse credimus , ut nos facilius in  
studio religionis contineant , ut in nobis excitent reverentiam divino-  
rum mysteriorum , ut exterioribus symbolis spiritalia nobis propo-  
nant , ut demum pædagogia quadam ad arcana & mystica accedere  
valeamus . Quod non obscure innuit sess. xxi. cap. v. Synodus Tri-  
dentina , demonstratque citato loco ex consensione Theologorum  
Cassander , nec ignoravit , ut ex dictis constet , Hugo Grotius . Re-  
cte Philippica xiv. Alphonsus Virvesius : *Nemo est inter Catholicos*  
*tam stupidus , & superstitiosus , qui credat vestium colorem aut for-*  
*mam , & ceremonias alias hujuscemodi justificare* .

Affirmamus etiam non omnem sacrorum rituum transgressionem  
esse lethale peccatum , sed attendendam esse ceremoniarum , quæ præ-  
termittuntur , conditionem : si enim plurimum sint conspicuæ , ut

est in Missa sacras vestes, lumina, oblationem Hostiæ, aut Calicis elevationem, & adorationem, aliaque id genus adhibere; nequeunt absque gravissimo scelere prætermitti. Si verò accidentales sint, ut manus ante sacrificium ablueri, & cetera hujusmodi, nisi adsit contemptus, plebisque scandalum, erit levis culpa duntaxat. Verum de hac re legenda dissertatio edita jussu Benedicti XIII. ab amplissimo Cardinali Gregorio Sellari Ordinis FF. Prædicatorum.

#### AD OBJECTA HAERETICORUM.

Opponunt hæretici primò, plures Romanæ Ecclesiæ ceremonias derivasse a legibus Judæorum, quibus si obtemperemus, teste Paulo ad Galat. v. 2. *Christus nihil proderit*: permultas alias desumptas a paganorum superstitione, quæ proinde nequeant absque idololatriæ crimine retineri. II. Inquiunt unicuique fas esse sacras ceremonias aut immutare, aut omittere, quoniam Augustinus citata ad Januarium Epistola scribit *habere liberas observationes*; ac pessime se gerere, qui Religionem, *quam Deus paucissimis & manifestissimis celebrationum Sacramentis liberam esse voluit, servilibus oneribus premunt*. III. Ajunt etiam Papistas veterum rituum se contemptores ostendere, dum baptismum absque degustatione lactis & mellis, absque igne, & absque Eucharistia nunc ministrant: quæ si fas sit aspernari, cur non exorcismos, cereos, & ejusmodi cetera? IV. In ceremoniis Ecclesiæ videtur Satanas, inquit cum Calvino Vedrosius rat. 3. Exam. docum. 9. post receptas imposturas suas, ad crassiora prorupisse ludibria, *qualia sunt sputum, & similes nugæ*, quarum nec apud veteres vestigium ullum. V. Argutari possunt ex jactis a Claudio de Vert fundamentis; cum enim vestes, ritus, cerei, aliaque id genus vel ex consuetudine locorum, vel ex necessitate fuerint primum usurpata; alia modo consuetudine vigente, & diurno duntaxat tempore convenientibus ad Ecclesiam fidelibus, abjici possunt antiquæ vestes, lumina, & cetera hujusce generis.

Respondetur ad primum, retinendas fore ceremonias, etiam si a Judæis, vel Paganis essent derivatæ; quoniam quæ Judæi carnaliter servarunt, nos spiritualiter usurparemus, & quæ Ethnici adhibuerunt sacrilege, converterentur a nobis in Dei cultum. Numquid enim detestanda erant sacrificia Patrum, quia & sacrificia offerebant Gentiles? Numquid contemnenda sanctimonialium virginitas, quia & virgines fuerunt Vestales? Numquid destruenda templa, quoniam & extiterunt templa idolorum? Vide Augustinum libro 20. contra Faustum cap. 21. Sane superstitio vel attenditur ex objecto; & est, quando Dei cultus exhibetur creaturæ: vel ex humanorum actuum institutione atque directione; sitque dum exteriori ritu, aut pravi

opi

opinationibus instruimur , aut improbis obscenisque rebus religionis officia labefactamus . Superstitio ergo , quæ est in ceremoniis Gentilium , procul abest a nostris ; quoniam illi idola , nos colimus Deum verum : illi absurdissimis fœdissimisque moribus , nos saluberrimis optimisque institutis usu externorum signorum formamur . Deinde respondemus aliter de ceremoniis Judaicis , aliter de Ethnicis judicandum . Judaici ritus , quidam prænuntiabant Evangelicæ legis mysteria , ut circumcisio , sacrificia cruenta , esus Agni , baptismi , mortis Christi , & Eucharistiæ typi ac figuræ ; & hi ritus merito sublati sunt , quoniam res præfiguratæ advenerunt . Ritus alii , ut vestes sacræ , lumina , thymiamata , cantica , ad decentiam exterioris cultus , & devotionis excitationem spectabant ; ideoque etiamnum ritus istiusmodi jure servamus , cum teneamur animo & corpore Deo cultum exhibere ; maxime quod a legis abrogatæ mysticis ceremoniis plurimum nostræ discrepant . Apostolum vero scribentem ad Galatas legalia primi generis , & quidem adversus eos , qui ex circumcissione justitiam salutemque repetebant , quasi lex Christi infirmior sit , quam quæ sola possit justificare , manifestum est ex proximis verbis : *Evacuati estis a Christo , qui in lege justificamini* . Ad Paganos quod attinet ; omnes fere eorum ritus diabolus divinorum honorum cupidissimus mutuavit ex nostris , *amulatus res Sacramentorum divinorum , & sibi arrogans , quo tanquam Deus haberetur* , ut citatis in locis docent Afrorum sapientissimi Tertullianus , & Augustinus . Si quosdam Ecclesia Christi , ut plebem a superstitione , idolorumque cultu removeret , ex contaminatis & profanis sacros reddidit & religiosos ; id non est idololatrias imitari , sed idololatriæ adminicula in religionis incrementa convertere . Hactenus ad primum . Ad secundum dicimus Augustinum , cujus verba sensumque audacter hæreticus Vedrosius pervertit , in illa ad Januarium Epistola cap. 1. præter divinas Scripturas admittere Apostolicas traditiones in iis , quæ servantur ab Ecclesia ubique diffusa ; cujus generis dicimus esse ritus Sacramentorum *essentiales* . Neque eo loci ait Sanctus Pater retinenda Sacramenta paucissima ceremoniis rejectis , sed , *exceptis iis , quæ servitutem populi veteris pro congruentia cordis illorum , & prophetici temporis onerabant* . Pertrahat deinde Augustinus de variis consuetudinibus Ecclesiæ , ritibusque accessoriis , de quibus ait quidem cap. 2. habere *liberas observationes* , quatenus nisi ubique recepti sint , universos utique fideles non obligant ; sed docet tamen servandos in Ecclesia , a qua fuerunt probati , & ab iis , qui ad Ecclesiam illam accedunt , scribens : *Nec disciplina ulla est in his melior gravi prudentique Christiano , quam ut eo modo agat , quo agere videris Ecclesiam ad quamcunque forte venerit . Quod enim neque contra fidem , neque contra bonos mores injungitur , indif-*

*indifferenter est habendum, & pro eorum inter quos videtur societate servandum est.* Idque Augustinus explicat exemplo jejunii sabbati, cujus alia Romæ, alia Mediolani vigeat consuetudo: & quod auctoritate Ambrosii asserit de jejunio, repetit postea cap. 5. de ritibus *Eucharistia*, dicens: *Faciat ergo quisque quod in ea Ecclesia, in quam venit, invenerit.* Merito itaque id, quod contra Ecclesiæ ceremonias Vedrosius objicit, illas firmare ac stabilire supra affirmavimus. Tertia vero objectio nihil aliud probat, quàm in ritibus Sacramentorum accidentariis fieri variationem aliquam: quod nos ultro fatemur, dicturi de veteribus baptismi ritibus, eorumque abolitione libro proximo. Neque ex illa variatione sequitur posse unumquemque aspernari Ecclesiasticas ceremonias; quoniam non privata auctoritate, sed Ecclesiæ aut definitione, sicut parvulorum communio, aut desuetudine, sicut mellis lactisque degustatio, ritus quidam sunt antiquati. In quarta mirari satis non possumus impudentiam hæreticorum; siquidem etiam Christus sputo surdum & mutum sanavit, Marci vi 11. 33. eodemque sputo lutum fecit, quo linivit cæcum a nativitate, Joannis ix. 6. ideoque liniuntur saliva aures, naresque baptizandorum, *ut quemadmodum cæcus ille Evangelicus, quem Dominus jussit oculis luto illitus Siloes aqua ablueri, lumen recuperavit, ita etiam intelligamus sacræ abluionis eam vim esse, ut menti ad celestem veritatem percipiendam lumen afferat.* Ita Catech. Rom. de Baptis. num. 68. & Gratianus cap. *Postea tanguntur*, de Consecr. dist. 1v. cap. 68. qui canon desumptus est ex libro 1. de Sacram. cap. 1. n. 3. inter Ambrosii Opera. Calvinus itaque, & Vedrosius mysticas quoque actiones Christi existimabant ridiculas & nugatorias. Ad ultimum constat ex dictis non probari a nobis systema Claudii de Vert: quamquam etsi ceremoniæ aliquæ necessitate fuissent inductæ, minime sequeretur esse abolendas, postquam probavit illas Ecclesiæ usus, in eisque præter res sensibiles nobis symbola rerum spiritualium exhibuit.

DE IIS, QUÆ IN SOLEMNIORIBUS ECCLESIAE RITIBUS  
SOLENT ADHIBERI.

Utitur in solemnibus Sacramentorum administratione primum sacris vestibus, quarum usum temere damnant Novatorum quamplurimi. Etiam Aaron veste sancta *in gloriam & decorem* exornatum legimus Exodi xxvi 11. 2. Samuelcm quoque in templo deservisse accinctum *epbod lineo*, constat ex 1. Regum 2. 18. Sacræ itaque vestes cum ad gloriam decoremque spectent, habeantque præterea mysticam significationem, jure, meritoque adhibentur. Præter hæc Scripturarum exempla revincuntur Sectarum auctoritate Nazianzeni commemorantis Orat. 2. *Sacerdotalem stolam, & vetustissimi Laodicensi Conci-*  
lii,

lii, præscriptis ne Clericus psallat, legatque in templo absque *oratio*. Expende hujus Synodi canonem 23. Tom. 2. pag. 1499. Insuper usum sacrarum vestium qui de Ecclesiæ ritibus pertractant stabiliunt antiquissimis monumentis. Mitto quæ ex ambiguis Anacleti Epistolis profert pag. 186. J. B. Casalius. Stephanus ad summum Pontificatum evectus tertio Ecclesiæ sæculo constituit ut in Ecclesia, tantum *vestibus sacris* Sacerdotes & Levitæ uterentur: quod confirmat vetustissimum illarum usum. Joannem Evangelistam adhibuisse Pontificale *aitalon*, laminam scilicet, aut vittam, refert in V. H. E. cap. 24. ex Polycrate Ephesino Eusebius. Sigebertus in Chronico ad annum 451. eo nomine notat Vandalos, quod vestes sibi fecissent *ex sacris palliis & vestibus*: traditque similia de Genferico Vandalorum rege Victor Vitenfis. Sacra insuper vestimenta laudant apud eximium Lupum P. v. pag. vet. edit. 262. Remensis Hincmarus in 1. Capitularium, RATHERIUS Veronensis Episcopus Epist. Synodica 17. Cyrillus Hierosolymitanus apud Hermiam Sozomenum lib. 1v. cap. 24. Etiam vetus pictura in *cæmeterio* Priscillæ repræsentat S. Pii I. & Pastoris presbyteri sacra indumenta. Adeas Aringhū Rom. subter. Tom. 2. pag. 305. & Blanchinum in notis ad Anastas. pag. 128. II. Vol. Ciampinus quoque in disquisit. de duobus emblematibus sacras vestes delineat ex vitreo orbiculo ætatis, ut conjectat, duorum Philipporum, qui Consules prodire anno 247. Fabiano in Cathedra Petri sedente. Ait Ciampinus ipse asservari in oppido S. Eliæ Nepesinæ Diœcesis sacra vestimenta sexcentorum saltim annorum. Eadem probat ratio: quoniam exterior apparatus & devotionem excitat, & suadet, ut munda conscientia atque virtutum ornatu divinæ res peragantur. Aiebat propterea Innocentius I. de Myst. Missæ cap. 64. *Attendat Sacerdos studiose, ut signum sine significato non ferat*. Hæc tantum de sacris indumentis dicta sint universim, ne hoc in loco tractentur peculiaria.

## II.

Carpunt Novatorum quidam etiam Psalmodiam, & cantica, quibus utimur in solemnioribus ritibus, officiisque Ecclesiasticis. Dament, necessum est, eadem ratione psallentem Davidem, Levitarum choro, Salomonici templi innumeros fere cantores. Quod si a nobis petant Evangelicæ legis exempla; proferemus hortamentum Apostoli ad Ephes. v. 19. *Loquentes vobismetipsi in psalmis, & hymnis, & canticis spiritualibus, cantantes, & psallentes in cordibus vestris Domino*. In quem locum Hieronymus, *Sic cantet, inquit, servus Christi, ut non vox canentis, sed verba placeant, quæ leguntur*. Facile insuper demonstrabimus cantandi morem esse in Christi Ecclesia antiquissimum. Ignatium Martyrem tradidisse Ecclesiæ Antiochenæ formam alternatim canendi demonstrat in Actib. Martyrum pag. 8. Ruinartius,

nartius, literisque id olim mandaverat Socrates octavo capite libri vi. Auctor Qq. ad Orth. inter Opera Justini pag. edit. Perionii 60. ait retentum in Ecclesia cantum, *quoniam movet animum ad ardentem cupiditatem ejus rei, qua in cantibus delectat: sedat motus, qui ex carne excitantur, &c.* Confirmat id suimet exemplo Augustinus in iv. Confess. cap. 6. ita Deum alloquens: *Quantum stovi in hymnis & canticis tuis, suave sonantis Ecclesiae tuae vocibus commotus acriter!* Tali experimento S. Pater edoctus laudat libro nono ejusdem Op. cap. 7. Ambrosium, quod secundum morem Orientalium instituerit, ut psalmi & hymni canerentur, *ne populus mœroris radio contabesceret.* Libro etiam x. cap. 33. fatetur se acquiescere in sonis, quos animant eloquia Dei, *cum suavi & artificiosa voce cantantur*, commendatque plurimum instituti hujus utilitatem, præsertim si cantetur *liquida, & convenientissima modulatione*, qualem ait placuisse Athanasio. Vide & sæpe laudatam ad Januarium Epistolam cap. 18. Adhæc perantiquam cantandi in Ecclesia consuetudinem ostendit Cardinalis Bona in Harmonia Psallent. Eccl. pag. 21. profanorum Scriptorum testimonio, Philonis, Plinii 11. Luciani. Philo quippe de Christianis Alexandrinis scribit: *Hymnos canunt in Dei laudem, vel recens a se factos, vel pridem ab aliquo priscorum vatam:* cujus testimonii meminit etiam Eusebius libro 11. H. E. cap. 17. Lucianus in Philopatreæ conviciatur Christianis *ad hymnos tota nocte decantandos vigilantibus.* C. Plinius in Epistola ad Trajanum Cæsarem, de qua Tertullianus cap. 2. Apologetici, Eusebius lib. 111. cap. 33. & Hieronymus in Chronico Eusebiano, refert de Christianis, *Quod soliti essent ante lucem convenire, carmenque Christo, quasi Deo, dicere secum invicem.* Si perlegas Vossii in Plinianam Epistolam Commentarium Tom. iv. pag. 59. videbis quam belle, annuente eodem hæretico, hinc firmetur vetus Romanæ Ecclesiæ consuetudo. Ex his vero liquet canticorum, hymnorumque usus firmari vctustate, utilitate, auctoritate.

Sed illud ægre ferunt hæretici nos in canticis, ceterisque ritibus, uti latina lingua, quam plebs Christiana non percipit. Quam inique indignantur, ostendendum ubi disputabitur de Scripturarum, sanctorum lectione. Ut interim compendio agamus: non una ratio Ecclesiam permovit, ut sola apud nos latina lingua administrarentur Sacramenta, & divina celebrentur officia. Prima ratio est Ecclesiæ unitas; quæ postulat ut ad Romanam Ecclesiam ceterarum Caput & Magistrum venientibus eadem forma, & communiori idiomate societatis symbola præbeantur: alioqui tot linguæ adhibendæ forent, quot sunt Ecclesiæ membra, quod profecto non communionis servaret vinculum, sed induceret potius confusionem Babelis. Altera ratio est, quod in vulgari lingua decursu temporis, incursione barbarorum, populorumque mixtione frequens occurrit mutatio: decet autem



autem in sacris ritibus a novitate, qua perturbari possunt simpliciores, quantum fieri potest abstineri. Rationem tertiam suppeditat Ecclesiæ praxis: quippe non solum Judæis, quando in captivitate vernaculæ linguæ obliiti sunt, Esdras legem proposuit antiquo, Hebræoque idiome; verum etiam Græci una semper in Liturgiis lingua usi sunt, quamvis ipsi pro regionum varietate variis dialectis loquantur, & in præsentia saltim popularis sermo plurimum discrepet a litterali: ac Latini pariter nunquam latinam linguam deseruerunt, irrumpentibus in Latium barbaris, & lingua Itala dolente, atque ad hanc tandem venustatem progressa. Tandem injustissima est hæreticorum expositio: quod enim inquit, latinam linguam a populo minime intelligi, non una ratione diluitur. Principio nec Syri, nec Aethiopes, nec Armeni, nec Aegyptii vulgari idiome utuntur suis in Liturgiis, ut demonstrat pag. 259. Casalius: ideoque omnes fere Ecclesias impetit prædicta accusatio: quin & urget calumniatores ipsos, siquidem Calvinista Gallus, si Germaniam petat, aut Angliam, frequentat propriæ sectæ conventus, quamvis ignota sibi & peregrina lingua ibidem peragantur officia. Supponunt deinde hæretici verba in Sacramentis excitare duntaxat fidem, ideoque ab omnibus esse percipienda: cum vim habeant consecrandi materiam; devotionem verò ac reverentiam excitare valeant, etiam si non percipiantur, ut docent Origenes hom. 20. in Iosue, Chrysostomus hom. 3. de Lazaro, & S. Pater contra Epistolam Fundam. cap. 4. Insuper Apostolus Corinthios æmulantes loqui diversis linguis Epistola prima cap. iv. commonet oriri potius ex linguis confusionem, neque professe loqui, nisi aliquis interpretetur. At in Ecclesia Romana sunt Pastores, & Parochi mysteria exponentes, prout sess. xxii. cap. 8. mandavit Synodus Tridentina, & absque illorum interpretamentis sacræ literæ vernacula lingua prolata adhuc ignaris essent obscurissimæ, pluribusque mysteria non assequentibus offendiculo: præstat ergo unam latinam linguam cum Sacerdotum explicatione adhibere, quam vernaculas multas cum privati spiritus præsumptione. Tandem aliud de publicis, aliud de privatis orationibus est asserendum. Si de privatis loquimur, utamur, si lubet, proprio unusquisque idiome: at si de publicis; utamur publico, ut loquamur ore, & spiritu Ecclesiæ, quam certo scimus nobiliori intentione dirigi, verbisque sublimioribus loqui, quàm possit excogitare, vel promere universorum hominum ingenium & eloquentia.

## III.

Quid verò dicendum de candelis, cereisque ad officiorum divinorum condecentiam accensis? Si ad vetus testamentum convertimur, lucernas in Sanctuario splendentes legimus Exodi xxv. 37. xxvii. 20. Levit. xxiv. 2. ac iiii. Regum vii. 49. Diximus autem supra in iis,

2b.Vh

Nn

quæ

quæ ad cultus divini majestatem pertinent, eandem quolibet tempore habendam esse rationem. Sed cereorum, lampadumque usum in Christi etiam Ecclesia vetustissimum ostendunt momenta quamplurima. Primò probant usum illum testimonia Patrum, quos inter Gregorius Nazianzenus Orat. iv. seu investiva 2. in Julian. pag. edit. More. 118. miratur ab illo reprehensos *cereorum ignes*. S. Hieronymus lib. 2. adversus Vigilantium, *Quicumque*, ait, *accendunt cereos, secundum fidem suam habent mercedem*: & infra, *Quando legendum est Evangelium, accenduntur luminaria jam sole rutilante; non utique ad fugandas tenebras, sed ad signum lætitiæ demonstrandum. Unde & Virgines illæ Evangelicæ semper habent accensas lampades suas. Et ad Apostolos dicitur, Sint lumbi vestri præcincti, & lucernæ ardentes in manibus vestris, &c.* Obiter nota non solum ad expellendas nocturnas tenebras, sed etiam in typum spiritualis luminis, ex mente Hieronymi accendi cereos, & ad hunc præsertim finem in Ecclesia adhiberi. Prudentius in Hymno de S. Laurentio cecinit,

*Auroque nocturnis sacris*

*Adflare fixos cereos.*

Agit de cereis afferri solitis ad reliquias sancti Stephani Evodius; Uzalensis, aut qui Evodii jussu edidit Commentarium in Append. Tom. vii. Operum S. P. Aug. Paulinus cereos, lampadesque describit Nat. 111. & ix. de S. Felice. Venantius etiam Fortunatus lib. iv. de Judæis conversis, scribens:

*Undique raptâ manu lux cerea provocat astra.*

Vide eundem ubi describit loculum Sancti Martini. Constat deinde id muneri antiquo more Clericis demandari, ut accendant Ecclesiæ cereos & luminaria; ut liquet ex Concilio Carthag. iv. celebrato anno 398. can. 6. *Ab Archidiacono accipiat ceroferarium cum cereo, ut scias se ad accendenda Ecclesiæ luminaria mancipari*: quod & habetur in Sacrament. Gregorii de Acolythi Ordinat. & apud Isidorum lib. vii. Orig. cap. 12. ut mittam Innocentium III. lib. 1. de Myst. Missæ cap. 3. Alcuinum, Rabanum, Rupertum, Gerardum Cameracensem, aliosque recentiores. Insuper nonne pro cereis candelabra preparata fuerunt? Priscum itaque cereorum usum commonstrat Pharus Adriani, de quo Baronius ad an. 795. num. 15. & Anastasius item in Adriano, & phari alii, de quibus Walafridus Strabo, & Leo Ostiensis apud Altaferam in notis ad Silvestrum; necnon candelabra connumerata ab Anast. item in Silvestro sect. 36. Prætermitto cereorum, ac luminarium usum in mortuorum vigiliis: quorum vetustatem comprobant Acta Proconsularia S. Cypr. apud Ruinartium pag. 190. Sepulchrales lucernæ cum Christi monogrammate apud Beliorium, & Begerum num. 22. & seqq. Tandem etiam miracula ritus istiusmodi confirmarunt; nam Narcissum ut sacræ lucernæ ardere signo

signo crucis aquam vertisse in olei pinguedinem refert Eusebius lib. vi. H. Ec., cap. 9. arfisse cereos in Pictavensi templo sine olei diminutione narrat Gregorius Turonensis in lib. de Glor. Mart. cap. 5. accensas lampades Romæ in Templo S. Agathæ lumine divinitus illato scribit M. Gregorius in 111. Dialog. cap. 30. At de iis plura Silvester Petrasancta Tom. 11. de Sacris Rit. cap. 8. & in libro de Benedict. eruditus Gretserus.

IV.

Nonnulla dicamus & de thuris usu . Exemplia ex veteri testamento deprompta occurrunt Exodi xxv. 1. xxx. 1. xl. 24. 1. Reg. 11. 27. & ex novo Lucæ 1. 8. Apocal. v 111. 5. quamquam eo non utamur tanquam ceremonia Judaica, sed quatenus orationis symbolum est, ex Ps. cxi. 2. earumque virtutum, quarum gratiâ *Christi bonus odor sumus*, ex 11. ad Corinth. 11. 15. Significatum præterea in thure, cultum Numinis, quod ultimo spectat religionis quilibet actus, vidimus lib. xxix. disputantes de Magis . Antiquum verò in Ecclesiâ usum thus adolendi pertractantes de rebus Liturgicis demonstrant ex canone 111. inter Apostolicos, ex Auctore Operis de Ecclesiastica Hierarch. cap. 3. ex Act. 111. Chalcedonensis Synodi, & monumentis aliis, quæ legi poterant apud Card. Bona lib. 1. cap. 25. & Menardum in Sacramentarium Gregorii pag. 195. Digna est, quæ non prætermittatur, sententia beati Ambrosii lib. 1. in Lucam num. 28. *Atque utinam nobis quoque adolentibus altaria, sacrificium deferentibus adsistat Angelus, immo præbeat se videndum*. En apertum sacrificii nostri, ritusque hujus testimonium . Addo perantiqua thymiamateria, seu thuribula, quæ monstrant antiquissimum esse thurificationis usum . Inter vasa argentea tertio sæculo a S. Urbano comparata extitisse cochleare ad ingerendum thuribulo incensum, ostendit ex opere anaglyptico in not. ad Anast. Tom. 2. pag. 179. Blanchinus . Laudatus Anastasius in Silvestro sect. 36. inter dona facta a Constantino Lateranensi Basilicæ recenset *Thymiamateria duo ex auro purissimo pensantia libras triginta : donum aromaticum ante altaria annis singulis libras 150. & sect. 38. scribit dono datum Basilicæ S. Petri Thymiamaterium ex auro purissimo cum gemmis undique ornatum* . Meminit thymiamaterii & Helgaudus in Roberto Francorum Rege . *Thuribulum argenteum* commemorat Leo Ostiensis lib. 1. cap. 58. De illo Alcuinus Poemate 111.

*Hic quoque thuribulum capitellis undique cinctum,  
Pendit de summo fumosa foramina pandens ;  
De quibus ambrosia spirabunt thura Sabæa,  
Quando Sacerdotes Missas offerre jubentur .*

Nec audiendi sunt hæretici opposcentes quod 1. Isaiæ 15. inquit Dominus, *Incensum abominatio est mihi* : aut quod ait Tertull. Apo-

log. xxx. mandasse nobis Deum orationem ac pudicitiam, *non grandæ thuris unius assis, non Arabicæ arboris lacrymas*. Siquidem per Isaiam testatur Dominus se oblationes & sacrificia aspernari, si manus offerentium *plena sint sanguine*, nec quiescant *perverse agere*; quemadmodum ibidem inquit Propheta, explicatque in Orat. 111. contra Julianum Nazianzenus. Tertullianus quoque de iis agit, qui conscientia non curant inquinamenta, ac sola oblatione externa se purgari confidunt, eodem ritu odorem Arabiæ incendentes, quo a Gentibus immolatur idolis. Frustra itaque nituntur hæretici subvertere hinc argutiunculis inveteratas Romanæ Ecclesiæ consuetudines.

## V.

Loquamur perpaucæ & de usu lustralis aquæ, de qua pag. 76. diximus quo sensu ab Hugone appelletur *Sacramentum*, & quo pacto vim habeat ad venialia peccata abluenda. Itaque dicta eo loci non repetam: nec dicam de lustrationibus veterum, aut Gentilium, aut Judæorum; cum non horum intuitu aqua aspergamur, nec insit nobis opinio hac asperzione castimoniam præstari: sed id exequamur, quoniam & interioris ablutionis est symbolum, & per Ecclesiæ preces sanctificata plurimum valet ad dæmonem expellendum, obtinendamque supernam benedictionem. Ergo asperionem istam institutionis esse Apostolicæ demonstrarunt viri doctissimi, Baronius ad annum Christi 132. num. 3. Bona de Reb. Liturg. lib. 1. cap. 20. Bellarm. lib. 111. de cultu SS. cap. 7. Blanchinus & Altaferra in notis ad Alex. Tom. 2. Anast. pag. 83. Atque id quidem tradit Auctor Confit. Apostolic. lib. v11. cap. 44. Idem nos asserimus, quoniam comperimus sacram hanc adspersionem semper obtinuisse, nec primam institutionem invenimus. Nam Alexandri inter Romanos Pontifices septimi decretum non omnes putant genuinum, amandantque nonnulli inter supposita ab Isidoro Mercatore; & qui illud recipiunt, ita exponunt, ut Alexander non primus auctor fuerit hujus ritus, sed confirmator: quamquam revera auctorem faciant Scriptor libri Pontificalis, & Walafridus Strabo de Rebus Eccles. cap. 29. At lustralis aquæ meminere Synesius epist. 121. apud McNardum pag. 95. in Sacramentarium Gregorii, canon 1v. Synodi Namnetensis, Theodoretus lib. v. cap. 21. Hist. Eccl. ubi etiam refert, a Marcello Apamenorum Episcopo sparsâ aquâ benedictâ fugatos dæmones. Hieronymus in Hilarione 2. p. Tomi 1v. pag. 80. narrat dissipatas ejusdem aquæ adspersione Etnici aurigæ præstigiis. Plura hujus generis mirabilia collegerunt citatis in locis Altaferra, Petrasancta, Gretserus. At Scriptorum nemo commemoravit ritum illum, tanquam sua ætate receptum, aut novum; ideoque ad nos ex Apostolorum traditione descendit. Mitto quæ de vasculis vitreis, & fœtilibus ad usum lustralis aquæ repertis in cæmeteriis, cryptisque referunt Durantes, & Casalius; nam ea per-

perpeſſi potius martyrii indicia eſſe, veriſimilius exiſtimavit Aringhus lib. 1. cap. xxvii. num. 13.

## VI.

Conſequitur, ut dicamus de Eulogiis, aut Pane benediſto. De iis complures aſſerunt decretum Miltiadis, qui præcepit, ut oblationes conſecratæ diſtribuerentur per Eccleſias, eas appellans *Fermentum*: ſed probabilius eſt hic ſacram Eucharistiā deſignari, *fermentum* dicta, non quod Eccleſia Romana conſecraret fermentatum, ut perſuaſum permultis; ſed quod fermenti præſtaret vicem, & eſiet quaſi vinculum unionis, ſive quod ad occultanda myſteria extraneo, & obſcuro vocabulo appellaretur. Verum de hoc fermento alibi. Conſueviſſe olim fideles in ſymbolum communionis invicem mittere Eulogias, conſtat ex xiv. canone Concilii Laodicensi, quo inhibetur, *ne ſancta, inſtar Eulogiarum, in feſto Paſchæ ad alias Parochias tranſmittantur*. Illas etiam Catechumenis diſtributas haud obſcure innuit Auguſtinus lib. 1. de Peccat. meritis & remiſ. cap. 26. S. Paulinum pro Eulogiis miſiſſe panem ſiliginæ, & *buccellatum* Sulpitio Severo, Alipio, & Romaniano, ejuſdem Paulini epiſtolæ 1. xxx. & xxxvi. commonſtrant. Hincmarus in Capitulis pro Presbyteris Parochiæ ſuæ conſcriptis an. 752. juſſit cap. 7. ut ſingulis Dominicis diebus poſt Miſſarum ſolemnia Eulogias acciperet quiſquis communicare non eſſet paratus. Græci etiamnum his utuntur. Adeas Sirmondum de Azyzo cap. 6. Albaſpinæum lib. 1. Obſervat. cap. 8. Cangium in Gloſſario, alioſque ibidem laudatos.

## VII.

Reſtat, ut breviter pertractemus de Benediſtionibus, quæ Hugo Viſtorinus inter Sacramentalia connumerat, ac primo de Benediſtione cinerum. Significari iis contritionem, humilitatem, pœnitentiam, dictum ſupra; quare ut Deum placarent, conſperſerunt ſe cinere David, Eſther, Judith, Ninivitæ. Hieremiæ hæc verba ſunt cap. vi. 26. *Filia populi mei accingere cilicio, & conſpergere cinere*. Excitatur & cinere mortis recordatio, unde ajebat Rupertus lib. 1v. de divinis Offic. cap. 10. *Cinere capita noſtra adſpergimus, ut noſtra nobis calamitas ad memoriam revocetur*. Cur ergo Hoſpinianus etiam in ſacros cineres indignetur, eique plaudant Refraſtarii ceteri, cauſam ignoramus. Queritur Hoſpinianus inductum hunc ritum a Gregorio Magno, qui jejunio Quadrageſimali addidit dies quatuor. Negat id Gretſerus lib. 2. de Bened. cap. 39. quod ſacrorum cinerum meminerit ante Gregorium Maximus Taurinenſis, qui floruit circa annum. 420. Honorio, & Theodoſio juniore imperantibus. Addat qui cum Gretſero ſentit, Sacramentarium Geſaſii editum a Thomaſio. Verum non ſunt hæc auctoritatis omnino exploratæ: nam Maximo ſermo- nes aliqui fuerunt ſuppoſiti; Thomaſius edidit Sacramentarium Geſaſii

Iasii quidem, sed exaratum paullo ante septingentesimum annum, ac Misa in capite jejunii fortassis adauctum. Faciliori ergo via occurrerimus Hospiniano, si cum Cajetano Merati Tom. 1. p. 2. pag. 879. in Gavantium dixerimus, antiquitus publicos pœnites conserpos cinere, & hanc pœnitentium consuetudinem postea in communem esse transactam. Confirmat hanc sententiam canon 63. Concilii Agathensis, qui jubet, ut initio Quadragesimæ recipiantur pœnites cinerum consperzione. Requiritur istiusmodi pœnitentiæ symbolum Tertullianus, Cyprianus, Ambrosius, quorum testimonia profert cap. 61. Casalius. Quid denique consequeretur absurdi, si ætate nostra ritus idem primum obtinisset?

## VIII.

Vetustior videtur esse benedictio palmarum, etsi Martene vicesimo capite de Antiq. Eccl. discipl. obtinuisse scribat post octavum duntaxat sæculum. Sed revincitur Martenius, ut docti viri observarunt, ex Sacramentario Gregorii ejusque perantiquo Codice Regine Suecorum, in quo hujus ceremoniæ fit mentio, necnon ex vetustissimo Calendario edito ab ipso Martenio v. vol. Anecd. ejusdemque sententiæ ante quintum sæculum exarato; in quo pag. 72. notatur *Dominica in Palmis*, & statio ad *S. Joban. in Lateranis*. Plura sane ejusdem ceremoniæ mysteria: quorum primum est commemoratio triumphalis ingressus Salvatoris nostri in urbem Jerosolymam enarrati capite xxi. Matth. alterum vero pacis, & gratiæ, ad quam Dominica Pascha præcedenti pœnites, & baptizandi festinabant; unde ea dies in Ordine Romano appellata est *Dominica indulgentiæ*, & apud Alcuinum, aliosque, *Pascha Competentium*. Illius triumphus palmæ signa sunt, hujus autem pacis rami olivarum. Isidorus lib. xvi. Etym. cap. 7. appellat oleam *pacis insigne*: hujusque arboris ramusculum columbam portasse ad arcam narratur cap. vii. 11. Geneseos. De civibus triumphantis Jerusalem legitur Apoc. vii. 9. *Et palma in manibus eorum*.

## IX.

Commemorat deinde Hugo Victorinus Cereum Paschalem, cuius benedicendi ritum a Zosimo anno Chr. 417. ad Pontificatum evectum fuisse statutum inquit Sigebertus in Chronico, Leo Ostiensis lib. i. Chr. Cassin. cap. 31. & qui de Ecclesiæ ritibus erudite scripserunt, Amalarius, Rupertus, & alii. Sed optime observatum a Baronio ad an. 418. num. 17. & postea a permultis benedictionem Cerei Paschalis esse in Ecclesia Zosimo antiquiorem. Anastasius quippe, & Liber Pontificalis tradunt constituisse Zosimum, ut Cereus, qui accendi tantum solebat in præcipuis Basilicis, benediceretur in singulis quoque Parochiis: quod non est novum instituere ritum, sed veterem ampliare. Necessum ergo non est ad vetustatem ritus hujus vindicandam recurrere ad suppositam Hieronymo Epistolam ad Præsidium, alterius sane, & for-

& fortassis non unius hominis fœtum, ac modo rejectam in Appendicem Tomi v. Incertum quoque an de hoc cereo, an de ceremonia alia pertractet Prudentius in hymno, qui inscribitur, *Ad accensum lucernæ*, & videtur oppositum suadere idem titulus, iudiciumque recentiorum. His fluxæ fidei monumentis omisiss, confugimus ad eas quæ diximus de Zosimo, & ad Benedictiones Cerei huius, quas Opusculo 9. & 10. profert Ennodius emortuus anno 521. & ad Hymnum de Paschali Cereo, quem hymnum v. sæculo conscripsit Drepanius Florus. Hi, alique pertractant de hoc ritu, tamquam in Ecclesiæ consuetudinem recepto ætate majorum. Nec receptus est nocturnorum officiorum necessitate, ut visum Tom. 1. pag. 275. Claudio de Vert: quoniam ad hunc finem ceteris quoque per annum solemnitatibus Cereus ille fuisset accensus, nec luceret tantum a Paschate ad Ascensionem. Jure Vertius propterea vapulat ab Auctore Gallo §. 27. & a sapientissimo Pontifice notatione in Sabbatum sanctum 393. Accenditur itaque Paschalis Cereus ob mysterium Resurrectionis Christi, quemadmodum legitur cap. 9. Concilii Toletani IV. in quinto Labbæanæ Collectionis volumine, necnon ob Evangelicæ fidei, & gratiæ splendorem: quæ omnia venuste exprimit decantatum a Diacono *Paschale Praconium*.

## X.

Proxime sequitur, ut differamus de cereis imaginibus, quas vulgo dicimus *Agnos Dei*; nam improbus Hospinianus inquit in Apophoretis derivasse a sigillariis, quæ sibi invicem mittebant Romani Saturnaliorum festo; & apostata Vergerus nares corrugat, quoniam Romanus Pontifex pronuntiât ceram cum agno impresso (inquit ille prope finem Tomi 1.) delere peccata, *ut sanguinem Christi*. Egit de Ritu ceras consecrandi etiam noster Panvinus: in quo refutant recentiorum doctissimi, quod ait invaluisse posteaquam defuit usus administrandi in Paschate solemnem baptismum, ideoque post nonum sæculum. At videtur mihi Panvinus asserere, quod *remansit* ritus iste sublato antiquiori, quo baptizatis dabatur *cera candidissima cum imagine Agni, confecta ex chrismate, oleo sancto*; cereis *Paschalibus*, & de solemniori ritu benedictionis pertractare, non de antiquiori institutione, quæ sæculo saltim v. vigeat. Ad id comprobandum protulit olim Vincentius Bonardus in Opusculo Itala lingua conscripto pag. 32. ceram sacram, sive *Agnus Dei*, repertam anno 1544. in sarcophago Mariæ Augustæ conjugis Honorii Imperator., quæ fatis cessit ante medium sæculum quintum. Utitur & hoc argumento BENEDICTUS XIV. in absolutissimo Opere de Canon. SS. Tom. IV. p. 2. cap. 20. num. 12. Hinc tamen hæreticus Munsterus in Cosmographia occasionem arripuit cereas has icunculas explodendi; quod adinventæ in eo sarcophago scriptum haberet in peripheria, Ma-

*Maria nostra omnium pulcherrima.* Gretserus lib. 2. de Bened. cap. 36. respondet Munsterum decipi, nec imaginem fuisse ceream, sed auream, quæ a Surio *Agnus Dei* dicta sit ob figuræ similitudinem. Corrueret, si ita foret, argumentum Bonardi, probatum a sapientissimo, eruditissimoque Pontifice; nisi ex Bonardo ipso, necnon ex Raynaldo ad annum 1544. num. 43. constaret auream laminam inscriptam quorundam Angelorum nominibus fuisse distinctam ab imagine cerea, & inscriptionem non ceræ, sed torqui incisam, *Maria nostra clementissima*, non, ut scribit Munsterus, *pulcherrima*. Refutatur hoc pacto hæreticus, & persistit argumentum nuper productum de istius ritus antiquitate: de quo plura eo loci Bonardus, & Orat. 1. Joannes Molanus. Porro imagines *agni* factæ ex cera pura & virginea symbolum sunt agni immaculati Christi Jesu absque ulla contagione ex Virgine procreati, quemadmodum ait in litteris ad Paschalem Ciconiam Ducem Venetiarum Romanus Pontifex Sixtus V. Pertractarunt de miraculis per *Agnos* istos patris Calalium, Gretserus, Petrasancta, Carolus Dufresne, præsertim vero IV. Vol. præcitato p. 1. cap. 5. Summus Pontifex BENEDICTUS, collectis undique Scriptorum testimoniis, egregiisque carminibus: nec aliquid ego subjiciam, memor veteris adagii, *In sylvam ne ligna feras*. Respondendum tantummodo Hospiniano, & Vergerio, idque brevissime. Baronii sententia est, *Christianos ex Bullis Ethnicorum, quas parvulis suis fascini avertendi causa appendebant, occasione sumpsisse ut recens baptizatos Bullis, sed sacris insignirent, superstitione in religionem mutata*. His ergo *agnis* abolita est juxta Baronium, non confirmata superstitio Gentilium amuleta bullasque gestantium: nec nobis tantum, sed primorum quoque sæculorum fidelibus perperam superstitionis crimen obijcitur. Vergerus autem splendidissime mentitur: *agnos* enim, de quibus sermo est, symbolum esse Christi, qui nos proprio redemit sanguine, recte nos cum Romano Pontifice asserimus: at *agnis* iisdem virtutem sanctificandi nequaquam tribuimus, non solum *meritoriam* illam, ac summam, quæ est in Christi morte, sed nec *instrumentalem*, quam propugnavimus in Sacramentis.

## XI.

Dicam tandem de benedictione candelarum in festo Purificationis B. M. Virginis; nam de ceremoniis reliquis ad calcem consequentium librorum est pertractandum. Repetunt quidam hunc ritum a Sergio Romano Pontifice, qui Cononi successit anno 687. sed Sergius tantum statuit, ut ea die haberentur Litanie: ante Sergium verò de hoc ritu ac festo sermonem instituerunt Sophronius Jerosolymitanus, Idelphonsus Toletanus, & Eligius Noviomenfis Episcopus. Quidam cum Baronio in Notis ad Martyr. Romanum hujus ceremoniæ auctorem faciunt Gelasium, qui successit Felici III. anno 492. ac ducuntur ea-

ra-



ratione quod Gelafius fustulerit Lupercalia , ut conflat ex erudito ipfius Commentario adverfus Andromachum tom. iv. Conciliorum. Et quidem Lupercalia facta Februario mense confentiunt omnes : immo ab his dici *Februarium* fcribit S. Pater Auguftinus lib. xviii. contra Fauftum cap. 5. eft enim *februare* idem , ac *luſtrare* , *expiare* , *purum reddere* : Lupercalia vero idem , ac luſtrationes , quibus pelle hirci , vel capræ diſſecta urbs luſtrabatur , lorifque inde factis cæſæ mulieres , opem ferente Junone , facilius concipere , & parere credebantur . Sed quamquam Baronio ſubſcribant cum Sandino in Hiſt. Fam. Sacræ viri alii litteratiſſimi : refellitur hæc ſententia ex quo Gelafius ſcribat quidem adverſus Lupercalia , ſed de Purificatione Virginis , candelarumque benediſtione nullam mentionem faciat : ex quo Lupercalia die Februarii decimaquinta celebrarentur : ex quo denique nihil ſit in ſacra ceremonia , de qua loquimur , reſpondens ritibus Lupercalium . Addit Menardus pag. 42. in Sacramentarium Gregorii , non a *Februis Lupercorum* dici Februarium , quemadmodum ait Auguſtinus ; ſed a *Februo* , id eſt , Plutone , in cujus cultum Ethnici accenſis ccreis luſtrabant urbem . Verum hac in re animadvertendum erat viro doctiſſimo Plutonen appellatum *Februum* , quatenus præſſe credebatur *februationibus* , ideoque poſſe cum Iſidoro repente nomen Februarii a *Februo* lib. v. Orig. cap. 32. conciliari Auguſtinum ſcribentem adverſus Fauſtum dici Februarium a *Februis ſaceris Lupercorum* . Quod ſi diſcrimen inter Iſidorum & Auguſtinum , eſt aliquod ; certe potior eſt Auguſtini ſententia : quam tradiderat Feſtus apud Roſinum lib. iv. Antiq. cap. 6. necnon Ovidius in ii. Faſtorum :

*Menſis ab his dictus , ſeſſa quia pelle Luperci*

*Omne ſolum luſtrant , idque piamentum habent .*

Non evertit ergo ſententiam Baronii , nec forte corroborat , menſis Februarii vocabulum . Tandem Menardus ipſe , noſter Angelus Rocca Tom. i. pag. 214. alique permulti , a quibus non diſſentit Summus Pontifex BENEDICTUS XIV. Not. In Feſtum Purific. 26. veriſimilius putant inſtitutam ceremoniam hanc adverſus luſtrationes *Amburbales* , eas ſcilicet , quibus Ethnici ut juſta perſolverent Diis Manibus urbem accenſis facibus februebant . His ſubſcribo , primum , quia hæ luſtrationes , quamvis non haberent præſtitutum diem , quod opponit Sandinus , fiebant tamen initio menſis , & Lupercalia , ut diximus , die tantum xv. Deinde quia apparet inter ſacram hanc ceremoniam , & luſtrationes illas *amburbales* oppoſitio , quæ non dignoſcitur in februis Lupercorum . Præterea quia id affirmant Rabanus lib. 2. de Inſtit. Clericorum cap. 33. & Innocentius III. ſerm. 1. de Purif. Rabanus quidem ſcribit inſtitutam hanc ceremoniam adverſus luſtrationes Februo ſacras , & Innocentius adverſus cultum Cereris ,

To. VI.

O o

quæ

## 290 De Theologicis Disciplinis Lib. Trigesimus.

quæ fertur accensis facibus quæsisse raptam a Plutone Proserpinam : sed adverti paullo supra Plutonem, Februum, Deumque lustrationum esse unum eundemque, ut observat Rahanus ipse, traditque Servius in primum Georgicorum. Sed de ritus institutione satis dixi. Candelas accensas ferimus, ut sicut Simeon accepit in ulnis suis puerum Jesum, agnovitque superna illustratione latentem in eo majestatem; ita nos cereum gestantes, carnis fragilis ac labentis symbolum, supernum gratiæ lumen imploremus; atque ut imitemur prudentes Virgines, & lampade castitatis accensa advenienti Sponso occurramus. Attulit priorem hujus ritus rationem Ivo Carnotensis serm. de Purif. & Rupertus lib. 111. de Div. Off. cap. 25. alteram cap. 81. Joannes Beletus. Explicui tricesimum librum. A Puero, quem præsentavit in templo impetret mihi Deipara sapientiæ lumen flammamque caritatis, ut digne & caste prosequar, absolvamque libros proximos de SACRAMENTIS,





# DE THEOLOGICIS DISCIPLINIS

## LIBER TRIGESIMUS PRIMUS

### *In quo pertractatur de Sacramento* BAPTISMI.



**F**ELIX SACRAMENTUM AQUÆ NOSTRÆ; agebat Tertullianus de Baptismo adversus Quintillam pertractaturus. Et revera ab ipsa rerum creatarum origine prænuntiata fuere Sacramenti hujus præstantia, necessitas, effectus, utilitas: nec elementum est ullum, quod amplioribus divinorum beneficiorum symbolis fuerit cumulatam. Principio enim temporum Spiritus Dei *in aurigæ modum* ferebatur super aquas, & nascentem mundum *in figura baptismatis* parturiebat, inquit scribens ad Oceanum Hieronymus. Cæli deinde ab aquis fortiti vocabulim; aves, quæ ex aqua egressæ de terra levantur in aerem; fons è Paradiso in quatuor flumina erumpens, & amaras aquas mortuasque vivificans; purgatus mundus diluvio, expulsoque alite teterrimo volitans super aquas columba, orbique pacem annuntians; Naaman aquarum fluctibus mundatus a lepra; Bersabee civitas juramenti, regnumque Salomonis, quod nomen sumpsit a fontibus; inventa ad puteum Rebecca; Rachel propter aquas Supplantatoris osculo salutata; Præcursor Domini juxta Salim, fontesque aquarum præparans plebem Domino; Salvator lavacro suo sanctificans fluentia Jordanis; patratum ab illo primum signum ex aquis ad nuptias; Samaritana ad puteum

vocata; colloquium cum Nicodemo de nova *ex aqua & Spiritu sancto* nativitate; latus Christi percussum lancea, & baptismi mysteria fundens: hæc, inquam, aliaque innumera commostrant satis huiusce Sacramenti virtutem, confirmantque brevem illam, gravissimamque laudationem, *Felix Sacramentum Aqua nostræ*. De hoc itaque Sacramento, quo renascimur, abluimur, divini Spiritus participatione donamur, & de antiqua peccati propagine in novam generationem transimus, facti nova creatura novumque figmentum, aggredior Theologicam dissertationem argumenti dignitate, rerumque amplitudine perutilem, ac per jucundam: in qua exornanda quid operis studique infumperim, non ego fastidiosè recenscam, facile tamen dignoscet lector: quem illam non modo patienti, sed etiam libenti animo excepturum fore confido.

## C A P U T I.

*De Baptismatis vocabulo, significationibus, definitione, atque origine.*

**P**Rimum ergo Sacramentorum novæ Legis est *Baptismus*: cuius etymologiam, ac significationem nominis primum investigabimus: atque ut pervulgatis disquisitionibus non solum pertenuis eruditionis nostræ lacinias asfluere, verum etiam prætermisissas a Scholasticis quæstiones curemus intexere, expendemus etiam scitum Socini contendentis baptismi nihil significari præter institutionem atque doctrinam. Videbimus præterea an Baptismi origo, quatenus est Sacramentum, quo Ethnici in novam religionem, Ecclesiamque deducuntur, derivatum sit ex Hebræorum statutis, sive num etiam apud Judæos profelyti mystico quodam lavacro initiarentur, ut post Maimonidem tradidere complures Hebraicarum antiquitatum Scrutatores; inter quos Joseph de Voisin de Lege Divina cap. 6. pag. 23. Lightfootus in Harmon. Evang. pag. 447. & in Horis Hebr. 265. & lib. 111. de Ingen. moderat. cap. 2. omnigena eruditione excultus Laminus Britanius.

Itaque *Baptisma* Græcum vocabulum est a βαπτίζω, quod idem est, ac *mergere*, signatque medium aliquid inter ἐπιπλεόνω, *leviter innatare*, ac δύνω, *peffum ire*, sive ad exitium sui fundum petere, ut ex Vett. Glossis ad calcem Cyrilli tradunt Henricus Stephanus, Vulcanius, & Vossius. Ampla ergo, & lata significatione *baptizare* idem notat, ac *lavare*; & quemadmodum apud Hebræos טָבַל *mergere* frequenter accipitur pro קָוַר *lavare*, ita apud Græcos τὸ βαπτίζω idem significat, ac *abluere*. Occurrunt exempla Judith x. 1. 7. *Baptizabat*

zabat se in fonte aquæ . 1v. Reg. v. 14. Descendit, & lavit (ἰβατισμὸν) in Jordane septiet . Lucæ x1. 38. Quare non baptizatus esset antequam prandium . Nec aliter accipiendum est verbum βαπτίζω, ubi in sacris literis fit mentio ablutionum legalium, ac baptismatis, idest, lotionis calicium, urceorum, aramentorum, lectorum, Marci vii. 4. & ad Hebr. ix. 10. Hinc Pharisei, qui crebris utebantur mersionibus, sectam, aut hæresim constituebant, quam in Dialogo cum Tryphone pag. 307. appellat Justinus θαλασσίαν βαπτισμὸν, Pharisaeorum Baptistarum . Ab his Epiphanius h. xvii. distinguit hæresim ἡμεροβαπτισμὸν, Hemerobaptistarum, qui quotidie lavabant, ac sese aquis abluebant, ut se ab omni crimine purgarent . De his etiam in Constit. Apost. lib. iv. cap. 6. pag. 333. ἡμεροβαπτισαὶ οἱ τὸν καθ' ἡμέραν ἡμῖς, ἰὲν μὴ βαπτίζονται, ἐν ἰσχύει, ἀλλὰ καὶ τὰς κλῖνας, καὶ τοὺς τῆρας ἡπὶ κρατῆρας, καὶ πετρίδα, καὶ καθίσματα ἰὲν μὴ καθάρονται ὕδατι, ἰδὼν χροῖται . Hemerobaptista, qui quotidie, nisi abluant se, non comedunt, imo & lectis, catinis, crateribus, poculis, & sedilibus, nisi aqua purgaverint, nullatenus utuntur . Ceterum liquet ex præcitato cap. vii. Marci etiam Phariseos omnes has lotiones adhibuisse, imo nonnullos, ut puriores viderentur, sæpius, non singulis tantum diebus, sed etiam noctibus : quod suis in Marcum Comment. ex Iosepho notavit Grotius .

A significatione verbi βαπτίζω, quatenus idem est ac mergere ; promanarunt tres aliæ significationes, plurimum affligi, pœnitere, martyrio affici : unde apud veteres baptismus appellantur calamitas, pœnitentia, martyrium, ducta inde comparatione, quod sicuti corpus aqua, ita animus mergitur pœnarum gurgite ; aut quemadmodum in baptisinate aquis, ita in pœnitentia lacrymis, atque in martyrio sanguine perfundimur . De afflictionum & martyrii baptismate inquit Dominus Lucæ xii. 50. Baptismo autem habeo baptizari, idest, pati, affligi, omnique suppliciorum genere affici : unde in hunc locum Theophylactus pag. 419. Βάπτισμα δὲ τὸ θάνατον κατὰ λέξιν, Baptisma autem mortem suam dixit . Et Marci x. 38. ait Christus : Potestis bibere calicem quem ego bibo, aut baptismο, quo ego baptizor, baptizari ? quo item in loco omnes teterrimam trucemque mortem intelligunt . Calamitates sibi ab hostibus invidisque illatas comparat aquarum gurgitibus sanctus David Psal. xvi. 17. & lxxvi. 2. Hunc postremum locum Augustinus n. 3. egregie exponit de Christi acerbissimis cruciatibus . Præsertim verb martyrium baptismati comparatur ob similitudinem, quæ est inter aquam & sanguinem, & ob virtutem, quam etiam baptismus habet remittendi peccata . De comparatione inter baptismum aquæ, & baptismum sanguinis agit in libro de Ecclesiasticis Dogmatibus cap. 61. in Appendice Tom. vii. Operum Augustini, Gennadius Massiliensis : de virtute autem baptismatis,

matis, ac martyrii nos etiam hoc in libro. Audiatur tantum hic Prosper Epigrammate 87. Tom. vii. Biblioth. PP. pag. 95.

*Fraudati non sunt sacro baptismo Christi*

*Fons quibus ipsa sui sanguinis unda fuit.*

*Et quicquid sacri fert mystica forma lavacri,*

*Id totum implevit gloria martyrii.*

Pœnitentia pariter a Nazianzeno Orat. xxxix. five, in sancta *Lumina*, pag. 643. appellatur, τὸ ἅγιον βάπτισμα, lacrymarum baptisma, quoniam & hæc, si vehemens sit, & conjuncta flagrantissimæ caritati, eluit peccati sordes. Quare de Magdalena cecinit lib. iv. vers. 79. Sedulius presbyter:

*Ex polluta diu, modicum purgata recessit*

*Per gemitum, propriique lavans in gurgite fletus,*

*Munda suis lacrymis redit, & deterfa capillis.*

Adhibetur præterea Baptismi vocabulum ad significandam remissionem peccati, donationem Spiritus sancti; divinorumque donorum affluentiam: quo sensu non tantum dicimur mundari aqua, verum etiam baptizari Spiritu sancto, & igni, Act. i. 5. & Matth. iii. 11. Comparatur autem virtus Spiritus sancti igni, ob vim purgandi efficacissimam, veterumque noxarum consumptricem, nec non ob figuram linguarum ignearum, quibus in die Pentecostes Apostolis illapsus est. Vide vaticinium Isaie iv. 4. Chrysostomum Hom. xi. in Matth. pag. edit. Commel. 103. Augustinum sem. lxxi. de verbis Evang. num. 19. alias xi. de Verbis Dom. cap. 12. nec non Barthium lib. v. Adversariorum cap. 2. Præclara est etiam similitudo Panis, qui aqua & igne perficitur, quam protulit Dux Catholicus Sebastianus, dum Gothorum Rex Gensericus eundem sollicitaret, ut unam secum religionem iniret. *Quemadmodum, inquit, hic panis, ut ad tantum honorem ascenderet aqua & ignis beneficio consecutus est; sic ego aqua sancti baptismati, & igne Spiritus sancti ad decus hominis Christiani perveni. Quod si effeceris, ut panis hic contritus, iterumque mollitus, atque recoctus melior evadat, tum ipse faciam quod hortaris.* Vide Sigonium prope finem libri xii. de Occidentali Imp. pag. edit. Francf. 208.

Præter has verò significationes, præcipue baptismus significat Sacramentum regenerationis per aquam, sive lavacrum, quo a peccatis abluihur, & renovamur spiritu: de quo Christus Joannis iii. 5. ait, *Nisi quis renatus fuerit ex aqua, & Spiritu sancto, &c.* ac Paulus ad Titum iii. 5. *Salvos nos fecit per lavacrum regenerationis, & renovationis Spiritus sancti.* Hujus autem baptismatis, cujus typum prætulit diluvium Noeticum, in quo perierunt peccatores, ac mare rubrum, per quod pertransiit populus Israel, id nos docentibus Apostolorum principibus, Petro i. Epist. iii. 21. & Paulo

Paulo 1. ad Corinth. x. 2. , tanta est dignitas & excellentia , ut illum præclarissimis titulis Scriptura , Patresque insignierint . Nam quod in baptismo fidem sanctæ Trinitatis profiteamur , consepeliatur Christo , mundemur a culpa , atque spiritu vitæ innovemur ; hunc Baptismum appellamus *Sacramentum fidei* , *sepulturam veteris hominis cum Christo in mortem* , *ablutionem peccatorum* ; quæ nomina passim occurrunt in Paulinis Epistolis : necnon *Illuminationem* , *unctionem Spiritus sancti* , *indumentum incorruptionis* , *sigillum* , & *arabam hereditatis* ; quorum nominum rationem paucis complexus est oratione in *sanctum lavacrum* , Tom. 1. pag. 638. Nazianzenus scribens : Καλῆται ὡσαύτῃ Χρῆσις ὁ τῷτῃ δότηρ , πολλὰς καὶ διαφόρους ἐνέμασι . Δότερ μὲν ὡς μὴδὲν ἀπορροῦσι καὶ οὐκ ἐκλύουσιν . Χάρισμα δὲ , ὡς καὶ ἐκλύουσιν . Βάπτισμα δὲ , ὡς συνδαπτῶμεν τῷ ὕδατι τῆς ἁμαρτίας . Χρῆσμα δὲ , ὡς , ἐνὶ τοῦ βασιλείου , ταῦτα γὰρ ἢ τὰ χαρίσματα . φωτισμὸς δὲ , ὡς λαμπρότης . ἐνδύμα δὲ , ὡς ἀίματος κάλυμμα . λυγρὸν δὲ , ὡς ἐκλυσις . σφραγὶς δὲ , ὡς συντήρησις , καὶ τῆς διαποτίσεως σπουδή . Videlicet , *Appellatur autem , quemadmodum Christus ejus dator , multis diversisque nominibus . Dicitur donum , quia iis qui nihil prius contulerunt datur : Gratia , quia etiam debentibus : Baptismus , quia peccatum in aqua sepelitur : Unctio , quia sacer & regius ; hujusmodi enim erant quæ ungebantur : Illuminatio , quia splendor , & claritas : Indumentum , quia ignominia nostræ velamen est : Lavacrum , quia abluit ; Sigillum , quia conservatio est , ac donationis significatio .*

Ex quo Baptismus dicatur ob protestationem fidei in Christum *Sacramentum fidei* , & ob charismata Spiritus sancti *Illuminatio* ; ausi sunt Socinus , & Ostorodius comminisci nomine *baptismi* in sacris literis significari institutionem doctrinamque Evangelicam , ita , ut baptisma Joannis nihil fuerit aliud , quam ipsius prædicatio ; & præceptum Domini Matt. xxv. 11. 19. *Euntes ergo docete omnes gentes , baptizantes* , &c. nihil sonet aliud , quàm , *Ite prædicate , docete , imbuite fide* : hac enim interpretatione præmissa facilius viam sibi sterni prævidit Socinus ad negandam baptismi necessitatem , atque ad asserendum , quod *baptizari aqua* idem sit , ac *fidem Christi palam testari* , quod vel usitata baptismatis ceremonia fieri potest , vel alia qualicumque ratione . Ne itaque hunc errorem , unde promanant pestifera alia dogmata , absque infixo *thema* prætermittamus ; hoc in loco demonstrandum est turpiter Socinum alucinari , dum absurdo , ac plane inusitato sensu unum idemque esse contendit doctrinam , atque baptismum . Ac primum cedo , qui profanorum , sacrorumque Scriptorum acceperit *baptismi* vocabulum in alio sensu , quàm ad immersionem , intinctionem , ablutionemque signandam , ac *baptistarium* , quàm ad commonstrandum tinctorium in cellis frigidariis , aut caldariis constructum , vel locum illum , in quo regenerationis lava-

lavacrum administratur. Cum vero nos passim Socinus objurget, propterea quod interdum spreto literalis sensu ex Patrum testimoniis requirimus Scripturarum intelligentiam; cur modo ipse cudat e proprio cerebro tam absurdam significationem vocabulorum, communi planissimaque rejecta? Deinde si baptismus Joannis idem erat, ac illius doctrina; quomodo Jerosolymitæ *baptizabantur ab illo in Jordanis flumine*? Marci 1. 5. Quomodo idem Joannes ait ib. 8. *Ego baptizavi vos aqua*? Præterea Joannem ipsum baptizasse *in Aennon, juxta Salim, quia aquæ multæ erant illic, & baptizabantur*, legitur Joan. cap. 111. 23. Quamvis ergo Joannes prædicaret penitentiam, & hæc etiam culpam abluat, habeatque cum exteriori lavacro quamdam *analogiam*; baptismum tamen Joannis non fuisse ritum ac ceremoniam ab ejus prædicatione distinctam nemo dicet, qui audacter negare velit aquam esse aquam, Jordanem Jordanem, rivos rivos, idest, qui insanus non sit, ac delirus.

Idem evincitur ex persona Christi, qui Matth. 111. 13. Marci 1. 9. Lucæ 111. 21. *baptizatus est a Joanne*: neque dici potest eo sensu *baptizatus*, quasi imbutus doctrina, non tinctus aqua; enimvero Marcus eo loci inquit, *Baptizatus est a Joanne in Jordane, & statim ascendens de aqua, &c.* ac Matthæus notat principio Joannem obtulisse ne Dominum tingeret, mirabundus, ac dicens, *Ego a te debeo baptizari, & tu venis ad me*? sed tamen ad Christi responsionem acquievisse: quare non Baptista Dominum, sed Dominus Baptistam docuit. Quis enim dixerit Unigenitum, *qui est in sinu Patris*, a famulo rudimenta accepisse? Baptismus ergo non est doctrina; quoniam etiam Salvator, qui doctrinam habet a Patre, Joan. vii. 16. baptismum accepit a servo. Præterea dicitur quidem Christus baptizasse, Joannis 111. 22. sed non per se id, communiter saltim, peregit, scribente eodem Evangelista proximo cap. 1v. 2. *Quamquam Jesus non baptizaret, sed discipuli ejus*; quo demonstratum est Apostolos fuisse ministros Christi, & hunc longe præstantiorem Joanne, qui propria manu tingebat, ut in libro de Baptismo animadvertit Tertullianus. At Jesum omnes proprio ore docuisse testatur historia Evangeliorum universa: ac ideo *baptizare, ac docere* diversum sonant; cum per se non baptizet, qui per se docet. Ad hæc nisi baptismus aliquid sit a doctrina distinctum, cum Dominus ait discipulis Mat. xxvi. 11. 19. *Euntes ergo docete omnes gentes baptizantes eos*, & Marci xvi. 16. *Qui crediderit, & baptizatus fuerit*, non rhetoricam locutionem adhibuisset, ut inquit Socinus, sed insulam, ac puerilen. ταυτολογίαν dixisset enim, *docete, & docete; qui crediderit, & crediderit*. Ex iisdem quoque locis constat gentes prius docendas, postea credituras, deinde tingendas baptismate; & consequenter doctrina præcedens fidem non est baptismus, qui fidem subsequitur.

Con-



Confirmatur eadem veritas ex doctrina, gestisque Apostolorum. Etenim Paulus 1. ad Corinth. 1. 16. 17. ait, *Non enim misi me Christus baptizare, sed evangelizare*; & cum plurimos docuerit, affirmat se baptizasse tantum Crispum, Cajum, & Stephanæ domum: quod sane falsum esset, si inter baptizare & evangelizare nullum interesset discrimen. In Actis quoque Apostolicis 11. 38. dictum a Petro quibusdam jam credentibus, & compunctis corde, *Baptizetur unusquisque vestrum*: & VII. 12. legitur, *Cam ergo credidissent Philippo evangelizanti de regno Dei, in nomine Jesu Christi baptizabantur viri, ac mulieres*. En aperte baptismus fidem, ideoque Evangelii doctrinam ac prædicationem subsequitur. Eodem capite versu 36. Eunuchus, cui Philippus evangelizaverat Jesum, cum venissent ad quamdam aquam, ait: *Ecce aqua, quid prohibet me baptizari*? His forte reponet Socinus in Baptismo aquæ profiteri Neophytos fidem Christi. Verissimum id est; symbolum enim recitant, ipsaque baptismi forma continet sanctæ Trinitatis invocationem: verum nec baptizare est in Christi fide aliquem instituere, nec baptizari est fidem utnunque profiteri, sed aqua tingi, vel mergi in remissionem peccatorum.

Hinc Socinianorum permulti tenent præcipi revera in sacris literis baptismum verum ac proprium, & hunc retinendum esse, & perpetuo in Ecclesia servandum. Slichtingius enim in 1. ad Corinth. ad ea verba, *Aut in nomine Pauli baptizati estis*, inquit: *Docemur etiam hoc Apostoli loco, Baptismi ritum in Ecclesia retinendum esse, quo sciant omnes in cujus nomen initiati sint*. Wolchellius lib. vi. de vera Rel. cap. 6. ait utique baptismum esse publicum Christianæ professionis symbolum, sed, *per intuitionem in aquam*: & Ludovicus Wolzogenius in cap. xxv. 111. Matth. v. 19. scribit, *Baptismum esse medium, quo Apostoli uti debebant ad faciendos discipulos: inter Judæos quoque fuisse receptum, ut qui ex Paganismo in Judaicam religionem transibant, aqua baptizarentur, quo signo profitebantur, quod sicut sordes corporis aqua abluuntur, ita ipsi quoque conversi ad Deum velint omnem idololatriam abjicere: hunc ritum præcepto Christi servandum in omnibus fidem in ipsum susipientibus: Baptismi nomen per synecdochē partis prædicationem quidem Evangelii completi, sed signare etiam ritum illum a Christo præscriptum, & qui prædicationem Evangelii consequi debet*. Hæc Wolzogenius: in quibus licet illud absurdissimum sit, quod cum Socino asserit baptismum aquæ esse nudam ceremoniam, qua palam fidem Christi testamur, agnoscit tamen ceremoniam ipsam ab Evangelica doctrina distinctam, & in Ecclesia Christi institutione servandam.

At opponit Socinus: Apostolus ad Galatas 111. 27. ait: *Quicunque in Christo baptizati estis, Christum indaiistis*. Ad Hebr. vi. 20. VI.

1. 2. *Quapropter intermittentes inchoationis Christi sermonem*; ad perfectiora feramur, non rursus jacentes fundamentum penitentiae ab operibus mortuis, & fidei ad Deum, baptismatum doctrinæ, impositionis manuum, &c. Petrus etiam Epist. 1. cap. 111. 21. *Quod vos*, inquit, *nunc similis forma salvos facit baptisma*, non carnis depositio sordium, sed conscientiae bonæ interrogatio in Deum per resurrectionem Jesu Christi. Ex quibus verbis perspicuum est Petrum baptismatis nomine, non aquæ baptismum intellexisse, sed aliud omnino baptismi genus, doctrinam scilicet Evangelicam.

Verum nescio quid sibi velit hîc testimonii Socinus. Nam prioris loci apertissima est expositio, eos scilicet, qui baptizantur, exuere veterem hominem, & induere novum, *qui secundum Deum creatus est in iustitia & sanctitate veritatis*, ut ait idem Apostolus ad Ephes. 1v. 24. quare citata verba commonstrant salutarem effectum baptismi, idest, abolitionem peccati, & spiritus renovationem. Christum enim *induere*, juxta Paulinam phrasim, est Christo sanctitate & iustitia conformem fieri, ad Rom. x111. 14. Recte Chrysostomus Tom. 2. in Paulum pag. 1006. *Etenim si Christus est filius Dei, tu verò illum induisti, in illum per similitudinem transformatus es*, &c. ei γὰρ γενὴς εἶς τοῦ θεοῦ, εὐὶ δὲ ἄνθρωπος ἐκείνου & εἶς, ἀπὸς αὐτοῦ ἀπογεννηθείς, &c. Hinc nos recte de Sacramentorum efficacia sentientes, baptismum supra cum Patribus appellavimus, *Indumentum iustitiæ, & ignominiae velamen*. In Epistola autem ad Hebræos non ait Apostolus baptismum esse doctrinam, sed non opus esse, ut jam Christiana fide imbutis tradat catechumenorum rudimenta, inter quæ est doctrina baptismatum. Quod autem *baptismatum* plurali numero dictum sit, parum refert; nec est cur Socinus oggerat baptismum aquæ esse unum; nam & una est doctrina, quam ipse putat esse baptismum; quamquam vel cum Theodoretò dicimus Apostolum *baptismata* dixisse numero multitudinis, quia plures baptismi gratiam consequuntur; vel quia non solum aquæ baptismus datur, sed etiam sanguinis, & flaminis; vel quia cum exteriori merfione conjuncta est interior animæ purgatio, vel ob alias causas, de quibus estius in Paulum. Petrus denique, ut dictum est præcedenti libro cap. 19. ait nos salvos fieri per baptismum, non quatenus corpus tangit, sed quatenus virtutem habet ablundi peccatum, removelque animi bene sibi conscii trepidationem; vel quatenus baptizati fide, & abrenunciatione Sata-næ, de qua in baptismate interrogantur, disponuntur ad gratiam, æternamque salutem adipiscuntur. Audiamus, quæso, Jonam Slichtingium Socinianum in hunc locum, apud Antonium Van-Dale in Hist. Baptismi pag. 371. *Utitur autem Apostolus interrogationis voce, qua alludit ad interrogationem in baptismo fieri solitam qua baptizati interrogantur an peccatis omnibus renuntiarent*. Et infra:

Con-

*Conscientia bona est bene sibi conscire, nullius sibi mali conscium esse. Hæc in baptizatis erat. Nam præteritorum omnium criminum reatu per baptismum erant soluti, eodem & baptisimi Sacramento semes ad omnem in posterum justitiam, ac vitæ puritatem obstrinxerant. Postremo missis exteriorum interpretationibus, bonæ conscientie interrogatio, de qua Petrus, est contractus ille, quem baptizati cum Deo ineunt, & quem sincero corde ad salutem capeßendam servare debent; habent enim Græci pro interrogatione, ἐρώτηση, stipulationem: & præclare quadrat in hunc locum illud Ambrosii de Myst. cap. 11. n. 5. Repete quid interrogatus sis, recognosce quid responderis. Renuntiasti Diabolo & operibus ejus, mundo & luxuria ejus ac voluptatibus. Tenetur vox tua, non in tumultu mortuorum, sed in libro viventium.*

Hæc postrema responsio expeditior est ad evitandam illam fiduciam hæreticorum, quam Slichtingius citato loco appellat Græco vocabulo *ῥαπισμὸς*, *parrhesiam*, idest, libertatem loquendi ex rei evidentia fluentem, & ob quam hæretici alii putant baptizatum quemque teneri ad credendum sibi remissa esse peccata, ea firmitudine, quæ credimus articulos fidei; autumantes ob hanc specialem fiduciam, quam vocant *fidem divinarum promissionum*, dici baptismum a Patribus *sigillum fidei*, sive *fidei obsignationem*. Verùm, præterquamquod dictum alibi fidem, per quam justificamur, non esse confidentiam hanc a Novatoribus temere, impudenterque jactatam; etiam Catholici appellant Baptismum cum Tridentinis Patribus sess. vi. cap. 7. *Sacramentum fidei, sine qua nulla unquam contingit justificatio*: sed docent fidem istam, quæ justificationis exordium est, illam esse, quæ concipitur ex auditu, & qua credimus vera esse quæ divinitus revelata atque promissa sunt. Atque hoc sensu inquit Tertullianus de Pœnit. cap. 6. *Lavacrum istud obsignatio est fidei*; quem locum perperam herodoxi obsecant; cum Tertullianus ibidem fidem istam cum salutari timore conjungat, subjiciens, *Audientis insinctio est metus integer*. Et infra: *Itaque audientes optare intinctionem, non præsumere oportet. Qui enim optat, honorat; qui præsumit, superbit. In illo verecundia, in isto petulantia apparet. Illa satagit, hic negligit. Ille mereri capit, at hic ut debitum sibi repromittit. Ille sumit, hic invadit. Quem censeas digniorem, nisi emendatiorem, quem emendatiorem, nisi timidiorem?* At contra specialis illa hæreticorum fides nequit Deum timere tanquam judicem, ut fatentur Monheimius, alique hæretici solum timorem, quo Deus honoratur ut Pater, non quo timetur tanquam peccatorum vindex, probantes, a nobis alibi refutati, & in Opere de hoc argumento cap. v. a Joanne Hesselio Lovanienti. Basilius quoque vocat baptismum *sigillum fidei*; sed statim addit, hanc fidem esse confessionem Deitatis; ait enim:

τὸ βάπτισμα σφραγὶς τῆς πίστεως, ἢ δὲ πίστις ζωῆς ἀνατάξις πνεύματος γὰρ  
 οὗτος ἐστὶν ἵνα τὸ βάπτισμα καταργησάτω. τὸ δὲ βάπτισμα ἑμὸν ἐστὶ  
 κατὰ τὴν κυρίαν παράδοσιν, ἐκ ὕδατος καὶ οἴνου, ἢ ὕδατος καὶ πνεύματος, Tom.  
 2. pag. 84. idest, *Baptismus est sigillum fidei, fides verò Deitatis con-*  
*fessio. Nam recedere prius oportet, ac postea baptismate obsignari. Ba-*  
*ptismus verò noster est secundum Domini traditionem, in nomine Pa-*  
*tris, & Filii, & Spiritus sancti.* Idem tradunt antiquiores Patres;  
 inter quos Martyr Iustinus ait illos duci ad aquam & regenerari, οὗτοι  
 ἐν πηδαρίῳ καὶ πνεύματι ἀναδύναντα τὰ ὕδατα καὶ ὁ ἑμὸν διδασκόμενα καὶ λόγους ἰσχυ-  
 ῶς δυνάμεν ὑπογράψαι: *Quicumque persuasi fuerint & crediderint ve-*  
*ra esse quæ a nobis docentur ac pradicantur.* Immo ex Actis Apostoli-  
 cis cap. 11. 41. ubi legitur baptizatos, qui Petro evangelizanti cre-  
 diderunt, *Qui ergo receperunt sermonem ejus baptizati sunt,* & cap.  
 vii. 37. ubi Eunuchus petenti baptismum ait Philippus, *Si credis ex*  
*toto corde,* & ille respondit, *Credo filium Dei esse Jesum Christum;*  
 necnon ex præmissis baptismati catechesibus, symbolique formulis,  
 de quibus loquitur universa Ecclesiasticarum rerum historia, constat  
 non alia ratione baptismum dictum *Sacramentum fidei*, nisi ob Tri-  
 nitatis & Incarnationis Dominicæ professionem. Consentientem ha-  
 beo Hugonem Grotium, qui in cap. 28. Matth. pag. 289. scribit: *Et*  
*tales quidem fuere fidei interrogationes, aut primis temporibus, aut*  
*proximè primis: quarum respectu βάπτισμα Basilio & aliis dicitur*  
*σφραγὶς τῆς πίστεως.* Fidei obsignatio Tertulliano de *Penitentia*. Facel-  
 sant ergo Novatores alii, qui Tertulliani & Basilii auctoritate con-  
 tendunt baptismum esse *Sacramentum fidei* illius *specialis*, in cerebro  
 hæreticorum consistere.

Ex his omnibus constat rejiciendas esse traditas ab hæreticis de-  
 finitiones baptismatis, siue dixeris cum Calvino, *Baptismum esse*  
*signum initiationis, quo cooptamur in Ecclesia societatem,* siue cum  
 Melancthone, *signum quo Deus nobiscum agit, & recipit in gra-*  
*tiam,* siue cum Episcopio, & Wolchelio, *publicum Christianæ pro-*  
*fessionis signum & tesseram:* quæ definitiones omnes eo collineant,  
 ut vel negent Sacramenti novæ legis efficientiam, vel inherentem  
 gratiam & spiritalem regenerationem, vel ipsius baptismatis necessita-  
 tem; adcoque satis superque ex primo, & decimono capite præce-  
 dentis libri latens in hisce flosculis venenum deprehenditur. Nos ita-  
 que Baptismum definiendum existimamus cum Catechismo Romano  
 P. 11. cap. 2. §. *Baptismus est Sacramentum regenerationis per aquam,*  
*in verbo:* quæ definitio cum baptismi proprietatem, tum materiam  
 formamque demonstrat. Etenim baptismum *Sacramentum* esse, &  
 spiritualis gratiæ signum sensibile, quæ ratio unicuique Sacramento  
 inest, nobiscum consentiunt hæretici. Esse autem *Sacramentum re-*  
*generationis,* idest, quo conscripti cum Christo in mortem, rena-  
 scimur,

scimur, & innovamur, constat ex verbis Christi Joan. 111. 5. & Pauli ad Tit. superius recitatis, nec non ex Augustino, qui baptismum appellat *Sacramentum regenerationis spiritualis, & salutis aeternae*, Tract. xv. in Joan. lib. 1. de Peccat. merit. & remis. cap. 24. in 11. adversus Cresconium cap. 13. & in vi. contra Julian. cap. 2. & 4. *Aquam* verb esse baptismatis *materiam* constat ex sacris literis, & Patribus, ex dictis contra Socinum; & in sequentibus confirmabitur. *In verbo* pariter sitam Sacramenti *formam* diximus praecedenti libro cap. 9. quod singillatim de baptismo affirmat Apostolus ad Ephes. v. 26. & Augustinus Tract. lxxx. in Joan. num. 3. Verba, quae baptismi constituunt *formam*, sunt sanctae Trinitatis invocatio: unde nonnulli id etiam exprimunt in definitione baptismi, perspicuitatis gratia; sed non opus est, ut singula in rerum definitionibus accuratissime describantur, modo innotescat ipsarum rerum, quae definiuntur, natura. Tenenda est igitur allata baptismatis definitio.

Restat, ut de origine baptismi nonnulla dicantur. Profanarum quoque Gentium antiquam fuisse consuetudinem, ut initiandi toto corpore abluerentur, contendit Grotius in Matth. pag. 286. ex Libanio, Lampridio, ex Comœdia Eupolidis, ex Horatii Scholiaste, necnon ex Clemente Alexandrino, ac Tertulliano. Certum est per lavacrum initiatos Isidis ac Mithrae cultores; tinctosque Ethnicos ludis Apollinaribus, & Pelusiis. Addit plura Spencerus Volumine 2. de legibus Hebr. disert. 3. sect. 1. cap. 2. ubi etiam probare nititur illustrationes Judaicas à Gentium ritibus fuisse traductas. Atque ex Hebraeorum more derivasse baptismum Christianorum opinantur praecitati haeretici, Grotius, Wolzogenius, Lightfootus, haut dissentientibus aliquibus Catholicorum.

Momenta horum sunt, quod etiam Hebraeis baptismus fuerit symbolum initiationis, quo Ethnici in Judæorum Ecclesiam adfisciebantur; idque probant primò, ex quo Jacob Patriarcha Gen. xxxv. priusquam Bethel conscenderet, convocata domo sua ait: *Abjicite Deos alienos, qui in medio vestri sunt, & mundamini, ac mutate vestimenta vestra*: quo in loco Abenezra verbum והטהרו, & *mundamini*, interpretatur de ablutione corporis. Afferunt deinde testimonium Maimonidis, qui lib. Issure Biah, parcc 13. scribit triplici ritu Israelitas in foedus intrasse, circumcisione, baptismo, & oblatione: circumcisionis usum fuisse in Aegypto, Exod. xii. 48. Baptismum in deserto ante datam legem, Exodi xix. 10. oblationem postea, Exodi xxiv. 5. addit pro masculis necessariam fuisse cum baptismo circumcisionem, pro feminis verb baptismum tantum, ac sacrificium: neminem factum proselytum, receptumque in foedus, nisi circumcissus esset, & baptizatus; circumcissum verb, & non baptizatum, ex proselytorum expunctum numero. Producent & Thalmud Babyloni-  
cum

cum in lib. Jevamoth, ubi legitur baptizandos duntaxat Ethnicos; nec tingendum filium Ethnicæ mulieris, si gravida facta fuerit jam profelyta. Denique animadvertunt Phariseos ita interrogasse Baptistam, *Quid ergo baptizas, si tu non es Christus, neque Elias, neque Propheta?* Joan. 1. 25. non quærentes de usu baptismatis, sed de auctoritate. Cum itaque apud Judæos consuetum fuerit, ut Gentes merfione initiarentur; ex Hebræorum ritibus, inquirunt, promanavit Christianorum baptismus.

Ut dicam de his quod sentio, negari non potest etiam apud idololatrias fuisse in usu baptismata, ac lustrationes, de quibus Plutarchus in Iside, Virgilius Aeneid. iv. Tacitus Annalium xv. 44. Scacchus noster in Myrotheciis p. 2. cap. 75. aliiq; a Joanne Spencero collecti, At cum Gentiles non solum corpora abluerent, verum etiam templa, simulacra, mactandas pecudes, vestes, idque non semel, sed frequentissime, & quotiescunque sacra instituerent; Gentilium lustrationes non erant eo sensu initiationes, quasi his profanæ religioni nomen darent; sed purificationes quædam superstitiosis quandoque peractæ ritibus, quibus arbitrabantur se digniores esse, qui ad aras accederent, & sacris operarentur. Atque hinc Tibullus lib. 11. Eleg. 1. cecinit,

*Costa placent superis; pura cum veste venite;*

*Et manibus puris sumite fontis aquam:*

& Livius lib. xli. *Omnis præfatio sacrarum, inquit, eos, qui non sunt puri manus, sacris arceat.* Fuerunt ergo apud Ethnicos baptismata ac merfiones ritus potius, & ceremoniæ, quàm initiationes mysteriorum.

Apud Judæos verò per circumcisionem, non per baptismum, Ethnici in fœdus deducebantur; vereorque, ne oppositum hæretici quidam commenti sint, ut inde facilius per suadeant, baptismum necessarium quidem esse tanquam symbolum professionis Christianæ venientibus à cœtu Gentilium, non autem procreatis à Christianis parentibus; quemadmodum necessarius erat apud Judæos, sed non ex Hebræorum gente, aut e profelytis, generatis: quare opinionem illam, quæ & baptismi necessitatem evertit, & hunc in sola fidel professione constituit, opportune in rem suam amplexatus est cum heterodoxis aliis callidus Wolzogenius. At Judæos sola circumcisione, non baptismo, deductos in fœdus, liquet ex eo, quod nullibi legatur fuisse olim lustrationem *signum fœderis*; ut de præcisione præputii xv. 11. Genesis. Constat præterea apud Judæos lustrationes non fuisse singulare quoddam initiationis symbolum, sed ritum, ac ceremoniam communem, qua utebantur Pontifices, Levitæ, profani, semivivus, leprosi, aliiq; omnes, vel ob contractam immunditiam, vel ob reverentiam sacrarum. Non est autem mysterium initiationis.

tiationis id , quod alium ab initiatione , & communem , frequentissimumque habet usum . Addo sententiam Rabbiorum esse in Gemara tit. Jabimoth cap. 4. *enim , qui circumcissus fuerit , nec baptizatus , tanquam profelytum habendum esse , quoniam circumcisi quidem , at non baptizati fuerunt Patres* : idem dicit Rab. Eliczer ab ipsomet Lightfooto laudatus in Horis Hebr. pag. 266. Addo etiam inverisimile non esse , quod baptismus superadditus fuerit a quibusdam Hebræis circumcisioni , ut discriminentur a Samaritanis , ut ex Raf Alphes demonstrat Wilhelmus Schichardus apud Anton. Vandale , Hist. Baptisim. pag. 342. Josephus insuper lib. xi. 11. Antiq. cap. 9. aliàs 17. narrans quomodo in expeditione Hircani Idumæorum gens adscita , fuerit inter Judæos , ait admisisse circumcisionem , ac spondidisse se in ceteris servaturam Hebræorum leges , nulla facta mentione baptismatis : *Illi verò , inquit , patriæ amore tum circumcisionem admi-ferunt , tum vitam in ceteris similiter ac Judæi agere subsinuerunt* . Rursus lustrationes Judæorum institutas , non ad initiationem & in- symbolum fœderis , sed *ad emundationem carnis* , & purgationem labis , quæ vel contactu cadaverum , vel aliis modis , etiam ab initiatis contrahitur , haud obscure innuit Apostolus ad Hebr. ix. 13. Postremo circumcisio , quæ signum fœderis est , non solum necessaria erat Judæis genere , sed etiam emptitiis , alienigenis , ac profelytis omnibus . Si ergo ex traditione Rabbiorum baptismus ortus ex Judæis , aut ex profelytis necessarius non erat ; nec erat signum fœderis , ac mysterium initiationis .

Ex his soluta manent argumenta Lightfooti , aliorumque . Ad primum enim dicimus præcepisse Jacobum domui suæ , ut mundaretur , non quod ablutio esset initiationis Sacramentum , sed ob reverentiam loci , ad quem debebat ascendere , sive *ob pollutionem occisorum , quæ contractaverat* , ut inquit Rabbi Samuel , & Jonathan . Ad alterum dicimus aut Maimonidem errare , aut intelligendum de ritu superaddito baptismati a Judæis , ut discriminentur ab aliis gentibus , quæ pariter circumcidebantur . Ad tertium liquet ex dictis , Germanam ineptiis , oppositisque sententiis scaterere , nec alia de causa . Ethnicos baptizatos a Judæis , quàm ob immunditiei expiationem . Ad ultimum constat eos , qui confluebant ad baptismum Joannis , fuisse jam initiatos , & in Ecclesiam Judæorum adscitos ; ideoque non erat baptismus ipse initiationis mysterium , sed ceremonialis purgatio : de qua mirari non poterant pharisæi , qui optime noverant a Judæis lustrationes quamsepius adhiberi , & qui cas præ ceteris repetebant .

Consequitur tandem ex dictis , Baptismum Christianorum nihil habere commune , præter aquæ clementum , cum mersionibus Judæorum , eo quod apud nos Baptismus est Sacramentum , quo cooptamur

ptamur in Christi Ecclesiam : unus est , non multiplex ; eoque non tantum tinguntur Gentcs , quæ ex cultu idolorum convertuntur ad Christum , sed etiam filii baptizatorum . Præterea nec in baptismo nostro præscriptum est tempus ; nec aqua conspersa cineribus vitulæ , qualem in asperisionibus suis adhibuisse Judæos constat ex libro Num. xix. 9. Aqua denique Christiani baptismatis nullam vim habet , nisi consecrata sit verbo : consecrata autem non ad emundationem carnis ex sui institutione valet , sed ad spiritus innovationem . Falluntur ergo , qui ex Hebræorum lustrationibus baptismum nostrum derivant .

## C A P U T II.

### *De Baptismo Joannis.*

**P**osteaquam dixi de lustrationibus Gentium & purificationibus Hebræorum , & ostendi ab iis plurimum discrepare Baptismum Christi ; pertractandum mihi est de lavacro Joannis , & inquirendum an saltem istud sit cum Christiano baptismo confundendum . Joannis ergo baptismum hereticorum quidam nimis deprimunt , alii nimium extollunt , reliqui perversè explicant . Deprimunt Sociniani , ac præsertim in Institutione Germ. cap. 30. Orosiodius , nullum in eo divinum mandatum agnoscens : quod nos etiam sentire , falso scribit disput. viii. de Baptismo Gerardus Vossius . Nimium verbè baptismum Joannis attollunt , qui ei tribuunt eandem , ac baptismo Christi efficaciam , ex eo , ut opinor , capite , quod putent Sacramenta nihil esse aliud , quàm Dei oppignorationem , & sigilla doctrinæ , nullumque excepta fide agnoscant instrumentum justitiæ : idque de mersione Joannis sentiunt Melanchthon contra Anabaptistas , Calvinus in iv. Instit. xv. 17. Brentius in iii. Lucæ , Magdeburgenses Centur. i. lib. i. cap. 4. Theodorus Beza in Acta , xix. 4. Vossius præcitata disput. & alii . Perversè denique de Baptismo Joannis loquuntur , qui cum illud a baptismo Christi distinguant , nullam tamen differentię rationem tradunt , præter accidentariam temporis , personarum , mersionis , ac fidei , nulla facta effectus mentione . Gerit se in hunc modum Joannes Lightfootus in cap. 3. Matth. ubi ait , Baptismo Joannis nullum ab una religione in aliam traductum , Judæosque illo imbutos doctrina Evangelica , ut fide in Messiam , & penitentia , ad Christum recipiendum essent paratiores ; cum Apostoli Judæos baptizantes , Christi , qui advenerat , fidem promoverent , Gentibus verò etiam Trinitatem annuntiarent : quæ omnia , utut speciosa videantur , baptismi nostri differentiam , quæ in vi regenerationis sita est , silentio prætereunt alto . Vindicanda ergo mihi est baptisimi Joannis dignitas , demon-



demonstrandum illius a baptismo Christi discrimen, istiusque discriminis potissima ratio assignanda.

PROP. I. Baptismus Joannis cœlestis fuit, idest, institutus divino instinctu, & Moisaicis etiam meritionibus excellentior.

Id primum non obscure indicat historia Evangelica; Matthæi quippe xxi. 25. Christus interrogavit principes Sacerdotum: *Baptismus Joannis unde erat? è cœlo, an ex hominibus?* Ut si respondissent, *De cœlo*, quod veritas postulabat, cur ergo, Dominus intulisset, ei non credidistis, qui de me tam apertum, præclarumque perhibuit testimonium? Idque optimè versuti homines sunt assecuti, tacite ad Christi interrogationem submurmurantes, *Si dixerimus è cœlo, dicet nobis: Quare ergo non credidistis illi?* Cœlestis ergo erat, Domini testimonio, Joannis tinctio. II. Lucas 11. 2. testatur tunc Joannem venisse prædicando baptismum in regionem Jordanis, cum super illum factum est verbum Domini: quibus verbis, inquit Theophylactus, innuitur illum non temere, neque citra vocationem ad testificandum de Christo profectum, sed divino motum spiritu, pag. 323. *ὡς ἀπὸ κατὰ θεὸν μαρτυροῦσαι τοῦ Χριστοῦ, ἀλλὰ διὰ τοῦ καίματος πνεύματος.* III. Idem Joannes sic loquitur apud cognominem Evangelistam, 1. 33. *Qui misit me baptizare in aqua*, satis commoustrans se divino mandato baptizandi munus obisse.

Fuisse autem baptismum Joannis præstantiorem purificationibus Legalibus probat egregie Cyrillus lib. 1. in Joannem cap. 1. p. 157. ex quo cum veteres ceremoniæ Christum prænuntiarent, & meritiones legis gratiam promitterent futuro quidem, sed incompto tempore conferendam; baptismus Joannis Christo proximus erat, docebatque præparationem quamdam, & rudimentum perfectionis. Animadvertit eo loci Doctor eximius contentionem ortam inter discipulos Joannis cum Judæis nonnullis, de qua Joan. 11. 25, in hoc versatam, quod illi baptismum suspicientes magistri sui, purificationes legales oppugnare viderentur. II. Sanctus Basilii lib. de Baptismo Tom. 4. pag. 647. his verbis baptismum Joannis præfert purificationibus legis: *Baptismus itaque per Moysen traditus, primum peccatorum differentiam observavit; non enim quævis peccata remissionis gratiam assequabantur. Deinde verò & differentia sacrificia exigebat. Purificationem studiosè petebat. Imparum & maculatum aliquando a reliquis separabat: dierum & horarum observantiam statuebat; & tunc baptismus illis, a quibus accipiebatur, quasi quadam purificationis erat obsequatio. Joannis verò baptismus multis modis excelluit. Nullam enim prorsus faciebat peccatorum differentiam: nullum exigebat sacrificiorum discrimen. Purificationem studiosè non efflagitabat, nec dierum aut horarum habebat observantiam, nec ulla prorsus facta dilatione, per gratiam Dei & Christi ipsius, simul ac accesserat quis, & peccata sua, quantu-*

tacunque & qualiacunque fuissent, confessus fuerat, in Jordanis flumine baptizabatur, & confessim peccatorum remissionem accipiebat. At de hoc loco, quo abutuntur hæretici hunc baptismum æquiparantes baptismi Christi, dicam iterum: nam hæc tantum ad consutationem Orosiodii.

PROP. II. Multiplici titulo Joannis baptisma discrepabat a baptismo Redemptoris.

Primum autem rationem discriminis quidam in eo statuunt, quod revera baptismus Joannis non fuerit Sacramentum, nisi quatenus *Sacramenti* nomen ampla significatione accipitur pro signo quolibet mystico: in qua sententia est S. Thomas 3. p. q. 38. art. 1. Nitiur verò hæc opinio duplici momento, quorum unum est, Sacramentum esse signum permanens, cum baptismus Joannis exiguo temporis perduraverit intervallo: alterum, vi sua mundasse duntaxat corpus, ut S. Thomas inquit art. proximo ad 1. Sed dilutæ videntur hæc rationes: prior namque è temporis diuturnitate petita, omnino Sacramento extranea est: altera probat, tantum, baptismi Joannis fuisse, ut erant veteres ritus, cægenum, infirmumque elementum. Nec inverisimile est beatum Thomam appellasse baptismum, illum *Sacramentale* potius, quam *Sacramentum*, habita ratione effectus, qui erat *parare viam Domino*, & ad baptismum Christi disponere, non spectata ratione generica Sacramentorum. Quare posse illud baptismi dici Sacramentum, non repugnant Thomistæ duo hujus ævi percelebres, Auctor de Re Sacram. lib. 2. q. v. cap. 1. §. 4. & Thomas Vincentius Monelia differt. de Annis Christi cap. v. num. 13. Verum, si *Sacramentum* dicas, si *Sacramentale*, in hoc differt a baptismo Christi; quod *sicut legis vetera Sacramenta, præcursorio quodam, & præfiguratorio fungebatur officio*, ut inquit S. Pater de unico baptismo contra Petil. cap. 7. num. 9. ac præterea, quod Joannes baptismi ipsum accepit *certain dispensationis gratia, non diu mansurum, sed quantum satis esset ad parandam viam Domino*, ut idem Augustinus scribit contra Donatistas lib. v. cap. 9. num. 10. Ex quo autem baptismi Joannis, haud diu perseveraverit, *quod non fecit Dominus, ne hoc unum, quo ipse baptizat, indigere præcedenti altero videretur*, ut insequenti num. 11. ait Oppugnator Donatistarum, consequtur etiam baptismum Joannis propriè ad hanc Legem minime pertinuisse, sed fuisse medium quoddam inter novam, & veterem, unius finem, alteriusque initia commonstrans.

Petitur alia differentie ratio a formula baptismi: baptismus quippe Joannis verborum expertus fuit, inquiunt Ludovicus Habert de Baptismo cap. 1. q. 9. & Cardinalis Gotti dub. 1. §. 2. post Bellarminum lib. 1. de Baptismo cap. 20. Reponit Vossius cit. disp. num. 8. verisimiliorem esse sententiam eorum, qui dicunt Joannem usum hac, simili.

similive forma, *Baptizo te in nomine venturi Messia*, & hanc esse sententiam Ambrosii lib. 1. de Spir. S. cap. 2. Hieronymi in cap. 3. Ioculis, Scholasticorum quorundam, & quæ colligitur ex Act. xix. 4. At fallitur Vossius. Nam Ambrosius ibidem num. 41. eo sensu docet Joannem baptizasse *in advenientis Jesu nomine*, quatenus *Christum prædicabat*; negatque eos, qui ignorabant esse Spiritum sanctum, sed baptismo Joannis tincti fuerant, de quibus Act. xix. 2. *baptismum in Christi nomine* accepisse, cum non credidissent in Spiritum Christi, quem prædicabat Baptista. Idem scribit Hieronymus in Joelem Tom. 111. pag. 1359. ubi de fide in Spiritum sanctum instituit sermonem. Ex Actis verò colliges tantum, Joannem baptizasse baptismum poenitentiae, *in eum, qui venturus esset post ipsum, ut crederent*: quæ verba ad Joannis prædicationem spectant, non ad formulam elementum aquæ determinantem. Salva ergo Marsilii, Paludani, Alensis, aliorumque sententia, subscribo Suaresio Tom. 2. in 3. p. disp. 25. Lorino in Acta pag. 773. aliisque negantibus Joannem usum in baptismo verborum *forma*. Ducor autem momentis hujusmodi. Primum Scriptura de hac formula silet, ac Patres, ut diximus, in alio loquuntur sensu: nec est, cur opponas cum laudato Suaresio Augustinum in libro quæst. novi Testam. q. 29. spurio, & jure in appendicem 2. p. Tom. 111. ablegato. Deinde in baptismo collato Jesu adhibitam formulam negant Paludanus ipse, ac Marsilius, immo & Gerardus Vossius; tametsi nescio quam aliam formulam excogitaverit in 1v. dist. 2. Palacius. Præterea necessum non erat verbo consecrari materiam nullius in ordine ad gratiam producendam efficientiæ. Addunt quidam, etiam tincto Domino baptismum Joannis perdurasse, quod inferunt ex Joannis 1v. 2. At puto eo loci sermonem esse de baptismo Christi, primò quia S. Pater lib. v. de Baptismo num. 11. scribit, *Dominus*, postquam Joannis baptismate tinctus est, *ultra illud perseverare non sinit*: adhuc, quia apud Joannem cap. 4. legitur Jesum baptizasse, *quamquam non baptizaret ipse, sed discipuli ejus*; quod recte Augustinus Tract. xv. in Joannem num. 3. ita conciliat, *Baptizabat enim, quia ipse mundabat; non baptizabat, quia non ipse tingebat*. At baptismus datus discipulorum Christi ministerio, & cui ipse Christus, ut Augustinus ait, *præbebat adjutorium maiestatis*, regenerationis Sacramentum est. Imbelle est itaque argumentum postremum, petitum ex duratione baptismi Joannis; qui sane si perstitisset baptizato Domino, debebat mutari ea formula, *Baptizo te in nomine venturi Messia*. Ceterum hac etiam *forma* concessa baptismati Præcursoris, adhuc consequitur ex ea maximum a baptismo Christi discrimen. Enimverò lavacrum administratum *in nomine Messia venturi* pollicebatur gratiam, non eam conferebat; datum verò *in nomine Christi advenientis*, proximam redemptionem;

nem; non consummatam perfectamque præferebat: hi autem, qui baptizantur *in Christi nomine*, quem jam mortuum, sepultumque, ac redivivum firmissime credunt, completæ redemptionis fructum, ac præsentem regenerationis percipiunt gratiam. Tandem non in Christi nomine tantum, sed sub sanctæ Trinitatis invocatione Dominicum baptismum confertur; mentiturque splendidissime Voslius, scribens etiam Joannem *in nomine Trinitatis* baptizasse. Si id enim verum est, quomodo nonnulli tincti Joannis baptismate ignorabant Spiritum Sanctum, Act. xix. 2? Præclare Hieronymus in Joëlem loco cit. *In affibus Apostolorum, qui baptizati erant baptismate Joannis in eum qui venturus erat, hoc est, in nomine Domini Jesu: quia responderunt Paulo interroganti, Sed ne si sit quidem Spiritus sanctus novimus, iterum baptizantur, imo verum baptismum accipiunt: quia sine Spiritu sancto, & mysterio Trinitatis, quicquid in unam, aut alteram personam accipitur, imperfectum est.* Sive ergo baptismus Joannis fuerit in aqua, & non in verbo, sive non fuerit in verbo *fidei*, idest, cum sanctæ Trinitatis invocatione; a baptismate Christi plurimum discrepavit, fuitque in hujus comparatione admodum imperfectus.

Probo denique differentiarum rationes, quas attulit Lightfootus; non enim sum talis ingenii, qui erumpentem ex ore impiorum veritatem, tanquam margaritam in stercore, audeam pedibus conculcare. Joannis baptismus sese circa Jordanis regionem continuit, ac neminem ex falsa religione deduxit in veram: at baptismus Christi etiam ad Gentes pertransiit, easque de regione umbræ mortis in lucem Evangelicæ veritatis pertraxit. Habuit etiam Præcursoris lavacrum speciem pristinæ severitatis, cum præscriberet immersionem illam, quam Judæorum quidam tollere studuerunt gratiæ feminarum Galilæarum; intinctio autem Christi id genus immersionis necessario non exigit. In his homini hæretico assentior. In eo etiam, assero præstare baptismum Domini baptismum Joannis, quod hic tingeret propriis manibus, ille ministerio discipulorum; unus adultos, ac poenitentia expiandos, alter & parvulos originaria tantum labe pollutos: ad Christi demum baptismum accessit multitudo populorum frequentior, ita, ut ea res zelotypiæ causa fuerit discipulis Joannis, Joan. 111. 26. atque invidentiæ Phariseis Joann. iv. 1. Insuper & istud, quod discipuli Joannis turbati sint, & Pharisei populos confluentes ad baptismum Christi invidis, lividisque suspexerint oculis, argumento est baptismum Domini esse baptismate famuli longè præstantiorem; ut Tract. in Joannem x111. num. 8. vidit Augustinus, & in Comment. pag. 175. Alexandriæ antistes Cyrillus.

PROP. III. In hoc etiam baptismus Christi præstat baptismum Joannis, quod ille majorem habeat efficaciam, valeatque ad ablu-

nem

nem culpæ; quum iste vi sua conferret legalem tantum, corporeamque mundiciam, remissionem verò peccatorum nonnisi ratione pœnitentiæ, fideique suscipientium.

Hanc utriusque baptismatis differentiam, quam negant hæretici, ne cogantur Sacramento Christi tribuere virtutem producendi gratiam, & ejurare male feriatum de Justificatione systema, probant argumenta prorsus invicta. I. Joannes Matth. 111. 11. inquit: *Ego quidem baptizo vos aqua in pœnitentiam: qui autem post me venturus est, fortior me est, cujus non sum dignus calcamenta portare: ipse vos baptizabit in Spiritu sancto, & igni.* Hoc in loco Joannes discrimen istud statuit inter suum, & Christi baptismum, quod suus corpus tantum ablueret, & ad pœnitentiam excitaret: baptismus autem Christi pertingat animum, eumque gratia Spiritus sancti perfundat. Respondent hæretici baptismum Christi in Spiritu sancto fuisse cum in die Pentecostes apparuerunt in Apostolis dispersitæ linguæ tanquam ignis, sedisque Spiritus sanctus supra singulos eorum, Aët. 11. 3. Id verò probant ex quo Matthæus ibi, necnon Lucas 111. 16. *Spiritum* simul, & *ignem* commemorant: & ex quo Dominus priusquam cœlum ascenderet, ita Aët. 1. 5. Apostolos allocutus est, *Joannes quidem baptizavit aqua, vos autem baptizabimini Spiritu sancto, non post multos hos dies*: idem ait Petrus Aët. x1. 16. Verum hæc responsio nullatenus vim præmissæ argumentationis infringit. Nam primò fatemur Joannem etiam ad effusionem Spiritus in linguis igneis intendisse animum; negamus de baptismo aquæ non esse pariter accipiendum, cum utrumque innuat dicens, *In Spiritu sancto, & igni.* Deinde si contendas *Spiritum sanctum & ignem* ad unam effusionem Spiritus pertinere, ut sensus sit, *Ille baptizabit vos Spiritu sancto in linguis ignis elapso*, quod non ignoro contendere in hunc locum Hugonem Grotium: igitur etiam Joannis 111. 5. ea verba, *Nisi quis renatus fueris ex aqua & Spiritu sancto*, in unum baptismum quadrabunt; & quemadmodum non sejungis energiam Spiritus a linguis igneis, ita separare non debes energiam ipsam a baptismo aquæ. Rursus de hoc etiam baptismo tradidere Patres, quod sit *in Spiritu sancto, & igni*, quatenus sicut aqua lebeti infusa & ad ignem apposita comburendi vim induit, ita, inquit Cyrillus in Joannem pag. 147. *διὰ τὴν τὴν πνευματικὴν ἰσχυρίαν τὸ αἰδμενὸν ὕδωρ ὡς διὰ τοῦ ἁγίου ἀνευχεμένου δυνάμει. Per Spiritus efficacitatem sensibilis aqua ad divinam quamdam & ineffabilem vim transformatur*: quod pariter tradiderunt Theodorus Heracleotes, Macarius, alique apud Corderium in Catena Volum. 2. pag. 80. Insuper Joannis scopus est humiliter significare suam a Christo discrepantiam: quam comprobabat ex comparatione utriusque baptismatis, quasi dicat, quemadmodum in aqua, qua ego baptizo, est sola exterior ablutio, & in aqua baptismi-

ptismatis Christi latet Spiritus sancti energia : ita in me nuda humanitas est, & præcursoris officium ; in illo autem subest vestimento carnis majestas divinitatis, & Reparatoris auctoritas ; ideoque *proficitur baptismatis simplicitatem sui*, inquit Chrysostomus Hom. xi. in Matth. pag. 104. *nec illud quicquam amplius habere demonstrat, quam ut eos ad pœnitentiam duceret : non enim dicit in aqua remissionis, sed pœnitentiæ : tum demum ponit Christi baptismum ineffabilem donorum liberalitate cumulatum : τὸ ὕδατος τὸ πᾶσι δωρεῖται τὸ ἄντι δὲ τοῦ, ὃ δίδωκεν οἱ τοῦτον πλὴν ἔχει τὸ πρὸς μετέπειτα αὐτοῖς ὄφελος. ἢ γὰρ ἴστω. ἢ τὸ ὑδατος ὁρίσας, ἀλλὰ μεταρτίας. τίδωκεν ὃ τὸ ἄντι, τὸ τὰς ἀρετὰς δίδωκεν γάρ. Præterea, cum eo loci Joannes commonstret Messie dignitatem, dum ait hunc baptizaturum in Spiritu sancto, & igni ; videtur ignis nomine designare Messie auctoritatem, qua in futuro seculo probaturus est uniuscujusque opus, & nominæ Spiritus sancti tum energiam baptismalis aquæ, tum alia gratiarum charismata : ideoque imperitè contendunt hæretici ex vocabulo ignis locutum Joannem, tantummodo de linguis igneis super Apostolos dispersitis : id verò animadvertit ingeniose citato loco Macarius, mihiq̃ue videtur quadrare subiectis verbis, Cujus ventilabrum in manu sua : & permundabit aream suam : & congregabit triticum suum in borreum, paleas autem comburet igni inextinguibili. Quare possunt verba Joannis ad varia baptismatum genera accommodari, nullo tamen excluso, non baptismi aquæ, non effusionis Spiritus, non postremæ conflagrationis. Tandem Joannis 111. 5. illis verbis, Nisi quis renatus fuerit ex aqua & Spiritu sancto, aquæ vis regenerativa tribuitur, quam sane habere nequit absque Spiritus sancti virtute : unde Augustinus epist. 23. ad Bonifac. nunc 98. num. 2. de regeneratione scribit : Aqua igitur exhibens forinsecus Sacramentum gratiæ, & Spiritus operans intrinsecus beneficium gratiæ, solvens vinculum culpæ, reconcilians bonum naturæ, regenerans hominem in uno Christo, ex uno Adam generatum. Et Ammonius, Catena Græc. in Joan. pag. 89. Aqua quidem corpus emundat, sed animam inaspectabilem Spiritus sanctificat. Et aqua matricis loco sumitur, Spiritus verò vice Dei effectoris. Aqua illa, quæ sensu percipitur, ad divinam quamdam virtutem elevatur, omnesque quos contigerit sanctificat, utpote solo connotato à Spiritu diversa, cum sit eadem operatione. τὸ ὕδωρ καταρτίζει τὸ σῶμα, ὃ τὸ πνεῦμα δ' αἰσάτω ἀγιάζει ψυχὴν. τὸ ὕδωρ ἐν ταῖς μητρὶς λαμβάνεται, τὸ δὲ πνεῦμα ἐν ταῖς τοῦ διαπαιτήσεως δυν. τὸ αἰσάτω ὕδωρ ἀποδίδωκεν ἀσπασίχουται δυνάμει, ὃ ἀγιάζει τοὺς ἐν δεῖσιν γίνονται. τὸ ὕδωρ ἐκταίει μόνον διαπορεύει ἔχει πρὸς τὸ πνεῦμα, ἐπὶ ταῦτα ἐστὶ τῇ ἐνέργειᾳ. Similia Chrysostomus hom. xx111. in Joan. pag. 127. & Cyrillus Alexandrinus supralaudatus. Vide præcedentis libri caput xix. prop. 5. Nullibi tam magnificè de baptismo Joannis scripta leguntur. Il. Præcitata verba, Nisi quis*

r. n. d.

*renatus*, &c. probationem aliam suppeditant. Iis enim respondit Dominus Nicodemo interroganti quomodo potest homo iterato introire in matris uterum, & renasci; quod mirum non esse inquit Salvator, cum ipse locutus sit de regeneratione spiritus, non carnis: ac propterea addidit. *Quod natum est ex carne caro est, & quod natum est ex spiritu spiritus est*. Animum advertas. Homo semel gignitur carne in utero matris, & iccirco nequit carne renasci, atque una est carnis nativitas ex Adam: ergo semel regeneratur homo baptismo, & ideo baptisma repeti nequit, sed unum est Sacramentum regenerationis in Christo. Istud vero non est baptismus Joannis, quo tingi semel, iterumque Judæi poterant, & post quem novimus plures tinctos fuisse baptismo Christi: non erat ergo baptismus Joannis Sacramentum regenerationis, uti est baptismus Domini. *Jam natus sum de Adam*, inquit Augustinus Tract. xi. in Joan. num. 6. *non me potest iterum generare Adam: jam natus sum de Christo, non me potest iterum generare Christus. Quomodo iteras non potest repeti, ita nec baptismus*. III. Validum petitur argumentum ex Act. xix. ubi legimus Paulum iterum baptizasse baptismo Christi quosdam discipulos Ephesi, qui dixerunt se baptizatos in Joannis baptismo, versu 3. Si uterque baptismus idem est, cur illum Apostolus iteravit, maxime cum necesse sit baptismum rite collatum repetere? *Quæro itaque*, ait Augustinus lib. iv. contra Donatistas cap. x. num. 12. *quæro itaque, si baptismo Joannis peccata dimittebantur, quid amplius præstare potuit baptismus Christi eis, quos Apostolus Paulus post baptismum Joannis voluit baptizari?* & seq. num. 13. *Quæ igitur causa est, nisi quia baptismus, quod illos jussit Paulus accipere, non hoc erat quod per Joannem dabatur?* Non una est ad hanc decretoriam argumentationem hæreticorum responsio. Calvinus lib. iv. Instit. xv. 18. ait, *Quid sibi volunt ea verba; Baptizati sunt in nomine Jesu?* Quidam interpretantur tantum sincera doctrina eruditos a Paulo fuisse: sed simplicius intelligere malim, baptismum Spiritus sancti, hoc est gratias Spiritus visibiles per manuum impositionem datas: quas baptismi nomine significari non novam est. At inepta supra quam dici potest hæc responsio Calvinii. Et quantum ad aliorum opinionem de doctrina, liquet ex præced. cap. id olere purum putum Socinianismum. Quod vero addit baptismi nomine designari in Actis impositionem manuum, principio auctore etiam Vossio num. 29. adversatur sententiæ omnium antiquorum, si excipias Optatum, & Interpretem Ambrosiastem in Paulum; cum veteres scripserint verè ab Apostolis rebaptizatos, qui antea rite a Joanne baptizati fuerant. Deinde eo loci narrat Lucas Paulum denuo baptizatis imposuisse manus, actionem hanc attingendi ministerio sejungens: *Baptizati sunt*, inquit, *in nomine Domini Jesu. Et cum imposuisset illis manus Paulus, venit Spiritus san-*

*sanctus super eos.* Constat quoque ex Act. cap. viii. 17. manuum impositionem fuisse munus Apostolicum longe a baptismo diverfum. Præter hæc, quum nomen *Pauli* occurrat versu 6. *Cum imposuisset illis manus Paulus*, non versu præcedenti, *Baptizati sunt*; atque aliunde constet non fuisse consuetudinem Pauli baptizare, probabile admodum est, alium baptizasse, ac Paulum manus imposuisse. *Baptizati erant ab alio Christiano*, inquit Grotius pag. 637. Quomodo ergo baptismus, & collatio Spiritus sancti per manuum impositionem idem sunt, si hæc duo sejunctis ministeriis distincti viri perfece-  
runt? Repudiata responsione Calvinii allam excogitavit Philippus Marnixius, laudatus a Theodoro Beza in Acta pag. 353. eaque utuntur idem Beza, Schmidius pag. 913. Drusus Tom. vii. Crit. Sacr. pag. 349. & alii. Inquiunt ergo, illa verba, *His auditis baptizati sunt*, non esse Lucæ narrantis rebaptizationem eorum, qui baptizati fuerunt a Joanne, sed esse verba Pauli significantis, quod etiam Joannes baptizabat in nomine Christi: etenim, ajunt, extat Græce *ἀκούσαντες δι' ἰσχυρίσματος*, ubi particula *δι'* adversativa est, & respondens particulæ *ἡ*, in versu 4. *Ἰωάννης ἡ* *ἰσχυρίσματος βάπτισμα ἡ* *ἰουδαίας*. *Joannes quidem baptizavit baptismo pœnitentiæ*. Verum hæc responsio præmissa Calvinianâ deterior est. Ac primo consentiunt hæretici illam antiquis omnibus adversari; unde rejicienda est, tanquam commentum Marnixii. Inquit Vossius num. xxxi. 1. pag. 288. *Nam sententia illa, quæ ἡ, & δι', ad Pauli sententiam refert, atque inde statuit semel duntaxat fuisse baptizatos, admodum novella est; quippe nata me nato.* Præterea infirmum est admodum argumentum depromptum ex duabus illis particulis, quas certum est perraro adversativas esse, & a Græcis *euphonia* gratia cuilibet fere periodo inferi; neque opus est afferamus exempla, cum in ipso Actorum libro a primo versu, ac deinceps, frequenter se prodant. Insuper Versiones omnes, quas vide in Polyglottis Walt. Tom. V. pag. 592. dum illarum particularum Interpretationem omittunt, aperte resellunt singularem Marnixii commentationem. Rursus si præcitate verba sunt Pauli, cum ipse baptizatos a Joanne alloqueretur, uti dixerat, *In quo baptizati estis*, ita prosecutus fuisset, *His auditis baptizati fuistis*, non in tertia persona, *Baptizati sunt*. Tandem Grotius hæc de ea opinione scribit: *His auditis, nempe illi ad quos Paulus loquebatur: sunt enim hæc Lucæ verba. Sic accepere Latini, Syri, Arabi, & veteres omnes ante Marnixium.* Hujus repudiata responsione, aliam excogitavit Gerardus Vossius num. 27. quam puto subtiliorem. Ait literatus ille, post institutum a Domino baptismum Joannis fuisse antiquatum & illegitimum, eos autem, qui baptizati iterum sunt apud Ephesum, suscepisse baptismum Joannis ab aliquo ejus discipulo, *post introductum baptismum Domini, & exclusum baptismum*



*psisma servi*, quæ est sententia Optati Milevitani lib. v. de Schism. Donatist. num. v. pag. 85. Verum neque hæc sententia præsidio esse potest hæreticis. Enimvero Optatus ibidem præmiserat, *Qua moris alterum fuerat baptisma Joannis, & alterum sit Christi. Baptisma Joannis ante legem pro pleno voluit esse, quod non erat plenum*. Rursus Optatus oppugnat Donatistas rebaptizantes, & opposcentes quod iterum baptizati sint jam baptizati a Joanne Act. xix. quem locum urgent quoque posteriores Anabaptistæ: quos contra efficax est argumentum Optati docentis non esse comparandos rebaptizatos post baptismum Joannis cum rebaptizatis post baptismum Christi, sive dicas baptismum Joannis & baptismum Christi fuisse diversos; sive dicas baptismum Joannis exclusum instituto Christiano. Quicquid præterea sit de mente Optati; incredibile est Joannem ministrasse baptismum jam exclusum, & eliminatum, atque inter tot millia, quæ baptizavit Petrus Act. 11. 41. nullum fuisse tinctum a Joanne, ad quem venisse, ut baptizaretur, omnem Judæam, etiam publica nos, narrant Matthæus, 111. 5. Marcus, 1. 5. Lucas 111. 12. Ad hæc Paulus ibidem docuit, cur necessum foret baptismum repeti: nec ait, Ideo baptizemini, quia recepistis baptismum jam exclusum, sed, ideo, quia Joannes baptizavit baptismum poenitentiae, ostendens parvi momenti fuisse baptismum Joannis, neque enim dixit, remissionis fuisse, sed poenitentiae, inquit pag. 144. Oecumenius, ἵνα δὲ δὴναιτο ἐν αὐτῷ ἢ τὸ βάπτισμα τοῦ Ἰωάννου. ἢ γὰρ ἵππερ ὁρίσκει, ἀλλὰ μάταιος: & cum ceteris Latinorum Tertullianus de Baptismo cap. x. In Actis Apostolorum invenimus, quoniam qui Joannis baptismum habebant, non accepissent Spiritum sanctum, quem ne auditu quidem noverant: ergo non erat caeleste quod caelestia non exhibebat, &c. Explosis itaque commentationibus hæreticorum, concludendum est cum Augustino lib. de Unit. Eccles. cap. xx1. num. 58. *Non erat unus baptismus qui dabatur a Joanne, & qui dabatur a Paulo*.

Deinde probatur thesis ex canone primo de Baptismo Conc. Trid. sess. vii. *Si quis dixerit baptismum Joannis habuisse eandem vim cum baptismo Christi, anathema sit*. Subirascitur Vossius n. 23. Tridentinis Patribus, dicens longe alium eis fuisse spiritum, quam Augustino, qui non anathema dicit iis, qui dissentirent, sed negat se cum iis velle pugnaciter contendere; vidit enim sanctissimus Antistes, etsi hic erret aliquis, non periclitari salutem, non convelli fidem, non lædi pietatem. Papæ, quam insigniter! Ubinam illud asserit Augustinus? In v. libro de Baptismo cap. x. num. 12. ubi ait: *Tamen ne quisque contendat, etiam in baptismo Joannis dimissa esse peccata, sed aliquam ampliorem sanctificationem eis, quos jussit Paulus denovo baptizari, per baptismum Christi esse collatam, non ago pugnaciter*. Atqui hæc, Vossj, nequaquam canoni Tridentino adver-

Te. VI.

R r

fantur.

santur; non enim sacrosancta Tridentina Synodus dixit *anathema* iis, qui assererent etiam baptismo Joannis peccata fuisse dimissa: minime; anathema in eos intorsit, qui baptismum Joannis, & Christi unum dicunt, sive utrique eandem attribuunt efficaciam. At si dixeris Baptismo Joannis non dimissa peccata, quod non infaciaberis eodem loco adferere absque hæsitacione Augustinum; si dixeris aliquam ampliorem sanctificationem per baptismum Christi collatam, negas baptismum Christi & Joannis esse unum, eandemque habere efficaciam. Igitur si unum, si alterum affirmes, id est, si quod Augustinus tenet, si quod non vult in disputationem pugnaciter trahere, probare debes Tridentinæ Synodi definitionem. Rursus in hoc etiam Tridentinorum Patrum debes commendare prudentiam, quod id, de quo Augustinus agere noluit pugnaciter, præcitato canone non exprefferint, rati id tantum ad fidem pertinere, quod maximum sit inter utrumque baptismum, Joannis, & Christi, discrimen. Fatentur enim Catholici quidam Theologi fidem non convelli, si dicatur Joannis baptisinate dimissa fuisse peccata, modò statuatur baptismatum differentia; quamquam verissime teneant ferme omnes baptismum Præcursoris aut non diluisse peccata, aut si diluit, id non præstitisse baptismatis energiâ, *ex opere operato*. Postremo miserrimum hæretici hominis subterfugium censendum est, quod dum Augustinus gratis illud concedit, quo etiam admissio causa cadunt Donatistæ ibidem exagitati, arripit inde occasionem oppugnandi quod Augustinus absolute pronuntiat, *Baptismo Joannis non dimittebantur peccata, dimittebantur vero Domini baptismo*.

Jam vero ad Patrum traditionem progrediar, qua in re brevis ero, tum quia permulti hætenus fuerunt producti, tum quia ingenue Vossius num. 16. pag. 285. scribit, *Multos Patrum ejus, ac Bel-larminum voluit, sententia fuisse agnoscimus*. Itaque præter Tertul-lianum, Chrysostomum, Augustinum, Cyrillum Alexandrinum, & Oecumenium prælaudatos, Auctor qq. ad Orthodoxos inter Opera Justini, quæst. xxxvii. pag. 413. ait, τὸ βάπτισμα Ἰωάννου προίμιον ἐστὶν ἰουαννίου ἐν χάριτι, *Baptismus Joannis proæmium fuit Evangelii gratiæ*; paucisque interjectis scribit *dimissa peccata*, non vi hujus baptismatis, sed, διὰ μετανοίας τὴν ἐν πίστει τοῦ Χριστοῦ, *per penitentiam, & per fidem Christi*. Idem scribit Cyrillus Hierosoly. Catech. 3. Basilium de Spiritu sancto cap. xv. Tom. 2. pag. 178. Illinc cognoscitur, inquit, quantum inter eam gratiam, quæ a Spiritu proficiscitur, & baptismum enim, qui aqua tantum constabat, sit discriminis, quod Joannes quidem baptizavit aqua, Dominus autem meus, Jesus Christus, in Spiritu sancto: ἐν τῷ ἁγίῳ πνεύματι τὸ βάπτισμα ἐστὶν Ἰησοῦ. ἵνα ἡμεῖς ἐν τῷ ἁγίῳ πνεύματι τὸ βάπτισμα ἐν ὕδατι. ἵνα ἡμεῖς ἐν τῷ ἁγίῳ πνεύματι τὸ βάπτισμα ἐν ὕδατι. Vide quæ de hoc libro

libro scripsi Vol. 11. pag. 186. Gregorius Nazianzenus Orat. in sancta lumina xxxix. pag. 634. *Baptizavit* (inquit) *etiam Joannes*, non jam ille quidem Judaico more, sed etiam ad penitentiam, nondum tamen prorsus spiritualiter. Nec enim addit, in Spiritu. Baptizat quoque Jesus, sed in Spiritu. Quod quidem perfectum numerisque omnibus absolutum baptismum reddit. Ἐβαπτισεν ὁ Ἰωάννης οὐκ ἐν μὲν Ἰουδαίῳ. ἐν γὰρ ἐν ὕδατι μόνον, ἀλλὰ ὁ οὐ μετανοίας. οὕτω δὲ ἔλα πνεύματι, ἐν γὰρ προσίδου τὸ ἐν πνεύματι. βαπτίζει ὁ Ἰησοῦς, ἀλλὰ ἐν πνεύματι. τῷτῳ ἢ τελμήνῃ, &c. Hieronymus adversus Luciferianos Tom. iv. pag. 293. *Audi quid Scriptura doceant*: Joannis baptismum non tam peccata dimisit, quam penitentia baptismum fuit, in peccatorum remissionem, id est, futuram remissionem, quæ esset postea per sanctificationem Christi subsequutura. Gregorius M. lib. 1. in Evang. Hom. vii. num. 3. *Joannes*, inquit, *non Spiritu, sed aqua baptizat*; quia peccata solvere non valens, baptizatorum corpora per aquam lavat, sed tamen mentem per veniam non lavat. Denique Theophylactus in Evang. ita loquitur Joannis ore, pag. 19. *Meum baptismum non dat spiritualem gratiam, sed neque peccatorum remissionem*. τὸ μὲν ἱμῶν βάπτισμα ὃ δίδωμι πνευματικὴν χάριν, ὃ δὲ γὰρ ἄριστος ἁμαρτιῶν.

Producam postremo loco & exterorum testimonia. Primum, cum Dominus baptismum instituit, Judæorum aliqui cum discipulis Joannis disceptantes, prater sententiam, atque inviti fateri coacti sunt longe præstantius esse Christi baptismum, inquit Cyrillus in Joan. Tom. iv. pag. 175. expendens quæ narratur Joan. 111. 25. & iv. 1. ἐγὼ τὸ γινώσκω χάριτος, καὶ ἄλλους πολλοὺς δὲ καὶ ἄλλους ἐν αὐτῷ λόγῳ τὸ διὰ Χριστοῦ λεγόμενον βάπτισμα. II. Josephus lib. xviii. Antiq. cap. vii. nunc v. num. 2. de Joanne, ejusque baptismo scribit: Deo enim ita acceptum iri lavacrum agebat, cum eo non ad expiationem criminum uterentur, sed ad corporis munditiam, ὅτι γὰρ καὶ τὸ βάπτισμα προδεδωκεν αὐτῷ παρὰ τοῦ Θεοῦ, μὴ ἐπὶ τῇ αἵματι παραποιεῖν χρομίσω, ἀλλ' ἐπ' ἀγνίᾳ τοῦ σώματος. Citatur hoc testimonium Josephi ab Origene lib. 1. contra Celsum pag. edit. Cantab. 35. & ab Euseb. H. E. lib. 1. cap. xi. pag. 29. nec est, qui illud in dubium hæstus revocaverit. III. Etiam hæretici veritatem hanc agnovere. De Vossio dictum supra, fateri multos Patres sentire nobiscum: adde in proxima quæst. contra Anabaptistas num. xxix. hæc subjicere: *Plurimi aqua tantum baptizasse Joannem putant*. Grotius aperte amplectitur Catholicorum sententiam in Aët. cap. xix. v. 4. Tom. 2. pag. 637. Quid? Ipse Lutherus in disputatione habita anno 1520. art. 3. ait: *Baptisma legis membra, vestes, vasa lavabat, figurante spiritu externorum operum sanctitatem, & legis velamen; baptismum Joannis, revelata facie legis, omnes peccato immergit, & avidos gratia facit: baptismum Christi peccato mersos, & avidos gratia educit, & novas creaturas facit*. Ut

*baptisma legis pœnitentiam non præstabat, sed magis præsumptionem, donec in baptisma Joannis desinebat: ita Joannis baptisma gratiam, non præstabat, sed magis desperationem, donec ad baptismum Christi pertingeret.* Idem tradidisse Melancthonem in primis locis communibus animadvertit Cassander in Consult. ad art. 1x. Conf. ss. Augustanæ Tom. 1v. Op. Grot. pag. 571. Cur ergo postea Melancthon, ejusque Sectatores a sententia discesserunt? Nempe quoniam devexa est mendaciorum via, ac tumidorum hæreticorum sapientia per viam eandem incedit,

*Commentisque suis ludificata ruit,*  
inquit Prosper.

Diluenda remanent perpauca A catholicorum objecta, videor enim mihi præcipua non præcidisse tantum, sed & evulsiſſe radicitus. Principio, inquitur, satis liquet baptismum Joannis & Christi convenire in causa efficiente principali, cum propositione prima dictum sit, illum quoque fuisse cælestem. Nec dici potest, quod reponunt Bel-larminus de Baptismo cap. 20. & Maldonatus de Sacram. disp. 2. q. 3. baptismum Joannis fuisse cælestem quantum ad institutionem, non quantum spectat ad effectum & ritum; oportet enim ritum & effectum Deo tribuere, si ipse Joannem miserat ad tingendum aqua in remissionem peccatorum, ut legimus Joann. 1. 33. Convenit præterea uterque baptismus materia, quia utrobique tinctio facta est aquâ. Conveniunt & in ratione formæ; nam videtur parum probabile Joannem muta ceremonia fuisse contentum, si autem formula hac usus est, *Baptizo in nomine Messie venturi*, aut duntaxat, *In nomine Christi*; hæc forma non est diversa ab ea, quam adhibuerunt discipuli ante passionem, atque, ut nonnulli e Schola docuere, etiam post passionem in baptizandis Judæis. Tandem etiam in effectu convenit utrumque baptismus, aut effectus accipiat pro obſignatione doctrinæ, aut pro remissione peccati. Nam si de doctrina sermo sit, etiam Joannes annuntiabat Christum, dicens Joan. 1. 29. *Ecce agnus Dei, &c.* imo & Trinitas in ejus baptismo innotuit, cum baptizato Domino *vox Patris audita est, & Spiritus sanctus in columbæ specie descendit*, Matth. 111. 16. & Lucæ 111. 22. De remissione autem peccati, sicuti Act. 11. 23. de baptismo Christi ait Petrus, *Baptizetur unusquisque vestrum in nomine Jesu Christi in remissionem peccatorum*, ita Marci 1. 4. de baptismo Joannis legitur: *Fuit Joannes in deserto baptizans, & prædicans baptismum pœnitentiæ in remissionem peccatorum.* Eadem ergo ratione uterque baptismus peccata abluit.

Revera baptismus Joannis remissa fuisse peccata docent nonnulli Patres. Tenet primum locum Basilius, qui Orat. superius laudata de baptismo Tom. 1. pag. 648. inquit: *Simul itaque accesserat quis, & peccata sua, quantacunque & qualiacunque fuissent, confessus fuerat;*

rat; in Jordanis flumine baptizabatur, & confessum, peccatorum remissionem accipiebat. *Κατεπεσθησαν ἐν ἰορδάνῳ τοῖς ἁμαρτίαις, ὅρας διππὶ ἐν, ἡ ἰουε διππὶ ἐν. καὶ ἱερατίζον ἐν τῷ ἰορδάνῳ πεταμῶ, ἡ εὐδὺς ἱλασθαι τῶν ἁρτων ἁμαρτιμῶτων.* Accedit Ambrosius, qui lib. de Spiritu sancto cap. 3. num. 41. ait: *Joannes in remissionem peccatorum in advenientis Jesu, non in suo baptizabat nomine.* Ex quo loco Mag. sent. in 1v. dist. 2. infert baptizatos a Joanne non fuisse rebaptizatos, si in Trinitatem crediderant, nec in ipso baptismo Joannis spem collocaverant, ac rebaptizatos tantum, qui Spiritum sanctum nesciebant, suamque spem in Joannis lavacro posuerant. Opponit Vossius & Prudentium, quem Cathemer. hymno v11. tribuisse baptismum Joannis remissionem peccatorum, affirmat quoque Jansenius Gandavenfis in Concordia cap. x111. pag. 99. Prudentii autem verba ista sunt:

*Hoc ex lavacro labe dempta criminum  
Ibant renati; non secus, quam si rudis  
Auri recocta vena pulcrum splendeat,  
Micet metalli sive lux argentei,  
Sudum polito praeitens purgamine.*

Quædam sunt alia, sed levioris momenti; ut unum esse baptismum, auctore Apostolo ad Ephesios 1v.5. nec Joannem, nec ejus discipulos, nec Apostolos certe tinctos fuisse baptismum Christi: istum denique baptizatum, nobisque fore maximum solamen, ac decus, si eadem cum Redemptore nostro merfione abluamur; sed de his plura Bellarminus de Baptif. cap. 23.

Hæc tamen nullam ad catholicum dogma labefactandam vim habent. Ad primum enim respondemus duo in institutione aliqua specari, instinctum, sive inspirationem atque mandatum, & potestatem virtutemque rei collatam. Si primum attendas, baptismus Joannis cœlestis erat, quod nos adversus Orostadium statuimus: si species alterum, non cœlestis erat, sed elementaris, corpus tantummodo tinguens; & hanc tingendi vim habet utique Jordanis flumen a Deo, sed non primum collatam, dum misit Joannem baptizare; tunc inditam, cum initio temporis aquam fluidæ naturæ produxit. Id ante Bellarminum, & Maldonatum tradiderat S. Thomas 3. p. q. 38. art. 2. *Dicendum, quod in baptismo Joannis duo possunt considerari, scilicet ipse ritus baptizandi, & effectus baptismi. Ritus quidem baptizandi non fuit ex hominibus, sed a Deo, qui familiari Spiritus sancti revelatione Joannem ad baptizandum misit. Effectus autem illius baptismi fuit ab homine; quia nihil in illo baptismis efficiebatur quod homo facere non posset: unde non fuit a solo Deo, nisi in quantum Deus in homine operatur.* Ante beatum Thomam idem tradiderat Tertull. scribens lib. de Baptismo cap. 10. *divinum quidem cum*

eum baptismum fuisse, mandatu tamen, non potestate, quod & Joannem à Domino missum legimus in hoc munus; ceterum humanum conditione. Nihil enim cæleste præstibat, sed cælestibus præmuni-  
strabat, pœnitentia scilicet præpositus. Perperam ergo Vossius impetit Bellarmini & Maldonati responsa. In baptismo Joannis fuisse tinctionem; nemo ignorat: defuisse formam supra ostendimus; quam si detrahas, quid est aqua, nisi aqua? inquit Augustinus Tract. 80. in Joan. n. 3. Nec proinde asserimus Joannem muta usum ceremoniam, cum Christum annuntiasset, & ad pœnitentiam hortatum fuisse quos tinge-  
bat, sit certum: negamus hanc prædicationem, hortationem-  
que appellandam Sacramenti formam, quam in doctrina sitam esse aliud est hæreticorum figmentum jam altero libro dispunctum. Atque ut liberalis sim, & concedam Joannem adhibuisse formam fundendo elementum; baptizasse tamen sub invocatione Trinitatis falsum est penitus. Ridendus hic mihi est Vossius, qui id ex uno Magistro sent. in 1v. dist. 3. probare nititur. Huc ne confugiunt, qui non solum Lombardum, verum & Scholasticos omnes, imo & Patrum traditiones rejiciunt? Sed & Magister eo loci discipulos ante passionem baptizasse in nomine Trinitatis, scribit; baptismo Joannis baptizasse, non scribit: quinimo eo loci complectitur opinionem eorum, qui ajunt Christum instituisse baptismum in Jordane, quando baptizatus est à Joanne, ac propterea haut inverisimile putat Apostolos ante passionem baptizasse in nomine Trinitatis. Unus ergo eximendus est scrupulus de remissione peccatorum. Solet responderi, baptismo Joannis non dimissa peccata virtute baptismi, sed virtute pœnitentiæ; cum baptismus Christi eadem diluat propria vi, atque energia: quare baptismus Joannis dicitur baptismus pœnitentiæ, baptismus Christi lavacrum regenerationis: quæ responsio est fere communis, placuitque ex Reformatis Scriptoribus etiam Regnerio Pedrinio in Matth. pag. 137. quod num. xi. cogitur Vossius concoquere. Tutatur autem sese responsio ista ab omni adversantium oppugnatione, modò verba ipsa, quæ opponuntur, attendas.

At mihi arridet responsio altera, quod baptismus Joannis erat in remissionem peccatorum proximè futuram per Christum, ad quem digne suscipiendum populus ad pœnitentiam voce Præcursoris excitabatur. De baptismo quippe Joannis non legimus, eo hominem renasci, regenerari, sepeliri in Christi mortem, abluì peccata, & cetera, quæ diximus cap. 1. de Christiano baptismo enuntiari; sed legimus tantum, fuisse baptismum pœnitentiæ in remissionem peccatorum: quorum verborum sensus est, Joannem prædicando & baptizando ad pœnitentiam fuisse exhortatum Judæos, ut pararent viam ei, qui adveniebat gratiam exhibens, baptizans in Spiritu sancto, & peccata dimittens: qua exhortatione, si qui pœnitentiam egit ve-  
hem-

hementem, hunc vi contritionis fideique caritati conjunctæ justificationem, nequaquam repugno. Trahit me primum in hanc sententiam, quod Joannes non hortabatur ad poenitentiam tanquam ad dispositionem baptismatis sui, ut Petrus Act. 11. 28. sed tanquam ad præparationem pro recipiendo Messia, dicens Matth. 11. 2. 3. *Pœnitentiam agite, appropinquavit enim regnum cœlorum. Parate viam Domini, rectas facite semitas ejus*: atque dum Jesum vidit, Joan. 1. 29. 33. *Eccce agnus Dei, ecce qui tollit peccata mundi. Hic est qui baptizat in Spiritu sancto*. Deinde sensum hunc innuit Paulus Act. x 11. 4. de quo loco plura jam dixi: idque fatetur etiam Acaholius Grotius. Præterea hæc fuit plurimorum Patrum sententia. Tertullianus, *Prædicabat baptismum poenitentiae* (inquit de Bapt. cap. 10.) *in remissionem delictorum, in futuram remissionem enuntiaturum*. Hieronymus in Joëlem supra laudatus, *in futuram remissionem*. Augustinus lib. v. de Bapt. cap. 10. *In remissionem peccatorum, ut ab eo baptizatis in spe remitterentur peccata, reipsa verò in Domini baptismo id fieret*. Insuper cohæret cum his Patribus sententia aliorum, qui absolute negant baptismo Joannis dimissa peccata. Ad hæc idem sensisse Tridentinos Theologos auctor est lib. 11. Hist. cap. 7. Pallavicinus. Tenuisse denique sententiam istam Scholarum Angelum, satis liquet ex 3. p. q. 38. ad 2.

Exciipiuntur, & explanantur utraque responsione, quæ objiciebantur ex Patribus, perpauca tamen, & quæ cum supra productis nequeant æquiparari. Si enim velis baptismo Joannis dimissa crimina vi tantummodo poenitentiae; hanc Basilii commemorat, nec Ambrosius, & Prudentius excludunt. Si responsionem præfers nostram; etsi sudandum non est, ut commonstretur omnes omnino veterum denegasse baptismo Joannis peccata fuisse dimissa: id enim ad fidem non spectat, ut supra monuimus; contendere poteris, neque Basilium habere nos adversarium. Quomodo enim adversarius, qui in libro de Spiritu sancto nobis quæ diximus præmonstravit? In loco autem, qui objicitur, tria baptismata distinguit, unum Moysi, alterum Joannis, tertium Christi. Primum, quod promittebat futurum Reparatorem, & conferebat solam munditiem legalem, appellat *obsignationem purificationis*, *ἱεροσμία τοῦ κατὰ νοῦν*: alterum, in quo Salvator prædicabatur adveniens, exhibebat *ἰούνη τὴν ἄρσιν*, *statim remissionem*: tribuebat tertium, reliqua superans, *τὴν ὑπερβολὴν χάριτος*, *supereminentiam gratiæ*. Ne locus iste pugnet cum iis, quæ scripsit Basilii in lib. de Sp. S. interpretor ego particulam, *ἰούνη*, *statim*, ac si idem valeat ac *quancitissime*, *quamprimum*; ita, ut sensus sit, primum baptisma prænuntiabat remissionem aliquando futuram: alterum jam advenientem, ac statim obtinendam; tertium verò plenam, perfectamque largitur. Nonne hæc interpretatio optime

time Basilii scopo, verbisque collineat? Idem affirmandum de verbis Ambrosii: *Joannes*, inquit ille, *in remissionem peccatorum, in advenientis Jesu baptizabat nomine*, idest, in remissionem futuram. Quid arduum, absurdumque, si ita explicemus Ambrosium, qui Præf. in Psalmum xxxvii. Tom. 1. pag. 816. docet solum baptismum Christi conferre gratiam, baptismum verò pœnitentiæ ineutere timorem suppliciorum? *Baptismus Joannis*, inquit, *oculus suppliciorum est; baptismus Christi oculus gratiarum*: & in Lucam lib. 2. num. 78. pag. 1307. *Aqua corpus abluitur, Spiritu animæ delicta mundantur. Aliud agimus, aliud invocamus; licet etiam in ipso fonte sanctificatio divinitatis adspiret. Non enim aqua omnis ablutio; sed hæc inter se divisa esse non possunt; & ideo aliud fuit baptismus pœnitentiæ, aliud gratiæ est. Istud ex utroque, illud ex uno. Agit autem Ambrosius ibi de Joanne, & exponit ejus verba, Ego vos aqua baptizo. Unus restat Prudentius. Et hunc possumus accipere de remissione in spe, & quæ lavacrum Joannis non comitaretur, sed consequeretur; nam cecinit eo in loco,*

*Sed tincta postquam membra defacaverat,  
Cælo refulgens influebat Spiritus.*

Si repugnes, unoque versu decertes, antitheton panget lib. 2. H. Evang. Arator:

*Nomine venturi Præcursor in orbe Joannes  
Exhibuit baptismum suum, Dominoque paravit  
Ipse viam, memorans cunctis baptismum futurum  
Post aliud, quod jure datur, quod Trina potestas  
Illustrare solet.*

Reliqua paucis expediā. Apostolus ad Ephesios scribens, eos monet, ut solliciti sint servare unitatem spiritus in vinculo pacis, iv. 3. ex quo eidem Domino se devoverint, eandem fidem fuerint amplexi, eodemque baptismo regenerati. Nil istic de Joannis baptismate. Etiam Joannem baptizatum a Christo affirmat Nazianzenus pag. 633. in Oratione xxxix. Idem scribit Sanctus Thomas cit. q. 38. ad 3. Vide Cardinalem Gotti Tom. xi. pag. 156. Necessè tamen non erat, ut tingeretur baptismo novæ legis Præcursor, priusquam hæc obstringeret truncatus capite. Discipulos baptizatos baptismo Christi scribit Augustinus Ep. ad Seleucianam, nunc 265. num. 5. Baptizari Christum a Joanne voluit, ut Præcursoris ministerium probaret, ob quam rem & circumcisionem accepit: ut exinanitus in forma servi, & factus in similitudinem carnis peccati, simile cum peccatoribus susceperet signum; ut nobis præberet humilitatis exemplum; ut denique consecraret baptismi nostri elementum, de qua re infra. Lege S. Thomam 3. p. q. 38. art. 1. & 2. Suarezium Tom. 2. pag. 256. & Jansenium in Concordia cap. 14. At nobis, instituto salubrio.



ubriori remedio, quemadmodum nec carnis circumcisio, ita nec ablutio sola abstergens membra præscribitur; ac magis consolationis nostræ argumentum est, quod exclusum fuerit baptisma servi, quod institutum salubrius, quod regeneremur Spiritu sancto, & ex fonte levemur tanquam e Christi sepulcro ad spiritalem vitam renati. Hæc de baptismo Joannis: de quo agebat Cyrillus Tom. iv. pag. 156. Joannem apertissime suum a Christi baptismo alterum, ac longe imparem commonstrasse, quasi præcius foret, *exoriturus aliquos, qui præmentis inopia dicere auderent, nullum esse prorsus eorum discrimen.* *ὅτι γὰρ ὁ ἴστος ἐλπίδες ἢ μακρὰν ἀναδείχουσιν αἰὲτα τοῖς ἀποστολικῶντες ἐξ ἐνίας ἐκείνης μακρίας ἑλως ἐν αὐτοῖς ὑπάρχον τῆς διαφοράς, &c.* Dignum cedro, & quo dissertatio claudatur, oraculum.

### C A P U T III.

*Quando a Christo institutum sit Baptismatis Sacramentum?*

VEnio ad Baptismum Christi, de quo primum inquiritur quando a Domino sit institutus. Arcessunt quidam baptismi originem ab eo tempore, quando Christus Matth. xxviii. inquit Apostolis, *Euntes docete omnes gentes, baptizantes eos, &c.* in qua sententia fuit Rupertus lib. 3. in Joannem: nec ab ea recedunt qui cum Melchiore Cano lib. viii. de locis Th. cap. 5. tenent nunquam Apostolos ante Christi mortem aliud, quàm Joannis, administrasse baptismum. Alii cum Scoto in iv. disp. 3. baptizasse Apostolos baptismum Christi ante hujus mortem haud negant, sed quo tempore baptismus sit institutus, ajunt omnino esse incertum: qua de re legendus Mastrius Tom. iv. disp. 2. quæst. 1. Nonnulli cum Alex. Alensi p. 4. de Sacram. q. viii. membro 2. art. 3. distinguunt multiplicem baptismi institutionem, unam, quam vocant *potentialem*, cum Jesus baptizatus in Jordane aquis vim regenerativam largitus est: *formalem* alteram, cum ait Apostolis, *Ite, docete, &c.* præscribens formam, *In nomine Patris, &c.* alteram quantum *ad finem*, dum ait Joan. 3. *Nisi quis renatus, &c.* Quantum *ad effectum* quartam, dum inquit Marc. ult. *Qui crediderit, & baptizatus fuerit, &c.* Rursus institutum baptismum ajunt quantum *ad efficaciam*, & *significationem*, quando de Christi latere Joan. xix. *exiit sanguis, & aqua.* Addunt & institutum *officialiter*, cum Dominus misit discipulos binos & binos ad prædicandum & baptizandum, Lucæ x. Agebat de Alensi Vossius disp. ix. thesi 1. *non dividere, vel distinguere, sed concidere in minutias, ut bovem solent molossi.* Permulti denique unum institutionis tempus designant:

26/1.

S s

signant:

signant: quidam cum Estio dist. 3. §. 11. quando Christus ait Nicodemus, *Nisi quis renatus fuerit, &c.* Joannis 111. 5. quidam vero quando in Jordane baptizatus est a Joanne. Tenent hanc postremam sententiam cum Magistro in 1v. dist. 111. ac D. Thoma 3. p. q. lxxvi. art. 2. Thomistæ, ac nostrates singuli; necnon Bernardus Zanc Episcopus Spalatenfis in Orat. habita in Conc. Lateran. V. an. 1512. Bellarminus lib. 1. de Bapt. cap. 5. Suarez in præcitatum art. quæstionis 66. Vasquez disp. 140. cap. 4. atque ex recentioribus J. B. Du-Hamel cap. 2. Ludovicus Habert cap. 1. q. 7. Boucat dissert. 1. art. 5. ac Tournely q. 3. art. 1. Ego quoque, tametsi disquisitionem hanc parum necessariam arbitror, scholæ morem gerens opinionem postremam tanquam probabiliorem amplector.

PROP. I. Probabilius est baptismum a Christo fuisse institutum ante passionem; & quidem dum baptizatus est a Joanne.

Demonstratur prior pars. 1. Joannis 111. 22. & 1v. 1. legitur etiam Jesum, ac discipulos ejus baptizasse. Atqui non baptizarunt baptismò Joannis; igitur baptizarunt baptismò Christi. Minorem, probò: ait eo loci Evangelista, *Quamquam Jesus non baptizaret, sed discipuli ejus.* Dicitur ergo Christus baptizasse, ministrantibus discipulis baptismum: ideoque hi Christi, non Joannis baptisma administrabant; alioqui Joannes potius, quam Christus diceretur per discipulos baptizasse. Præclare S. P. Augustinus Tract. xv. in Joannem, num. 3. *Baptizabat enim quia ipse mundabat, non baptizabat, quia non ipse tinguebat. Præbebant discipuli ministerium corporis, præbebat ille adjutorium majestatis.* Et in Epist. ad Seleucianam 265. num. 5. *Ipsius enim erat baptismi Sacramentum, ad discipulos autem baptizandi ministerium pertinebat.* Similia Cyrillus in Joannem pag. 156. ubi etiam advertit, nunquam Joannem baptizasse, *sed χυρὸς ὕδατος, per aliorum manus.* Et Ammonius in Cat. Græcor. pag. 103. *Ceterum baptismus Evangelicus tradebat, quod multum erat a Joannis baptismate diversum: τὸ Εὐαγγελικὸν λατὶν παρὰ τοῦ βαπτίσματος, ὅπου ποιεῖ ὁ Χρὺς διὰ τοῦ ὕδατος, ἀπὸ τοῦ Ἰωάννου.* Rursus Joannes de Christo prænuntiaverat, Joann. 1. 33. *Hic est qui baptizat in Spiritu sancto;* nec ullibi invenies Dominum Jesum aqua duntaxat baptizasse. Cum igitur audis, *Jesus baptizabat,* accipere debes, baptizabat Spiritu sancto. Recte Augustinus cit. Tract. xv. num. 4. *Hic est qui baptizat. Baptizat quidem Christus in Spiritu, &c.* Rursus nullibi legimus eos, quos discipuli Domini baptizarunt, fuisse iterum baptizatos, sicuti Act. xix. 4. rebaptizatos novimus baptizatos baptismò Joannis, utique, quod hi non essent tincti baptismate Christi, ut præc. cap. dictum est. Baptizati ergo a discipulis Domini, Christi baptismum receperant. *Quidam qui habebant baptismum Joannis* (inquit August. Tract. v. in Joan. num. 16.) *jussi sunt a Paulo baptizari, non enim habebant baptis-*

*baptisma Christi*. Et num. 18. *Dedit Judas, & non baptizatum est post Judam; dedit Joannes, & baptizatum est post Joannem, quis si datus est a Juda baptismus, Christi erat*. Agit Augustinus contra Donatistas, quos imbelli peteret argumento, si discipuli Domini dedissent baptismum Joannis. II. Discipuli Joannis, cum audissent etiam Jesum baptizare, *venerunt ad Joannem, & dixerunt ei: Rabbi, qui erat tecum trans Jordanem, cui tu testimonium perhibuisti, ecce baptizat, & omnes veniunt ad eum*, Joann. 111. 26. Si Jesus, ejusque discipuli baptizassent baptismo Joannis; cur discipuli Joannis quæstionem movissent istam, dum ipsius honori cessisset, quod baptismo suo etiam Christi discipuli baptizarent? Vide Augustinum Tract. x111. num. 8. & Epist. xlii. ad Eleusium cap. v. num. 10. & Cyrillum in Joannem pag. 175. Addo Ammonium scribentem pag. 104. ideo confertim turbas ad baptismum Christi accurrisse, quoniam *neque Joannis, neque discipulorum ejus baptismus Spiritum sanctum conferebat*, ὅτι τὸ ἴδιον βάπτισμα, ὅτι τὸ αὐτὸ μαρτυρῆσαι παρὰ τοῦ πνεύματος ἁγίου. III. Joannis x111. 10. Christus discipulorum lavans pedes, inquit ad Petrum: *Qui lotus est, non indiget, nisi ut pedes lavet, sed est mundus totus*. Petrus itaque ante passionem Christi baptismum, idest, *aqua, & Spiritu sancto fuerat ablutus*. *Perfecta enim mundatio*, inquit Augustinus cit. Epist. 44. *non in Joannis, sed in Domini baptismis est*. Poterat quidem Petrus mundus esse eo tempore sine baptismate nondum quoslibet obstringente: sed tamen Augustini ratio persistit, tum quia baptismus perfectiorem contulisset munditiam; tum quia congruum erat, ne Apostoli Eucharistiam acciperent, & novæ legis Sacerdotes constituerentur nondum baptizati, quod eo loci S. Pater animadvertit; tum demum quia revera Petrum fuisse a Domino baptizatum est vetus traditio, de qua vide Euthymium in Evangelia pag. 324. Evodium apud Nicephorum lib. 2. cap. 3. pag. 134. & Acta ab Aemilio Sanctorio collecta Tom. vii. SS. Junii pag. 3. Atque hæc de prima propositionis parte.

Alteram partem stabiliunt quæ sequuntur. I. Si Dominus, ejusque discipuli dabant aliud a Joannis baptismate; atque, ut liquet ex Historia Evangelica, nunquam leguntur ante baptizatum Jesum baptizasse, id vero fecerunt Joanne adhuc superstite, & initio Domini prædicationis: profectò videtur eo tempore, quo Christus ad Jordanem venit, baptismus ab eo consecratus & institutus, siquidem antea non erat, & posthac solemniter ministrabatur. II. Instituitur Sacramentum dum consecratur *materia*, & designatur verborum *forma*. At *materiam* baptismatis, idest, aquam fuisse a Domino in Jordane mundatam, sanctificatam, consecratam, concors est sanctorum Patrum sententia: quare S. Thomas q. 66. art. 2. inquit, *Tunc videtur aliquod Sacramentum institui, quando accipit virtutem*

*producendi suum effectum : hanc autem virtutem accepit baptismus ; quando Christus est baptizatus ; unde tunc vere baptismus institutus fuit , quantum ad ipsum Sacramentum . Neque hanc probationem , elidunt quæ reponit Estius cum antiquioribus , Christum contactu carnis suæ ordinasse aquam ad regenerationem hominum , non ei regenerativam vim contulisse ; aut quod ait Juenin , aquas Jordanis contactu quidem Christi sanctificatas , non autem donatas fuisse sanctificandi virtute : oppositum quippe docent Patres , si perlegantur attente . Ambrosius enim lib. 2. in Lucam num. 83. pag. 1308. non solum ait , Baptizatus est ergo Dominus non mundari volens , sed mundare aquas , quæ verba plures exscripserunt ; sed ulterius addidit , ut abluta per carnem Christi , quæ peccatum non cognovit , Baptismatis jus haberent , ut recte vidit S. Thomas q. 39. art. 1. Nazianzenus Orat. xxxix. pag. 633. inquit Christum accessisse ad baptismum , ut ipsum a quo baptizabatur afficeret sanctitate , ut in aqua veterem Adam sepeliret , præsertim verò , & propter hoc Jordanem , quemadmodum ipse spiritus , & caro erat , ita spiritu perficiens , & aqua , quæ dicitur totum in Jordanem , & in ipsum in ipsum & caput , & in ipsum & in ipsum & in ipsum . S. Maximus Taurinensis Hom. vi. de Epiph. Tom. vi. Bibl. PP. pag. 12. Christus , inquit , beati Joannis ministerio fluentis Jordanis benedictione proprii baptismatis consecravit : & infra , Baptizatur Filius in Jordane , Spiritus sanctificat Sacramentum , Pater aperit veritatem : ac seq. Hom. vii. Quod verò fluentis Jordanis baptizatur Jesus , aqua nostro baptismati consecrantur ; ac rursus pag. 13. Baptizatur ergo Jesus , non sibi , sed nobis : baptizatur , non ut purificetur aquis , sed ut aquas ipse sanctificet : baptizatur novus homo , ut novi baptismatis constituat Sacramentum . Mitto sermonem 36. de Tempore inter Augustinianos , nunc in Appendice n. 135. Cyrillum in Symb. Græc. Tom. 1. pag. 44. En aperte affirmant Patres Christum in Jordane non solum aquas sanctificasse suæ carnis contactu , verum etiam eas perfecisse , ut haberent jus baptismatis , ut in earum ablutione adesset Spiritus sancti energia , ut nostro baptismati consecrarentur , ut novum institueretur baptisma : quid est autem donari sanctificationis virtute , si hoc non est ? III. Aquas in Jordane vi regenerationis donatas antiquæ etiam Liturgiæ commonstrant . In vetusto Missali Gothico Gallicano edito a Cardinali Thomasio , & citato ab Edm. Martenio lib. 1. de Antiq. Rit. art. 18. pag. 169. in Benedict. Fontis Baptismalis legitur : Deus qui Jordanis fontem pro animarum salute sanctificasti . Item : Sanctifica Domine hujus laticis undas , sicut sanctificasti fluentia Jordanis . In Græcorum Euchologio apud Jacobum Goarum in Officio Baptismatis pag. 350. habetur : Ut in eam (aquam) redemptionis gratia , benedictio Jordanis mittatur , Dominum precemur :*

ὕπὲρ τοῦ κατακαρτῆσαι αὐτὴν τὴν χάριν τῆς ἀπολυτρώσεως ὑδατῶν τοῦ Ιορδάνου, τοῦ ἡμεῖς δαδόμεν. Ubi male apposuit Goarius particulam *Et*, quæ non apparet in Græco, ita, ut benedictio Jordanis sit ipsa gratia regenerans. Hinc additur, *Ut virtus purgativa supersubstantialis Trinitatis his aquis infideat*, ὕπὲρ τοῦ κατακαρτῆσαι τὴν ὕδατι ταύτης τὴν καθαρῶν τῆς ἡμεῖς δαδόμεν. Pag. 353. *Da et redemptionis gratiam*, *Jordanis benedictionem*, δὲ αὐτῇ τὴν χάριν λύτρωσεως τῆς ὑδατῶν τοῦ Ιορδάνου: ac statim, *Fac illam incorruptionis fontem, sanitatis donum, solutionem peccatorum*, πύξιν αὐτὴ ἀφάρτατος πᾶν, ἀκαρτῶν δῶρον, ἀμαρτανῶν λύτρεον. In Ordine baptismi apud Aethiopes, Tom. IV. vet. Bibl. Patrum pag. 47. qui Ordo inscribitur Severo Patriarchæ Alexandrino, *O Deus, qui medio in Jordane baptizatus es a Joanne, et naturam aquarum sanctificasti, ad te accedo, miserere mei: multum lava me Deus, qui tanquam indigens baptizatus es in fluvio Jordanis, et sanctificasti nobis baptismum apud te*. Infra: *In baptismo suo sanctificavit nobis baptismum*. Vide & Jos. Vicecom. lib. 1. cap. xv. pag. 36. In benedictione, qua utitur Romana Ecclesia in Sabbato sancto id utique non exprimitur; sed nota, Gulielmum Durandum in Rat. Divin. Offic. lib. vi. cap. 82. pag. 237. animadvertere ea verba, *Qui in te a Joanne baptizatus es*, olim proxima fuisse illis, *Qui te de paradisi fonte manare fecit*; cujus transpositionis hanc ille rationem reddit: *Quia gratia de paradiso manans aquis in baptismo est infusa, unde de baptismi gratia Ecclesia profluens in quatuor partes orbis dilatata est, quod quodammodo factum est, quando Dominus baptizatus est a Joanne, quia tunc aqua vim regenerativam suscepit*. Postposita autem ea verba fuere, aut servata serie historiarum sanctarum, aut auctoritate libri Sacrament. Gregorii, Tom. 111. pag. 72. editique a Thomaſio pag. 83. At de priori illa lect. etiam Prompt. Antiq. Liturg. Tom. 111. pag. 52. Vim ergo regenerativam in Jordane collatam aquis comprobant vetera quoque Rituaia. IV. Posset & huc referri, quod in Ecclesiæ primordiis, tamen aliquando tingerentur, ubi primum aqua occurrisset, ut de Eunuchō Reginæ Candacis narratur Act. Apost. viii. 36. præsertim, tamen mysterium illud peragebatur *in fluvio*, ut ex Walfrido Strabone lib. de reb. Eccl. cap. 26. & Honorio Augustodunensi lib. 3. de Gemma animæ cap. 106. referunt Vicecomes lib. 1. cap. 4. Durantes lib. 1. cap. 19. Martene lib. 1. art. 2. in Operibus, quæ præclari viri de Antiquis Ecclesiæ ritibus ediderunt. Hujus autem rei causam produciunt istam, quoniam, ut Walfridus inquit, *ipse Dominus noster Jesus Christus, ut in nobis idem consecraret lavacrum, in Jordane baptizatus est a Joanne*. V. Nec tantum materia, etiam forma baptismi in Jordane designata est. Apparet, inquit August. Tract. vi. in Joannem n. 5. *manifestissima Trinitas, Pater in voce,*  
Fi-

*Filius in homine, Spiritus in columba. In ista Trinitate missi sunt Apostoli.* Ante Augustinum Origenes Cat. Græc. pag. 45. *Εἰ τῷ Ἰησοῦ πατέρα παραίρηται τὸν ἀδελφόν ἢ πρὸς αὐτὸν ὁ πατὴρ ἐμαρτύρηται, καὶ ὁ υἱὸς ἢ ὁ μαρτυρήσεται, καὶ ὑποδεικνύει τὸ πνεῦμα τὸ ἅγιον, πῶς ἐν τριῶν ἡ δύναμις; videlicet, In Jordani fluvio manifestata est hominibus Trinitas. Si enim Pater testimonium dedit, & Filius fuit de quo testimonium est datum, & qui ipsum manifestavit, Spiritus sanctus; quomodo non Trinitas divina? Ac in præcitato Aethiop. Ord. pag. 51. *Fons vite apertus est baptismus, & Pater, Filius, & Spiritus sanctus in sancta gratia sua. Pater qui clamavit, Hic est filius meus dilectus, & Filius qui inclinavit caput suum, & in eo baptizatus est, & Spiritus sanctitatis, qui in specie columbæ volans descendit, & sanctificatus sunt flumina, & fontes omnes.* VI. Denique & effectus Baptismi tunc innotuit, dum cæli aperti sunt, & Spiritus sanctus in columbæ specie descendit. Recte Ephrem Syrus volum. 2. Cat. Græc. pag. 85. *Aperiuntur autem cæli, quos clausit Adam & sibi, & posteris: quamobrem? ut dicas etiam te baptizato hoc fieri, Deo ad supernam patriam te vocante.* Ἀνοίγεται ὁ οὐρανός, καὶ Ἰησοῦς ἐκλάσκει αὐτὸν τὴν καὶ τοῦ πατρὸς αὐτοῦ. τίνας ἰσχυροὺς; ἴσα μάλιστα, ὅτι καὶ σὺ βαπτίζων ἐν τῷ ὕδατι πρὸς πατέρα αὐτοῦ παρὶς τῷ θεῷ καλεῖσθαι σε. infra, *Super Jesum venit Spiritus, ut ostendat super omnes fideles dum baptizantur sese etiam venturum.* Εἰ τὸν Ἰησοῦν ἴδωμι τὸ πνεῦμα, ἴσα δὲξαι ὅτι καὶ ἐνὶ πάντας τοὺς πιστοὺς μάλιστα ἐπιφύεται βαπτίζων.*

Oppones: Præmissæ thesi sacrae literæ, Patres, & ipsa ratio adversantur. Et sacrae quidem literæ, nam cum Christus in Jordane baptizatus est, baptismus servi suscepit, nulla forma verborum consecratum. Enimverò principio constat formam baptismi nostri institutam, cum Dominus mittens Apostolos ad prædicandum Matth. ult. inquit, *Euntes ergo docete omnes gentes, baptizantes eos in nomine Patris, & Filii, & Spiritus sancti.* Deinde constat ante Christi ascensionem datum non fuisse Spiritum sanctum, Joan. vii. 39. Præterea falsum est ante passionem collatum fuisse baptismum Christi; nam a quo, & cui datum comminiscimur? A Christo? At ipse non baptizabat. Apostolis? Hi verò Spiritu sancto baptizandi erant post Christi discessum. Paulus insuper baptizatos nos docet in morte Christi, ad Rom. vi. 3. ideoque nemo ante Christi passionem, ipsius baptismate tinctus fuit. Ad hæc, si ante passionem institutum velimus, cur non subscribimus Estio, qui institutum arbitratur, dum Christus ait Nicodemo Joannis i. 5. *Nisi quis renatus fuerit ex aqua & Spiritu sancto, &c?* Hæc enim verba de Baptismo Christi Patres omnes exponunt. Constat etiam ex Evangelica Hist. ibid. versu 22. post habitum colloquium cum Nicodemo, venisse Jesum in terram Judæam; & baptizasse, *velut procedens*, inquit Estius, *ad executionem*.

*cutionem institutionis factæ.* Hæc ex Scripturis. II. Quantum ad Patres attinet, Augustinus Tract. 120. in Joannem, num. 2. aliisque in locis ait Ecclesiæ Sacramenta profuxisse ex latere Christi, quando exivit inde *sanguis & aqua*, Joan. xix. 3. Quomodo ergo fuerat antea Sacramentum aquæ, idest, Baptismatis? Antiquior Tertullianus de Baptis. cap. 11. scribit: *Itaque tingebant discipuli ejus, ut ministri, ut Joannes ante præcurfor, eodem baptismo Joannis.* In eadem sententia, nemine contradicente, sunt Chrysostomus Hom. xxv. 11. in Joannem pag. 145. & ejus pedisequs Theophylactus in Evang. pag. 601. His connumerari potest Ambrosius scribens de Apostolis in Galilæa post Christi resurrectionem congregatis, lib. xix. in Lucam num. 183. *Quibus docendi, & baptizandi tribuit potestatem.* Accedit Magnus Leo, qui Epistola iv. ad Episcopos per Siciliam constituit, cap. 3. pag. 110. ait: *Posteaquam resurrexit a mortuis, discipulis suis, in quibus Præsules omnes Ecclesiarum debebantur, & formam, & potestatem tradidit baptizandi, dicens, Euntes ergo, &c. De quo utique eos etiam ante passionem potuisset instruere, nisi proprie voluisset intelligi regenerationis gratiam ex sua resurrectione cæpisse.* III. His ratio suffragatur: Sacramenta enim suam ex Christi passione habent efficaciam, ideoque debent passionem illam supponere. Deinde Sacramentorum institutio legislatoris actus est: at in Jordane Christus non jurisdictionem exercuit, sed potius humilitatem. Denique, etsi detur in Jordane omnia, quæ in Christi baptismo peraguntur, præsignata fuisse, formam quoque, & effectum, id nequaquam fat est, ut illinc repetamus baptismatis institutionem: siquidem etiam Lucæ ix. in muliere peccatrice designatæ fuere partes omnes Sacramenti Pœnitentiæ, contritio in lacrymis, satisfactio in caritatis & humilitatis operibus, nec non *forma* in verbis a Christo prolatis, *Remittuntur tibi peccata tua;* & nihilofecius Sacramentum Pœnitentiæ juxta Tridentinum, sess. xiv. cap. 1. fuit institutum, quando Christus post resurrectionem, Joan. xx. 22. in discipulos suos insufflavit, dicens: *Accipite Spiritum sanctum, quorum remisistis peccata, remittantur eis.* Igitur neque è signis, quæ apparuerunt in Jordane, rectè colligas tunc institutum fuisse baptismum.

His ad hunc respondeo modum. Ad primum dico ad institutionem Sacramenti necessarium non esse, ut dum instituitur, *forma* proferatur; sed fat est efficax determinatio, ut quando hæc materia cum tali verborum formula applicetur, vim habeat sanctificandi. Atque hinc Hugo Victorinus libro Erudit. Theologicæ Tract. v. ait in Jordane institutum baptismum, *quia ibi collata est aqua illa efficacia, ut quicumque postea mergeretur in nomine Trinitatis, consequeretur benedictionem.* Utitur eadem ratione S. Thomas. Adde inverisimile, nequaquam esse Christum in Jordane non solum accepisse baptismum;

mum, sed etiam baptizasse Joannem, & tunc consecratis aquis bap-  
 tismum suum instituisse. Joanni quippe dicenti Mat. 111. 14. *Ego*  
*a te deo baptizari, & tu venis ad me?* respondit Dominus, *Sine*  
*modo;* quasi diceret, Ego te consecratis aquis postmodum baptiza-  
 bo. Certe a Domino baptizatum Joannem scribit præcatus Nazian-  
 zenus: & Hieronymus in cap. 111. Matth. Tom. 1v. pag. 11. *Pul-*  
*bre dixit, Sine modo, ut ostenderet Christum in aqua; Joannem a*  
*Christo in spiritu baptizandum:* quæ verba accipi nequeunt de baptis-  
 mate martyrii, quo postea Joannes baptizandus erat; hanc enim ex-  
 positionem addit quoque Hieronymus, præmissa particula, *sive aliter,*  
 qua innuit se aliquid novi dicturum. Ad hæc affirmo Christum occa-  
 sione baptismatis sui, præsentibus discipulis *formam* tradidisse, qua  
 ipsi tingerent, ad eamque comprobandam Patris testimonium, &  
 speciem columbæ accessisse: nam id contigit Domino jam baptizato,  
 & cum ascendisset de aqua, Matth. 111. 16. & Lucæ 111. 22., aut  
 dum baptizaret Joannem, aut dum instituti a se baptismi rationem  
 exponeret: atque iccirco Ambrosius lib. 1. de Sacramentis cap. 5.  
 num. 15. scribit Spiritum sanctum descendisse, *cum Dominus noster*  
*Jesus Christus formam baptismatis daret,* Tom. 2. pag. 352. Divinitus  
 quoque revelatum fuit Sanctimoniali Ordinis nostri Veronicæ de Bi-  
 nasco, a Domino jam baptizato tinctum Joannem, Tom. 2. Bollan. pag.  
 908. Denique etsi in Jordane solus baptismus Joannis fuisset collatus,  
 nullaque *forma* nostri baptismatis tradita; sufficit ad Sacramenti in-  
 stitutionem, ut *materia* determinata sit, & *forma* illa aperte com-  
 monstrata, quibus baptismus Christi esset suo tempore conferendus;  
 unde S. P. Augustinus serm. 63. de diversis, nunc 51. cap. 23. num.  
 33. ait: *Et quamvis esset illud baptisma Joannis: in eo tamen sen-*  
*sibiliter apparuit Trinitas Patris & Filii & Spiritus sancti, qui con-*  
*secratus est ipsius Christi baptismus, quo baptizandi erant futuri*  
*Christiani.* Ex his diluuntur facillime cetera. Quando enim Chri-  
 stus misit discipulos ad baptizandas gentes, non instituit baptismum,  
 sed præcepit, ut jam instituto gentes initiarent, nec solis Judæis,  
 verum etiam paganis cum cœlestem doctrinam, tum Sacramenta im-  
 pertirentur. Spiritus sanctus visibili quidem specie super Apostolos  
 in die Pentecostes descendit, sed ipsis, aliisque antea datus fuerat  
*invisibiliter;* & a quo jam acceperant sanctificationis gratiam, de-  
 nati tunc fuerunt charismatum largitate. *Spiritus sanctus* (inquit  
 Augustinus q. 62. inter LXXXIII.) *latenter dabatur ante Domini*  
*clarificationem, post manifestationem autem Divinitatis ejus manife-*  
*stus datus est. Et hoc dictum est, Spiritus autem nondum erat datus,*  
*idest, nondum sic apparuerat, ut omnes eum datum esse faterentur:*  
*sicut etiam Dominus nondum erat clarificatus inter homines, sed ta-*  
*men clarificatio ejus æterna nunquam esse desistit.* Ibidem S. Pater  
 de-



demonstrat datum antea Spiritum sanctum Davidi, Elisabeth, Zachariæ, Annæ, Simeoni, productis Scripturarum testimoniis. Ante passionem verò baptismum Christi datum a discipulis, & quidem confluenti multitudini, quam ad Christum mittebat Præcursor, dictum est supra. Baptizabat ergo Dominus *presentiâ majestatis*: propria autem manu non quemlibet indiscriminatim, nonnullos tantum, Joannem nempe, ac Petrum, nec non Virginem matrem, quam a Domino baptizatam narrat citato loco Euthymius ex veterum traditione. Ab Apostolo autem baptizati dicimur *in morte Christi*, quoniam per gratiam *in novitate vitæ* ambulamus, sicut Christus surrexit a mortuis per gloriam Patris: quem sensum tradit ibidem Paulus, explanatque Augustinus cap. 11. num. 14. Enchiridii. At agrumentum Estii nullius est roboris; siquidem illis verbis, *Nisi quis renatus, &c.* non exprimitur institutio baptismatis, sed necessitas: quemadmodum iis, *Nisi manducaveritis carnem filii hominis*, Joan. vi. 54. necessitas quidem probatur, at non institutio Eucharistiæ. Hæc ad argumenta, producta 1. num.

Ad ea, quæ urgentur ex Patribus, sic respondemus. Non oportet, ut ad confirmandam opinionem Scholæ, suffragium afferat traditio universa: sufficit, si innixa ea sit plurium auctoritati. Tertullianus præterea, Chrysostomus, ac Theophylactus ducuntur momento illo, quod nondum datus esset Spiritus sanctus, quod ex dictis obviæ habet solutionem. Ex horum quoque Patrum testimoniis sequeretur, nec in Jordane, neque ullo ante adventum Spiritus sancti tempore Sacramenta ulla fuisse efficacia, nec Eucharistiæ in ultimæ Cœnæ institutum tribuisse spiritalis gratiæ ubertatem. Jure ergo præferimus Augustini, aliorumque sententiam, satis operâ etiam nostrâ communitam. Nam quod S. Pater ait Sacramenta promanasse de Christi latere, illud de merito & efficacia accipiendum est, non de Sacramentorum institutione; alioqui tunc instituta quoque fuisset Eucharistia. At Ambrosius jure dixit *potestatem baptizandi*; aliud est enim baptismi institutio, aliud mandatum, præscriptio, intimatio: quæ duo optimè distinguit S. Thomas. Etiam verba Leonis Magni referri debent ad mandatum & publicam baptismi promulgationem: etenim seq. num. 6. inquit de Christo, *Tunc regenerationis potentiam sanxit, quando de latere ipsius profluxerunt sanguis redemptionis, & aqua baptismatis*. Si tunc, quomodo postea? In Jordane instituit, in cruce confirmavit, ascensurus in cælum generali intimatione, præscripsit ipsius regenerationis lavacrum.

Postremas argumentationes ita infringam. Ut baptismus vim suam atque energiam habeat a passione Christi, sat est si eadem passio prævisa fuerit. Ad institutionem verò requiri actum Legislatoris negant permulti; addit D. Thomas Christum, dum baptisma suscep-

pit, impleſſe munus Legislatoris, quoniam inchoavit ea, quæ ſunt novæ legis. At ego repono non ideo Chriſtum inſtituiſſe baptiſmum in Jordane, quia a Joanne baptizatus eſt, ſed quia dum baptizatus eſt tribuit aquis vim regenerativam: quod nego humilitatis tantum, non etiam auctoritatis ac poteſtatis fuiſſe exercitium. Ad ultimum ſactor non omnem *materiæ ac formæ* designationem ſufficere ad inſtitutionem Sacramenti; neceſſaria eſt enim materiæ determinatio, & conſecratio per verba, quæ ſenſibili ſigno vim tribuant produciendi gratiam; quam vim Chriſtus in domo Phariſæi accumbens nulli dedit, ſed ipſe divina poteſtate peccata pœnitentis mulieris abſteſit. Accedit hanc eſſe inter baptiſmum, & pœnitentiæ Sacramentum differentiam, quod in baptiſmo in neminem exercetur *Judicium*; in pœnitentia autem pœnitentes *per Sacerdotum ſententiam* ab admiſſis peccatis abſolvuntur, ut ſequenti cap. 2. eadem ſeſſione xlv. docet Synodus Tridentina. Quare merito Pœnitentiæ Sacramentum præcipue inſtitutum dicitur, cum Dominus a mortuis excitatus inſufflavit in diſcipulos ſuos, dicens, *Accipite, &c.* quoniam *tam inſigni ſacſto, & verbis tam perſpicuis, poteſtatem remittendi & retinendi peccata, ad reconciliandos fideles poſt baptiſmum lapſos, Apoſtoliſ, & eorum legitimit ſucceſſoribus fuiſſe communicatam, univerſorum Patrum conſenſus ſemper intellexit*, inquit eadem Synodus Oecumenica.

PROP. II. Quamvis baptiſmus ante mortem Chriſti fuerit inſtitutus, præceptum tamen illum ſuſcipiendi non obſtrinxit, ſaltem generaliter, ante Evangelicæ legis promulgationem.

Pertraſtat hanc quæſtionem S. Bernardus epift. 77. ad Hugonem, nunc inter Tractatus Tom. iv. pag. 118. ubi primum oſtendit eſſe a ratione alienam opinionem Hugonis Farſiti aſſerentis neminem ullatenus potuiſſe ſalvari abſque baptiſmo, ex quo primum dictum a Domino legimus, *Niſi quis renatus fuerit, &c.* Hæc vcrò argumenta, Bernardus aſſert. Primum *durum nimis auſterumque videtur, ut verbum adhuc abſconditum palam jam noceat*. At prædicta Domini verba privatim uni Nicodemæ dicta fuerant, qui etiam nocte ad Jeſum venerat, Joan. 111. 2. Deinde baptiſmus eſt Sacramentum fidei: *Fidem vcrò neceſſe eſt, ut auditus præcedat, dicente Apoſtolo, Ergo fides ex auditu*, ad Rom. x. 17. Præterea non deſuerunt *alia præter baptiſmum contra originale peccatum remedia, ut circumciſionis Sacramentum in hoc ipſum divinitus traditum*: quod non ſubito evanuit, ſed cum ſuper teſta clamatum fuit, *Si circumcidamini, Chriſtus vobis nihil proderit*, ad Galat. v. 2. Concludit Bernardus ſeq. cap. 2. baptiſmi obligationem cœpiſſe primum poſt ſufficientem ejus promulgationem: *Ex eo tempore tantum* (inquit) *cuique cœpit antiqua obſervatio non valere, & non baptizatus quiſque novi præcepti reus exiſtere, ex quo præceptum ipſum inexcusableiter ad ejus poſuit per-*  
ce-

*venire notitiam*; affirmatque parvulis, & necdum ratione utentibus, quibus sola nocere creditur peccati contagio, *tandem antiqua valuisse Sacramenta, quandiu palam interdicta non fuisse confiterit*. Hæc Bernardus: cujus sententiam amplexatus est Hugo Victorinus, Scotus, Estius, Turnely, alique complures. Legi poterunt Mastrius quæst. 1. de Baptif. inst. art. 2. & Frassen q. 2. art. 1. concl. ult. Subscribo huic sententiæ, tum ob propositiones a D. Bernardo productas; tum ob doctrinam Trident. Concilii sess. vi. cap. 4. docentis translationem ab eo statu, in quo homo nascitur filius primi Adæ, in statum gratiæ & filiorum Dei per secundum Adam Jesum Christum, Salvatorem nostrum, fieri non posse sine lavacro regenerationis, aut ejus voto, *post Evangelium promulgatum*; atque huc referentis quod scriptum est, *Nisi quis renatus fuerit, &c.*

Thomistarum tamen permulti, Soto, Medina, Gonet, Gotti, alii tenent obligationem baptismi statim cœpisse post resurrectionem, quod probant, quoniam Christus Matth. ult. 19. legem baptismi promulgavit discipulis, ideoque ex eo tempore cœpit lex baptismi obligare, inquit Gonet disp. 1. §. 4. & Cardin. Gotti quæst. 111. dub. 2. num. 7. Deinde inquirunt ex Apostolo ad Hebr. vi. 12. *Translato Sacerdotio, necesse est, ut legis translatio fiat*; unde Augustinus, ac Hieronymus, quamvis dissentirent de observatione Legalium, ambo tamen illa extincta & mortua fatebantur. Id etiam probant ex quo in cruce omnia fuerint consummata; ideoque Christus clamavit, Joan. xix. 30. *Consummatum est*. Denique ajunt promulgationem legis necessariam quidem esse, ne excusationem valeant prætexere qui ipsam legem *invincibiliter* ignorant: sed tamen qui latam norunt a principe, & promulgatam in aula, tenentur eidem obtemperare.

Quamquam his plura reponit Mastrius art. 3. non mihi talia videntur, quæ jure assertioni nostræ opponantur: siquidem nec Thomistæ negant necessariam notitiam legis, ut alios obstringat. Quemadmodum ergo nos assentimur Scotistis, & necessariam fatemur legis promulgationem, ut obliget omnes universim; ita Thomistis concedimus sufficere privatam notitiam, ut nequeat ignorantia excusare eos, qui *voluntariè* contemnunt remedia salutis. Non enim aliud docet citata Epistola D. Bernardus, ubi testatur ideo non obligasse legem baptismi ante promulgationem, *quia tale hoc inquisitum humano non poterat addisci magisterio*, neque hujusmodi ignorantia erat quæ non habet excusationem, qua scilicet *scienda nesciuntur, aut sciendi incuriâ, aut verecundiâ inquirendi*. Si quis ergo antepublicam Evangelii promulgationem scisset quæ tacitè Christus docuerat Nicodemum, nec ignorasset extinctam in Christi morte legem circumcisionis; is quo remedio aut sibi, aut parvulo originali cul-

pa obstricto confuisset? ex qua ignorantia habuisset excusationem? Eam ob rem consultò propositioni particulas illas affixi, *saltim generaliter*. Ex adductis tamen Thomistarum probationibus non videntur singulæ ineluctabiles. Siquidem ea verba, *Euntes ergo docete omnes gentes*, &c., si postremum Matthæi caput conferatur cum ultimo Marci, dicta videntur non statim post Domini resurrectionem, sed cum adscensusus esset ad Patrem. E contra verba illa, *Consummatum est*, protulit Christus in ultima vitæ periodo; unde ante Resurrectionem, ac in triduo mortis cœpisse obligationem baptismi tenent quidam D. Thomæ discipuli, ut testatur Petrus de Cabrera Tom. 3. p. 972. Vide nostram de Legalium fine dissertationem lib. xx. cap. 10.

## C A P U T IV.

*De Aquæ elemento, idest, de materia Baptismi.*

**M**odo de Baptismi *materia*: circa quam erraverunt quamplurimi. Ac missis iis, qui negarunt Sacramenta quælibet sensibilia, Gnosticis, de quibus Irenæus lib. 1. cap. 18. nunc 21. num. 4. Ascodrupitis, & Archonticis, de quibus Theodoretus lib. 1. Hæret. fabul. cap. 10. & 11. tom. iv. pag. 201. Cajanis, de quibus Tertullianus de Baptis. cap. 1. atque aliis quibusdam, qui superbo cognomine *Spirituales* sunt appellati; his inquam missis; baptismum in aqua repudiarent Manichæi, autumantes elementum illud a principio malo productum, apud Augustinum de Hæres. cap. 46. His Bellarminus lib. 1. de Baptismo cap. 2. accenset Paulicianos, qui in Sacramentis res materiales averfabantur, eo quod Dominus dixerit in Evangelio, *Ego sum aqua viva*, ex Euthymio p. 2. Panopliæ cap. 21. Opponit vir acerrimi ingenii Honoratus Tournely quæst. 1. art. 2. huiusmodi hæreticos errasse circa baptismi efficaciam, non circa *materiam*, cum eo loci Euthymius scribat, *Illi infantes suos presbyteris baptizandos offerunt*. At Tournelius fallitur. Scribens enim eo in loco Euthymius, *Evangelii verba baptismum existimant*, demonstrat Paulicianos aquæ elementum substituisse, & Sacramentum perfecisse *sola pronuntiatione verborum*, ut Bellarminus ait, & cum ipso Vasquez disput. 141. cap. 1. Juenin. q. 3. cap. 1. Auctor Op. de Re Sacram. q. 2. cap. 1. necnon Vossius disp. 1. th. 2. Deinde cum Pauliciani Manichæi essent, non potuerunt in Sacramento adhibere aquam, quam putabant a malo principio conditam: quare illos paullo post Euthymius refellit, scribens: *Quomodo in re a malo confecta boni ille parris filius bonus baptizatus inde ascendit?* Probat etiam infra Damaskeni, Basilii, aliorumque adductis testimoniis, non solum *spiritu*, verum etiam *aqua* homines baptizandos, cum consent. animo, &

cor-

corpore, quorum illud sub aspectum cadit, alter non cadit: atque hæc ad refellendos Paulicianos ineptè dicerentur, si *aquam* adhibuissent. De pueris autem Euthymius ait, *Liberos etiam suos ab Ecclesiæ presbyteris saluari baptismo volunt aliquando lustrari*, non quod Pauliciani baptismum ipsum probarent, sed ut adjumentum afferrent corporibus, quemadmodum, inquit, *Salutarem crucem ex ligno confectam sibi ipsis imponunt, deinde si convaluerint, eam perfringunt, aut conculcant*.

Præter istos materiam baptismi esse *aquam* negarunt apud Augustinum de Hæresib. cap. 5. Seleuciani, vel Hermiani. Quidam censent hos pro aqua posuisse *ignem*, ductos Joannis verbis de Christo, *Ille vos baptizabit Spiritu sancto, & igni*. Ita Estius dist. 3. §. 7. & Alphonsus de Castro lib. 1. adversus Hæreses, & Cardinalis Gotti q. 1. dub. 3. Incertum tamen, an hi ignem adhibuerint, scribunt Vasquez, ac Tournelius citato loco. Ex Augustino quidem id unum infertur, hæreticos illos non accepisse *baptismum in aqua*: & hoc tantum colligi ex Philastrio censent Gotfridus Olearius in dissert. de Baptismo, & in notis ad Philastrium Galeardus. S. Philastrii hæc sunt verba, pag. 40. *Animas hominum de igne, & spiritu esse existimantes, isto baptismo non utuntur, propter verbum hoc, quod dixit Joannes Baptista, Ipse vos baptizabit in spiritu, & igne*. Videtur mihi Tournelius Vasquesio, & Galeardus Oleario nimium fidere. Philastrius enim scribens, *Isto baptismo non utuntur*, & causam afferens, *propter verbum hoc, quod dixit Joannes*, alium baptismum, idest, *ignis*, significat, præsertim quod Seleuciani animas hominum *in igne & spiritu* constituentes, facile poterant credere latitantes illas in corpore purgari igne, & quodammodo instaurari. In Anathematismis, quos olim resiliens ab hæresi Manichæorum, Ecclesiæ tenebantur offerre, memoratur & Hermas; & dicitur anathema iis, *qui rejiciunt salutarem baptismum, umbelicis autem infantium combustis utuntur ad animarum purificationem*. Vide Tom. 1. Patrum Apost. pag. 539.

Quidquid sit de his hæreticis, *ignem* in baptismo complures adhibuisse compertum est: ac primum eo usi sunt nonnulli hæretici, qui jactabant, statim ac in fontem descenderent, super aquam ipsum ignem apparere, eoque baptizatos habere *integrum perfectumque lacrum*, non, sicut nos, decurtatum & mutilum. Meminit horum hæreticorum Anonymus Scriptor de Baptismo Tom. 1. Concil. pag. 783. & Martene de Ritib. baptismi lib. 1. art. xiv. Affricant permulti, etiam Bellarminus, & Turnelius, errorem hunc Jacobitis præsertim Coptis, ex Bernardo Lutsemburgenfi in Catalogo Hæret., addunt quidam & Aethiopes. Sed primum dici potest veterum nonnullos *ignem* adhibuisse, non tanquam materiam baptismi, sed veluti si-  
gnum

gnum effectus, quemadmodum mel, lac, vinum, ut nititur demonstrare Hugo Grotius in cap. 111. Matth. Deinde Aethiopes baptizare *aqua* constat ex Ord. Baptismi secundum illorum usum Tom. xxv11. Bibl. PP. p. 642. Idem eruitur ex relatione Damiani a Goes Tom. 11. Hisp. illustratæ. Aethiopes præterea ajunt accepisse se baptismi ritum ab Eunuchio Reginæ Candacis, quem appellant Indich, & quem baptizatum aqua legitur Act. v111. De Jacobitis major suspicio est, quod iis tribuat causticum baptismum etiam Jacobus de Viatriaco cap. 76. Hist. Orientalis, Marinus Sanutus, Matthæus Parisius, & alii citati pag. 130. a Solerio: sed nota, ibidem Vitriacum ipsum testari se ab incolis accepisse, ignitas cruces a se brachiis inuri, *ad paganorum distinctionem, & ob sanctæ Crucis reverentiam*: istud vero aut consimile signum etiam hodierni Copti in brachiis ostentant, quos tamen certum est baptismali cauterizatione non uti. Ludolphus lib. 111. Hist. Aeth. cap. 6. n. 41. fabulam illam extundit testimonio Gregorii Habessini: atque his monemur, ne singulis auctoribus fidem adhibeamus. De Catharis exortis sæculo duodecimo, assentimur Egberto Bunnensi ferm. v111. Tom. xx111. Bibl. Patrum, pag. 615. nam & antiquiores Messaliani, quorum illi germen sunt, apud Theodoretum lib. 1v. H. Fab. cap. 11. repudiabant *aqua luvacrum*, ex Manetis utrique propagine. Ex hoc Theodoreti loco inferitur Hermiam, unde Hermiani, fuisse antesignanum Messalianorum, ex quibus Cathari: si ergo hi ex Eckberto baptizabant *igne*, idem censendum est de Hermianis. Atque id comprobatur quæ supra diximus.

Fuerunt, qui non per aquam baptizarent, sed per *oleum*, de quibus citato loco ex Thuribio Asturicensi Edmundus Martenc: quidam alii, ut refert Egbertus Eboracensis in Excerpt. cap. 42. aquæ commiscendum *vinum* existimant. Nonnulli sedente Stephano III. puerum in solo vino baptizarunt: quidam alii Gregorio IX. Pontifice Maximo, cum deesset aqua, baptizarunt *cervisia*. Baptizandum vino, aut quovis alio liquore, si nullo modo aqua haberi possit, tenet etiam Beza Epist. 2. ad Thomam Tilium. Memoria autem fessellit eundem Beza, ibidem scribentem non aliter sentire Scholasticos; quod notat etiam Vossius disput. 1. Th. 5. Lutherus in Colloquiis Symposiacis, idest, convivalibus, cap. 7. pariter asseruit sufficere ad baptismum *quicquid loco balnei esse potest*. Videtur habere originem error iste, ex quo valeat excitare fidem quicquid habet cum ablu-tione per Christi sanguinem facta, aliquam *analogiam*. Hinc opinionem illam adoptarunt Novatorum complures. Hi cum necessitate, aquæ negant ejusdem consecrationem, quam Calvinus lib. 1v. Instit. cap. xv. 19. ait appellandam potius *incantationem*, Tilmanus Heshusius in Errorib. Papist. num. 27. *manifestam magiam*, & Magdeburg. cent. 2. cap. 2. *alicujus Pontificis Ebraici inventum*: quod & de aliis aquæ

aquæ benedictionibus tradunt. Duo sunt itaque hoc loco demonstranda; primum baptismatis materiam esse aquam, & quidem naturalem ac veram: alterum recte, & ex antiquorum præscripto baptismalem aquam solemnî benedictione ritueque consecrari.

PROP. I. Sola naturalis aqua Sacramenti baptismatis materia est.

Id primo evincunt præclara baptismatis symbola, in quibus præsignatam Spiritus sancti energiam aquæ Sacramento collatam, agnoverunt eximii Patres Ecclesiæ. Ambrosius enim de Mysteriis cap. 3. Tom. 2. pag. 328. prænunciatam operationem divinitatis elemento aquæ insidentem ostendit a mundi origine, cum Spiritus Domini ferebatur super aquas Gen. 1. 2. Addit diluvium, quo terra a carnali immunditia purgata fuit, Noe receptum in arcam, columbam dimissam, & cum oleæ ramo reversam, Gen. vii. & viii. Profert & figuram baptismatis expressam in mari, & in nube, testimonio Apostoli confirmatam, 1. ad Corinth. x. 2. Addit fontem Mara immisso ligno figura Crucis factum dulcem, ac Naamanum Syrum in Jordane mundatum a lepra. Agit proximo capite de piscina Siloe, in quam descendebat cælestis Angelus. Hæc omnia fusiori stylo profequitur lib. 1. de Sacramentis, & sequenti. Eadem profert S. Hieronymus Epist. 82. ad Oceanum Tom. iv. pag. 650. exemplis allatis aliis, firmamenti quod ex aquis sortitur vocabulum, pennatorum, quæ de aquis egressa ad cælum levantur, puteorum, quos repugnantibus Allophylis foderunt Abraham & Isaac, fontium, a quibus Bersabee civitas, regnumque Salomonis nomen sumpsit, adinventæ prope aquas Rebeccæ, salutatæ ibidem Rachelis, vindicatarum a Mose filiarum Sacerdotis Madian. Producit & Præcursores baptismum juxta Salim, primum Christi signum patratum ex aquis, Samaritanæ vocationem ad puteum, & fusam è Christi latere aquam. Nec aliter Augustinus lib. 2. ad Simpl. num. 5. lib. xii. contra Faustum cap. 15. & 16. aliisque in locis. Nec dicas Augustinum appellare figuram baptismatis etiam Circumcisionem lib. vi. contra Jul. cap. vii. num. 18. hæc enim non materiæ Sacramenti figura erat, sed effectus, quatenus præsignabat *expoliationem corporis carnis*. II. Hieronymus præcitato loco de gratia, quæ confertur baptismate aquæ, docet accipienda veteris testamenti loca, Ps. 28. 3. *Vox Domini super aquas, Dominus super aquas multas*. Cant. iv. 2. *Greeges tonsarum, qua ascendunt de lavacro, omnes gemellis satibus*. Ezech. xxxvi. 25. *Et effundam super vos aquam mundam*, &c. III. Aperta sunt novi Testamenti loca Joannis 1. 5. *Nisi quis renatus fuerit ex aqua, & Spiritu sancto*. Matth. xxvi. 11. 19. *Euntes docete omnes gentes, baptizantes eos*, &c. Act. viii. 36. *Venerunt ad quamdam aquam, & ait Eunuchus: Ecce aqua, quid prohibet me baptizari?* Ad Ephes. v. 26. *Mundans lavacro aquæ in verbo vitæ*. In quibus verbis animadvertendum

tendum est præter occultam conscientiae emundationem, præter vim verborum, & Spiritus sancti virtutem, expresse designari sensibile aquæ elementum, ut demonstravi primo capite adversus Socinum, confirmatque tam verborum distinctio, quam praxis sanctorum Apostolorum. Apposite Augustinus Tract. xv. in Joannem num. 4. *Sed forte ait aliquis, Baptizat quidem Christus in Spiritu, non in corpore. Quasi vero alterius dono, quam illius, quisquam & Sacramento corporalis & visibilis baptismatis imbuatur. Vis nosse quia ipse baptizat non solum spiritu, sed etiam aqua? Audi Apostolum: Sicut Christus, inquit, dilexit Ecclesiam, & seipsum tradidit pro ea, mundans eam lavacro aquæ in verbo. Mundans eam. Unde? Lavacro aquæ in verbo. Quid est baptismus Christi? Lavacrum aquæ in verbo. Tolle aquam, non est baptismus: tolle verbum, non est baptismus.* IV. Extant præterea de materia baptismi definitiones Ecclesiae. Gregorius IX. anno 1241. in rescripto ad Archiepiscopum Nidrosiensem de baptizantibus in Norvergia ob aquæ penuriam cervisia, apud Raynaldum ad hunc annum, ait: *Cum sicut ex tua relatione didicimus, nonnunquam propter aquæ penuriam infantes terræ tuæ contingat in cervisia baptizari, tibi tenore præsentium respondemus, quod cum secundum doctrinam evangelicam oporteat ex aqua & Spiritu sancto renasci, non debent reputari rite baptizati qui in cervisia baptizantur.* Florentinum Concilium in Instru. Armenorum, *Materia, inquit, hujus Sacramenti est aqua vera & naturalis.* Ac Tridentinum sess. vii. can. 2. *Si quis dixerit aquam, veram & naturalem non esse de necessitate baptismi, atque ideo verba illa Domini Jesu Christi, Nisi quis renatus fuerit ex aqua & Spiritu sancto, ad metaphoram aliquam detorserit, anathema sit.* V. Docent hoc idem Patres. Tertullianus de Bap. cap. 1. Cajanos aquæ baptismum abjicientes comparat aspidibus, regulisque serpentum, *qui arida & inaquosa sciscitantur.* Sed nos, ait, secundum *ΙΧΘΥΣ* nostrum *Ιησοῦν Χριστὸν* pisciculi in aqua nascimur. Vocabulum, *ΙΧΘΥΣ*, piscis, revocat in memoriam nostram, quod scribit Augustinus lib. xviii. de Civ. Dei cap. 23. Sibyllam Erythræam Acrostichidem de Christo Jesu conscripisse in capitibus versusum ordinem literarum ita habentem, *Ιησὺς Χριστὸς Θεὸς υἱὸς αὐτοῦ, quod est Latine Jesus Christus Dei filius Salvator.* Refert ibidem Augustinus Sibyllina carmina latinitate donata, & Græce Vives in Comment. ex Eusebio aliquantulum tamen errata: quare adeas Sibyllas Oporopoei pag. 380. *Horum autem Græcorum quinque verborum, inquit ibidem Augustinus, quæ sunt, Ιησὺς Χριστὸς Θεὸς υἱὸς αὐτοῦ, si primas literas jungas erit ΙΧΘΥΣ, idest, piscis, in quo nomine mystice intelligitur Christus.* Vide & Optatum lib. 111. de Schif. Donatist. pag. 52. & Panvinium de Sibyllis. At hæc ad intelligentiam potius textus Tertulliani, quam ad materiam baptismatis. Hanc esse omnem



omnem aquam naturalem, ejusdemque speciei cum producta initio creaturarum rerum, asserit cap. 4. idem Tertullianus. *Nemo dicat, inquit, numquid ipsis enim aquis tingimur, quæ tunc in primordio fuerunt? Non utique ipsis nisi ex parte, quod genus quidem unum, species vero complures; quod autem generi attributum est, etiam in species redundat: ideoque nulla distinctio est, mari quis, an stagno, flumine, an fonte, lacu, an alveo abluatur.* Exscribere aliorum testimonia in re notissima, necesse non est. VI. Etsi vero in his, quæ divinam habent institutionem, investigemus non oportet rationem humanam; videtur tamen non potuisse determinari pro Sacramento regenerationis materiam faciliorem, magisque congruam. Repetit S. Thomas congruentiam istam 3. p. q. 66. art. 3. ex rerum seminio, quod philosophi quidam posuerunt *aquam*. Gratulamur hoc in loco, Doctorem Angelicum recurrere ad principium universale, quod nos statui-  
mus lib. xi. cap. 3. Legimus Gen. 1. 3. Spiritum incubasse aquis; ac de Baptismo Tertull. cap. 3. ait: *Primus liquor quod viveret edidit: ne mirum sit in baptismo, si aqua animare noverunt.* Lege Orat. habitam in Trident. Concilio a Joanne Villetano Tom. xiv. pag. 1627. Addit S. Thomas symbolum internæ ablutionis, & recte ob scripturæ loca num. 2. producta. Ambrosiaster Interpres Pauli in vi. caput ad Rom. pag. 59. App. scribit: *Ideo per aquam celebratur, ut sicut aqua sordes corporis abluit, ita & nos per baptismum ab omni peccato spiritualiter purgatos vos & innovatos credamus.* Tertio loco addit Angelicus mysteria passionis Christi: hujusque causæ rationem proferit Chrysostomus Hom. x. in Paulum pag. 103. quoniam, *quod Christo crux & sepulcrum, hoc nobis baptisma fuit, quamvis non iisdem rebus: ille enim carni & mortuus & sepultus est, nos autem peccato utrumque.* ὁ αὐτὸς τοῦ σώματος καὶ νεκρὸς καὶ ταφὴς, καὶ οὗτος αὐτὸς τῆς ῥαπίδος καὶ ζήσης, καὶ καὶ μὴ ἐστὶν ὁ αὐτὸς. αὐτὸς μὴ γὰρ σαπὶ καὶ ἀνίσταται καὶ ἰσχύει, οὗτος δὲ ἀμαρτίας ἀποτίνα. Accedit aquam esse passionum typum, ut dixi cap. 1. Hinc S. Cyrillus Hierosolymit. Catechesi 2. Mystagogica pag. 521. baptismum appellat *eorum, quæ Christus perpeffus est, similitudinem*, καὶ τὴν ἁγίαν παρὰμύτην ἀντίτυπον. Assignat S. Thomas & aquæ *communitatem*; nempe congruebat Sacramento apprime necessario materies ubique obvia & facillima. Vide Catech. Romanum P. 2. de Baptismo num. 10. Affert rationes alias Estius dist. 3. §. 8. sed præcipuas jam tenes. VII. Cum præter baptismi aqua Matt. 111. & Lucæ 111. fiat mentio baptismi ignis; illud tandem ostendam, quàm in-  
scite usi quidam fuerunt baptismo caustico. Ac primò hujus interne-  
civi baptismatis apud nullos veterum extat vestigium, nisi in consi-  
cto libro, qui inscribitur *Prædicatio Pauli*: in quo libro absurda,  
multa congesta narrat prælaudatus Scriptor Anonymus inter Opera  
Cypriani. Hujusmodi sunt, Christum propria peccata confessum, pene  
To. VI. V u invi-

invitum compulsus a matre ad accipiendum Joannis baptismum, ignem in Jordane super aquam delapsus, ac Petrum & Paulum in urbe Roma primum sibi invicem fuisse cognitos. Eckbertus autem ferm. viii. adversus Catharos narrat horum antesignanos Arnoldum & Theodoricum, qui studuerunt exinanire baptismum aquæ constitutum a Domino, ipso igne, quo unus Colonæ, alter Bunnæ baptizari voluit, miserrime absumptos; ideoque *justissimo judicio factum est, ut sic in igne baptizarentur, ut ab eo irrevocabiliter devorarentur*. Quod legitur denique in Evangelio, *Ille vos baptizabit Spiritu sancto, & igni*, aut metaphorice, aut literaliter accipere volumus. Si primum, *ignis* significat *Spiritus sancti virtutem*, ut inquit præcitatus scriptor Anonymus: si alterum dicis, non ad lavacrum regenerationis hæc verba referenda sunt, sed vel ad effusionem Spiritus sancti super Apostolos, vel ad postremam mundi conflagrationem, & purgationem, quod supra demonstravi cap. 2. Scripturarum contextu, & testimoniis Sanctorum. Adeas, plura si cupias, Chrysostomum Hom. xi. in Mat. pag. 104. Cyrillum Catech. xvii. pag. 439. Theophylactum in Lucam pag. 325. & ex Latinis Hieronymum in Matth. Tom. iv. pag. 11.

Corruunt ex dictis omnia adversantium objecta. Ac primò opponunt locum, de quo modo disserui. Deinde objiciunt qui aquam & materiam excludunt omnem, verba Joannis, *Ego baptizo vos aqua, ipse vos baptizabit in Spiritu sancto*; quo in loco videtur antithesis demonstrare lavacrum Joannis corporeum esse, baptismum Christi spirituales. Sed liquet ex cap. 2. id verum esse, si accipiatur de effectu; secus, si fiat sermo de *materia*, quam necessariam ad Sacramentum regenerationis commonstrant cum alia Scripturæ loca, tum ratio Sacramenti; quæ in signo sensibili sita est. Innuit vero Joannes quantum suum a Christi baptismate differat; cum illud aqua corpus abluat, istud vero Spiritus largitate sanctificet animam. Obijciunt & cavillulum alterum, Joan. 111. 5. ea verba, *Ex aqua & Spiritu sancto*, idem sonare, atque ex spiritu aqueo, quod supra diximus esse excogitatum a Grotio. Verum si id accipias de Spiritus sancti energia, quæ insit aquis, gratanter concedimus; si de spiritali baptismo prorsus invisibili, rejicimus inter hominum commenta. Ipse enim textus, *ἐν ὕδατι καὶ πνεύματι*, ex aqua & Spiritu sancto, quemadmodum & alii præcitati, utrumque ponit, aquam, & spiritum. At inquis, Grotius hic unum spiritum intelligi firmis argumentis confirmat. Ait Christum dedisse operam, ne diutius Nicodemus allegoricæ locutionis ignorantia nutaret: Matth. 111. 11. per verba *in spiritu & igne*, significari *ἰσὶν δὲ δύο, unum per duo, spiritum & ignem*: ita Act. xvii. 25. *ὃς καὶ πνεῦμα, vita & inspiratio*, idem esse ac *πνεῦμα ζωῆς, inspiratio vitæ*; ad Coloss. 11. 8. *δὲ τῆς φαντασίας καὶ νοῦς*

καὶ ἡ σκία, per philosophiam & inanem fallaciam, idem sonare, ac per inanes fallacias philosophiæ: Matth. 1v. 16. Ἐργαὶ αὐτοῦ καὶ ἡ σκία θανάτου, in regione & umbra mortis, esse idem, ac, in regione umbra mortis. Me non latet Grotium hæc omnia proferre ad demonstrandum aquam esse symbolum Spiritus sancti, non ad excludendum sensibile Sacramentum, sed quoniam incaute plura e Socinianis esibens, incaute, etiam evomuit; dicimus nihil nobis esse negotii cum Grotio, quem ad ejus adoratores refellendos, non ad instruendos Catholicos interdum laudavimus. Sane hæc argumenta contra jaculatores intorquentur. Si enim Nicodemus allegorico sermone decipiebatur: cur Dominus iterum aquæ allegoriam obtrudit? At constat ex sola lectione illius capitis, Nicodemum hæsitasse ad Christi sententiam, Nisi quis renatus fuerit, eam intelligendo de renascentia carnali: ac Dominum respondisse de alia longe dispari se loqui, de ea nimirum, qua homo renascitur ex aqua & Spiritu sancto. Cumque & ista nondum Israelita satis perciperet, addidit Christus se de cælestibus loqui, & posse Spiritum, qui ubi vult spirat, etiam per aquam hominem regenerare. Quid his mysteriis erat opus, nisi de aquæ baptismo Dominus pertractasset? Sat erat reponere, Solo spiritu homo regeneratur. Sed vide Augustinum Tract. xi. in Joan. num. 6. Exempla allata aquam non excludunt, sed comprobant. Locis enim illis receptis, ad hunc modum ratiocinabor: Quid est inspiratio vitæ? vita sensibili inspiratione collata, Quid vero fallacia inanis philosophiæ? latens in syllogismis philosophorum deceptio. At quid regio umbræ mortis? habitans in scelerosis factis exitium, Ita per spiritum aqueum, si ita fas sit efferre, intelligo spiritum occulta energia operantem in aquis; præsertim cum has ad peccatorum remissionem Apostolos adhibuisse divina tradant eloquia. Ceterum baptismum constare extrinseca quoque ablutione, ostendimus priori capite adversus Socinianos.

Præter hæc objicies: Joannes Moscus, cognomento Eviratus, in Prato spirituali cap. 176. Tom. 2. vet. Bibl. PP. refert Judæum, quemdam in deserto vehementi febre correptum, & præ solis æstu ardore, ac siti fere resolutum, ab itineris comitibus postulassee baptismum; cumque deesset aqua, baptizatum arena ter super eum injecta, ac ita regeneratum in nomine Trinitatis, imposito ei nomine Theodori: subito vero virtute baptismi convalescere, quod ejus validitatis indicium est. Narrat consimile factum Nicephorus lib. 111. cap. 37. etsi unum, idemque censent plurimi; at illud contigit sub Aurelio Antonino, Dionysio Episcopo Ascalonita; istud Dionysio Episcopo Alexandrino, sub imperio Philippi ad Episcopatum evecto.

Resp. ex utraque Mosci, & Nicephori narratione probari oppositum. Moscus enim refert Judæum illum repente quidem sana-

tum ob ardentissimum baptismatis desiderium, sed cum pervenisset ad urbem Afcalonem, *Visum beato Dionysio mittere fratrem illum ad sanctum Jordanem, ibique baptizari.* Nicephorus pariter, *Postquam autem domum sunt reversi, rem eam ad Dionysium Alexandria Episcopum retulerunt. Ille vero admiratione stupens Ecclesiam consuluit, cui visum est aqua insuper ad eum modum initiatum juxta Ecclesie traditionem ablundum esse.* Quantum ad Historiam attinet, arbitror & ego a Mosco & Nicephoro narrari factum idem, & hunc errasse circa Dionysii personam. Primo quia circumstantiæ utriusque narrationis coherent, adolescentis Judæi, deserti loci, repentinae oppressionis, ingesta arenæ, restitutæ salutis, ac nominis Dionysii. Deinde quia Nicephorus scribit id contigisse Marco Aurelio Antonino, quo imperante fuerunt Episcopi Alexandrini Celadion, & Agrippinus, non Dionysius; quare si ad tempora Marci Aurelii hæc historia esset referenda, contigisset sub Dionysio Episcopo Corinthiorum, ut visum Baronio ad an. 181. num. 2. Floruit enim Dionysius Corinthius juxta Chron. Eusebii pag. 170. Marco Antonino imperante. Denique Moscus ait id narratum *Alexandria ab Andrea Abbate*; quod causam prodit, cur Nicephorus pro Dionysio Afcalonita scripserit *Alexandrinum.*

Denique objiciunt qui probant vinarium baptismum, fat esse ad Sacramenti materiam *analogiam* cum ablutione animarum, quæ analogia inest cuique liquori, vino præsertim, quo vulnera absteruntur & sanantur. Addunt rescriptum Stephani III. qui de Presbytero, a quo baptizatus fuerat infans vino, ait, *Si in vino quis propterea quod aqua non inveniebat, periclitantem infantem baptizavit, nulla exinde ei adscribitur culpa. Infantes sic permaneant in baptismo.*

Resp. materiam Sacramenti non solum habere *analogiam* cum re quam significat, sed etiam divinam institutionem; cum Sacramentum sit *signum divinitus institutum*: non enim penes hominem est sensibili signo efficaciam gratiæ alligare, immo nec immutare *sigillum*, quo nomine Novatores insigniunt Sacramentum. Quis enim, nisi falsarius, pro sigillo Principis aliquid signaculo alio firmaret? Vide præced. libri cap. 1. Ad rescriptum Stephani varia adhibentur responsa. Nat. Alex. sæc. VIII. cap. 1. art. 6. ait sic habere quidem editionem Sirmondi, sed illic mendum cubare. Tom. VII. Conciliorum pag. 1652. adnotatur, ibi a librario *glossæ temere intrusum*, quo deleta absolvitur quidem presbyter ab excommunicatione, sed non probatur baptismus: nonnulli tribuunt ea responsa, non Romano Pontifici, sed Stephano Tornacensi. Sirmondus denique, qui primus hæc edidit ex MS. Laudunensi, animadvertit eadem responsa privatim data Monachis Britaniacensibus, cum idem Codex habeat in fine, *Expliciunt quæ Dominus Papa Stephanus in Carisiaco villa Britaniaco Monasterio ad interrogata de-*  
dit

*die responsa.* Respondemus ergo primum videri supposititium illud responsum Stephani, cujus nec Collationes canonum, nec Scriptorem aliquem invenimus meminisse : deinde affirmamus malè literis exaratum : tertio, ut liberalissimi simus, privatam opinionem dicimus, non Pontificiam definitionem : tandem post citata verba sequitur, *Si aqua fuit præsens, ille presbyter excommunicetur, & pœnitentia submitatur, quia contra canonum sententiam agere presumpsit.* Supponit itaque juxta canones materiam baptismi esse solam aquam, piamque baptizantis ignorantem excusat. Obiter nota Stephanum, quem cum Onuphrio nostro, ac Baronio *Tertium* diximus, appellari ab aliis compluribus secundum. Baronium & Onuphrium, ideoque & nos acriter reprehendit Pagius ad annum 752. num. 13. sed immerito; nam Stephanum illum, qui post Zachariam ab universo populo electus, & in Lateranense Patriarchium immissus, tribus tantum diebus supervixit, nos verum Pontificem esse contendimus. Rationes, ne nimium evagemur, vide in notis ad Anast. Tom. IV. pag. 227. Quod diximus de Responso Stephani, dicimus de alio Siricii, citato in Pœnitentiali Theodori, & in quibusdam Codicibus a Tournelio laudatis : cum enim non inveniatur in Romanis Archivis, neque in aliqua canonum collectione, neque citati Codices consentiant, nunquam denique in Romana Ecclesia opinio de baptismo in vino obtinuerit, imò nec ætate Siricii fuerit audita ; jure, meritoque affirmamus & Siricii responsum spurium esse, aut saltim adulteratum.

PROPOSITIO II. Non est Ecclesiæ Romanæ recens usus, sed a Patrum traditione derivatus, ac retinendus, consecratio & benedictio aquæ baptismi deservientis.

Tamet si nihil evincerent Novatores, si baptismalis aquæ consecratio novæ esset disciplinæ, cum immutandorum rituum pro temporum opportunitate habeat Ecclesia plenissimam facultatem ; ut appareat tamen impudens illorum audacia, dum nobiscum antiquos orthodoxos omnes condemnant, secundam hanc thesim primo loco monumentis Patrum firmamus. Benedictionis namque baptismalis aquæ mentionem facit Auctor Constitut. Apost. lib. VII. pag. 381. & lib. VIII. pag. 411. Basilii de Spiritu sancto cap. 27. Tom. 2. p. 211. repetens ipsam benedictionem ex traditione Apostolica inquit : *ἐὐλο- γούμεν δὲ τὸ ὕδωρ τοῦ βαπτίσματος, καὶ τὸ ἕλαιον τῆς χρίσεως, καὶ προσέτι αὐτὸ τὸ βαπτίσμα.* ἀπὸ τοίνυν ἱερῶν ; Benedicimus autem aquam baptismatis, & oleum unctionis, ac præterea ipsam qui baptismum accepit. Ex quibus scriptis ? Cyrillus Hierosolymit. Catech. III. pag. 52. *Ut illa, inquit, quæ in aris effruntur, cum natura sunt pura, invocatione demonum impura efficiuntur, sic contra aqua simplex per sancti Spiritus & Christi invocationem accepta virtute, sanctitatem consequitur.* ὅτι καὶ τὰ τῶν βωμῶν προσεργόμενα τῇ φύσιν ὅσα ἀτάκα

μεμνησμένα γίνονται τῇ ἐκπαίδει τῇ οὐρανῇ, οὕτως ἀποκαταστήσει τὴν κτλ. ὡς  
 πνεύματος ἁγίου καὶ Χριστοῦ ὡς τὴν ἐκπαίδει λατὼν δυνάμει, ὁρίσσετε ἰσακτάτω.  
 Cyprianus Epistola 70. pag. 269. *Oportet ergo mundari & sanctifi-*  
*cari aquam prius a Sacerdote, ut possit baptismo suo peccata hominis*  
*qui baptizatur abluere.* Ambrosius de Myst. cap. 3. num. 14. *Aqua*  
*sine predicatione Dominicæ crucis ad nullos usus futura salutis est:*  
*cum verò salutaris fuerit crucis mysterio consecrata, tunc ad usum*  
*spiritualis lavaeri & salutaris poculi temperatur.* Monuimus alibi,  
 Ambrosium agere de usu & consuetudine, non de jure, ut in-  
 quunt, & validitate, Idem Ambrosius lib. 1. de Sacram. cap. v.  
 num. 18. *Forma baptismatis & usus hoc habet, ut ante fons consecre-*  
*tur, & tum descendat, qui baptizandus est. Nam ubi primum in-*  
*greditur Sacerdos, exorcismum facit secundum creaturam aquæ, in-*  
*vocationem postea & precem deservit, ut sanctificetur fons, & ad se*  
*presentia Trinitatis æternæ.* Ob tam præclara testimonia Bullinge-  
 rus, Albertinus, Dallæus, & hæretici alii hæc Opera Ambrosio ab-  
 judicant, luridisque pingunt coloribus, sed perperam, cum negare  
 nequeant Auctorem, quisquis sit, ante octavum saltem sæculum  
 floruisse, & vetustas ceremonias memorasse aut juxta Ecclesiæ Medi-  
 olanensis ritus, aut juxta Gallicanæ Ecclesiæ consuetudinem. Au-  
 gustinus serm. 352. num. 3. *Quia baptismus, inquit, idest salutis*  
*aqua, non est salutis nisi Christi nomine consecrata, qui pro nobis*  
*sanguinem fudit, cruce ipsius aqua signatur.* Vide & Victorem Vi-  
 tensensem de Persecut. Vandalica, aliosque laudatos a Joseph Vicecom.  
 lib. 1. de Antiq. rit. cap. 14. Martene lib. 1. art. 14. Hugone Menardo in  
 notis ad Sacram. Gregorii, not. 306. & Notif. I. edita a Prospero Card.  
 Lambertini, nunc BENEDICTO XIV. His addi possunt vetera Græ-  
 corum Euchologia apud Goarium pag. 353. Ordo Baptismi, qui tri-  
 buitur Severo Alexandrino Tom. IV. vet. Bibl. PP. pag. 50. Sacra-  
 mentarium Gregorii Tom. 111. pag. 72. antiqui Rituales libri,  
 laudati a Martene art. 18. Sacram. Romanæ Ecclesiæ editum a Cardi-  
 nali Thomasio lib. 1. n. 44. Missale Gothicum, quod Cardinalis Bona  
 lib. 1. Rer. liturg. cap. 12. scriptum asseruit ante annos nongentos,  
 editumque ab ipso Thomasio. Adde Ordines nationum ceterarum, de  
 quibus Iodocus Coccus lib. v. art. 8. Ex his liquet nullam esse in  
 Orbe Catholico nationem, quæ a vetustis temporibus aquam pro  
 baptismo conferendo non consecraverit. Tertio loco pervetustum  
 morem consecrandi aquam commonstrant antiqua Baptisteria, non  
 aliâ constructa ratione, quàm ad sacram lympham solemnî sacratam  
 ritu, loco digniori servandam. Anastasius quidem Bibliothecarius  
 de S. Pio I. Pontifice Maximo electo anno 142. scribit, *Fontem bap-*  
*tismi construi fecit, manu sua benedixit, & consecravit.* Constanti-  
 nus in Lateranensi Basilica ædificavit sanctum fontem ex metallo  
 por-

*porphyretico ex omni parte coopertum intrinsecus , & foris , & desuper , & quantum aquam continet ex argento purissimo in pedibus , qui pensavit argenti libras tria millia & octo . Vide Anast. Tom. 1. pag. 39. De antiquo Fonte Medionalensi versibus S. Ambrosii exornato , necnon de Pisano , legendus eruditus Ciampinus p. 2. vet. Monum. pag. 22. Meminit Baptisteriorum , quæ hæretici incendebant S. Athanasius in Epist. Encyclica ad Episcopos Tom. 1. pag. 113. De iisdem verba facit lib. xxii. de Civit. Dei cap. 8. & in libro de Cura pro mortuis gerenda S. P. Augustinus . Dixi constructa baptisteria ad servandam aquam solemnî benedictione consecratam : unde Paulinus de Baptisterio , quod ædificaverat Severus , scripsit Epist. xii. pag. 142.*

*Dives opum Christo , pauper sibi , pulchra Severus  
Culina sacratîs fontibus instituit .*

Accedunt postremo loco miracula , quæ consecratam pro baptismo aquam mirè commendant . De qualibet aqua benedicta scribit Epiphanius hæc. xxx. num. 12. *magnam habere vim ad magicas artes , maleficiaque omnia reslinguenda* . Baptismali verò sanatum mendicum quemdam a podagra , & a paralyti mimum Curubitanum scribit citato loco Augustinus . Eamdem aquam ad preces Sacerdotum proficere inquit lib. viii. variar. lect. Cassiodorus . Divinitus in vacuum piscinam diffuere , & huc , illucque fluere , dum sabbato Paschæ benedicitur apud Osen Lusitanæ campum , narrat Greg. Turonens. de Gloria Martyr. cap. 24. necnon Baronius ad an. 548. num. 10. De aqua in insula Arcipelagi , nec non apud ceteras Orientales Ecclesias in die Epiphaniarum consecrata , post Allatium , & Pagium , nos etiam scripsimus Volum. v. pag. 538. A Latinis pariter benedictam persistisse apud nonnullos incorruptibilem demonstrat exemplis compluribus Jacobus Gretserus lib. 2. de Benedict. pag. 103. Adde singulare , quod anno præteriti sæculi vigesimo contigit in Monasterio Haldenslebeni prope Magdeburgensem civitatem , ubi fons baptismalis per sexaginta annos incorruptus permanfit ; intruso autem illuc Lutherano ministro statim computruit . Vide Christianum Lupum P. v. in canones pag. prioris editionis 328. Comprobant itaque consecrationem aquæ baptismalis traditio Patrum , consuetudo Ecclesiarum , Baptisteriorum ornatus , rerumque mirabilium eventus.

## C A P U T V.

*Resolutio dubiorum quorundam , quæ movent de materia  
Baptismi Tractatores moralis Theologiæ.*

**I**nquirunt primò quid sit aqua vera & naturalis , quam esse materiam baptismatis dictum est hætenus . Sed communis sensus huic  
quæ-

quæstioni responsum exhibet. Aqua est enim elementum illud, *quo ad necessaria quotidie utimur*; unde ita appellatam volunt Grammatici ex *A*, & *Que*, quasi a *qua vivamus*. Græci appellant *ti usup* ab *in*, *pluo*, *fluo*, pleonasmò literæ *A*. atque hoc nomine vocatur ab Aristotele, & Xenophonte aqua pluvia, ab Homero flumen, & mare. Plinius initio libri xxxi. aquam dicit elementum, quod *ceteris omnibus imperat*. Augustinus, a quo non dissentiunt philosophi, ait aquam esse *undam labilem*, & elementum *labiliter fluxum*, de Gen. ad lit. lib. 2. cap. 11. & lib. 3. cap. 7. Indubitatum est ergo sufficere ad baptismum aquam quamlibet *naturalem*, sive scateat e fontibus, sive fluviis præterlabatur, sive fluctuet in mari, sive in stagno, aut puteo contineatur. Produximus præced. cap. Tertulliani locum insignem. De Victore Papa legitur in Pontificali, quod tribuitur Damaso, & apud Anast. Tom. 1. pag. 16. *Constituit, ut necessitate faciente ibi, ubi inventus fuisset, sive in flumine, sive in mari, sive in fontibus, tantum Christiana confessione credulitatis clarificata, quicumque hominum ex gentilitate veniens, ut baptizaretur*. Nota id tantum licere, si emergat necessitas, mortisque periculum. II. Quoniam mutatio tantum accidentalis non immutat elementi naturam, indubitatum est ritè conferri baptismum sive aqua calida sit, quæ Græci dicuntur tingere; sive frigida sit, aut sulphurea, aut purulenta, aut resoluta ex grandine, pruina, vel nive. Hac tamen postremo commemorata, nisi soluta sint, non sunt ad baptizandum idonea, quia cum materia Sacramenti quamdam habeat cum effectu similitudinem, sitque naturæ suæ *signum* alterius rei, concreta illa corpora nivis, glaciei, grandinis, cum non consent particulis actu fluxis, & ad abluendum aptis, nequeunt censerī elementum illud, quod est Sacramenti *materia*. Pari ratione affirmamus cum D. Thoma quæst. 66. art. 4. validum esse baptismum, si per naturam, aut per artem talis fiat aquæ immutatio, quæ illius *speciem* non solvat; ut si colore aliquo tincta sit, si odore affecta, si permixtione terrestrium particularum turbida, si decoctione carnum, modò *species* permaneat, transmutata. III. Afferendum est nullum esse baptismum, si adhibeantur ea, quæ licèt abluendi vim habeant, aqua tamen censerī nequeunt, ut vinum, cervisia: cujus generis sunt & sudor, lacrymæ, lac, aliaque, de quibus etiam Martinus Bonacina de Baptif. disp. 2. dub. 3.

## II.

Sed difficilior est quæstio de aqua rosacea, necnon de ea, quæ ex arboribus, vitibusque promanat, si nulla alia aqua sit in promptu. His validum conferri baptismum negant quamplurimi, immò fere omnes Theologi. Tenent nihilo tamen minus oppositum ex nostris Joannes Puteanus 3. p. q. 66. art. 4. dub. 1. Franciscus Farvacques q. 2. de Baptismo



paſſimo §. 3. nec opponitur his Vanroy cap. 1. q. 2. Ducuntur verbò his momentis. Primum aqua è floribus igne ſubjecto expreſſa, vera, & naturalis eſt; in mixtis quippe elementa verè perſiſtere communis eſt Medicorum, & Chymicorum opinio, longe veriſimilior quorundam Peripateticorum decretis. Deinde plerique Theologi hætenus negarunt aquam roſaceam eſſe idoneam baptiſmo materiem, quoniam *forma ſubſtantiæ* differt ab aqua naturali, & communi. At *formas ſubſtantiales* relegarunt e Democriti, & Epicuri ſchola rediviſi philoſophi: iſſdem etiam *formis* admiſſis, aqua roſacea, quæ cum aqua naturali majorem habere videtur affinitatem, quam habeat aqua quorundam fontium, ab ea diſtinctam ſubſtantialem *formam* non habet. Præterea ſi naturalis aqua non foret, quæ ex floribus, herbisque exprimitur, id eſſet, quia clibano artificiali ſtillatur: at ſi id probaret quidquam; nec eſſet naturalis ignis ille, qui è ſilice percuſſo elicitur: qui tamen artificialis *quoad modum*, non *quoad ſubſtantiam* poterit nuncupari. Infirmum præterea eſt argumentum, quod iſtiusmodi aquæ ſint odoriferæ; nam dictum eſt paullo ſupra, odorem non immutare ſubſtantiam: ac omnes fere fontes aquas emittunt diverſis præditas qualitatibus. *Arbores pariter aquam ad ſe trahunt ex humo radicum opera, velut fiſtulis; atque adeo avertuntur fontes & ſcaturigines ne profluant; propterea caſu ſylva fontes promaſſe compertum eſt*, inquit apud Farvaqueſium Majolus. Afferuntur & quæ ſcribit Joannes Dicatillo tract. 2. de Baptiſ. dub. 3. diſp. 3. collectas brevi tempore ex vitibus amphoras aquæ, colore, ſapore, & odore ab elementari parum, aut nihil diverſæ, & apud Indos homines & pecora bibere aquam, quæ jugiter fluit ex arboribus, nec ullum ſentiri hujus ab aqua naturali diſcrimen.

Nullum hæc argumenta apud me robur habent. Principio enim probo monitum præclari auctoris de Re Sacrament. Tom. 1. pag. 134. *de vera & naturali aqua* ex communi hominum uſu, non ex diſputationibus philoſophorum judicium ferendum eſſe. Deinde etiam ex Philoſophiæ principiis prædictæ argumentationes mihi videntur infirmæ. Et prima quidem; nam etſi demus elementa permanere in mixtis, qua de re digladiantur phyſici, nemo tamen negat corporum permixtione immutari naturas rerum. Ita, etſi aqua permaneat in vino, in hydargyro, & in aquis mulſis, aut cauſticis; inſcitè, ut opinor, dixeris retinere hæc corpora *naturalis aqua* ſubſtantiam: atque idem videtur aſſerendum de aqua roſacea particulis analepticis, ſeu mercurialibus, unde odor promanat, ac volatili ſulphure, tenuique oleo, non permixta ſolum, ſed *undique incorporata*. Quare aquam hanc, aliasque clibano fabricatas, nec aquas *ſine nominis additamento* appellamus, cum ſuccus ſint potius, ac humor attractus, *χυμὸς* proinde, non *ὕδωρ*. Videtur etiam Florentina Synodus *aquam* *To.VI.* natu-

*naturalem* communi sensu accepisse: nam alioqui hæc verba forent superflua. Præterea quamvis Rituale Romanum posteriorum editionum, ubi *rubrica* leguntur stylo magis contracto, definiat tantum materiam baptismi esse *aquam veram & naturalem*; editum Romæ iussu Gregorii XIII. apertè explicat quid sit aqua hæc naturalis, docens pag. 17. *Materiam hujus Sacramenti esse aquam veram & naturalem, ut fontium, puteorum, maris, fluminum, lacuum, stagnorum, paludum, cisternarum, & pluvialem, & sic quamcunque simplicem, & puram, quæ propriam aquæ speciem retineat; nec referre frigida sit, an calida: non autem esse aquam artificialem, ut ex rosis, floribus, herbis, seu similibus rebus expressum, aut distillatam, neque alium quævis liquorem*. Imbelles est etiam argumentum petitum ex nova Philosophia: in qua dencgatur utique *substantia* a materia distincta, at non *forma substantialis* discriminans rerum species, & in certa permixtione corporum sita. Nec sunt ejusdem naturæ corpora omnia quæ disfluunt, quamvis plurimum habeant communis materiæ, idest, aquei humoris. Ejusdem farinae est quod additur, arbores humorem trahere ex aqua transvecta radicum vehiculis; & hæc namque in visceribus plantarum confecta oleosis, sulphureisque particulis induit diversam naturam, cum aqua sit in nostra sententia catholicum rerum corporearum principium. Nisi id eveniret, aqua naturalis forent oleum, vinum, nec non humani coporis humores: in quibus invalide baptizari definit Innocentius III. cap. *Nonus apponeres*, de Baptismo. Si autem aqua ex cortice arborum, & ex vitibus stillans retineat *speciem* suam, quod evenire potest si arbor meatus ampliores habeat, per quos transeat immunis, ut inquit de vitibus Murciæ, & de plantis Ombrii Dicaſtillo; non debet id statuere regulam universalem. Itaque quantum ad me spectat, sententiam Puteani, & Farvacquesii non approbo, amplectorque oppositam, non solum inter Theologos, verum etiam inter JCC. lib. 111. Decret. tit. 42. communem.

At si nulla aqua haberi possit præter rosaceam, & expressam ex floribus, conferendus ne erit baptismus? Utique, respondet nuper Augustinianus Scriptor Antonius Guerrero Tom. 1. pag. 416. & ait hanc esse communem opinionem; quoniam fas est urgente necessitate uti materia dubia. Perperam ergo Scriptor iste oppugnavit præc. pagina Farvacquesium; nam is adhibendam aquam rosaceam docuit *in extremo tantum periculo*. Si quis ergo opinetur prædictam aquam esse materiam probabilem, poterit eam sub conditione adhibere, nempe, *Si hæc aqua est materia sufficiens, ego te baptizo, &c.* Si autem amplecti velit sententiam nostram, eamque, (si excipias Baunium, Chamerotam, Puteanum, & duos, aut tres alios) communem; cum non sit probabile, sed apertè falsum, aliam aquam præ-

præter *veram & naturalem* esse materiam baptismatis, neque in casu necessitatis fas est cum aqua è rosis, aliisque floribus, aut plantis expressa aliquem baptizare. Vide Andream Mendo in Statera opinionum benignarum dissert. ix. quæst. 1. & Emmanuelem Gonzalez in 111. Decret. tit. 42. pag. 844.

III.

Inquirunt preterea, an leve crimen debeat existimari, si baptizans pro aqua consecrata, sacroque Chrismate delibuta, quam facillè habere queat, adhibeat communem atque profanam: ut apud Antonium Dianam Tract. 111. Miscell. Resol. 33. tenent Quintanadvennas, & Granado, alique vix nomine noti. At quæ præc. capite diximus de aquæ baptismalis consecratione, abunde refellunt hujusce opinionis laxitatem. Hæc ergo refutatur primò productis eo loci Basilii, Ambrosii, aliorumque testimoniis. Addimus visum quibusdam veterum consecrationem illam esse prorsus necessariam, cujus sententiæ videtur S. Cyprianus in præcitata Epist. Synodica ad Januarium, & ceteros Episcopos Numidas Tom. 1. Concil. pag. 762. Extat etiam apud Gratianum de Consecrat. dist. v. cap. *Numquid*, decretum Stephani V. *Numquid baptismatis unda, nisi cruce sanctificata, peccata relaxantur?* Quæ tamen, ut diximus de consimili Ambrosii loco, accipienda sunt de more atque consuetudine: unde Glossa Decreti, *Refert factum, quia sic fit*. Accedit divinorum signaculorum dignitas, & commendatio Sacramentorum, de quorum materia ait S. Pater de Catechiz. rudib. cap. 26. num. 50. *non sic habendam illam speciem benedictione sanctificatam, quemadmodum habetur in usu quolibet*.

Quid verò, si baptismus solemnî ritu non conferatur? In hoc etiam casu, si aqua consecrata haberi queat, culpandus est qui eam non adhibet. Enimverò tenent momenta eadem, quod res divina peragitur, & assumitur elementum, non ad quemlibet usum, sed ad animarum emundationem. Sane sævientibus persecutionibus, quando Sacramenta non poterant solemniter celebrari, religioni tamen duxerunt Patres ac Martyres baptizare aquâ tantummodo consecrata. Aperta sunt quæ narrantur de Aproniano baptizato a Sisinio Diacono, de Artemia Diocletiani filia, & Jobia filia regis Persarum, quas baptizavit S. Cyriacus, & de aliis, quorum exempla singulis obvia sunt.

C A P U T VI.

*De ablutione, sive de materia Baptismi proxima.*

**E**lementum aquæ *materiam* baptismi *remotam* vulgo appellant; aquæ verò usum, aut abluendi modum, *materiam proximam*,

de qua instituimus modò disputationem. Triplicem enim modum abluendi diversis temporibus novimus obtinuisse, immersionem, infusionem, aspersionem; immersionem præterea olim trinam, postmodum simplicem fuisse in usu receptam. Nullam autem hac in parte litem intentant nobis Lutheri, aut Calvini sectatores, qui baptismum, sicuti apud nos moris est, tenui infusione, aut adspersione ministrant; sed funem contentionis ducimus cum Græcis schismaticis, qui antesignano Marco Ephesio, post solutam Synodum Florentinam, inter ceteras istam separationis suæ prætexuere causam, baptismum a se mersione trina collatum alium esse a baptismo, quem infusione præbet Romana Ecclesia, & ideo hanc a vera fide descivisse, scribente ad Ephesios Paulo, 1v. 5. *Unus Dominus, una fides, unum baptisma*. Itaque adversus Græcos fœdisragos, quemadmodum trinam immersionem fuisse quondam servatam non diffitemur, ita negamus eam ad substantiam baptismatis pertinere; atque ut ordinem debitum dissertatio ista teneat, priscam consuetudinem, hujus varietatem, atque desuetudinem demonstrabimus. Poterit autem qui nostram lucubrationem aut mutilam, aut elumbem compererit, adire Juenium disert. 11. cap. 3. q. 2. Tournely q. 1. art. 3. Habertum cap. 111. aliosque recentiores, nisi oportunitatem magis ei videbitur perlegere qui de sacris ritibus pertractarunt, ac præsertim Josephum Viccomitem lib. 1v. cap. 6. Martenium lib. 1. art. 14. & Hugonem Menardum in notis ad Sacrament. Gregorii: quibus addi velim Joannem Ciampinum in Explicat. quorundam Sarcophagorum Tom. 11. Vet. Monum. Barnabam Brissonium de Spect. & feriis, & ex Acatholicis Joannem Gerardum Vossium disput. 1. de Bapt. thesi 6. & sequentibus. Diatribe autem nostra hoc procedit incessu.

PROP. I. A priscis Ecclesiæ sæculis obtinuit consuetudo baptizandi per immersionem, & quidem trinam.

Immersione baptizatum Dominum videntur innuere ea verba Matth. 111. 16. *Baptizatus autem Jesus confestim ascendit de aqua*; quibus recitatis Hieremias Constantinopolitanus Resp. 11. ad Wittebergenses cap. 4. *Ascendit, inquit, ex aqua: ergo ante descenderat. Ecce immersio, non adpersio*. Nil vtro probabilius, quam ad similitudinem Dominicæ humilitatis tinctos primitivæ Ecclesiæ fideles. II. Et quidem olim collatum fuisse regenerationis lavacrum trina mersione probant vetera monumenta, quæ etsi a non obesa naris criticis revocantur indubium, antiquam tamen consuetudinem auctoribus suis compertam esse suadent. Hujusmodi sunt, canon 49. Apostolicus, *Si quis Episcopus, vel presbyter, non tria unius mysterii baptismata perfecit, sed unum baptismum, qui datur in mortem Domini, deponatur*. *Ἐὰν τις ἐπίσκοπος, ἢ πρεσβύτερος μὴ τρία βαπτίσματα μὴς μόνως ἐπέποιήσῃ ἐν τῇ θανάτου τοῦ κυρίου δίδωμι, κατακλιθεῖ*. Atque

que hunc canonem esse unum ex receptis a Romana Ecclesia, constat ex dictis Tom. iv. pag. 169. Dionysius de Ecclesiastica Hierarchia, cap. de Baptism. *Ter illum Episcopus mergit, hac trina illius mer- sione & emersione tres beatitudinis divinae personas inclamans. Τὴν μὲν αὐτὴν ὁ ἱερεὺς βαπτίζει τὰς τρεῖς τοῦ ταμίου καταδύοντι καὶ ἀνιδύοντι τὴν τρεῖς τῆς θείας μακαριότητος ἐκδόσεις ἐκείνων. III.* Certiora & indubitata ex ant traditionis hujus apud Patres vestigia. Tertullianus de Corona Milit. cap. 3. *Dehinc ter mergitamar: & contra Praxeam cap. 26. Nec semel, sed ter ad singula nomina in personas singulas tingimur. Tres item merfiones commemorant alii Patres, Ambrosius lib. 2. de Sacram. cap. vii. num. 20. Hieronymus adversus Luciferianos, & in cap. 4. Epist. ad Ephesios, Leo Magnus Epist. ad Episcopos per Siciliam constitutos, Bern. in serm. de Cœna Domini. IV. Nec tantum Patres id innuunt, verum etiam hujus trinae merfionis significatio- nem explanant. Ac primo Dionysius de Ecclef. Hierarch. cap. 11. num. 8. in trina immersione & emersione symbolum agnoscit *triam dierum, ac noctium sepultura Jesu, τὴν ὑμνασμένην τὰς τρεῖς ἡμέρας*, quam hujus ritus rationem prosequitur S. Gregorius Epistola ad Leandrum, de qua infra. Tertullianus, & Ambrosius loco citato opinantur eos, qui baptizantur, ter mergi *propter Trinitatis mysterium*: insinuatue eadem ratio apud Grat. de Consecrat. cap. *Eodem modo*, & cap. *Multi*. Rabanus Maurus lib. 1. Instit. Clericorum cap. 28. utramque ratio- nem probat, Dominicæ sepulturae, ac Trinitatis mysterii, additque alteram, nempe, quia *tertio gradu peccati homo in mortem cecidit*. Hujus trinae immersionis usum inter Apostolicas traditiones recensent permulti. Tertullianus de Corona Milit. cap. iv. de ritu merfionis, aliisque præcedenti cap. 3. recensitis, ait: *Harum & aliarum ejus- modi disciplinarum si legem expositales Scripturarum, nullam invenies: traditio tibi prætendetur auctrix, consuetudo confirmatrix, & fides observatrix*. Basilii de Spiritu sancto cap. 27. *ὅτι δι' ἧς βαπτίζ- δαι τὸ ἀνθρώπου, τρίς; Ter autem immergi hominem, unde? ac re- spondet, ὅτι ἐν τῇ ἀδυναμίᾳ ταύτῃ καὶ ἀποψίτῃ διδάσκαλος; nonne ex minime publicita, & arcana hac traditione?* Hieronymus pariter adversus Luciferianos: *Multi, quæ per traditionem in Ecclesia obser- vantur, auctoritatem sibi scripta legis usurpaverunt, velut in Iova- cro ter caput mergitare*. VI. Idem comprobant antiquiores Rituales libri. Vide Officium Græcorum, ejusque varias lectiones apud Jaco- bum Goar pag. 357. Ritus baptizandi apud Aegyptios pag. 58. Li- brum Sacramentorum Gelasii editum a Thomasio e Ms. 900. annorum, pag. 84. Codicem S. Remigii Remensis ejusdem vetustatis apud Mar- tene lib. 1. cap. 1. art. xviii. ord. 8. & antiquum Ordinem Roma- num de Divinis Offic. Tom. xiii. Bibl. Patrum pag. 697. In Sacra- mentario Gregorii typis edito non memoratur trina merfio; quam- tamen*

tamen præcipiunt vet. Mss. Remense, Corbejense, aliaque laudata num. 323. a Menardo.

PROP. II. Non fuit tamen ad sæculum usque xiii. trina mersio ita communiter recepta, ut probatus aliquando non fuerit baptizatus, aut infusione, aut unica mersione collatus.

Obtinuisse enim ritum baptizandi per immersionem etiam terdecimo sæculo, constat ex D. Thoma 3. p. q. 66. art. 7. ubi ait tutius esse baptizare per immersionem, *quia hoc habet communior usus*: obiit autem S. Thomas anno 1274. Verum cum ritus ille prævaluerit, immo etiamnum obtineat in Mediolanensi Ecclesia, & apud Comptos, & Jacobitas; non fuit omnino indispensabiliter observatus.

I. De Baptismo per infusionem dato proferit illustria exempla Martene ex vita S. Laurentii, quem baptizasse Romanum militem aqua ex urceo effusa referunt Acta martyris, commonstratque vetus pictura etiam nunc in Basilica S. Laurentii in Agro Verano, ubi Romanus conspicitur sacrum suscipiens a Laurentio lavacrum. Addit vir eruditus Acta S. Gratiliani, S. Bacchi Junioris, & sancti Liudgeri Episcopi, in quibus baptismum infusione collatum ipsa Sanctorum gesta confirmant. Vidit hæc & doctus Tournelius, qui tamen contendit immersionem fuisse *constanter observatam* in solemni baptismo; infusionem vero, aut asperionem aquæ usurpatam solummodo in baptismo privato, & urgente necessitate. At Mabillonius in Itin. Italico pag. 73. & 81. refert dono sibi datas a Ciampino ejusdam tumuli prope Neapolim reperti figuras duas, quibus repræsentatur baptismus per immersionem simul, & superinfusionem collatus. Idem Ciampinus volum. 2. Vet. Monum. cap. 4. proferit in tabula delineatum ex antiquis Sarcophagis baptismum Agilulfi Regis Longobardorum, & Theodolindæ ejus uxoris, in pelvi, sive semidoliolo existentium, & superinfusa aqua tinctos in superiori parte corporis, dum inferiores tantum essent aqua mersæ. Consimilis extat pictura in templo Sanctæ Pudentiæ, de qua idem Ciampinus pag. 20. Imo collatum baptismum infusione aquæ, existentem baptizato extra pelvim, demonstrat alter Sarcophagus Ciampini pag. 16. necnon baptismus Romani, de quo supra, depictus in agro Verano, ubi male scribit Martene S. Romanum cerni *existentem in pelvi*, cum sit extra, nudus, & dextera Levitæ porrigens urceolum alterum aqua plenum, quoddam forte non una, sed trina fieret asperio, aut infusio. Etsi ergo immersio longe apud veteres prævaluerit, obtinuit tamen aliquando infusionis usus.

II. Perfusionem baptizatos *Clinicos*, idest, decumbentes in lecto, constat ex Epistola S. Cypriani 76. ad Magnum. Videtur ibi S. Martyr mirari, cur in ægitudine baptizati *Clinici* appellarentur: *Non invenio*, inquit, *unde hoc nomen assument, nisi forte qui plura & secretiora legerunt, apud Hippocratem, vel Soranum, Clinicos istos depre-*

*deprehenderunt*. Scite, & ingeniose; *Clinici* enim medici dicuntur, quorum princeps Hippocrates. Soranus etiam fuit inter medicos nobilissimus, nec uno in loco laudatur ab Augustino. Lepide Martialis lib. 1. Epigram. 31.

*Chirurgus fuerat, nunc est vespillo Diaulus,  
Cæpit quo poterat Clinicus esse modo.*

Attamen, sicuti qui invifunt decumbentes, ita ægroti *Clinici* dicti sunt *ἀνὶ τῆ κλίνης*, a lectulo, in quo decumbunt. Vide Eusebium lib. vi. Hist. eccl. cap. 43. pag. 244. Horum ergo Clinicorum baptismum, de quo hæsitabat Magnus, quoniam superfusione, non immersione conferebatur, ratum censuit S. Cyprianus, scribens: *Neque enim sic in Sacramento salutari delictorum contagia, ut in lavacro carnali sordes cutis & corporis, abluuntur*. Et post pauca: *Unde apparet adspersionem quoque aquæ instar salutari lavacri obtinere*. Addit: *Et ideo quantum fide concipere & sentire nobis datur, mea sententia hæc est, ut Christianus judicetur legitimus, quisquis fuerit in Ecclesia lege, & jure fidei divinam gratiam consecutus. Aut si aliquis existimat eos nihil consecutos eo quod aqua salutari tantum perfusi sint, sed inanet & vacui sunt, non decipiantur, ut si incommodum languoris evaserint, & convalescerint, baptizentur*. Notes, velim, Cypriani in dijudicanda aliorum opinione sententiam, in sua autem pronuntianda firmitudinem. Profecto baptismum Clinicorum probatur Synodus Neocæsariensis canone xli. Tom. 1. Concil. ad an. 314. alique posteriores, etsi vetuit ea Synodus, ne baptizati in ægritudine ordinarentur in presbyteros, sive quod necessitate potius, quàm electione initiati viderentur, sive Sacerdotii officia implere non possent, quos valetudo ignaros elementorum fidei baptismum suscipere coeisset, ut opinatur in notis ad præfatum canonem Albaspinæus. III. Trinam immersionem circa annum sexcentesium Hispaniarum Episcopi deseruerunt occasione Arianorum, qui ex ea petebant argumentum ad oppugnandam sanctæ Trinitatis consubstantialitatem: inductam vero ab Hispanis consuetudinem approbavit Magnus Gregorius Epistola 43. libri 1. ad Leandrum Episcopum Hispalensem; ubi post multa, quæ etiam a Grâtiano relata sunt in canone *De Trinitate* de Consecrat. dist. 1v. ait Gregorius Tom. 2. pag. 532. *Reprehensibile esse nullatenus potest, infantem in baptismo vel ter, vel semel mergere, quando & tribus immersionibus personarum Trinitas, & in una potest divinitatis singularitas designari. Sed quia nunciusque ab hæreticis infans in baptismo tertio mergebatur, sciendum apud vos esse non censuo, ne dum immersiones numerant, divinitatem dividant, dumque quod faciebant faciunt, se morem nostrum vicisse gloriantur*. Gregorii judicium secutum est, sedente Honorio, an. 633. Concilium Toletanum 1v. canone 6. alijs 5. ubi post Sancti Gregorii verba, legi-

legitur: *Quapropter, quia de utroque Sacramento, quod fit in sancto baptismo, a tanto viro reddita est ratio (trinæ scilicet, aut simplæ merfionis) quod utrumque rectum, utrumque irreprehensibile in sancta Dei Ecclesia habeatur; propter vitandum autem schismatis scandalum, vel hæretici dogmatis usum, simplam teneamus baptismi merfionem; ne videantur apud nos qui tertio mergunt hæreticorum probare assertionem, dum sequuntur & morem. Et ne forte cuiquam sit dubium hujus simpli mysterium Sacramenti, videat in eo mortem & resurrectionem Christi significari: nam in aquis merfio, quasi in infernum descensio est, & rursus ab aquis emerfio, resurrectio est. Item vident in eo Unitatem Divinitatis & Trinitatem personarum ostendi: Unitatem dum semel immergimus; Trinitatem, dum in nomine Patris & Filii, & Spiritus sancti baptizamus. Et hunc Canonem inter decreta retulit Gratianus citata dist. 1v. cap. Propter vitandum. Gregorianæ Epistolæ, & Canonis Toletani meminit Valafridus Strabo de Rebus Ecclesiasticis cap. 26. scribens: *Alii trinam immerfionem volunt in similitudinem triduanæ sepulturæ, ut in canonibus Apostolorum statutum habetur, & Romanorum consuetudo observat; alii unam, propter divinitatis unitatem contendunt, ut in Concilio Toletano plenissime habetur; ubi etiam commemoratur quod beatus Gregorius interroganti super hæc Leandro inter cetera ita responderit, Quia in una fide nihil officit Ecclesiæ consuetudo diversa.* Vide Tom. xv. Bibl. PP. pag. 196.*

Invehitur in Hispanos Alcuinus Epist. 69. ad Lugdunenses pag. 1587. scribens morem illum unius merfionis esse contra universalem sanctæ Dei Ecclesiæ consuetudinem: adversari Apostolo, qui ait nos conscriptos esse in Christo per baptismum, cum Christus triduo in sepulcro permanferit: revinci potius Arianos baptismate, quo ter mergimur, quia in ipso unum apparet Trinitatis Sacramentum. Addit & Ambrosii, ut putat, versus de ternarii excellentia:

*Omnia trina vigent sub majestate Tonantis.  
Tres Pater, & Verbum, sanctus quoque Spiritus unum.  
Trina salutaris species crucis, una redemptrix.  
Tertia lux Dominum remeantem a morte recepit.  
Trina dies Jonam tenuit sub viscera cæci,  
Tres pueri \* cernere Deum flagrante camino.  
Ter Sabaoth sanctum referens benedictio psallit.*

\* cernunt Deum.  
unum.

*Ter mergendus aqua est, cui gratia plena lavacri, &c.*

Negat etiam Alcuinus epistolam de simpla merfione, citatam a PP. Toletanis, a S. Gregorio scriptam fuisse, quod eam non invenerit in Epistolari libro Romæ ad se allato, ut observarunt in notis ad Gregorium Maurini Patres: idque Alcuinus asserit epistola proxima lxx. quæ videtur continuatio præcedentis. Martinus quoque Bracaren-  
fis



His Antistes in Epistola ad Bonifacium, edita Volum. 11. Concil. Hispaniæ pag. 506. reprehendit eos, qui *unam tinctionem fieri voluerunt*; nam si sub uno nomine facta una tinctio unitatem Deitatis demonstrat, ac per hoc error fugitur Arianus; Sabelliana ignorantibus subrepet pestis, dum sub uno nomine una solummodo retenta versio, nullam in Sacramento baptismi monstrat trium personarum distinctionem. Intorquet simile argumentum Gerardus Vossius, disp. 11. thesi 4. pag. 262.

Hæc tamen nullius momenti sunt. Quocunque enim modo conferatur baptismus, si materia & forma servantur, ratus erit, ac validus: neque necessum est, ut versio, aut infusione simpla, vel trina significetur mysterium Trinitatis, aut Christi passio; tum quia Sacramentum est signum gratiæ, non prædicatio duntaxat fidei, gratiam vero commonstrat quæcunque ablutio: tum quia fides, si baptizetur adultus, ab eo petitur, & exigitur, tanquam prævia dispositio; & si tingatur infantulus, id supplet fides gestantium, aut sanctæ matris Ecclesiæ. Deinde in sola forma hæc significantur; unitas vocabulo singularis numeri, *in nomine*; Trinitas, distincta divinarum enumeratione personarum, quæ sane catholico sensu, non Ariano, aut Sabelliano, enuntiantur. Mors etiam Christi una versio demonstratur, quoniam semel sepultus est; nec immersio, & immersio per se signum sunt dierum, quibus Dominus in sepulcro delituit, sed potius resurrectionis & sepulturæ; quamquam versio trina id quoque sit aliquatenus demonstratum. Si enim trina versio, eadem omnino ratione significaret sepulturam Domini, & Trinitatis mysterium; tres simul personæ innuerentur sepultæ. Quare versio, ut versio est, mortem significat Christi, non Trinitatem: hanc vero innuit aut versio numerus, aut personarum enumeratio, aut utrumque. Nihil est ergo in causa, cur Alcuinus ex significatione mysterii recarguat canonem Toletanum. Infirum est pariter argumentum ex traditione depromptum; quamvis enim trina immersio, ut diximus, prævaluerit, obtinuerunt tamen etiam ritus alii: ac præterea traditiones ad solam disciplinam spectantes possunt ab Ecclesia pro temporum opportunitate antiquari. At quod Alcuinus neget Epistolam ad Leandrum esse genuinum Gregorii scriptum, facilius est refutare: Primum enim hæc Epistola Gregorii salivam habet. Deinde illam exhibent codices optimæ notæ. Insuper meminerunt ejusdem Epistolæ S. Isidorus de Script. Eccles. S. Leocinianus Episcopus ad ipsum Gregorium scribens, & Joannes Diaconus in vita Gregorii cap. 53. Tandem fidem omnem superat, quod confecta sit Gregorii Epistola in Synodo, cui præfuit S. Isidorus, frater ejusdem Leandri, ad quem missa fuerat.

At Martinus Dumiensis citata Epistola scribit, baptismum conferen-

To. VI.

Y y

feren-

ferendum non esse *in nominibus Trinitatis*, ac certissime *tertio nomen invocari, & tertio tingui*, Arianum censendum esse. Damnat etiam præsumptionem eorum, qui *pro refugienda Arianorum similitudine*; tinctionem unam fieri voluerunt, priusquam aliqua accederet sententia *Generalis, aut Provincialis Synodi*: quod nempe non debeat unusquisque, ob hæreticorum abusum, propria auctoritate antiquam disciplinam deferere. Licuit ergo Hispanis post Gregorii Epistolam adhibere mersionem simplicam; maxime quod *quidam trinam, quidam simplicam facerent, & a nonnullis schisma suscitaretur, ab aliis crederetur scindi unitas fidei*, ut legitur ipsomet canone Toletano: a quo propterea, *ad vitandum scandalum*, provide definita est una mersio. Vossius autem fallitur, dum ait argumentum Gregorii, & Toletani Concilii non esse tanti ponderis, ut inducenda sit simpla mersio in Ecclesiis, quæ cum Arianis conflictantur. Non id unice spectandum est; sed etiam scandalum schismatis, inducta consuetudo, & opinio eorum, qui contendebant irritum esse baptismum trinæ mersione peractum: quæ omnia narrat Synodus Toletana, eodem Volum. 2. pag. 480. Ceterum tam Gregorius, quam Toletana Synodus utrumque baptismum *rectum, & irreprehensibile* judicarunt, sive collatum una, sive trina mersione. Animadvertas autem, etiamnum in Ecclesia Romana probari, & in usu esse baptismum per trinam immersionem in nonnullis Ecclesiis, eamque adhiberi pro forma & situ baptisteriorum, licet prævaleat usus infusionis, quæ pariter trina, non simpla, est apud Latinos: de qua re vide Rituale Romanum, nec non Synodum Beneventanam Cardinalis Vincentii Mariæ Ursini an. 1693. qui etiam ætate nostra ad summum Pontificatum evectus, ubi baptisterii vas amplum est, propria manu parvulos ter immergebat.

PROP. III. Quocunque ritu conferatur baptismus, sive immersione, sive infusione, sive asperzione, validus est: recte Ecclesia Romana præscribit immersionem, aut infusionem; a Marco autem Ephesio, aliisque Græculis male, nulloque jure reprehenditur.

Quidam priorem partem confirmant exemplo Petri, qui Act. II. 41. una die baptizavit tria millia hominum, & cap. IV. 4. alia die hominum quinque millia. Quomodo enim potuit unus tam ingentem numerum immersione trina baptizare? Profert rationem istam S. Thomas q. 66. art. 7. Ac baptizasse Petrum omnem illam multitudinem eadem die constat ex Scriptura, & ex Epistola IV. Leonis Magni cap. 5. Sunt tamen, qui hanc probationem infirmam putant, ut Vicedomes lib. IV. cap. 6. quoniam veteres baptismum illum ad asperzione datum non asserunt; nec inverisimile est Petrum baptizasse more apud Judæos recepto, in locis ad immersionem idoneis, necnon adjuvantibus aliis, *tum Apostolis, tum Discipulis*, ut inquit Carthusianus:

hiant . II. Quicquid sit de vi probationis hujus ; *invisitæ* sunt aliæ , quæ ex thesi præmissa consequuntur . Et prima quidem , quod stet *Sacramenti substantia* , si verbum accedat ad elementum , necnon analogia , signumque interioris ablutionis , quocumque ritu fundatur aqua : & argumentum quidem istud etiam S. Thomas producit priori loco . Accedunt exempla baptismi infusione collati . Adde probatum a Patribus baptismum *Clinicorum* , & cetera jam commonstrata . II. S. Cyprianus in præcit. Epistola ad Magnum , significari gratiam baptismatis sola adspersione , probat exquisitis Scripturæ locis , ut Ezechielis xxxvi. 25. *Et effundam super vos aquam mundam* . Legit Cyprianus , *Et aspergam* ; atque Num. viii. 7. *Aspergantur aqua lustrationis* . Addit Cyprianus aquam aspersionis appellari a Mose aquam *purificationis* , nec baptismum præsignatum solummodo *in mari* , verum etiam *in nube* superius madefaciente . At initio hujus libri baptismum significare ablutionem quamlibet , satis declaravimus . Probat Cypriani Epistolam Augustinus lib. vi. de Baptismo cap. vii. num. 10. Turnclius pag. 27. laudat ejusdem Augustini verba Tract. lxxx. in Joan. num. 3. *tingentem etiam tantillum mundet infantem* : at nescio , quo jure *tantillum* faciat adverbium . IV. Cum baptisma sit maximæ necessitatis , videtur imperceptibile , datum fuisse trina mersione , aut superfusione , aut animam agente puerulo , aut deficiente aquæ copia , aut ad unum Sacerdotem conflente immensa baptizandorum multitudine ; ideoque nec adhibitam mersionem puto , quando Paulus Act. xvi. 33. baptizavit custodem carceris & domum ejus ; aut quando Petrus in Mamertino carcere , aqua divinitus e saxo erumpente , Processum & Martinianum & quaterdenos milites abluit , quod ita carmine expressit Martha Marchina :

*Clauditur in tenebris hominum Piscator , & inde*

*Bina quaterdenos retia missi trahunt .*

*Vnda deest , Petri virgâ Tarpeia rupes*

*Percussa , & petris larga fluente dedit .*

Ac solam fortasse aspersionem adhibuit Liberius , dum festo die Pen-tecostes *quatuor millia & duodecim* promiscui sexus salutari baptismo exiavit , ut ex Actis Damasi refert Paulus Aringhus Romæ Subterr. pag. 223. Voluminis 1. Atque hæc de priori parte propositionis.

Alteram partem comprobat Ritualc Romanum , editum jussu Pii V. ubi tit. de forma baptismi legitur , *Baptismus licet fieri possit , aut per infusionem aquæ , aut per immersionem , aut per aspersionem , primus tamen , vel secundus modus , qui magis sunt in usu , pro Ecclesiarum consuetudine retineantur* . Et quidem adspersionem perraro adhibitam , aperte ex præmissis monumentis evincitur .

Tertiam partem sic demonstro . Liqueat ex Rituali nuper laudato , & ex Beneventana Synodo , Actisque Mediolanensibus supra ci-

tatis, etiamnum in Ecclesia Latina ritum trinae immersionis adhiberi; *pro Ecclesiarum consuetudine, & forma Baptisteriorum*. Immo Rituale Gregorii XIII. mandat, ut si baptismus per immersionem sit conferendus, *Baptisterium humilius jaceat, ac late patens cum suis gradibus extruatur*. Quo ergo jure affirmant Græci, ritum immersionis a nobis eliminatum? II. Sive immersione, sive infusione tingamus, ter immergimus, aut aquam fundimus. At Græci non ita immersionem putant necessariam, ut complures eorum non utantur superfusione: baptizant enim puerum primum positum, & sinistra in ventre sustentatum, dextera salutarem aquam superfundentes: ideoque immersionem, & infusionem eodem vocabulo designant, ut animadvertit, probatque ex Neophyto Rhodino pag. 365. eruditus Goarius. Nuda ergo battologia nobiscum decertant. III. Sit denique in trina mersione latens mysterium; sit porro: principio istud refert etiam trina effusio; deinde vero, etiam in aqua calida ipsi Græci portentosum aliquid divinant, & nihilominus si frigida ablatur infans, baptismum ratum pronuntiant, ut constat ex canone Synodi Amaxuntinae ibidem producto a Goario, ἡ ἡμεῖς ἐν τῷ ψυχρῷ ὕδατι βαπτίζοντες, ἀλλ' ἐν τῷ ζεῖν. ἀλλ' οὐκ ἐν τῷ ζεῖν τὸ ἐν τῷ χέλει τοῦ βαπτισματος. ἐν δὲ τῷ ζεῖν ἰσχυρὸν ὡς ἐν τῷ ψυχρῷ, idest, *In aqua frigida baptizare non oportet, sed in calida; manifestante nimirum calida fervorem gratia baptismatis: si vero necessitas urgeat, fiat & in frigida*. Ita de trina mersione, aut infusione, quamvis in ea mysterium lateat, ratiocinentur oportet.

Militare videntur adversus primam partem hujus propositionis probationes omnes proposit. I. Et sane urgeri possunt hoc pacto. Canon. XLIX. Apostolicus deponendum censet presbyterum, *qui non perfecerit trina unius mysterii baptismata*. Irritum ergo judicat baptismum absque trina immersione collatum. II. Tertullianus, Hieronymus, Basilii, aliique Patres affirmant trinam mersionem haberi ex traditione Apostolica: nefas est igitur ritum hunc immutare. III. Latet in trina mersione mysterium Dominicæ sepulturæ, trium divinarum personarum, nec non expiationis cujuslibet generis peccatorum. Hoc ergo ritu semoto, Sacramentum mystica significatione expoliatur. IV. Non solum Magnus in Epistola ad Cyprianum, sed etiam Cornelius Papa apud Eusebium lib. VI. cap. 43. dubitat de validitate baptismi *Clinicorum*; scribit enim de Novatiano in lecto aquæ perfusione baptizato, *In ipso, in quo jacebat, lectulo perfusus baptismum suscepit, si tamen hujusmodi baptismum suscepisse dicendus est*. V. Denique simplicam immersionem invexit primus omnium Eunomius, οὐ γὰρ ἡμεῖς λέγομεν οὐκ ἀναδύον τὸ βαπτίζεσθαι, dicens non oportere *temmergi eum, qui baptizatur*, inquit Theodoretus lib. IV. Heret. fabul. cap. 3. Ut igitur trina immersio apud Hispanos in consuetudinem abiit

abiit propter hæresim Arianam ; ita nunquam adhibere fas est mer-  
sionem simplicem ob hæresim deteriozem Eunomii , & Aetii .

Verum ut argumenta , ita etiam solutiones , ex prædictis the-  
sibus obviæ sunt . Ad 1. itaque respondemus , Apostolico canone non  
declari nullum baptismum absque trina mersione datum , sed de-  
poni tantummodo eam non adhibentem , propterea quod nonnulli bap-  
tizabant , non in nomine Trinitatis , sed *in nomine solius Christi*  
*mortui pro nobis* , & ad hunc ritum inducendum utebantur una mer-  
sione tantum . Igitur propter Ecclesiæ disciplinam , & in detestatio-  
nem illius erroris , præscripsit canon *invocationem Trinitatis , tri-*  
*namque mersionem* ; ut manifeste apparet ex sequenti canone 50. *Si*  
*quis presbyter* : de quo vide Glossam decreti de consecrat. dist. 4. can.  
79. Ad secundum , jam diximus distinguendas esse traditiones , quæ  
spectant ad regulam fidei ab iis , quæ pertinent ad ritum & discipli-  
nam ; & quemadmodum traditiones primi generis custodiri debent  
inviolatæ , ita postremæ pro vicissitudine temporum subeunt , ut de  
Velandis Virg. loquitur Tertullianus , *novitatem correctionis* . At  
de his plura lib. xxiii. cap. 6. Ad tertium , quamvis cum Paludano  
in quarto dist. 111. q. 3. aliisque negari possit symbolum mysterio-  
rum fidei spectare *ad substantiam Sacramenti* , ut quod accidenta-  
rium sit duntaxat ; respondemus tamen cum D. Thoma art. vii. ad 2.  
ablutionem , quocunque modo fiat , repræsentare Christi mortem , dum  
*corpus hominis , vel aliqua pars ejus aqua supponitur , sicut corpus*  
*Christi sub terra fuit positum* : ne repetam quæ de sensu Apostolicæ  
sententiæ ad Rom. vi. 3. dixi præcedenti cap. 3. & quæ de Trinitatis  
mysterio expresso in baptismi formula , paullo supra . Ad proximum  
jam dixi dubitationem Magni fuisse dispunctam a Cypriano , quam-  
vis non satis appareat an Magnus hæsitaret de validate baptismi per-  
fusorum , an de effectu ob exiguam in Clinicis fidem ; nam Cypria-  
nus respondet etiam perfusos gratiam consequi , *Deo credentibus in*  
*Sacramentis salutaribus indulgentiam suam largiente* . Ego tamen  
non diffiteor Magnum de valore baptismatis hæsitasse ; cum Cypria-  
nus hæc verbis propositam sibi quæstionem exponat , *Quæsit etiam ;*  
*quid mihi de illis videatur , qui in infirmitate & languore gratiam*  
*Dei consequuntur , an habendi sint legitimi Christiani , eo quod aqua*  
*salutari non loti sint , sed perfusi* . Verum , ut dixi , scrupulum hunc  
Sanctus Martyr exemit , temperanter simul , & eruditè . Cornelius  
autem ea phrasi carpit Novatianum , qui nulla fide , nulla recta in-  
tentione , nulla observatione canonum , aqua baptismali perfusus ,  
nec liberatus a morbo perficiens reliqua juxta Ecclesiasticam regu-  
læ , nec ab Episcopo consignatus , refragante universo Clero , per  
gratiam Episcopi contra præcitatum canonem a Synodo Neocæsariensi  
innovatum , ad presbyteratus gradum conscenderat : quæ , aliaque  
eo

eo loci ab Eusebio conscripta ostendunt quanta improbitate Novatianus parvipenderet Sacramenta. Ceterum illum fore rebaptizandum minime asseruit Cornelius, quod affirmasset utique, si Novatiani baptismum irritum existimasset. Mitto quod tam Magni, quam Cornelii verba dubitantis sunt, non asserentis: nec mirum, si iudicium non proferunt suum, contemnentibus compluribus Ecclesiasticam disciplinam. Ad ultimum dicendum cum Arcudio non reprobatur in Eunomianis baptismum, eo quod semel immergerent, sed quia cum una unctione utebantur formula fidem Trinitatis labefactante. Theodoretus quippe, ad ea verba, *Dicens non oportere iter mergi eum, qui baptizatur*, καὶ ἕνα λῆρον τῆς καταβύτης τοῦ βαπτίζοντος, addit, *nec Trinitatem invocare, sed semel baptizare in mortem Christi*, μὴ πάλιν τὰς Τριάδας ἐπίκαλεσθαι, ἀλλ' ἅπαρ βαπτίζοντες τὴν θάνατον τοῦ Χριστοῦ. S. etiam Epiphanius violatam ab Eunomianis formulam ad nunc modum recitat h. lv. nunc lxxvi. pag. edit. Petavianæ 992. *ἐν ὀνόματι τοῦ πατρὸς, ἡ ὃς ὄνομα τοῦ υἱοῦ κτισμένου, ἡ ὃς ὄνομα πνεύματος ἀγίου, ἡ ὑπὸ τὴν κτίσιν ὡς κτισμένης, ἢ ἀκτισμένης, ἢ ἐν ὀνόματι τοῦ ἀκτιστοῦ, ἢ ἐν ὀνόματι τοῦ ἀκτισμένου, ἢ ἐν ὀνόματι τοῦ ἀκτισμένου*, *In nomine Dei increati, & in nomine Filii creati, & in nomine Spiritus sanctificantis, & a creato filio procreati*. Ex quo loco diligenter exscripto vides decipi virum doctum, Gasparum Juenin, qui Arcudium de affectis Epiphania his verbis reprehendit. De immutato autem ab Hispanis unctionum ritu dictum supra.

# A P P E N D I X:

**S**unt qui hoc loco inquirunt, quonam modo olim baptizati mergentur. Plura de his Vicecomes libro iv. cap. ix. & seq. Martene lib. i. cap. i. art. 14. necnon Vossius disput. i. thesi 6. Primo itaque immergebantur nudi, quo ritu demonstrabatur *exuere baptizatos veterem hominem*; & imitabantur Christum, *qui in cruce nudatus principatus & potestates huius sæculi spoliavit*, ut eleganter docet S. Cyrillus Hierosolymitanus catech. xvii. & ii. Mystagogica a principio, S. Joannes Chrysostomus Hom. vi. in Epist. ad Coloss. D. Anselmus in cap. 3. Matth. & Bernard. serm. 46. de Paupertate. Denudabantur verò non solum adulti, verum etiam infantes; ut liquet ex Sacramentario Gregorii, & Ordine Romano, & ex Alcuino cap. 19. de div. Off. nec non mulieres, ut constat ex iis, quæ de Conone presbytero narrat Eviratus cap. iv. Prati Spirituales, & ex iis, quæ contigerunt Constantinopoli, dum è Sede sua armata manu deiceretur Joan. Chrysostomus, ut ipse scribit in Ep. ad Rom. Pontif. Innocentium. Exhibent huius denudationis consuetudinem imagines Romani, Agilulfi, Theodolindæ, aliæque supra è Ciampino memoratæ, necnon quæ conspicitur in Ecclesia Mediolani Ambrosianæ Basilicæ proxima, nudos exhibens in baptismali lavacro S. Patrem

trem Augustinum, Alipium, ac puerum Adeodatum. Mulierum, autem pudori non una ratione consultum fuit. Priscis temporibus solæ Diaconissæ nudabant feminas, dabantque operam, ne a ministrantibus conspicerentur, ut legitur lib. 111. Constit. Apostol. cap. xv. apud Epiphanium hæc. lxxix. quæ est Collyridianorum, Justinian. Novella v1. cap. 6. In *Elemento* 7 cap. 13. Matthæi Blastaris, & apud alios in Notis Const. Apost. pag. 387. Deinde mulieres tingebantur in loco a viris separato, & post exorcismum a masculis discedebant, ex Cyrillo Hieros. in Præf. Catech. ex Ordine Romano, & ex libro xx11. Augustini de Civit. Dei cap. 8. Alicubi etiam cortinæ, & vela obducebantur: qua in re merito commendatur apud Suerium die 22. Julii, & apud Continuatores Bolland. tom. 1. Jul. pag. 395. sollicitudo sancti Ottonis Pomeranorum Apostoli.

Immersio præterea baptismalis in modum crucis peragebatur. In Ordine Aethiopum præscribitur, ut qui baptizatur ter attollatur ex aquis, *a fonte, a tergo, & altero laterum*. Jacobitæ baptizandum componunt in modum crucis. S. Bonaventura in 1v. dist. 3. qu. 1. referens ritum, qui etate quoque sua servabatur, ait baptizandum respicere *primò versus Orientem, secundò versus aquilonem, tertiò versus meridiem*. In trina demum merfione semel pronuntiabant integram baptismi formulam. In vet. Ordine Romano Tom. xi11. Bibliothecæ PP. legitur: *Baptizant eos sub trina merfione, tantum sanctam Trinitatem semel invocando, ita dicendo, Ego baptizo te in nomine Patris, & mergis semel: & Filii, & mergis iterum: & Spiritus sancti, & mergis tertio*. Haud secus Rituale Gregorii XIII. pag. 14. *Trina cum merfione baptizet, semel tantum dicens, Ego te baptizo in nomine Patris, mergat primo: & Filii, mergat secundo: & Spiritus sancti, mergat tertio*: atque ut id servetur, dum baptismus datur per infusionem, mandat cum idem Rituale, tum editum iussu Pii V. Negari non potest id ex antiqua traditione fluxisse, scribente Tertulliano contra Praxeam cap. 26. *Ter ad singula nomina in personas singulas tingimur*. Sacrilegè ergo se gereret, qui ad unamquamque merfionem repeteret singula *formæ* verba, eundemque baptismum impiè repeteret: quod monuit sapienter S. Thomas 3. p. q. 66. art. 8. ad 3. comprobaturque ipsa ratio repetitæ materiæ, & formæ, quibus integrum perficitur Sacramentum. Hac in parte jure, meritoque Alcuinus invehitur in quosdam Hispanos, qui dum alii unam servabant merfionem, ipsi trinam faciebant, & *unaquaque merfione invocationem sanctæ Trinitatis; ac per hoc tres personas ter nominare studentes, dum ipsa veritas præceperit: Ita, docete omnes gentes, baptizantes eos in nomine Patris, & Filii, & Spiritus sancti. Quid opus est tertiò replicare, quod semel dictum sufficit?* Ita ille Epist. ad Paulinum Patriarcham 81. aliàs 66. pag. 1609.

## CAPUT VII.

*Quædam circa modum abluendi quæstiones.*

**A**T quæres, si etiamnum obtinet baptismus per infusionem; aut per immersionem collatus, poterit ne qui baptizat, unum; aut alterum abluendi modum servare pro libito? Dixi supra, in hoc servandam consuetudinem Ecclesiarum, necnon Baptisteriorum formam. Nemo errare hac in re poterit, si tria, quæ mox subijciam, teneat monita. Est primum, ne memoria excidat canon XIII. sess. VII. Triden. *Si quis dixerit, receptos & approbatos Ecclesia Catholica ritus, in solemnibus Sacramentorum administratione adhiberi consuetos, aut contemni, aut sine peccato a ministris pro libito omitti, aut in novos alios pro quemcunque Ecclesiarum Pastorem mutari posse, anathema sit.* Accedit Augustini regula in Epistola LTV. ad Januar. n. 6. ubi de iis, quæ per loca, regionesque variantur, inquit: *Faciat ergo quisque quod in ea Ecclesia, in quam venit, invenerit. Non enim quidquam eorum contra fidem est, aut contra mores, hinc, vel inde meliores. His enim causis, idest, aut propter fidem, aut propter mores, vel emendari oportet quod perperam fiebat, vel institui quod non fiebat.* Et supra, num. 2. *Nec disciplina ulla est in his melior gravi prudentique Christiano, quam ut eo modo agat, quo agere videtur Ecclesiam, ad quam forte devenerit. Quod enim neque contra fidem, neque contra bonos mores esse convincitur, indifferenter est habendum, & propter eorum inter quos vivitur societatem servandum est.* Animadvertendum denique, ex rituum quoque diversitate oriri aliquando schismata, plebisque Christianæ scandala: ad quæ compefcenda, diximus supra canone VI. quarti Toletani Concilii simplicam immersionem auctoritate beati Gregorii fuisse præscriptam.

## II.

Inquires præterea, an baptismus valeat, si abluatur aliqua tantum pars corporis, & quænam sit abluenda? Ad hæc respondeo necessum non esse, ut totum prorsus corpus aqua perfundatur. Damnat quidem Theodoretus lib. IV. Hæret. fabul. pag. 236. Eunomianos, eo quod baptizandum aqua usque ad pectus superiori parte tantum madefacerent; & posteaquam quidam capite ad solum illiso vulnus accepit, excogitarint baptismi genus aliud, quo baptizandum in subsellio extendentes, erectam ipsius caput lavabant, nullo alio membro corporis attincto; aut tænia quadam longissima hominem a pectore usque ad ungues pedum involvebant, ne aqua illic ullatenus madcheret. Verùm duo hic notanda sunt: unum, Eunomianos in baptismo Trinitatem non invocasse, quod innuit idem Theodoretus, ac nos paullo supra observavimus: alterum, hæreticos illos *aquam*

*non*



non adhibuisse reliquis partibus, tanquam execrandis, τοῖς δὲ ἄλλοις  
 μέρουσιν τοῦ σώματος ὡς ἱεραῖς προσήκουσιν τὸ ὕδωρ ἀπαρτίσθαι, ait eo loci  
 Theodorctus: ex quo PP. S. Mauri in notis ad illa Ambrosii verba:  
*Quomodo sapiens Marcion, atque Eunomius, qui malunt Deum malum,  
 quam bonum habere?* lib. 1. de Off. Ministr. cap. 25. num. 117. rectè  
 inferunt, Eunomium Arii blasphemiam nova impietatis accessione  
 cumulasse, & cum Marcione induxisse Deum malum, a quo procrea-  
 tas autumavit inferiores partes humani corporis, malas proinde in  
 sensu ejusdem Eunomii, atque execrandas. Eunomium a Manichæis  
 errores hausisse prænotaverat in notis ad Canones Concilii Gangren-  
 sis Severinus Binius Tom. 11. Concil. pag. 434. His autem præmis-  
 sis, affirmo immergendum esse, aut abluendum saltem baptizandi  
 caput, quod humani corporis pars præcipua est, & in quo facultates  
 omnes sensuum, ut inquit 3. p. q. 66. art. 7. ad 3. S. Thomas, vi-  
 gent, suaque exercent officia; nec non, si philosophis plurimis as-  
 sentimur, residet rationalis anima, in ea cerebri glandula, quam  
 Anatomici appellant *Conarion*, excipiens animales spiritus, re-  
 rumque corporearum imagines. In capite ergo ablatus homo, du-  
 bio omni procul baptizatus est: secus si in vestibus, & in capillis  
 tingatur, nec aqua ad cutem pertingat. Etsi enim Dominicus Soto  
 in 1v. dist. 3. art. 7. ablutum in capillis rite baptizatum pronuntiat,  
 quoniam vulgari idiomate, si aqua soli perfundantur capilli, dicitur  
 caput ablui; imo & de tinctis vestibus, asserat esse rem valde dubiam;  
 hanc tamen opinionem fere omnes explodunt: rejiciuntque pariter  
 sententiam Durandi, scribentis fat ad baptismum esse, si aqua mini-  
 mus digitus, aut externa alia pars abluatur. Vide Suarezii disp. 20.  
 in præcitatam tertiæ partis quæstionem. Certum est graviter eum  
 peccare qui cum possit abluere caput, tingit corporis partem alte-  
 ram, etiam pedem, aut brachium. Necessitate tamen urgente,  
 E. G. si materno ex utero puerulus emitteret manum unam, perfundi  
 debet pars, quæ apparet, juxta præscriptum Ritualis Romani tit. de  
 baptiz. parvulis, ubi hæc habentur: *Nemo in utero matrum clausus  
 baptizari debet: sed si infans caput emisit, & periculum mortis im-  
 mineat, baptizetur in capite; nec postea si vivens evaserit erit iterum  
 baptizandus. At si aliud membrum emisit, quod vitalem indicet  
 motum, in illo, si periculum impendat, baptizetur; & tunc si natus  
 vixerit, erit sub conditione baptizandus. Si vero ita baptizatus dein-  
 de mortuus prodierit ex utero, debet in loco sacro sepeliri.* Similia  
 S. Thomas q. 68. art. x1. ad 4. Ex hac præscriptione intelligimus;  
 non constare de validitate baptismi, si alia a capite pars abluatur;  
 quandoquidem forma conditionalis adhibenda non est, nisi re diligen-  
 ter pervestigata probabilis subest dubitatio, ut rectè movet idem Ri-  
 tuale titulo præced. & Catechismus Rom. P. 2. cap. 2. num. 57. quod

& nos libro superiori advertebamus. Nec probat oppositum Ecclesiastica sepultura eo modo baptizatis concessa: hanc enim jure Ecclesiæ impertitur, quia nemo in dubiis æquo, justoque exspoliatur.

## III.

Præterea inquires, num si ablutio fiat, ut baptizato necem inferat, sit verus baptismus? Si ablutionis servetur natura, puta si infans ferventi, aut venenata aqua perfundatur, ac debita adhibeatur *forma*, nec desit intentio, non videtur de hac re dubitandum; affirmatque etiam Scotista Henno disp. 2. de Baptismo q. 3. Enimvero quod aqua servens sit, aut veneno infecta, ipsius non immutat proprietatem; nec si abluens intendat effectum pravam, vanum redditur Sacramentum, etiamsi nedum interimere infantulum, verum & illum devovere diabolo cogitaret minister immanis ac scelerosus: quod vidimus libro superiori disputantes de intentione. At si baptizandus projiciatur in puteum, vel flumen, unde nequeat emergi; valere baptismum negat Scotus in 1v. dist. 4. q. 3. cui non solum accessere peracuti illius scholæ disputatores, ut Mastrius disp. 2. de Bapt. q. 2. art. 1. & Frassen Tom. x. pag. 258. alique, uno excepto Brancato, verum & exterorum nonnulli, quos ibidem num. 39. laudat citatus Mastrius, & quibus addo Dominicum Soto in 1v. dist. 3. art. 8. Habert cap. 3. q. 3. hanc inutilem disquisitionem appellat, cum nemini liceat quovis prætextu necare innocentem; ideoque nefas est, etiam periclitantem infantem in fundum projicere. At id etiam Scotus affirmat dist. v. q. 3. nec disquiritur an fas sit hoc facere, sed an baptizatus sit puer, si istud fiat. Videtur baptizatum non esse ob ea, quæ sequuntur. Primum, si puer projiciatur in puteum, quod aliquando contigisse refert Panormitanus, nec infunditur aqua, nec adspargitur, nec immergitur; non enim est *forma* merionis, ubi nulla succedit emersio: ideoque illa projectio nullam habet speciem ablutionis. Juxta enim communem loquendi modum, quod ita immergitur, ut non emergat, non dicitur abluī. Quis etenim lavare fœdum canem in altum demergens puteum, unde non posset evadere, diceretur illum lavare, non autem perdere & occidere? Atque hoc argumento movetur Dominicus Soto. Deinde baptizari quisque debet in mortem Christi, qui ita sepultus est, ut resurgeret. At nisi emersio sit; nec resurrectionis est symbolum. Tandem baptismus ex Christi institutione ordinatus est ad vitam illius, qui baptizatur; ideoque ablutio, quæ mortem infert, non baptismus dicitur, sed flagitiosum, crudelissimumque homicidium.

Est tamen communior sententia opposita, quam & propugnant nostrates, Gavardi q. 2. de Baptismo art. v. Vanroy cap. 1. q. 4. Guerrero Tract. v. 11. disput. 2. num. 43. & Piette P. v. pag. 374. Hæc innititur communi principio, quod duo tantum pertineant ad substantiam

stantiam Sacramentorum, verbum, & elementum. Ratio autem abluendi omnino indifferens est, modo aqua physice tangat corpus. Hinc est obvia, nec semel repetita S. P. Augustini sententia Tract. LXXX. in Joan: *Accedit verbum ad elementum, & fit Sacramentum*. Tria etiam ad perficiendum Sacramentum necessaria esse, materiam, formam, & intentionem, auctoritate Conciliorum Sanctorum definitum est. Quid ergo in casu ad Sacramenti perfectionem deest, si projiciens puerum in flumen formam proferat, intendatque facere, quod facit Ecclesia? Nec quicquam obest, quod actio impia sit, mortemque inferat: non enim impietas, & sacrilegium ministrantium reddit nulla & irrita Sacramenta. Nullam præterea difficultatem ingerunt contraria argumenta, si primum excipias. Ad alterum enim optime responsum a Theologis, puerum, qui aquis suffocatur, resurgere ad vitam spiritalem; baptismus enim est figura mortis, & resurrectionis Christi, quatenus in baptismo peccatis morimur, & ad gratiam resurgimus, ut docet Apostolus ad Rom. vi. 4. atque nos cap. præcedenti, aliisque in locis animadvertimus. Tertia quoque obiectio exsufflatur, siquidem baptismus non ad vitam corporis, sed ad vitam spiritus fuit institutus: quod si ablutio mortem inferens nunquam esset baptismus; nec baptizatus foret parvulus, qui venenatis aquis a facinoroso ministro perfunderetur.

Ad argumentum ergo priori loco positum, & quod unice aliamquam speciem habet difficultatis, nego *immersionem* recte non appellari nisi succedat emersio, cum potius *immergi*, & *emergi*, quemadmodum & *aspersio*, & *abstergi* invicem opponantur. Quare sicut vere quis aspergeretur aqua, etsi post adspersionem non abstergere-tur; ita vere, proprieque immergeretur, quamvis postea non emergeretur. Immo, si vim latinorum verborum attendamus, *immergere* non aliud sonat, quam intus *mergere*, & veluti *in profundum obruere*: atque ne proferam exempla ex Cicerone, Plauto, aliisque a Nizolio in Thesauro lat. linguæ collecta; sane non petebat extrahi ab undis, sed discerpi, dilacerari, & in profundum projici, qui apud Virgilium in tertio Aeneid. agebat:

*Pro quo si sceleris tanta est injuria nostri,*

*Spargite me in fluctus, vastoque immergite ponto.*

Abui etiam dicitur, quod sordidum cum sit, flumini immergitur, tametsi fundum petat; veluti si in limpidam Versiliam projicias squalentem concham. In mersione catuli, etsi percat, abluentionem non fieri negamus; idque potiori jure in puero, qui mersus flumine vitam perennem consequeretur. In eum siquidem quadraret illud Paulini pag. 144:

*Sic homo & occisa felici sumtuq, & orta,*

*Terrenis moritur, perpetuis oritur.*

Atque his dissertationi de materia baptismatis finem constituo.

## CAPUT VIII.

*Pertractatur de forma, qua Sacramentum Baptismi perficitur.*

**S**equitur, ut differamus de Baptismatis *forma*, sive de verbis, quibus consecratur aquæ elementum. Agendum autem primo de *forma* illa, quam adhibet Occidentalis Ecclesia; tum de ea, quæ in usu est in Ecclesia Græcorum; tandem de illa, quam invexit ac multifariam labefactavit hæreticorum audacia.

PROP. I. Legitima est, antiquissima, & omnino certa verborum formula, qua baptizant Latini.

His verbis hæc formula continetur, *Ego te baptizo in nomine Patris, & Filii, & Spiritus sancti. Amen.* Legitimam hanc *formam* esse satis commonstrat decretum Eugenii Papæ ad Armenos Tom. XI. Conc. pag. 535. Tridentina Synodus sess. VII. can. 4. de Baptismo Tom. xv. pag. 778. Rituale Gregorii XIII. pag. 14. & Pii V. primæ edit. pag. 18. Accedit consensus omnium Ecclesiarum Occidentis; eadem quippe *forma* utitur a priscis temporibus Ecclesia Gallicana, ut liquet ex Constitut. Synodicis Odonis Episcopi Parisiensis, Tom. x. Conc. pag. 1802. & ex antiquo Missali Gothico-Gallicano apud Thomasiū pag. 334. ac Martenium Volum. 1. pag. 171. Item Ambrosiana sive Mediolanensis, Hispanica, aliæ: inter Hæreticos etiam Reformatos eadem *forma* viget; unde Vossius disp. 2. de Baptismo th. v. etsi temere ait nequaquam Salvatore nos verbis istis adstrinxisse, quod proximo capite refutabitur, subjicit tamen: *Ita per totum orbem & olim obtinuit, & nunc fit, ideoque satis verisimile est, morem istum ab Apostolico promanare exemplo.* Utuntur eadem formula Hugonistæ apud Martinum Marloratum pag. 83. De Orientalibus postmodum. II. Eam esse antiquissimam. constat ex Sacrament. Gregorii Tom. I. pag. 73. & ex Ordine Romano Tom. XI. Bibl. PP. pag. 697. Et quidem semper invocationem Trinitatis in baptismo fuisse expressam, demonstrabitur sequenti capite; de verbis autem illis *Ego te baptizo*, dubitarunt nonnulli, quod horum non extet ante Magnum Gregorium, & per quinque priora sæcula expressum testimonium; sed, ut infra ostendam, immerito; enim-vero S. Gregorius non primus eam *formam* invexit, sed descripsit tanquam ritum communi Latinorum usu receptum: quod recte observat Juenio quæst. IV. cap. 3. art. 1. & q. 3. cap. 4. Ludovicus Habert. III. Hujus formulæ perfectionem ostendit, quod in ea non deest invocatio Trinitatis expressa, cujus pronuntiatione sacrum perfici lavacrum exploratissima traditio est: cetera autem verba tingendi actum & ba-

& baptizantis ministerium significant. Bene præcitato loco Eugenius: *Quoniam cum principalis causa, ex qua baptismus virtutem habet, sit sancta Trinitas, instrumentalis autem sit minister qui tradit exterius Sacramentum, si exprimitur actus, qui per ipsum exercetur ministerium, cum sancta Trinitatis invocatione, perficitur Sacramentum.* Haud secus S. Thomas q. lxxvi. art. 5. & Catech. Rom. de Baptismo num. 13.

PROF. II. Græcorum forma enuntiativa est, non deprecativa: valida & ipsa est; nec ab ea, qua utuntur Latini, substantialitèr differt.

Non tantum superioris ævi Scholastici, verum etiam viri alii doctissimi existimarunt Græcos in baptismo conferendo uti hac formula, *Baptizetur servus Christi, in nomine Patris, &c.* At post evulgata Orientalium Euchologia oppositum sentiunt docti recentiores. Juenin cap. 2. art. 1. Habert cap. 4. q. 3. Tournelius q. 1. art. 4. Auctor de Re Sacram. cap. 3. §. 2. atque ante hos omnes Farvaquesius noster cap. 111. q. 2. Certa ad hanc rem demonstrandam argumenta suppeditant Arcudius lib. 1. Concordiæ cap. 8. Goarius not. in Euchol. Græc. pag. 365. Morinus lib. vi 111. de Pœnit. cap. 16. & Martenius Antiq. Rituum lib. 1. cap. 14. num. 17. Et quidem. Euchologium Græcorum pag. 355. hanc formam præscribit: *Βαπτίζεταί ὁ δούλος τοῦ Θεοῦ ἐν τῷ ὀνόματι τοῦ πατρὸς, καὶ τοῦ υἱοῦ, καὶ τοῦ ἁγίου πνεύματος. Ἄμήν, ἀμήν, καὶ ἐν τῷ ὀνόματι τοῦ Θεοῦ.* *Baptizatur servus Dei in nomine Patris, & Filii, & sancti Spiritus, nunc, & semper, & in sacula saculorum, Amen.* Quidam Rituales libri repetunt voculam *Amen* post quamlibet sanctæ Trinitatis personam, ad hunc modum, *Baptizatur servus Dei in nomine Patris, Amen; & Filii, Amen; & Spiritus sancti, Amen.* Parum differunt formulæ Jacobitarum, & Maronitarum, de quibus Faustus Naironus in Euoplia Cath. fid. p. 2. cap. 2. omnes siquidem proferuntur enuntiative, *Baptizatur, &c.* Nec aliter Ordo Aethiopum Severo attributus. Eadem ratione, baptismatum Judæum, de quo supra cap. iv. narrat in Prato Spirit. loco ibidem citato Joannes Moscus. II. Validam esse prædictam baptismi formam constat primo, quia eandem valere scribit in prælaudato decreto, sive Instru. Armenorum, Eugenius IV. deinde, quia valide Græcos, ea formula baptizare, nec ad eam immutandam cogendos esse, definiere post Eugenium Leo X. in Bulla, *Acceptimusi nuper*, emanata die 18. Maji an. 1521. & Clemens VII. in Bulla, *Provisionis nostræ*, emissâ die 26. Martii an. 1526. De his consulas Leonem Allatium in Opere de Aetate, & interstitiis in Collat. Ordinum pag. 5. Præterea Ecclesia Latina baptizatos a Græcis iterum non baptizat, ideoque Græcorum baptismum tanquam legitimum approbat. Si denique nonnulli ætate D. Thomæ, ut ipse refert in iv. sent. dist. 3.

dist. 3. q. 2. art. 2. dubitarunt de valore baptismi *forma* Græcorum collati, in eam dubitationem venerunt, propterea quod opinabantur *deprecativam* esse eandem *formam*, non autem *enuntiativam*. At explosa est modo hæsitatio ista, primum quia ex præcætitatis Eucharologiis, & Ritualibus, cum editis, tum asservatis in Bibliothecis Barberiniana, & Cryptæ Ferratæ, compertum est Græcorum *formam* habere βαπτίζω, *Baptizatur*, non βαπτίζω, *Baptizetur*: nec ulterius ambigi potest, quin *enuntiativa* ea sit. Præterea quia etsi liggeretur, βαπτίζω, *Baptizetur*, Imperativi modi esset, non Optativi. Postremo, quoniam *deprecativa* etiam formula iudicio Theologorum, quibus præcedenti libro subscripsimus, *forma substantiam* nequaquam immutat. III. A Latinorum *forma* hanc Græcam *substantialiter* non discrepare ulterius evincitur, quoniam utraque exprimit actionem tingendi, expressamque habet invocationem Trinitatis: imo testimonio Græcorum qui baptizat, dum ait, βαπτίζω ὁ δὺς τοῦ θεοῦ, subintelligit, ὡς ἐγὼ, sive, δι' ἐμῆ, a me, aut, per me: idque constat confessione Simonis Thessalonicensis, qui apud Goarium pag. 356. & apud laudatum Arcudium pag. 16. inquit, ἐν βαπτίζω τὸ ἰουδαίου σπλάσσω, καὶ παρ' ἐμὲ τὸ ἀρχιερεὺς, ἢ ἱερεὺς, ἢ τὸ ἱερὸν ἱδὲ πῶντος, καὶ τοῦ ἐν ἡριὰδι μετὰ θεοῦ, nimirum, *Illud baptizatur spontaneam actionem significat, & per me Pontificem, vel Sacerdotem, opus ipsum actu exequentem; & per unum in Trinitate Deum.* Repetitio autem voculæ *Amen*, & additio vocabulorum, *servus Dei*, sive, *Agnus in grege Christi*, aut lacinia aliæ, *in vitam æternam*, vel, *in remissionem peccatorum*, minime *formæ* proprietatem adulterare cuique notum est, pinguissimæ licet minervæ.

At enim dicis: Unde præterita ætate invaluit opinatio, a Græcis *formam* adhiberi illam, *Baptizetur servus Dei*, &c? Id quippe non tantum affirmavere rudes quidam Scholastici, sed celebrioris nominis, ducesque aliorum; necnon Eugenius IV. in Instructione Armenorum edita eo tempore, quo in Italiam convenerant viri Græcorum ritum peritissimi, nec Græci sermonis ignari. Quid etiam potuit esse causæ, ut vetus Græcia ab Occidentalium consuetudine in hac parte discederet, unde posterioribus temporibus Schismatici adversus Romanam Ecclesiam pervicaciores evaderent?

Respondco promanasse opinionationem Majorum partim ab affinitate inter Græcum βαπτίζω, & Latinum *Baptizetur*, partim vero a consuetudine jurandi in verba Magistri, atque a temporum rusticitate ac barbarie. At Eugenius, me iudice, ritum Græcum perfecte novit, scribens enim in decreto, *Non negamus quin & per illa verba, Baptizetur talis servus Christi, &c. vel, Baptizatur manibus meis talis, &c. utrumque definit, idest, & valde baptismum datum forma Græcorum, quam Scholastici proferunt modo deprecativo,*

& va-

& valere collatum *forma* illa, quæ *enuntiativa* est: nisi mavis dicere etiam priori loco legendum, *Baptizatur*, ita enim legit Leo X. & Clemens VII. in prælaudatis Constitutionibus apud Allacium: mihi-que propterea commendanda hoc loco est eruditio eorum, qui in postremis Conciliorum editionibus ea voce *Baptizetur* \* asterisco confixa, apposuerunt in margine, *Baptizatur*. Hanc vero formulam potius Græci adhibuerunt, quia cum initio nascentis Ecclesiæ alii se aliis præferrent, quod baptizarentur a viris præstantioribus, ut narrat Apostolus in 1. ad Corinth. 1. 12. maluerunt quidam uti verbo *Baptizatur*, quam *Ego baptizo*, ne quis schismati occasionem præberet, aut opinaretur homines propria, non Christi potestate baptizare. Atque hinc Joannes Chrysostomus Hom. 1. in Acta pag. 453. animadvertit etiam Dominum Jesum dixisse Apostolis Act. 1. 5. *Vos autem baptizabimini Spiritu sancto*, non, *Vos ego baptizabo*, *ὑμεῖς ἀλλήλους βαπτίζετε ἐν πνεύματι ἁγίῳ*, docent nos, at modeste de nobis sentiamus. Causam vero hanc observarunt, non solum Gabriel Philadelphiensis apud Arcudium, sed etiam S. Thomas Aquinas, Alphonsus Castrensis, atque alii. Quod ergo principio humilitatis fuit, modo factum est Græcis argumentum temeritatis; dum baptismum nostrum ob unam voculam spernunt, nobis baptismum eorum, vocibus pluribus, utique superfluis, collatum minime reprobantibus. Neque enim nos propria auctoritate baptizamus in partes, ut Corinthiorum Ecclesia, diffissi; quemadmodum nec arbitramur cum Donatistis pendere vim Sacramenti a sanctitate ministri, adeo, ut jure obnoxii simus increpationibus, quas modo in nos Græculorum loquacitas, & olim adversus Donatianos Tract. vi. in Joannem, & sermone xcix. magnus Augustinus intorlit. Finem faciamus Caryophili verbis:

*Perbene Romanus, bene Græcus mystica profert*

*Verba: unus meriti Conditor, una fides.*

PROPOSITIO III. Quamplures sunt baptismi *formæ* ab hæreticis confictæ, quæ tollunt Sacramenti veritatem.

Harum formularum prior sit, quam commemorat canon 48. inter Apostolicos Tom. 1. Conc. pag. 35. & cap. *Si quis Presbyter*, de Consecr. dist. 4. eorum scilicet, qui baptizabant *non in nomine Patris & Filii & Spiritus sancti, sed in trium principii expertium vel trium filiorum, vel trium paracletorum*, *οὐκ ἐν πατρὶ, οὐκ ἐν υἱῷ, οὐκ ἐν πνεύματι, ἀλλ' ἐν τοῖς ἀρχαῖς, ἢ ἐν τοῖς υἱοῖς, ἢ ἐν τοῖς παρακλήτοις*. Prolapsit iterum eandem *formam* anno 538. Vigilius Papa in Epistola ad Euthe-rium, sive potius ad Profuturum, ut observant Baluzius, & Pagi- us ad præcit. annum pag. 563. 11. Voluminis. II. Aliam *formam* excogitarunt Gnostici apud Irenæum libro 1. cap. 21. num. 3. his verbis. *utentes, In nomine ignoti Patris universorum, in veritate matre omnium, in eo, qui in Jesum descendis, in unione, & redemptione*.

ne, & communionem virtutum : eis ὄνομα ἀγίων πατρὶς τοῦ ὁμοῦ, ἐν ἀλλήλοις μοῖρα πάντων, ἐν τῇ κατωδίτῃ ἐν ἑαυτοῖς, ἐν ἐνείκῃ, ἐν ἀπολύτρωσιν, ἐν κοινήσει τοῦ δυνάμεως. Addit S. Martyr, alios hebraica quædam vocabula, ut magis eos, quos initiabant, in stuporem traherent, protulisse, ipsaque vocabula Græce describit, βάσιμα, καμωσὴ, βασιανόρ, μουσάδ'ια, ραδὰ, κωσά, βασβορ, καλαχδὴ, *Basema, Chamessi, Bazanora, Mystadia, Ruada, Custa, Babophor, Calatbi*: quæ & interpretatur, *Id quod virtutem omnem exsuperat, invoco, quod lux & spiritus bonus, & vita nominatur, quoniam in corpore regnasti*. Meminerere hujus formulæ Eusebius lib. iv. H. E. cap. 11. pag. 124. Theodoretus lib. 1. hæreticarum Fabul. Tom. iv. pag. 201. ubi pertractat de Marco Præstigiatore, & alii. Hebraica tamen verba non uno modo Gnostici illi, a Marco *Marcofii* appellati, proferebant: aliter enim ea describit in Thesauro Orthodoxo Nicetas Choniates lib. iv. cap. 6. Tomo xxv. Bibl. PP. pag. 113. aliter citato loco Irenæus, ac Epiphanius hæc. xxxiv. num. 20. pag. 255. adeo, ut non male Feuarden- tius in Iren. Marcofios æquiparaverit magis monstruosa attentantibus occultorum vocabulorum furramine, ut Eclog. v. 111. cecinit Maro:

*Carmina vel calo possunt deducere lunam:*

*Carminibus Ciræ socios mutavit Ulixes;*

*Frigidus in pratis cantando rumpitur anguis.*

Sapientissime: enimvero & in Marcum præstigiatores senex quidam apud Irenæum lib. 1. cap. 15. num. 16. invecitus est. carmine, quod incipit,

Εἰδωλότητι Μάρκε, καὶ παρασκώτι,

Ἀρελογικῆς ἱμνῆς ἢ μαγικῆς τέχνης,

*Idolorum fabricator Marce, & portentorum inspector;*

*Astrologia cognitor, & magica superstitionis.*

At de Gnosticis, & Marcofiis satis. III. Permulti etiam Ariani ex im- pio eorum dogmate formulas quasdam fabricarunt; nam Athanasius Orat. 111. affirmat Arianos baptizare, ἐν κτίσιν, ἢ κτίσμα, ἐν ποίμῃ, ἢ ποιμῇ, in Creatorem, & creaturam; & Hieronymus adversus Luci- ferianos, In Patre solo vero Deo, & in Jesu Christo Salvatore, & in Spiritu sancto utrinque servo. Videntur nihilominus horum Pa- trum verba accipienda esse, non de prolatione formæ, sed de fide, animoque proferentium; primò quia Athanasius eo loci scribit, *alias quoque hæreses nominis tenus ritum ipsum*, (idest, trium divina- rum personarum pronuntiationem) *exprimere, & tamen quia sanam fidem non retinent inutilem esse aquam, quam impertiunt*. Atque ita (inquit eadem Orat. 3. nunc 2. num. 43.) *qui cum Ario sentiunt, licet quæ scripta sunt retineant, & nomina pronunciant, eos tamen, qui ab illis accipiunt baptismum, decipiunt, & eludunt*. Præterea Hieronymus citato Dialogo Tom. iv. pag. 305. reprehendit Hila- rium



rium Diaconum, appellatque *Orbis Deucalionem*, propterea quod rebaptizaffet Arianos, non autem ab aliis hæreticis venientes : quod fane non feciffet, nifi Ariani illi communem formam fervaffent. Ad hæc Innocentius I. epift. 18. ad Alex. Tom. 2. Conc. pag. 1269. ait Arianorum baptifma ratum effe, *quod utique in nomine Patris, & Filii, & Spiritus fancti perficitur*. Gregorius etiam Epift. 67. lib. xi. affirmat Arianos in communionem recipi per folam manuum impositionem, *quia in Trinitatis nomine baptizantur*. Extat idem apud Grat. c. *Ab antiqua*, de Consecrat. diff. 1v. num. 44. Dixi tamen permultos Arianos *formam* variaffe; nam Theodorus Lector lib. 2. Collectaneorum ait Anaftafio I. imperante, Deuterium Arianorum Epifcopum baptizaffe quemdam, nomine Barbam, hac fub formula, *Baptizatur Barbas in nomen Patris, per Filium, in Spiritu fancto*, Βαπτίζω Βάρβαν εν τῷ ὀνόματι τοῦ πατρὸς, διὰ τοῦ υἱοῦ, ἐν πνεύματι ἁγίῳ. pag. edit. Valesii, poft Evagrium, 562. Addit Theodorus, hac forma pronuntiata ftatim aquam, quæ erat in *Colymbetbra*, idelt, pifcina evanuiſſe. Rebaptizatam quoque in Galliis Brunichildi, five Brunam filiam Athanahildi Regis Gothorum, uxoremque Sigeberti ſcripfit lib. 111. Hiſt. Francorum cap. 4. pag. 47. Aimoinus Monachus Floriacenſis : quod argumento eſt, Gothos Arianos legitimam baptifmi formulam nequaquam ſervaffe. Hinc ſapienter perſcribunt canones, ut qui ex hæreticis ad nos veniunt, *ſi in ſancta Trinitatis nomine baptizati ſint*, iterum non baptizentur, cap. *Si qui apud illos*. *Quamvis unum*. *Oſtenditur illos*, diff. 1v. de Consecrat. ſecus ſi in nomine ſanctæ Trinitatis baptizati non ſint, cap. *Si revera*, & *Quos a paganis*, & *De Arianis*, eadem diſtinctione. IV. Baptifmi *formam* adulterarunt Eunomiani, & Aetiani, quos Trinitatem minime invocaffe ſcribit Theodoretus lib. 1v. hæret. fab. pag. 236. & uſurpaſſe hanc formulam, *in nomine Dei increati, & in nomine Filii creati, & in nomine Spiritus ſanctificantis, & a creato filio procreati*, refert Epiphanius hæreſi lxxvi. pag. 992. At de his ſupra, ubi diſſeruiſimus de trina, aut ſimpla merſione. V. In Trinitatis nomine nequaquam baptizatos Bonofiacos, & Cataphrygas, ſcribit laudata Epiftola 76. Gregorius Magnus, & refertur a Gratiano prælaudata diſtinct. 1v. cap. *Hi verò hæretici*. Ceterum qua *forma* Bonofiaci tingerent, me fugit. Eos quoque, ſicut Arianos, non eundem ritum ubique ſervaffe, & aliquando baptizaffe in Trinitatis nomine, conſtat ex canone 17. Concilii 2. Arelatenſis, quo præſcribitur, ut Bonofiaci interrogentur de fide Trinitatis, & an hujus invocato nomine baptizati ſint: prout citato cap. *De Arianis*, ſeu, *De Afris*, anno 314. ſtatuit Concilium primum Arelatenſe. VI. Accenſendi ſunt perverſarum formularum fabricatoribus Montaniſtæ, quorum baptifmum nullam habere rationem, ſcribit in Epiftola Canonica ad Am-

philochium Tom. 2. pag. 757. S. Basilius, eo quod baptizarent, *καὶ πατέρα, καὶ υἱόν, καὶ ἁγίον πνεῦμα, ὡς ἐκείνους, in Patrem, & Filium, & Montanum, sive Priscillam*, Spiritum sanctum summa afficientes injuria *per comparationem cum hominibus*, ut ibidem inquit Basilius: unde & Gregorius Magnus Epistola non semel laudata inquit: *Illi sanctum Spiritum perverso sensu esse quemdam pravam hominem Montanum credunt*. Hos ego a Cataphrygis, de quibus supra, non distinguo, ductus auctoritate Tertulliani de Præscript. cap. 52. quamvis istorum non una fortasse viguit doctrina. VII. Perverfa *forma* ufos præterea dicimus, quotquot canon VII. Synodi I. Constantinopolitanæ, ac Trullanæ xcv. statuit rebaptizandos, Paulianos præsertim, sive Photinianos, aut Sabellianos, aliosque hæreticos, quorum præcipuas sectas commemoravimus, Trinitatem negantes, & Evangelicam *formam* abjicientes: de quibus legendus interim Lupus in præfatos canones, & quæ adnotarunt PP. S. Mauri ad prælaudatam S. Gregorii Epistolam, nam de hæreticorum baptismate plura nobis repetenda erunt. VII. Denique & Novatores circa baptismatis *formam* errant quammaxime; etsi enim communiter adhibent apud nos usitatum, eam tamen minimè existimant necessariam, quoniam putant sola fide apprehendi justitiam, non conferri illam vi Sacramenti. Hinc Zuvinglius lib. de vera & falsa Relig. pag. 202. scribit valere baptismum quocunque modo conferatur, nec *formam* aliquam necessariam esse, quia baptizari in Dei nomen, nihil aliud est, *quam per fidem in Deum inferi*. Similia effutiunt Novatores alii; imo Lutherus de Capt. Babylon. cap. de Baptismo scribit: *Non dubitem, si quis in nomine Domini suscipiat baptismum, etiamsi impius minister non det in nomine Domini, verè baptizatum esse in nomine Domini*; quia nimirum (juxta hæreticum dogma) *in suscipientis fide, vel usu, sita est virtus baptismi*, ut inquit ibidem hæresiarcha: quæ impia doctrina, quantum ad justificationem attinet, refutata est alibi; quantum verò spectat ad *formam* baptismi, proximo capite exagitabitur.

## C A P U T IX.

*Sintne ad valorem baptismi necessaria omnia verba, quæ ordinariam ejus formam constituunt.*

**O**rdinariam baptismi *formam* appello sequentem, *Ego te baptizo in nomine Patris, & Filii, & Spiritus sancti, Amen*: nec quæstionem moveo. de pronomine *Ego*, aut de particula, *Amen*; illud quippe prorsus non requiri constat tum ex probata Græcorum formula, tum ex conditione verbi personam exprimentis: hanc ve-

rò particulam, *Amen*, esse quasi peracti Sacramenti acclamationem per se patet. Instituo igitur disputationem de reliquis partibus ejusdem *formæ*; ac principio de verbi, *Baptizo*, pronuntiatione. Rectè asseruit eruditus Lupus in dissert. de S. Leonis IX. Actis pag. primæ edit. 863. olim gravissimos Doctores existinasse *ad formæ essentiam* non requiri verba personam, & actum baptizantis exprimentia. Fuerunt in hac opinione Præpositivus in 1v. p. Summæ, Petrus Cantor p. 2. & Stephanus Tornacensis, alique refutati ab Alberto Magno in 1v. dist. 3. His connumerat Tornely pag. 43. Magistrum Sententiarum; apud quem tamen invenies tantummodo verbum, quo consecratur baptisma, esse invocationem Trinitatis, qui est veterum, & recentiorum omnium communis sensus: de suppressione autem verbi, *Baptizo*, nil in 1v. dist. 3. apud Magistrum. Impingit Tournelius opinionem illam, post Morinum lib. viii. de Pœnit. cap. 16. & Hugoni Victorino lib. 2. de Sacramentis part. vi. cap. 13. At ibidem Hugo affirmat tantum, puerulum ablutum a matre cum invocatione Trinitatis, animo non conferendi Sacramentum, sed fordes abstergerendi, fovendique corpusculum, baptizatum nequaquam fuisse; at num mulier pronuntiaverit etiam verbum, *ablavo*, *mergo*, *lavo*, aut aliud simile, ex illo capite non apparet. Certe Morinus rationes Stephani Tornacensis judicat esse probabiles; etsi fateatur post Alexandri III. decretum a Gregorio IX. lib. 3. Decretalium insertum, Tornacensis sententiam suo jure cecidisse. Hanc ergo ad lancem appendet diatribæ hujus pars prima.

In parte altera discutiam graviorem quæstionem, num ratum sit baptisma absque expressa sanctæ Trinitatis invocatione. Gravior est hæc controversia: Sociniani siquidem, Episcopus, Vossius, & Huldricus Zuvinglius, quamquam non vetant, dum initiamus baptismum, invocare Trinitatem, contendunt tamen id *ad essentiam baptismatis* non requiri, eo quod baptizari sit fide in Corpus Christi mysticum coaptari, non visibili Sacramento mundari a labe peccati. Eapropter ratum baptismum pronuntiant Christi solius nomine pronuntiato. Hoc postremum tenuit etiam Magister citata distinct. 3. lit. E. & Cajetanus ad quæst. lxxvi. art. 5. & 6. a doctrinæ Præceptoris Angelici apertè desciscens, unde jussu Pii V. è Commentariis Summæ ipsa Cajetani sententia dispuncta fuit. Præcinerant tamen Cajetano nonnulli antiquiores citati a Dominico Soto in 1v. dist. 111. art. 6. eumque secutus est Adrianus P. 1. art. 2. quæst. 2. Scotus, cui (sicut permultis veterum) placuit Apostolos in solo Christi nomine baptizasse ex divina dispensatione, licet fateatur communem *formam* promulgatam a Christo, dum ait Matth. ult., *Ite, &c. in nomine Patris, & Filii, & Spiritus sancti*; vacillat tamen in hac quæstione, scribens in 1v. dist. 3. q. 2. *Non audeo dicere quod bapti-*

*zatus bodie in nomine Christi esset baptizatus, sed nec audeo dicere quod non esset baptizatus, quia non lego ubi fuerit ea dispensatio revocata.* Consimili modo anceps est eadem dist. art. 2. q. 5. Ricardus: quare in horum sententia baptizatus in solo Christi nomine, baptizandus iterum foret *sub conditione*. Nihil affinitatis habet Scholasticorum istorum opinio cum placitis hæreticorum; hi quippe nituntur nefario dogmati, quod nullis verbis aquæ elementum consecratur, & attollatur ad producendam gratiam: illi verò utrumque asserentes contenderunt, dum una sanctæ Trinitatis persona nominatur, subintelligi alias, adeo, ut idem sit baptizari *in nomine Christi*, & baptizari *in nomine Trinitatis*. Falsa tamen est, & secundo hujus capituli membro refutanda hæc opinio, quocunque sensu propugnetur; cum certa sit, & vera sententia, baptismum non consecrari, nisi expressa sanctæ Trinitatis invocatione.

Sed quid de Apostolicis temporibus asserendum est? Baptizarunt ne discipuli nomine solius Christi invocato? Affirmativam partem propugnant inter Scholasticos non ignobiles, non tantum antiqui celebratissimi, S. Thomas, Scotus, divus Bonaventura, & alii; verum etiam posterioris ævi quamplurimi, & ætate nostra præclarus Scriptor Dominicanæ familiæ, quem tamen alter ejusdem instituti vir æque doctus strenue exagitavit. Poterit qui velit antiquorum illorum vestigiis insilire, adire ex Thomistis Gonet disp. 1. art. 3. & quos ille singillatim commemorat: e Scotistis verò Brancatum disput. 12. art. 5. Franciscum Henno disp. 2. q. 6. Claudium Frassen disp. 1. q. 6. Sed oppositam sententiam tenet major Doctorum numerus, Belarminus, Suarez, Vasquez, Estius, Juenin, Tournelius, ac nostratum omnes, præsertim juniores, Farvacques, Gavardi, Vanroy, Piette. Animadvertite autem nulla nos lege adstringi ad propugnandam illam veterum sententiam, salva etiam Scholarum necessitudine: primum quia antiqui pertractantes de baptismi *forma*, docuerunt Apostolos in solo Christi nomine baptizasse speciali Dei consilio, ut Christi nomen Judæis, & Gentibus redderetur honorabilius, non data opera disputantes, an revera eà formâ baptizassent Apostoli, sed exponentes quædam loca ex Act. Apostolicis deprompta, quæ primo adpectu id videntur innuere: unde eorum sententia potius est propugnanda, qui in his locis expendendis, atque in Patrum investiganda traditione, animum nervosque intenderunt. Deinde etiam, quæ Scholæ nomen dedere, nequaquam religioni duxerunt se hac in parte Magistri sententiæ obstringere, ut ex Thomistis fecerunt Dominicus Soto, Melchior Canus, Joannes Nicolai, & nuperime Auctor librorum de Re Sacramentaria, ne commemorem Cardinalem Gotti, qui utramque sententiam censet esse probabilem. Scotistarum tamen nullum hætenus aut legi, aut audivi, qui vel in  
hac

hac minima re Subtili Doctore adverteatur, si unum excipias Centinum de quo q. 2. art. 2. illustris Mastrius. Hæc itaque disquisitio tertiam hujus capituli partem occupabit.

PROP. I. Requiritur ad validitatem Baptismi verbum, quo exprimitur actus baptizantis, scilicet, BAPTIZO, sive, BAPTIZATUR.

Demonstratur I. definitione Alexandri III. quæ habetur in III. Decretalium tit. XLII. cap. 1. *Si quis puerum ter in aqua immerferit, in nomine Patris, & Filii, & Spiritus sancti: & non dixerit, Ego te baptizo in nomine Patris, & Filii, & Spiritus sancti, non est puer baptizatus.* II. Confirmatur ex occasione hujus Rescripti, quod datum ad Petrum Pontium ex Abbate V. Claravallensi Præsulem Claramontanum, & ad hanc controversiam definiendam, constat ex Annalib. Cisterc. Angeli Manrique, ad annum MCLXXVI. cap. 6. sive Tom. 3. pag. 39. ex quibus apparet Pontium literas dedisse ad Mauritium Episcopum Parisiensem, & ad Stephanum tunc Abbatem S. Eburnitii, postea S. Genovefæ, ac deinde Tornacensem Antistitem, eos consulens, quid sentirent de baptismo ab homine laico, sine verbis, *Ego te baptizo*, in necessitate collato: cumque Mauritius respondisset nullum esse, at Stephanus ratum judicasset, Pontium graviori hæsitacione permotum, rem omnem ad Romanum Pontificem detulisse, *Qui controversiam diremit, abusum damnans edita Decretali, quæ in corpore Juris circumfertur, cap. 1. de Baptismo.* Ita Cisterciensis Historicus. Atque ex his constat, quando decretum Alexandri editum sit, & quomodo definitionis vim habeat: quod non arbitror cuique notum. III. Diligentia ipsa Pontii splendorem addidit veritati: nam ille præcitata Epistola ad Mauritium, & Stephanum, quæ habetur Tom. xxv. Bibl. PP. pag. 5. ait. *Hæc est pessima consuetudo in terra nostra, ut in talis necessitatis articulo dicant, In nomine Patris & Filii & Spiritus sancti, nec totam exprimant verborum formam, quæ debet exprimi in baptismo, quod undeque vocant.* Ex quibus verbis apparet Pontium consuetudinem illam reprobasse. At Mauritius baptismum illum absque ulla hæsitacione nullum declaravit, rescribens Pontio: *Nisi hæc verba simul a quocunque, & quacunque lingua proferantur, baptismum esse non credimus: quia ergo sicut litterarum vestrarum testimonio cognovimus, præsentium lator in submersione filii sui, Ego te baptizo, siluit, & tantum, In nomine Patris & Filii & Spiritus sancti protulit, baptismus non fuit, & ideo puer ille baptizandus est, quia baptismum nunquam suscepit.* Stephanus quidem docuit oppositum, sed temperanter, & protestatione hac inserta, *Opiniones profundo, non assertiones, & ista, Clausulam tamen, quæ a baptizantibus solet & debet dici, scilicet, Ego te baptizo, summa devotione deosculor, summo studio amplector.* Hanc ergo thesaurum quæ narratur de Præsule Claramontano, non impetunt,

tunt, sed corroborant. IV. Jurisconsultorum decus Innoc. IV. in lib. 111. Decret. cap. 2. num. 4. ait, verbum Baptizo *esse de substantia forma*: & quamvis ibidem scribat substitui non posse verbum æquivalens, ut, *Baptizat te Christus, vel Petrus, vel Sacerdos, se demonstrato*, quod nonnulli opponunt ad ejus elevandam auctoritatem, addit tamen, *Si aliqua provincia esset, quæ nunquam formam nostram accepisset, & verba dicta, & alia equipollentia nostris diceret, debens haberi pro baptizatis*. Quare arbitror Innocentium hæsitasse de baptismo immutata forma collato, si mutetur prava intentione inducendi errorem, puta hæresim Nestorianam, quæ Christum a secunda persona Trinitatis divellit. Nam Nestorii perfidiam haud obscure commonstraret eadem forma, *Baptizat te Christus, &c.* Ceterum quod Innocentius ait pertinere ad *formam substantiam*, *Ego te baptizo*; id tradunt JCC. omnes, Em. Gonzalez, Gibertus, alii; tametsi Prosper Fagnanus interpretatur cap. *Si quis puerum*, de baptismo, quo puer mersus sit aqua, nec pronuntiatum sit, *In nomine Patris, &c.* in quo, ut ex dictis constat, ignorat factum, nec sensum verborum assequitur. V. Alexander VIII. die 7. Decembris an. 1690. proscript sit hanc propositionem num. 27. *Valuit aliquando baptismus sub hac forma collatus, In nomine Patris, & Filii, & Spiritus sancti, prætermisiss illis, Ego te baptizo*: quæ damnatio quæstionem prorsus dirimit. VI. In hac definitione Alexander normam Traditionis secutus fuit: quippe ex Apostolis tradita & commendata sunt, *quæ per universam custodiuntur Ecclesiam*, quemadmodum ait Augustinus lib. 2. de Bapt. cap. vii. num. 12. Universæ autem Ecclesiæ consuetudo fuit, & est, uti in Baptismate verbo actum ablutionis exprimente, ut constat ex Græcorum, Syrorum, Aegyptiorum, Latinorum Ritualibus libris, ab Arcudio, ab Amalario, ab Alcuino laudatis, ceterisque a Mabillonio, a Thomasio, a Goario, a Martenio donatis latinitate. In viginti enim quatuor baptizandi Ordinibus vetustissimis apud eundem Martenium lib. 1. cap. 1. art. 18. ubique legitur verbum *Baptizo*, aut, *Baptizatur*; nec desiderari invenies, nisi in uno Ms. Cameracensi sequioris ævi, trecentis ab hinc annis exarato, nullius proinde, si cum ceteris comparetur, auctoritatis. Quamobrem thesis nostra, & Romanorum Pontificum definitio in nixa est perpetuè custoditæ, ac firmissimæ traditioni.

Hujus traditionis præsidio diluenda cenfeo omnia argumenta Stephanii Tornacensis, & Joannis Morini, qui opponunt ex verbis Christi, *Docete omnes gentes, baptizantes, eos, &c.* non deduci necessaria esse verba, *Ego te baptizo*, sicuti necessarium non est, ut ministri proferant, hæc verba, *Ego te doceo*. Addunt, ex Patribus hoc unum colligi, baptismum conferendum *in nomine Trinitatis*. Connu-merant præcitatos Auctores, qui sententiam tenuerunt oppositam,

Stc-

Stephanum, Petrum Cantorem, Præpositivum. Affert Morinus & exempla Moſis, & pueri, quem Eliſæus miſit ad mortuum ſuſci-  
andum, qui, ut juſſa exequerentur, non opus erat, ut dicerent, *Pro-*  
*jicio virgam, Pono baculum ſuper faciem tuam, &c.*

Verum in his, quæ pendent a divina institutione, neque in Scri-  
ptura inveniuntur expreſſa, traditio eſt nobis certa regula rerum  
dijudicandarum; alioqui, nec neceſſaria erit in baptiſmo prolatio  
verborum, *In nomine Patris, &c.* quoniam neque Matth. ult. ex-  
preſſe Salvator ait, *Ite, hæc verba proferte*: quod ſi dicamus, quan-  
tum geſtiant Socinus, Voſſius, Zuvinglius? Ex quibus ſatis apparet  
præmiſſæ argumentationis inanitas. Auctores vero prælaudatos,  
(quod humanum eſt) erraſſe monſtravimus. Exempla quoque a Mo-  
rino producta non faciunt ad rem; tum quia omnem omnino *formam*  
excludunt, tum etiam quia in patrandis miraculis elementa certis  
verbis non conſecrantur, quamvis & Dei verbo perfectæ ſint mira-  
cula innumera. Denique ex his eruitur, nunquam ratum fuiſſe ba-  
ptiſmum abſque verbis iſtis *Ego te baptizo*, aut æquivalentibus;  
quamvis ante Romanorum Pontificum definitiones id nonnulli abſque  
nota hæreſis affirmaverint.

Nemo ſuccenſeat mihi, quod prætermiſerim argumentum, quo  
Theologi ſolent fulcire aſertum iſtud, contententes neceſſum eſſe,  
*ut actus exprimat in verbis forma*, prout videtur innuere Euge-  
nius IV. cujus verba produximus præced. cap. prop. 1. Me quidem  
non latet, niti iſtiusmodi momento S. Thomam q. lxxv. art. 5. ad 2.  
Dominicum Soto in 1v. diſt. 3. art. 5. & ne antiquiores commemorem,  
Habertum cap. 1v. q. 3. ac Tournelium q. 1. art. 4. Sed certum eſt Sa-  
cramentum Confirmationis ratum eſſe abſque verbo exprimente  
actum, ſive cum *forma* Græcorum, *Ἐπεὶ δὲ διὰ τὴν ἀνίμωτον αἰνῶν, Σι-  
γνακὺλον donationis Spiritus ſancti*, aut conſimilibus, de quibus li-  
bro proximo. Si autem verbum *exprimens actum* non requiritur ad  
valorem Confirmationis, cur neceſſarium eſt ad valorem baptiſmi,  
niſi quia id Salvator inſtituit? Quod vero ait Eugenius ita baptiſmum  
pérſici, verum eſt: ſed & ipſe institutionem attendit, non vim, ne-  
ceſſitatemque verborum. Ad Chriſti igitur voluntatem, non ad ra-  
tionis libellam confugiendum eſt nobis. Hinc communem argumen-  
tationem haud prorsus efficacem exiſtimavit Farvacqueſius noſter  
q. 1v. cap. 3. §. 2. ac nuper Pius Thomas Milante Ord. Præd. Exerci-  
tat. xv. 1. in propoſitiones ab Alexandro VIII. proſcriptas.

Prop. II. Non valet Baptiſmus abſque expreſſa ſanctæ *Trinitatis*  
invocatione collatus.

Demonſtratur 1. Matthæi ultimo 19. præcepit Dominus discipu-  
lis, ut baptizarent *in nomine Patris, & Filii, & Spiritus ſancti*.  
Igitur hæc verba in *forma* baptiſmatis a Chriſto præſcripta debent  
com.

comprehendi. Respondent hæretici cum Vossio disp. 2. th. v. nullis proferendis verbis baptizantes hoc præcepto fuisse adstrictos; cum *baptizari in alicujus nomen* nihil aliud sit, quam per ablutionem initiari, & consecrari in alicujus religionem & cultum, ut illius arbitrio vivamus. Sed excutitur hæc responsio; primum quia ibidem Vossius fatetur, *non junioribus modo, sed etiam veteribus ita persuasum esse*, ut præcitatæ verbis Christus baptismi *formam* præscripserit: & quidem id, ut mox videbimus, est Patrum omnium constans, & perpetua traditio. At in Scripturæ divinæ investigando sensu, non proprii ingenii ductum sequi fas est, sed interpretationem Patrum & documenta Majorum. Deinde religio, cui per baptismum *initiamur*, est illa, qua in *unitate substantiæ* profitemur *Trinitatem personarum*: si ergo baptismus est *mysterium religionis initiativum*, debet Trinitatis fides in ipso exprimi, præsertim cum absque tali nota, per ablutionem tam in religionem Christianam adscisci, & consecrari quis possit, quam in Ethnicam, vel Judaicam: & consequenter absque additione verborum non datur Sacramentum, sive signum sensibile, quo Christianorum Ecclesiæ inferamur. Præterea Ecclesiæ istam sibi immet Christus respondit *mundans eam lavaero in verbo*, auctore Apostolo ad Ephes. v. Non ergo ablutione sola, sed & in verbo: *In quo verbo, nisi in illo*, ait Chrysostomus paulo infra laudandus, *In nomine Patris, & Filii, & Spiritus sancti*? II. Evertit hæreticam responsionem, simulque commonstrat necessariam esse plenam prolationem horum verborum, definitionum Ecclesiæ repetitio. Mitto canonem XLVIII. Apostolicum, de quo prop. 3. capitis præced. Auctor Constit. Apostolic. lib. I. cap. 16. pag. 288. mandat, ut qui baptizat, *proferat nominatim invocationem Patris, Filii, & Spiritus sancti*, *ὡς τὸ ἐκπορεύας ἐκ τῆς καθολικῆς πίστεως καὶ τοῦ ἐκ τοῦ ἁγίου πνεύματος*: quod inquit repetens lib. VII. cap. 22. pag. 368. id Dominum injunxisse Matth. ult. dum ait, *Euntes &c. καὶ ὁ κύριος διατάξατο αὐτὸν λέγειν: παραδίδτω*, &c. Arelatenſe Concilium I. anno 314. can. 8. *De Afriis*, aliàs, *De Arianis*, præcepit, ut illi rebaptizentur, *qui baptizati non fuerint in nomine Patris, & Filii, & Spiritus sancti*, Tom. 1. Conc. pag. 1428. & Concilium Nicænum Tom. 2. pag. 31. jussit canone VIII. non esse rebaptizandos Catharos, sive Novatianos, canone autem XIX. pag. 38. rebaptizandos Paulianistas, sive Samosatenses. Non alia quidem hujus discriminis ratio, nisi quia *Paulianista in nomine Patris & Filii & Spiritus sancti minime baptizabant, & Novatiani iisdem tremendis venerandisque nominibus baptizant*, inquit Innoc. I. epist. 22. Tom. 2. Conc. Eandem rationem produciunt S. Pater Augustinus lib. de hæres. num XLIV. & S. Gregorius epist. 67. libri XI. relatus, ut supra diximus, a Gratiano cap. *Ab antiqua*, de Conf. dist. 4. Hinc merito alii canones præscribere,

ut



ut absque ulla ambiguitate *in sanctæ Trinitatis nomine* baptizarentur, qui baptizati essent solummodo *in nomine Domini*: atque ubi id non esset plane compertum, interrogarentur venientes ab hæresi. Videsis cit. dist. iv. de Consecr. cap. *Sive vera, & Multi sunt*, ex epistolis Pelagii deprompta, necnon cap. *Hi vero hæretici*, petium ex Epistola prælaudata Gregorii. Consonat Leo Magnus epist. 79. ad Nicetam Aquilejensem. Zacharias denique in Epist. vi. ad Bonif. anno 748. mandavit, ut *quisque baptizatus fuerit ab hæreticis in nomine Patris, & Filii, & Spiritus sancti*, nullo modo rebaptizari debeat; secus si baptizatus sit hac forma non servata, scite & caute animadvertens, ut expendereetur, an presbyter qui sermonis barbarie, ita formulam pronuntiaverat, *Baptizo te in nomine patris, & filia & Spiritus sancta*, id fecisset ignorantia Latini sermonis, an consilio inducendi hæresim: quod & legas apud Grat. cap. *Retulerunt nuptii*, & apud Aventinum lib. 111. Annal. Bojorum. Item in hoc volumine pag. 123. Confirmat perpetuam hanc sententiam Ecclesiæ, quod in nullo Rituali, aut Liturgico libro invenies aliquam baptismi formulam, quæ expressam sanctam Trinitatem non habeat, pervolutes quantumvis Thomassium, Menardum, Goarium, Martenium, alios. III. Accedit Latinorum Patrum locupletissima auctoritas. Tertullianus enim de Baptismo cap. 13. inquit: *Lex tingendi imposita est, & forma præscripta: Ite, docete omnes nationes tingentes eas, in nomine Patris, & Filii, & Spiritus sancti*: quod repetit de Præscript. cap. 20. & adversus Praxeam cap. 26. Cyprianus in Epist. ad Jubajanum, quamvis versaretur in errore Rebaptizantium, supposebat tamen *formam* baptismi a Domino præscriptam: *Dominus enim* (inquit pag. 279.) *post resurrectionem discipulos suos mittens, quemadmodum baptizare deberent instruxit, & docuit dicens: Data est mihi omnis potestas in calo & in terra: ite ergo, docete omnes gentes, baptizantes eos in nomine Patris & Filii & Spiritus sancti. Insinuavit Trinitatem, cujus Sacramento gentes baptizarentur*. Ambrosius de Myst. cap. iv. num. 20. ita de Catechumeno loquitur: *Nisi baptizatus fueris in nomine Patris & Filii & Spiritus sancti, remissionem non potest accipere peccatorum*. S. Pater Augustinus lib. 111. de Baptismo cap. 15. n. 20. affirmat baptismum consecrari Evangelicis verbis, *In nomine Patris, & Filii, & Spiritus sancti*. Et libro vi. cap. 25. num. 47. *Certa illa Evangelica verba, sine quibus non potest baptismus consecrari*. Et ibid. *Ceterum quis nesciat non esse baptismum, si verba Evangelica, quibus symbolum constat, illic defuerint?* In symbolo quippe de Patre, Filio, & Spiritu sancto pertractatur. S. Fulgentius de Incarnat. cap. xi. pag. 639. recitatis verbis, *Docete omnes gentes, &c.* inquit: *Doctior igitur & largitor æternæ salutis hanc ideo formam sancti baptismatis dedit, ne quis in eodem Dei filio natu-*

ras dividens manifesto illaqueetur errore. S. Gaudentius Brixienſis pag. 288. *Neque enim baptizari quis poteſt, niſi in integram, atque inſeparabilem Trinitatem.* IV. Conſentiunt & Græci. Juſtini martyris proſert Beveregius in notis ad canonem 1. Apoſt. hæc verba: *In nomine Dei Patris rerum omnium Domini, & Salvatoris noſtri Jeſu Chriſti, & Spiritus ſancti, in aqua tunc lavantur: id eſt* ὁνομα τοῦ πατρὸς ὃ ἔστιν ὃ δεικνύει θεοῦ, ὃ τὸν σωτὴρα ἡμῶν Ἰησοῦ χριſτὸν, ὃ πνεῦματος ἁγίου τὸ ἐν τῷ ὕδατι πάντα λύτρων πλύνεται. Extat in Apologia ad Antonium pag. 94. S. Baſilius tom. 2. pag. 170. ait primo, *perfectum non eſſe baptiſmum, in quo ſolum nomen Spiritus invocatur, id eſt* μὴ μόνον τὸ ὄνομα τοῦ πνεύματος ἐπικληθῆναι: addit, *in baptiſmo ſeparari ſpiritum a patre & filio, ut periculolum eſt baptizanti, ita inutile eſt baptiſmum accipienti: id eſt* τῷ βαπτίζοντι ὁ χωριſμὸς τοῦ πνεύματος ἀπὸ πατρὸς, ὃς υἱοῦ, ἐκτινύμενος κατὰ τὴν βαπτίζοντι, ἀναρῶν δὲ τὴν δεξιάν: ſequitur, *ſicut enim credimus in Patrem, & Filium, & Spiritum ſanctum, ſic & baptizamur in nomine Patris & Filii & Spiritus ſancti, ut γὰρ πνεῦμα οὐκ πατέρα ὃς υἱὸς ὃς ἅγιον πνεῦμα, οὕτω ὃ βαπτίζοντα οὐκ τὸ ὄνομα τοῦ πατρὸς ὃς υἱοῦ ὃς τοῦ ἁγίου πνεύματος.* S. Athanaſius Orat. 2. contra Arianos Tom. 1. pag. 508. poſteaquam demonſtravit tres ſimul perſonas in baptiſmo nominari, non quod ſolus Pater non ſufficiat, ſed quia baptiſmus eadem virtute ſingularum perſonarum perficitur, Quæcirca, concludit, *cum pater in baptiſmo nominatur in eo etiam filium neceſſe eſt nominari, ὁνομαζέται δὲ ἐν τῷ βαπτίζοντι ὁ πατὴρ, ὁ υἱὸς ὃς τὸν υἱὸν συγκατανομάζοντα.* Atque in Epiſtola 1v. ad Serapionem pag. 703. ex quo ſanctum lavacrum detur in nomine Patris & Filii & Spiritus ſancti, inferit eum, qui poſt baptiſmum prævaricatur, in ſanctam individuanque Trinitatem delinquere, affirmans, ſi ſanctum lavacrum in nomine unius perſonæ daretur, jure inferendum in eam duntaxat perſonam peccare. Præſcriptam vero formam baptiſmatis Matth. ult. docet etiam Cyrillus Jerofolym. Catech. xvi. pag. 399. Nazianzenus, & Ammonius in Cat. Cord. pag. 815. Damascenus item lib. 1v. Fid. Orthod. cap. 10. Theophylaetus in Matth. pag. 184. S. Joan. Chryſoſt. in Epiſtolam ad Eph. hom. xx. exponens ea verba, *Mundans eam lavacro in verbo viſa, inquit: In verbo, dixit, quoniam? In nomine Patris, & Filii, & Spiritus ſancti, id eſt* ὁνοματι τριῶν. ποῖος; ἐν ὀνόματι τοῦ πατρὸς, ὃς τὸν υἱόν, ὃς τὸν ἁγίον πνεῦμα. Didymus denique libro 2. de Sp. ſancto, interprete Hieronymo Tom. 1v. pag. 508. *Non arbitror, inquit, quemquam tam vecordem & inſanum futurum, ut perfectum baptiſma putet id, quod datur in nomine Patris & Filii, ſine aſſumptione Spiritus ſancti, aut rursus in nomine Patris & Spiritus ſancti, Filii vocabulo prætermiſſo; aut certe in nomine Filii & Spiritus ſancti, non præpoſito vocabulo Patris. Licet enim, quis poſſit exiſtere ſuxeῖ, ut ita dicam, cordis, & penitus mentis*

*mentis alienæ, qui ita baptizare conetur, ut unum de præceptis nominibus prætermittat, videlicet contrarius legislator Christi, tamen sine perfectione baptizabit.* Scopus autem Didymi est demonstrare argumento *ex forma* baptismi deprompto individuum Trinitatem. V. Hætenus producta exhibent hujus thesisi multiplicem probationem, quarum prima sit: Erronea est opinio, quæ Ecclesiæ definitionibus, ac Patrum doctrinæ adversatur. Talis est autem sententia Magistri, & Cajetani, qui putarunt ratum esse baptismum in solo Christi nomine datum. Igitur hæc sententia est erronea; prout notatur in margine lib. 1v. dist. 3. affirmantque Ruardus Tapperus in Explicat. 1. art. Lovan. Joannes Driedo lib. 3. de Reg. Script. Joannes Heffelius lib. 1v. de Sacram. Estius in dist. 3. §. 3. Lupus dissert. de Act. S. Leonis p. 3. pag. 858. Hinc merito Magistri sententia refutatur a D. Thoma q. 66. art. 6. a Bellarmino lib. 1. de Bapt. cap. 3. atque a Theologis fere universis. Altera probatio sit: Videtur ea sententia sacrilegii crimen inurere Romanis Pontificibus, qui jusserunt iterari baptismum absque Trinitatis expressa invocatione collatum: quippe sacrilegium est ratum baptismum repetere. Accedit probatio tertia; adversa. siquidem opinio labefactat argumentationes Patrum, qui probant indivisam Trinitatem, ex quo in baptismo nomina divinarum personarum nequeant separari. Si vero loquamur de sententia Socini, Episcopii, Vosii, aliorumque necessitatem cujuslibet formæ denegantium, constat apertissime ex dictis non tantum esse erroneam, verum etiam hæreticam, & Sacramenti rationem audacter oppugnantem. Ab hæresi Magister, & Cajetanus immunes sunt, quoniam necessitatem *formæ*, ejusque præscriptionem profitentes existimarunt in nomine unius personæ totam Trinitatem intelligi, ianixi difficili testimonio Ambrosii postea explicando. Et horum tamen opinio iisdem argumentis quatitur, & obruitur.

Hæretici negantes necessariam esse quamcunque *formam* præter argumentum supra refutatum hæc duo opponere possunt. 1. Ex quo Apostolus ad Coloss. iii. 17. præcipiat, ut omnia fiant *in nomine Domini Jesu Christi*, non ideo tenemur cum manducamus & bibimus, præferre hæc verba, *Manduco*, aut, *bibo in nomine D. J. C.* Igitur ex quo Christus dixerit, *Baptizantes eos, in nomine, &c.* non consequitur hæc verba, dum baptizamus, esse necessario pronuntianda. II. Aliquando trina immersio adhibita fuit absque prolatione verborum. Aitenim Ambrosius lib. 2. de Sacramento cap. vii. num. 20. *Interrogatus es, Credis in Deum patrem omnipotentem? Dixisti, Credo, & mergisti.* Idem ait de duabus aliis personis. Ipsæ itaque immersiones possunt verborum vicem supplere. Hinc in libro Sacramentorum Gelassii legitur: *Et cum interrogas, per singulas vices mergis eum tertio in aquam, nulla formæ mentione facta.*

Resp. ad 1. nego consequentiam & paritatem; Ecclesia enim, & Patrum traditio docent primis verbis conjunctum præceptum prolationis, non verbis Apostoli. Ita respondent Joannes Driedo loco supracit. & Janfenius in Concordia cap. 149. Et si petas, cur istiusmodi præceptum in Scriptura expressum non sit, respondebit Schellstratius de Arcani disciplina pag. 19. Sacramenta non initiatis fuisse occultanda, ac principio nascentis Ecclesiæ *tradito verbo* explananda, non *scripto*. Addo priori loco, ad Colofs. 111. loqui Apostolum de omni deliberato opere; nec requiritur ad omne opus pronuntiatio verborum; & ideo *in nomine Domini*, idem sonat ac, *in gloriam Dei*, ut ad Corinth. prima, cap. x. 31. ubi occurrit eadem Apostolica communitio. At Matt. ult. sermo instituitur de Baptismo, idest, de Sacramento, quod *consecratur Evangelicis verbis*: & in quo si verbum detrahas, *quid est aqua, nisi aqua?* Agnosceis, opinor, sepe repetita verba Augustini. Ad alterum respondent PP. S. Mauri, Ambrosium insinuare interrogationes, quæ in baptismo fieri solent, & quibus olim respondebant trinæ merfiones, non celebrandi ordine, sed intentione, ut sic loquamur, celebrantium. Constat hæc responsio ex antiquis Liturgicis omnibus, & ex quo Ambrosius paulo infra, idest, num. 22. baptismi *formam* recenset. Idem dicimus de Sacram. Gelassi, in quo præterea duo animadverto: unum, quod in edito a Thomasio pag. 84. post trinas interrogationes legitur, *Deinde per singulas vices mergis, &c.* ex quo apparet intentione celebrantium, non ordine celebrandi, tres merfiones tribus interrogationibus respondisse, ut ad Ambr. adnotarunt viri clarissimi: alterum, quod in vetustissimo Codice Regio, & in Noviomenfi apud Martene pag. 174. additur forma, *Baptizo te ille in nomine Patris & Filii & Spiritus sancti, ut habeas vitam æternam*; quod ostendit nunquam *formam* fuisse prætermisam.

PROP. III. Neque ab Apostolis baptismus absque invocatione Trinitatis expressa collatus fuit.

Demonstratur primo. Ut vidimus hætenus Christus baptismi *formam* præscripsit Apostolis, dicens, *Euntes ergo docete omnes gentes, baptizantes eos in nomine Patris, & Filii, & Spiritus sancti*. Atque his verbis mandavit, ut gentes initiando per regenerationis lavacrum singulas Trinitatis personas nominarent: quod & Patres docent, & adversarii non dissentunt. Imperceptibile est igitur Apostolos transgressos fuisse tam expressum, recentissimumque mandatum. At reponunt adversarii id Apostolos non præstitisse pro libito, sed facta sibi a legislatore dispensatione, ut nomen Christi honorificentius exciperetur. Verum excutitur nullo negotio commentum istud. Ac principio, cum ea, quæ ad historiam pertinent, nullam promereantur fidem, si absque ullo idoneo testimonio proferantur; jura

jure petimus, ut istiusmodi dispensationis prodant vestigium aliquod, unam saltem antiquorum vel ambiguam voculam: quod cum præstare non valeant, repetimus animosiores datam Apostolis *legem tingendi* tali præceptione, ut non auderent illam ullatenus decurtare. Præterea quis unquam audivit, legislatorem prudentissimum legem ferre, illam absolute intimare, præscribere etiam, ac jubere ut præcones sui cuique servandam proponant, ac simul eam relaxare, eique vulnus infligere? Si ergo Christus præcepit Apostolis ut baptizarent in nomine Trinitatis, eisque simul injunxit, ut servarent, & servanda præscriberent, *quæcunque mandavit*, inverisimile omnino est, statim illum in lege hæc dispensasse, & ab initio Apostolos fidelibus exemplum relaxationis exhibuisse. Ad hæc laudati Patres ita asserunt præscriptam *formam* baptismatis, ut unius personæ invocationi separari nequeat ab invocatione aliarum, quemadmodum separari non potest ipsa fides; eandemque *formam* appellant, *ἀρραβὴν τῆς πίστεως*, *inviolabilem traditionem*, ut citato cap. 12. de Sp. sancto inquit Basilii: quod perinde est, ac asserere traditam baptismi *formam* nulla ratione fuisse immutandam. Insuper ratio commonstrat nullam esse causam dispensandi, nisi rerum vel temporum perurgeat angustia, quod & definitur cap. *Præcis igitur*, dist. 11. Quam ergo dispensationis causam habuerunt Apostoli? Gloriam, inquiunt, & celebritatem nominis Jesu Christi. Sed euiam manifestanda erat hæc gloria? Baptizandis ne? Jam ipsi per catechismum novebant Jesum esse Deum, mundique Reparatorem, atque se baptismi initiatione in ejus cultum, religionemque adsciscendos. Profanis vero, quibus Christi nomen ludibrio erat? At hi vel ignorabant initiationis nostræ mysteria, vel ad hæc trahendi erant Apostolica prædicatione. Si præterea nomen Christi *scandalum* erat Judæis, & *stultitia* gentilibus; signum quoque videbatur mysterium Trinitatis arcanum, & unius divinitatis in tribus subsistentiis individua majestas. Quid ergo? Dicis baptismum conferendum fuisse *in Christi nomine*, quoniam nomen istud erat permultis despicabile? At ego dicam contra, dandum fuisse *in nomine Trinitatis*, ejus cultum profani exstimant superstitiosum; idque longe probabilius, nam Christiana fides, cui baptizati devoventur, fides Trinitatis, & Incarnationis simul est. Insuper quemadmodum multis odio erat nomen Christi, ita ignorabant complures dari Spiritum sanctum, non Ethnicis soli, sed universa etiam secta Sadducæorum: cum isti ergo baptizarentur, consulendum erat gloriæ Spiritus sancti, *in ejus nomine* baptizando. Rursus non detrahitur gloriæ nominis Jesu Christi, sed honor debitus ei redditur, quando Deo Patri, & Spiritui sancto conjungitur, ipsique eadem virtus tribuitur, idem obsequium impenditur, eodem ritu baptizati initiantur; ideoque gloria tanti nominis postulat, ut *forma* baptismi pro-

proferatur integra, non decurtata. Addamus & istud: Si iusta fuit Apostolis ea causa baptizandi in solo Christi nomine, quam adversarii configunt; opus est, ut vigeat ratio eadem, eademque dispensatio, si baptizandus sit modo Paganus, aut Judæus hostis infensus Christiani nominis. Postremo (arbitror enim satis adversariorum responsionem contrivisse) concedamus gratis, postulasse gloriam nominis Jesu Christi, ut peculiari ratione in *forma* baptismatis exprimeretur; id quidem fieri poterat Patre, & Spiritu sancto non prætermisiss: idque reapse factum aliquando do libenter & ultro; scribit enim supra laudatus Justinus Christifideles per aquæ ablutionem initiari, *in nomine Dei Patris universorum Domini, Salvatoris nostri Jesu Christi, & Spiritus sancti*, & inter formulas perantiquas etiam istam invenimus apud Naironem, & Martenium: *Baptizatur agnus in grege Christi, in nomine Patris, &c.* II. Alterum argumentum ad probandam thesim petunt sententiæ nostræ propugnatores ex cap. xi. x. Act. ubi narratur Paulum ita nonnullos discipulos interrogasse, *Si Spiritum sanctum accepistis credentes?* cumque illi respondissent, *Sed neque si Spiritus sanctus est audivimus*, statim Apostolus reposuit, *In quo ergo baptizati estis?* Nulla alia hujus interrogationis causa esse potest, nisi quod hi discipuli, si baptizati fuissent baptismo Christi, non potuissent ignorare Spiritum sanctum, quoniam Christi baptismus datur *in nomine Patris, & Filii, & Spiritus sancti*. Igitur Apostolico etiam tempore baptismus Christi erat cum expressa sanctæ Trinitatis invocatione. Jam responsum ab adversariis huic argumento, ita ab Apostolo Ephesinos discipulos interrogatos, quoniam Apostoli licet baptizarent in solo Christi nomine, non baptizabant tamen, nisi Catechesi præmissa, & fide Trinitatis imbutos: quare idem sonant ea verba, *In quo ergo baptizati estis?* ac ista, *Quomodo ergo baptizati estis?* numquid sine Catechismo, & Spiritus sancti non accepta notitia? Contra hanc responsionem id plurimum valere putant nostrarum partium Theologi, quod non ait Apostolus, *Quomodo*, sed, *in quo*. Ast, ut verum fatear, mihi quod adversarii repouunt, non displicet: quippe notitia fidei a catechismo potius petenda est, quam a *forma* baptismi; unde & Estius cenfet probabilius ad catechismum, non ad *formam* Paulum animum intendisse. Persistit vis nihilominus argumenti: ita enim urgeo adversarios. Principio sententia vestra baptizari *in nomine Christi*, est baptizari invocato nomine Christi: igitur baptizari *in Spiritu sancto*, est baptizari invocato nomine Spiritus sancti. Aut contra: Dicitur baptizari *in Spiritu sancto*, qui baptizatur præmissa prædicatione Spiritus sancti, quamvis per vos Spiritus sanctus non exprimat in *forma* baptismi; dici ergo potest aliquis baptizari *in Christo Jesu*, qui baptizatur imbutus fide Christi, tamen in *forma* baptismi Christus ipse non exprimat.

matur. Aut hoc modo : Ubi legimus, *In quo ergo baptizati estis?* particula *In* significat catechismus, non *formam*: itaque verbis proximis *Baptizati sunt in nomine Jesu*, eadem particula *In* non *formam* significat, sed catechismus. Sed hæc retorquendo contrariorum responsiones dicta sint. Revera enim persuasum mihi est ea verba, *In quo ergo baptizati estis?* idem valere, ac ista, *In quonam ergo baptismo baptizati estis?* ita, ut non solum catechismus innuant, sed etiam ipsum baptismum propria *forma* constantem: siquidem in Greco legimus, *eis vi in iparridanti*; *In quid ergo?* sive, *In quem?* atque ita legunt cum Chrysostomo in Acta pag. 719. Græci omnes, nec non Syrus. Arabs vero, *In quo baptismo*: quem sensum confirmat responsio discipulorum, *In Joannis baptismo*. Mirabatur ergo Paulus Ephesios ignorare Spiritum sanctum, quoniam si baptizati fuissent baptismo Christi, ante baptismum instructi fuissent in fide Trinitatis, in baptismo abluti fuissent invocato Trinitatis nomine, atque per baptismum in cultum ejusdem Trinitatis se noscent fuisse initiatos. III. Permoveat adversarios, quod in Actis Ap. legimus collatum baptismum *in nomine Jesu Christi*, cap. 11. 38. v111. 12. x. 48. xix. 5. His autem verbis, inquirunt, demonstratur *forma* baptismi, non minus, ac Mat. ult. 19. illis verbis, *In nomine Patris, & Filii, & Spiritus sancti*. At argumentum istud vel nihil probat, vel sententiam nostram confirmat; quod evidens erit productis hujus loci interpretationibus. Præferamus primum honoris gratia ipsorum adversariorum explicationem. Illis verbis, inquirunt, commonstratur *forma* qua tangebant Apostoli; igitur baptizabant *in nomine Jesu Christi*. Concedo quod nunc inferunt; sed nego baptizasse *in solo nomine Jesu Christi*, Patre, ac Spiritu sancto prætermisiss; id quippe illo argumento non evincitur. Primo enim non dissentient adversarii, Apostolos piusquam baptismum initiarent, annuntiassse Trinitatis mysterium; & tamen cap. 2. Act. solum narratur Petrum prædicasse *Jesum crucifixum*, in cap. etiam v111. legimus Philippum evangelizasse Eunucho *Jesum*: de Paulo item cap. xix. hoc unum scriptum est, dixisse baptismum Joannis datum, ut crederent *in Jesum* venturum. Quemadmodum ergo legimus in Actis Ap. Petrum, Philippum, Paulum baptizasse *in nomine Jesu Christi*, ita legimus evangelizasse ipsum *Jesum*. At non evangelizarunt *Jesum*, sine Patre & Spiritu sancto. Igitur non baptizarunt *in nomine Jesu*, sine invocatione Patris, & Spiritus sancti. Si petant, quare id sacer Historicus non enarravit? reponam vicissim, Ecce non inquit Philippum una cum Jesu Patrem, ac Spiritum sanctum evangelizasse? Si dicant, subintelligitur *fides Trinitatis* nomine fidei in Christum, quoniam Christus Trinitatem annuntiavit; dicam ego pariter in baptismo Christi intelligi baptismum *in nomine Trinitatis*, quoniam Christus tale baptismum præscripsit.

scripsit. Præterea Patres, quos infra producam, ita in Aët. Ap. Christi nomen sentienti expressum, ut Pater & Spiritus sanctus non intelligantur omitti. Ad hæc, si demus Filii nomen singulari ratione, & cum adjunctis expresso, ut videtur innuere Martyr Iulianus, moles adversariorum tota corruet. Insuper ex quo dicamur Matth. 111. 11. & 1. ad Corinth. 1. 13. baptizati in Spiritu sancto, non proinde excluditur Pater & Filius: igitur ex quo dicantur Apostoli baptizasse, in nomine Jesu Christi, non ideo excluditur nomen Spiritus sancti & Patris. Admissa ergo adversantium interpretatione, & dato iis verbis, In nomine Jesu Christi, designari formam baptismatis, ipsorum argumentatio evanescit, nec probabilis est opinio tam labili fulcro subnixæ. Si autem expendamus alia interpretamenta, hæc eadem argumentatio sententiam confirmat nostram. Sunt enim qui putant baptizari in nomine Christi, nihil aliud esse, quam baptizari virtute, merito, & efficacia Christi, de qua interpretatione plura Jo. Hesselius de Bapt. cap. 4. Ita Sacerdotes Judæorum Aët. 1v. 7. interrogarunt Petrum, qui claudum ad Portam templi sanaverat, In qua virtute, aut in quo nomine fecistis hoc vos? Ipse Dominus Marci ult. 17. de credentibus ait, In nomine meo demonia ejicient: & olim Psalmographus xlii. 6. In nomine tuo spernemus. insurgentes in nobis. Quibus in locis idem est In nomine, ac, in virtute. Quidam consent baptizari in nomine Christi non esse aliud, quam baptizari baptismi instituto a Christo: quod maxime quadrat verbis, quæ obijciuntur ex cap. xix. Aët. ubi constat baptismum Christi opponi baptismi Joannis. Sunt & qui Baptizari in nomine Christi sic accipiunt, ut non sit aliud, quam ritu baptismi initiari, & consecrari in Christi cultum, cique se devovere, atque in religionem ab ipso institutam adscisci; quam phrasim derivatam contendunt ex Hebræis, apud quos baptizari in nomine Profelytarum, מטביל בשם נרות, ut de mulieribus bello captis inquit Maimonides, idem sonat, ac Profelytarum religioni nomen darc. Ita Grotius in Matth. xxv. 11. quod caute accipias, nullatenus excluso sensibili Sacramento, ne in Socinianismum impingas. Quævis harum interpretationum commonstrat Apostolos nequaquam sine consueta forma baptizasse, quod constat ex hoc ratiocinio: Baptizari in nomine Christi est baptizari baptismi instituto a Christo, atque hoc baptismi inferi in Ecclesiam, religionemque Christianam. Atqui Christus baptismum instituit dandum sub expressa invocatione Trinitatis, & qui baptizatur baptismi Christi fidei, & cultui Trinitatis sese devovet. Ergo qui baptizatur in nomine Christi, baptizatur in nomine sanctissimæ Trinitatis. IV. Postremo sulcitur assertio nostra eximiorum Patrum auctoritate. S. Cyprianus laudata Epist. 73. ad Jubajanum pag. 284. de verbis Petri Aët. 21. Baptizetur unusquisque vestrum in nomine Domini Jesu Christi, in-



inquit, *Jesu Christi mentionem facit Petrus, non quasi Pater omittetur, sed ut Patri quoque Filius adjungeretur*. Frustra hunc nodum etiam injectis unguibus contrarii solvent. Nam Cyprianus, ut perspicue ostendat loqui se de expressa Trinitatis invocatione, statim repetit formam a Christo præscriptam, dicens: *Ubi post resurrectionem Apostoli ad gentes mittuntur, in nomine Patris & Filii & Spiritus sancti baptizare gentes jubentur*. Probat autem eo loci sanctus Martyr baptizatos in solo nomine *Jesu Christi* non posse consequi remissionem peccatorum, neque id sentientibus præsidio esse Apostolicam historiam, quandoquidem incredibile est Apostolos fuisse transgressos mandatum Christi, qui jussit *Gentes baptizari* (expendas hæc verba) *in plena & adungta Trinitate*. De Basilio dictum supra. Addo tantum, commonere eo loci unumquemque, ne in errorem inducatur ex quo nominis Patris, & Spiritus sancti mentio in baptismatis commemoratione omittatur, *Neque ideo putet harum vocum usum, nominumque invocationem esse indifferentem, sicut si τὸν ἀπατίστον ἰδίῳ τῷ ἐκκλησίᾳ ἡμῶν ᾤκηται*. Quæ verba nonnisi de invocatione expressa, nominumque prolatione possunt accipi. Hieronymus in 111. Joelis supponens discipulos Ephesinos, de quibus Act. xix. baptizatos in nomine Domini *Jesu* baptismo Joannis, scribit fuisse rebaptizatos, imo verum baptismum accepisse, *quia sine Spiritu sancto, & mysterio Trinitatis quicquid in unam vel alteram personam accipitur, imperfectum est*. De hoc tamen loco vide quæ diximus cap. 2. hujus libri. S. Pater Augustinus hæreticum Arianum Maximinum, dicentem Spiritum sanctum non esse Creatorem, quoniam de Filio dictum est, *Omnia per ipsum facta sunt*, quasi legeret, *Omnia per ipsum facta sunt absque Spiritu sancto*, hoc argumento refellit lib. 111. nunc 11. cap. 17. num. 1. *Si autem quia non est nominatus, quod etiam per illum facta sit creatura, quando de filio dictum est, Omnia per ipsum facta sunt, ideo putas Dei Spiritum non esse creatorem; proculdubio nec in ejus nomine poteris baptizatos dicere quibus ait Petrus, Agite poenitentiam, & baptizetur unusquisque vestrum in nomine Domini Jesu Christi; quia non ait, Et Spiritus sancti; nec in Patris nomine, quia nec ibi est nominatus. Si autem etiam non nominatis Patre & Spiritu sancto, in nomine Jesu Christi jussi sunt baptizari, & tamen intelliguntur non baptizati nisi in nomine Patris, & Filii, & Spiritus sancti: cur non sic audis de filio Dei, Omnia per ipsum facta sunt; ut & non nominatum intelligas ibi etiam Spiritum sanctum?* Audio insignem Scotistam contendentem hoc Augustini testimonio sententiam firmari suam, & hortantem ut accuratius Augustinum perlegamus, atque ita ipsa lectione convincamur: sensus enim Augustini est, inquit, si jussi baptizari in nomine Christi non nominatis Patre & Spiritu sancto, censentur tamen baptizati in nomine Patris

& Spiritus sancti, quia nempe eadem est trium personarum virtus; cur facta per filium non censentur etiam facta per Spiritum sanctum, cum eadem sit Filii, & Spiritus sancti potentia? Sane qui hæc respondent, non tam nos faciunt bardos, quam Augustinum solidum, & incautum. Maximinus quippe Arianus, si negabat omnia facta esse per Spiritum sanctum, negabat quoque Filii & Spiritus sancti eandem esse virtutem; negabat & consequenter in baptismo non nominato Spiritu sancto totam Trinitatem intelligi, eo quod trium personarum virtus sit eadem. Insulse ergo, inscite, & caste omnino Augustinus prædicta comparatione Maximinum exagitasset; atque is merito reposuisset, *Quid de forma baptismi obiectas, quid comminisceris?* Nec Spiritus sanctus in baptismo habet eandem cum Patre efficaciam, & ideo aliquando baptizarunt Apostoli in solo Christi nomine; quemadmodum per solum Verbum omnia facta esse inquit Joannes Evangelista. Meam ergo argumentationem non diluis, non enervas, Augustine, sed confirmas. Augustinus itaque supponit nunquam Apostolos in solo Christi nomine baptizasse, idque putat etiam Maximino persuasum: eumque propterea hoc ratiocinio refellit: Ex quo in Actibus Apost. legatur Apostolos baptizasse *in nomine Christi*, non sequitur baptizasse non nominatis Patre & Spiritu sancto. Ergo ex quo cap. 1. Joannis scriptum sit, *Omnia facta esse per verbum*, non consequitur facta simul non esse per Patrem, & Spiritum sanctum. Atque ita stat sua argumentationi Augustini firmitas & libritas. Joannes Damascenus lib. 1v. de Fid. Orthod. cap. 10. docet primum, rebaptizandos quicumque in sancta Trinitate baptizati non fuerint: *οὐδὲ μὴ οὐ τὸν ἁγίον πνεῦμα βαπτισθέντας, τούτων δὲ ἀναβαπτίζονται*. Deinde ait Baptizari in Christo, quod in sacris literis legitur, non idem esse ac baptizari invocato solo nomine Christi, sed credentes in eum ablui: *τὸ οὐ οὐς Χριστὸν βαπτισθέντας δὲ αὐτὸ τὸ πιστεύοντας οὐς αὐτοὺς βαπτίζονται*. Addit impossibile esse in Christum credere, non edoctos confessionem in Patrem, Filium, & Spiritum sanctum: *ἀδύνατον δὲ οὐς Χριστὸν πιστεύειν μὴ διδασκόντας τὸν οὐ πατέρα, ἢ υἱόν, ἢ ἅγιον πνεῦμα ὁμολογῶντας*. Concludit ideo Dominum Apostolis suis præcipisse, ut baptizarent in nomine Patris & Filii & Spiritus sancti: *τὸν μὲν ἐπέκρινεν τῶν αἰώνων μαρτυρῶν ὁ κύριος διδάσκων, ἰλαρὶ βαπτίζοντες αὐτοὺς οὐς τὸ ὄνομα τοῦ πατρὸς, ἢ τοῦ υἱοῦ, ἢ τοῦ ἁγίου πνεύματος*. Facundus denique Hermianensis Episcopus libro 1. Operis, quod conscripsit pro defensione trium Capitulorum pag. 22. edit. Sirmondi, *Quod autem*, inquit, *in nomine Jesu bi quos memoravimus baptizati narrantur, non ex eo credendum arbitror, quia non in nomine Patris & Filii & Spiritus sancti baptizati sunt, ut etiam in ipsis servaretur verbis a Domino constituta forma baptismi: sed quia hoc erat insinuandum quod baptismo novo fuerint baptizati; sufficere judicatum est ad discrecionem ipsius*  
novi

*novi baptismi solum nomen Domini Jesu memorare, quod neque in baptismo Joannis, neque in aliis baptismis Judaici ritus interferebatur. Ceterum illis sacratis verbis, id est, in nomine Patris, & Filii, & Spiritus sancti baptizati mihi videntur.*

ADVERSARIORUM OBJECTIONES DILUUNTUR.

Opp. 1. ex Scripturis; Mandatum illud Matth. ult. *Euntes, &c.* non ad Judæos spectat, sed ad gentiles, ut constat ex illis verbis, *Docete omnes gentes baptizantes eos, &c.* Ex quo ergo Gentiles in plena & adanata Trinitate essent baptizandi, ut ait Cyprianus, minime sequitur eandem formam necessario fuisse servandam in baptizandis Judæis. II. Revera Judæos in solo Christi nomine baptizatos legitur in Apostolorum Actis cap. 2. 8. & 19.

Resp. ad primum, nego ant. quamvis enim *Gentium* nomine veniant aliquando pagani, & idolis addicti, eo tamen vocabulo significantur nationes, hominumque genera; nec aliud sonat Græcorum *τὰ ἔθνη*. Id vero præsertim Matth. ult. ubi additur adjectivum, *omnes, πάντα τὰ ἔθνη*. Quare Persica lectio vertit, *totum mundum*, Aethiopica vero, *omnes generationes*, & recte; Marcus enim Matthæi abbreviator cap. xvi. 15. ea verba; *Euntes docete omnes gentes*, reddidit, *Euntes in mundum universum, predicate Evangelium omni creatura*. Voluit ergo Dominus ne discipuli se continerent duntaxat inter fines Palæstinæ, sicut mandaverat Matth. x. 5. sed ut, post lustratas Judæorum regiones, etiam ad exteras commigrarent. Et quidem Apostoli Domino obtemperantes primum Judæis, deinde gentibus reliquis Christum annuntiarunt, ut legitur Act. 1. 8. & xiii. 46. Sicut ergo *Docete omnes gentes* ad Judæos quoque spectat; ita & quod sequitur, *baptizantes eos, &c.* Fallitur itaque eximius Thomista, & oppositæ sententiæ vindex acerrimus, dum objectat discrimen illud Judæorum, atque Gentilium, & jure exagitur ab antagonista fœdali Volum. 1. de Re Sacram. pag. 231. Animadverto ipsum discrimen ad rem non esse; quippe S. Thomas q. lxxvi. art. 6. ad 1. scribit Apostolos ex speciali Christi revelatione in primitiva Ecclesia in ejus nomine baptizasse, *ut nomen Christi, quod erat odiosum Judæis, & Gentilibus honorabile redderetur*; unde infero eam æconomiam, sive dispensationem, si fuisset, tam in baptizandis Judæis, quam in baptizandis Gentilibus fuisse servandam, Addo fictum istud discrimen, robur addere hæretico dogmati, quod baptismus conferendus tantum sit ex Dei mandato Ethnicis, ut in veram Ecclesiam inferantur, eo quod *baptisma sit introductorium in visibilem Ecclesiam*, ut ait Lightfootus in Matth. pag. 390., quandoquidem de solis Ethnicis Christus sermonem instituisse; tamen ipsum illud dogma momentis aliis

refellitur. Ad 2. distinguenda est propositio: Apostoli baptizantur *in Christi nomine*, idest, baptismo a Christo instituto, & meritis Christi peccata remittente, cor: Baptizantur *in Christi nomine*, idest, solo Christi nomine invocato, nego. Vide supra num. 111.

Opp. 2. Sententia adversariorum auctoritati Patrum innixa est: Hilarius in libro de Synodis num. 85. ait: *Ne postremo Apostoli reperiantur in crimine, qui baptizare in nomine Patris & Filii & Spiritus sancti iussi, tantum in Jesu nomine baptizaverunt.* Ambrosius lib. 1. de Sp. sancto, cap. 3. num. 42. inquit, *Si unum in sermone comprehendat, aut Patrem, aut Filium, aut Spiritum sanctum; fide autem nec Patrem, nec Filium, nec Spiritum sanctum abneget, plenum est fidei Sacramentum.* Et num. 44. *Rationem sequamur; quia qui unum dixerit, Trinitatem signavit. Si Christum dicas, & Deum Patrem, a quo unctus est Filius, & ipsum qui unctus est Filium, & Spiritum sanctum, quo unctus est, designasti.* Idem scribit Venerabilis Beda in Act. x. Videtur idem innuere sanctus Basilius citato cap. 12. de Spiritu sancto, ubi ait: *Siquidem Christi appellatio totius deitatis est professio: quippe quae simul declarat & Deum, qui unxit, & Filium qui unctus est, & Spiritum sanctum qui est unctio.* ἡ γὰρ τοῦ Χριστοῦ ἀποστολὴ, τοῦ πατρὸς ἐκ τῆς ἑμῶν ἑμῶν. ὁλοῦ γὰρ τὸν τι Χριστὸς οὖν, ἢ τὸν Χριστὸν ἢ τὸν πνεῦμα: Item Theodoretus in cap. ult. Lucæ pag. 546. *Christi nomen in se ipso continet & Patrem inungentem, & unctionem Spiritum, & unctum Filium.* τὸ Χριστοῦ ὄνομα ἐν αὐτῷ ὑμῶν ἢ τὸ πατέρα τὸν Χριστὸν, ἢ τὸ πνεῦμα τὸ πνεῦμα, ἢ τὸν Χριστὸν ἢ τὸν πνεῦμα. Denique S. Bern. in Epistola ad Henricum Archidiaconum Aurelianensem Tom. 1. pag. 236. interrogatus an ratum esset baptismus collatum puero periclitanti sub hac forma, *Baptizo te in nomine Dei, & sanctæ & veræ Crucis*, respondet ratum sibi videri, hac ratione producta, *Legimus sane in Actibus Apostolorum, non modo in nomine Patris, & Filii, & Spiritus sancti, verum & in nomine Domini Jesu Christi aliquos baptizatos.*

Resp. Hilarii sensum hunc esse, non deferendum vocabulum *ἑμῶν*, quia vitiose a nonnullis soleat intelligi: ad quod commonstrandum varia profert exempla, ut, delenda alioqui ex prima ad Timotheum ea verba, *Mediator Dei & hominum homo Christus Jesus*, quoniam abutitur hoc loco Photinus: damnandam igni, aut spongia abstergendam epistolam ad Philipenses, ne legat in ea Marcion, *Et habitu inventus ut homo*; aliisque allatis exemplis concludit novum quoque testamentum abjiciendum, si ob pravam quorundam interpretationem aliqua supprimenda essent vocabula: quippe si legantur E. gratia Actus Apostolici, ubi narratur Apostolos baptizasse *in nomine Jesu*, si nugari velimus, Apostoli *reperiantur in crimine*, utpote qui non observant præscriptam a Christo formam. Quare ut liquet

liquet ex scopo Hilarii, & ex toto orationis complexu, idem est; *Tantum in Jesu nomine baptizaverunt*, ac, *Tantum in Jesu nomine baptizasse leguntur*, ut optime adnotarunt PP. S. Mauri. Hilarius itaque supponit Apostolos baptizasse *in nomine Trinitatis*; aliàs perperam eorum exemplum produxisset ad probandum non esse vocem aliquam eliminandam ob ambiguum significationem, pravamque aliquorum intelligentiam. Haut nescio Christianum Lupum in dissert. de Actis S. Leonis p. 3. pag. 858. scribere *deferendum Hilarium*: sed detur mihi venia, si in re perlevi a sodali recedam.

Ambrosii testimonium intricatissimum esse fateor, adeo, ut excusandus sit Magister in ejus intelligentia deceptus; at illud nullatenus suffragatur adversariis. Primo namque inde sequeretur, non solum Apostolicis temporibus, verum & nunc ratum esse baptismum invocata una tantum persona collatum, cum ratio, quam inculcat Ambrosius, etiamnum subsistat, ut optime notatum ab Estio in IV. dist. 3. §. 5. Consequeretur etiam validum esse baptismum *in solo nomine Spiritus sancti*, de quo præsertim sanctus Antistes pertractat. Fieret & consequens, nullum esse baptismum absque fide Trinitatis datum, sive unius, sive etiam trium personarum invocatione. Hæc tria confectaria cum adversarii non probent, frustra a perplexo, & ambiguo Ambrosii testimonio præsidium quæritant. Sed videamus quid responderi soleat, & quænam responsio sit præeligenda. I. Ac primo animadverto Catechismum Romanum P. 2. de Baptismo n. 16. tradere revera Ambrosium loqui *de forma baptismatis*, sed nequaquam dum unam personam commemorat excludere alias, & quod scriptum est explicare, non quod actu perfectum: *Quamquam dubium* (inquit) *fortasse alicui videri potest, an hujusmodi forma Apostoli aliquem baptizaverint; si Ambrosii, & Basilii sanctissimorum, & gravissimorum Patrum auctoritatem sequi volumus, qui ita baptismum in nomine Jesu interpretati sunt, ut dixerint iis verbis significari baptismum, non qui a Joanne, sed qui a Christo Domino traditus esset: tamen a communi & usitata forma, quæ distincta trium personarum nomina continet, Apostoli non discederent. Atque hoc loquendi genere Paulus etiam in Epistola ad Galatas usus videtur, cum inquit, Quicumque in Christo baptizati estis, Christum induistis, ut significaret, in fide Christi, nec alia tamen forma, quam idem Salvator & Dominus noster servandam præceperat, baptizatos esse.* Hanc responsionem, utut vera sit, impos est ingeniolum meum cum textu Ambrosii conciliare; siquidem ita ille unius Personæ invocationem deprædicat, ut dicat sufficere, *si quod verbo tacitum fuerat, expressum est fide*. II. Communior est responsio, quam tradunt Estius, Sylvius, Nat. Alex. Juenin, & alii, non loqui Ambrosium *de forma baptismi*, sed *de operatione S. Trinitatis*, demonstrando in illis Scripturæ locis, ubi

ubi operatio tribuitur uni personæ, nequaquam excludi alias: atque hoc pacto, etsi in Act. Ap. legimus baptizasse Apostolos *in nomine Christi*, non sequitur aliarum personarum nomina siluisse. Ad quam responcionem confirmandam addunt illam Ambrosii doctrinam esse desumptam ex libro Basilii de Spiritu sancto, ubi hæc doceri nemo denegabit, qui Basilium perlegat oculis non lippientibus. Probabilis plurimum est hæc responcio: etenim Ambrosius initio hujus capituli inquirendum proponit, *Qua ratione, cum dixeris* (Apost. in 1. ad Corinth.) *Ex Patre omnia, & per Filium omnia, de Spiritu sancto tacuerit*; respondetque: *Ubi operatio aliqua divina, aut Patris, aut Filii, aut Spiritus sancti designatur, non solum ad sanctum Spiritum, sed etiam ad Patrem refertur & Filium; nec solum ad Patrem, sed etiam ad Filium refertur ac Spiritum*. Atque ad hoc comprobandum agit postea de baptismo, cujus effectus modo in sacris litteris tribuitur *Spiritui sancto*, ut Joan. 1. 27. & 1. ad Corinth. xii. modo *Jesu Christo*, ut Act. xix. 5. Hinc Ambrosius num. 45. concludit: *Unitas ergo operationis, unitas predicationis, quæ non potest separari*. III. Responcio tertia traditur a Farvacquesio, ab Harduino, a Nat. Alex. a Ludovico Habert, a Tournely, ac præcedenti præfertur a PP. S. Mauri Tom. 2. Op. Amb. pag. 608. qui ajunt agere Ambrosium, non de sola operatione Trinitatis, sed etiam de fide eorum, qui suscipiunt baptismum, & hoc sanctum Præfulem intendere, catechumenos, quamvis interrogarentur de fide in unam personam sanctæ Trinitatis, dummodo rectam de tota Trinitate fidem animo retinerent, legitimum baptismum, & remissionem peccatorum consecuturos. Responcionem hanc ce'eris & ego arbitror meliorem, quoniam Ambrosium loqui de pronuntiandis in baptismo divinis personis, tota orationis series demonstrat. Primo enim profert num. 41. exemplum Aethiopis Eunuchi Candacis reginæ, qui *baptizatus in Christo plenum mysterium consecutus est*. Legimus vero illum hanc fidei professionem emisisse, Act. viii. 37. *Credo filium Dei esse Christum*. Deinde num. 42. ait S. Doctor: *Plenum autem est* (fidei Sacramentum) *si Patrem & Filium Spiritumque sanctum fatearis; si unum neget, totum subruet*. Quid est Trinitatem fateri, nisi credere? Sequitur Ambrosius: *Et quemadmodum si unum in sermone comprehendat, aut Patrem, aut Filium, aut Spiritum sanctum, fide autem nec Patrem, nec Filium, nec Spiritum sanctum abneget, plenum est fidei Sacramentum*: sermone comprehendere, est fidei professionem emittere, in qua professione, qui ait, *Credo in Dominum Jesum Christum*, si fidem ex audita perceperit, & quis sit Dominus Jesus agnoverit, se in totam Trinitatem credere profitetur. Ita (ait subinde sanctissimus Præsul) *quamvis Patrem & Filium & Spiritum sanctum dicas, & aut Patris, aut Filii, aut Spiritus sancti minus*

*minus potestatem, vacuum est omne mysterium.* Hæc verba nequeunt accipi de forma baptisni; aliàs irrium esset baptisma in nomine *Trinitatis* collatum ab Ariano; intelligenda sunt ergo de fide suscipientium. Perspicua magis sunt, quæ sequuntur num. 43. *Quod verbo tacitum fuerat, expressum est fide:* & num. prox. *Qui unum dixerit, Trinitatem signavit;* aliæque omnia, quæ ex dictis satis sunt obvia. Sane ex quo ad fidei professionem sufficiat dicere, *Credo in Dominum Jesum Christum*, modò animo etiam Spiritus sanctus ac Pater retineantur, non sequitur idem satis esse ad formam baptisni; quippe fides in corde sita est, Sacramentorum autem forma in verbis a Christo præscriptis, quæ non ex animo proferentium virtutem habent, sed ex merito institutoris. Vide quæ supra de Ambrosio diximus prop. 2.

Idem de Venerabili Beda dicendum est: nam eo loci Ambrosium exscripuit; ut recte vidit Estius in iv. dist. 3. & Sylvius in art. 6. q. LXVI. Ceterum ipsemet Beda in libro Variarum qq. Tom. VIII. q. 14. quæ est de peccato originali, scribit: *Si quis baptizans dicit, Ego baptizo te in Christo Jesu, & non dicat, In nomine Patris, & Filii, & Spiritus sancti, non est verus baptismus.* Ad Basilium & Theophylactum respondeo, explicare illos cur baptismus in nomine *Trinitatis* dictus sit baptismus in nomine *Christi*; quod recte dici animadvertunt, quoniam nomen Christi est totius Trinitatis appellatio. At ibidem docent Apostolos baptizasse forma sibi a Domino præscripta, ac decipi qui putant posse prætermitti, & indifferentem esse usum nominis Patris, & Filii, & Spiritus sancti: quod de Basilio constat ex dictis. Theophylactus verò eodem in loco hæc habet: *Quomodo autem baptismus in nomine solius Christi fieri intelligemus, præsertim cum alias doceamur baptizari in nomine Patris & Filii, & Spiritus sancti? Igitur primum quidem dicimus quod quando dicimus baptismum fieri in nomine Christi, non dicimus quod oporteat in solius Christi nomine fieri, sed quod Christi baptismus spirituale sit, non judaicum. Insuper baptismus in nomine Christi intellige in mortem Christi.* Turpè subjicit rationem, de qua supra. Quare demiramur Frassenium, & alios probare sententiam suam ex Theophylacto, præsertim cum ibidem nec de baptismo collato ab Apostolis loquatur, ac demonstret in solo nomine Domini esse remissionem peccatorum, redarguens eos, qui baptizabant in Montanum, Priscillam, & Maximillam.

De Epistola D. Bernardi est judicium Estii spuriam esse, eique affectam. Tournely inquit Estium id asserere, non probare, & Jacobum Horstium genuinam agnoscere, eique subscribere doctissimum Mabillonium: ait tamen caute, *videtur.* Censeo Estio subscribendum. Primo animadvertit etiam Michael Bajus in Opusculo de Forma baptisni, cap. 4. pag. 228, hanc Epistolam unam esse ex triginta, quæ

quæ posterius additæ sunt, & de quibus an sint Bernardi certo non constat. Deinde Mabillon in Præfat. ad sancti Bernardi Opera testatur eandem Epistolam in paucis manuscriptis inveniri; nec in ullo alio, præterquam in Sorbonico exemplari valde mutilo, a se reperitam. Tertio rationem allatam ab illius Epistolæ auctore, ratum illum baptismum, quia baptizans, in eo quod addidit, *sanctæ & vere Crucis, manifeste commendavit Dominicam passionem*, quamvis Horstius appellat non spernendam, constat esse insulsam, & quam non credo ex ore Mellisui profectam. Ipsum enim Bernardum latere non poterat nunquam nomen *Crucis* formam baptismi constituisse. Demum & Horstius ait, *Si tamen ejus est hæc Epistola, nam plerique negant*. Verum si Bernardi est, dicendum cum eodem Horstio, *Hæc sententia hodie non recipitur a Theologis, & traditione Apostolica, & aliorum Patrum, ipsiusque sancti Augustini auctoritate refellitur*. Similia Juenin in fine quæst. iv. agnoscens hanc Epistolam tanquam germanum Bernardi fœtum. Auctor denique illius Epistolæ ait se breviter respondere, & absque præjudicio sanius sapientis; quo liquet aliis negotiis distentum, nec firma, certissimaque assertione hæc distasse.

Opp. 3. Romani Pontifices definire baptismum in solo nomine Christi collatum ratum esse ac legitimum, quoniam & Apostoli *sub illa forma* baptizaverunt. Talem fuisse sententiam Stephani in suis literis adversus Rebaptizantes, demonstratum a plurimis, præsertim a Joanne Launojo p.v. ep. i. & liquet ex Cypriano ep. lxxiii. ad Jubanum. Nicolaus I. ad Consulta Bulgarorum cap. 104. interrogatus an rebaptizandi essent baptizati a quodam Judæo, de quo ignorabatur an paganus esset, vel Christianus, respondit: *Si in nomine SS. Trinitatis, vel tantum in nomine Christi, sicut in Actis Apostolorum legitur, baptizati sunt, (unum quippe, idemque est, ut sanctus exponit Ambrosius) constat eos non esse denuo baptizandos*. Extat etiam in cap. *A quodam*, de Consecrat. dist. iv. ubi & Glossa Decreti ait valere baptismum *in solo nomine Christi*, quamvis modo sub ea forma baptizare non liceat.

Resp. sententiam Romanorum Pontificum nobis innotescere ex aliis ejusdem dist. rescriptis, ex can. nempe, *Ab antiqua, Si revera, Multi sunt, Hi vero hæretici*, aliisque citatis prop. 2. quò cum Auctore Glossæ candidatum nostrum remittimus. Ac de Stephano infra; nunc enim solum reponimus, ab ipso baptismum dici *in nomine Christi*, qui a Christo institutus est, & forma ab illo statuta collatus. De Nicolao autem, quamquam non desunt qui cum interpretantur eo pacto, quo nos supra acta Apostolica, & Ambrosium explanavimus, eo quod Pontifex hæc eadem commemorat; respondemus tamen illius definitionem irreformabilem esse in eo, quod statuit legitime baptiza-



ptizatum etiam a Judæo, vel Pagano, non esse rebaptizandum; in eo, autem, quod obiter pertractat de *forma*, sub qua baptizantur Apostoli, quoniam de hac interrogatus non fuerat, inseruitque quod opinabatur, non attendens ad traditionem, & Prædecessorum decreta, privatum Doctorem egisse, non Romanum Pontificem: siquidem non de *forma*, ut dixi, sed de ministro, interrogatus fuerat a Bulgaris; nec quæstio proposita erat, num *forma* baptismi esset *Baptizo te in nomine Jesu Christi*, sed, an ratus esset baptismus a *Judæo, vel Pagano* collatus. Atque hanc responsionem datam a Belarmino lib. 1v. de Rom. Pontif. cap. 12. a Vasquesio disp. 143. cap. 3. a Cano lib. vi. de Locis cap. 8. ad 7. a Sylvio, Tournelio, innumerisque Theologis, nemo jure repudiabit. Addo urgere hoc argumentum etiam adversarios, qui fatentur post ætatem Apostolorum baptismum datum *in nomine tantum Christi* nullum esse: unde miramur præclarum Scotistam Henno q. vi. concl. 2. auctoritate Nicolai probare aliquando ratum fuisse baptismum in solo nomine Christi, dum conclus. præcedenti, qua statuit jam invalidum esse, ad objectam Nicolai auctoritatem, respondet, *Nego, quia non interrogabatur, an valeret baptismus collatus in nomine Christi, sed an valeret collatus a Judæo*. Gerit se eodem modo Frassenius Tom. x. pag. Rom. edit. 274.

Opp. ult. Decebat, ut plures Theologi inquirunt, in Ecclesiæ incunabulis reddere nomen Salvatoris nostri honestissimum ac celeberrimum, ejusque divinitatem palam testatam facere: quod melius fieri non poterat, quam invocatione hujus augustissimi nominis baptizando, atque in novam Ecclesiam inferendo. Hæc ergo erat dispensationis, quam propugnant complures, causa legitima & gravis. Præterea videtur Joannes Lightfootus in Horis Hebr. pag. 270. haud contemnendam rationem asserre cur Judæi *in Christi nomine*, Gentiles *in nomine Trinitatis* essent abluendi: quia nimirum cum Judæis summe controversum est de Messia, quem esse Jesum Nazarenum a gente illa perfida negabatur, ideoque non sine causa, imo non sine necessitate initio baptizatum est *in nomine Jesu*, ut sigillo isto firmaretur hæc veritas cardinalis, *Jesum Nazarenum esse verum Messiam*. At cum Gentilibus non erat controversia *de vero Messia*, sed *de vero Deo*, & ideo inter Gentiles necessum fuit, ut initiarentur credentes, *in nomine Patris, & Filii, & Spiritus sancti*.

Resp. ad 1. jam demonstratum supra, gloriæ & celebritati nominis Jesu consultum magis adhibendo consuetam baptismi *formam*, quàm mutilam, qua Christi nomen a Patre, & a Spiritu sancto pronuntiatum sit separatim. Quæ enim sublimior gloria, quàm Dominum Jesum *unum* substantia ac potestate cum summo Deo profiteri? Et quidem ex *forma* baptismi unam in tribus personis ostendi essen-

tiam ac majestatem, vidimus lib. vii. cap. 3. & hæreticos male de Trinitate sentientes non semel hanc *formam* adulterasse, ostendimus paullo supra. Dictum quoque est baptismo initiatos credentes, & per Apostolicam prædicationem fide imbutos, ideoque non ignorantes quo sensu nomen *Filii* in sancto lavacro pronuntiaretur. Quod si celebritas ac dignitas venerandi nominis postulabat, ut singillatim enuntiaretur se junctim a personis aliis, id in prædicatione potius, quam in baptismo erat faciendum; & si adversarii non putant, Apostolos, quibus dictum est, *Ite, docete, baptizate*, annuntiasse nomen solius Christi, non Trinitatem; nunquam mihi persuadebunt baptizasse *in nomine Christi* tantum, non *in nomine Trinitatis*. Ad didi confictam illam dispensationis causam, si fuit unquam, & nunc in suo robore permanfuram; commendoque Subtilem Doctorem, qui ait: *Non audeo dicere quod baptizatus hodie in nomine Christi non esset baptizatus, quia non lego ubi fuerit ea dispensatio revocata*: ac pariter excuso Magistrum, & Cajetanum, qui arbitrati sunt baptismum *in solo Christi nomine* etiamnum esse ratum, quoniam talis fuit Apostolorum ætate. At cum omnium consensu postrema hæc sententia falsa sit, eamque Scholæ omnes exuerint, mehercule non video, cur primam, a qua ista consequitur, pugnaciter defensent, quasi decertantes pro aris. Neque enim illam dispensationem aut datam esse, aut cessasse possunt evincere, quantumvis lacertis viribusque se torquant. Dixi postremo, me præfracte non denegare, quin Apostoli honoris gratia ad *Filii* nomen addiderint vocabulum *Salvatoris nostri Jesu Christi*, aut consimile; malo etenim id asserere, quàm incertam illam dispensationem venditare. Sed de priori argumento hætenus. In proximo, quod urget Lightfootus, non immorabor, siquidem & nunc Judæi virulentia illa, & Vatiniano atque capitali odio in Salvatorem nostrum laborant, & nunc denegant esse Messiam: nunquam vero sine prædicatione Christi, crucisque præconio caput baptismati nostro submittunt. Si ergo olim, etiamnum in solo Christi nomine baptizari illos oportet. Neque tantum *Messiam* negant; oppugnant quoque *Trinitatem*, & cum Christus se *Unum* cum Patre asseruisset, adeo commoti sunt, ut lapidibus eum impeterent. Quod si filium Patris illum credidissent, nec Messiam abnegassent. Permulti denique Judæorum, ut olim Sadducæi, Spiritum sanctum ignorant. Quantum ergo Judæos spectat; nulla baptismi *forma* congruentior, quàm vulgaris Christi divinitatem, mysteriumque Trinitatis significans. Idem dicendum est de Gentilibus, qui non solum pluralitati Deorum addicti sunt, verum etiam detinentur errore, quod adorandus non sit Christus affixus cruci: unde aiebat Apostolus 1. ad Corinth. 1. 23. *Nos autem prædicamus Christum crucifixum: Judæis quidem scandalum, Gentibus autem stultitiam*. Mysterium item

item Trinitatis adversatur gentium polytheismo, earumque captum longe superat. Quæ ergo militat pro Judæis, eadem pro Gentilibus tenet ratio: quamquam illud nobis attendendum est, non quod imbecillis ratio suadet, sed quod Veritas ipsa præscripsit. Hæc autem, ut ultima primis respondeant, priusquam cælum conscenderet, allocuta est Apostolos repetitis sæpe verbis, & quæ in fine Hist. Evang. numeris expreßit Juvencus Presbyter:

*Pergite, & ablutos homines purgantibus undis  
Nomine sub sancto Patris, Natique lavate,  
Vivifici pariter currant spiramina Flatus.*

# MONITUM.

Quamquam tertiam ac postremam propositionem certam, & valide communiam existimo; nullam contrariæ inuro censoriam notam, nec improbabilem illam arbitror, si expendantur sola argumenta ab auctoritate deprompta. Principio nec unus negat in eam conspirasse antiquiores Scholasticos, præsertim in IV. dist. 3. Scotum, Durandum, Divum Bonaventuram, nec non 3. p. q. LXVI. art. 6. S. Thomam, atque his subscripsisse discipulos numero, doctrina, & fama præclaros. Scio D. Thomam a Natali Alex. V. Cl. diss. 13. sæc. III. aliisque ita exponi, quasi *hypothetice* duntaxat, non asseritive in eam sententiam abierit, nec *ad dispensationem* confugerit; nisi ex *hypothesi*, methodo Scholasticæ intentum. Si quod ajunt *hypothetice*, ita accipiant, ut S. Doctor noluerit factum discutere, ac verum supposuerit, sicut videtur innuere in notis ad præcitatum articulum Joannes Nicolai; Alexandro subscribam: si usurpent *hypothetice* ad commonstrandam beati Thomæ hæsitacionem, aut factam argumentationis gratia *συγγνωμην*, *concessionem*, id non assentiar; non enim S. Thomas ait, *μὴ baptizabant*, sed, *baptizabant*: exponensque subinde auctoritatem Ambrosii, eum probat de Apostolorum ætate, in qua ait servatam formam baptismi traditam in Evangelio, *integritate intelligibili*: quod minime negat Adversarius Viri Cl. P. Josephi Augustini Orsi, cap. XV. num. 2. Aperta præterea est mens S. Thomæ in IV. Sent. dist. 3. art. 2. quæst. 2. ad 3. ubi docet ab Apostolis mutatam *formam sensibilem*; quod nullibi retractatum invenio. II. Non desunt præter Scholasticos, qui in eandem sententiam devernerint, præsertim Nicolaus I. supra laudatus, a quo insertam Rescripto ad Bulgaros opinionem, quæ nono sæculo non esset recepta, nequit salva æquitate affirmari. Patres quidem a præclaro Viro Jos. A. Orsi diligenter collectos, explicandos quomodo nos supra exposuimus Acta Apostolica, Ambrosium, Basilium, & Theophylactum, erudito illius Adversario arbitror concedendum. De Ferrando tamen

Diacono ad Orsium accedo . Ferrandus enim non tantum ait Apostolos baptizasse *in nomine Christi*, quæ verba fateor esse ambigua, sed etiam rotundis verbis addit, nomen Patris, & Spiritus sancti subtraxisse: *In nomine Domini* (inquit Ferrandus in Epist. ad Anatolium pag. edit. Rom. 75.) *in nomine Domini Jesu Apostoli baptizabant: numquid quia Patrem, & Spiritum sanctum tacebant, ideo negabant?* Nequeunt hæc verba in sententiam nostram trahi, nisi per vim ac violentiam . Certe de mente Ferrandi non dubitat in notis ad Facundum Hermianensem vir summus Jacobus Sirmondus . III. Veterum opinionum non opponitur Catechismus Romanus de Baptismo num. 15. Catechismus vero a selectis Theologis præfide Cardinali Sirleto editum jussu Pii V. & a Gregorio XIII. approbatum, non per tenuis existimamus auctoritatis: in sententiam tamen nostram ejusdem Catechismi Auctores seq. n. 16. descendisse observatum est supra. Opinionem illam docuit è suggestu in Concilio Basileensi die xvi. Januarii an. 1433. Joannes de Ragulio Dominicanæ Familiæ Procurator Generalis; atque in Congregat. Gen. Synodi Tridentinæ die xvi. Junii an. 1562. Ludovicus Joannes Villetanus, uterque de Communionem sub utraque specie naviter disputans, & ex variatione formæ baptismi facta ab Apostolis inspiratione divina, probans argumento *a majori ad minus* non semper necessario servandam utriusque speciei communicationem: quod argumentum, tametsi ambiguo fluxoque principio innixum, ostendit tamen quid de forma baptismi ab Apostolis collati ad sæculum usque decimum sextum tenuerint celebriores Theologi . IV. Addam postremo in gratiam sententiæ oppositæ, hæc haberi in Synodo Nemausensi celebrato circa annum Domini 1484. imperante in Galliis Philippo III. *Dicimus infantem baptizatum esse, si baptizans dixit, Baptizo te in nomine Christi. Quod tamen non est laicis exprimendum, ne a forma statuta per Ecclesiam recedatur*. Extat prope finem Tom. xi. Conc. Labbei. Similia leguntur in statutis Synodalibus Eliæ Episcopi Uticensis, quæ non habentur impressa: de quibus lib. 1. art. xiv. n. 20. eximius Martene. Hæc tamen mihi non videntur talis ponderis, quæ nos valeant remove a superiori sententia; cum nonnulla ex dictis etiam hoc tempore baptismum in solo Christi nomine datum comprobarent; cetera autem innitantur facti historico, in cujus perquisitione permulti operam minime locaverunt: quod præmonui hujus dissertationis initio.



## CAPUT X.

*Solvuntur nonnullæ quæstiones circa formam Baptismi.*

**C**ommunem formam Baptismi hætenus explicavi. Verùm quid censes de illa forma, in qua minister pro verbo *baptizo*, aliud apponeret, V. G. *mergo*, *abluo*, *tingo*? Nullum tali in casu fore baptismum statuit Glosa Decreti, in cap. *Multi sunt*, de Consecr. dist. 1v. quoniam, inquit, *Mergo non est synonymum cum eo verbo, Baptizo*. Etiam Innoc. IV. in cap. *Si quis puerum*, de Bapt. ait: *Loco hujus verbi, baptizo, non potest poni lavo, vel balneo, quia hoc verbum baptizo plus importat ex institutione, quam sit ejus propria significatio*. Idem ex Scholasticis opinantur Alensis q. v. 111. de Baptismo art. 3. n. 3. & Gabriel in 1v. dist. 3. At ratum, legitimumque baptismum in tali casu existimo, primò quoniam constat ex cap. 1. hujus libri hæc verba *baptizo*, *abluo*, *tingo*, *mergo*, revera esse synonyma; unde corrui contrariorum præcipua ratio. Ad hæc apud Tertullianum pro *baptizare* legimus *mergitare*, ac *tingere*, lib. de Bapt. cap. 13. adv. Praxeam 26. & de Corona militis cap. 3. Cyprianus etiam epist. 22. ad Clerum Romæ consistentem pag. 78. ait, *In nomine Patris, Filii, & Spiritus sancti gentes tingui*; & epist. 25. ad Moysen pag. 82. aliisque in locis verba Matth. xxv. 11. 19. recipiat: *Ite ergo, & docete omnes gentes, tingentes eos, &c.* Hieronymus Tom. 1v. pag. 144. idest, in cap. ult. Mat. *Primum docent omnes gentes, deinde doctas intingunt aqua*; & post pauca, *Fussit Apostolis, ut primum docerent universas gentes, deinde fides intingerent Sacramento*. Isidorus denique lib. vi. Orig. cap. 19. *Baptismus Græce, Latine tinctio appellatur*. Insuper Stephanus III. anno 754. in Responsis Carisiacis, (quæ tamen non esse exploratissimæ auctoritatis diximus pertractantes de baptismo in vino) num. 14. rite baptizatum puerum definivit, sub hac forma, *In nomine Patris mergo: & Filii mergo: & Spiritus sancti mergo*. Ad Glosam autem Decreti, & ad Innoc. IV. aliosque oppositæ sententiæ verbo tenus hærentes, respondeo accipiendos esse in hypothesi, qua non intenderent lavantes puerum rem sacram peragere, nec facere quod intendit Ecclesia; cum revera sermonis nostri consuetudine verbum *luare*, & *ablueræ* profanam actionem, non sacramentalem significet. Dico etiam eum, qui non ignarus sermonis nostri, pro *baptizo* aliud verbum synonymum usurparet, etsi intentionem rectam haberet, scelus tamen grave patraturum; propterea quod, si verbum *Baptizo*, juxta Augustinum lib. vi. contra Jul. cap. 9. num. 26, a Latinis non adhibetur, nisi

in Sacramento regenerationis; neque fas est ad usum Sacramenti transferre quæ humanis rebus etiam contaminatis promiscua facimus.

## II.

Quid vero, si in forma baptismi nullo modo exprimitur *subiectum*, aut pronomine *Tu*, aut æquivalenti vocabulo, validum nec conficietur baptisma? Sunt qui affirmant duplici ratione ducti. Petitur una ex præcitato Stephani III. Rescripto; in recensita enim *forma* nullatenus persona baptizata designatur. Depromitur altera ex Decreto Eugenii IV. asserentis perfici Sacramentum, *si exprimitur actus, qui per ipsum exercetur ministrum, cum sanctissima Trinitatis invocatione*: quod, inquirunt, servatur in hac forma, *Ego baptizo in nomine Patris & Filii & Spiritus sancti*. Etenim verbum *Baptizo* demonstrat actum, qui a ministro exercetur; & quæ sequuntur, continent invocationem Trinitatis. Oppositam tamen sententiam tantquam probabiliorem amplector cum Dominico Soto in IV. dist. 111. art. 5. Sylvio in 3. p. q. 66. art. 6. concl. 3. Vasquesio disp. 142. cap. 3. quibus omnes, si unum, vel alterum excipias, subscribunt. Movet me primum, quod in nullo Rituali, aut Euchologio *formam* aliquam baptismi deprehenderim, in qua persona ejus qui baptizatur, aut nomine, aut pronomine, aut adjuncto aliquo non explicetur; nec video cur Farvacques vellicet Præpositum id asserentem. Deinde in hoc Sacramentum baptismi situm arbitror, quod elementum *vi formæ* applicetur suscipienti. Insuper non video, quo pacto, nisi *subiectum* exprimitur, designetur certa & determinata actio, & non, potius vaga & indifferens. Nec urgent contraria argumenta. In Rescriptis enim Carisiacis irrepsisse glossemata, nec constare eadem esse Stephani, dictum supra. Eugenius autem jam *formam* Latinorum Græcorumque descripserat, in qua exprimitur baptizati persona; ac propterea docens valere formam utramque, & Sacramentum perfici, *si exprimitur actus*, loquitur *de actu determinato*, ut exprimitur in forma Latinorum *vi pronominis Tu*, in forma autem Græcorum *vi adjuncti servus Christi*.

## III.

At quid, si minister *in nomine* pronuntiaret numero multitudinis, *In nominibus*? Nullum in hac hypothesi fore baptismum consentiunt omnes. Prior ratio inferitur ex verbis Christi, *Euntes docete omnes gentes baptizantes eos in nomine*, sive ut Græci habent, *in ōnoma*, in nomen. Proxima petitur ex consuetudine, ac disciplina omnium sæculorum; nullam quippe Catholicam *formam* invenies ejuscemodi inmutatione prolatam. Eruitur tertia ex Patribus. Ambrosius lib. 1. de Spiritu S. cap. xii. num. 132. de præcitatis Domini verbis ait: *In nomine dixit, non in nominibus. Non ergo aliud nomen Patris, aliud nomen Filii, aliud nomen Spiritus sancti; quia*

unus

*unus Deus* : nec aliter Auctor librorum de Sacram. quem Ambrosii nomenclatura laudamus, lib. 11. cap. v11. num. 2. *In uno autem nomine baptizari nos iussit*, hac producta ratione, *Noli mirari quia, dixit unum nomen, ubi est una substantia, una divinitas, una majestas*. Item Hieronymus in cap. 1v. Epist. ad Eph. Tom. 1v. pag. 362. *Et non baptizamur in nominibus Patris & Filii & Spiritus sancti, sed in uno nomine, quod intelligitur Deus*. Nec aliter Augustinus lib. 2. adversus Maximinum cap. 22. num. 3. *In nomine, non in nominibus: hi enim tres unum sunt, & hi tres unus est Deus*: atque Tract. v1. in Ioan. num. 9. *Intenti facti sumus cum audiremus, Ite, baptizate gentes. In cuius nomine? In nomine Patris & Filii & Spiritus sancti. Iste unus Deus, quia non in nominibus, sed in nomine. Ubi unum nomen audis, unus est Deus*. Quarta ac postrema ratio ex dictis infertur, quia cum *in nomine* divinam substantiam, virtutem, potestatemque significet; si dicas, *in nominibus*, sensum omnibus orthodoxis oppositum, & quidem pravam, hæreticum, nefarium appingis præscriptæ formæ, eamque adulteras substantiali depravatione: atque rationem istam perlegas quoque in Catechismo Rom. P. 2. de Sacram. Baptismi num. 12.

IV.

Si autem pronuntiet quidem *in nomine*, sed hanc particulam tertio repetat, dicens, *Ego te baptizo in nomine Patris, in nomine Filii, in nomine Spiritus sancti*, baptisma reputandum erit legitimum? Haud vereor, quin sint negaturi Italorum complures, quibus magnus Apollo est Martinus Bonacina. Etenim is de Baptismo disp. 2. q. 2. puncto 4. parem casum hunc facit cum præcedenti, scribens num. 5. *Quamobrem si quis baptizando dicat, Ego te baptizo in nominibus Patris, &c. aut etiam si dicat, Te baptizo in nomine Patris, in nomine Filii, in nomine Spiritus sancti, invalide baptizat, ut multi Doctores testantur apud Suarez, &c.* Rationem addit Bonacina, *Nam dicendo in nomine Patris, &c. non ostenditur unitas divinæ essentia*. Verum, si nonnihil sapio, nil absurdius, & in re tam gravi ponderatum minus, poterat a Moralistarum signifero in vulgus spargi. Principio ea forma passim peracta Sacramentalia inficias non ibit antiquorum Ritualium inspector. Invenies enim in Ordine Baptismi Ecclesiæ Alexandrinæ Tom. 1v. vet. Bibl. Patrum pag. 58. effundi in aquam baptismalem sacrum Chrisma his verbis: *In nomine Patris, in nomine Filii, in nomine Spiritus sancti, Amen*. Ex veteri Sacramentario Gallicano edito a Jo. Mabillonio Tom. 1. Mus. It. ipsa baptismalis aqua hoc exorcismo expiatur: *Exorcidio te creatura aqua in nomine Dei Patris omnipotentis, & in nomine Domini nostri Jesu Christi filii ejus, & Spiritus sancti*. Nec aliter legas in Sacram. Gelasii. Interdum etiam quod significatur *Dei nomine*, synon-

nonimis repetitur, ut in Exorcismo salis Ritualia etiam posteriora, ac probatissima, *Exorcizo te, creatura salis, in nomine Dei Patris omnipotentis, & in caritate Domini nostri Jesu Christi, & in virtute Spiritus sancti*. Nonnunquam adinvenies particulam *in nomine* semel tantum repetitam, & tertio loco positam æquivalentem, *in virtute*, ut in Exorcismo priusquam accedatur ad baptisterium, *Exorcizo te, omnis spiritus immunde, in nomine Dei Patris omnipotentis, & in nomine Jesu Christi Filii ejus & Judicis nostri, & in virtute Spiritus sancti*. Vides in hisce exemplis aliquando tribus vicibus, aliquando duabus tantum, aliquando vero æquipollenti vocabulo *in nomine* pronuntiatum absque ullo prorsus fidei in sanctam Trinitatem dispendio. Nec dicas his in locis repetitum *In nomine* commonstrare aliam naturam in Filio, idest, humanam: nam primum id affirmari nequit de Spiritu sancto, in cujus invocatione repetitum *In nomine*, aut, *in virtute* apertum est. Deinde natura Christi humana non invocatur absque divina. Quem sensum denique appinges exscriptis ritibus, perspicies facile accommodari formæ baptismatis, de qua disserimus. II. Si fas non est repetere particulam *In nomine*, propiæ quod substantiam potestatemque significat; sacrilegum & erit iterato proferre hoc nomen *Deus*, cujus eadem est significatio. Damnabimus propterea probatam ab Ecclesia demonum adjurationem, *Imperat tibi Deus Pater: imperat tibi Deus Filius: Imperat tibi Deus Spiritus sanctus*. Rejiciemus quoque symbolum Athanasianum, & universis Theologis temere audacterque refragantes nullum judicabimus baptismum datum hac formula, *Baptizo te in nomine Dei Patris, Dei Filii, Dei Spiritus sancti*. Si autem repetitum vocabulum *Deus* nequaquam divinam substantiam multiplicat; nec eam multiplicabit repetitio particulæ *In nomine*. III. Nec attente Bonacina Suarefium perlegit, qui invalidam utique censet baptizandi formam, si pro *In nomine*, dicas *In nominibus*; at de replicato *In nomine*, loco, quem Bonacina citat, idest disp. xx1. in quæst. 66. 3. p. inquit: *Respondetur illam formam esse validam, quia unum & idem nomen potest iterum atque iterum nominari, & invocari absque pluralitate, & vere dicitur, Pater Deus, Filius Deus, Spiritus sanctus Deus.*

## V.

Tres personas *in forma* baptismatis singillatim exprimendas diximus sup. capite: si autem quis eas designaret istiusmodi verbis, *Ego te baptizo in nomine Genitoris, Geniti, & Procedentis ab utroque*; raturum ne censendum erit Baptisma? Respondeo me propriæ inscitæ conscientiam nolle de hac quæstione proferre judicium: non enim me latet, nullum baptismum illum definire S. Thomam lib. 1v. ad Annibaldum dist. 3. q. un. art. 2. Scotum in 1v. sent. dist. 1v. q. 2. num. 9. Thomistas omnes, Cajetano excepto, in 3. p. disp. LXVI. art. 5.



art. 5. & Scotistas cum Maffrio disp. 2. de Baptismo, & Confirm. q. 2. necnon Sylvium in cit. q. lxxv. concl. v. Suarez ibidem disp. 222. sect. 4. Estium in xv. dist. 111. §. 6. Vasquez disp. 144. cap. 2. ac Nostrates cum Friderico Gavardi q. 2. de Baptismo art. 6. Quis vero cum talibus tantisque adversariis audeat subire certamen? Neque enim pugnant inermes, sed quod ajunt, sequentibus argumentis defendunt. Est primum, quod vocabula *Genitoris & Geniti* non significant personam subsistentem, sed proprietatem, & actum, prout Scholæ appellant, *notionalem*: nam nomen *Patris* significat relationem, quæ constituit *hypostasim*, nomen vero *Genitoris* significat originem, quæ non est constitutiva *hypostasis*, ex doctrina S. Thomæ 1. p. q. 40. art. 2. Proximum argumentum est, quod sicut ex parte *materie* assumitur aqua communis & naturalis, nec sufficit æquivalens ex rosis, aut aliis floribus expressa; ita *in forma* assumi debent nomina in ea lingua, in qua proferuntur, communia; maxime quod Dominus *materiam* ac *formam* baptismi determinavit: quæ ratio insinuatur ab eodem D. Thoma 3. p. q. lxxvi. art. 5. ad 7. Addamus argumentum tertium: Constat Epiphanium hæresi lxxiii. quæ est Semiarianorum, reprobare baptismum datum in nomine *Ingeniti, & Geniti*; quod videtur hoc idem, de quo disputamus. Esi enim hunc locum Epiphanii interpretantur quidam, quasi *in nomine Ingeniti & Geniti*, idem sit, ac, *In nomine increati, & creati*, quia disputat adversus Arianos inter creaturas divinum Verbum connumerantes; hi tamen decipiuntur, quoniam Epiphanius, ait, *ὁ ἰσχυρὸς τὸ ἀγεννητὸν, ὃ γινώσκω*, geminata litera *m.* utiturque participii verbi *γινώσκω*, *gignor*, non *γινώσκω*, *scio*: de quorum verborum diversitate dixi cap. ult. libri vii. Constat autem pravam hæreticorum fidem vi Sacramentorum non obesse, modo verba idonea ab illis adhibeantur.

Et tamen hæc, ut dicam quod sentio, me a sententia Cajetani penitus non divellunt, quam video etiam probatam Glossæ cap. *Multi sunt*, de Consecr. dist. xv. & Scholasticis etiam nonnullis, inter quos Puteanus noster, Victoria, ac Ledesma, laudati a Guerrero pag. 424. Me autem primum permovet, quod libro ix. aliam sectatus physiologiam, nullam cum Gregorio Arimineni agnosco intrinsecam formam a divina substantia distinctam, per quam constituatur *persona*: & hujus nomine nihil aliud percipio, quàm id quod est, non *absolute*, sed *connotative*, idest, cum ordine ad aliud. Atqui hoc vocabulo *Genitoris* designatur quod est cum ordine ad aliud, scilicet *Generans* cum relatione ad *Genitum*. Igitur hoc nomine significatur vere proprièque *persona*. II. Si attendamus Grammaticalem significationem, hoc nomen *Christus* significat *Unicum*, non hypost. sim; *Paracletus* etiam *advocatum*, & *consolatorem*, non personam, & ni-

hilominus nomina sunt hæc personarum, ratione, ut inquit scholæ, *concreti*: quoniam ille, qui unctus est, persona est; & ille, qui advocatus est, pariter persona est. Ergo, etsi nomen *Genitoris* actum demonstret gignendi, nihilo tamen minus, quoniam ille qui gignit, Pater est, & ille qui genitus est, Filius est; ratione *concreti* Genitor, & Genitus designare debent personas. III. Quid metaphysicis perceptionibus mentem diverberamus? Ex communi usu exquirere debemus significationem vocabulorum: lingua vero tam latina, quam vernacula, *Patris*, ac *Genitoris* nomine promiscue utimur: nec aliter divina Scriptura Eccli. xxi. 4. singulas item Trinitatis Personas ita in pervulgato hymno veneramus, *Genitori, Genitoque laus & jubilatio, &c.* IV. Nec nomina, quibus utimur frequentius, *Patris, Filii, & Spiritus sancti*, spectata vi Grammaticali significant hypostasim; sed omnino synonyma sunt cum vocabulis *Genitoris, Geniti, & Spirati*, actumque *notionalem*, non rem subsistentem designant: & singulorum consequenter eadem est ratio. Dicitur *Genitor* a *gignendo*, & dicitur *Pater* juxta Varronem lib. iv. de Lingua Latina, *a patefaciendo semine*: aut a Græco πατήρ, derivato a πάω, idest, *alo*, quod Pater sit *altor prolis*, sive, ut placuit Eustathio, ἀὶς τοῖς αἰσῶς πατὴρ, *a parvulos asservere ac tueri*. Item *Filius* est a φίω, *pario, nascor*, transiente *v. in i.* aut, quemadmodum quidam volunt, a φίω, *amo*, quoniam amor omnium constantissimus est parentis in filium: alterum item vocabulum Græcum φίω, *filius*, a φίω, *pario*. Spiritus quoque a *spirare*, sicut, & Græcorum πνεῦμα ἀπὸ τοῦ στόματος, quod est *spirare ex ore*. Hebræi etiam Patrem dicunt אב אב, ab אב *v. velle, & concupiscere*, Filium vero בן *Ben* ex בנה *adificare*, quasi sit Patris *edificium*; & Spiritum רוח, *Ruab*, a רוּחַ *spirare*. Ex quibus apparet eandem prorsus esse rationem de nomine *Patris, Filii, & Spiritus sancti*, atque de nomine *Genitoris, Geniti, ac Spirati*, sive vim Grammaticalem, sive usum attendas.

Ad primam ergo objectionem respondeo vocabulum *Genitoris* significare actum quidem *notionalem*, sed *in concreto*, quod omnino apparet etiam in vocabulo *Patris*; idque repono de nomine *Geniti, & Spirati*. Ad alteram dico Christum determinasse materiam & formam Sacramentorum *in specie*, non *in individuo*; & synonyma idem significantia non immutare substantiam vocabulorum. Ad tertium dico Epiphanium jure reprehendere Semianianos, qui pravo animo nomina adulterabant: nec denego graviter peccatum qui mutaret consuetam baptismi *formam* aut intentionem perversa, aut animi vanitate, tametsi persisteret substantia verborum. Affirmo etiam non valere baptismum datum *in nomine Ingeniti, & Geniti*, quoniam *Ingenitum* significat attributum Patri, & Spiritui sancto commune, neque in ea *forma* Spiritus sanctus exprimitur. Salvo itaque

que meliori iudicio baptismum datum *in nomine Genitoris , &c.* validum cenſeo , nec reiterandum , niſi forte ſub conditione .

VI.

Postremo, (nam ſi quæ ſunt alia, quæ in quæſtionem venire poſſunt, expedita fuere libro præcedenti cap. xii.) dubitant aliqui, num baptiſma ratum ſit prætermiſſa duntaxat minima particula *Et*, quoniam etſi parvi momenti videatur, demonſtrat tamen divinarum perſonarum diſtinctionem: atqui his videtur accedere Gabriel in iv. diſt. 3. & Auguſtinianus Belga Leonardus Vanroy cap. i. de Bapt. q. v. At ego abſque ulla hæſitatione ratum baptiſma illud exiſtimo, propterea quod vocabula *Patris, Filii, & Spiritus ſancti*, nativa, propriaque ſignificatione demonſtrant oppoſitionem relationis, ideoque diſtinctionem perſonarum. Quamquam nec minima illa particula omitti debet; & qui eam prætermitteret Sabelliana pice inquinatus, ſubjiceretur anathemati, quod anno D. 538. Vigilius ſcribens ad Euthereum intorſit in quorſdam, qui, *ut minuerent Trinitatem*, in fine pſalmorum ſublata ſyllaba conjunctiva dicebant: *Gloria Patri, & Filio, Spiritui ſancto*. Adeas Tom. v. Conciliorum pag. 312.

C A P U T XI.

*Pertrahatur de Miniſtro Baptiſmatis.*

**S**equitur, ut diſſertationem inſtituamus de Baptiſmi miniſtro: quod ut ordinata præſtetur methodo, primum de baptiſmo ſolemni ritu, & extra neceſſitatem dato, deinde de privato, collatoque periclitantibus, perſectabimur. Ac miniſtrum quidem ſolemniſis baptiſmi eſſe Episcopum, ac Presbyterum, nec non ex delegatione Diaconum, ipſi Novatores conſentiunt. In neceſſitate autem baptizare etiam minores Clericos, imo & Laicos, doctrina Catholicorum eſt, cui opponuntur Calvinus lib. iv. Inſtitut. cap. xv. n. 20. & Græci quidam recentiores apud Petrum Arcudium lib. 1. Concordiæ cap. xi. pag. 24. Controverſia major videri poteſt de mulieribus, quas nonnulli Patrum, & antiqui canones negant habere poteſtatem baptizandi: contra vero Marcionitæ, Pepuziani, & Collyridiani munere ſolemniſter baptizandi feminas honeſtabant. De hiſce omnibus hoc capite agendum eſt.

PROP. I. Jus baptizandi ſolemni ritu Episcopis principaliter datum eſt, deinde Presbyteris id commiſſum, non tamen abſque Episcoporum auctoritate.

Demonſtratur prima pars. I. Apoſtoliſ, quorum Episcopi ſucceſſores ſunt, dictum eſt a Domino Matt. xxviii. 19. *Euntes docete*

*omnes gentes, baptizantes eos, &c.* & Paulus Epist. ad Corinth. prima, se, aliosque Apostolos appellat cap. iv. 1. *Dispensatores mysteriorum Dei.* II. Apostolos ac Discipulos ministrasse baptismum ex historia novi testamenti aperte constat; ubi legimus Petrum baptizasse tria millia hominum Act. 11. 41. a Paulo baptizatum Crispum, Cajum, & domum Stephanæ 1. Corinth. 1. 14. 16. Lydiam Act. xvi. 15. & ibidem 33. custodem carceris Philippensis. III. Non aliud docent antiqui Patres. Tertullianus de Bapt. cap. 17. inquit: *Dandi (baptismum) jus habet summus Sacerdos, qui est Episcopus: deinde Presbyteri, & Diaconi, non tamen sine Episcopi auctoritate.* Hieronymus in cap. 3. Sophoniæ Tom. 111. pag. 1673. ait: *Sacerdotes autem, qui dant baptismum, faciunt oleum Chrismatis, manus imponunt, catechumenos erudiunt, Levitas, & alios constituant Sacerdotes.* Ex hoc loco, & ex præcitato Tertulliani, atque ex Auctore librorum de Sacram. inter Opera Ambrosii lib. 111. cap. 1. num. 4. intelligimus olim Episcopos dictos simpliciter *Sacerdotes*, aut etiam *Summos Sacerdotes*. Idem Hieronymus adversus Luciferianos p. 2. Tom. iv. pag. 295. ait: *Sine Episcopi jussione neque Presbyter, neque Diaconus jus habet baptizandi.* IV. Idem ostendunt exempla sanctissimorum Episcoporum, qui suis manibus baptizarunt. De Macario Jerosolymorum Antistite scribit Theodoretus lib. 11. H. Ec. cap. 27. veste aureis filis contexta donatum a Constantino, *ut ea indutus divini baptismi ministerium perageret, Ita tantum baptizans, ut in eo dñi baptismus etiam appareret*, pag. edit. Val. 111. Ambrosius, auctore in ipsius Vita Paulino *ejus notario* (errant permulti, qui illam adscribunt S. Paulino Nolano Episcopo) num. 9. *postulavit non se, nisi a catholico Episcopo, baptizari:* & num. 38. *In rebus divinis implendis fortissimus, in tantum, ut quod solitus erat circa baptizandos solus implere, quinque postea Episcopi tempore, quo decessit, vix implerent.* Licentius in carmine ad S. P. Augustinum. olim præceptorem suum, apud ipsum August. Epist. xxv. 1. olim 39. num. 3.

*An te voce vocem, clari quem Reflor Olympi  
Fontibus infantum præfecit, & abdita jussit  
Ubertate animi longe rutilare fluentia:*

Quibus verbis supponit munus esse Episcopi tam docere, quam baptizare. V. Non solum jus baptizandi Episcopis est, verum etiam hi tantum in primis Ecclesiæ sæculis baptizabant, quod duplici argumentorum genere demonstratur. Ac primum depromitur, ex quo olim in qualibet civitate unum dumtaxat baptisterium extaret, idque prope Cathedralem Ecclesiam, ut adnotarunt summi viri Panvinus noster in libro de præcipuis urbis Basilicis cap. de Baptist. Lateran. Joseph Vicecomes lib. 1. de Antiq. Rit. cap. 8. Lupus de Appel.  
Ecc.

Ecl. Africanæ cap. 28. ubi e Baptisterio demonstrat Carthaginensem Basilicam Faustî, in qua baptizabat S. Eugenius, fuisse Cathedralem, Martene lib. 1. cap. 1. art. 2. num. 15. atque in priori Notificat. doctissimus Bononiensis Ecclesiæ Archiepiscopus, nunc Oecumenicus, & Vigilantissimus Christiani populi Rector. Confirmat tantorum virorum assertionem, quod in vetustis Martyrologiis invenio commemoratam 111. Kal. Julii dedicationem *antiqui Baptisterii Romæ*: in Concilio Toletano xvii. celebrato anno 694. de Regulis fidei, mandatum Episcopis, ut propria manu claudant,  *suisque signaculis obsignent* ostia Baptisterii; in Hispaniis denique non nisi post annum Domini 890. baptisteria fuerunt multiplicata, ut constat ex cap. xxi. Synodi Triburiensis Tom. ix. Conc. 345. Persistere antiquitatis vestigium, quantum ad unicum Baptisterium, Florentiæ, Bononiæ, Parmæ, Pisis, & Urbeveteri scripsit citato loco Panvinus. Nulla autem congruentior unius baptisterii, & prope Cathedralem constructi potest ratio assignari, nisi quod olim soli Episcopi baptizarent. Argumentum alterum conficiunt historica monumenta, quæ ante Martenium, & recentiores Theologos, collegit in Appendice ad Ephesinum Latrocinium eximius Lupus: Epistola nempe Cleri Edeffeni ad Photium & Eustachium, quæ extat in Actis Conc. Chalced. Aët. x., rogantis, ut imminente Paschali festivitate ad propriam sedem Ibas remitteretur, quoniam ipsius præsentia opus erat *propter catechismos, & propter eos, qui digni sunt sancto baptismo*. Epistola S. Gregorii Papæ 32. libri 1. nunc 33. ad Romanum Patricium, & Exarchum Italiæ, fuffectum a Mauricio Imperat. in locum Smaragdi, qua illum hortatur, ne in civitate Ravennate detineat Blondum Hortensis civitatis Episcopum, quod eo absente fieret, *ut Ecclesia sine Rectore, & populus quasi sine pastore grex*, deflueret, & *ibidem infantes absque baptismo* morerentur. Sapienter in notis ad hanc Epistolam PP. S. Mauri: *Quare absente Episcopo infantes sine baptismo moriebantur? Quia baptismi ordinarius minister est Episcopus, & in illa solum civitatis Ecclesia, in qua Episcopus sedebat, olim erit baptisterium: hodieque Florentiæ, Pisis, Parmæ, Patavii, Bononiæ, &c. in solis Ecclesiæ Cathedralis Baptisteriis infantes sacris aquis intingui solent*. Similia legas in Epistola Hincmari l. 11. ad Odacrum inavorem Ecclesiæ Bellovacensis, de qua Lupus citato loco Tom. 1. vet. edit. pag. 855. & Tournely de Sacram. Bapt. pag. 140. *Odacrum* hi duo pronuntiant: at Hincmarus *Odacram*. De prima parte propositionis hæcenus.

Secunda pars de Presbyteris probatur. I. In Constitut. Apostolicis lib. 111. cap. xi. legimus: *Permittimus baptizare solos Episcopos ac Presbyteros, ministrantibus Diaconis, interque baptizantes unum interpres, qui omnesque, & interpretumque auctoritas sit dationis*. Innoc. I. Epist. ad Decentium cap. 3. Tom. 2. Concil. ait de Presbyteris, *Sed extra*

*extra Episcopum, seu presente Episcopo baptizant.* Concilium Florentinum Tom. xiii. pag. 535. in Decreto pro Armenis, *Minister hujus Sacramenti* (baptismi) *est Sacerdos, cui ex officio competit baptizare.* Idem eruitur ex Responsis Stephani III. aut II. non semel laudatis, a num. x. usque ad xv. Tomo Conciliorum Labbei Sexto. Non aliud colligas ex Vet. Ordine Romano pag. 696. Tom. xiii. Bibl. Patrum. II. Idem constat auctoritate Majorum. De Tertulliano, & Hieronymo paullo supra. S. P. Augustinus serm. 33. de diversis, nunc cccxxxiv. narrans miraculum beati Stephani apud Uzalim patratum, quo revixit infans in gremio mulieris Divi opem implorantis, inquit: *Continuo tulit illum ad presbyteros, baptizatus est, sanctificatus est, unctus est, imposita est ei manus, completis omnibus Sacramentis assumptus est.* Ac Theodulphus Aurelianensis Antistes editus a Sirmondo, de Bapt. cap. 17. *Presbyteris* (inquit) *sive absentibus, sive presentibus Episcopis, baptizare licet.* III. In hoc tantum difficultas aliqua occurrit, an Presbyteri sint *Ordinarii* ministri baptismatis, an *Delegati.* Esse enim *ordinarios*, & *ex officio*, constat ex Florentino Concilio, ex Catechismo Romano, tit. de Baptif. n. 23. ex D. Thoma 3. p. q. 67. art. 2. ex ratione pervulgata, quoniam presbyteri ad Eucharistiam consecrandam instituti sunt, ideoque etiam ad illa administranda, per quæ ejusdem Eucharistiæ quilibet particeps esse possit. E contra habere presbyterum solam potestatem baptizandi *delegatam*, videtur colligi ex præcitatis testimoniis Tertulliani, & Hieronymi, asserentium presbyteros non habere jus baptizandi nisi *ex jussione & auctoritate Episcoporum*: nec aliter Ignatius in Epist. ad Smirnenſes, & Epist. 88. ad Episcopos Germ. & Galliæ (si tamen supposita non est, ut visum Quenellio) Magnus Leo. Accedit & ratio, quia baptizare & in Ecclesiam recipere Pastorum, Rectorumque munus est. Attamen, etsi Catech. Rom. ibid. ait antiquos Patres, ubi affirmant Sacerdotibus sine Episcopi venia jus baptizandi non esse permissum, accipiendos de certis anni diebus, quando solemnî ritu Episcopi baptizabant; arbitror facilius omnia conciliari, si dicamus Sacerdotes omnes habere *vi Ordinis*, ut præſint Christianæ plebi, ideoque & doceant, & baptizent, & Sacramenta omnia (Ordine, & Confirmatione exceptis) ministrent; quamobrem Episcopus sacram ordinationem celebrans inquit, *Presbyterum oportet præſe;* sed hac in re attendendam esse Ecclesiasticam politicam, atque Antistitium jurisdictionem. Quare dum Episcopi baptizabant, non poterant id muneris arripere presbyteri; uti & modò, si illi doceant, hos tacere necessum est. Ita si nunc adſit Parochus, non debet baptizare alius Sacerdos, nec parentes possunt ad aliam Parœciam deferre baptizandum infantem. Ac propterea optime in Rituali Romano præscriptum legimus solemnîs baptismi ministrum *esse Parochum, vel alium Sacerdo-*

cerdo-

*cerdotem a Parocho, vel ab Ordinario loci delegatum.* Dicam brevi: Quilibet Sacerdos vi ordinationis habet baptizandi potestatem, non autem jurisdictionem.

PROP. II. Diaconus nonnisi ex delegatione, potest solemniter baptismum administrare.

Probatur I. auctoritate Tertulliani & Hieronymi, qui affirmant Diaconis *absque Episcoporum jussione* potestatem baptizandi non esse. Auctor Constit. Apostol. lib. VII. cap. 28. pag. 411. *Diaconus non benedicit, non dat benedictionem, accipit vero ab Episcopo, & presbytero, non baptizat, &c.* Citatur hic locus in fine Responsionum Nicetæ Heracleensis ad Constantinum Episcopum. Epiphanius in h. LXXIX. quæ est Collyridianorum: *Nam neque Diaconis quidem ipsis ullum in Ecclesiastico ordine Sacramentum perficere conceditur, sed hoc dumtaxat, ut eorum quæ perficiuntur, ministri sint.* Καὶ γὰρ οἱ Διάκονοι ἐν τῇ Εκκλησίᾳ τὰς ἐπιτάξεις μυστήρων ἐπιτελοῦν, ὅλλα μὴν διακονῶντα ἐπιτελοῦμεν. II. Probatur ex definitione Canonum. In cap. Diaconos, dist. xciii. cap. 3. legitur: *Diaconi absque Episcopo vel Presbytero baptizare non audeant, nisi prædictis fortassis ordinibus, seu officiis longius constitutis, extrema necessitas compellat.* De promptus est canon ex Epistola Gelasii ad Episcopos Lucanæ cap. VI. Extat Tom. IV. Concil. Similia legas in cap. 19. *Constat*, de Consecrat. dist. IV. desumpto ex libro 2. Isidori de Offic. cap. 24. Nec aliter canone IV. Concilii Rothomagi celebrati anno MXXXII. Volum. Conc. IX.

Diaconis vero commissum aliquando baptizandi munus, nequit in dubium revocari: Philippum Diaconum baptizasse Ennuchum Reginæ Aethiopum constat ex cap. VII. Actuum. II. Habemus Concilii Illiberitani canonem LXXVI. *Si quis Diaconus regens plebem sine Episcopo, vel presbytero aliquos baptizaverit, &c.* quo permittitur Diacono jurisdictione Ecclesiastica prædito baptizare, non autem baptizatum per benedictionem perficere, idest, confirmare: quod Episcoporum munus est. III. Ex præcitato Ordine Romano liquet Diaconos in Sabbato sancto præsertim baptizasse, quod nempe hoc eis indulgeretur propter multitudinem ad baptismum confluentem, ut observarunt Andreas Saufay in Panopl. Sacerdot. lib. 2. cap. 6. Ferdinandus de Mendoza lib. III. de Conc. Illiberit. cap. 77. Thomassinus de Eccl. disciplina lib. 2. primæ partis cap. 29. Fanciscus Hallier de Hier. Eccl. lib. 3. act. 3. §. 3. & in tit. 28. lib. V. Decret. Emman. Gonzalez. IV. Idem eruitur ex Catech. Rom. P. II. cap. 2. num. 23.

Non desunt tamen, qui putent Diaconos posse ex officio conferre baptismum, ejusque dici *ordinarios* ministros, ut apud Franc. Hallier cit. loco tenet Ludovicus Cellotius. Hujus opinionis hæ probationes produci possunt. I. Diaconi ex citato cap. 28. lib. VII. Const. Apo-

stolicarum, & cap. *Pervenit*, dist. xciii. dispensare valent Eucharistiam: igitur & conferre baptismum. II. Possunt Diaconi & poenitentiam dare, cap. *Fures*, 2. de furtis. Quare non baptismum? III. Episcopus consecrans Diaconos, inquit: *Provebendi, filii dilectissimi, ad Leviticum ordinem, cogitate magnopere ad quantum gradum Ecclesie adscenditis: Diaconum enim oportet ministrare ad altare, baptizare, predicare, &c.* Spectat igitur ratione proprii officii ad Diaconum baptizare. IV. Tandem Tertullianus & Hieronymus eodem modo loquuntur de Presbyteris, ac de Diaconis: ideoque si illi ex officio baptizant, hi quoque ordinaria potestate baptismum conferunt.

At communior est, ac vera sententia, Diaconos nonnisi extraordinarios, & delegatos baptismi ministros esse; non enim quicquam probant argumenta nuper producta. Ad primum quippe dicimus, neque dispensare corpus Christi spectare ad officium, ac munus Diaconorum, neque id posse Diaconos præstare extra necessitatem, & sine Episcopi, aut Presbyterorum mandato, ut docet Sanctus Thomas 3. p. q. 82. art. 3. Citato lib. vii. Const. Apost. legitur, *Oblatione ab Episcopo, vel presbytero facta, ipse Diaconus dat populo, non tanquam Sacerdos, sed tanquam qui ministrat presbyteris.* Expende hæc verba, *ex utriusque, dixit ut diaconusque ipsius.* Id ipsum *Diaconi* nomen commoestrat. Non aliud inferitur ex cap. *Pervenit*: quo decernitur Diaconos, tanquam ministros Episcopi, & inferiores presbytero habendos esse, ac debere gratiam communionis recipere presbytero porrigente. At non habere illos jus baptizandi, liquet ex cap. *Præsente presbytero*, ead. dist. Inde etiam patet nonnisi urgente necessitate concessam Diaconis Dominici corporis dispensationem. Tantum, quum vigeat usus communionis *sub utraque specie*, Diaconi dispensabant Sanguinem in calice, quia id agere poterant, quamvis non tangerent Sacramentum, ut ait cit. art. ad 1. Doctor Angelicus, & lib. x. Moral. cap. 23. Azorius. Hoc duntaxat commissum Diaconis constat etiam ex off. S. Laurentii martyris. Hinc de Levitarum manu lib. 1. Hist. Apost. Arator:

*Quæ pocula vitæ*

*Misceat, & laticem cum sanguine porrigat Agni:*

Ad secundum dicimus nunquam Diaconos administrasse Sacramentum Poenitentiae, sed tantum ex delegatione Episcopi recepisse eos, qui solemnis poenitentiae gradus expleverant, non absolutionem impendentes, sed excipientes poenitentium deprecationem: id vero duntaxat affirmat *Palea* in cap. *Fures*, nec aliud innuit perdifficile illud Cypriani Ep. xvi. 1. *Apud Diaconum exomologesim facere*, ut adnotarunt Ferd. de Mendoza lib. 2. de Concil. Illiberit. cap. 65. & observat. xxvii. libri 2. doctissimus Albaspinæus. Ad tertium dicimus Diaconum *vi ordinis* accipere potestatem baptizandi ex commissione & delegatione,

NON



non tamen virtute proprii gradus, quo constituitur presbytero subiectus, non præses, nec minister baptismi ordinarius, ut liquet ex cap. *Diaconos*, dist. 93. Idque ex Scholasticis docent Soto in 1v. dist. 4. q. un. art. 1. & Vasquez disput. 147. cap. 4. & Gonzalez, aliique Jurisconsulti in cap. 1. de Clerico non ordinato. Ad ultimum resp. Presbyterum & Diaconum non posse baptizare absque iussione Episcopi, eo præsentem; sed presbyterum *vi ordinis* esse solemnis baptismi ordinarium ministrum, Diaconum vero extraordinarium tantum, ac delegatum, ut constat ex dictis,

C O R O L L A R I U M.

Sequitur ex hac thesi probabilem esse sententiam quorundam, asserentium Diaconum, si absque delegatione baptizet, fieri irregularem, ex cap. 1. *De Clerico non ordinato*, lib. v. Decret. tit. 28. Ita censent Paludanus, Sylvester, Sylvius, Navarrus, Habertus, Tournelius. Ratio est, quoniam ex præcitato canone irregularitatem contrahunt, qui baptizant, aut divinum officium exercent *in gradu, quem non habent*. At diaconus, ut diximus, *vi ordinis* habet tantum, ut sit minister baptismi solemniter dati *ex delegatione*. Si igitur non delegatus baptizat, exercet id quod excedit sui muneris potestatem. Sunt tamen, qui in tali casu Diaconum ab irregularitate faciunt immunem. I. Quoniam *vi ordinationis* plus quippiam habet in solemnis baptismatis administratione, quam inferior clericus, aut laicus. II. Ex cap. *Diaconos*, dist. 93. conceditur Diaconis baptizare in extrema necessitate, si absint Episcopus & presbyteri, quod videtur accipiendum esse de baptismo solemnī; ingruente enim necessitate possunt baptizare absque solemnitate laici quoque, & mulieres. Hinc Glossa in præcit. cap. ait: *Ubi necessitas exigit, & presbyter est absens, potest Diaconus etiam jure suo baptizare*. III. Quod Diaconus sit minister ex delegatione, oritur ex eo, quod pendeat a presbytero, debeatque ipsius iussa capessere, non quod non constituitur *vi ordinis* ad baptizandum idoneus; ideoque si non delegatus administrat solemnem baptismum, lædit quidem presbyteri jurisdictionem, sed non arrogat sibi munus, quod nemo valeat exercere nisi constitutus in Ordine superiori. IV. Communis est regula canones in odiosis restringendos esse, non ampliandos. Ob hæc momenta ita priori sententiæ adhæreo, ut postremam, quam tenet Franciscus Henno disp. 3. de Bapt. q. 3. non ausim censoria nota configere.

PROP. III. In casu necessitatis quilibet homo, etiam laicus, potest absque solemnī ritu administrare baptismum.

Dixi absque *solemnī ritu*, quoniam ceremoniarum, solemnissimorum.

FF

que

que ministerii apparatus ad casum necessitatis non attinet, ideoque eo uti fas est ministris tantummodo ordinariis. Propositio itaque probatur 1. definitionibus Ecclesiasticis. Eliberitanum Concilium can. 38. decernit, *Peregre navigantes, aut si Ecclesia in proximo non fuerit, posse fidelem qui lavacrum suum integrum habet, nec sit bigamus, baptizare in necessitate*. Hoc canone affirmari laicum valide, si compellat necessitas, baptizare, perspicuum est. Sola emergit difficultas, cur canon excipiat bigamum, & qui baptismum integrum non perceperit: de quo miratur Petavius in suis ad Epiphanium notis scribens pag. 341. *Ergo ne a bigamis baptizari in tanta necessitate non liquet?* Sed animadvertendum, canonem esse accipiendum, *si plures adsint*: quo in casu decens admodum & congruum est, ut potius baptizatus, quam paganus, & potius agamus, quam bigamus tingat: quod observarunt ante recentiores Theologos in notis ad prælaudatum canonem Ferd. Mendoza, & Gabriel Albaspinæus. Gelasius Papa in præcit. Epist. ad Episcopos per Lucaniam & Brutios constitutos, *Quod, inquit, idest, baptizare, & laicis Christianis facere plerumque conceditur*. In Concilio Lateran. iv. cap. *Firmiter*, de summa Trinit. §. *Una vero*, habetur: *Sacramentum baptismi a quocunque rito collatum proficit ad salutem*. Concilium Florentinum in Instruēt. Armeniorum: *In casu autem necessitatis non solum Sacerdos, vel Diaconus, sed etiam laicus, vel mulier, imo etiam paganus & hæreticus baptizare potest*. Idem definitur cap. *Quod quodam*, Causa 1. q. 1. num. 97. cap. *Ad limina*, xxx. q. 1. n. 7. cap. *Sanctum*, de Consecrat. dist. iv. n. 36. Deinde probatur propositio veterum testimonio. Tertullianus de Baptismo cap. xvi 1. ait *Baptismus, æque Dei census, ab omnibus exerceri potest*; & postquam commonefecit, ne laici absque verecundia & modestia id muneris coram Episcopo adsumant, *Sufficiat (inquit) in necessitatibus ut utaris; sicuti aut loci, aut temporis, aut personæ conditio compellit*. Addit subinde rationem, quam Theologi omnes insinuant, petitam ex summa baptismi necessitate, *Tunc enim constantia succurrentis excipitur, cum viget circumstantia periclitantis: quoniam reus erit perditionis hominis, si superederis prestare quod liberè posuit*. S. Pater Augustinus lib. 2. contra Epistolam Parmeniani cap. 13. *Si laicus, ait, aliqua pereuntem dederis (baptismum) necessitate compulsi, quod cum ipse acceperit dandum esse addidicis: nescio an pie quisquam dixeris esse repetendum*. Certe Gerardus Vossius disp. xi. th. vi 1. ait Augustino hoc in loco non videri adeo certum, quid fieri conveniat, scilicet, an repetendum sit baptismus in necessitate a laico collatum. At Vossius fallitur, non enim S. Pater hæsit de validitate baptismi, sed an impietatis damnanda sit opinio contraria; nam subjectis verbis legitimum appellat baptismum laici, etiam extra necessitatem.

*Quam-*

*Quamvis recte dici possit illicite datum*, ob alieni juris usurpationem: concludit vero, *Si autem necessitas urgeat, aut nullum, aut veniale delictum est*. In libro quoque vii. de Baptismo cap. lxi. num. 102. asserit verum esse baptismum, *ubicunque, & a quibuscunque verbis Evangelicis consecratum*. Prætermitto Isidorum lib. 2. de divinis Offic. cap. 24. Walafridum Strabonem cap. 26. & Catechismum Romanum P. 2. cap. 2. num. 24. Probatur denique propositio hæreticorum ipsorum consensione. Calvinus enim lib. iv. Instit. cap. xv. §. 20. fatetur, *ab ipso fere Ecclesiæ exordio usu receptum: ut in periculo mortis laici baptizarent; quamvis temere subiciat: Non video qua firma ratione defendi possit*. De Anglicana Ecclesia scribit Isaac Casaubonus in Resp. ad Cardin. Perronium: *Laicorum vero baptismum, aut seminarum, ut fieri legibus suis vetat, sic factum ex legitima formula quodammodo non improbat, baptismum esse promittens, etsi non legitime administratum*. Similiter Georgius Abbas in Prælect. Oxoniensibus laudatis a Vossio: *Male igitur factum est, si laicus; pejus factum, si femina rem sacrosanctam hanc attigerit: sed factum est, & quod factum est, infectum esse non potest*. Neque enim a nobis negatur laicos illicite baptizare, si præsto sit Presbyter, aut Diaconus.

Opp. Nunquam laicis baptizare licitum infertur ex Scriptura, ex Patribus, ex ratione. Etenim Matth. ult. Christus Dominus solis Apostolis baptizandi contulit potestatem, dicens: *Euntes, docete*, &c. quibus verbis constat mandatum, ut baptizarent, ordinariis tantum verbi ministris, Auctor Constit. Apostol. lib. lxi. cap. 10. hæc habet, *Sed neque laicos concedimus aliquod Sacerdotale munus exercere, veluti sacrificium, baptismum, manuum impositionem*: id vero attentanti minatur τὴν τῷ ὀζία τιμωρίαν, *Ozia pœnam*. Et S. Basilii in Epist. ad Amphilocho. can. 1. reprobans baptismum hæreticorum, ait tinctos ab his, repurgandos, *veluti a laicis baptizatos, ὡς παρὰ λαὸν βαπτίζουσιν*. Primum objecit Calvinus loco cit. Hæc duo autem testimonia inculcat Gerardus Vossius disp. xi. n. 3. & 9. Addamus depromptam ex historia rationem. Diximus prop. 1. absentibus Pastoribus infantes sine baptismate periisse, ideoque Gregorium Magnum lib. 1. epist. 33. rogasse Exarchum Ravennatem, ut dimitteret Hortensem Episcopum Blondum. Etiam S. P. Augustinus Epist. ad Honoratum 180. nunc 228. num. 8. hortabatur ministros, ne fugam arripere in persecutione Vandalica, eo quod magnus tunc fieret in Ecclesia concursus, *aliis baptismum flagitantibus, aliis reconciliationem*, &c. Cur hæc inculcare, si urgente necessitate baptizare possint & laici?

Resp. Nihil ex his erui, nisi Apostolos esse baptismi, ac prædicationis ordinarios, principesque ministros, & qui expectare non

debeant antistitum iussa : nam præterquamquod in exponendis scripturis debemus attendere Ecclesiæ iudicium , ac traditionem majorum , constat ex Actis Apost. etiam Philippum Diaconum administrasse baptismum Eunuchis , & Ananiam Paulo . Scio respondere Calvinistas , etiam Philippum ac Ananiam fuisse *verbi ministros* . At ex hac responsione subinfero , Diaconos , qualis erat Philippus , ex delegatione , posse solemni ritu & baptizare & prædicare , ideoque Christi mandatum Matth. ult. non ita spectare Apostolos , ut nequeat alios comprehendere . Dicent , si de Diaconis sermo sit , nec hæreticus diffitetur . Verum & in casu necessitatis , domi saltem , laici docere possunt , ex priori ad Corinth. xiv. 35. Similiter ergo privatim baptizare non prohibentur . Auctor Constitutionum Apost. loquitur de baptismo solemni , & extra necessitatem dato : perstringit enim laicos , qui munera Sacerdotalia , exemplo Core Num. 16. & regis Ozia 2. Paralip. 26. usurpabant , ut constat legenti præcitatum , cap. x. & ultimum libri viii. Hoc loco videtur etiam negari Ananiam , qui baptizavit Paulum , fuisse Diaconum , quamquam oppositum censet Oecumenius in Act. ix. Videfis canonem xvi. Nicephori Confessoris in Jure Græco-Rom. & l. i. apud Glycam p. 3. Annalium , necnon Cotelierum in notis ad PP. Apost. 1. Volum. pag. 282. De mente Basilii pertractandum infra : sufficit modo , si dicamus in eadem ad Amphiloichium Epistola definiri , *Quod oporteat consuetudine uti , & sequi patres , qui quæ ad nos pertinent providerunt* , Tom. 2. pag. 759. Postrema ratio nil probat : nam nisi adsit Episcopus , error & ignorantia invalescunt , sicuti lupi grassantur , dum pastor dormitat : atque id præsertim sua ætate Augustinus & Gregorius exaggerabant , quando laici spe sanitatis decepti differebant baptismum , maximaque propriæ , & alienæ salutis torpebant negligentia . Vide quæ adversus Guffanvillæum PP. S. Mauri adnotarunt ad Epistolam illam Gregorianam .

PROP. IV. Et mulieres valide in necessitate baptizant .

Sequitur ex dictis , eadem enim mulierum & laicorum est ratio . Decretum etiam Concilii Florentini comprehendit mulieres : similiter & Lateranensis iv. Idem definit Urbanus Papa II. in Epistola ad Vitalem Brixiensem presbyterum , ut patet ex cap. *Super quibus* , Causa xxx. q. 3. num. 4. Probat insuper dandum baptismum etiam si nullus adsit præter feminas , argumentum supra ex ejus necessitate depromptum . Præterea Patres indiscriminatim pertractantes de laicis , legitimumque pronuntiantes baptismum *a quocunque* verbis Evangelicis consecratum , mulieres nequaquam excludunt . Non aliter sentiunt Græci Orthodoxi , ut ex præcitato canone xvi. Nicephori , & ex Hieremia Patriarcha Constantinop. cap. vii. suæ Censuræ , demonstrat lib. 1. Concordiæ cap. 10. Arcudius ,

Bel-

Bellarminus de Bapt. cap. VII. probat hanc assertionem exemplo Sephoræ, quæ Exodi IV. filium suum circumcidit, atque idem exemplum strenue vindicat a Calvinii commentationibus. Responderunt postea Bellarmino Georgius Abbas quæst. 2. Oxoniensi, & Vossius disp. x. th. 4. nusquam in vet. testamento, nec in Philone, aut Josepho legi, utrum voluerit Deus fieri circumcisionem per Sacerdotem, aut patremfamilias, per feminam ne, an marem. Etiam Serrius ex Catholicis Exercit. XXXIII. existimavit puerum Jesum non circumcissum a Sacerdote, ejusdem Sephoræ exemplo non prætermisso. Addunt Sephoram peccasse, nec factum ejus esse pro exemplo afferendum. Hæc tamen argumentum Bellarmini minime enervant, tametsi quæ attigimus sint validiora. Etenim dato quod ministerium circumcisionis fuerit laicale, (quod non opus est in præsentia discutere,) circumcissio tamen per Sephoram facta repeti non poterat, & figura erat baptismi, qui semel datus nequit reiterari, ut inquit Augustinus Epistola ad Maximinum Donatistam 203. nuuc 23. num. 4. & lib. 2. contra lit. Petil. cap. 72. Igitur nec reiterandus est baptismus a muliere collatus; ideoque est validus. Deinde quæ olim circumcisionis, eadem nunc baptismatis est necessitas. Ad hæc non sola Sephora filium circumcidit, verum etiam id præstiterunt piæ mulieres, de quibus in 1. Machab. 1. 63. & in 2. libro VI. 10. Nec est, cur dicant hæretici hos libros non esse in canone hebræorum: illos quippe ut Augustinus ait lib. XVI. 11. de Civit. Dei cap. 36. *Ecclesia pro canonicis habet.*

Oppones: Mulierum baptismum damnat Tertullianus de Baptismo cap. 17. scribens: *Petulantia autem mulierum, quæ usurpavit docere, atque non etiam tingendi jus sibi pariet.* Et in libro de Virginibus velandis cap. 9. *Non permittitur mulieri in Ecclesia loqui sed nec docere, nec tingere, nec offerre, &c.* Et de Præscript. cap. 41. *Ipse mulieres hæreticæ quam procaces! quæ audeant docere, contendere, exorcismos agere, carationes repromittere, forsitan & tingere.* Epiphanius h. 42. num. 4. pag. 305. damnat Marcionem, quod mulierculis tribueret, *ἐπιτην βαπτισμα διδόναι, permissionem baptizandi*: & h. 49. num. 2. pag. 48. eundem errorem redarguit in Pepuzianis, sive Quintillianis: quod & notavit hæresi 27. Augustinus. Idem Epiphanius hæresi LXXIX. num. 3. de beata Virgine inquit, *ὡς ἰδοὶ βαπτισμα διδόναι παρασκευαῖται, Sed nec baptisma dare ei conceditum est*: quod repetit infra num. 7. S. Joannes quoque Chrysostomus hom. de sanctis Bernice, & Procloce, quæ extat Tom. 1. edit. Com. pag. 640. descripto baptismi nomine sanctarum Virginum martyrio, post hæc verba, *ἰσχυρῶς δὲ αὐτὰς ἡ μάτρ. Baptizavit autem illas mater*, (Dominna scilicet, quæ filias aqua necatas Deo obtulit,) statim addit, *τὴν Νίκαν; καὶ βαπτίζῃ; Quid ais? mulier baptizat?* ostendens

dens his verbis feminam posse quidem mysticum celebrare baptismum, at non verum. Demum Concilium Carthaginense iv. celebratum anno 398. canone 100. inquit: *Mulier baptizare non presumat*. Adverte Bellarminum cit. cap. 7. respondere ipsum Concilium excipere casum necessitatis, quoniam Petrus Lombardus in iv. sent. dist. 6. & Gratianus cap. *Mulier*, de Consecrat. dist. iv. num. 20. addunt clausulam, *nisi necessitate cogente*; sed posteriores hæretici observarunt hanc clausulam in nullis Conciliorum libris reperiri: atque ita esse liquet ex collectione Labbei Tom. 11. pag. 1207.

Resp. his tantummodo evinci feminas baptizare non posse in Ecclesiæ conventu, solemnî ritu, extra necessitatem, & si virorum adsit copia. Manifestum id est præcitatos auctores legenti. Tertullianum perstringere *petulantiam mulierum*, quæ ex fabula Teclæ munia presbyterorum obibant, quales erant Quintilla, & Priscilla, tam apertum est, ut negare non audeat Vossius disp. xi. th. 10. Grotius in disert. de administrat. Cœnæ, ubi non sunt pastores, Tom. iv. pag. 509. ait Tertullianum agere adversus mulieres, *quæ in hæreticorum parasynagogis publice docebant populum*, & si videtur Tertullianus sensisse, nec privatim baptizarc licitum feminis; restringendum id esse ad circumstantiam, ubi adfuit viri. Didicimus ex Apostolo 1. ad Corinth. xiv. turpe esse mulierem loqui *in Ecclesia*, quod docere dominii & auctoritatis indicium sit, ex eodem Apost. 1. ad Timoth. 11. Vide quæ scripsimus cap. 9. libri xxv 111. Privatim ergo, & nisi vir adest, ut docere, ita baptizare femina potest, ac debet, *Tunc enim* (inquit ipse Tertullianus,) *constantia succurrentis excipitur, cum viget circumstantia periclitantis*. Epiphanius pariter de his loquitur, *apud quos mulieres Episcopi erant, ac presbyteri*, *ἐπισκοποι καὶ πρεσβύτεροι γυναῖκες*, & *προσβύτεροι γυναῖκες*. Tales erant Peputiani, Cataphryges, Collyridiani: quos & valide refellit, quoniam Mariæ potius, quam Quintillæ, aut mulierculæ alteri Sacerdotalis dignitas fuisset collata, *ὡς ἱερατικὴν γυναῖκα διὰ προστάξεως, ἢ κατὰ τὴν τὴν ἐκκλησίαν ἐκκαλεῖται*, si Sacerdotio fungi mulieribus mandatum foret, aut canonicum quidpiam præstare *in Ecclesia*. Non alia mens Chrysostomi triumphum Bernicis & Prosdoci celebrationi mysteriorum, solemnique sacrificio, personante oratione comparantis. Ad canonem 100. Synodi Carthaginensis nemo, me iudice, respondit melius Doctore Aquinate, qui 3. p. q. 67. art. 4. ad 1. ait vetari hoc canone mulieribus ministerium publici, solemnisque baptismi; siquidem præcedenti canone 99. legitur, *Mulier, quamvis docta & sancta, viros in conventu docere non presumat*. In proximo itaque canone eadem exceptio subintelligitur, *In conventu*; non quam affixit Gratianus, *nisi necessitate cogente*: nam *in conventu*, sive *in Ecclesia*, adfunt Sacerdotes, & viri, nec ulla necessitas

fitas compellit feminas baptizare. Ceterum quod ait Gratianus, posse mulierem baptizare, si cogat necessitas, verissimum est, & reliquis sanctionibus comprobatum. Ex hoc canone Carthaginensi refellitur error Attonis Vercellensis, autumantis Diaconissas posse *in conventu Ecclesie* alias feminas baptizare: de quo errore Spicilegium Acherianum, & Cotelierius ad caput 9. lib. 111. Constit. Apostol. Quid peregerint in seminarum baptismo Diaconissæ, dictum supra in Appendice capitis sexti.

## C A P U T XII.

*Nonnulla ad praxim spectantia de ministro baptismi  
quæsitæ producantur & explanantur.*

Contingere potest, ut in lucem editus infans agat animam, eique sit salvifica unda succurrendum; pluribus autem in puerperæ domo existentibus, clericis, laicis, feminis, inquiratur cui id muneris sit committendum. Extra dubitationem positum est, ordinem dignitatis esse servandum; nec mulieri baptizandum si præsto sit masculus, neque laico si adsit clericus, nec diacono si sacerdos sit præsens. Ita docent cum Hugone Victorino lib. 1. Erudit. Theologiæ cap. 13. ac D. Thoma 3. p. q. 67. art. 4. omnes Scholastici. Petitur autem ex dictis superiori cap. aperta ratio; enim vero Augustinus lib. 2. contra Epist. Parm. cap. 13. num. 29. de laico baptizante inquit: *Nulla cogente necessitate si fiat, alieni muneris usurpatio est.* At si adsit quispiam e clero, nullâ necessitas laicum compellit; ideoque alienum jus temere invadit. Idem dicendum de minori clerico, dum adest superior: administratio siquidem baptismi spectat ad Ecclesiasticam Hierarchiam, in qua dignitatis, quantum fieri potest, servandus est ordo. Mulier quoque id non debet præsumere, quoniam auctore Apostolo in 1. ad Corinth. x1. 3. *caput mulieris vir*: quod & insinuat eo loci sanctus Thomas. Hæc præscribit Rituale Romanum de ministro bapt. *Sed si adsit Sacerdos, Diacono præferatur, Diaconus Subdiacono, Clericus laico, nisi pudoris gratia deceat feminam potius, quàm virum baptizare infantem non omnino editum, vel nisi melius femina sciret formam, & modum baptizandi.* Recte appositæ est exceptio pudoris, & ritus cognitio; quoniam *sancta sanctæ tractanda sunt*, nec Sacramentum exponendum est periculo nullitatis. Id etiam Diana animadvertit p. v. tract. 9. ref. 87. Toletus in Summa lib. 1. cap. 29. Vide & Catechismum Rom. de Sacram. Bapt. num. 25.

### II.

Gravior videtur difficultas, an si laicus, vel mulier obstetrix bapti-

baptizent præfente Clerico in facris constituto, lethale crimen committant, an veniale duntaxat. Verum si præfens sit presbyter, mortale peccatum patrari, indubitatum est, quoniam ille baptismi minister est *ex officio*, nec fas est cuilibet alienum munus in re gravi usurpare, & violare jus conferendi Sacramenta, tametsi non sequatur contemptus, & Sacerdos præfens consentiat, ut adversus Valentiam, ac Petrum Ledefina tenet illustris JC. Gonzalez in Tit. xxviii. libri v. Decret. Si vero non adsit Sacerdos, sed Diaconus, aut alius Clericus; laicum, aut feminam baptizantem venialiter tantum peccare, tenent Quintanadennas, Diana, & præcitatus Gonzalez, necnon Dominicus Soto in iv. dist. iv. art. 2. Sylvius in 3. p. q. 67. art. 5. & Salmant. tract. 2. cap. xv. Horum argumentum est, quoniam nulli Clericorum, si Sacerdotem excipias, incumbit *ex officio* baptizare, ideoque non violatur in tali casu jus alicujus, nec fit Sacramento notabilis irreverentia. Verum argumentum istud non est, ut putant, firmissimum & palmarc; sed videtur falsum in casu necessitatis non devolvi jus baptizandi ad illum, qui ceteris præeminet, nec ladi ordinem Hierarchiæ, jure divino, ac naturali præscriptum. Quare in hoc etiam casu jus violatur alienum, ut tenent Vasquez disp. 147. cap. 5. ex nostris autem Farvacques cap. iv. de Baptismo q. vi. Vanroy Tom. iv. cap. iv. de Bapt. q. 2. Antonius Guerrero Tract. vii. disp. 2. num. 80. Huic sententiæ, salvo jure alterius, subscribo, maxime quod in rebus ambiguis conscientiæ securitati sit consulendum.

## III.

At duo tantum præfentes sunt, obfetrux, & Sacerdos vinculo excommunicationis innodatus; quis horum tinget periclitantem puerulum? Audio Navarrum, Sylvestrum, aliosque bene multos præferendum tali in casu laicum, eo quod Sacerdos excommunicatus Satanae traditus est, segregatus a communione fidelium, & suspensus ab ordinis exercitio. Quod si opponas Sacerdotem illum in casu necessitatis rite absolvere; reponent disparcm esse rationem, propterea quod in nulla necessitate valeat laicus absolutionem impendere. Verum Leander Tract. 2. de Excom. §. 1. & Farvacques laudato in loco putant hos decipi, aut saltem infirmo niti argumento. Siquidem administrare baptismum absque solemnî ritu, & impellente necessitate, non est *actus ordinis*; alioqui id excqui non posset mulier, nec laicus. Igitur vi excommunicationis, qua Sacerdos arcetur ab exercitio Ordinis sui, non prohibetur baptizare necessitate urgente. Et quidem si tali in casu baptizet; consensu omnium, non fit irregularis, quoniam non exercet actum Ordinis, peragiturque quod conceditur laico; ut recte Suarez de Censuris disp. xi. sect. 3. num. 20. & in cap. 1. de Clerico excommunicato Jurisconsulti. Si autem



autem excommunicatione a privatim baptizando prohiberetur; proculdubio ex præcit. cap. 1. fieret irregularis. Non videtur ergo tali in casu denegandum presbytero jus, quod ei tanquam viro competit supra mulierem. Adde jus baptizandi persistere in *charactere* Ordinis, nec constare quod velit Ecclesia illius usum in necessitate quoque prohibitum: nullam vero *ex ordine* habet obstitrix conferendi baptismatis facultatem. Hæc illi. Verum a priori communicque sententia arbitror non recedendum. Nam per excommunicationem Ecclesiæ, velut mortuus, a communione fidelium quis separatur, cap. *Per venerabilem*. §. *Sunt autem*, lib. iv. Decret. tit. xvii. num. 13. Atqui mulier in ministerio baptismi præferenda est homini segregato ab Ecclesia. Igitur & presbytero excommunicato. Neque robur habent argumenta contraria: non primum, quia Sacerdos excommunicatus non ut laicus habendus est, sed ut segregatus a communione fidelium: non alterum, quia in privato baptismo non requiritur *character* Sacerdotalis.

IV.

Ut revertamur ad puerum agentem animam, ne pereat decedens absque regenerationis lavacro, ex adstantibus plures eum abluunt baptismi forma prolata: quaeritur autem, an Sacramentum perficiant. Respondemus nullum de hac re dubium esse, si materiam singuli adhibeant, pronuntient verba, rectamque habeant intentionem. Quod enim posset opponi, unum, eundemque effectum non produci a duplici causa totali, locum non habet in hac questione; cum ministri baptizantes sint causæ instrumentales, non principes: effectus quoque supernaturalis sit, earumque causarum excedat virtutem. Hinc unum baptismum tunc fieri docent S. Thomas 3. p. q. 67. art. 6. necnon Scotus in 17. dist. 6. q. 2. & utriusque Scholæ Theologi. Extra controversiam quoque est, si unus prius altero verba proferret, illum duntaxat baptizaturum; eum vero, qui postea pronuntiaret *formam*, patraturum sacrilegium, & tanquam repentem baptismi fore puniendum.

Quid autem, si adessent duo, quorum uni truncata esset manus, alteri evulsa lingua? Negat ibidem S. Thomas in responsione ad tertium, integrum fore baptismum, quoniam qui verba proferret, ipse non immergeret, nec posset dicere, *te baptizo*, id enim præstaret alter brachia, non linguam habens. Imperite autem, ut credo, Cajetanus recedit hoc in loco a D. Thoma, respondens posse omnes scrupulos vitari adhibita forma Græcorum, *Baptizetur servus Christi*: nam & in hac forma intelligitur actio ministri. Forte melius Paludanus in iv. dist. 5. ubi ait duos illos homines, elinguem, brachiique truncatum, unum integrum repræsentaturos, & eum, qui loqueretur propria lingua, manu aliena quidem baptizaturum, sed vi-

caria. Accedit Paludano Joannes Chapeaville in Tractatu de Sacramentis ministrandis tempore pestis, quæst. 20. At non excedunt hæc fines exiguæ probabilitatis: ac tali pacto baptizatum, iterum sub conditione baptizandum esse affirmamus.

## V.

Oritur nunc quæstio quinta, num baptismi indigus, non quidem puer expers rationis, sed catechumenus, & adultus, sese prospiciens in mortis periculo, nec ministrum inveniens ullum, baptizare queat semetipsum? Respondemus negative cum Innoc. III. cap. *Debitum*, lib. 3. Decret. tit. XLII. num. 4. ubi rescribit Theodorico Metensi Episcopo, denuo esse baptizandum ab alio, *qui in mortis articulo constitutus in aquam seipsum immergit, dicens, Ego baptizo me in nomine Patris, &c.* quod Pontifex hac ratione demonstrat: *Inter baptizantem debet esse discretio, sicut ex verbis Domini colligitur. Ite, baptizate omnes gentes, &c.* Addit comparisonem carnalis generationis, in qua alius est qui carnaliter gignit, & alius qui carnaliter gignitur, & sic, inquit, *in Sacramentali generatione, qua soboles ex aqua, & Spiritu sancto renascitur, alius debet esse qui generet, & alius qui spiritaliter generetur.* Concludit etiam in baptismo paternitatem & filiationem inveniri, *quibus baptizatus & baptizans ad invicem referantur.* Consentiunt omnes in hac parte Theologi. Neque dicas aliquando etiam laicos propria manu sumpsisse Eucharistiam, viros quidem cava nudaque dextera, & mulieres nitido. testâ lintheamine, ut constat ex Palladio cap. 143. Cyrillo Hier. Catech. 5. mystag. & Serm. inter Augustinianos de Temp. 252. nunc 229. Ap. num. 5. ex quo depromptæ sunt lectiones Brev. Rom. in festo dedicat. Eccl. Discrimen quippe est maximum inter baptizari & communicare, quemadmodum inter gigni & nutrirî.

## VI.

Proxima quæstio est, num laicus, quem certum est non posse solemnî ritu baptizare, nec privatim necessitate urgente, si presbyteri, vel ministri alii inveniantur, ut dictum est cap. præced., & liquet ex c. *In necessitate*, de Consecrat. dist. 4. num. 21. si audeat solemniter baptizare, quemadmodum gravissime peccat, & alienum munus usurpat; ita & contrahat irregularitatem, cui ex cap. *Si quis baptizaverit*, lib. v. Decret. tit. 28. num. 1. subjicitur Clericus. In tali casu laicum solemniter baptizantem non fieri irregularem, censent Laymanus, Bonacina, Diana, alique innumeri; quoniam, inquit, constat ex titulo agi ibidem *de Clerico non ordinato*, ac præsertim de Diacono, qui non promotus ad presbyteratum rem divinam perageret. Sed revera laicum illum fieri irregularem existimo. Primo quia cum verba perspicua sunt, frustra confugitur ad *titulum*: qui num. recte adjunctus sit, ignoramus. At verba canonis sunt,

sunt, *Si quis baptizaverit, aut aliquod divinum officium exercuerit non ordinatus, propter temeritatem abjiciatur de Ecclesia, & numquam ordinetur*: ex quibus verbis constat Hormisdam non loqui tantummodo de Diacono missam celebrante, sed de quocunque non ordinato quodlibet Sacramentum, ac singillatim solemnem baptismum ministrante. Atqui, subsumo, laicus tali in casu exercet aliquod divinum, & quod nonnisi ab ordinato potest eo ritu administrari. Igitur laicus abjiciendus est, & tanquam irregularis non est ordinandus. Præterea in Editione Gregoriana adnotatur, haberi in vii. Mss. hunc titulum, *De non ordinato ministrante*, & Glossa: *Nota hic pœnam non ordinati ministrantis*. Cum etiam superiori titulo 27. pertractum sit de ordinatis, quibus administrare Sacramenta non licet, subnectitur titulus, *De ministrante non ordinato*: ideoque appositus, *De Clerico non ordinato*, ita spectat ad Diaconum celebrantem, aut absolventem, ut non excludat laicum baptizantem. Postremo si laicus solemniter baptizet, fungitur ordine, quem non habet, non minus quam Clericus non ordinatus: quod ergo de Clerico non ordinato, idem de laico iudicium est pronuntiandum. Atque ita saniori quidem sententia, quam pervulgati Tractatores, tradunt Paludanus in 1v. dist. 5. Suarez Tom. 3. in 3. p. disp. 3. sect. 4. Sylvius in q. 67. art. 1. Gonzalez in præcit. cap. *Si quis*, alique percelebres.

VII.

Sequitur quæstio, an recte se gerat Parochus, qui ut salutem infantis in tuto statuatur, expectetque patrinum de longinquo venturum, puerum extra necessitatem domi baptizat, perfecturus post adventum patrini rituum solemnitatem in templo. Ad hanc quæstionem respondemus Parochum grave peccatum patrare, nisi agatur de Regum ac principum filiis, ut in Man. cap. 22. n. 7. asseruit Navarrus, q. 8. de Min. baptismi Farvaques, Henno ibid. q. 3. & cum ceteris Canonistis Joan. Petrus Gibert de Bapt. sect. 9. num. 4. Patet ex Clementina lib. 11. tit. xv. cap. unico: qua in Vienneſi Concilio sub Clem. V. anno 1311. statutum est, *ne quis in aulis, vel cameris, aut aliis privatis domibus, sed duntaxat in Ecclesiis, in quibus sunt ad hoc fontes specialiter deputati, aliquos (nisi Regum, vel principum, quibus valeat in hoc casu deferri, liberi extiterint, aut talis necessitas emerſerit, propter quam nequeat ad Ecclesiam absque periculo propter hoc accessus haberi) audeat baptizare, qui autem secus præſumpſerit, aut suam in hoc præſentiam exhibuerit, taliter per Episcopum suum caſtigetur, quod alii attentare ſimilia non præſumant*. Eadem legas cap. 48. Synodi Meldenſis celebrati anno 845. Dictum ſupra cap. vi. p. 2. Clinicos domi baptizatos non fuiſſe ad præſbyterii gradum promotos, id vetante canone 12. Concilii Neocæſarienſis.

Et quamquam olim rabie persecutionum furente, nec sacris ædibus constructis, baptizatos invenimus Catechumenos privatis in domibus, in carceribus, & ubique locorum; baptisteriis tamen ædificatis nullibi legimus baptismum extra necessitatem datum privato in loco. Immo ad baptisteria augustissimos reges, eorumque liberos accessisse, tradunt Historici, ut de Theodosio juniore Marcus Gazæus apud Baronium ad annum 401. & de Clodovæo rege, ejusque filio Ingomiro Hincmarus Remensis Archiep. in vita S. Remigii. Ratio quoque postulat, ut quemadmodum suscipiendi baptismatis eadem causa est singulorum; ita omnes publice ad communem matrem Ecclesiam accedant. Atque hinc patet Viennensem Synodum novum potius Regibus contulisse privilegium, quam reliquos recenti lege obstrinxisse, neque ullatenus contemnendam Ritualis Pii V. præceptionem: *Itaque necessitate excepta, in privatis locis nemo baptizare debet, nisi forte sint Regum aut magnorum Principum filii, id ipsi ita deposcentibus, dummodo id fiat in eorum Capellis, seu Oratoriis, & in aqua baptismali de more benedicta.*

## VIII.

In quæstionem denique venit, quid de baptizantibus sentiendum sit, qui olim a compatribus munera recipiebant, vel collocato super altare puerulo baptizato, vel concha, in quam cummi immitterentur, exposita. Respondemus autem præter universales inhibitiones, quibus indicitur sacris ministris, ne quicquam exigant pro aliqua administratione Sacramentorum, cujusmodi sunt canones Lateranensis Concilii celebrati anno 1179. cap. 9. alterius Later. an. 1216. cap. 42. Burdigalensis an. 1255. cap. 26. aliique innumeri, producti a pertractantibus de Simonia; peculiare haberi canones, distinctaque mandata, ne quidpiam accipiat in collatione baptismatis. Illi beritanum Concilium anno 315. cap. 4. prohibuit, *ne qui baptizantur nummos in concham immittant.* Gelasius Papa anno 494. in Epist. ad Episcopos Lucaniæ, cap. 5. *Baptizandis (inquit) consignandisque fidelibus sacerdotes pretia nulla præfigant.* Concilium Toletanum XI. anno 675. cap. 8. *Si pro baptizandis (ait) pretia qualibet vel præmia voluntarie oblata susceperis Presbyter, tribus mensibus excommunicatione plectatur.* Prætermitto Canonem 5. Concilii Remensis anni 1049. canonem 16. Concilii Rothomagensis anni 1050. Acta Ecclesiæ Mediolanensis P. 1. lib. 2. aliaque plura decreta, quæ legi possunt apud Martenium lib. 1. de Antiquis Ritibus cap. 1. art. 19. num. 6. vel apud Joannem Petrum Gibert de Ecclesiæ Rectoribus Tit. x. cap. v. §. 5.

## C A P U T XIII.

*De Anabaptismo, sive Rebaptizantium errore, historica  
theorematum.*

**P**Ræmissam de ministro baptismatis dissertationem consequitur altera de *Anabaptismo*, idest, de errore illorum, qui ab hæreticis, vel improbis tinctos iterum baptizarunt. Est enim hæc eadem quæstio, ac si in disputationem veniat, num etiam hæretici & impii administrent validum, ratumque baptismum. De impiis autem, universim diximus superiori libro: ideoque agendum hoc in loco de hæreticis: de quorum baptismo tractationem hucusque distulimus, non una causa impellente. Principio enim de baptismo hæc dissidia præsertim efferbuerunt; deinde expresse sess. vii. canone 4. de baptismo dato ab hæreticis sententiam dixit Synodus Tridentina: ac præterea non desunt, qui salva fide negant posse hæreticos quædam sacramenta conficere, Confirmationem, Pœnitentiam, Ordinem; quod jam nullus de baptismate pronuntiabit. Hanc ergo sedem præfenti controversiæ hanc immerito constituimus. In historiam vero dilucidandam animum initio intendimus; & investigabimus quinam hæreticorum a catholicis tinctos rebaptizarint: posthac quinam catholicorum tinctos ab hæreticis, qua in re viri maximi in iudicium trahendi sunt, Tertullianus, Dionysius Alexandrinus, magnus Basilii, ac præsertim Firmilianus ejus prædecessor, ac Cyprianus; nam hos duos ab impacto Rebaptizantium errore vindicat, ut alibi diximus, peracutus & eloquens Italus: tum videndum, qua ratione se gesserit in hac causa Romanus Pontifex Stephanus; ac tandem quomodo gravis hæc controversia finita sit, & quibus terminis circumscripta. Atque his, ut statim aggrediar dissertationem, arbitror lectorem satis attentum reddi, rerumque dicendarum expectatione suspensum.

PROP. I. Permulti hæretici baptismum repetere consueverunt.

Veniunt primo loco Himerobaptistæ, principio hujus libri commemorati, qui non semel, sed quotidie sese abluebant, & a quibus initium Anabaptismi nonnulli arcessunt: sed puto illos, non Sacramentum certis consecratum verbis, sed lustrationes Pharisaico more iterasse. II. Sequuntur Cælicolæ, quorum sectam Vossius disp. xvi. de Bapt. appellat *obscuram*, & de qua in Codice Theodosiano tit. vii. de *Judeis*, *Cælicolis*, & *Samaritis*, legitur: *Cælicolarum nomen inauditum quodammodo novum crimen superstitionis vindicavit*. At in eodem Codice plura hujus sectæ deprehendo vestigia. Primum ex præcitato titulo, in quo *Cælicola* Judeis, Samaritisque junguntur, infero

infero Cælicolas fuisse *Judaos genere*, Mosaiscos ritus, & Christianum baptismum simul retinentes; non enim, si generis fuissent alieni, cum Judæis, & Samaritis invenirentur permixti. Eodem insuper titulo, l. xix. de Cælicolis legimus, coegisse quosdam Christianos *sædum*, *tetramque Judæorum nomen induere*. Præterea idem *Cælicolarum* nomen commonstrat Judæorum progeniem, de qua fuit olim Ethnicorum opinio *cæli dumtaxat lumen adorare*. Ita Satyra xiv. vates Aquinas, citatus vol. 1. pag. 90. cui addimus Petronium in Catelestis:

*Judaus licet & porcinum numen adoret,*

*Et cæli summos advocet auricolas :*

quo tamen in loco legerem, *Et cilli summas advocet auriculas*; nam videtur poeta respexisse ad fabulam *de capite Asinino*, explosam eodem volumine primo pag. 82. siquidem *asinus* apud Dores est *asinus*. Opponit Vossius Augustinum scribentem de Donatistis Ep. 163. ad Eleusium, nunc 44. num. 13. *Sim enim miseramus ad Majorem Cælicolarum, quem audiveramus novi apud eos baptismatis institutorem extitisse*. Quomodo, Vossius inquit, Major ac præses Judæorum, Donatistis, qui Christiani erant, potuit accenseri? Sed oppositionem dirimunt, quæ habentur l. 44. Cod. Theod. tit. de Hæreticis: *Donatistarum hæreticorum, Judæorumque nova atque inusitata detexit audacia, quod Catholica fidei velint Sacramenta turbare*. Hinc intelligimus, Majorem Cælicolam, & Judæum simul cum Donatistis probasse Anabaptismum, atque labefactasse Christiana Sacramenta superstitione Judaica; unde Augustinus illum appellat *novi apud Donatistas baptismi institutorem*: quamobrem Cælicolæ una cum Donatistis ab Honorio & Theodosio Augustis anno 408. leg. xliii. *de hæret.* nominatim proscripti sunt. III. Marcion apud Epiphanium h. xlii. num. 4. non semel, sed tertio baptismum repetendum asseruit: *nam cum virginem in patria constuprasset, & ingentis flagitii convictus aufugisset, alterum sibi circumforaneus iste baptismum adsecurvit; licere pronuntians ter omnino aquis elui, ac baptismo peccatorum ad condonationem expiari*, Tom. 1. pag. 304. De Marcione plura lib. 1. cap. 8. Rebaptizantibus permulti ex Philastrio accensent *Montanistas*; quos tantum mortuos baptizasse idem Philastrius scribit cap. 49. unde Vossius opinionem perstrinxit istam. At cum idem Philastrius cap. 63. scribat: *Montanistæ sunt, qui rebaptizant si quos seduxerint homines*; non illa opinio perstringenda erat, sed explicanda. Montanistæ itaque a Montano dicti, sive Pepuziani a Pepuza Phrygiæ oppido, unde & Cataphryges appellati sunt, rebaptizasse non legimus neque apud Philastrium h. 49. neque apud Epiphanium h. 49. & 50. neque apud Augustinum h. 26. & 27. At fuerunt alii, *Montanistæ a Philastrio nuncupati*, qui re ipsa iterum bap-

pti-

ptizarunt. IV. Horum nomine intelliguntur Lapsi, qui cum Felicissimo, quem Novatus Diaconum constituerat, & cum Fortunato Carthaginensi, se a D. Cypriano separarunt circa annum ccl. quod contendere-  
rent lapsos, modò libellum a martyribus & confessoribus asserrent,  
statim esse recipiendos, & Cyprianus assereret id adversari Ecclesiasti-  
cæ disciplinæ: cumque hi *Libellatici* cum Felicissimo in monte com-  
municarent, *Montaniste* a Philastrio una cum Donatistis dicuntur.  
Hi ergo, sicut & Novatiani, ad se confugientes iterum baptizabant;  
atque eò usque abrepti sunt, ut Ecclesiam, a qua segregati erant,  
crederent Satanæ conventiculum, nec in ea vera esse Sacramenta,  
sed pollutiones Sacramentorum, & ceremonias inanes; unde se,  
suosque talia execrantes, *καθαρῖς*, idest, *mundos* appellabant.  
Rebaptizarent deinde hæretici Donatistæ, quorum schisma exortum  
est anno cccxii. juxta Valesium, Pagium, & Norisium, cum sedata  
persecutione ageretur de eligendo in locum Mensurii Episcopi Car-  
thaginensis vitæ sancti Cæciliano: adversus quem steterunt Majori-  
nus domesticus Lucillæ, ac Donatus, a quo Donatistæ, qui sectæ  
initio dicebantur *Pars Majorini*: unde Augustinus Epist. 68. ad Ja-  
nuarium, nunc 88. ait: *Pars Donati primo apud Carthaginem pars  
Majorini dicebatur*. An verò Donatistis nomen dederit Donatus Nu-  
mida a Calis Nigris domesticus Lucillæ, an Donatus, qui Majorino  
successit, non consentiunt Scriptores. De Donato a Calis Nigris as-  
sertorem habeo Augustinum Ep. 185. sive libro de correct. Donati-  
starum n. 47. Alterum Donatum sectæ ducem facit Optatus lib. 111.  
adversus Parmen. cap. 3. Sed puto facilè hanc litem dirimi, neque  
Optatum adversari Augustino: nam S. Pater de hæresibus num. 69.  
tradit Donatum Numidam adversus Cæcilianum divisisse Christianam  
plebem, Donatum verò successorem Majorini hæresim eloquentia sua  
confirmasse. De his ergo Donatistis inquit ibidem Sanctus Pater:  
*Audent & rebaptizare Catholicos*: nec male illos appellavit Phila-  
strios *Montanistas*; quamvis de Philastrio attendi debeat ejusdem  
Augustini judicium in priori Epistola ad Quodvultdeum, nunc  
ccxxii. num. 2. Enimverò Donatiani dicuntur *Montenses* ab Optato  
lib. 2. cap. 4. & a Hieronymo in Chronico ad an. 36. & in fine Dia-  
logi adversus Luciferianos, nec non ab Augustino lib. de Unit. Ec-  
cles. cap. 3. & cp. 53. olim 165. num. 2. quibus in locis invenies etiam  
dictos *Campitas*, *Rupitanos*, *Cutzapitas*: quoniam exemplo anti-  
quioris. sectæ sub Felicissimo, in montibus, rupibusque coaduna-  
bantur. V. Ad hæc Catholicos ad se transcentes rebaptizarent Ariani:  
de quibus S. Pater h. 49. *Rebaptizari quoque ab Arianis Catho-  
licos novimus: utrum & non Catholicos, nescio*. Vide & Ambro-  
sium de Tradendis Basilicis, sive sermone contra Auxentium Aria-  
num, num. 37. De Eunomio insuper scribit Epiphanius h. 76. n. 6.

pag. 992. *Iterum baptizat Eunomius, non modo qui a Catholicis, aut aliis hæresibus, sed eos etiam, qui ab ipsismet Arianis desciunt.* VI. Rebaptizant denique Anabaptistæ, perditissimi hæretici, vates mendacissimi, hominumque propudia. Horum caput fuit Nicolaus Pelargus, qui anno 1521. fretus opera Caroloostadii, & Munckeri sectam primus instituit Witthembergæ. Tum eam excitavit Tiguri in Helvetia Georgius quidam a Conrado Grebe rebaptizatus. Illinc a Zuvinglianis expulsi Zollicæ quinto a Tigurina urbe lapide se receperunt. Post Tigurinum colloquium an. 1525. inde etiam edicto Senatus fuerunt ejecti. Anno 1530. regem creare Augustæ ausi sunt, Augustinum Vader, forcipibus propterea laceratum, plexumque capite: & tamen adeo pestis grassata est, ut circa hæc tempora in una Moravia septuaginta Anabaptistarum millia numerata fuerint. At de his plura in Historia Anabaptistica Arnoldus Meshovius.

PROP. II. A Catholicis rebaptizandos hæreticos nonnulli Veterum tradiderunt, inter quos secundo sæculo desinente Agrippianus Carthagenensis Episcopus, ejusque gentilitius Tertullianus.

Recte Epiphanius in libro, quem inscripsit *Brevem Catholicæ, Apostolicæ fidei Expositionem*, num. xlii. ait: *Etiam alii ex Catholicorum partibus, præter Ecclesiæ consuetudinem, ac citra generalis Concilii decretum ab hæreticis ad suas partes transeuntes iterum baptizant.* Hos inter commemorandum Agrippinum Carthagenensem Episcopum, satis constat. Cyprianus enim epist. 71. ad Quintum, ubi nititur ostendere baptismum hæreticorum irritum esse, inquit: *Quod quidem & Agrippinus bona memoria vir, cum ceteris Coepiscopis, qui eo tempore in provincia Africa, & Numidia Ecclesiam Domini gubernabant, statuit, & librato consilii communis examine firmavit.* Et Epist. 73. ad Iubajanum, *Apud nos autem non nova, aut repentina res est, ut baptizandos censeamus eos, qui ab hæreticis ad Ecclesiam veniunt, quando multi jam anni sint, & longa ætas, ex quo sub Agrippino bona memoria viro, convenientes in unum Episcopi plurimi hoc statuerint.* Augustinus lib. 2. de Baptismo cap. viii. num. 13. excusans Cyprianum ait: *Quam tamen consuetudinem, nisi prior ante Agrippinum, & nonnulli per Africam Coepiscopi ejus etiam per Concilii sententias deferere tentavissent, non auderet iste saltem ratiocinari adversus eam.* Similia lib. i. cap. 12. num. 17. & lib. iv. cap. 6. num. 8. Sanctus Vincentius Lirinensis in Commonitorio num. 9. pag. postremæ edit. Rom. 17. hæc habet: *Quondam igitur venerabilis memoria Agrippinus Carthagenensis Episcopus, primus omnium martalium contra divinum canonem, contra universalis Ecclesiæ regulam, contra sensum omnium confiderotum, contra morem & instituta majorum, rebaptizandum esse censibat,*

Eam-



Eandem fuisse mentem Tertulliani demonstrant quæ sequuntur : Libro de Baptismo cap. 15. ait : *Sed circa hæreticos sane quid custodiendum sit, digne quis retrahet : ad nos enim editum est : Hæretici autem nullum habent consortium nostræ disciplinæ, quos extraneos atque testatur ipsa ademptio communicationis.* Recentiores post Dupinium in Geographia sacra Africæ, quæ præmittitur Op. Optati pag. xxx., contendunt Tertullianum his verbis, *Ad nos enim editum est*, respexisse ad Concilium Agrippini, quod proinde coactum putant ante annum 200. non 215. cui illud affixit Harduinus. At obscurissima sunt verba illa Tertulliani, ut notavit Pamelius, ac forte hunc sensum reddunt, *Sicuti vera fides, ita verus baptismus nobis commissus est, non hæreticis* : hæc quippe interpretatio nostra periodo illi, ac sententiæ cohæret ; nec exposuit alia ratione Carolus Moreau, scribens, *Ad nos editum, nobis traditum.* Itaque Joannes Salinas, vir aliqui doctus, haud invicte in notis ad S. Vincentii Commonit. Harduinum refellit. Ante annum Christi 215. aut secundum Baronium 217. edictis Imperatorum, Christianorum conventus fuerant prohibiti : unde hoc tantum anno ab Africanis actum de rebaptizandis hæreticis tenent cum Harduino Baronius ad annum 217. num. 2. Vossius disp. 19. de Baptismo, & Pagius ad an. 215. ex quorum sententia infertur non a Tertulliano commemoratum Agrippini decretum, sed potius a Tertulliano Agrippinum in errorem inductum : quod Baronius animadvertit proximo num. 5. Ut ad Tertullianum revertatur oratio ; tradidit eundem errorem de Pudicitia cap. 19. scribens : *Apud nos ut Ethnicus par, immo & super Ethnicum hæreticus, etiam per baptismum veritatis utroque homine purgatus admittitur.* Ubi nostrum appellat baptismum veritatis, quod ejus sententiâ apud hæreticos falsum sit. Etiam de Præscript. cap. 12. *Nemo* (inquit) *ab eo illuminatur, a quo contenebratur* : quo in loco illuminationem dici baptismum quidam docti arbitrantur ; cum tamen Tertulliani verba, ut alia permulta, subobscura sint, & commode queant accipi pro doctrina. Baptismum quidem illuminationem appellari, manifestum est ex libri hujus initio.

Ex his constat Eusebium, ubi libro vii. H. Eccl. cap. 3. ait : *ὁ πρῶτος τῶν τῶν κυρίων τῶν κατὰ καρχιδόντα παριστάς πρῶτος, ἐν ἄλλῃ ἢ διὰ τοῦ ἀρίστου τῆς πλάνης ἀποκαθαρτικῆς προσέδωκεν δὴν ἡγεῖται, Primus omnium Cyprianus, qui tum temporis Carthaginensem regebat Ecclesiam, non nisi per baptismum ab errore prius emundatos, admittendos esse censuit, & Nicephorum idem scribentem lib. vi. cap. 7. non ita esse accipiendos, quasi Cyprianus primus hujus sententiæ auctor fuerit, cum ipse Agrippinum & Ecclesiæ suæ traditionem laudaverit ; sed quod Cypriani præsertim auctoritate, & occasione dissidii cum Stephano exorti, tum primum Rebaptizantium opinio evaserit cele-*

berrima, Afrorumque præsertim Ecclesias turbaverit. Addo adverbium *ubi* in textu Eusebii conjungendum cum articulo præcedenti, ita, ut sensus sit, *Cyprianus primus inter homines ejus ætatis*, ut vertit Christophorus pag. edit. Colon. 155. non ut supra recitavimus ex Valesio: unde nonnulli, inter quos Joannes Cestriensis in Annalib. Cyprianicis ad an. 256. num. 6. demonstrant apertissime falli Valesium, & Joannem Gerardum Vossium, qui putant Eusebium fuisse deceptum; quem in scopulum impegisse video & Juenum q. vi. de Baptism. cap. 2. art. 3. Facile errant, qui emendandos putant antiquiores, summosque viros.

PROP. III. Rebaptizandos hæreticos tertio labente sæculo propugnarunt Firmilianus Cæsareæ in Cappadocia Episcopus, & Cyprianus Episcopus Carthaginensis: quorum de hoc argumento Epistolas tanquam genuinas recipimus.

Hanc propositionem nos, ut credimus, omnium primis inferimus Theologicis Dissertationibus, adacti tamen necessitate; siquidem Raymundus Missorius inclyti Ordinis Min. Conv. ut diximus lib. xx: i. cap. 5. expolito & eleganti Opere ab errore Rebaptizantium cum Firmiliano S. Martyrem Cyprianum studuit acerrime vindicare. Hujus quidem universa argumenta discutere instituti nostri ratio non sinit, neque refutandi peracutum Scriptorem gloriam iis eripiemus, qui hanc provinciam subiere: quos inter sunt aliqui, ut fert rumor, quorum elucubrationes jam sub prælo sudant. Interim ergo, dum expectamus aliorum judicium, nostrum citato libro xxiii. elapso jam anno prolatum, confirmabimus; frustra enim proxima asserta subjicerentur, si Firmiliani & Cypriani de Rebaptizandis Epistolæ spurix essent, neque hi duo doctrina, ac sanctitate percelebres revera stetitissent adversus Stephanum. Aliter ergo rem se habere, ac Missorius contendit, de Firmiliano primum asserimus his momentis subnixi. I. Firmiliani Epistola inter Cyprianicas lxxv. rebaptizantium continere errorem, & adversus Stephani sententiam esse conscriptam, nemo in dubium revocat. Atqui eam Epistolam genuinum solum esse Firmiliani evidentissimum est. Igitur Firmilianus adversus Stephanum adhæsit Rebaptizantium errori. Prob. mi. Quamquam hæc Epistola in editione Manutii sit prætermissa; atque hinc oriri posset aliqua suspicio suppositionis: nihilo tamen minus in auras suspicio hæc evanescit, si animadvertatur reperiri in vetustissimis codicibus, quos vidit Pamelius, in Anglicano, Assiginenfi, Blandino, Marchiano, Dumensi, & Cauchiano. In his autem codicibus haberi testatur Nicolaus Rigaltius pag. prioris editionis sue Op. Cypriani 144. Addit ipse Rigaltius extare hanc Epistolam in Regio Codice sub num. cccv. Joannes quoque Oxoniensis in editione sua Bremæ pag. 217. testatur a se repertam in septem antiquissimis Mss.

Mss. quorum ipsi copia facta est: cum decem aliis contulit Editor Benedictinus. Habetur etiam in Ms. Angelicæ Bibliothecæ, quem ex vetustiori, sedente Nicolao V., exaravit Hieronymus Pistorienfis. Cur autem hæc Epistola desideretur in editione Manutiana, culpam in se transfert Latinus Latinus scribens pag. 177. Bibl. Sacræ: *Ego Latinus omisi, non Manutius; cum majorum exempla secutus, tum hominis petulantiam detestatus*. Hinc merito typis cusam habes a. Pamelio, insertamque editionibus Morelli, Rigaltii, Joannis Oxoniensis, Baluzii, ac PP. S. Mauri. Abjudicare ergo hanc Epistolam Firmiliano, est detrachere vetustissimorum codicum, qui hac in re sunt *proa & pappis*, auctoritati. II. Percipere nequit Misforius quomodo hæc Epistola Romanum Pontificem aceto perfundens, & inhumanitatis redarguens prodierit a Firmiliano præclaro Antistite, ac sanctitate conspicuo. Absit, ut nos derogemus meritis Firmiliani. Haud ignoramus quam honeste de tali viro loquantur apud Eusebium PP. 2. Concilii Antiocheni, & Hieronymus de Scriptoribus Ecclesiasticis: scimus quoque Firmiliani nomen inscriptum die 26. Octobris Menologiis Græcorum. At non id sat est ad amandandam hanc Epistolam inter spurias. Videbatur quippe Firmillano, nondum veritate eliquata, rebaptizantium opinio innixa traditioni, certa, aut saltem probabilior, præsertim quod accepisset propugnari a Cypriano tanti nominis viro; atque ægre proinde ferebat, injuste (ut falso opinabatur) sibi velle Romanum Pontificem indicere anathematis pœnam. Nec unum occurrit exemplum, in quo eximios viros ad contentiosas epistolas conscribendas, librosque avariore stylo exarandos, imaginariæ veritatis impulit studium. Omitto quæ Theophilus Alexandrinus, & Epiphanius Cypri Episcopus adversus virum incomparabilem Joannem Chrysostomum attentarunt: quæ adversus Cyrillum edidit Theodoretus: quæ ad Augustinum, conscripsit Hieronymus: quæ in trium Capitulorum Oppugnatores Facundus Hermianensis: quæ in prædicatores Gratia Vincentius Lirinensis, aliaque id genus sexcenta, ex quibus deprehendimus magnorum virorum aut in aliis reprehendendis libertatem, aut acrimoniam in sugillandis. Sat enim est, si ad mentem revocemus Asianorum Patrum, præsertim Polycratis Ephesini, necnon Præsulum Gallia, ac in primis S. Irenæi, acerrima cum Victore Papa de die Paschatis celebrandi dissidia: videtur quippe causa causæ consimilis; nam Victor Quartadecimanis, Stephanus Rebaptizantibus excommunicationem comminatus est, ac tam Rebaptizantes, quam celebrantes Pascha luna Martii xiv. putabant se pro antiquo more, & Ecclesiarum suarum disciplina certare. Si autem una alteri causæ est præferenda, profecto Tessera decitarum majori contentione, animisque pervicacioribus fuit agitata. Quod ergo afferri potest in tot

Episcoporum excusationem, id plurimum valet ad excusandum Firmilianum: & si contendas nulla ratione posse excusari, malo credere culpam pœnitentiâ expiâsse, quàm detrahere nominis ejus celebritati. III. Firmilianum fuisse inter Rebaptizantes, atque ea de causa voluisse Stephanum in illum pœna excommunicationis animadvertere, testatur Dionysius Alexandrinus aq. Eusebium lib. VII. Hist. Eccl. cap. 5. pag. edit. Valesii 252. Dionysii hæc de Stephano verba sunt: ἐπέσταν μὲν δύο πρεσβυτεροὶ καὶ περὶ ἑλίου, καὶ περὶ φερμιλιανῶ, καὶ πάντων τῶν ἐκ τῆς Καλικίας, καὶ Καππαδοκίας, καὶ Γαλατίας, καὶ πάντων τῶν ἐξ ἡμετέρας ἐκκλησιῶν, οἳ οὐδὲ ἐκείνους κατατίθεντες διὰ τὴν αὐτῶν ταύτων αἰτίαν ἐπεὶ τὴν αἰματίνον (σφαίρην) ἀναβαπτίζουσι: *Antea quidem literas scripserat de Heleno, & Firmiliano, de omnibus denique Sacerdotibus per Ciliciam, Cappadociam, Galatiam, cunctisque finitimis provincias constitutis, se ob eam causam ob eorum communionem discessurum, quod hæreticos rebaptizarent.* En aperte Dionysius, & ex illo Eusebius, quorum silentium objectat vindex Firmiliani, tradunt huic Rebaptizantium maculam infedis; nec scribunt tantum a Stephano nominatum cum Heleno Firmilianum, quod præter ceteros fuerint Antistites maximi nominis; sed insuper manifeste, nullaque sermonis ambiguitate dicunt voluisse Stephanum in illos intorquere anathema, quod Rebaptizantibus adhærerent. Atque de hoc maxime conqueritur cum Cypriano in sua Epistola Cæsareensis Episcopus. IV. Cuiusnam de mente Firmiliani assensum potius præbeamus, quam magno Basilio ejusdem urbis Episcopo, ac tanta literarum gloria percelebris? Is quidem Epistola 1. Canonica ad Amphiloichium Tom. 2. pag. edit. Moræll. 759. postquam scripserat rebaptizandos omnium sententiâ Montanistas, qui tangebant in Patrem, Filium, Montanum, atque Priscillam, ait videri sibi rebaptizandos omnes promiscue hæreticos, ut visum olim Cypriano, ac prædecessori suo Firmiliano: *Verum enim vero (inquit) antiquis visum est, Cypriano dico, & nostro Firmiliano, eos omnes uni calculo subijcere, καὶ ἀλλ' ἰδεῖν τοὺς ἀρχαίους, τοὺς περὶ Κυπριανὸν λόγον, καὶ φερμιλιανὸν τὸν ἡμέτερον, ταύτους πάντας μὲν ψήφῳ ὑπεβαλέον.* V. Cum ex tam illustri testimonio, accedente etiam prælaudata Epistola Dionysii, constet Firmilianum, Cyprianumque in dogmate rebaptizantium conspirasse, nec ulla sponsia attributus sanctissimis vris error abstergitur; nec inverisimile est Cyprianum per literas Cæsareensem Episcopum consuluisse: nec qui probe noverit, quam vehementi stylo pugnarunt veteres pro Ecclesiarum suarum disciplina, mirabitur Firmilianum adversus decreta Stephani excanduisse: nec demum ob frivolas conjecturas, quantumvis pompa verborum & rhetorico pigmento illitas, vetustissimorum codicum, quos tinea, blattisque excussis pervolutarunt viri laborum patientissimi, despiciet fidem, ac deludet auctoritatem.

Opponit vir eruditissimus: Firmilianus in Epistola ei supposita non tantum in virum sanctissimum, innoxium, nemini secundum, omnibusque probatum, idest, in Stephanum Romanum Pontificem evomuit horrenda probra, & convicia; verum etiam controversiarum infallibilem Judicem, & universalem Ecclesiæ Pastorem asperime pertractavit. Ne ergo id asseramus de viro sanctitate clarissimo, epistola, quæ illi morum probitatem & fidem adimit, est inter spurias rejicienda. II. Hujus suppositionis invictum est argumentum, profundum silentium Eusebii, Dionysii Alexandrini, Augustini, ipsorumque Donatistarum, qui cum in Carthaginensi Collatione omnem verterent lapidem ut statuerent *Rebaptismum*, minime tamen Firmiliani testimonium in ea disceptatione protulerunt. III. Neque hujus Epistolæ mentionem aliquam factam esse in Concilio III. Carthaginensi constat ex ejus Actis editis ab Erasmo, & nunc insertis Editioni Cyprianicæ. Cur autem lectæ in eo Concilio fuerunt literæ Jubajani, qui Afrorum sententiæ aut numquam, aut sero, aut frigide adhæsit & non potius perlectæ literæ Firmiliani, qui ad Xysti usque tempora in ea opinione persistisset? IV. Totius Rebaptizantium historiæ non injuria architectus videtur signifer Arianae factionis Eusebius Cæsariensis, qui occasione hæresis Cataphrygum & Paulianistarum omnia permiscuit, universa de Orientalium Afrorumque anabaptismo historia conficta. Neminem quippe latet quomodo Arianos inter ac Donatistas intercesserit necessitudo, & vinculum communionis, ut in Epistola ad Bonifacium 185. & in Colloquio habito cum Fortunio Donatista Epist. 45. tradidit Augustinus. V. Constat Historia Eusebiana plurimum Orientalibus probata in errorem inductum S. Basilium; nam is de baptismo hæreticorum multa narrat minus idonea: & invicem pugnancia: scribit a Dionysio Alexandrino Paulianistarum, & Cataphrygum baptisma fuisse receptum, ac fuisse illum apud Romanam sedem veluti Heleni, & Firmiliani sequestrum, quod aperte exscripsit ex Eusebio lib. v. 11. cap. 5. Quare perperam testimonium Basilii adversus Firmilianum paullo supra productum est.

His ad hunc modum respondemus. Primo Firmilianus existimabat se pro causæ æquitate pugnare, præsertim acceptis per Rogatianum literis Cypriani, ex quibus etiam Afrorum Episcoporum agnoverat confessionem: unde in priori sententia confirmatus, per motus etiam minis excommunicationis, quam sibi immerito intentari putabat, indignatione accensus convicia jactavit in Stephanum; nec fidem pessumdedit, si judicio Romani Pontificis ausus est refragari, siquidem servans Ecclesiarum unitatem sibi decertandum esse putabat pro consuetudine ac disciplina, quam perantiquam arbitrabatur, hac in re antiquiorum complurium, præsertim Asiaticorum antistitem, exempla secutus. Respondeo ad secundum, Euse-

bium,

bium, Dionysium, necnon Basilium Magnum asserere Firmiliani *Rebaptismum*, ac duos priores innuere etiam Stephani in Firmilianum, Helenum, aliosque Rebaptizantes indignationem; unde satis apparet sententia Firmiliani, atque causa & occasio conscriptæ ad Cyprianum epistolæ. Ex Augustini autem & Donatistarum silentio nil jure inferas. Certo siquidem Augustini ætate vulgata erat Historia Eusebii, qui obiit anno 338. terebantur manibus Opera Basilii, qui decesserat ineunte anno 379. Potcrant ergo disceptantes de *Rebaptismo* Helenum, Firmilianum, ipsum Basilium laudare. Id non fecerunt, quoniam cum Orientales communicarent cum Africanis, ipsi autem Donatistæ separationem suam pugnacissime tutarentur, dicebant ipsos Orientales suam de Rebaptizandis hæreticis sententiam retractasse, & ideo non cum Donatistis, sed cum Catholicis unitos esse. Quare Augustinus lib. 1v. contra Cresconium cap. 17. num. 20. scribit: *Nam quod dicis Orientales ideo vestrorum communione discretos, quia postea nobis consentiendo judicium suum quod habuerunt de baptismo rescindere maluerunt; si hoc ab aliquibus paucis Orientalibus factum est (quod quidem interest utrum possit ostendi) profecto suum judicium correxerunt.* Quo in loco Augustinus dubitat, an Orientales, qui tamen cum Catholicis communicabant, deposuerint suam de *Rebaptismo* sententiam, & ex eorum communione exagitat, oppugnatque schisma Donati; atque ex retractione sententiæ, quam Donatistæ obtrudebant, horum confodit *anabaptismum*. Nec moror quod prolixè & ornate profequitur Misforius, non extare literarum Firmiliani Græcum exemplar, nec illas latina toga induisse Cyprianum, cujus summa caritas nequaquam petulantiam Orientalis Episcopi prodidisset: hæc enim neminem cordatum poterunt permovere; quin ex deperdito Græco exemplari, persuasum mihi est, literas Firmiliani non esse Donatistarum vafritie confictas, quippe Græcè, non Latine tantum eas fabricassent. Cyprianus vero patrociniū sententiæ suæ in literis Firmiliani duntaxat contuebatur, non acerbitate verborum, vehementi proinde flagrans caritate, dum cōpiscopi confessionem quærebat, expressamque literis, licet duris & concitatis, evulgabat; atque, ut opinor, anathematis, quod minabatur Stephanus, a se, suisque fulmen avertere nitebatur. Ex his autem argumentis ex veterum silentio, conjecturisque petitis, ista potius videntur esse inferenda: Eusebius quidem, quem Misforius putat historiæ Rebaptizantium confarcinatorem mendacissimum, non confinxit literas Firmiliani. Donatistæ usque ad tempora Augustini earundem non meminerunt, nec ipsi illarum dicendi sunt auctores. Nullus Donatista posterior eandem literas, quæ tandiu delituerunt, in vulgus sparfit, nec solent eximii impostores quæ ad alios decipiendos excogitant, in tenebris sepelire. Novatores, qui  
istiuf-

istiusmodi literis abutuntur adversus Romani Pontificis auctoritatem, eas non peperisse codices supra viginti ipsis Novatoribus antiquiores commonstrant. Quem ergo suppositarum literarum autorem, quam figmenti hujus causam, quem finem, quam ætatem, quodnam commodum profert eloquentissimus adversarius? Sed ad reliqua progrediamur. Tertium Carthaginense Concilium in altera dissertatione, pro Cypriano confectum pariter, & repugnans Epochæ Stephani, contendit vir doctus: in eo igitur potuisset posterus Fabricator, Firmilianicæ epistolæ mentionem facere. At Concilium pariter genuinum est, rectæ Chronologiæ non repugnat, nec in illo commemorari potuerunt literæ Firmiliani. Nos Stephanum in summum Pontificem electum asserimus anno 254. Valeriani I. quo anno die 3. Martii obiit Lucius, seditque Stephanus usque ad annum 257. & 1v. nonas Augusti Valeriano IV. & Gallieno III. Coss. in propria sede capite truncatus est. Quod perspicuum erit legentibus dissertat. 2. Schelestratii cap. 7. Vol. 1. Antiq. Eccl. ac Notas Blanchini, aliorumque Tom. 2. Anastasii pag. 216. Epocham vero Epistolarum Cypriani, & Conciliorum Carthaginensium in causa Rebaptizantium, hanc statuit Auctor Vitæ Cypriani, Monachus Sancti Mauri accuratius, quam præstiterint Pearsonius, Tillemontius, & alii. Non improbat ille exortam in Africa controversiam de *Rebaptismo* initio anni 255. Potes illam deducere etiam ab anno superiori, immo & a 253. nam prius inter se Afri decertarunt, quàm cum Stephano. Episcopi Numidæ scribes ad Cyprianum, huic occasionem præbuerent sententiam dicendi suam: nam Epistola Cypriani, & aliorum xxx. Episcoporum laudat ipsos Numidas. Hæc Epistola nunc inter Cyprianicas lxx. est Synodica primi Carthaginensis congressus habiti anno 255. aut forte præcedenti. Paulo post Concilium hoc primum scripsit Cyprianus ad Quintum, a quo per Lucianum consultus fuerat quid in Synodo cum ceteris coepiscopis decrevisset: atque hæc est Epistola Cyprianica lxxi. Celebrata deinde anno 255. paullo post primam (si habitam contendas hoc anno) secunda Synodus Carthaginensis Episcoporum lxxi. atque Cyprianus cum aliis lxx. scripserunt ad Stephanum Epistolam inter Cyprianicas lxxi., in qua proinde fit mentio Epistolæ lxxi. ad Quintum, & Synodicæ lxx. ad Numidas. Subsecuta est secundum Concilium Epistola Cypriani ad Jubajanum; nam in ea fit mentio ejusdem Synodi, ad quam Episcopi lxxi. convenerant: recte igitur hæc Epistola locata est inter Cyprianicas num. lxxi. Pervenerunt interea temporis in Africam literæ Stephani, quarum cupidus Pompejus Sabratenfis scripsit ad Cyprianum, hic autem Pompejo morem gerens rescripsit Epistolam lxxiv. in qua & Stephanum studuit refellere. At Cyprianus videns adversari sibi Romanum Pontificem scripsit etiam, misitque Rogantium

tianum ad Firmilianum Episcopum Cæsareæ, coegitque Concilium Tertium ex Episcopis LXXXV. Africæ, Numidiæ, & Mauritanie. Celebratum est calendis Septembris anno 256. superstite adhuc Stephano: qui anno proximo, ut diximus, martyr occubuit. Pervenit eodem anno, Synodo jam soluta, ad Cyprianum Epistola Firmiliani, n. LXXV. inter Cyprianicas recensita: atque in hac Epistola Cæsareensis auditis iis, quæ rescripserat Stephanus, & fortassis legati amplificaverant, in eundem Stephanum acuit stylum. Firmiliani vero Epistolam conscriptam anno 256. jamdudum docti viri observarunt ex Epocha Alexandri Severi, a cujus obitu præteriisse ibidem dicuntur anni fere XXII. Occisus est autem Alexander die 15. aut 18. Martii anno 235. Scriptam post Concilium III. a Cypriano Epistolam ad Magnum censent eruditi recentiores, unde positam legimus num. LXXVI. at alii contendunt hanc esse priorem in hac materia, quod nullius Concilii, aut aliarum literarum occurrat in ea vestigium: quare nihil nostra interest hujus Epistolæ Epocham investigare; de qua Pearsonius in Annalibus Cyprianicis, & Pagius ad annum 255. num. X. Apparet ex dictis, cur literarum Firmiliani nulla fiat mentio in tertia Synodo Chartaginensi, & quomodo hæc non pugnet cum Epocha Stephani, ut perperam nititur demonstrare Missorius. Ad quartum hanc tene responsionem. Quidquid sit de fide Eusebii, de qua disserui alio in loco, nequit dici sine injuria maxima, & aperta falsitate commentor historiæ Rebaptizantium. Quamquam enim Donatistæ captarent Arianorum consuetudinem; Eusebius tamen *Rebaptismum* improbat eodem libro VI. cap. 2. 3. 7. & 9. scribens Stephanum, pro antiqua traditione stetisse, ac Dionysium cælesti quoque voce admonitum, opus non esse recipiendis hæreticis iterato baptismo. Neque dicas Eusebium reprobasse Rebaptisma, ægre ferendo tinctos iterum a Catholicis Paulianistas: quantum enim hos adversaretur, apparet ex eodem lib. VI. H. E. cap. 27. immo nec ulla affinitas est Arianos inter, ac Samosatenses, sed ex Sirmienfi Synodo laudata. Tom. 2. pag. 16. hos inter, & illos eruitur pugna & contentio. Eusebius ergo, sive Arianum dicas, sive Orthodoxum, neque in gratiam Rebaptizantium, neque in gratiam Paulianistarum mentitus est. Quanta insuper aversione Eusebius prosequatur schisma Novati, cujus Donatianum est surculus, constat ex libro VI. cap. 43. & lib. VI. cap. 8. Postremum diluam hoc pacto. Sit Eusebii Historia, fueritque apud omnes magno in pretio, quod me quidem judice promeretur; nego ejus lectione deceptum Basilium, qui sane non opus habebat res gestas prædecessorum suorum e scriptis exterorum delibare. Falsus est insuper quisquis ait Basilium scripsisse in 1. Can. probatum Dionysio baptisma Paulianistarum. Ait Basilius duntaxat pag. 757. τὸ δὲ πρῶτον οὐκ ἔστιν ἡμῶν λόγος ἔχειν δοκῆ. ἢ ἐκείνους τοὺς κατηγόρους



ἵστα τὴν μίαν Διόνησι παρὰ Διόν. *Pepuzenorum autem* (baptismus) *nul-*  
*lam mihi rationem habere videtur: & miratus sum, quomodo hoc ma-*  
*gnum Dionysium, qui fuit Canonicus, praterierit.* Dionysius ergo  
Pepuzenorum, sive Cataphrygum (quorum non una erat secta, ut  
dicam Prop. 1x.) baptisma probavit, non Paulianistarum; quam-  
vis Basilii, qui adhæsit Rebaptizantibus, nitatur eo loci contra  
Dionysium ostendere idem de omnibus hæreticis, Catharis, Monta-  
nistis, aliisque asserendum. Narrat præterea Eusebius Dionysium,  
Alexandrinum, neenon Dionysium & Philemonem presbyteros apud  
Romanam Sedem egisse, ne Helenus & Firmilianus anathemate mul-  
tarentur, sed hæc in Epistola Basiliana nequaquam leguntur; ideo-  
que non uno commento utitur Misforius, ut probet Basilium deco-  
ptum ab Eusebio: quamquam si eadem a Scriptore narrarentur utro-  
que, esset id veritatis fulcimentum, non argumentum erroris. At  
de Firmiliano quod instituti nostri, erat, persolvimus: modò ad  
Cyprianum convertimur.

Cyprianum itaque accensent Rebaptizantibus quotquot ad hæc  
usque tempora floruerunt, immo nec Misforii sententiam secuti sunt  
qui adversus Bossuetum postremo tempore Romanorum Pontificum  
propugnaverunt auctoritatem, quamquam illud, si haberet proba-  
bilitatis speciem aliquam, ad conterendas oppositiones è Cyprianicis  
testimoniis depromptas videretur aptissimum. Nec tantùm secuti non  
sunt, ejus tanquam ineptæ fabellæ nec meminerunt cum Joseph-Au-  
gustinus Orsi, tum Joseph-Maria Platina, viri ambo literatissimi, &  
alter quidem ejusdem cum Misforio instituti. Perpaucos nos laudatu-  
ri, primas deferemus Eusebio, quem non esse fabulæ architectum di-  
ximus paullo supra. Scimus ad Eusebii elevandam auctoritatem re-  
poni, Cyprianum non fuisse Rebaptizantium *omnium primum*, ut in-  
quit Eusebius in editione Valesii, nec etiam *primum ejus ætatis*, ut me-  
lius legerunt Christophoronus & Pearsonius: sed animadvertimus dici  
*primum* ab Eusebio Cyprianum, quod tunc temporis ejus opera, au-  
ctoritate, ac Synodorum celebratione sententia Rebaptizantium eva-  
ferit celebrior, & cornua crexerit. Christophoroni quoque versio-  
nem ita probavimus, ut *ἄνευ τῆς* *πρῆς*, non sit nobis *primus ætatis*,  
sed merito, atque doctrina. Addimus modò, Eusebium commemo-  
rare subinde epistolas Dionysii, & Synodos ab Orientalibus in causa  
Rebaptizantium celebratas; unde liquet compertum Eusebio, alios  
ante Cyprianum pugnavisse pro *Rebaptismo*. II. Sequitur Magnus Basi-  
lius, quem historia Eusebii non esse deceptum, (præterquamquod  
nec ipsum Eusebium lapsum, falsumque contendimus,) eximii Docto-  
ris nomen præclarissimum, exquisita eruditio, præmissaque contra-  
riæ suspitionis confutatio probo cuique viro suadebunt. III. Accedit  
Hieronymus, qui adversus Luciferianos Tom. IV. pag. 303. inquit:

*Conatus est beatus Cyprianus contritos lacus fugere, nec bibere de aqua aliena: & idcirco hæreticorum baptisma reprobandum ad Stephanum tunc Romanæ urbis Episcopum, qui a beato Petro vicesimus sextus fuit, super banc rem Africanam Synodam direxit, sed conatus ejus frustra sunt.* Laudat Hieronymus paullo infra Cypriani ad Jubajanum epistolam, innuitque etiam literas ad Pompejum, dum ait suis in Epistolis lacerare Stephanum Romanæ urbis Episcopum. Atque hæc nemo dixerit ex Eusebio Hieronymum exscripsisse, quum nullam ille mentionem faciat Africanæ Synodi, neque Cyprianicæ ad Pompejum epistolæ, neque alterius ad Jubajanum. IV. Plurima ex Augustino proferri possunt: nam Cypriani literas laudat lib. 1. de Baptismo. cap. xvi. n. 28. Epistolam ad Quintum expendit lib. 11. cap. 1. num. 2. De literis ad Jubajanum agit eodem libro cap. 11. num. 4. & lib. 111. cap. 11. num. 4. cap. 1v. num. 6. cap. xi. num. 16. Epistolam ad Pompejum refellit lib. v. cap. xxiii. num. 31. Vellicat simul literas ad Jubajanum, ad Quintum, & ad Pompejum lib. vi. cap. vi. num. 10. Addit ibidem epistolam, quam Cyprianus scripsit ad Magnum, necnon alteram ad quosdam Collegas, idest, ad Numidas; nec silentio præterit eodem libro cap. xv. num. 25. epistolam, quæ periit, ad Stephanum. Mitto loca alia quamplurima. VII. Contendit vir doctus Augustinum facti quæstionem refugere, ejusque adversus Donatistas disceptationem esse hypotheticam, quoniam scilicet facta hypothesi Cyprianum revera illas Epistolas conscripsisse, illarum auctoritate perspicue & valide refutabantur. Donatistæ, propterea, quod in Epistolis Cyprianicis unitas Ecclesiæ apertissime commendatur. Superstruit autem systema istud hypotheticum dubitationi, quam alicubi præfert Augustinus, num revera Cyprianus rebaptizandos hæreticos scripserit, & docuerit. Extant quidem aperta hujus hæsitationis vestigia lib. 1. contra Cresconium. cap. xxxi. num. 38. lib. 11. cap. xxxi. num. 39. & in Epistola ad Vincentium Rogatistam xc. 11. num. 38. atque ad Macrobius cv. 11. num. 9. Verum hæc dubitatio ad systema illud hypotheticum stabilendum nequaquam sufficit. Dubitat siquidem Augustinus, imo potius ait alios dubitare, tum spectata Donatistarum præsumptione, & mentiendi libidine, tum quod nequeat integritas, atque notitia unius quamlibet illustis Episcopi custodiri, quemadmodum custoditur Scriptura canonica; sed apud ipsum Augustinum tenuissimam esse dubitationem istam argumentationes plures evincunt. Ac prima sit, quod locis numero præcedenti citatis, expendens epistolas Cyprianicas, non ait, *In literis Cypriano attributis, sive affectis, sed, Extant beati Cypriani in ejus literis magna documenta: His verbis beati Cypriani: Hoc enim ipse etiam Cyprianus cum ceteris statuit: Ad Pompejum etiam scribit Cyprianus: Epistolam, quam Jubajano scripsit, illam quam ad Quintum dedit, illam, quam cum quibusdam*

*dam collegis ad quosdam collegas, illam, quam ad Pompejum; & alia his consimilia, in quibus aperte Augustinus agnoscit Cyprianum eardem epistolarum auctorem. Deinde ubi S. Pater excusat Cypriani errorem, non scribit de hoc immerito S. Martyrem infimulari; sed modo inquit, Dominum ei veritatem non aperuisse, ut ejus pia humilitas & caritas in custodienda salubriter Ecclesia pace pateretur; ita lib. 1. de Bapt. cap. 18. modo non ausum fuisse ipsum Cyprianum ratiocinari adversus universalem consuetudinem, nisi prior ante Agrippinum, & nonnulli per Africam Coepiscopi ejus etiam per Concilii sententias deferere tentavissent; ita lib. 2. de Bapt. cap. 8. modo apparere in Epistolis Cypriani simplicitatem potius, quam duplicitem, dum ait admissos sine baptismo in unitatem corporis Christi de divina misericordia mereri indulgentiam, & ab Ecclesia muneribus non separari; ita libro 2. contra Cresconium cap. 33. modo ejus merita usque ad triumphum martyrii consecuta, ut & caritatis, qua exellebat, luce illa obumbratio fugaretur; ita in libro de unico Baptismo contra Petilianum cap. 13. Quorsum vero hæc, aliaque multa ad elevandum, & excusandum errorem, quem idem Augustinus confictum, nullumque crederet? Præterea Augustinus, dum ait de Cypriano, Si scripta ejus esse constat, aut phrasi consimili hypothetice loquitur; ad quorundam potius, quam ad sui ipsius attendit dubitationem: inquit enim ad Vincentium scribens, Quamquam non desint, qui hoc Cyprianum prorsus non sensisse contendant; & ad Macrobiū, Illud Concilium, vel illa scripta, si vere ipsius sunt, & non sicut aliqui putant sub ejus nomine conscripta atque conficta: sed postmodum sententiam promens suam, ita sanctus Pater loquitur priori loco, Nos tamen non negamus illud sensisse Cyprianum; & de Epistola ad Stephanum lib. vi. de Baptif. cap. xv. num. 25. Nam & ipsam in isto casu sacerdotum lectam esse dixit: quod factum omnino non dubito. V. Idem Augustinus citata ad Vincentium epistola n. 39. duo profert argumenta, ob quæ ipse haud negat Cyprianum adhæsisse Rebaptizantibus: ac primum est, Quod stilus ejus habet quamdam propriam faciem, qua possit agnosci. Retinet enim cum puritate orationis genium Africanum, ornatus simul est, placidus, ac ratiocinio potens, & est quasi Tertullianici moderamen & expolitio. Interdum quidem variat Scriptorum oratio, nec semper graditur eodem incessu: sed tandem uniuscujusque se prodit indoles & ingenium. Ad hæc ut faciem faciei perraro aliquam, sed singulari & insigni, propriique delineamenti affectu prorsus nullam invenimus simillimam; ita stilum stilo nonnunquam reperiemus consimilem: sed talem, qui a peculiari, suisque lineis, notis, figurisque distincto minime seceratur, inventum iri non arbitror. Atque ita a Livio Sallustium, Tullium a Cæsare, Terentium a Plauto, Ovidium ab Horatio, quasi*

ex forma vultus, Grammatici e stili proprietate plurimum differre cognoscunt. Habent faciem pariter singularem inter Afros Tertullianus, Cyprianus, Optatus, eamque statim discernunt ipsorum lectioni paululum assueti. Hinc ob stili dissimilitudinem abjudicamus Cypriano Epistolam Celsi ad Vigilium de singularitate Clericorum: ac de libro *de Spectaculis*, qui tamen ad stilum S. Martyris propius accedit, scite scribit in ejus vita Monachus Benedictinus num. xxxv. *Inst dissimilitudo, quam aures legendo Cypriano assuetæ & contrita facile percipient.* Hanc profecto dissimilitudinem non offendes in epistolis *de Rebaptismo*: quæ, etsi multæ sint, habent nihilominus singulæ propriam illam faciem, in quam Augustinus conjiciens oculos ait: *Nos tamen duas ob res non negamus illud sensisse Cyprianum: quod & stilus ejus habet quamdam propriam faciem, qua possit agnosci: & quod (en Augustini Donatistam alloquentis alterum argumentum) & quod ibi magis contra vos nostra causa monstratur invictior, vestraque separationis præsumptio, videlicet ne macularemini peccatis alienis, tota facilitate subvertitur, cum apparet in literis Cypriani communicata esse cum peccatoribus sacramenta, cum admissi sunt in Ecclesiam qui secundum vestram, & sicut vultis, illius sententiam baptismum non habebant.* Hinc ita ratiocinamur: Primo in literis Cyprianicis nullum anathema dictum est in approbantes baptismum ab hæreticis datum, immo significatum expresse servandum esse cum illis inviolatum vinculum communionis. Sat est unum illud Cypriani testimonium, *Neminem judicantes, aut a jure communionis aliquem, si diversum senserit, amoventes*: de quo Augustinus lib. 2. de Baptismo cap. 6. aliisque in locis. At Donatistæ se a non rebaptizantibus segregabant, illosque adversabantur tanquam nefaria contaminatione pollutos. Ergo Donatistæ Cyprianicas Epistolas minime fabricarunt. Nullus deinde, quantumvis Minervæ pinguis, & ignarus, reprobatur hæresis, errorisque sui motivum præcipuum. Atqui causa princeps hæresis, & schismatis Donatiani fuit segregatio a Catholicis, tanquam a peccatoribus & immundis. Igitur nullus Donatista, tametsi ignarus & imprudens, comendare potuit assertam in Epistolis Cyprianicis communionem. Rursus Donatista, quem fingis Epistolarum earundem artificem, aut vaser erat & callidus, aut imprudens ac stolidus: si primum affirmas, quomodo callidus Donatista probare potuit unitatem Ecclesiarum? si sentis alterum, quomodo stolidus Donatista potuit tam bene Cypriani imitari orationem, sectari virtutem, assequi acumen, necesse ratiocinia, eximique cujuslibet impostoris non modo explere partes, sed superare? Insuper nullo validiori argumento revinci, ac subverti possunt Donatistæ, quam petito ex epistolis Cyprianicis. Hinc Augustinus septem de Baptismo libros conscripsit, ut exemplo & au-

& auctoritate Cypriani contereret ipsorum Donatistarum peruersitatem, quemadmodum testatur eodem in Opere a capite ad calcem, necnon in 2. Retract. cap. 18. Adversus igitur semetipsos acerrimi Catholicorum hostes arcem illam, munitissimumque propugnaculum minime construxerunt. VI. Confirmat dicta haftenus Facundus Hermianensis scribens lib. x. de Tribus Capitulis pag. edit. Sirmondi 428. cap. 3. *Nemo sapiens Ecclesiam credit haeticam, quia doctrinam beati Cypriani Carthaginensis Episcopi & Martyris laudat; cum ille non solum privatim, ut ei visum est, verum etiam congregato Concilio definierit, ut omnis haeticus ad Ecclesiam rediens baptizetur, & propter hoc culpatus a Stephano Antistite Romano resisteret, suamque sententiam scribens ad Pompejum quanta potuit humana argumentatione defenderit.* Et contra Mocianum pag. 577. *Ideirco beatus quoque Stephanus Praeful Apostolica Sedis, cum sanctum Cyprianum, atque alios Afros Episcopos de baptizandis omnibus haeticis decrevisse cognosceret, quamvis ut dictum est nullo interposito anathemate, neque adversus ulla Concilii generalis antiquiora decreta, aut conniventes haeticis talem sententiam protulissent; continuo tamen ei denuntiavit, quod si qui hoc auderent, ab Ecclesia pellerentur.* Valde ibidem Hermianensis commendat Augustinum, quoniam auctoritate beati Martyris Cypriani compressit Donatistas, non ex systemate hypothetico, quod Missorius miratur nec deprehendisse Norisium in Donatistarum Historia, sed quia cum revera Cyprianus aliter, quam plures aliarum provinciarum Episcopi de Baptismo superet, non tamen se, quemadmodum ipsi Donatista, ab Ecclesia segregavit. VII. Ad subvertendam opinionem, quæ inveteravit, ac possessionis jure fruitur, pondus non habent momenta infirma, atque inutilia. Cyprianum vero stetisse pro rebaptismo sententia est, quæ Scriptorum omnium infedit animis, Mss. & editorum librorum firmata consensu, probata Historicorum suffragiis, nullumque ante Missorium, vel Tourneminum (cui namque hujus commenti tribuenda sit origo prima, nil ad nos attinet) illam e propria fede ausus est deijcere ac deturbare. Ut ergo merito censetur illinc delapsa, proferri debent argumenta pondere gravia, rerumque circumstantiis inspectis multas habentia opportunitates. At quæ proferuntur argumentationes, nullius, ut mox ostendam, sunt roboris: nec video cur expediat in illas omnes eloquentia nervos, totumque acumen mentis intendere. Nova enim sententia nil ad Cypriani laudem, meritorumque ipsius confert celebritatem; cum in ea potius disceptatione illius caritas in unitate servanda, studium in perquirenda veritate, temperamentum & eruditio in epistolis conscribendis, cura antiquioris disciplinae tenendæ, animique egregiæ dotes aliæ magnopere eniteant, & si quid humani lapsus occurrit, id purgatum fuerit salce

mar-

martyrii, & igne flagrantissimæ dilectionis : quibus rationibus Augustinus jam ostendit novam hanc in Cyprianum devotionem tenuissimis stimulis excitari. Immo, si quod sentio fas est ingenuè proferre, quamquam novam istam in Cyprianum devotionem commendo plurimum, pluris tamen beatissimum Martyrem ex hisce epistolis æstimo, in quibus deprehendo tot probitatis, virtutisque argumenta, simulque commoneor, quantum mihi trepidandum sit in sententia aliqua pronuntianda, cum tantorum meritorum viro noluerit Deus justissimo, altissimoque judicio veritatem hanc revelare. Nihil præterea ex nova opinione percipient commodi qui Romanæ Sedis propugnant auctoritatem; quæ enim hoc in dogmate obijciuntur ex Cypriano, a singulis Controversiarum Scriptoribus diluuntur, nec horum aliquis respondit Cypriani epistolas esse confictas; ac si id respondisset, jure persisteret adversarius, contendens nos prorsus devictos & superatos ad inaudita, novaque figmenta confugere. Denique si Cypriano recensitæ epistolæ abjudicandæ sunt, pereunt argumenta, quæ inde erui pro confirmandis Traditionibus dixi libro xxiii. cap. 5. nec arduum erit illa ratiocinandi methodo semel recepta, complura facta, quibus Romanæ Ecclesiæ dogmata fulciuntur, inter hominum commenta rejicere. Saltem hoc sibi promittunt hæretici in Actis Erudit. Lipsiæ an. 1736. pag. 26. ubi non tantum Misfiori laudes prosequuntur, (quod factum bene omnique jure fateamur) verum etiam hæsitanter in hæc verba prorumpunt : *Debitavimus vero, an Auctor applicationes regularum suarum sit admissurus, simul ac Protestantes iis uterentur in dijudicandis factis ab Ecclesia Romana probatis.*

Breviter jam præcipuas adversarii argumentationes expendam. Quarum prima est, nec unum reperiri auctorem, qui in adversariis oppugnandis ad systema *hypotheticum* non desineat : quod præstitisse Augustinum, cui aperta erat Donatistarum astutia & fallaciloquentia, demonstrat primum hæsitatio, quam pluribus in locis de facto, scriptisque Cypriani significat, tum quod probans rite ab hæreticis conferri baptismum ex Cypriani sententiis & opusculis receptissimis, si Rebaptizantibus sanctum martyrem accensusisset, damnaffet eundem supini erroris, & manifestissimæ *antilogiæ*. Huic argumento responsum est paullo supra. Nunc tantum addimus probare & nos systema *hypotheticum*, quo adversarii ex suppositione ipsorum doctrinæ facilius revincuntur & refutantur, nec denegamus Augustinum in Donatistas Cypriani auctoritatem obijcientes, valide ejusdem Cypriani exemplo, & scriptis insurgere. Sed ideo insurgit, ideo Donatistas premit : quod Cyprianus *de baptismo aliter sentiens, quam res se habebat, in catholica unitate permansit, illumque novum in candore sanctæ animæ caritatis ubera contegebant.*

Vide

Vide libri 1. de Baptismo postrema capita. Et si alicubi anceps est, aut de Epistolis Cyprianicis, aut de Carthaginensi Concilio; dubitat spectata Donatistarum perversitate, & Cypriani sanctimonia; at postquam egregie hanc vindicavit, sensisse Cyprianum hæreticos esse rebaptizandos non negat, & adversus semetipsum illas Epistolas a Donatistis confectas, nequit prudentissimus Augustinus sibi met suadere. Nec propterea Cyprianum arguit *antilogia*, quippe, nullum, quem invenerim, Cypriani locum profert ex receptis illius Operibus Augustinus, in quo aperte probetur hæreticorum baptismus; quamvis Missorius scribat pag. 281. *Compluribus Cypriani sententiis & receptissimis opusculis literisque collectis probat* (Augustinus) *baptismum rite ab hæreticis conferri*. Producere Augustinum contra Donatistas permulta testimonia Cypriani ad probandam Ecclesiæ unitatem, necnon ad commonstrandam in Ecclesia bonorum, malorumque commixtionem, cum ex Epistolis controverfis, tum ex Epistola ad Antonianum, ex altera de lapsis, ex alia de zelo & livore, verum est: plurima, imo unicum asserre testimonium, in quo diserte Cyprianus asserat *baptismum rite conferri ab hæreticis*, id falsum est penitus; abique inter figmenta reliqua, objecta Cypriani *antilogia*, & contradiçtio.

Petitur secunda objectio ex silentio S. Optati Milevitani, qui scribens adversus Parmenianum libros septem (nam & postremum recipiunt Critici) nullibi mentionem facit Cypriani, quam fecisset utique, si fuisset Rebaptizantium dux & coriphæus. Tanta est autem Optati auctoritas, ut apud ipsos Donatistas promeruerit æstimationem, eumque in Collatione tertiæ diei legi postulaverint. Accedit quod argumentis Optati probantis Majorinum recessisse a cathedra Petri, vel Cypriani, si docuisset is rebaptismum, Donatistæ reposuissent, non Majorinum, sed Cæcilianum recessisse a cathedra Cypriani, cum in eadem de Rebaptismo sententia Majorinus ipse perstitisset. Huic argumento respondendum est ad hunc modum. Pertractans ipse Missorius de auctoritate argumenti negantis pag. 205. recte observat, necessum esse, ut illud vim habeat, prætermissa fuisse ab auctore, quæ neutiquam fuissent prætermittenda, ita causa, quam egit, postulante. Atqui sententiam Cypriani de Rebaptismo prætermitti debebat ab Optato: nullam ergo vim habet argumentum a silentio Optati depromptum. Quod sententia Cypriani fuerit ab Optato prætermittenda, demonstro ex eodem Optato, qui libro v. ubi disputat de Baptismo, num. 3. ait: *De hoc Sacramento non leve certamen innatum est, & dubitatur, an post Trinitatem, in eadem Trinitate hoc iterum licet facere. Vos dicitis, Licet: Nos dicimus, Non licet. Inter Licet vestrum, & Licet nostrum nutant & remigant animæ populorum. Nemo vobis credat,*

*dat, nemo nobis: omnes contentiosi homines sumus. Quærendi sunt Judices: si Christiani, de utraque parte dari non possunt, quia studii veritas impeditur. De foris quærendus est iudex. Si paganus, non potest nosse Christiana secreta. Si Judæus, inimicus est Christiani baptismatis. Ergo in terris de hac re nullum poterit reperiri iudicium. De celo quærendus est iudex. Sed ut quid pulsamus ad eælum, cum habeamus hic in Evangelio Testamentum? Anne vides Optatum de baptismo disputantem ad sola divina testimonia recurrere, ac prævenire etiam Donatistas, ne aut Cyprianum, aut Orthodoxum alium opponant, ad solum Evangelium provocans adversarios, propterea quod etiam apud Catholicos exorta fuerint hac in parte dissidia? Optatus igitur debebat Cypriani Epistolas, sententiamque alto silentio præterire. Quid, quod Optatus scribens adversus Parmenianum, nec meminit Epistolæ ejusdem Parmeniani ad Tychonium, quam S. P. Augustinus egregio Opere refutavit? Numquid ex Optati silentio epistola Parmeniani judicabitur spuria? Probationes autem silentio Optati subiectæ nil omnino concludunt. Nam Donatistæ in Collatione Carthagenensi petierunt Optatum legi, quia arbitrabantur inde se probaturos Cæcilianum ab Imperatore damnatum: quod cum minime in Optato invenissent, Donatistæ dixerunt hoc se non petiisse recitari, stomachantes adversus eos, qui risam tenere non poterant, ut narrat Augustinus in Breviculo Collat. tertii diei cap. xx. n. 38. Hæc vero quid faciant ad præsentem de Cypriano controversiam, non video. Nec momenti alicujus est, quod Optatus scribit lib. 1. cap. x. *Non enim Cæcilianus exivit a Majorino avo tuo, sed Majorinus a Cæciliano; nec Cæcilianus recessit a Cathedra Petri, vel Cypriani: sed Majorinus, cujus tu Cathedram sedes, quæ ante ipsum Majorinum originem non habebat.* Eo enim loci Optatus probat schismatis originem non a Cæciliano, sed a Majorino esse repetendam, quod Cæcilianus successerit Mensurio, suffragio totius populi electus, & rite a Felice Autumnitano, seu Aptuginensi ordinatus, Majorinus vero contra Cæcilianum ordinatus fuerit a Traditoribus, & se a communione catholicorum sejunxerit, erecta Episcopali sede, quæ ante ipsum Majorinum non erat. Atque hanc esse Optati mentem præcitata verba declarant, confirmantque totius libri contextus. Ut ergo Donatistæ diluerent argumentationem Optati, non debebant respondere Majorinum secutum sententiam Cypriani de Rebaptismo, de quo ibidem S. Optatus non loquitur; sed debebant ostendere Majorinum, non Cæcilianum esse legitimum successorem Mensurii, & Cæcilianum, non Majorinum, nova erecta sede schisma constasse. Quamquam & de Rebaptismo longe distat sententia Donatistarum a Cyprianica; cum illi non solum hæreticos, sed etiam a pace deviantes rebaptizandos judicarent; quod monuit Augustinus lib. 1,*



libro 1. de Baptismat. capit. xix. numero 29.

Tertia objectio promitur ex silentio Pontii, qui cum fuerit Cypriani Diaconus, ejus amantissimus, exilii voluntarius comes, vitamque & passionem ipsius Cypriani conscripserit, nullam hujusce sententiæ fecit mentionem; enimvero si Cyprianus docuisset Rebaptismum, id Pontius gestorum ejus Scriptor diligentissimus minime prætermisisset: & si Cyprianus a priori errore resiliisset, & istud Pontius mandasset literis, ne videretur se delectari errore ipso Magistri. Scribit namque Augustinus ad Vincentium Rogatistam haud esse improbabile, *quod Cyprianus correxerit istam sententiam, & fortasse suppressum sit ab eis, qui hoc errore nimium delectati sunt.* Non ego hanc adhibebo responsionem, meminisse Pontium & sententiæ Cypriani, & Carthaginensium pro ea stabilienda conciliorum, ut in Apparatu lib. iv. art. 14. num. 10. scripsit Petrus Annatus: nam revera hæc non habentur apud Pontium, sive pervolutes Editiones omnes Cypriani, sive Acta Martyrum Ruinartii, sive Codicem nostrum prælaudatum. Ac si Annatus singularem aliquem nactus esset aliisque incompertum, indigitaſset utique, errorisque tam obvii a se abjecisset suspensionem. Nec respondebo Dupinium in nova Bibliotheca asserere Pontii Opus cum tanta eloquentiæ affectatione conscriptum, ut posset merito venire in suspensionem falsitatis, nisi illud Hieronymus agnovisset pro genuino. Nec denique illud reponam, non videri hunc Pontii librum turgido stylo, rhetoricisque figuris ornatum idem esse Opus, quod præcitatus Hieronymus de Script. Eccl. cap. 68. *volumen appellat egregium*, Caveus autem diligentissime scriptum censet, at *stilo simplici & inelaborato*. Sit per me quidem Pontii fœtus, sit egregium præstantissimumque volumen, nec affectata editum eloquentia, sed vera. At Mislorius ad vim argumenti a veterum silentio deducti, id etiam recte ac sapienter exigit, ut Auctor, cujus profundum silentium opponitur, fuisse, & ex instituto quæstionem, de qua agitur, pertractaverit. Nego itaque Pontium fuisse res a Cypriano gestas, editasque ab eo literas recensuisse. Ipse enim fatetur num. x. præterire *multa alia, & quidem magna*, nec inverisimile est ea duntaxat narrasse, quæ ad Cypriani laudem, aliorumque ædificationem potissimum serviebant. Immo Pontius nec meminit Epistolæ xl. in qua Cyprianus pertractat de presbyteris factionis Felicissimi, qui illum subruere tentarunt; neque Epistolæ lxi. ad Antonianum, aliorumque, in quibus differtur de Libellaticis, & quæ haud exiguum rerum a Cypriano gestarum partem continent. Præterit Pontius & Cypriani Concilium celebratum anno 252. in causa Victoris presbyteri, omnesque ad Romanum Clerum, & ad Cornelium epistolæ de lapsis ad penitentiam recipiendis. Quid plura? Epistolam lv. ad eundem.

To. I.

K k k

Cor-

Cornelium, qua se Cyprianus defendit adversus Schismaticos, LVII. de ipsius Cornelii confessione, necnon LVIII. ad Lucium, in qua de huius ab exilio reditu gratulatur, frustra perquires in Pontii libro. Ibi Xystum solum ex Romanis Episcopis invenies commemoratum num. XIV. quem Pontius appellat *pacificum Sacerdotem*, forte (si levioribus conjecturis est indulgendum) quod Cyprianus cum Xysti prædecesore aliquam habuerit dissensionem. Cum vero Pontius, ut firmissime teneo, Magistri sui adhæserit opinioni, non Cypriani errore delectatum dicimus, sed doctrina meritique devinctum, adactumque ne scriberet quod nil conferebat ad scopum & dignitatem suscepti operis.

Opponit IV. loco Missorius silentium auctoris Anonymi Tractatus adversus Rebaptizantes, necnon summum, diuturnumque silentium ipsorum Donatistarum ante Augustini tempora: silentium præterea ipsius Donati, qui convictus a Miltiade Papa, Romanoque Concilio, caussatus est exiguum Episcoporum numerum formulæque judiciorum; & damnatus a Synodo I. Arelatensi, & provocans ad Constantinum, ab eoque de sacrilega appellatione objurgatus, nunquam protulit aut Cypriani literas, aut ejusdem, sive Agrippini Concilia: altissimum denique silentium, quod extat in Actibus Synodicis, in gestis proconsularibus, & in legibus Imperatoriis, ubi nullum facti Cypriani deprehendi potest vestigium.

Resp. & argumentationem istam nullius esse roboris. Nam si silentium aut scriptis, aut factis adimeret auctoritatem, cum literis de Rebaptismo rejicienda foret celeberrima Cypriani Epistola ad Fortunatum de Exhortatione Martyrii, altera ad Antonianum de Cornelio & Novatiano, quæ in XI. antiquis Cod. desideratur, ac præfertim LXV. ad Stephanum de Marciano Episcopo Arelatensi; quam, licet Launojo, aliisque videatur conficta, Missorius tamen & genuinam agnoscit, & ex ea prolixam nescit ratiocinationem, de qua inferius est differendum. Primæ enim, ac tertiæ harum Epistolarum nemo veterum meminit, ut constat ex notis posteriorum Editionum Cypriani ad Epistolam LXV. nec istas in tantis Mss. Codicibus adinvenies, in quantis leguntur agentes de Rebaptismo. Quo ergo se vertet adversarius ut Cypriano adjudicet nunc commemoratas Epistolas, eo nos convertimur, ut quas explodere nititur, propugnemus; & potiori quidem jure, cum istæ jam ab ætate Hieronymi & Augustini Cypriani sub nomine legerentur. Sed est aliud, quod præmissæ objectioni reponamus. Enim vero, quantum attinet ad librum Anonymi de Rebaptismo, si scriptum dicas adversus Cyprianum tertio sæculo, ut est communis sententia, fatearis necessum est Cyprianum pro Rebaptismo pugnavisse, cumque suppresso nomine ab Anonymo carpi, & vellicari; & Cyprianum ipsum esse virum illum *magna*  
*pria*

*prudentiæ & constantiæ*, quem adversarius clanculum mordet, appellatque andaçter *hæreticorum stupore pradtum*. Si vero Misorium audias, & librum de Rebaptismate editum velis contra Donatistas, quod difficulter mihi, aliisque persuadebis, commendare debes silentium Anonymi, qui oppugnans pervicacissimos Donatistas, beatissimi Martyris famæ pepercerit. At quantum ad antiquiores Donatistas attinet, principio dicam ad nos usque ipsorum scripta & facinora minime omnia, & singula pervenisse; & ne aliud divagetur disceptatio, libenter legeremus Acta Romanæ Synodi sub Miltiade, quam hic objectat vir eruditus, præter fragmenta, quæ proferunt in Collatione 111. diei Augustinus, & lib. 1. cap. 24. adversus Parmenianum Optatus. Quod si dicas fuisse seniores Donatistas oculatiores posterioribus, nec obrudisse Cyprianum, quod norint hunc servasse cum impiis unitatem, & hæreticorum quidem, sed non improborum expunxisse baptismum, aut potissimum fuisse intentos in subvertenda ordinatione Cæciliani, & avertenda a se origine schismatis; hoc etiam temere non inficiabor. Donatistæ præterea factam a Miltiade damnationem putabant se posse facilius eludere, si Melchiamdem ipsum de crimine traditionis arguerent, aut negarent potuisse sub Melchiade Cirtæ Synodum congregari, aut assererent falsa esse concilia, quæ diem, & consules haberent inscriptos, quale præsertim erat Cirtense. Atque hoc fuisse Donatistarum perfugium, constat ex Collat. 3. diei cap. 17. & 18. & ex libro ad Donatistas post Collationem cap. 14. Donatus vero appellans ad Constantinum, (non a Melchiade, ut existimarunt Baronius & Balduinus refutati a Norisio P. 1. Hist. Donat. cap. 9. sed appellans a Synodo Arelatenfi,) nullo pacto exemplum proferre poterat Cypriani. Sanctus enim Episcopus Synodos Catholicorum in Proconsulari provincia coegit, non appellavit ad Cæsarem. In legibus denique Imperatoriis, quæ collectæ extant in postrema Edit. Dupinii Operum Optati pag. 215. & seqq. nullum invenitur judicium Ecclesiasticum habitum in causa Donatistarum, non Concilii Cirtensis, non Romani sub Melchiade, non primi Arelatenfis. Acta autem Proconsularia antiquiora, quæ extant in causa Donatiana, sunt Flavii Marcellini, & anni 411. quo Carthagine mense Junio habita est Catholicorum, & Donatistarum Collatio. Sunt ne Synodi Cirtensis, Romana, & Arelatenfis fictitiæ? Anno ne 411. Donatistæ non objecerant sancti Cypriani auctoritatem, nec Augustinus libros vii. de Baptismo conscripserat? At de frondoso, inanique argumento dictum satis.

Conatur insuper Misorius expungere tertiam Synodum Carthaginensem, pluraque, ut illam ostendat suppositam, momenta congerit. Primum est, quod vero non videatur simile sub calo Africano convocatum xc. fere Episcoporum conventum, æstuoso tem-

pore, nec gravissima urgente causa, ut agerent nempe de Rebaptizandis hæreticis, quod jam aliis in Synodis definierant. Alterum, quod in Conciliorum actis omittere diem & Consules, ut omittuntur in Synodo Cyprianica, videtur positum in more Donatistarum, ut liquet ex Augustino in Breviculo Collationis 111. cap. 15. Tertium, quod idem Augustinus citatis in locis, ac præsertim lib. 1. contra Cresconium cap. 32. de hac Synodo dubitat, scribens: *Nam & vos profertis Concilium Cypriani, quod aut non est factum, aut a ceteris unitatis membris, a quibus ille non divisus est, merito superatum.* Quartum, quod hac in Synodo perlectæ dicantur literæ ad Jubajanum, non aliæ ejusdem argumenti; sitque inter Episcoporum sententias contradictio apertissima, cum Cyprianus dixerit de Rebaptismate a se prolatam sententiam *semel atque iterum & sæpe*, Geminus autem a Furnis & Junius a Neapoli dixerint, *Semel decrevimus, semel censuimus.* Quintum, quod Carthaginensis hæc Synodus nequeat cum Epocha Stephani concordare. Consignandus est enim obitus Lucii cum eximio Petavio anno Ch. 255. P. Licinio Valeriano Aug. 111. & P. Licinio Gallieno 11. Cofs. eodemque anno sub initium mensis Aprilis Stephanus inauguratus est Pontifex. At Stephanus martyr occubuit 14. Nonis Augusti eodem anno, seditque non amplius, quam menses quatuor. Hoc autem exiguo intervallo, quomodo potuerunt Epistolæ inter Cyprianum, & Stephanum intercedere, plura celebrari Concilia, & ea evenire, quæ in Africa & Romæ dicimus contigisse? Detur quoque gratis, & summâ agatur benignitate, detur decessisse Stephanum non an. 255. sed 257. Valeriano Aug. 14. & Gallieno Aug. 111. Cofs. non proinde concurret Synodus illa Carthaginensis cum Epocha Stephani. Primo namque anno ipsius Pontificatus inter Cyprianum ac Stephanum nulla potuit oriri contentio, quandoquidem post Stephani inaugurationem Romana Ecclesia hanc Cypriano per literas significavit, Cyprianus Episcopis Africæ, tum hi Stephano gratulatorias misere, Pontifex Cypriano communicationis literas dedit, Cyprianus rescripsit Stephano, inita inter eos amicitia, hujus fama etiam in Gallias pervenit, Faustinus Lugdunensis Episcopus scribit Cypriano illius adversus Marcianum opem implorans, diuque expectato responso, alias ad Cyprianum dat literas, Cyprianus adductus duabus Faustini epistolis scribit ad Stephanum de Marciano. Hæc omnia minori, quam unius anni spatio perfici non potuerunt; ideoque nulla fuit hoc anno Stephani cum Africanis contentio. Quæstio de hæreticorum baptismate exorta est mense Aprilis, convocatur Concilium primum, recrudescit disceptatio, celebratur Concilium alterum, mittuntur Synodicæ ad Numidas, fit certior de Synodica factione Stephanus, Afris minitur anathema, indicitur tertia Carthaginensis Synodus, & celebratur calendis Se-

ptem-

## Liber Trigesimus primus. Cap. XIII. 445

ptembris; quisnam dixerit talia ac tanta quinque mensium spatio fieri potuisse? Hæc Missorius.

Cæterum & ista nil penitus probant. Ad primum enim negamus Carthaginis florentissimæ olim urbis, æmulæ Romani Imperii, Deorumque, ut ab Augustino dicitur, *regni*, fuisse malignum aerem, non, ut Geographi monstrant, clementissimum, atque uti initio Carminum de Punicis Bellis ait Silius Italicus, *gratissimum*. Qualecunque vero sit cælum Carthaginiese, *Poeni & Africani, nec fessa quieti transmittunt corpora*, ac sacri maxime Antistites, magno Cypriano incitante. Dabo & aerem Carthaginensem esse ferventissimum, & crassissimum. Calendis Junii habitam Collationem coram Marcelino eadem in urbe, nemo negabit: quid inter Calendas Junii, & Calendas Septembris interfit, non video; mensis ille æstivum calorem præcedit, iste subsequitur. Eadem die *Calendarum Septembris* celebratum Carthagine Concilium Coss. Cæsario & Attico, idest, anno 397. sedente Siricio Papa, constat ex 2. Conciliorum volumine pag. 1567. Nec levis erat Afris Episcopis causa Romanum Pontificem adversarium habere, ab eoque percelli minis atrocibus. Quid plura? *Ecoe consentio, meridies Africa sit. Africa sit meridies: abundare audio rebaptizatores in Africa*, inquit Augustinus serm. 46. n. 37. *Sodales malos, hæreticosque* non dico: nam Augustinus de Donatistis, nos de Orthodoxis Patribus disputamus. Ad secundum non reponam Concilium, de quo est disceptatio, dicm habere, idest, Calendas Septembris; ideoque, si argumentum illud a more Donatistarum cvinceret aliquid, probaret hanc Synodum carere ipsorum Donatistarum fraude & ingenio: nec dicam die & Consule carere omnes alias Cypriani epistolas, etiam Synodicas; nedum quippe solvit argumentum ejuscemodi, sed disjicit, dissipatque Augustinus scribens in libro contra Donatistas post Collationem cap. xv. n. 19. *Fieri autem potest, ut in codicibus sit varietas, dum alii etiam dies & consules diligentia majore describunt, alii superfluum præmittunt. Sicut etiam codex de quo primum legimus judicium Constantini, quo inter partes Cæcilianum innocentem, illos autem calumniosissimos pronuntiavit, diem & consulem non habebat. Quo etiam illi invidiosissime proclamaverunt, quod Imperatoris literas sine die & consule recitavimus; & tamen etiam ipsi alias ejusdem Imperatoris literas in cænssa Felicis Ordinatoris Cæcilianii, quas mirabili cæcitate contra seipsos protulerunt, sine die & Consule recitarunt, nec eis inde aliquid objecimus, ne similiter, ut ipsi, tempora necessaria superfluis verbis occupavimus. Ad tertium plura superius dicta sunt, ubi quæсивimus qualis Augustini fuerit, & unde exorta hæsitatio: nam quadrant omnia huic Synodo, quam non uno in loco Augustinus absolute laudat & profert, ac data opera in postremis de Baptismo libris vocat.*

cat ad trutinam. Sane quantumvis callida ac mendax fuerit Donatistarum vafrities, tanto Episcoporum numero, qui in Synodo proprio de nomine commemorantur, affricasse errorem, sententias illorum compinxisse, nec potuisse tamen aperte revinci eximiam hanc imposturam, ingenio mei tarditas non assequitur. Quod sequitur facillimam habet expeditionem; literæ enim ad Jubajanum in tertia Synodo lectæ sunt, quoniam secundæ Synodi acta commemorant, unde & his productis facile Episcopi priorem sententiam confirmarunt, & Cypriano unanimiter adhæserunt. Nec repugnat Gemini, & Junio de re pluries discussa dixisse, *Semel decrevimus*; forte enim hi secundæ Synodo LXXI. Episcoporum, non primæ XXXI. interfuerunt: quamquam, si attente Gemini & Junii pensites verba, percipies non alium præferre sensum, quàm illos in suscepta semel sententia persistere; quod jure poterant pronuntiare, quamvis de ipsa causâ fuerit semel, iterumque actitatum. Ad quintum dicimus, optime tertiam hanc Carthaginensem Synodum convenire, cum Epocha Stephani, si cum viris doctissimis affirmemus Lucium martyrio coronatum die 3. Martii anno 254. & Stephanum electum a Clero eodem anno die 9. Aprilis, Dominica Passionis. Imo Pagius ex libro Pontificali, cui non repugnat Catalogus Liberianus, contendit Stephanum electum superiori anno 253. & nuperus Auctor vitæ Cypriani num 31. scribit cum Pagio omnes satis convenire. Subscriberem his & ego, si faterentur Stephanum ordinatum a Lucio, antequam is in exilium deportaretur, ad exercendam in urbe Vicariam administrationem; quam etsi Pagius deneget, vetusta comprobant monimenta, & ipsemet Anastasius scribens in Lucio, *Hic potestatem dedit omnis Ecclesie Stephano Archidiacono suo*. Sed vel anno 253. vel sequenti Stephanum dicas inauguratum Pontificem, parum refert. Sedisse usque ad annum 257. sive usque ad *Cos. Valer. Aug. 1v. & Gallieni Aug. 111*. constat ex libro Pontificali, aliisque Catalogis vetustissimis, ex quibus emendandus Anastasius, qui sedisse scribit *usque ad Valer. III. & Gallien. II*. ad annum scilicet 255. Corruunt ergo Missorii argumenta omnia, quibus Stephanum sedisse autumat mensibus tantum quatuor. Rectius dixisset *quatuor annis*, ut habetur in Vaticano Codice 800. annorum, in altero vetustissimo ante decretum Anselmi Lucensis Episcopi, in Ms. Bibliothecæ Urbinate, aliisque compluribus. Quod profecto, sive computando Vicariam Stephani administrationem, sive deducendo Stephani annos ab anno 253. statutæ, nobisque probatæ Epochæ adamusim convenit. At nobiscum benigne agit Cypriani vindex, & gratis concedit sedisse Stephanum usque ad annum 257. quo etiam concessio contendit Synodum Carthaginensem concurrere non posse cum Epocha Stephani, quia invictissime constat in Epistola Cypriani adversus Marcianum,

## Liber Trigessimus primus. Cap. XIII. 447

cianum, decursuque anteaſti temporis Cyprianum inter ac Stephanum integro ſaltem anno, ab indepto Pontificatu nullum exortum, eſſe diſſidium, poſt annum vero ab Aprili ad Calendas uſque Septembris, menſium quinque intervallo, ea, quæ in cauſa Rebaptiſmatis contigſſe narrantur, perfici neutiſquam potuiſſe. Quid ad hanc, qua plurimum ſibi plaudit, & cauſam vicifſe putat, novam, invictamque objectionem? Eam undique emendicatam, fractamque arbitramur. Ac principio non benigne agit Miſſorius, ſed æquiſſime omnique jure, dum Stephanum ſediſſe ait ad annum uſque 257. imo & dum ſe liberalcm deprædicat, Stephani Pontificatum decurſat, repetens hujus initia cum Cl. Petavio, a ſummis & accuratis Chronologis reſutato, a Conſ. Valcr. 111. & Gall. 11. anno nempe 255. cum repetendum dixerimus ab anno 254. & juxta complurium ſupputationem a præcedenti. Non eſt ergo, cur viro docto de tanta benignitate gratias agamus. Deinde magnopere miramur, quomodo vir peracutus nitatur oſtendere Cyprianum per integrum ſaltim annum concordi fuiſſe animo cum Stephano ad Pontificatum eveſto; cum paullo ſupra eam ſententiam ſit amplexus, ſediſſe Stephanum quatuor duntaxat menſes. Profeſto ſi id non eſt ſecum pugnare, aut ſaltim digladiari andabatarum more, probabilis erit prodigioſa quælibet antilogia. Inſuper ſi quid evinceret totum illud Miſſorii ratiocinium, non everteret Synodum Carthaginenſem, ſed ſuppoſitam demonſtraret Epistolam contra Marcianum, quam ob eandem rationem petitam e cauſa Rebaptizantium ſpuriam nituntur oſtendere Joannes Gerbaſius Doctör Pariſienſis in diſſert. de Cauſis majoribus cap. 8. art. 1. Launojus in diſſert. de duobus Dionyſiis, Joannes Fellus in ſua Editione Cypriani, & Caſimirus Oudinus Tom. 1. de Script. Eccl. p. 276. Genuina eſt tamen, & habetur, quicquid Launojus ſcribat, in vetuſtiſſimis Mſs. de quibus vide notas ad Epistolam Cypriani lxxvii. in Editione Maurina. Interim ad argumentum ductum ex harmonia Cypriani cum Stephano, quo Scriptores nuper citati oppugnant Epistolam Cypriani, hiftoriamque Fauſtini, & quo Miſſorius in rem ſuam extorto impetit Synodum Carthaginenſem, reſpondit Nicolaus Rigaltius: *Hujus argumenti vis cum tota pendeat ex circumſtantia temporis, quo ſcripſit epistolam Cyprianus, Stephano per quadriennum ſere in Episcopatu ſedente, ſatis poſuit eſſe ſpatii, quo nondum exarſerant animi.* Hinc nota Oudinum, qui inter rejicientes Epistolam illam recenſet Rigaltium, mendacem eſſe ſcriptorem. Præterea dum Miſſorius ſcribit motam quæſtionem de Rebaptiſmate menſe Aprili, poſtremo anno Pontificatus ſancti Stephani, non advertit Afros inter ſe primum, quàm cum Stephano diſceptaſſe, nec ad Romanum Pontificem ſcripſiſſe niſi poſt celebratam ſecundam Synodum Carthaginenſem; quod ſupra ſignificavimus agentes de Firmiliano.

En,

En, ut arbitror, argumentum Misorii satis superque revictum. Sed ne liberalitate vincamur, gratis & nos demus Stephanum sedisse quatuor duntaxat mensibus; quid inde? Præcesserant, non subsecuta sunt sancti Pontificis inaugurationem questionis hujus primordia. Nil absurdi, si quatuor mensium spatio, jam aliis celebratis congressibus, Cyprianus ad Stephanum scripserit, & accepto responso Synodum indixerit, litteras dederit ad Pompejum, & ad Firmilianum, & paulo post celebravit indictam Synodum. Etsi namque Carthago in Africano litore sita longe ab urbe Roma distaret, cum interfit tamen solum mare, brevi poterant a Stephano ad Cyprianum, a Cypriano ad Stephanum deferri epistolæ. Etenim Carthagine recto cursu Romam naves prætervehebantur, atque duæ hæ urbes, ut Virgilius inquit in 1. Aeneidum, quasi se fronte spectabant:

*Urbs antiqua fuit (Tyrii tenuere coloni)*

*Carthago, Italiam contra, Tiberinaque longe*

*Olia.*

Tridui navigatione Romam Carthagine delatas recentes ficus, quas in curiam attulit Cato, ostendens quam prope a muris essent Pœni, atque ideo statutum Punicum tertium bellum, quo Carthago deleta est, scribunt Plinius libro XIV. cap. 18. & in M. Catone Plutarchus. Ex ipsa Cypriani vita, cui fuerunt cum Romanis Episcopis Cornelio, Lucio, Stephano, & Xysto literarum officia, cognoscimus ejusdem navigationis facilitatem. Sed hæc ut liberales simus addita sunt: cetera nunc prosequamur.

Postremo, (nam si quæ sunt alia fundamentis disjectis & ipsa corrunt) etiam decretum Stephani Misorius aggeditur. Primo quia nihil de hoc decreto in suppositis Actis apud Surium, & Baronium, neque in Anastasio inter Stephani constitutiones, neque in Chronico Damasi. Deinde, quia nullo pacto fieri potuit, ut Stephanus baptizari vetuerit a quacunque hæresi revertentes, cum multi hæretici in nomine Trinitatis non baptizent. Præterea, quod frivolam, ineptamque rationem prætexat, videlicet, quod *nec hæretici proprie baptizent alterutrum ad se venientes*, sed communicent tantum: quasi Catholica Ecclesia normam ab hæreticis mutuetur. Insuper, quia non legimus Stephani rescriptum adversus Donatistas productum, quo causa absque tanta contentione finita esset. Istit ergo argumentationibus ab errore Rebaptizantium S. Cyprianus demonstratur immunis, quod utique ad majorem ejus laudem videtur conferre. His respondemus nullatenus concuti, sed firmari magis sententiam veterem, si decretum Stephani expendamus. Sanctum enim Pontificem stetit contra Rebaptizantes narrat Eusebius lib. VII. H. Ec. cap. 3, scribens: *Verum Stephanus nihil adversus traditionem, qua jam inde ab ultimis temporibus obtinuerat, innovandum ratus, gravissime*



*fme id tulit* . Cur autem injurius sit in Eusebium , qui asserit insignis fabulæ esse architectum , aut Paullianistarum gratia mentium , attulimus supra rationem aliquam , addimusque modo quæ cap. 27. ejusdem libri scribit in Paulum Samosatensem , ubi illum appellat *Gregis Dominici vastatorem* , & adversus illum *excitatos undique ait Pastores Ecclesiarum* . Et quod de Stephano Eusebius mandavit litteris , idem postea Nicephorus lib. vi. cap. 7. universique Historici tradiderunt . Meminit decreti Stephani & Augustinus lib. v. de Baptism. cap. 23. num. 31. nec non lib. de unico Baptif. cap. xi v. n. 23. quo in loco etiam addit sententiam Stephani non solum ex literis Cypriani patescere , sed etiam ex literis *aliorum Episcoporum* . Nec arbitror Donatistas adeo fuisse stolidos , ut cum Stephanum , non absque laude commemorarent , suam de Rebaptismo sententiam ab eo comminiscerentur proscriptam , decretumque contra semetipsos delinearant , confictisque a se epistolis illud infererent . Quare & decretum verum est , & genuinæ literæ Firmiliani & Cypriani , somniumque nova commentatio Missorii . Prætermitto quæ de hoc decreto scribunt Facundus Hermianensis supra laudatus , & in 1. Commonit. cap. 9. S. Vincentius Lirinensis , libellum quoque Synodicum in Collect. Conc. Labbei Tom. 1. pag. 717. quem vidit etiam eruditissimus adversarius . Acta vero Stephani apud Baronium ad annum 259. num. 8. inchoantur a delatione S. Pontificis baptizantis in Crypta ad Mummium urbis Præfectum , & inde ad Imperatorem Valerianum : quamvis & ibidem num. 23. legitur : *Per cryptas martyrum missas atque concilia celebrabat* . Ex horum Conciliorum aliquo profectam dicimus Synodicam in Rebaptisma : unde Lirinensis ait Stephanum Afris rebaptizantibus restitisse , *cum ceteris collegis suis* . Etiam Anastasius inquit in Stephano , *In carcere ad arcum stella fecit Synodum* ; & hanc Synodum adversus Rebaptizantes celebratam , conjectant quamplurimi . Immo Anastasius in Melchiade 2. Volum. pag. 271. nullam commemorat Synodum adversus Donatistas , nec ullam omnino : & nihilominus vir peracutus , ut supra vidimus , Synodum istam agnoscit & urget , perspicuus optime quàm infirmum sit argumentum petitum ex silentio Anastasii . Atque idem de Chronico Damasi dictum sit . Quod sequitur de probato a Stephano baptismate omnium hæreticorum , non solum a recentioribus Theologis Juenin , Tournelio , Habert , aliisque expunctum fuit , verum etiam a Pagio ad an. 256. num. 6. ab Antonio Charlas lib. x. de Libert. Eccl. Gallic. cap. 15. a clarissimo P. Coustant Tom. 1. Epistol. Pontif. a pag. 277. a Benedicctino altero in Præf. ad Opera Cypriani §. 1v. & aliis innumeris : & nos infra de hac quæstione dicemus nonnulla . Proximum frivolum argumentum est : non enim inquit Stephanus , Rebaptizandum non est , *quia nec hæretici rebaptizant* , sed , *Ipsi*  
*To. VI.* *baptizant*

*hæretici proprie non baptizant*, idest, quia baptisma non est *proprium* hæreticorum, sed Christi, nec hæretici sacramenta *propria*, sed sacramenta Ecclesiæ dispensant, adinstar adulteræ conferentis *munera quæ sua non sunt*: quæ utique est ratio validissima ad probandum, baptismum ab hæreticis datum, eaque Augustinus utitur lib. 2. contra lit. Parmeniani cap. 2. & 7. in Epistola contra Donatistas, sive de Unit. Ecclesiæ cap. 23. in lib. 111. de Bapt. cap. 19. aliisque in locis. Stephanus ergo ad antiquam traditionem confugit, non ad hæreticorum consuetudinem: tametsi absurdum non est arguere negantes unitatem Baptismatis, ex quo nec plures hæretici illam ausi sint temerare. Ad argumentum aliud dicimus & Stephani rescriptum contra Donatistas ab Augustino non uno in loco productum, illo autem causam non finitam *quantum ad discussionem*, quoniam publicum non erat, eique Africani resisterant, quod putarent non agi *de dogmate*, sed tantum *de disciplina*: in se tamen decreto Stephani causa Rebaptizantium & finita erat, & definita. Atque hæc de errore Cypriani, cujus meritis nil derogare sententiam nostram demonstratum est supra, nec aliud addimus modo, nisi *etiam primum Apostolorum Petrum potuisse aliter sapere, quam veritas postulabat, quod accidisse etiam Cypriano sine ulla ejus contumelia credimus quicunque diligimus Cyprianum, quia non cum fas est diligere majore caritate, quam Petrum*. Ita Augustinus lib. v 11. de Bapt. cap. 20.

PROP. IV. Decreto Stephani probatum non fuit Baptisma omnium promiscue hæreticorum, sed consecratum duntaxat Evangelicis verbis, idest, in nomine Trinitatis collatum.

Hanc propositionem adversus Marcum-Antonium de Dominis, Blondellum, Vossium, Launojum, Dupinium, & Joannem Cestriensem, aliosque inconcussæ fidei Romanorum Pontificum injustos oppugnatores, commonstrant quæ sequuntur. I. Decretum Stephani, ut servatur in Epistola S. Cypriani ad Pompejum, est: *Si quis ergo a quacunque hæresi venerit, nihil innovetur, nisi quod traditum est, ut manus illi imponatur in penitentiam: cum ipsi hæretici proprie ad se venientes non baptizent, sed communicent tantum*. Stephanus ergo id unum volebat, ut antiqua servaretur traditio: quod etiam scribunt Eusebius lib. v 11. H. Ec. cap. 3. Hieronymus in Dialogo adv. Luciferianos, Vincentius Lirinensis lib. 1. Commonit. cap. 9. & alii. Sicut ergo antiqua Traditio probat solum baptismum in nomine Trinitatis collatum; ita Stephanus baptismum duntaxat istum non repetendum esse sancivit. II. Neque Firmilianus, neque Cyprianus ita Stephanum interpretati sunt, quasi ratum tradiderit baptismum datum in solo Christi nomine, sed quasi voluerit Christi nomen prodesse baptizatis in Trinitate, licet Trinitatem ipsam nequaquam crederent hi, qui baptizant, Firmilianus enim hæc de Stephano scribit

feribit ad Cyprianum: *Illud quoque absurdum, quod non putans quarendum esse, quis sit ille qui baptizaverit, eo quod qui baptizatus sit gratiam consequi potuerit, invocata Trinitate nominum Patris, & Filii, & Spiritus sancti. At quis est in Ecclesia perfectus & sapiens, qui hoc aut defendat, aut credat, quod invocatio hæc nominum nuda sufficiat ad remissionem peccatorum, & baptismi sanctificationem: cum hæc tum utique proficiant, cum & qui baptizat habet Spiritum sanctum, & baptismum quoque ipsum non est sine Spiritu sancto constitutum?* Ex quibus liquido apparet litem Stephanum inter, ac Rebaptizantes non fuisse *de forma baptismatis*, sed *de fide baptizantium*; ipsumque Firmilianum fateri persuasum Stephano sufficere nudam, idest, absque fide, sanctæ Trinitatis invocationem. Idem infertur ex Epistola Cypriani ad Pompejum: in qua adversus Stephanum probat, aut probare nititur baptismum hæreticorum esse nullum, quoniam *hæretici nihil aliud, quam adversarii & anticristi nominantur*: quoniam effectus baptismi solummodo tribuendum non est: *majestati nominis*: quoniam *ineptum est, ut cum natiuitas secunda spiritalis sit, qua in Christo per lavacrum regenerationis nascimur, dicant quod possit quis apud hæreticos spiritaliter nasci, ubi spiritum negant esse*: quoniam dici nequit, *in nomine Jesu Christi remissionem peccatorum dari, ubi blasphematur in Patrem, & in Dominum Deum Christum*. Hæc aliaque multa demonstrant Cyprianum hoc unum in Stephano reprehendisse, quod S. Pontifex ratum vellet baptismum Christi, idest, *forma a Christo præscripta datum*, tamen baptizantes Christum Deum, aut sacrosanctam individuanque Trinitatem, aut alia fidei capita denegarent. III. Sententia Stephani ea est, quam tradiderunt Apostoli, & modo universa tenet Ecclesia. Ergo Apostolica, inconcussa, orthodoxa. Antecedens probatur; nam S. P. Augustinus lib. v. de Baptismo cap. 23. num. 31. ait Stephanum non improbasse in hæreticis *Baptisma Christi, quod in eorum perversitate integrum mansisse cognovit*. Lib. 2. contra Gaudentium Donatistam cap. viii. num. 8. ait: *Dic mihi utrum illo tempore Ecclesia, quando secundum vos omnium criminum reos sine baptismo recipiebat per Stephanum, & ejus innumerabiles toto orbe collegas, qui ejusdem sententia participes erant, malorum contagione perierat, aut non perierat?* Vincentius Lirinensis loco citato, *Intelligebat enim vir sanctus & prudens, inquit de Stephano, nihil aliud rationem pietatis admittere, nisi omnia qua fide a Patribus suscepta forent, eadem fide filiis consignarentur, nosque religionem non qua vellemus ducere, sed potius qua illa duceret, sequi oportere, idque esse proprium Christianæ modestiæ & gravitatis, non sua posteris tradere, sed a majoribus accepta servare. Quis ergo tunc universi negotii exitus? Quis utique, nisi usitatus & solitus? Retenta est scilicet Anti-*

*quitas, explosa novitas.* Facundus Hermianensis lib. x. cap. 3. pro defensorum trium Capit. scribit Cyprianum a Stephano *jure culpatum*. Et contra Mocianum, *Stephani potius, quam Cypriani sententiam tenet Ecclesia*. Stephani itaque sententiam innumerabiles toto orbe Episcopi propugnarunt, antiqua traditio corroborat, & nunc tenet Ecclesia Christi. Atqui nunquam universa Ecclesia probavit, nec probat modo baptismum non consecratum *Evangelicis verbis*. Igitur nec tale baptismum ratum habuit beatus Stephanus.

Opp. 1. Stephanus inquit: *Si quis ergo a quacunque hæresi venerit ad nos; ergo probavit baptismum hæreticorum omnium, etiam Paullianistarum, aliorumque in adunata Trinitate non baptizantium*. II. S. Cyprianus hoc sensu decretum Stephani interpretatus est, scribens epist. 74. ad Pompejum: *A quacunque hæresi venientem baptizari in Ecclesia vetuit, idest, omnium hæreticorum baptismata justa esse, & legitima judicavit*. III. Idem Cyprianus epist. 73. ad Jubaianum ait, probari a Stephano etiam baptismum Marcionis, quod hac ratione oppugnat: *Dominus post resurrectionem discipulos suos mittens, quemadmodum baptizare deberent instruxit & docuit dicens: Data est mihi omnis potestas in calo & in terra. Ite ergo, & docete omnes gentes, baptizantes eos in nomine Patris & Filii & Spiritus sancti. Insinuat Trinitatem, cujus Sacramento gentes baptizarentur. Numquid hanc Trinitatem Marcion tenet?* Et in præcitata ad Pompejum Epistola, *In tantum Stephani fratris nostri obstinatio dura prorupit, ut etiam de Marcionis baptismo, item Valentini & Apollonii, & ceterorum blasphemantium in Deum Patrem contendat filios Dei nasci, & illic in nomine Jesu Christi dicat remissionem peccatorum dari, ubi blasphematur in Patrem, & in Dominum Deum Christum*. IV. Etiam S. P. Augustinus lib. de unico baptismo contra Petilianum cap. 14. num. 23. *Stephanus, inquit, baptismum Christi in nullo iterandum esse censebat, & hoc facientibus graviter succensebat*. Cum vero, ait Launojus, idem Augustinus lib. 111. de Baptismo cap. xv. num. 20. integrum fateatur baptismum, quod in nomine Trinitatis confertur, proculdubio sententiæ Stephani recipientis baptismum hæreticorum omnium, etiam absque invocatione Trinitatis baptizantium, se adversari, ac repugnare significat. V. Ex honore, cultuque præstantiori, quo Ecclesia prosequitur Cyprianum, ut apparet ex antiquis Litanis, ex vetusto Calendario edito a Frontone, aliisque Ecclesiasticæ Historiæ monumentis, inferitur Stephanum gravius peccasse, ideoque resistens Cypriano in errorem oppositum prolapsus est: quod etiam fatetur Benedictus XII. in Responsione ad objectiones Fraticellorum.

Resp. ad primum, nego consequentiam; Stephanus enim præscribens, ut non rebaptizentur venientes a quacunque hæresi, sed  
ut

ut servetur Apostolorum traditio, ita accipiendus est, ut nolit iterari baptismum *a quocunque*, & *ubicunque* collatum in nomine sanctissimæ Trinitatis; non enim, ut diximus, *de forma baptismatis* tunc disceptabatur, sed *de fide baptizantium*. Nec quidquam in contrarium probat ea particula, *a quacunque hæresi*; pronomen siquidem universale cum salva accipiendum est, & in subiecta materia; modo scilicet hæretici conferant baptismum Christi, adhibeantque materiam & formam ab eo præscriptas. Sane Eusebius lib. vii. cap. 2. pag. 251. de controversia ætate Stephani excitata scribit: *Per id tempus non mediocriter controversia exorta est, utrum eos, qui ex qualibet hæresi convertuntur, baptismis purgari oporteret; quippe antiqua consuetudo invaluerat, ut in ejusmodi hominibus sola manuum impositio cum precationibus adhiberetur: nec tamen dixeris id moris servatum in recipiendis hæreticis, in adunata Trinitate non baptizatis*. Similiter S. Hieronymus in Dialogo adversus Luciferianos Tom. iv. pag. 305. *Quod si negandum quispiam putaveris hæreticos a majoribus nostris semper fuisse susceptos, legat beati Cypriani Epistolam, in quibus Stephanum Romanæ urbis Episcopum, & inveteratæ consuetudinis lacerat errorem. Legat & ipsius Hilarii libellos, quos adversus nos de hæreticis rebaptizandis edidit; & ibi reperiet ipsum Hilarium, confiteri, a Julio, Marco, Sylvestro, & ceteris veteribus Episcopis, similiter in penitentiam omnes hæreticos susceptos*. En & Hieronymus sola manuum impositione, & sine Rebaptismo ait recipi omnes hæreticos; quod tamen paullo infra negat de Pauli Samosatensi discipulis, tingentibus absque invocatione Trinitatis, subjiciens: *Symodus quoque Nicæna, cujus paullo ante fecimus mentionem, omnes hæreticos suscepit, exceptis Pauli Samosatensi discipulis*. Etiam S. P. Augustinus lib. v. de Baptismo cap. 5. num. 6. ait, *Homines occulta nescio qua inspiratione Dei detestantur, si quis iterum baptismum accipiat, quem ubicunque jam acceperat*: nec tamen aliquem fore arbitror, qui dicat probatum hoc loci ab Augustino baptismum apud Paullianistas receptum. Ad secundum dicimus Cyprianum, utpote existimantem singulas hæreses proprium habere baptismum, ex quo Stephanus baptismum Christi a quocunque hæretico datum probaverit, intulisse probatum quoque a sancto Pontifice baptismum hæreticorum illorum, qui non baptizant in Trinitate, quoniam in sententia Cypriani sicuti penes neminem hæreticorum est vera fides, ita penes neminem hæreticorum est verum baptismus. Ad tertium respondet Antonius Charlas, & cum eo quidam Scolaſticorum recentiorum, Marcionem, Valentinum, & alios hæreticos, quorum baptismus probatum a Stephano narrant Firmilianus, & Cyprianus. baptizasse in nomine Trinitatis: quam responſionem probant, quoniam Augustinus lib. vi. de Bapt. cap. 25. scribit, *facilius inveniri hære-*

*hæreticos, qui omnino non baptizent, quam qui verbis Evangelicis non baptizent.* Et quidem stare potest, ut hæretici *in Trinitate* baptizent, etiam si non credant Trinitatem esse unam substantiam, aut tres distinctas personas; quemadmodum baptizant *in nomine Christi*, tametsi non credant Christum esse simul verum Deum, verumque hominem. Verum huic responsioni undequaue non subscribo; nam complures hæreticos *formam* baptismatis temerasse, licet pauci id facerent ætate Augustini, certissimis testimoniis ostendi cap. VIII. prop. 3. Marcionitas vero olim rebaptizatos, nec debita *forma* tinctos, constat ex Timotheo presbytero apud Balsamonem pag. 1050. Cypriani ergo sensus est, eò prorumpere sententiam Stephani, ut credat *baptismum Christi*, idest, *in nomine Trinitatis* collatum remittere peccata, etiam si baptizent hæretici, Marcionis, Valentini, Basilidis, aut cuiusvis hæresiarchæ discipuli, Christum etiam, aut Trinitatem blasphemantes, non instituendo quæstionem, an hi hæretici, aut illi debitam adhiberent *formam*, quia apud quemcumque hæreticum ipse Cyprianus putabat illegitimum fore baptismum, qualicunque formula datum; sed culpando Stephanum quod crederet *nudam invocationem Trinitatis* prodesse absque fide baptizantium. Qua in re (cum debita in Cyprianum reverentia dictum volo) non videtur affectus sententiam Stephani. Nunquam enim is docuit baptizantes hæreticos dare Spiritum sanctum, remissionem peccatorum, & spiritalem regenerationem a se baptizatis, quemadmodum Stephanum interpretantur Firmilianus & Cyprianus; sed tantum, ait baptizatos ab hæreticis iterum non esse tinguendos, quoniam hæretici non *proprium* baptismum tribuunt, sed *Christi*: atque apud illos Ecclesia sibi parturit filios, si non *ex utero suo*, quemadmodum parit regeneratos in Catholica communione, saltim extra se, atque *ex semine viri sui*; ut præclaro exemplo filiorum Jacob, qui ei nati sunt ex ancillis, explicat Augustinus lib. I. de Baptismo cap. X. n. 14. Dicam brevi, Stephanus de *charactere* baptismatis, non de *gratia* loquebatur, nec eum latebat nefarium esse extra Catholicam baptizari; nisi a culpa aut bona fides excuset, aut ætas. Adde, quantum spectat ad Epistolam Jubajani, nullam in ea factam mentionem Stephani, quamquam id affirmant Pamelius & Baronius, sed *cuiusdam*, quem Cyprianus nequaquam nominat: nec credimus Stephanum scribentem adversus Cyprianum, Jubajano, non ipsi Cypriano dedisse literas; quod & Alexander Natalis, & alii observarunt. Quartum argumentum primo retorquetur in Launojum: siquidem per Augustinum in eodem Opere de Baptismo lib. I. cap. 23. Stephanus in hæreticis probavit baptismum Christi, *quod in eorum perversitate integrum mansisse cognovit*. Sed per Augustinum, asserente etiam Launojo, *integrum non est baptismus, nisi consecratum Evangelicis verbis*,

## Liber Trigesimus primus. Cap. XIII. 455

*verbis*, idest, *In nomine Patris & Filii & Spiritus sancti*, ex lib. 111. de Bapt. cap. 15. Ergo Stephanus ejusmodi duntaxat baptisma in hæreticis legitimum judicavit. Deinde respondeo, juxta Augustinum illud tantum dici *baptisma Christi*, quod Christum habet auctorem, quod datur secundum Evangelium, quod consecratur invocato nomine Trinitatis. Ita S. Pater lib. 2. contra lit. Petiliani cap. 24. num. 57. lib. de unico Bapt. cap. 8. num. 13. & epist. contra Donatistas, sive de unit. Eccles. cap. 23. num. 65. Itaque verissimum est, Stephanum judicasse *in nullo* iterandum *baptisma Christi*, quia in nullo iterandum censuit baptisma datum juxta Christi institutionem, & in nomine Trinitatis. Postremum argumentum nimis est futile: majorem siquidem venerationem Cypriano illustrior sanctitatis fama, non sanior doctrina comparavit; ut recte Natalis Alexander differt. xiv. 3. sæculi, & Pagius ad annum 256. num. v111. scribunt sententias, verbisque iidem. Lucii quoque, Melchiadis, Aniceti, aliorumque memoria minori celebritate recolitur, nec tamen hos dixeris errore aliquo imbutos. Responsiones autem Benedicti XII. insertæ Directorio Inquisitorum a Nicolao Eymerico, fuerunt conscriptæ anno 1330. cum ille adhuc Cardinalis esset; & apud Bzovium in Annal. non præferunt titulum Benedicti, sed Jacobi Fornerii Cardinalis, quia nimirum ita Fornerius inconsiderate de Stephano pronuntiavit, priusquam conscenderet Petri Cathedram.

PROP. V. Stephanus, neque Cyprianum, neque Firmilianum ob errorem Rebaptizantium a sui communione removit.

Hanc thesim juniores fere omnes propugnant, inter quos Natalis Alexander differt. x11. sæculi 3. Pagius ad annum 256. num. 12. H. Valesius Annot. ad v11. libri Eusebii cap. 5. atque viri de Re Sacramentaria optime meriti, Juenin, Tournely, Habert, Ledroin, alii: sed quoniam Baronius ad annum 258. num. 45. Joannes Cabassutius in Notitia Concil. cap. 3. Lupus noster tom. 1. in Can. Concil. pag. vet. edit. 243. alique perpauci affirmant disparem esse causam de Cypriano, & de Firmiliano; de utroque agendum est singillatim. Ergo in Cyprianum intortum nequaquam fuisse anathematis fulmen, probatur primo; etenim nullus veterum latæ in Cyprianum excommunicationis meminit, sed affirmant tantummodo, Stephanum Cypriano, aliisque excommunicationem fuisse comminatum. Videtis Eusebium lib. v11. cap. 3. & 5. pag. 252. Vincentium Lirinensem Com. 1. cap. 9. pag. 18. Facundum Herm. adversus Mocianum pag. 577. Immo haud obscure innuunt Stephanum provide a ferenda anathematis sententia abstinuisse. Eusebius enim eo loci narrat S. Dionysium Alexandrinum se per literas sequestrum fecisse apud Stephanum, ne excommunicaret rebaptizantes; quod dicam paullo infra pertractans de Firmiliano. II. S. Pater Augustinus lib. v. de Baptismo cap. 25. num. 35.

num. 35. ait: *Stephanus autem etiam abstinendos putaverat, qui de suscipiendis hæreticis priscam consuetudinem convellere conarentur: ille autem (idest Cyprianus) quæstionis ipsius difficultate permotus, & sanctis caritatis visceribus largissime præditus, in unitate cum eis manendum qui diversa sentirent. Ita quamvis commotius, sed tamen fraterne indignaretur, vicit tamen pax Christi in cordibus eorum; ut nullum inter eos schismatis malum oriretur. Lib. vi. cap. 1. Ista quæstio contra veterem consuetudinem disputationibus salva caritate atque unitate altereantibus discutebatur. Et lib. de unico baptismo cap. xiv. num. 23. ita Donatistas Augustinus perstringit: Ecce duo erant uno tempore, ut de aliis taceam, qui diversi sentiebant: duo erant eminentissimarum Ecclesiarum, Romana scilicet, & Carthagenensis Episcopi, Stephanus & Cyprianus, ambo in unitate catholica constituti; quorum Stephanus baptismum Christi in nullo iterandum esse censebat, & hoc facientibus graviter succensebat: Cyprianus autem in hæresi, vel schismate baptizatos, tanquam non habentes baptismum Christi, baptizandos in Ecclesia Catholica existimabat. Multi cum illo, quidam cum isto etiam sentiebant, utrique cum eis in unitate consistentes. Si ergo verum est quod isti dicunt (Donatistæ) & unde causam suæ separationis asserere, vel excusare conantur, in una communione Sacramentorum mali maculant bonos, & ideo corporali disjunctione a malorum contagione recedendum est, ne omnes pariter pereant; jam tunc Stephani & Cypriani temporibus perisse Ecclesiam confitendum est, nec aliquam posteris derelictam, ubi Donatus ipse spiritaliter nasceretur. Eandem unitatem commendat idem Cyprianus in fine Epistolæ 73. ad Jubajanum, laudantque in Carthagenensi tertia Synodo Episcopi alii Africani. Profecto si hi a Stephano fuissent excommunicatione separati; falso a se teneri unitatem jactassent, & falso Augustinus scripsisset vicisse in hac controversia pacem Christi, discussamque causam istam salva caritate atque unitate. Inapte quoque, ac pueriliter disputasset Augustinus postremo loco adversus Donatistas, si Stephanum inter ac Cyprianum servata non esset communio Sacramentorum. III. Ex vita S. Cypriani a Pontio conscripta apud Ruiaart in Actis Martyrum pag. 185. constat Xystum Romanum Pontificem Stephani successorem litteras ad Cyprianum dedisse paulo ante utriusque martyrium, idest, Cofs. Tusco, & Basso, sive anno 258. quod invictissimum argumentum est intercessisse tunc temporis Cyprianum inter, Romanumque Pontificem, communionem, atque unitatem, adeoque non latam in Cyprianum sententiam excommunicationis, aut certissime revocatam. Hæc de Cypriano.*

De Firmiliano vero primum constat Dionysium Alexandrinum, Stephanum a sententia excommunicandi Orientales Rebaptizantes offi-



officiosis literis removisse, interposita quoque opera Dionysii, & Philemonis presbyterorum. Vide Epistolam ejusdem Dionysii Alexandrini ad Xystum lib. v. 1. H. Eccl. Eusebii cap. 5. pag. edit. Valesii 252. Ibidem nota de Dionysio & Philemone presbyteris scriptum a Magno Dionysio, *συμφορὰς ὁρίσας Στεφάνῳ γυναικί, qui prius idem cum Stephano senserant*; ex quo loco Joannes Launojus infert hos presbyteros in Cypriani concessisse sententiam. Sed perabsurde; non enim de dogmate, se de excommunicandis Rebaptizantibus loquitur ibidem S. Dionysius, laudans presbyterorum istorum operam, qui irritatum animum Stephani flexerint ad lenitatem: quod & animadvertit in vita Cypriani §. xxx. accuratissimus Monachus S. Mauri. II. Probant hanc thesim Pagius, Alexander, & alii ex quo Firmilianum æque ac Dionysium Antiocheni Patres in Epistola Synodica anno 269. appellaverint *beata recordationis virum*, illumque Ecclesia Græca die 28. Octobris in Sanctorum Fastis retulerit (quamquam Firmiliani nomen inscriptum non sit Græcorum Menologio typis Urbinatibus cuso opera Cardinalis Albani,) & ex quo Firmilianus adfuerit duobus Antiochenis Conciliis celebratis adversus Paulum Samosatensem anno 265. & 269. III. Ut his argumentis, quæ trita & communia sunt, addamus & nostra, principio si Stephanus Firmiliano dixisset *anathema*; videtur nobis eadem excommunicatione illigandum fuisse, imo & illigatum etiam S. Cyprianum: tum quia dum aliquod dogma proferibitur lata in assertores excommunicationis sententia, ferit hæc omnes, & qualescunque propugnantes idem dogma: tum etiam quia communi Ecclesiæ praxi, phrasique judicium definitionum antiquissima, auctores omnes, cujuscunque conditionis existant, in damnatis assertionibus, universali potius, quam speciali appellatione interdum solent comprehendere, & solum hæretici pervicaciores, atque signiferi nominantur, nunquam sequacibus a pœna post latam sententiam immunibus. Neque vero Rebaptismum a Firmiliano primum dixeris contra avitam traditionem in-vectum, cum id attentarit prædecessor Cypriani Agrippinus, ac Cyprianus ipse asseruerit vetustissimam consuetudinem per Agrippinum *capisse corrigi*. Vide Augustinum lib. 2. de Baptismo cap. v. 1. num. 12. Aut nullos itaque, aut Orientales simul & Africanos, aut Africanos potius, quam Orientales, æquissimus ac sanctissimus Pontifex privavit Ecclesiastica communione. IV. Augustinus, ut dictum supra, scribit agitatam quæstionem de Rebaptismo, *salva pace, unitate, & Sacramentorum communione*. Vide lib. 1. de Bapt. cap. 7. lib. v. cap. 5. lib. v. 1. cap. 1. lib. de unico baptismo cap. 15. &c. Nec affirmari potest servatam unitatem tantum in Africa, quoniam & Augustinus loquitur generali assertionem, & si alicubi communio fuisset dississa, infirmo telo petisset Donatistas; ac denique tum Africanos, tum

Orientalis comprehendit priori loco citato, scribens: *Questionis huius obscuritas prioribus Ecclesiæ temporibus ante schisma Donati magnos viros, & magna caritate præditos patres Episcopos ita inter se compulsi salva pace disceptare atque fluctuare, ut diu conciliorum in suis quibusque regionibus diversa statuta nutaverint, donec plenario totius orbis concilio quod saluberrime sentiebatur, etiam remotis dubitationibus firmaretur.* V. Idem S. Pater de unico baptismo cap. xxv. inquit: *Cum ergo Stephanus non solum non rebaptizaret hæreticos, veram etiam hoc facientes, vel ut fieret decernentes, excommunicandos esse censeret, sicut aliorum Episcoporum & ipsius Cypriani literæ ostendunt, &c. Quinam erant alii Episcopi, præter Cyprianum, qui literis mandarunt voluisse Stephanum anathemate in Rebaptizantes animadvertere, nisi forte aut Firmilianus, aut Dionysius? Igitur tam ex Cypriani, quam ex Orientalium literis istud unum colligimus, Stephanum censuisse quidem excommunicandos esse Rebaptizantes, eos autem nequaquam excommunicasse.*

Opp. 1. Augustinus citato libro de unico baptismo cap. 14. post verba nuper producta ait: *Tamen cum eo Cyprianus in unitatis pace permansit.* Similia de Firmiliano non leges. II. Ipse Firmilianus in Epistola inter Cyprianicas lxxv. aperte se a Stephano excommunicatum fuisse testatur, scribit enim pag. 310. novæ edit. *Stephanum cum tot Episcopis per totum mundum dissensisse, abscindere se a caritatis unitate, & alienum se per omnia fratribus facere.* III. Narrat eo loci Firmilianus, a Stephano legatos Episcopos nec ad sermonem colloqui communis fuisse admissos, ac præcepisse illum fraternitati universæ, ne quis eos in domum suam reciperet, ut venientibus non solum pax & communio, sed & tectum & hospitium negaretur. IV. Testatur paullo supra Firmilianus pag. 304. jampridem a se explosum hæreticorum baptisma in Iconio, qui Pbrugia locus est, collecta Synodo: quare merito in ipsum, tanquam in erroris auctorem Romanus Pontifex animadvertit. V. Etiam Cyprianus in Epistola ad Pompejum pag. 293. Stephanum tanquam rumpentem unitatem his verbis vellicat, *Ille utique unitatis oblitus mendacio & contagia prophana tinctionis usurpat: & infra pag. 296. Dat honorem Deo, qui unitatem & veritatem de divina lege venientem non tenens hæreses contra Ecclesiam vindicat? Dat honorem Deo, qui hæreticorum amicus & inimicus Christianorum Sacerdotes Dei veritatem Christi, & Ecclesiæ unitatem tuentes abstinendos putat?* Ex quibus verbis potest colligi etiam Cyprianum excommunicatum fuisse a Stephano.

Resp. ad primum, singillatim ab Augustino ibidem commemorari Cyprianum, quoniam probat permanisse in Africa Ecclesiam, servatamque Sacramentorum communionem ex quo hæc vigerit usque ad tempora Cæciliani & Majorini: hanc tamen unitatem etiam

extra

extra Africam cum Rebaptizantibus custoditam Augustinus aliis in locis affirmat, & in argumentatione, qua urget hoc in loco Donatistas, manifesto supponit. Ad secundum respondemus verba Firmiliani, etsi rem magnopere exaggerant, nullum exhibere prolatæ a Stephano excommunicationis indicium, ut observant in Notis ad Eusebium pag. 141. Valefius, & Pagius ad annum 256. n. xii. De dissensione doctrinæ, seu disceptatione loquitur Firmilianus. Verum enim vero pag. 303. Cyprianum alloquens inquit: *Quod nunc Stephanus ausus est facere, rumpens adversus vos pacem, &c.* & nihilominus juxta Baronium, cujus est hæc argumentatio ad an. 258. num. xvi. Cyprianus a Stephano excommunicatus non fuit. Scribens idem Firmilianus pag. 310. Stephanum cum singulis vario discordiæ genere rumpentem, modo cum Orientalibus, quod nec vos latere confidimus, modo vobiscum, qui in meridie estis, commonstrat loqui se oratorum more: nam si revera Stephanus Afros, & Orientales excommunicasset, non vario discordiæ genere, sed uno, eodemque pacto pacem fregisset. Ad tertium dicimus in hoc etiam falli Baronium, quod velit legatos, de quibus Firmilianus, missos ab Orientalibus communione privatis, cum apertum sit eosdem legatos fuisse Africanos, ac missos, ut supra diximus, post Synodum Carthaginensem secundam; verba enim Firmiliani sunt, *Modo vobiscum, qui in meridie estis, a quibus legatos Episcopos, patienter sane & leniter suscepit, &c.* Vides missos legatos ab iis, qui in meridie sunt, scilicet ab Africanis? Supra etiam scripserat Firmilianus per Stephani inhumanitatem effectum, ut fidei & sapientiæ Afrorum caperet experimentum. Appellat ergo inhumanitatem, quod cum Afris Romæ factum acceperat a Rogatiano. Si quid igitur evinceret argumentatio ista, probaret Africanos, non Orientales excommunicatos a Stephano. At nec istud evincit; nam Firmilianus conceptis quidem verbis negat legatos ad colloquium admissos, sed quod attinet ad testum & hospitium, exprobrat minas tantum & jussa, non rem ipsam; quod nempe Stephanum linire studuerint Philemon ac Dionysius, ut acute expendit Auctor vitæ Cypriani num. xxx. & ex Epistola Cypriani ad Pompejum coniecerat antea Valefius. Quamobrem Stephanus quod præconceperat animo, non mandavit executioni. Ad quartum ex dictis constat, ante Iconiensem Synodum, investum Rebaptismum a Carthaginensi sub Agrippino. Ad ultimum dico, ea Cypriani verba, *Unitatis oblitus, &c.* unitatem significare baptismatis, non unitatem communionis: quod ex eodem textu manifestum est; ait quippe Cyprianus: *Et cum singula hæreses singula baptismata, & diversa peccata habeant, hic cum omnium baptismo communicans universorum delicta in sinum suum coacervata congestit. Et præcepit nihil aliud innovari nisi quod traditum est; quasi is innovet, qui unitatem*

*tatem tenens unum baptisma uni Ecclesia vindicat, & non ille utique, qui unitatis oblitus mendacia & contagia profana tinctionis usurpat. Ex altero autem testimonio solum concluditur Stephanum putasse excommunicandos, non actu excommunicasse Rebaptizantes, quod verbis Augustini de Unico Baptismo, necnon Eusebio, Vincentio Lirinensi, Facundo, aliisque magnopere est consentaneum.*

PROP. VI. Non est certum, quod Cyprianus aut Firmilianus a propria de Rebaptizandis hæreticis sententia recesserint.

Probat<sup>ur</sup> 1. Nam post receptum Stephani decretum S. Cyprianus non acquievit, sed illud oppugnare studuit scribens ad Pompejum, & ad Firmilianum, tertiamque Synodum Carthaginensem indicens pro recepta in Africa novitate stabilienda & confirmanda. Post tertiam autem illam Synodum persecutione exorta aliud animum. S. Martyris caritas & sollicitudo distraxit. Etiam Firmilianus in Stephanum plura iratus effudit, & quæ commonstrant ejus in propugnanda priori sententia firmitudinem, & contentionem acerrimam. II. Post Cypriani martyrium fuerunt in Africa Rebaptizantes, & Donatistæ quarto vertente sæculo, qui sese S. Martyris exemplo & auctoritate nitentur defendere. In Cappadocia pariter usque ad tempora Magni Basilii, & centum saltem annorum intervallo obtinuit Rebaptisma, cum Rebaptizantibus accesserit ipse quoque Basilii, Cypriani ac Firmiliani, ut in Epist. Canonica testatur, vestigiis insistent. III. Quamvis Augustinus lib. 2. de Baptismo cap. 4. & in Epist. 93. ad Vincentium Rogatistam scribat fortasse *tam sanctam, & tam pacatam* Cypriani *animam* tandem veritati cessisse, fatetur tamen non posse id certissime asseri, quoniam *revera correxisse istam sententiam non invenitur*. IV. Animadverti supra, & inferius repetam, Cyprianum ac Firmilianum in hoc deceptos, quod crederent tribui a Stephano hæreticorum baptismini *remissam peccatorum*, & conferri Spiritum sanctum cuique etiam in hæresi permanenti; qua falsa opinione sanctorum virorum menti inhærente, videntur mihi, ut explicabo, digni aliqua excusatione, si Romano Pontifici obstiterint; eademque opinione permanente vero non est simile palinodiam cantasse, & ex prava intelligentia sententiæ Stephani in errorem nefarium, absurdissimumque fuisse delapsos.

Oppones: Orientales omnes ad concordiam rediisse, scribit Dionysius Alexandrinus in Epistola ad Stephanum apud Eusebium lib. vii. H. E. cap. 5. Ipsos Orientales rescidisse judicium, *quo eis placuerat de ista baptismi questione Cypriano, atque illi Africano Concilio consentire oportere*, inquit Augustinus lib. 3. contra Cresconium cap. 2. De Africanis etiam scribit Hieronymus adversus Luciferianos, *ad antiquam consuetudinem revolutos novum emisisse decretum*.

Resp.

Resp. Dionysium in ea Epistola, quam Juenin, alique male, consignant anno 259. cum ante biennium Stephanus coronatus sit martyrio, aperte loqui de unitate, ad quam reversæ sunt *cunctæ per Orientem, & ulterius posita Ecclesiæ, quæ prius erant discissæ*, ideoque de compresso schismate Novatiano, quod omnes fere Ecclesiæ turbaverat, non de controversia baptismatis, quæ nec attulerat discissionem, nec ante magni Basilii ætatem fuerat finita. Idem Eusebius paullo supra ait Dionysium ad Stephanum literas conscripisse, quibus certiorum ipsum fecerat, Ecclesiæ omnes *mollito jam persecutionis furore, Novati turbulentam novitatem detestantes inter se pacem iniisse*. At Augustinus Cresconium Grammaticum ex suis principiis revincit: cum enim Donatistæ redarguerentur ab Augustino, quod ab Orientalium communione se discrevissent, & Donatistæ reponerent, factum id, quoniam Orientales iudicium resciderant quo statuerant Rebaptisma; valide insurgit Augustinus, debuisse majores Donatistarum, & separationis hujus auctores cum Orientalibus etiam diversa sentientibus tenere communionis unitatem, quemadmodum in suis literis fecisse legimus Cyprianum; aut ipsos Orientales imitari, qui retractantes sententiam contra tot millia Episcoporum, quibus displicuit in toto orbe, iudicium suum non rescidisse dicendi erant, sed correxisse. Hæc fusiori stilo Augustinus: quamquam si dicamus eo temporis Orientales communi adhæsisse sententiæ, quod utique verum est, non idem est asserendum de Firmiliano, decursuque sæculi præcedentis. Ad testimonium Hieronymi respondet Turnelius, aliquos Africanos Episcopos, qui Concilio Arelateni primo interfuerunt, at non Cyprianum, sententiam retractasse: quod non probo, nam tertia Synodus Carthagenensis aut anno 256. aut anno proximo celebrata est, Synodus autem Arelatenensis anno 314. quo Episcopi prioris Synodi decesserant, aut saltem decrepita senectute laborabant. Episcopi insuper Afri, qui interfuerunt Arelateni Concilio, sunt Cæcilianus Carthagenensis, Lampadius de Utina, Victor Uticensis, Faustus Tuburbitanus, & ex Numidia Victor de Civitate Legisvolumini, Tom. 1. Concil. Harduini pag. 267. At Carthagenensi Synodo interfuerunt e Carthagine Cyprianus, ex Utina Felix, ex Utica Aurelius, a Tuburbo Sedatus, & ex Numidia Victor Octavensis, non Victor Legensis. Vide eodem volumine pag. 159. Alii ergo respondent Hieronymum asserere, quod ignoravit Augustinus degens in Africa, neque illum posteritati commentaria aliqua commendasse, ubi id legerit: quod est Hieronymum officiose dimittere. Nos arbitramur dici a Hieronymo *illos ipsos* Episcopos habita Ecclesiarum, non personarum ratione; loquitur enim de traditione Majorum, quam pullulantes quandoque errores supprimere nequeunt, plurimis semper contra novitatem pugnantibus.

PROP.VII.

PROP. VII. Multa sunt, quæ Rebaptizantium, & præsertim Sancti Cypriani excusant errorem, maxime ante Stephani Papæ decretum.

Quamvis id supra propositione tertia significaverim; exigunt tamen egregia merita Cypriani, ut hoc in loco idem persequar argumentum. Facit ergo primum ad excusationem Martyris præclarissimi, quod etsi pugnabat adversus antiquam traditionem; non erat ea traditio ex earum genere, quas omnium auribus cotidiana prædicatio inculcat: nec ipse Cyprianus novam induxerat consuetudinem, sed ejus decessor *Agrippinus, & nonnulli per Africam Coepiscopi, etiam per Concilii sententias*, majorum traditionem deferere ausi fuerant; quod nisi præstitissent, nec adversus eam *tam sancta Anima ratiocinari ausa esset*. Vide Aug. lib. 2. de Baptismo cap. viii. num. 13. Deinde non ipse solus Rebaptismum propugnabat, sed cum eo consenserant octoginta ferme antistites Afri, & si nonnulli contrariam consuetudinem opponebant, non afferbant tamen ejusdem consuetudinis tales defensiones, quibus illa talis Anima moveretur, ex Augustino ibidem, & lib. 1. de Baptismo cap. xvi. num. 28. Præterea rationibus a Cypriano adductis talis verisimilitudo, splendorisque vis inerat, ut ipsemet Augustinus affirmaret, se quoque in ea sententia nutaturum, nisi firmatus esset *Ecclesie concordissima auctoritate*, lib. 2. de Baptismo cap. iv. num. 5. Insuper nunquam Cyprianus ob doctrinæ suæ defensionem deseruit unitatem, nec pacis vinculum rupit, ut omni jure S. P. Augustinus illius auctoritate atque exemplo exagitaverit Donatistas, lib. 1. de Baptismo cap. xvi. num. 27. lib. 2. cap. v. num. 6. lib. 3. cap. xix. num. 26. lib. iv. cap. 8. num. 11. Epistola 93. num. 15. 37. 42. lib. 2. contra Cresconium cap. 33. & seqq. nec verbis tantum, re quoque, & opere Cyprianum servasse unitatem ostendit ejus Epistola 82. ad Successum, & quod in ejus vita narrat Pontius de literarum commercio cum Xysto. Rursus nondum *eliquata veritate*, maluit Cyprianus prædecessorum suorum inventa defendere, quam inquirendo amplius laborare, quasi fessus acquiescens *in seculo auctoritatis*, ex Augustino lib. 2. de Baptismo cap. viii. num. 13. & licet magnam adhibuerit diligentiam, at non summam perfectamque rei inquisitionem, ideoque laborarit ignorantia *vincibili*; quia nihilominus nulla lege ad majorem diligentiam adhibendam obstringebatur, ipsa ignorantia immunem illum reddebat a culpa, ut de sanctis viris Semipelagianismo imbutis disputat in scrupulis Anonymi evulsis & eradicatis Tom. 111. pag. 971. vlr summus Norisius. Denique post Stephani rescriptum, ad Cypriani excusationem plurimum valere arbitror, quod in hac questione nondum satis distinctum esset inter usum & effectum Baptismi: quare Cyprianus, alique Rebaptizantes putabant

bant Stephanum tradere veram apud hæreticos *remissionem peccatorum*, & consecutionem salutis *extra unitatem Ecclesiæ*: quod mirum est accuratiores Theologos non observasse. Sanctus enim Cyprianus in Epistolis de Rebaptizandis hæreticis in id toto nisu incumbit, ut accitis undique Scripturarum locis demonstret apud hæreticos neminem posse consequi remissionem peccatorum, quia non est ibi fides, Spiritus sanctus, & immaculata Agni sponsa: & præsertim scribens adversus Stephanum, hunc, &ique consentientes redarguit, quod *effectum baptismi majestati nominis tribuant*, affirmatque baptizati apud hæreticos non posse Christum induere, & multo magis Spiritum sanctum, quem Christus misit, accipere: hæresim, quæ Christi sponsa non est, nec purgari posse, nec sanctificari lavacro ejus, ac multa his similia, & in eundem finem spectantia. Firmilianus quoque reprehendit in Stephano, quod contenderet *remissionem peccatorum & secundam nativitatem* ex hæreticorum baptismo procedere, ut constat ex illius Epistola ad Cyprianum. Audiatur Augustinus initio libri sexti de Baptismo: *Nec ob aliud illis temporibus, quando ista questio contra utilem consuetudinem disputationibus salva caritate atque unitate altercantibus discutiebatur, visum est quibusdam etiam egregiis viris antistitibus Christi, inter quos præcipue beatus Cyprianus eminebat, non esse posse apud hæreticos vel schismaticos baptismum Christi, nisi quia non distinguebatur Sacramentum ab effectu, vel usu Sacramenti: & quia ejus effectus, atque usus in liberatione a peccatis & cordis rectitudine apud hæreticos non inveniebatur, ipsum quoque Sacramentum non illic esse putabatur*. Ex his concludendum censeo, quod si Cyprianus potuisset cum Stephano congredi, & percepisset S. Pontificem distinguere characterem baptismatis a gratia, nec asserere hæreticorum baptismate purgari hæresim, aut peccatum baptizatorum permanentium in hæresi, facile Stephano consensisset; nam venientes ab hæreticis ad Ecclesiam Catholicam, quamvis non rebaptizatos gratiam consequi *propter unitatem Ecclesiæ* idem Cyprianus non denegavit. Vide Augustinum lib. 2. de Baptismo cap. xiv. Ex non accurata itaque explicatione sententiæ tam gravis controversia manavit.

PROP. VIII. Ex quo beatissimus Cyprianus decreto sancti Stephani oblectatus sit, nequit inde labefactari Romanorum Pontificum in rebus fidei, vel morum, judicium irreformabile.

Quoniam ex facto Cypriani non solum heterodoxi, verum etiam nonnulli Parisienses Theologi nituntur ostendere, in rebus plane non discussis judicium summi Pontificis non esse firmissimum, nec habendam esse irreformabile, nisi Ecclesiæ, aliorumque Episcoporum accedente consensu, Missorius autem hinc etiam, ne lædatur Romani Pontificis auctoritas, a se fabricatæ suppositionis quædam pro-

proferat munimenta ; ostendam hoc in loco , quantum ponderis habeant productæ ex tam celebri disceptatione inter Cyprianum ac Stephanum ratiocinationes adversus Apostolicæ cathedræ firmitatem . Ac primum certissimum est , Cyprianum ante exortam de Rebaptismo controversiam & cum Stephano diffensionem , non uno in loco Romano Pontifici debitum honorem detulisse ; siquidem in Epistola 52. ad Antonianum scribit eum , qui non communicat cum Romano Pontifice , *nec communicare cum Ecclesia Catholica* : Epist. 55. ad Cornelium in eo agnoscit *Petri cathedram* , & *unitatem Sacerdotii* : Epist. 67. ad Stephanum hujus auctoritatem implorat , oratque ut scribat in Arelatensem provinciam , *ut absento Marciano alius in locum ejus substituantur* ; & Epistola 69. ad Florentium Pupinianum , docet oriri schismata & hæreses , *dum Episcopus , qui unus est , & Ecclesiæ præest , superba quorundam præsumptione contemnitur* , ubi de Romano atque Pontifice instituit sermonem . Hinc Antonius Charlas lib. x. de libert. Eccles. Gallicanæ cap. x. & P. Joseph Augustinus Orsi de Auctor. Rom. Pontif. cap. 3. contendunt ad hæc potius , quæ pacato animo edidit Cyprianus , quam ad ea , quæ scripsit disputationis fervore commotus , esse attendendum . Verum cum soli hæretici denegent Romani Pontificis primatum , ejusque communionem floccifaciant ; at Meldensis Episcopus Jacobus Bosuet p. 2. Defens. declarat. Cler. Gallicani lib. xiv. cap. 2. alique Galliarum Theologi fateantur primatum Pontificis , ejusque cathedrâ nullam esse augustiorem & altiore , tenendam cum illo communionem , & nisi gravissimæ emergant difficultates , ei quoque ab omnibus obtemperandum ; nos præcitatæ Cypriani testimoniis , utimur tantum ad revincendos hæreticos , qui ex Cypriano probare nituntur Romanum Pontificem esse urbicum Episcopum , nullâ extra Romanam provinciam præditum auctoritate , ut præ ceteris jactant Vossius , Fellus , & Goulartius . Contra defensores autem declarationis Cleri Gallicani id unum illinc inferimus , Cyprianum nullatenus pertimescentem intentatum a Stephano anathema , adversus illum cogentem Synodos , nullumque insipientem periculum schismatis , aut alium a se videri , aut causam hanc non adeo gravem , ut adversarii arbitrantur , existimasse .

Censæo itaque eo temporis , quo apud quosdam orthodoxos Patres obtinuit opinio rebaptismatis , hanc ad disciplinam , non ad fidei decreta retulisse Cyprianum , ejusque collegas . Negant id quidem complures , inter quos Ludovicus Habert Tom. v. pag. 97. Auctor Operis de Re Sacrament. lib. 1. q. 6. §. 4. & Jacobus Bosuet lib. xiv. cap. 7. & 8. sed probatur nihilominus ea sententia Theologis præclarissimis , inter quos e Gallis connumerantur Natalis Alexander disert. 12. sæculi 3. art. 4. Jo. Claudius Somier in Hist. Dogm. S. Se-



S. Sedis lib. 2. cap. 8. Matthæus Petididier de Rom. Pontif. cap. 6. Gaspar Juenin disert. 2. de Baptismo q. 6. art. 3. §. 3. Jacobus Hyacinthus Serry de Rom. Pontif. falli & fallere nescio cap. 8. Honoratus Tournely in Prælect. ad Sacr. in genere q. 7. art. 2. alique permulti. His vero nec repugnat Pontificiæ auctoritatis infensus hostis, & apostata Casimirus Oudinus de Scriptorib. Eccles. Tom. 1. pag. 269. In hanc sententiam principio me trahunt pervulgata argumenta, quæ promuntur ex ipsis Epistolis Cypriani. Hic enim in Epistola ad Iubajanum ait: *Hæc tibi breviter pro nostra mediocritate rescripsimus; nemini præscribentes, aut præjudicantes, quominus unusquisque Episcoporum quod putaverit faciat, habens arbitrii sui liberam facultatem.* In Epistola ad Stephanum: *Ceterum scimus quosdam quod semel imbibierint nolle deponere, nec propositum suum facile mutare, sed salvo inter collegas pacis & concordia vinculo quadam propria, quæ apud se simul sint usurpata retinere: qua in re nec nos vim cuiuspiam facimus, aut legem damus, cum habeat in Ecclesia administratione voluntatis suæ arbitrium unusquisque prepositus, rationem actus sui Domino redditurus.* Nec aliter loquuntur Episcopi alii Africani in Præfatione Concilii tertii Carthaginensis. Cyprianus ergo, ac Rebaptizantes alii existimabant quæstionem illam ad meram disciplinam pertinere; aliis non solum Domini iudicium, sed etiam Ecclesiasticum formidassent, nec cum adversariis pacis vinculum & concordiam servassent, nec denique asseruissent habere unumquemque Episcoporum in istiusmodi rebus propriæ voluntatis arbitrium.

Resp. Auctor de re Sacram. Tom. 1. pag. 82. noluisse Doctorem humillimum legem alicui præscribere, ideoque communionem cum adversariis servasse, quod veritas nondum discussa esset & eliquata, sed tali difficultate involuta, ut liberum esset unicuique in re universalis Ecclesiæ supremo iudicio non definita sententiam suam propugnare; quod apertissime docet Augustinus lib. v. de Baptismo cap. 17. Equidem hoc asserere Augustinum, imo & affirmare Concilii plenarii auctoritate controversiam hanc eliquatam ac finitam, concedimus: ipsum autem Augustinum loqui de quæstionibus fidelis, negamus. At de hoc infra. Interim si Auctor iste contendat, fas esse re non discussa plenaria in Synodo, ut Augustinus ait, invicem disceptare, etiamsi iudicium tulerit Romanus Pontifex; nil aliud affirmabit, quam in gravi dissensione idoncum non esse ad causam finendam Romanum Pontificem, ut tenet Bossuet iisdem Augustini testimoniis productis citato lib. xiv. cap. 2. Si autem id affirmet non accedente definitione Pontificis, adeo, ut sentiat Stephani decretum, non fuisse ex Cathedra, omnique latum auctoritate, quod Bossuetius negat proximo cap. 6. & seq. jam ex facto Cypriani nil adversarii concludent adversus supremam in definiendis rebus fidei auctoritatem.

tem Pontificis. Atque nos utraque in parte a Bossuetio, ceterisque Declarationis Cleri Gallicani defensoribus dissentimus, negantes iudicium Stephani fuisse definitivum, atque, ut inquirunt, *ex cathedra*; & iudicium Pontificis *irreformabile* non esse in omnibus, etiam gravissimis, fidei quæstionibus. Profecto Cyprianus ait omnes Episcopos habere libertatem faciendi quicquid libuerit *in Ecclesiæ administratione*; & ait salvo vinculo pacis retineri ea, quæ usu & consuetudine *usurpata sunt*. Hæc vero quænam sunt, nisi res ad disciplinam spectantes? Addo, quod et si causa Rebaptizationis perplexa, admodum erat, & ambigua, Cypriano tamen videbatur certissima; quod idem Auctor probat præcedenti pag. 81. ex laudibus, quibus suam sententiam exornat, & ex conviciis, quibus onerat sententiam oppositam: at nemo consultus ab altero in rebus, quæ sibi videntur certæ, & pertinentes ad fidem, responderet posse unumquemque tenere quod libeat, nec alicui præjudicandum: ideoque Cyprianus similia respondens sententiam suam aut certam non reputabat, aut non pertinentem ad fidem. Si primum dicas; cur vir humillimus in re sibi dubia, tanta animositate consuetudinem antiquiorem, traditionem, & rescripta Stephani lacerabat? Si reponis alterum; quomodo non arbitrabatur vir sanctissimus agi tantummodo de re spectante ad disciplinam? Accedit quod Firmilianus in Epistola ad Cyprianum, dum conqueritur Stephanum intentasse rebaptizationibus excommunicationem, ut probet injuste comminatum hanc poenam ob præfens dissidium, ait apud Romanos *circa celebrandos dies Paschæ, & circa multa alia divina rei Sacramenta esse aliquas diversitates, nec observari illic æqualiter omnia, quæ Hierosolymis observantur: secundum quod in ceteris quoque plurimis provinciis multa pro locorum & nominum diversitate variantur; nec tamen propter hoc ab Ecclesiæ Catholicæ pace atque unitate aliquando discessum sit. Quemadmodum ergo controversia de die Paschatis, diversitas rituum in Sacramentis, & quæ in plurimis provinciis salva unitate variantur, ad solam attinent disciplinam; ita ad meram disciplinam spectare eo tempore credebatur Rebaptizatio.*

Nec illo duntaxat tempore; etiam post Concilium Nicænum; quod in sententia multorum, & maxime Jacobi Bossuet cap. 9. ejusdem libri pag. 268. est illud *plenarium*, quo hæc controversia juxta Augustinum eliquata est, non ad fidei decreta, sed ad disciplinam hæc quæstio pertinuit, nec forte transit in dogma fidei ante Tridentinum Concilium: cujus extat de hac re canon XI. sess. VII. Profecto nec a Nicæna Synodo definitam tanquam de Fide censent laudato in loco Natalis Alexander, Pagius ad an. 215. num. 2. Antonius Boucat de Sacram. in genere pag. edit. Paris. 393. quod & probatur, ex quo S. Basilius, qui floruit post Nicænam Synodum, natus anno

Do-

Domini 328. ac mortuus anno 379. in Epist. Canonica ad Amphilo-  
chium pag. 759. censet rebaptizandos hæreticos , & hoc disciplinæ  
esse , non fidei .

Doctissimus Meldensis Episcopus respondet cap. 8. pag. 267. p. 2.  
se de Cypriano & Firmiliano pertractare , non de Basilio . Sed fa-  
cile hæc responsio refellitur . Primo , quia S. Basilius Cypriani & Fir-  
miliani sententiam amplectitur , commonstratque se permoveri iis-  
dem rationibus , quod scilicet hæretici omnes sint extra Ecclesiam ,  
nec valeant gratiam conferre , qui ea carent . *Verum enim vero* (in-  
quit Basilius) *antiquis visum est , Cypriano dico , & nostro Firmilia-  
no eos omnes uni calculo subicere : quoniam separationis quidem prin-  
cipium per schisma , qui autem se ab Ecclesia abjunxerunt , non habent  
amplius in se gratiam Spiritus .* Addit eos non posse amplius Spiritus  
sancti gratiam aliis præbere , a qua ipsi exciderunt . Qui ergo Firmi-  
liano & Cypriano adhæret , iisdemque innititur principiis , eodem  
sensu quæstionem istam pertractat . Deinde , si post plenarii Concilii  
definitionem potuit quæstio inter *adiaphora* computari , & tamen ea-  
dem censeatur quæstio fidei , jam non solius Pontificis , sed & Synodi  
universalis in discrimen advocatur auctoritas . Respondet præterea  
Bossuet Basilium non satis hætenus intellectum , nec hæstitasse an vale-  
ret baptismus ab hæreticis debita forma collatus , sed quinam hære-  
tici Evangelicis verbis uterentur , quinam perverso , adulterato , sibi-  
que proprio baptismate . Verum hæc responsio imbecillior est præce-  
denti : putavit namque Basilius omnes hæreticos subicendos eidem cal-  
culo , nec adeo desipuit , ut crederet nullum hæreticorum uti verbis ,  
quibus consecratur baptismus . Addidit quoque rationem , non a for-  
mæ defectu petitam , sed quam urget frequentissime Cyprianus , non  
esse apud hæreticos *gratiam Spiritus* . Tandem diserte Basilius ait agi  
de sola disciplina , non de fidei dogmate scribens : *Sed quoniam non-  
nullis Asiaticis omnino visum est propter multorum æconomiam , &  
dispensationem eorum baptismum suscipi , suscipiatur : & paullo post de  
Encratitis , Quod si hoc universali æconomia sit impedimento futurum ,  
versus consuetudinem utendum est , & sequi oportet Patres , qui quæ  
ad nos pertinent , providerunt .* En aperte Basilius docet quæstionem  
de Rebaptismo spectare ad consuetudinem , ad æconomiam , ad di-  
sciplinam .

Multa quoque sunt ex Augustino , quæ veritatem istam confir-  
mant . Libro enim 2. de Baptis. cap. 3. ad excusandum Cyprianum ,  
ait , etiam Concilia , quæ per singulas regiones vel provincias sunt ,  
plenariorum conciliorum auctoritati , quæ fiant ex universo orbe  
Christiano , sine ullis ambagibus cedere , ipsaque plenaria sæpe priora  
posterioribus emendari , cum aliquo experimento rerum aperitur quod  
clausum erat . Quo in loco defensores Declarationis Gallicanæ , ne

ctiam plenariorum Synodorum elevent definitiones, ajunt Augustinum aut *humano more*, aut *ex Donatistarum sententia* locutum, cum tamen S. Pater aperte loquatur de dissensionibus, quæ *rerum experimento*, explorataque consuetudine dignoscuntur, idest, ad disciplinam spectantibus; nec ipsi Donatistæ præfractæ negarent Synodorum universalium auctoritatem, immo, ut constat ex Collatione tertiæ diei, negarent potius Cirtensem, & Romanam Melchiadis in causa Cæciliani celebratas, aut traditionis crimen opponerent Episcopis, ne harum judicio cedere cogerentur, aliam denique Synodum ampliorem peterent a Constantino. Ad hæc Augustinus cap. 9. ejusdem libri ait non tantum de consuetudine disceptatum fuisse, verum & solam consuetudinem Cypriano objectam, ideoque illum obstitisse, quia in Africam inuenta fuerat consuetudo contraria, quænam autem censenda esset universalis Ecclesiæ nondum innotuerat; quod factum plenaria in Synodo. *Consuetudinis robore* (inquit) *tenebatur orbis terrarum, & hæc sola opponebatur inducere volentibus novitatem, quia non poterant apprehendere veritatem.* Infra: *Hanc autem fuisse consuetudinem Ecclesiæ, quæ postea multis discussis ambagibus perspecta veritate plenario Concilio confirmata est, &c.* Ex plenaria itaque Synodo per Augustinum consuetudo, non dogma fidei, firmata fuit. Mitto quod S. Pater rebaptizationem hæreticorum appellat *humanum errorem*, rebaptizationem vero Catholicorum *diabolicam presumptionem*, libro de unico Baptismo cap. 13. quod in ea nova consuetudo præoneretur antiquæ, in hac Ecclesiæ Sacramentum rejiceretur. De re itaque Cypriani ætate agebatur, in qua etiam *plenaria concilia a posterioribus emendantur*, & consuetudo opponitur, consuetudo investigatur, consuetudo est dirimendæ controversiæ lydius lapis. Istiusmodi res pertinet ad disciplinam. Ergo de re pertinente ad disciplinam ætate Cypriani disceptabatur.

Dato tamen gratis, quæstionem hanc *tanquam fidei dogma* agitatam, negò decretum Stephani fuisse solemne & *ex cathedra*. Præclarus Scriptor de Auct. Rom. Pontif. lib. 3. cap. 5. docet quatuor ad dogmaticam definitionem discernendam notas haberi. I. Si contra Refractarios indicat anathema. II. Si eos declaret hæreticos. III. Si expresse asserat propositam definitionem ab omnibus tanquam fidei dogma tenendam esse. IV. Si juxta antiquam disciplinam res in aliqua Synodo sit discussa. Ita Tom. 1. laudati Operis pag. 277. Atque has omnes in decreto Stephani desiderari probat vir doctissimus, idque perspicuum est ex hæcenus dictis. Vereor tamen, ne vir præstantissimus nimium adversariis indulgeat. Nam Jacobus Bossuet citato lib. xiv. cap. 2. & 3. fatetur non quavis suborta quæstione sollicitandum orbem terrarum, & convocanda generalia Concilia; sed tantum *ex certa causa, si graves per orbem dissensiones oriantur, si*  
*aliter.*

*aliter nequeat pax coalescere*: unde infert causam Pelagianorum potuisse terminari iudicio Apostolicæ Sedis, causam vero Rebaptizantium nonnisi iudicio plenariæ Synodi. Quod cum nos prorsus rejiciamus; non possumus hanc notam supremæ definitionis probare, *Si in Synodo res discussa sit*; tunc enim certam esse causam, nec sollicitandum orbem, sed quæstionem finitam Rescripto Pontificis, annuit clarissimus adversarius. Mitto quod *re in Synodo* non discussa, innumeræ definitiones prodire, de fide quidem tenendæ: quas excludere possent Refractorii omnes, (ut faciunt perditissimi Jansenistæ) si characterem illum, notamque exigamus. Verum si notas illas quatuor, vel earum aliquam probes; nullam profecto earum invenies in decreto beati Stephani. Dictum a me Vol. v. pag. 168. notam definitionis *ex cathedra* esse, quod Pontifex illam culque, palam, solemnique ritu proponat, & tanquam de fide credendam finibus fidelibus tradat: quod etiam docet Matthæus Petitdidier cap. 8. pag. 251. aliique a me ibidem laudati. Character iste in decreto Stephani deerat, quia non damnabat Rebaptisma proponendo traditionem *dogmatis*, sed *consuetudinis*, & forte ad solum Cyprianum, ejusque collegas fuerat directum. Discrimen vero causarum a Bossuetio traditum optime refutatur a laudato Petitdidier cap. 6. Quod enim Augustinus scribit serm. 2. de verbis Apostoli, nunc 131. n. 10. epist. 157. ad Optatum, nunc 190. num. 22. lib. 1v. contra duas Epist. Pelag. cap. x11. num. 34. & lib. 2. Operis Imperfecti contra Julianum n. 103. causam Pelagianam finitam esse Innocentii & Zosimi rescriptis, superbe Pelagianos hanc gloriam captare, ut propter illos Orientis & Occidentis Synodus congregetur, nec ulterius causam Pelagianam examinandam ab Episcopis, sed a Potestatibus coerendam; id, inquam, etiam in causa Rebaptizantium dicendum esset, si Stephanus plena auctoritate & *solemniter* decrevisset, & quæstio non spectasset ad disciplinam, ut Meldensis Episcopus arbitratur. Enim vero falsum est quod ille ait, causam Pelagianam fuisse certam, & ab omnibus communiter refutatam, si loquamur ante Rescriptum Romani Præfulis; cum potius Pelagius in Jerosolymitano congressu, & in Synodo Diospolitana abierit immunis, & evaserit damnationem. Falsum quoque est quæstionem de Gratia & libero arbitrio perspicuam esse, non obscurissimam, ac perdifficilem ad solvendum. Si ergo causa Pelagii & causa Rebaptizantium æque spectassent ad fidem, & tam Innocentius, quam Stephanus sententiam definitivam pronuntiasset; utraque causa finita esset *Apostolicæ Sedis Rescripto*. Sic finitam causam Pelagianam affirmat Bossuetius; sic finitam causam Rebaptizantium negat Bossuetius. Aut ergo causa Rebaptizantium non spectabat ad fidem; aut Stephanus illam ex cathedra non definivit.

Postremo si recipimus sententiam Ludovici Maïmburgi in Tract. de Statu & prærogativis Eccl. Rom. & Jacobi Hyacinthi Serry de Rom. Pontif. contententium *irreformabile* esse Papæ judicium, dum rem decernit fufis ad Deum solemnibus precibus, præmiſſo accurato examine, & præhabita Eccleſiæ Romanæ, conſtitutæ intra ambitum Urbis, conſultatione; fieret conſequens decretum Stephani, ſuppoſito quod verfaretur circa fidei dogma, omni fuiſſe præditum auctoritate, ac debuiffe recipi ab omni Eccleſia: illud enim tulit Stephanus *cum ceteris collegis ſuis*, ut ſupra diximus, & in 1. Commonit. cap. 9. ait Lirinienſis. Ideoque hi Theologi, ne Cyprianum inſimulent violatæ fidei, ejus controverſiam nobiſcum referunt ad diſciplinam. Nos quidem hanc poſtremam ſententiam putamus falſam, nec aliam conſultationem exiſtimamus Pontifici neceſſariam, niſi quam exigit prudentiæ regula, ſive Cardinalium ſit, ſive Theologorum virorum, cum per ſe omnem pleniffimamque habeat auctoritatem: illius tamen ſententiæ meminimus, ut appareat hæc etiam probata, nullum ex factis Cypriani adverſarios noſtros habere præſidium.

Conſtat ex dictis argumenta eorum, qui ex controverſia Rebaptizationis impetunt Romani Pontificis τὴν ἀρραλίαν, inviſtiſſime refutari, non deſumptis e ſcholaſtico pulvere diſtinctiunculis. Opponit primo Boſſuetius quod ſcribit Auguſtinus lib. 2. de Baptiſmo cap. 4. controverſiam; de qua agimus, *altercationum nebulis involutam*, perductamque *ad plenarii concilii luculentam illuſtrationem & confirmationem*: quæ S. Pater repetit eodem libro cap. 9. Ait citato cap. 4. Auguſtinum de ſe profiteri, *Nec nos ipſi tale aliquid audere-mus aſſerere, niſi univerſa Eccleſia auctoritate firmati, &c.* Atque hinc infert in rebus difficilioribus, nebuliſque altercationum, poſſe aliquos reluſtari Pontificiæ definitioni, ut Cyprianus obſtitit Stephano præcipienti, & anathema comminanti. Ad hæc reſpondemus accipiendum S. Patrem de controverſiis ſpectantibus ad diſciplinam, in quibus duntaxat ſuperiora *Concilia plenaria emendantur a poſterioribus, & in quibus opponitur tantum conſuetudo*, quod Auguſtinus diſertiſſime affirmat iſdem in locis, quæ obji-ciuntur. In his ergo perducere aliquando controverſiam ad robur & diſcuſſionem concilii plenarii ultro concedimus, quippe *num conſuetudinis robore teneatur orbis terrarum*, nonniſi collatione Episcoporum poſſe dignoſci; ideoque & Aſiatici, quamvis in eos anathema Viſtor intendaſſet, nunquam a ſententia receſſerunt, niſi diſcuſſa a Nicæniſ Patribus controverſia. At in rebus fidei *reſcripto Apoſtolica Sedis finiri cauſam*, Auguſtinus non uno in loco affirmat pertractans de Pelagianis, id Meldeniſi Episcopo non denegante, ſed cauſarum diſcrimen ſupra diſpunctum comminiſcente. Addo ex Bellarmino lib. iv. de

de Romano Pontifice cap. 2. necnon ex Natali Alexandro citato loco, in fine art. 4. Catholicos omnes convenire, quod five errare possit Pontifex, five non, ab omnibus fidelibus sit audiendus. Quare si de dogmate fidei Cyprianus se pertractare agnovisset, non inquinaisset, se veniali culpa, sed exitiosa, & gravissima. Atque hinc exploditur illatio altera scriptoris eruditissimi cap. 5. pag. 264. Si dicas, Augustinus agnoscit in Cypriano veniale peccatum: *Ergo Pontifici decernenti infallibilitatem detraxisse, veniale peccatum est*. Etenim S. Pater veniale peccatum dixit, quoniam Cyprianus de consuetudine disceptabat, & non de fide: quamquam nec illud prætereundum est, fateri hac illatione virum, alioqui satis probum, suscepit a se causam, quæ nequeat omnino inculcate tractari; unde & tenebris opus damnaverit, quod postea in lucem editum vacillantium quorundam labefactavit ingenia.

Opp. 2. Cyprianus & Firmilianus controversiam talibus coloribus pingunt, ut sententiam suam recenseant inter fidei dogmata, & nihilominus decreto Stephani resistere. Igitur in causa nondum discussa exitiosum non est recedere a sententia Pontificis. Prob. ant. nam Cyprianus in Epistola ad Iubajanum probat hæreticos baptizare non posse, quia *fides est una, & unum baptisma*: quia non habet baptismum Christi, *qui est extra Ecclesie unitatem*: quia in sola Dominica ordinatione *licet baptizare, & dare peccatorum remissionem*. Idem cum Collegis in Concilio 87. Episcoporum inquit evacuare baptismum nostrum, *qui recipit baptismum hæreticorum*, fieri *a regno caelesti alienum* quisquis ab hæreticis tinctus non fuerit rebaptizatus, nec vindicare fidem & veritatem Ecclesiæ, *qui concedit hæreticis Ecclesie baptismum*: atque hæc asserta non humanis rationibus, sed divinis testimoniis communiebat. Similia Firmilianus. Resp. etiam Basilium, ut vidimus, iisdem momentis excludere omnium hæreticorum baptismum, & tamen docet apertissime quæstionem talem esse, ut servanda sit consuetudo, & statuta a Patribus æconomia. Polycrates etiam, alique Asiatici controversiæ de die Paschatis hærebant pertinaciter ob auctoritatem veteris, novique testamenti, quum luna xiv. Moses festivitatem Azymorum instituerit, eamque Christus Corporis, & Sanguinis sui mysteriis reddiderit celebriorem; & nihilominus ad disciplinam, non ad fidem pertinebat ea quæstio. Cyprianus itaque, & alii Rebaptizantes testimonia divina opponebant, unitatem fidei & baptismatis deprædicabant, hæreticos alienos ab Ecclesia, & a Spiritu sancto asseriebant; ut ex his, quæ scilicet catholica certa sunt, inferrent Ecclesiæ suæ disciplinam doctrinæ fidei magis esse conformem, non quod illa certa esset ac revelata, ut certum & revelatum est fidem esse unam, hæreticos alienos esse ab Ecclesia, non habere illos Spiritum sanctum; de his enim, quæ Cyprianus

prianus assumebat ad probandam sententiam nullum erat diffidium; de sententia autem, quam his probationibus confirmabat, fatebatur posse omnes Episcopos salvo pacis vinculo dissentire.

Opp. 3. Stephanus proculdubio credebat sententiam de non rebaptizandis hæreticis spectare ad fidem, & tamen Rebaptizantes non privavit communione. Igitur & Cyprianus potuit tenere communionem cum non rebaptizantibus, quamvis crederet ad fidem pertinere quæstionem illam. Respondent aliqui, si Stephanus non excommunicavit Cyprianum; aut non definivit ex cathedra, aut etiam Stephanus ratus est de consuetudine disceptari, non de re fidei. At ego respondeo, Theologos non consentire, num Stephanus causam definierit tanquam pertinentem ad fidem. Nonnulli quidem hoc affirmant, inter quos Tournelius pag. 215. primo quia Stephanus gravissimam excommunicationis pœnam Rebaptizantibus fuit comminatus, quod non fecisset in re ad meram disciplinam pertinente. Secundo quia in Concilio plenario, de quo Augustinus, sententia Stephani fuit approbata, ac definitum spectare ad fidem baptismi dati ab hæreticis validitatem. Tertio quia id affirmat Vincentius Lirinensis in 1. Commonit. cap. 9. At sunt rationes istæ fractæ admodum, & infirmissimæ. Prima quidem, nam etiam in rebus ad disciplinam universalem, & antiquitus derivatam spectantibus, potest Romanus pontifex *anathema* comminari, quod fecit Victor in Quartadecimanos: atque id paullo supra idem Tournelius animadverterat. Altera, quod nec in Concilio Nicæno, (hoc enim esse plenarium de quo Augustinus, censet eruditus Theologus) definitum est causam Rebaptizantium spectare ad fidem, ut liquet ex his, quæ diximus de Basilio: nec aliud Augustinus ait, quàm in plenaria Synodo rem esse eliquatam & discussam, quod tenet æque de fidei, & de consuetudinis disceptatione. Tertia, quoniam etiam Lirinensis de Stephano hoc tantum inquit, *Sanxit nihil novandum nisi quod traditum est*: sunt vero traditiones in Ecclesia quamplurimæ ad solam disciplinam spectantes. Hæc de argumentis propositis, non de Stephani sententia, dicta sint. Aliàs enim non inficias ibo, optime perspectam Stephano quæstionis naturam: sed a vibrando anathemate abstinuit, operam navante Dionysio, quod Afri nondum inter dogma & consuetudinem discrevisset; quemadmodum se gessit Victor erga Asiaticos acerrime pro nova disciplina pugnantes, interpellante pro his Irenæo. Sperabat quoque Stephanus Cyprianum ad veritatem pertrahere; quod fecisset utique, si diu vixisset, neque persecutio Valeriani turbasset Ecclesiæ pacem.

PROP. IX. Nonnulli sunt Patres, quorum de Rebaptismo sententia est obscura admodum, & ambigua.

Primus horum est S. Dionysius Alexandrinus: hunc adhæsisse Re-



Rebaptizantibus affirmat S. Hieronymus de Script. Eccles. cap. 69. p. 2. Tom. iv. pag. 119. scribens: *Hic in Cypriani, & Africanæ Synodi dogma consentiens de hæreticis rebaptizandis ad diversos plurimas misit Epistolas, quæ usque hodie extant.* Subscribunt Hieronymo Baronius ad annum 258. num. 48. Henricus Vales. in Notis ad Hist. Eusebii pag. 243. Nat. Alexander cap. 4. art. 6. H. Ec. sæc. 111. Joannes Cabasutius in Notitia Concil. cap. 3. alique permulti. Abieciunt tamen recentiores Theologi in sententiam oppositam his subnixi momenti. Principio, inquit Gaspar Juenin q. 6. de Bapt. cap. 7. art. 3. nusquam Rebaptizantes in suæ opinionis patrocinium vocasse ipsum Dionysium secundæ sedis antistitem, & sacrorum canonum peritissimum. Deinde si Dionysio comprobata fuisset Rebaptizantium sententia, eam & facto & verbis amplexati fuissent Episcopi sedis Alexandrinæ subiecti; cum tamen nullibi legatur Ecclesias Aegypti & Lybiæ iterum hæreticos redeuntes tinxisse. Præterea S. Basilus in Epistola ad Amphilochoium asserit Dionysium ratum habuisse baptismum Pepuzenorum; inquit enim Canonica prima, *Pepuzenorum baptismum nullam mihi habere rationem videtur, & miratus sum quomodo hoc magnum Dionysium, qui fuit canonicus, præterierit.* Et infra: *Non enim baptizati sunt, qui non in nobis tradita baptizati sunt; quare etiamsi hoc magnum Dionysium latuerit, nobis tamen non est servanda erroris imitatio.* Ad hæc Dionysius sequester ac mediator extitit pro Rebaptizantium pace cum Apostolica Sede redintegrandâ. At ineptus pacis fuisset conciliator, si ipsemet in eodem errore versatus esset. Hæc Juenin.

Verum hæc argumenta nil probant. Num enim Firmilianus & Cyprianus ad Dionysii patrocinium confugerint, incertum est: nec videtur inverisimile id fecisse, saltem Firmilianum; nam Dionysius pro Rebaptizantibus Orientalibus valida interposuit officia. Secundum argumentum probat oppositum: siquidem, si Juenino subscribamus, etiam S. Athanasius rejecit hæreticorum baptismum. Fuit autem Athanasius ejusdem Alexandrinæ Sedis Episcopus: ideoque obtinuit aliquando in Aegypto, & in ipsâ Alexandrina Ecclesia rebaptizatio. Verum ego de Athanasio aliter sentio, quamvis rebaptismus apud Orientales fuerit, teste Dionysio, frequentissimus. Tertium item argumentum infirmissimum est: si quid enim probaret, probaret S. Dionysium ratum habuisse baptismum Pepuzenorum, seu Montanistarum, qui, teste Basilio, nec tingebant *tradita forma*, idest, invocatione S. Trinitatis: quod nec Cyprianus, nec Firmilianus existimavit. Deinde respondeo, Dionysium ratum habuisse baptismum collatum a Pepuzenis, non ubique locorum, sed ubi juxta diversam disciplinam hæretici non rebaptizabantur, nec absolventur, sed dummodo Pepuzeni tingerent in nomine Trinitatis. Cataphrygæ  
*To, VI.* enim

enim & Montanistæ baptizando nequaquam præscriptam *formam* servabant, idemque ob testimonium Basilii dicendum de Pepuzenis: aliquod tamen inter Cataphrygas & Pepuzenos discrimen extitit, ut liquet ex Epiphanio h. 29. pag. 417. & ex Augustino de hæresibus num. 26. & 27. ubi Pepuzenis error iste de violata forma baptismatis non tribuitur. Præmitto Basilium in aliis Dionysii sententiis judicandis minus fuisse accuratum, ut dum ei impingit Anomæorum hæresim epist. xli. ad Maximum Philosophum pag. 803. Quo in loco deceptum Basilium constat ex Athanasio, & ex dictis lib. vii. cap. 6. Nec postremum argumentum est firmissimum: taliter enim Dionysius studuit Stephani indignationem compescere, ut scriberet sententiam Firmiliani *probatam in maximis Episcoporum Conciliis*, & rem esse gravem, & periculi plenam, ab ipsorum communione discedere: rebaptizandos hæreticos sancitum esse *non ab Afris solum, sed superiorum Episcoporum temporibus in Ecclesiis populosissimis, & in Conciliis fratrum apud Iconium & Synnada, & apud alios quamplurimos*. Vide Eusebium H. E. lib. vii. cap. 5. & 7. Si autem Dionysius penitus Stephano consensisset, debebat potius dare operam, ut Rebaptizantes æquo animo Pontificium decretum reciperent.

Honoratus Tournely pag. 200. & Ruinart in Actis Martyrum pag. 155. duo alia producant argumenta. Primum est, quod Dionysius in Epistola ad Philemonem apud Eusebium pag. 253. ait: *Hanc ego regulam & formam a beatissimo Papa nostro Heraclea accepi. Eos enim, qui ab hæreticis veniebant, tametsi defecissent, seu potius non defecissent illi quidem, sed in speciem cum fratribus communicantes, clam perverse doctrinæ magistros adire delati essent, ab Ecclesia ejectos post multas tandem preces non prius admisit, quam quæcunque ab adversariis audierant palam exposuissent: ac tum demum ad communionem eos admittebat, nequaquam existimans iterato baptismo eis opus esse*. Alterum argumentum petitur ex Epistola ad Xystum apud eundem Eusebium pag. 255. ubi ait Dionysius noluisse rebaptizare senem quemdam pedibus ipsius advolutum, ac dejerantem, Baptismum, quo apud hæreticos initiatus fuerat, nil cum nostro habere commune, proindeque orantem, ut purissimo lavacro, & verissima adoptione donaretur. *Quod equidem (ait) facere non sum ausus: sed diuturnam illi communionem ad se sufficere dixi*.

Ceterum neque ista evincunt aliquid: nam priori in loco agitur de *Apostatis*, qui baptismum in vera Ecclesia receperant, ut adnotavit Valesius, nec diffidet Ruinartius, ostendit autem aperte idem textus, quem integrum consulto produxi. Immo cum Dionysius immediate subjiciat, ideo *Apostatis* redeuntibus non opus esse iterato baptismo, *Quippe jam antea Spiritum sanctum ab ipso acceperant*, videtur innuere aliam Apostatarum, aliam hæreticorum esse

esse rationem . In altero autem loco non scribit Dionysius iccirco noluisse iterum tingere senem illum ingemiscntem , quoniam etiam baptisma hæreticorum ratum haberet , sed quia diu in Ecclesiæ communione vixerat , & Corporis & Sanguinis Domini diutissime participes fuerat , ut ibidem ait Dionysius . Rebaptizantes liquidem fatebantur , admissos olim ad altare *per ipsum unitatis vinculum* etiam absque iterato baptismo gratiam consequi . Vide Augustinum lib. 2. de Baptismo cap. xiv. num. 19. Profecto nisi Dionysius adhæsisset rebaptizantibus , non scripsisset non ausum se iterum tingere senem illum , qui ante Heraclæ episcopatum semper cætus fidelium particeps fuerat , *quia ei sufficiebat diuturna communio , & ad sacram mensam diutissime adstiterat* ; sed quia etiam baptismus hæreticorum ratum est , ac legitimus . Videtur itaque mihi potius Hieronymo , qui integras , suoque ævo extantes Dionysii epistolas pervolutavit , quàm recentioribus , qui sola earundem epistolarum fragmenta legerunt , assensum præbendum esse , præsertim cum fragmenta ipsa non prorsus rejiciant , ut dixi hætenus , *Rebaptismum* .

Quid verò de Athanasio ? Hunc , ut dixi , Gaspar Juenin , alique recentiores accensent Rebaptizantibus : non tamén Natalis Alex. dissert. xxiii. sæculi tertii , neque PP. S. Mauri Præf. in Opera Athanasii pag. 21. & in Notis ad 2. Orat. adversus Arianos pag. 510. quibus subscribimus . Argumentum contrariæ sententiæ est , quod sequitur . S. Athanasius oratione tertia , nunc 2. contra Arianos ait : *Quæ (quæso) igitur non plane vanum ac inutile fuerit baptisma , quod ab illis datur , cum id nonnisi species sit , & inane simulacrum ? Sicut igitur creatura diversum quid est a Filio : ita diversum quiddam a vero baptismo est quod ab illis existimatur dari* . Differt igitur in sensu Athanasii baptisma Catholicorum a baptisma hæreticorum , quemadmodum differt Creator a creatura . Hoc quidem argumentum non elidunt , qui reponunt loqui Athanasium de Arianis , qui *debitam formam* nequaquam servabant ; quoniam ætate Athanasii Arianos præscriptam baptismi formam temerasse non constat , & paullo post idem Athanasius nullum Arianorum baptismum pronuntiat , *etiamsi qui cum Ario sentiunt , quæ scripta sunt recitent , proloquanturque ipsa nomina* .

At alia ratione argumentum istud diluimus : respondemus enim Athanasium *vacuum & inutilem* appellare baptismum Arianorum , quantum ad effectum , non quantum ad characterem . τὸν (inquit Athanasius) ἰ παντὶ τοῖς ἀνὰ τὴν ἀληθείαν τὸ παραυτῶν διδόντων ἐστὶ , προσημασμένον μὴ ἔχειν , τὸ δὲ ἀλυστικῶς μὲν ἔχειν πρὸς τοὺς ὁμοίους βούληται ; idest , *Qui fieri potest , ut prorsus vacuus ac inutilis non sit Baptismus , qui ab illis datur , in quo quidem inest religionis simulatio , sed revera nihil ad pietatem queat conferre* ? Ubi non ait baptisma Arianorum .

esse Sacramenti *inane simulacrum*, sed habere *simulationem* religionis: nec ait *omnino nullum* esse, sed *vacuum, inutile, & non conferre ad pietatem*; quod subinde Athanasius demonstrans, docet non solum baptismum, sed etiam fidem, *quæ oritur ex rectâ doctrinâ*, ex præcepto Domini ad salutem requiri, ideoque inutilem esse aquam, quam hæretici donant, non quod ei desit ratio Sacramenti, sed quod ei desit pietas, propterea quod non profit salutare lavacrum, si illud suscipiens inquinetur hæresi, ac impietate. Πολλὰ (inquit) καὶ ἄλλα αἰρήσις λέγουσι τὰ ὀνόματα μόνον, καὶ ὁρῶντες δὲ ἑρῶντες, καὶ ἰσχυροὶ, καὶ τὴν πίσιν ὑπάκουσαν ἔχοντες, ἀνοσιτεύς ἔχοντες καὶ τὸ παρανομῆσαι διδόντες ἕδωρ, λυπημένοι δυνάμει, ὥστε καὶ τὸ βαπτίζοντες παρανομῶντες ἰσχυροὶ καὶ πολλοὶ ἐν ἀσέβειᾳ, καὶ λυπητοὶ. Multæ quoque aliæ hæreses nomina tantum pronunciant: verum cum recte non sentiant, uti dictum est, nec sanam habeant fidem, inutilis est aqua, quam donant, quippe cui desit pietas; ita ut quemcumque illi adperserint, impietate fedetur potius, quam redimatur. Movet nonnullos, quod scilicet Athanasius comparer baptismum Arianorum, cum baptismo Manichæorum, Phrygum, & Samosatensium, quorum lavacrum profecto *nullum* erat, cum nec debitam formulam hi fervarent; sed in eo comparat, quod omnium hæreticorum baptisma *vacuum* est, & *inutile* iis, qui adherent pravæ ipsorum doctrinæ: quo sensu Augustinus lib. de unico baptismo contra Petilianum cap. vi. num. 8. inquit: *Nihil prodest hæreticis ad salutem quod extra Ecclesiam verum baptismum per ignorantiam & tradunt & tenent; immo & obest ad damnationem, quod in sacrilega iniquitate erroris humani etiam divini Sacramenti, non per quam mundentur, sed per quam severius judicentur, detinent veritatem*. Hinc S. Athanasius paullo post ait, ab Arianis eos, qui ab ipsis accipiunt baptismum, decipi & eludi, quia major est ipsorum impietas, quàm ceterorum hæreticorum, ac *nullum* esse illum baptismum, quia cum filium Dei censeant rem creatam, nullum ab eo consequuntur auxilium, permanentque nudi plane, ac destituti divinitate; quæ omnia de effectu gratiæ proculdubio accipienda sunt. Ex alia parte Athanasius in Epistola ad Rufinianum, ubi pertractat de conditione hæretici recipiendi, non ait repetendum baptismum ab Arianis collatum, sed commonstrat se canonem Nicænæ Synodi, cui & interfuerat, tenere æconomiam, hæreticosque debita forma tinctos cum sola pœnitentia, & impositione manuum, admittere.

Major difficultas videtur esse de Optato Milevitano, de quo, ut certum est ratum habuisse baptismum datum a schismaticis, ita est incertum, an probarit baptismum ab hæreticis collatum. Sunt qui id negant ea ducti ratione, quod Optatus in primo contra Parmenianum libro n. 12. scribat, recte Donatistas clausisse hortum hæreticis, qui

*qui soli habent varia & falsa baptismata, quibus inquinatus non potest ablui, nec immundus emundare: id vero non esse afferendum de schismaticis, qui licet non sint in catholica, nobiscum tamen vera & communia Sacramenta traxerunt. Hæc, & alia plura explicari nequeunt de illicito, non de valido baptismo; siquidem nec apud schismaticos fas est Sacramenta recipere.*

Cum varia esse soleant Theologorum responsa, reponentibus aliis Optatum loqui de hæreticis, qui baptismi formam non servant, sive, ut idem ait, *falsaverunt symbolum*; dicentibus aliis sermonem instituere de fide, quæ ad consequendum effectum baptismatis requiritur, nec est apud hæreticos: expeditissimum mihi videtur, si reponamus Optati scopum hunc esse, Armenianum revincere quod segregavit se a Catholicis æque, ac ab hæreticis, autumans apud utrosque *Sacramenta esse inquinata*: priori enim libro de origine & causa schismatis agit, non de unitate baptismatis. Ita nimirum ad refellendum schismaticum recte probat Milevitanus Episcopus, non esse pertimescendam eam contaminationem, quæ contrahitur a Sacramentis hæreticorum ob pravitatem doctrinæ, si communicentur Sacramenta cum Ecclesia Catholica, unde illa iidem Schismatici hauserunt. Ceterum eodem libro 1. pag. 6. inquit Optatus: *In Trinitate baptismatis unionem defendimus*, scilicet, unus idemque est baptismus, modo conferatur sub invocatione Trinitatis. Et libro v. in quo pertractat de unitate baptismatis, producto circumcisionis exemplo, scribit pag. 80. *Semel enim factum servat salutem: si iterum fiat, potest afferre perniciem. Sic & baptisma Christianorum Trinitate confectum confert gratiam: si repetatur, facit vitæ iacturam. Infra. Aqua igitur sola & vera illa est, quæ non de loco, non de persona, sed de Trinitate condita est. Post pauca: Non licet post Trinitatem, in eadem Trinitate hoc iterum facere, idest, baptizare. Verum est, eo loci Optatum appellare mendacem aquam Praxeæ & Patripassianorum, quia abi (inquit) veritas non est, ibi est aqua mendax: sed mendacem appellat, quia ob fidei defectum non confert vitam, criminum mortem, nativitatem immortalem, & celestis regni comparisonem, quam credentis fides, & Trinitas præstat: Fides nimirum ut necessaria dispositio; Trinitas ut consecrans elementum. Hæc diluunt locum alium ejusdem libri pag. 83. In hoc Sacramento baptismatis celebrando tres esse species constat, quas & vos nec augere, nec minuire, nec præmittere poteritis. Prima species est in Trinitate: secunda in credente: tertia in operante; sed non pari libramine ponderanda sunt singula: duas enim video necessarias, & unam quasi necessariam: principalem locum Trinitas possidet, sine qua res ipsa non possit geri: hunc sequitur fides credentis: jam persona operantis vicina est, quæ simili auctoritate esse non potest.*

Bene

Bene igitur habet: *Ti iuitas necessaria est, ut res ipsa geratur*, quoniam invocatio Trinitatis constituit *formam* baptismatis. Sequitur *fides suscipientis*, quæ pariter necessaria est, non ut geratur res ipsa, sed ut baptismus vitam conferat spiritualem. Perspicuum est loqui Optatum de fide suscipientis, ut dixi, non de fide ministri, siquidem *operantis*, ut verbis utar Optati, *est tertia species* non adeo necessaria, uti necessaria est *Trinitas* ad constituendum Sacramentum, *fides* ad consequendam salutem. Hæc nostra de Optato sententia est.

Restat S. Cyrillus Hierosolymitanus, qui a permultis inter Rebaptizantes connumeratur, propterea quod scripserit Præfat. in Catecheses pag. 8. *Non licet his, aut ter hoc lavacro uti, ut si semel fueris eo frustratus, deinceps corrigas: si enim semel illo frustraberis, amplius id correctionem non patitur: unus enim Dominus, & una fides, & unum baptismus. Nam soli hæretici rebaptizantur; siquidem prius illud non erat baptismus.* Ubi cum loquatur S. Cyrillus de omnibus hæreticis univérse, non videtur de his accipiendus, qui *formam* viciant ac temerant. Sed vereor, ne docti viri decipiantur hac interpretatione Prevotii, aut Grodecii. Extat Græce: *Μὴν γὰρ ἀποτιμὴν ἀναβαπτίζονται, ἰσχυρὰ τὴν ἐπίστασιν ἐν τῷ βεβητούμῳ.* Male particula *ἰσχυρὰ* redditur per *siquidem*; est enim idem, ac *ubi*, *simul* ac, *quum*, aut consimilis: & videtur mihi Cyrilli sensum hunc esse, unum esse baptismum, nec repeti unquam; rebaptizari tantummodo hæreticos, non semper, sed *quando* verum baptismum ob adulteratam *formam* non conferunt. Lupus in librum Tertul. de Præscript. cap. 41. censet S. Cyrillum in Synodo prima Constantinopolitana, cui interfuit, traditum in Catechesibus sententiam retractasse.

PROF. X. Concilium plenarium, de quo Augustinus adversus Donatistas affirmat, ad ejus auctoritatem & robur perductam antiquam unius Baptismatis consuetudinem, videtur esse Nicænum; sed non istud solum innuere vult Præsul sapientissimus.

Scribit Augustinus lib. 11. de Bapt. cap. vii. num. 12. de controversia Rebaptizantium: *Post magnos dubitationis fluctus ad plenarii Concilii confirmationem perducta est; & cap. ix. num. 14. Postea tamen dum inter multos ex utraque parte tractatur & queritur, non solum inventa est, sed etiam ad plenarii Concilii auctoritatem roburque producta.* Inquirunt itaque de qua Synodo S. Pater intelligendus sit. Lovanienſes Theologi, Balduinus, Nicolajus, Nat. Alexander, Norisius, Lupus, Bossuetius, & alii quamplurimi contendunt loqui S. Patrem de Concilio Nicæno: Marca, Sirmondus, Albaspinæus, Launojus, & PP. S. Mauri stant pro Synodo Arclatenſi: in utramque partem disputant Merbeckius, Habert, Juenin, Le Droin. Nos priori sententiæ adhæremus, ita tamen, ut cum Norisio

rifio nostro fateamur S. Patrem alias quoque Synodos adversus Donatistas celebratas indiguisse .

Ab Augustino itaque in Synodum Nicænam præcætitis in locis intendi digitum , demonstratur . S. Pater lib. 1. de Bapt. cap. viii. num. 9. ait magnos viros , & caritate præditos Episcopos diu in controversia baptismatis disceptasse , *donec plenario totius orbis Concilio ; quod saluberrime sentiebatur , etiam remotis dubitationibus firmaretur* . His verbis nullum aliud Concilium designatur præter Nicænum : primo quia istud solum appellari poterat eo temporis *plenarium totius orbis Concilium* , cum ibi convenerint Episcopi ex Oriente , & Occidente , cccxviii. deinde quia ætate Augustini sola Nicæna Synodus per antonomasiam plenaria & universalis dicebatur , nullo alio addito distinctionis vocabulo , quod haberetur nota satis , ac celebris ; unde solo *universalis Concilii* nomine Nicænum designant in vita Augustini S. Possidius , & in Epistola 1. ad Himerium Tarraconensem Siricius Papa . Vide Norisium in Hist. Donat. pag. 178. Præterea in canone 19. Concilii Nicæni legitur : *De Paullianistis ad Ecclesiam catholicam confugientibus definitio probata est , ut baptizentur omnimodis* . Respondent post Launojum adversarii , eo in Canone Nicænum Concilium , dum solos Paullianistas rebaptizari jubet , nullam in admittendo ceterorum hæreticorum baptismate præscribere conditionem . Sed facile excutitur hæc responsio : primum , quia S. P. Augustinus existimavit Concilium Nicænum reprobasse baptismum Paullianistarum , quod hi minime præscriptam formam servarent , quam tamen custodiunt hæreticorum permulti : *Istos sane Paullianos* (inquit Augustinus de Hæres. num. 44.) *baptizandos esse in Ecclesia Catholica Nicæno Concilio constitutum est : unde credendum est eos regulam baptismatis non tenere , quam secum multi hæretici , cum de Catholica discederent , abstulerunt , eamque custodiunt* . Existimavit itaque Augustinus ita Concilium Nicænum reprobasse baptismum Samosatensem , ut simul probaret baptismum hæreticorum illorum , qui unam , eandemque cum Catholicis tenent regulam . Præterea Hieronymus in dialogo sæpe laudato adversus Luciferianos scribit , *Nicænam Synodum omnes hæreticos suscepisse , exceptis Pauli Samosatensi discipulis* ; ac S. Innocentius Hieronymi & Augustini scriptis commendatus in Epist. 22. ad Episc. Macedoniæ versans laudatum Nicænum canonem , *Numquid ( ait ) cum de Paullianistis jubent , omnes , qui ab hæreticis revertuntur , erant hoc exemplo baptizandi ?* Erat ergo ætate Augustini compertum , Nicæno canone Paullianistas rebaptizandos , non item alios quoscunque hæreticos . Tertiò Arelatense Concilium in sensu Augustini dici nequit *plenarium* , ac *totius orbis* ; quamquam phrasi Afris familiari quælibet Synodus collecta ex univerfa Africa , immo ex una tantum provincia , appel-

lari

lari possit aliquo sensu *plenaria*; igitur Augustinus nomine *Concilii plenarii* non intellexit Arelatense. Antec. probatur; primum quia ad Synodum Arelatensem soli Episcopi ex Occidentali Imperio, quod Constantino subiectum erat, anno 314 convenire potuerunt: at non aliquis ex universo Oriente, neque ex Aegypto, neque ex Africa, usque ad Tripolitanos, immo neque ex Illyrico, & Græcia, quæ ad Romanam sedem pertinebant; per id enim temporis amplissimæ hæ provincie subiciebantur Licinio Augusto: quare nec Synodus Arelatensis erat *plenaria*, nec talis existimabatur ab Augustino, cui, sicut & Optato Milevitano ejus acta fuisse ignota, demonstrat pag. 486. illustris Norisius. Deinde S. Pater sæpenumero Donatistis obtrusit Romanam Synodum Melchiadis, Gesta proconsularia, Constantini literas, ipsorumque adversariorum Conventum Bagaitanum: numquam vero, nisi memoria me fallit, gesta sententiasque Synodi Arelatensis: duntaxat in Epistola 43. ad Glorium, & Eleusium n. 20. & in Epist. 53. ad Generosum num. 5. meminit *judicii Arelatensis*: sed ex iisdem locis constat non esse illud *plenarium*, de quo in libris de Baptismo; priori enim Epistola, nec *concilii* nomine utitur, nec *judicium plenarium* appellat, sed *judicium aliorum Episcoporum*, idest, non omnium, sed quorundam, inter quos non erant qui jam in causa Cæciliani sententiam pronuntiaverant. In altera item Epistola, *Alios* (inquit de Constantino) *Episcopos voluit apud Arelatum judicare*. In sententia itaque Augustini Synodus Arelatensis non *plenaria* & universalis erat, sed confessus aliquorum tantum Episcoporum. Ad hæc S. P. prælaudata ad Glorium & Eleusium Epistola, num. 19. pertractans de causa Cæciliani Romæ discussa, & inquirens an interpellantibus Donatistis eadem causa fuerit in aliquo plenario Concilio iterum dijudicata, inquit: *Restabat adhuc plenarium Ecclesie universæ concilium, ubi etiam cum ipsis iudicibus causa posset agitari, ut si male judicasse convicti essent, eorum sententiæ solverentur. Quod utrum fecerint probent: nos enim non factum esse facile probamus, ex eo quod totus orbis cum eis communicat: aut si factum est, etiam ibi sunt victi, quod ipsi eorum separatio manifestat*. Revera si Concilium illud *plenarium* fuisset Arelatense; neque Augustinus dubitasset num causa Cæciliani agitata iterum fuisset in plenario Concilio, nec firmitatem judicii Romæ lati demonstrasset ex Donatistarum separatione, & unitate Catholicorum: sed absque tali dilemmate affirmasset, plenariam illam synodum reipsa peractam, eamque esse Arelatensem. Præterea in Collatione Carthagenensi tertie diei nunquam Catholici pro Cæciliano prodixerunt *plenariam* illam Arelatensem Synodum, sed Romanam Melchiadis: quod imperite fecissent, si ad manus habuissent acta Synodi Arelatensis, quippe causantibus Donatistis exiguum numerum Episcoporum prædictæ

Sy-



Synodi Romanæ, cui interfuere tantummodo XIX. poterant oppo-  
nere Arelatenſem, ad quam Launojus conveniſſe putat Episcopos DC.  
adeo, ut fuerit, ſi illi adhibeatur fides, duplo major Nicæna . Si  
ergo Concilium Arelatenſe non fuit adverſus Donatiſtas in ea Colla-  
tione productum; vel ab Africanis ignorabatur, vel non habeba-  
tur tanquam plenarium, & ad finiendam Cæciliani cauſam aptiſſi-  
mum . Tandem S. Pater in IV. libro contra Creſconium num. 32.  
*Nec forte auditum putat nomen Cæciliani in Eccleſiis Apoſtolico la-  
bore fundatis, Corinthiorum, Galatarum, Ephesoꝝ, Coloſſenſium,  
Philippenſium, Theſſalonicenſium, ceterarumque in ſacris litteris con-  
ſcripturarum;* quod utique non ſcripſiſſet, ſi Cæcilianum in plenario  
totius orbis concilio diſſamatum a Donatiſtis, & abſolutum exiſtimaſ-  
ſet: cumque pro Cæciliano latum ſcribat iudicium Arelatenſe, ne-  
quit iſtud appellari ab Auguſtino iudicium Synodi totius orbis ple-  
nariæ .

Verum tamen eſt Auguſtinum ab aliis quoque Synodis, præter  
Nicænam, afferere exploſam ſententiam Rebaptizantium . Nam  
lib. 2. contra Parm. cap. 13. num. 30. inquit: *Hoc enim jam in ipſa  
totius orbis unitate diſcuſſum, conſideratum, perfectum, atque fir-  
matum eſt:* & lib. 3. cap. IV. num. 21. de Donatiſtis ait: *Quoſdam  
paucos in Africa damnaverunt, a quibus totius orbis iudicio ſupe-  
rati ſunt.* Et in eodem libro cap. 6. num. 30. ſcribit ipſos Donatiſtas  
totius orbis auctoritate convinci: quæ loca cum aliis conſimilibus in-  
dicant Tom. IX. pag. 103. PP. S. Mauri ad confirmandam Joannis  
Launoji opinionem. Sed ego per unitatem & auctoritatem totius orbis,  
non plenarium aliquod & univerſale Concilium arbitror intelligen-  
dum, ſed communionem Catholicorum in eandem ſententiam con-  
ſpirantium; aut ſi Concilium, non unum, ſed multiplex, puta Nicæ-  
num, Capuanum, & forte etiam Arelatenſe . Nam S. Pater lib. VI.  
de Baptiſmo cap. 7. num. 10. conſuetudinem Eccleſiæ, a qua Reba-  
ptizantes diſceſſerant, dicit *Conciliis univerſalibus roboratam*, ibi-  
que de Cypriano, & collegis, inquit ſatis a ſe diſputatum *pro uni-  
verſitate catholica conſenſionis, atque Conciliis, in cujus unitate iſti  
tamquam pia membra manſerunt:* unde apparet non in uno Concilio  
cauſam Donatiſtarum diſcuſſam, atque aliud in ſententia Auguſtini  
eſſe *Concilium plenarium*, aliud *unitatem Eccleſiæ*, ſiquidem Cypria-  
nus, qui nunquam reſceſſit ab unitate, conſuetudinem unius baptiſ-  
mi in nullo concilio probavit, in pluribus conciliis rejecit .

Opp. 1. Concilium Arelatenſe primum recte appellatur *plena-  
rium*. Ad illud enim convenerant plurimi ex diverſis, ac *proprie  
inſinitis locis*, ut ſcribit Conſtantineſis ad Chreſtum Syracuſanum .  
Eidem Concilio interfuiffe DC. Episcopos inquit Ado Viennenſis in  
Chronico, confirmatque id Epistoſa ad Silveſtrum, quæ juxta anti-  
To. VI. P p p quiſſi-

quissimum Codicem Corbejensem habet : *Domino sanctissimo fratri Silvestro catus Episcoporum sexcentorum, qui adunati fuerunt in opido Arelatensi*. Præterea Concilium ex una tantum provincia collectum appellari *plenarium*, constat ex canone 65. codicis Africani. Ipsum concilium Donatistarum Bagajense dicitur ab Augustino *plenarium* lib. 2. contra Ep. Parmen. cap. 3. num. 7. aliisque in locis, quamvis ad illum convenerint soli Episcopi Donatiani, numero cccx. Potiori itaque jure *plenarium* dici poterat ab Augustino Concilium Arelatense, ex omnibus Episcopis transmarinis collectum.

Resp. nequaquam a nobis institui quæstionem, an Synodus Arelatensis dici possit *plenaria*; disceptamus, an sit ea plenaria, de qua loquitur Augustinus: id vero negamus, quoniam *plenaria* & *universalis* per antonomasiam dici non potest, ac multo minus *totius orbis*; immo nec *Concilium*, sed tantum *judicium Arelatense* appellatur a S. Patre in literis ad Eleusium, & *judicium transmarinum* lib. 3. contra Cresc. cap. 13. num. 16. Quot Episcopi convenerint ad Synodum Arelatensem, nobis incertum est. xxxiii. invenimus in subscriptionibus; sed non inficiabor deesse aliquos. Ducentos Episcopos ibidem convenisse scribit Baronius ad an. 314. n. 16. idem tenet Pagius ad eundem annum, num. 22. nec aliter Nat. Alexander dis. 1v. sec. 4. quæst. 2. Id colligunt ex Augustino scribente lib. 1. contra Epistolam Parmen. cap. 5. *Usque adeo (Donatistæ) dementes sunt homines, ut ducentos judices apud quos victi sunt, victis litigatoribus credunt esse postponendos*. At habet castigata lectio, *contra judices*, non, *ducentos judices*; eaque verba, *esse postponendos*, contra omnium ferè exemplarium fidem addita sunt. Eo item loci de Concilio Melchiadis, in quo novemdecim tantum adfuerunt Episcopi, non de Arelatensi, loquitur Augustinus. Frustra ergo inde colligas numerum ducentorum Episcoporum. Corbejenfis, & Morbacensis Codices, qui habent *sexcentos*, & unde Ado in errorem fortassis inductus est, emendari debent ex Colbertino exemplari, quod fuit olim ipsius Ecclesiæ Arelatensis, & in quo legitur tantum, *catus Episcoporum, omnisso .sexcentorum*. Incredibile est autem majorem Episcoporum numerum convenisse Arelate, quàm Nicææ ad Synodum œcumenicam, & superato Licinio celebratam; quamquam ad Arelatensem Patrum multitudinem exaggerandam, Constantinus illos convenisse scribat *ex infinitis prope locis*; ne singulas Gallicanas urbes, unde Episcopi acciti erant, epistolæ ad Chrestum infereret. Adde *ἀπὸ πάντων*, ut est in Græco, non valere, *ex infinitis*, sed, *quæ necessum non est recensere: πάντων* enim est *dicere, eloqui*; unde Joannes Nicolai reddendum putat, *inducibilibus*: Sirmondus legit, *ex diversis compluribus*. Bagajensem vero Synodum Augustinus non dixit *absolute plenariam*, sed plenariam Donatista-

rum;

rum; vel ut inquit Nat. Alex. diss. 24. sæc. 3. & Tournelius de Sacram. in gen. q. 7. art. 2. Augustinus *ironice*, non ex propria sententia locutus est. Addimus citato cap. 3. eodemque in loco, S. Patrem Bagajense Concilium appellasse *plenarium trecentorum decem* Donatistarum, *qui cum universis provinciis Africa convenerunt*: non vero *plenarium totius orbis*.

Opp. 2. Plura in Augustino inveniuntur, quæ demonstrant ab illo plenarium Concilium, de quo disputatur, non aliud intelligi præter Arelatense. Principio illud appellat *Transmarinum*, lib. 2. de Bapt. cap. 8. num. 14. *Transmarinum* autem dici nequit Nicænum, in Bithynia, quæ Asiæ minoris regio est, celebratum. Deinde epistola 167. ad Festum, nunc 89. num. 3. iudicium Arelatense pronuntiatum dicit, *ab omnibus transmarinis Episcopis*. Nec aliter Conc. 2. in Psal. 36. num. 22. Victos etiam, ac superatos Donatistas *totius orbis auctoritate*, *totius orbis iudicio* affirmat S. Pater lib. 3. contra Parmen. cap. 4. num. 21. & cap. 6. num. 3. Insuper in Epistola ad Eleusium 43. posteaquam de causa Donatistarum scripserat, *Restabat adhuc plenarium Ecclesiæ universæ Concilium, ubi etiam cum ipsis iudicibus causa posset agitari, &c.* num. 20. inquit: *Dedit ille*, idest Constantinus, *aliud Arelatense iudicium*: ideoque Concilium Arelatense est illud plenarium, transmarinum, ac totius orbis, in quo universæ Ecclesiæ circa baptismum hæreticorum consuetudo certa evasit & confirmata. Demum si Concilium illud plenarium in mente Augustini est Nicænum, cur illud suo nomine non appellavit, dum id causæ catholicorum prodesse poterat, obesse, inquit, Launojus, non poterat?

Solet ad primum responderi cum Joanne Nicolai, & Nat. Alexandro etiam Concilium Nicænum Afris dici *transmarinum*: quoniam S. Pater lib. 2. contra Cresconium cap. 37. num. 47. plurimis enumeratis Ecclesiis, inter quas recenset *Ecclesias Ponti, Cypadociae, Asiæ, & Bithyniæ*, inquit de Afris, *Habent cum illis transmarinis Ecclesiis societatem, &c.* Ubi proculdubio Augustinus *transmarinis* appellat omnes Ecclesias extra Africam, quæ mari Lybico, Arabico, & Atlantico clauditur, constitutas. Ego tamen non nego Augustinum *transmarinum* dicere etiam Concilium Arelatense; siquidem de Cæciliano inquit in Psalmum 36. *Purgavit se ille in transmarino iudicio*: & lib. 3. contra Cresconium cap. 43. num. 16. *Factum est pro Cæciliano posterius iudicium transmarinum, vestris apud Constantinum Imperatorem ut fieret instantibus*: quibus in locis agi de iudicio Arelateni perspicuum erit legentibus. Sed quid inde? Lib. 2. de Baptismo cap. 8. non ait S. Pater, ætate Cypriani nondum factum Concilium universale ac totius orbis transmarinum. Tantummodo disjunctive loquitur, *Nondum autem factum erat transmarinum*,

*vel universale Concilium*, idest, nondum factum erat vel *transmarinum* Capuanum, a quo statutum *ne fiant rebaptizationes* habetur in Cod. Concil. Africæ num. 15. vel *transmarinum* aliud, vel *universale* Nicænum; ex quibus Conciliis, sive ex universa Ecclesia collectis, sive ex provinciis saltim *transmarinis*, potuisset Cyprianus antiquam agnoscere consuetudinem. Neque in Epistola ad Pectum ait S. Pater ad Arelatensem Synodum convenisse *Transmarinos omnes Episcopos*, sed ait Donatistas non ad *transmarinos Episcopos*, sed ad Constantinum causam Cæciliani detulisse post latum Arelatense iudicium; qua in re S. Præsul illorum pertinaciam & iniquitatem redarguit: *Apud quem*, inquit de Constantino, *ultra Cæciliani accusatores fuerunt, cujus auctoritatem omnibus transmarinis Episcopis prætulerunt, ut non ad illos, sed ad illum Ecclesiæ causam deferrent. Quare Transmarini omnes Episcopi non sunt Arelatenses*, qui ad Constantini nutum judicarunt causam Cæciliani, sed sunt Episcopi omnes Occidentales, ad quorum potius, quàm ad Tribunal Imperatoris, erat eadem causa deferenda. Sermone autem 2. in Ps. 36. non ait Augustinus purgatum Cæcilianum in Concilio totius orbis, sed, *Purgavit se*, inquit, *in transmarino iudicio. Consensit huic iudicio universus terrarum orbis*. Consensit autem, non interfuit; consensitque communicans Afris, & fide tenens Ecclesiam extra Africæ fines diffusam verum habere baptismum. *Sed dicturus es mihi*, (ait paullo infra Augustinus) *numquid Donatistas millia Episcoporum damnaverunt de toto orbe terrarum? Optime, non damnarunt. Quare non damnarunt? Quia iudicio non interfuerunt. Si iudicio non interfuerunt, propterea non damnaverunt, quia causam illam penitus nescierunt*. Ac subinde damnaſſe demonstrat, quoniam nec Mosopotami, nec Syri, nec Pontici, nec alii longius constituti rebaptizantur. Hinc apparet, quo sensu scribat Augustinus superatos Donatistas iudicio, atque auctoritate totius orbis, nec tamen Arelatenſe Concilium ſit illud univerſale, ac plenarium, de quo diſputamus. At quod ex Epistola ad Eleſium depromitur, facere contra adverſarios oſtendimus paullo ſupra. Adde ibi Auguſtinum num. 20. appellare iudicium Arelatenſe, *iudicium aliorum Episcoporum*: ſuperiori autem numero egerat de Concilio *plenario Eccleſiæ univerſæ*, ubi cauſa agitaretur cum iſſdem Episcopis, *qui Romæ iudicaverunt*. Ibi etiam ſcripſit devictos Donatiſtas a toto orbe terrarum, quoniam *cum Cæciliano permansit orbis terrarum communio, & ad eum a transmarinis Eccleſiis communicatoria litera miſſa ſunt, non ad illum, quem ipſi ſcelerata ordinaverant*. Atque ita omnia ſententiæ coherere noſtræ. Tandem Auguſtinus Concilium Nicænum proprio nomine non appellavit, quoniam nullum aliud erat eo temporis univerſale ac plenarium totius orbis; neque hoc tantum, ſed & aliis iudi-

judi-

## Liber Trigesimus primus. Cap. XIII. 485

judiciis Episcopalibus opinio rebaptizantium fuerat eliminata & explosa.

Opp. ultimo: Si rebaptizantium opinio Nicæno canone fuisset proscripta, id neque S. Basilii, neque Athanasii, neque Epiphanius ignorasset: quorum primus docuit omnes hæreticos rebaptizandos in priori ad Amphilochem canone; & canone 47. de xciii. Synodi Trullanæ spectante ad Eucratitas, inquit & istos non admit-tendos nisi rebaptizentur, & si aliqui oppositum sentiant, oportere *ut plures simul sint Episcopi, & sic canonem exponant*: quod utique Basilii non affirmasset, si nosset rem in Nicæna Synodo definitam. Athanasius pariter Orat. 2. rejecit baptismum Arianorum: & Epiphanius in Expositione Catholicæ fidei ait controversiam Rebaptizantium nondum *Synodi judicio* decisam.

Resp. illud nos principio ab adversariis quærere, quomodo Basilii, Athanasii, Epiphanius ignorarint definitionem Synodi Arelaten-sis, si fuit istud *plenarium totius orbis*, collectum *ex infinitis prope locis*, atque *ex omnibus mundi partibus*, majus Nicæno fere duplo, & Constantinopolitano 1. *quadruplo*, *sexcentorum* denique *Episcoporum*, ut contra Nicolajum clamat Launojus? Deinde asserimus hoc argumento nihil evinci. Primum, quia etsi Patres aliqui existima-rint actum in Nicæno Concilio de solis Paullianistis, non sequitur eandem fuisse sententiam Augustini, quemadmodum non fuit Hieronymi, & Innocentii. Præterea Basilii subrogatus in sedem Firmiliani, qui statuerat omnes hæreticos rebaptizandos, inhærens inolitæ Cappadocum consuetudini, existimavit Nicænam Synodum non ut regulam dogmatis, sed disciplinæ juxta regionum consuetu-dinem variabilis, decimumnonum canonem edidisse. Nam Basiliius canone 1. ait nonnullos Asiaticos probare hæreticorum baptismum, *propter multorum æconomiam & dispensationem*, ut diximus prop. viii. & præcitato canone 47. *Si autem*, inquit, *prohibita est apud nos hæc rebaptizatio, sicut & a Romanis, alienius æconomiae gratia, &c.* Vid. edit. Sonnii pag. 782. Idem ad Epiphanium respondet Norisius Tom. iv. pag. 182. sed arbitror Epiphanium de solis Arianis pertra-ctare, quos utique rebaptizandos *nullius Synodi judicio* decisum est. De Athanasio autem aperui mentem meam prop. præcedenti.

PROP. XI. Præter Nicænum canonem, multæ aliæ Ecclesiasticæ definitiones probarunt baptismum hæreticorum, verbis Evangelicis, idest, invocatione S. Trinitatis collatum.

Et enim anno 313. Romana Synodus sub Melchiade damnavit Do-natum a Calis nigris, *quod confessus sit rebaptizasse*, inquit Optatus lib. 1. n. 24. Dixi id factum anno 313. licet Optatus scribat *Constantino quater, & Licinio ter Consulibus*. Fuit enim Constantinus IV. Con-sul anno 315 non solum post Romanam, sed etiã Arelatensem cele-bratam.

bratam Synodum : quare Augustinus libro post Collat. cap. 33. n. 36. inquit , *Nam Melchisedes judicavit Constantino ter & Licinio iterum consilibus , sexto nonas Octobres , idest , anno 313. in quem concurrerit Consulatus tertius Constantini , & secundus Licinii , aut si numeretur Consulatus Licinii susceptus anni 313. tertius ipsius quoque Licinii : atque ita scriptum a pluribus absque mendo , Constantino ter , & Licinio ter Cons. quod moneo , ne Augustini verba censeas castiganda .* II. Sequitur Synodus Arelatenfis celebrata anno 314. cujus extat v l l . canon : *De Afris autem , quod propria lege suavitantur ut rebaptizent , placuit ut si ad Ecclesiam aliquis hereticus venerit , interrogent eum symbolum , & si perviderint eum in Patre Filio & Spiritu sancto esse baptizatum , manus ei tantum imponatur : quod si interrogatus symbolum , non responderit Trinitatem , tunc merito baptizetur .* III. Deinde Concilium Nicænum , de quo supra , canone 8. Catharos , sive Novatianos in Ecclesiam admittendos jussit sola manuum impositione , canone autem 19. rebaptizandos Paullianistas , regulam baptismatis non tenentes , ut superiori propositione differebamus . IV. Synodus Laodicæna celebrata , ut inquit , anno 364. canone 8. *omni industria insitui & baptizari præcepit Montanistas , & Cataphrygas , quos non servasse præscriptam formam baptismatis diximus octavo capite . Ambiguum tamen est quod canone 7. ejusdem Synodi habetur , Novatianos , Photinianos , & Quartodecimanos , edoctos fidei symbola , & inunctis sacro oleo fieri participes sancti mysterii ; cum Photiniani vix discreparint a Paullianistis : unde vel Photiniani , ut censet Binius , præter fidem antiqui codicis , intrusi sunt ; vel saltem illorum aliqui cum Samosatenfibus dogmate , non ritu baptismatis convenerunt .* V. Rebaptizandos Eunomianos , Montanistas , & Sabellianos , non vero Arianos , Macedonianos , & Novatianos , statuit anno 381. Constantinopolitanum primum , sive secundum generale Concilium , canone 7. non alia ratione , nisi quia primi tingentes verbis Evangelicis non utebantur . VI. Siricius Papa anno 386. in Synodo Romana sanxit , *ut venientes a Novatianis , vel Montensibus ( idest Donatistis ) per manus impositionem recipiantur , hac ratione addita , Quia quamvis ab hereticis , tamen in Christi nomine sunt baptizati .* Vide Innoc. Epist. ad Victricium cap. 8. & quam ad Africanos dedit ipse Siricius , vindictam a Cl. P. Constantio Tom. 1. Epist. Rom. Pontif. VII. Anno 389. Concilium Capuanum , quod Synodus l l l . Carthag. can. 38. appellat plenarium , & eod. can. Afric. can. 68. *transmarinum ,* decrevit canone 38. *Non liceat fieri rebaptizationes .* VIII. Synodus Hipponensis anni 393. confirmata in Concilio Carthaginensi anno 397. edidit decretum , ut in recipiendis Donatistis *invitata pacis compensatione & sacrificio caritatis aboleantur quæ majorum suorum an-*  
*Historia-*

*Floritam sequentes repetitione baptisimatis commiserunt. IX. His, aliisque insitens sacrosancta Synodus Tridentina sess. VII. can. 4. ita statuit: Si quis dixerit Baptismum, qui etiam datur ab hæreticis in nomine Patris, & Filii, & Spiritus sancti, cum intentione faciendi quod facit Ecclesia, non esse verum baptismum, anathema sit.*

PROP. XII. Postremo etiam Augustorum legibus proscriptus est Rebaptismus.

Non est animus in medium proferre leges singulas in Donatistas ab Imperatoribus latas. Eas in unum collectas vide in Append. Tom. IX. Operum S. P. Augustini, in monumentis additis ad libros Optati, & in historia Donatistarum Norisiana. Seligam quæ ad præsens attinent institutum. I. Est lex Valentiniani senioris an. 373. die 20. Febr. quæ declarat *Sacerdotio indignum antistitem, qui sanctitatem baptismatis illicita usurpatione geminaverit.* II. Gratiani an. 377. die 17. Octob. in qua habetur: *Eorum condemnamus errorem, qui Apostolorum præcepta calcantes, Christiani nominis sacramenta sortitos alio rursus baptismo non purificant, sed incestant, lavacri nomine polluentes.* Laudatur ibidem divalis Constantini, Constantii, & Valentiniani. III. Lex Honorii anno 405. die 12. Februarii: *Rebaptizantium non patimur devios errores.* IV. Lex ejusdem Honorii lata per idem temporis: *Quisquis posthac fuerit rebaptizasse detectus, Judici, qui provincia præsidet, deferatur, ut facultatem omnium publicatione multatus, inopia panam, qua in perpetuum afficiatur, expendat.* V. Est lex consimilis eadem die, eodemque fine ab ipso Honorio emissa, ne *divinam gratiam sub repetito baptismo pollutam Donatistarum secreta violarent, &c.* Vid. Cod. Theodosianum lib. XVI. Tit. 6. *Ne sanctum baptismum iteretur.* Hactenus de historicis circa Anabaptisum velitationibus.

## C A P U T XIV.

*Demonstratur baptismum ab hæreticis, & a paganis collatum esse validum ac legitimum.*

**I**NStituitur quæstio, ut ex præcedentibus dissertationibus manifestum est, de baptismo Evangelicis verbis, idest, præscripta, in Evangelio formula consecrato, & collato cum intentione faciendi quod facit Ecclesia. Quæritur etiam de baptismatis *charactere*, non de gratia: hanc enim, si hæreticorum baptismus ratus est, certo consequuntur infantes, necnon adulti, qui bona fide, alio ministro destituti, neque hæreticis communicantes, ab his recipiunt regenerationis lavacrum; illi vero, qui hæresi consentiunt, aut baptismum

extra

extra Ecclesiam sponte suscipiunt, nec dare, nec habere possunt remissionem peccatorum: *Corporalia enim sacramenta, quæ portant & celebrant etiam segregati ab unitate corporis Christi, formam possunt exhibere pietatis. Virtus vero pietatis invisibilis & spiritalis ita in eis non potest esse, quemadmodum sensus non sequitur hominis membrum, quando amputatur a corpore.* Causa 1. q. 1. c. 49.

PROP. I. Valet baptismus datus ab hæreticis *in nomine Trinitatis.*

Luculenter hanc propositionem confirmant producta præcedenti capite munimenta, ac præsertim Ecclesiasticæ definitiones, Ecclesiæ consuetudo, atque traditio Patrum, quibus accedunt divinæ Scripturæ testimonia, pluraque argumenta Augustini Donatistæ naviter oppugnantis. I. Priorem tenent locum Conciliorum canones, de quibus paullo supra. His accedunt decreta Romanorum Pontificum collecta a Gratiano de Consecrat. dist. 1v. nimirum cap. 27. *Si qui apud illos*, ex Epistola S. Leonis 2. aliàs 29. scripta anno 443. in Galliam: cap. *Qui bis ignoranter*, n. 98. ex Epist. Felicis III. data anno 489. ad universos Episcopos: cap. 19. *Quamvis unum baptisma*, ex Epistola Pelagii ad Gaudentium conscripta anno 557. cap. 43. *Non in vobis*, ex Epist. S. Gregorii 61. lib. 1x. ad Quirinum, in Iberiam directâ an. 601. cap. 51. *Sive hæreticus*, ex Epist. 1. cap. 1. Gregorii III. missa an. 738. ad Bonifacium Archiepiscopum Moguntinum. Præscribitur hisce decretis, ut qui apud hæresim in Trinitatis nomine baptizati sunt, nullatenus novo baptismate tingantur, & ad Catholicam venientes sola reconciliationis impensa gratia recipiantur, ut inquit S.P. lib. 1. de Baptif. cap. 1. num. 2. sive juxta Ecclesiæ consuetudinem per impositionem manus, sive per unctionem chrisomatis, ut habetur in cap. *Ab antiqua*, præcitata dist. 1v. de Consecrat. Definitionibus igitur Ecclesiasticis perspicuum est valere hæreticorum baptismum.

Idem demonstratur Ecclesiæ vetustissima consuetudine. Hæc primum comprobatur Stephani decreto, de quo prop. 4. superioris cap. ipso enim decreto in Romana Synodo emanato declaratur in more positum a primordiis Ecclesiæ, ut hæretici manuum impositione, non repetito lavacro suscipiantur. Quod perpendens Lirinenfis cap. 4. Common. recte scripsit, *Agrippinum omnium primum censuisse rebaptizandum, contra universalis Ecclesiæ regulam, contra sensum omnium Consecratorum, contra morem & instituta majorum.* Eandem consuetudinem monstravit plenarium Concilium Nicænum, & quæ postea sunt consecuta. Eiusdem testis Hieronymus, scribens adversus Luciferianos de Epistolis Cypriani: *In quibus Stephanum Romane urbis Episcopum, & inveteratæ consuetudinis, lacerat errorem.* Augustinus perantiquam consuetudinem illam in libris de Baptismo invicte monstrat: ac primum lib. 2. de Baptismo cap. vii. num. 12.



num. 12. ait consuetudinem ipsam *ex Apostolorum traditione* derivatam; idque probat, quoniam *quæ per universam custodiantur Ecclesiam, non nisi ab ipsis tradita & commendata credantur*. Addit ex confessione Cypriani, *hanc saluberrimam consuetudinem per Agrippinum prædecessorem suum quasi cæpisse corrigi*: sed verius credendum, *corrupti cæpisse, non corrigi*. Cap. 1x. ejusdem libri num. 14. ipsemet consuetudinis vetustatem ex ipso Cypriano confirmat, ex quo scilicet, sanctus Martyr adversus illam pugnaret, quoniam *hæc sola opponebatur inducere volentibus novitatem*. Libro autem tertio cap. xii. num. 17. probat Augustinus, nec post Agrippinum in Africa Rebaptismum communiter obtinuisse, atque ita ratiocinatur: *Si permanebat ab Agrippino usque ad Cyprianum consuetudo baptizandi ab hæreticis venientes, ut quid facta sunt a Cypriano de hac re Concilia? Ut quid eidem Subajano dicit, non se rem novam facere aut repentinam, sed ab Agrippino constitutam? Cur enim Subajanus de novitate turbaretur, ut eum per auctoritatem Agrippini sanari oporteret, si ab Agrippino usque ad Cyprianum hoc tenebat Ecclesia? Car denique tot ejus collegæ in Concilio dixerunt rationem & veritatem consuetudini præponendam, ac non potius dixerunt eos, qui aliud facere vellent, & contra veritatem, & contra consuetudinem facere?* Exhibent hæc Augustini verba aliud vetustæ consuetudinis argumentum depromptum ex ipsis rebaptizantibus. Revera S. Cyprianus Ep. 71. ad Quintum, *Non est (ait) de consuetudine præscribendum, sed ratione vincendum*: & 74. ad Pompejum: *Consuetudo sine veritate vetustas erroris est*. In Epist. etiam ad Subajanum 73. inquit: *Sed dicit aliquis, quid ergo fiet de iis, qui in præteritum de hæresi ad Ecclesiam venientes sine baptismo admissi sunt?* Quo in loco, ut peracute notat Augustinus lib. 2. de Bapt. cap. 9. *Aperite indicat fuisse aliam consuetudinem Ecclesiæ*. Consuetudo itaque, ac traditio majorum demonstrat valere baptismum ab hæreticis in nomine Trinitatis collatum.

Divinæ Scripturæ testimonia priori loco, ut solemus, non produximus; non enim expresse dirimunt quæstionem istam, & bene ac sapienter agebat Augustinus in primo adversus Cresconium n. 39. *Quamvis hujus rei certe de Scripturis canonicis non proferatur exemplum; earundem tamen Scripturarum etiam in hac re a nobis tenetur veritas, cum hoc facimus quod universæ jam placuit Ecclesiæ, quam ipsarum Scripturarum commendat auctoritas*. Faciunt tamen ad rem nostram ea loca, quæ ostendunt Christum, non aliquem ministrantium, esse illum, *qui baptizat in Spiritu sancto*, ut Joan. 1.33. de quo loco plura differui pertractans de probitate eorum, qui Sacramenta dispensant, sectatus quæ S. P. docet Tract. v. in Joannem. Hinc deprompti hujus asserti rationem præcipuam S. Thomas q. lxiv. art. 9.

To. VI.

Q q q

ubi

ubi demonstrat fidem ministri non requiri ad Sacramentum perficiendum, quoniam ille non in propria, sed in Christi virtute operatur.

At ne scholasticæ methodi omnino videamur obliti, Catholicam veritatem confirmabimus nonnullis Theologicis ratiocinationibus. Quarum sit prima: Baptismus *propria sanctitate ac veritate constat*; ergo neque improbitate, neque infidelitate ministrantium potest labefactari. Probat antecedens Augustinus lib. 111. de Bapt. cap. 10. num. 15. *quia Sacramento divina virtus assiluit*; quia neque lucernæ lux, cum per cænosa diffunditur, inde aliquid sordium contrahit; quia etsi res visibiles, quibus sacramenta tractantur, corruptibiles sint, id tamen quod per illas agitur non potest corrumpi, quamvis homines, per quos agitur, pro suis moribus vel præmia percipiant, vel pœnas luant. Confirmat S. Pater idem argumentum lib. v. cap. 19. num. 27. quoniam per Cyprianum in Epist. ad Iubajanum valet baptismus ab eo datus, qui malevola invidia tabescit, & quem homicidam, & in tenebris esse testatur Epist. 1. 2. 3. Joannes. Objicienti ergo, quod hæresis Sacramentum inficiat, his occurrit S. P. Augustinus: *Quomodo aquam mundat & sanctificat homicida? quomodo benedicunt oleum tenebræ?* Quasi ita ratiocinetur: Ex confessione Rebaptizantium crimen odii & invidentiæ non labefactat Sacramenti sanctitatem. Ergo error & hæresis non tollit Sacramenti veritatem. Idem confirmat S. Pater lib. v. cap. viii. num. 9. aptissima comparatione: Sicut de lege dixit Apostolus, *Bona est lex, si quis ea legitime utatur; ita de Baptismo recte dicere possumus, Bonus est baptismus, si quis eo legitime utatur: & sicut non faciebant tunc, ut lex bona non esset, aut omnino nulla esset, qui ea non legitime utebantur: sic nullo modo facit, ut baptismus bonus non sit, aut ut omnino baptismus non sit, quisquis eo, sive quia in hæresi, sive quia in pessimis moribus vivit, non legitime utitur.* Brevi comparisonem ipsam propono: Prævaricatoris impietas legem impiam non reddit; igitur neque error ministrantium reddit Sacramentum nullum, & fallax. Altera ratiocinatio sit: Unus baptismus est, qui vel in hæresi, vel in Catholica datur; Baptismus itaque hæreticorum repeti nequit. Consequentia est legitima, siquidem præcipua Rebaptizantium ratio petitur ex quo baptisma sit unum, ideoque diversa baptismata nequeant approbari. Antecedens autem ab Augustino probatur præcitato Tractatu v. in Joannem num. 18. quia Christi, non ministro- rum baptismus est, & ideo quos baptizant ebriosi, adulteri, homicidæ (idem dic de hæreticis) *Christus baptizat*, & confertur unus idemque baptismus. Corroborat Augustinus eandem argumentationem lib. 2. contra lit. Petil. num. 57. quoniam Baptismus in nomine Patris & Filii & Spiritus sancti *Christum habet auctorem, non quemlibet hominem: & Christus est veritas, non quislibet homo.* Similia in lib.

lib. de Unit. Eccl. cap. 23. n. 65. Utitur ad idem confirmandum in libro de unico baptismo contra Petilian. cap. 8. num. 13. argumento a pari: *Hic fortasse dicat, jam non esse Christi sacramentum, quod a sacrilegis datur. Cur non ergo dicit non esse etiam nomen Christi, quod a sacrilegis dicitur?* & post pauca: *Sicut illud nomen est Jesu Christi, ita & iste baptismus Jesu Christi.* Continent hæc Augustini verba enthymema istud: Unum est ac idem Christi nomen prolatum ab Apostolis, & a Pseudoprophetis; igitur unus pariter idemque baptismus est, sive a Catholicis collatus, sive ab hæreticis. Urget S. Pater lib. vii. de Baptismo cap. 14. num. 27. sententiam Rebaptizantium, præsertim Cypriani approbantis baptismum iniquorum, & ait: *Cur non etiam ille duos baptismos facit, qui dicit quia & iniqui baptizant?* quæ verba aliud nobis enthymema suppeditant, videlicet: Unus est baptismus, sive a bono, sive a malo collatus; igitur & unus est, sive ab Infideli conferatur, sive a fidei. Ratiocinatio tertia sit: Potest baptismus conferri extra catholicam Ecclesiam: Ergo conferri potest ab hæreticis. Antecedens probatur ab Augustino lib. i. de Baptismo cap. 1. num. 2. quoniam *redeuntes, qui prius quam recederent baptizati sunt, non rebaptizantur*; ideoque extra unitatem Ecclesiæ baptismus non amittitur. *Quid si haberi foris potest, etiam dari cur non potest?* Addit lib. iii. cap. xv. n. 20. petitam ex scripturis divinis comparisonem, dicens: *Sacramenta si eadem sunt, ubique integra sunt, etiamsi prave intelliguntur, & discordiose tractantur: sicut scriptura ipsius Evangelii, si eadem ipsa est, ubique integra est, etiamsi innumerabili falsarum opinionum varietate offeratur*: quasi diceret, *Asservari potest scriptura in manu hæreticorum, igitur & baptismus.* Insuper acutissime Augustinus demonstrat posse generari Ecclesiæ filios per baptismum Christi etiam extra Ecclesiam, quemadmodum Abrahæ ex Agar Gen. 16. 15. natus est Ismael, & Rachel uxor Jacob filios sibi acquisivit ex utero ancillæ suæ Balam: Lia quoque obtinuit filios ex utero Zephæ Gen. 30. 3. 9. *Cum tales a spiritualibus evangelizantur, & sacramentis imbuuntur*, (inquit Aug. lib. i. de Bapt. cap. xvi. num. 25.) *tamquam per se ipsam Rebecca eos parit, sicut Esau: cum autem per illos, qui non caste annuntiant Evangelium, tales in Dei populo generantur, Sara quidem, sed per Agar. Item boni spirituales, quando evangelizantibus vel baptizantibus carnalibus generantur, Lia quidem vel Rachel jure conjugali eos, sed per ancillarum uterum parit.* Sed oporteret, si argumenta omnia colligenda forent, excubire universum fere Tomum ix. sive Augusti Polemicas contra Donatistas lucubrationes.

Facile ex dictis objecta omnia solvuntur: quæ cum permulta sint, ad tria tamen capita revocantur, ad scripturas, ad auctoritatem

tatem majorum, atque ad rationem. Ex scripturis hæc opponuntur. I. Baptismus unus est, scribente Apostolo ad Ephes. iv. 5. *Una fides, unam baptismam*; ut ergo hæretici non habent fidem, ita nec baptismum. II. Una pariter est Ecclesia: de qua Cant. iv. 12. *Hortus conclusus, fons signatus, & vi. 8. Una est columba mea, perfectia mea*. Nequeunt hæretici in hortum istum conclusum ingredi, utpote qui extra Ecclesiæ unitatem ejecti sunt; ideoque eundem fontem aquarum viventium non poterunt nobiscum habere communem. III. Ait Apostolus ad Galatas iii. 27. *Quotquot in Christo baptizati estis, Christum induistis*. Christum non induunt, qui ab hæreticis tinguntur; ergo nec verè baptizantur. IV. De hæreticis prænuntiatur a Jeremia ii. 13. *Me dereliquerunt fontem aqua viva, & foderunt sibi cisternas, cisternas dissipatas, quæ continere non valent aquam*. Quomodo ergo habent hæretici fontem aqua viva, & salient in vitam æternam, idest salvificam undam baptismatis? Accedit quod aqua hæreticorum profana est & adultera. V. De his, qui ab hæreticis tinguntur Ecclesiasticus prædixit xxxiv. 30. *Qui baptizatur a mortuo, quid proficit lavatio ejus?* Inane est itaque lavacrum hæreticorum. Huc spectant, quæ de ministro improbo diximus lib. xxx. cap. xiv.

Resp. ad 1. utique unum esse baptismum Christi, sed esse unum tam in manibus hæreticorum, quam Catholicorum, ut de Scriptura, atque de Christi nomine dictum supra. Quod objicitur de Fide, retorquetur ab Augustino lib. v. de Baptismo cap. xxvi. n. 37. nam Apostolus eo loci etiam ait unam esse spem: *Vocati estis, inquit, in una spe vocationis vestra*. At ipsi Apostolorum temporibus fuerunt quibus una spes non erat, & tamen erat unum baptismum, cujus generis erant, qui negabant resurrectionem mortuorum, & nihilominus baptizati erant, ex 1. ad Corinth. xv. 12. Igitur unum pariter erit baptismum in iis, qui non habent eandem fidem. Ratio autem, cur fide ablata permaneat baptismus, est quia Sacramentum baptismi spectat ad Ecclesiam, tanquam signum, nota, & character Christifidelium: notæ vero, & characteres permanent quoque in transfugis & apostatis; ut lib. 2. contra Parmen. cap. xiii. n. 29. idem Augustinus declarat. Ad 2. respondetur cum D. Patre cit. libro v. cap. 27. n. 38. si hortum conclusum, fontemque signatum intelligamus Ecclesiam Sanctorum, non esse in avaris, & fraudatoribus, & raptoribus, & feneratoribus, & invidis, qui tamen cum justis baptismum habent communem: itaque eundem baptismum eodem pacto habere possunt hæretici. Si vero hortum conclusum dicas Ecclesiam hujus temporis, in qua mali cum bonis permixti sunt, in ipsa Ecclesia sunt quædam propria sanctorum, ut caritas; quædam communia sanctis & improbis, ut fides; quædam permanentia extra Ecclesiæ corpus, ut sacrosan-

*erosancta mysteria* : & consequenter hæretici, quamvis caritate & fide careant, habere possunt nihilominus sacramenta . Adde Cap. 45. de Consecr. dist. 14. *Ecclesia paradiso comparata indicat nobis, posse quidem ejus baptismum homines etiam foris recipere, sed salutem beatitudinis extra eam neminem vel percipere, vel tenere . Nam & flumina de fonte Paradisi, sicut scriptura testatur, etiam foras largiter manaverunt .* Ad 3. hæc sit responsio: Avari non sunt templum Dei; ait enim Apostolus 2. ad Corinth. vi. 16. *Quæ societas templo Dei cum idolis?* & avaritiam idololatriam esse Paullus ipse, necnon Cyprianus affirmant. Baptizati tamen ab avaris induunt Christum. Cur illum induere non possunt baptizati ab hæreticis? Adde homines induere Christum duplici modo: quantum ad sacramenti perceptionem, & quantum ad vitæ sanctificationem: quorum primum bonis & malis commune est, alterum proprium bonorum & piorum. Vide Augustinum eodem libro cap. xxiv. num. 34. Præmonui capite superiori, Cyprianum aliosque Rebaptizantes in istiusmodi argumentis discrimen inter sacramentum, & gratiam sedulo non advertisse. Ad quartum reponimus, eos etiam, qui profitentur fidem, & vitiis indulgent, dereliquisse Deum fontem aquarum viventium: *Neque enim pedibus, ac non corde relinquitur Deus.* Præterea dicimus nec istos, neque hæreticos habere aquam viventem, quantum ad sanctificationem vitæ; quamquam illam habent quantum ad participationem sacramenti. Adeas librum 2. contra Parmenianum cap. x. num. 20. Affirmamus quoque non esse aquam profanam, *super quam nomen Dei invocatur*, quia nec ipsa creatura, nec ipsum nomen profanum est. Ita c. *Non est aqua*, 50. de Consecr. dist. 14. & S. P. lib. 111. de Bapt. cap. 10. n. 15. Ultimum sic diluitur: Si mortui non baptizant, quare Donatistæ fatebantur in schismate baptizasse Felicianum? quare susceperunt, quos ille mortuus in schismate baptizavit? atque, ut alloquamur rebaptizantes alios, quare baptizant invidi, & odio habentes fratrem suum, *qui manent in morte?* Directe autem respondeo primum, baptizari a mortuo paganos, qui homines colunt, *in quorum nomine baptizantur*, ita Augustinus cit. libro 2. num. 22. deinde affirmo non baptizari a mortuo, *qui baptizantur a Christo*; ita S. Pater lib. 2. contra Cresconium Donatistam cap. 25. num. 30. De ipso Ecclesiastici loco vide quæ scripsimus pag. 146. hujusce voluminis.

Ex majorum auctoritate objiuntur primo Cypriani, aliorumque testimonia, de quibus puto me satis superque disserruisse. II. Objiuntur canones Apostolici 45. & 46. quorum primus est: *Episcopum vel presbyterum, qui hæreticorum baptismum, vel sacrificium admiserit, deponi jubemus*: alter vero, *Episcopus vel presbyter eum, qui vere habet baptismum, si de integro baptizaverit, vel si eum, qui*

*qui ab impiis pollutus est, non baptizaverit, deponatur.* III. Leo I. Epist. ad Nicetam, Urbanus II. Epist. ad Lucium, aliique Pontifices tradiderunt hæreticorum Sacramenta non posse sanctificationem conferre, & formam quidem, & speciem quamdam habere, non autem virtutem Sacramentorum.

Resp. ad primum ipsos Patres, qui steterunt pro Rebaptismo, minime denegasse contrariam vetustissimamque consuetudinem, postea plenariis Conciliis, Romanorum Pontificum statutis, reique matura discussione corroboratam. Ad secundum vulgaris est responsio, prædictos canones editos in aliqua Synodo Rebaptizantium, scilicet, in Iconiensi, vel Synnadeni, ac deinde alicujus collectoris inscitia in numerum Apostolicorum intrusos: siquidem nec Cyprianus, nec Firmilianus, nec Rebaptizantium aliquis eosdem canones laudavit ad sententiam suam confirmandam, quod non solum Theologi Scholastici observarunt, verum etiam Zegerus Van-Elpen p. 3. Tract. Historico-canonici cap. 3. §. 4. & viri alii quamplurimi. Si genuini probentur, accipiendi erunt iidem canones de hæreticis baptismi formam adulterantibus. Ad 3. dicimus Leonem, Urbanum, & alios locutos de sanctificatione, non autem de perceptione Sacramenti. Ceterum, inquit Gratianus dist. xxxii. c. 6. §. 4. *schismaticorum & hæreticorum sacramenta, quoniam extra Ecclesiam sunt, juxta sanctorum Patrum traditiones, scilicet Pelagii, Gregorii, Cypriani, Augustini, & Hieronymi, formam quidem sacramentorum, non autem virtutis effectum habere profiteamur, nisi cum ipsi, vel eorum sacramentis initiati, per manus impositionem ad Catholicam redeant unitatem.* Vid. Aug. lib. iv. contra Donat. cap. 4. num. 5. lib. 2. contra Parmen. cap. xii. num. 30. & Epist. 164. ad Emeritum, nunc 87. num. 9.

A ratione hæc præsertim objiciuntur. I. Per baptismum, & sacramentum regenerationis homines gignuntur filii Dei: atqui filii Dei generari non possunt nisi a Christi sponsa, idest, ab Ecclesia Catholica: Igitur in sola Ecclesia Catholica est baptismus, & sacramentum regenerationis. II. Hæreticus Ecclesię membrum non est: nec ergo est minister. Item hæreticus non habet Spiritum sanctum; quomodo ergo potest Spiritum sanctum conferre? Rursus penes hæreticum in Christi sacramenta nullum jus est: irritum est ergo collatum ab hæretico Sacramentum. III. Rebaptizatum est post baptismum Joannis, ex Act. xix. 5. Ergo multo magis rebaptizandum est post baptismum hæreticorum.

Resp. ad primum dist. mi. Sola Ecclesia Catholica generare potest Christi filios, vel proprio utero, vel utero ancillarum suarum, concedo; utero duntaxat proprio, nego. Explicavimus supra responsionem istam exemplo filiorum Abraham, & Jacob, quorum

alii-

aliquos procrearunt Agar , & Zelpha . Ad secundum , nego conseq. minister enim Sacramentorum est causa instrumentalis , & Deus tam uti potest instrumentis sibi caritate , aut fide conjunctis , quàm instrumentis a se per culpam , vel apostasiam separatis , ut sæpenumero iisdem usus est in perpetrandis miraculis ad gloriam nominis sui , fideique argumentum ; & ex quo minister sit instrumentalis causa . Christi baptizantis , necessum non est , ut habeat Spiritum sanctum ; quem non virtute sua minister ipse communicat , sed virtute Christi , & vi Sacramenti producentis gratiam efficientia sua , non ex meritis operantis . Verum tamen est , impium & hæreticum sibi jus conficiendi sacramenta arrogare : vult enim Deus , ut sancta pie fideliterque tractentur ; sed id probat administrationem sacrilegam , non irritum , nullumque sacramentum . Vide quæ supra diximus ex Augustino libro v. contra Donatist. cap. 8. n. 9. Ad ultimum constat ex dissertatione de Baptismo Joannis cap. 2. hujus libri , maximum esse inter Joannis baptismum , & baptismum Christi discrimen ; ac sat est , si repetamus cum Augustino : *Dedit Judas , & non baptizatum est post Judam ; dedit Joannes , & baptizatum est post Joannem : quia si datus est a Judæo baptismus , Christi erat ; qui autem a Joanne datus est , Joannis erat .* Tract. v. in Joan. num. 18.

PROP. II. Tenet quoque Baptismus a pagano sub præscripta forma collatus ..

Sequitur ex dictis : Si enim ad regenerandum sufficiens est aqua , supra quam Dei nomen invocatur ; si quemadmodum hæresis hæreticorum est , ita baptismus , a quocunque ministretur , est Christi : si , aut Judas , aut Paulus , aut quilibet hominum tingat , Christus est , qui baptizat : si baptismus talis est , qualis est ille in cujus potestate datur , non qualis est ille , per cujus ministerium datur : quæ omnia sunt verba Augustini dist. 1v. de Consecr. relata in canones ; proculdubio baptismus datus a non baptizato hujus errore ac perfidia nequit inditam sibi a Christo virtutem deperdere . II. Nicolaus Papa anno 866. ad consulta Bulgarorum cap. 104. *A quodam Judæo (inquit) nescitis utrum Christiano , an pagano , multos in patria vestra baptizatos afferitis ; & quid de iis sit agendum , consulitis . Hi profecto si in nomine sanctæ Trinitatis , ... baptizati sunt , constat eos non esse de novo baptizandos .* In cap. etiam Romanus , de Conf. dist. 4. num. 23. desumpto aut ex Isidoro , aut ex lib. 1v. Capitularium c. 6. habetur , *Romanus Pontifex non hominem judicat qui baptizat , sed spiritum Dei subministrare gratiam baptismi , licet Paganus sit qui baptizat .* Similiter Conc. Florentinum in decreto Eugenii : *In casu necessitatis etiam paganus & hæreticus baptizare potest .*

Opp. 1. Nicolaus eodem rescripto affirmavit quoque valere baptismum in solo Christi nomine , quod minime nos assentimur . Non habet.

habet ergo idem rescriptum plenam ac firmissimam auctoritatem. Præterea Concilium Illiberitanum celebratum, ut inquirunt, anno 315. edidit canonem num. 38. *Peregre novigantes, aut si Ecclesia in proximo non fuerit, posse fidelem, qui lavacrum suum integrum habet, nec sit bigamus, baptizare in necessitate infirmitatis positum catechumenum.* Igitur qui lavacrum non habet, baptizare etiam urgente necessitate non potest. Insuper Gregorius III. anno 738. scribens ad Bonifacium Archiepiscopum Moguntinum, ait: *Quos a paganis baptizatos esse asseruisti, si ita habetur, ut denuo baptizes in nomine Trinitatis, mandamus.*

Resp. Nicolaum consultum a Bulgaris, num valeat baptismus a pagano datus, non de forma baptismatis; ideoque quod ait de baptismo in nomine Christi, esse opinionem insertam, quod vero docuit de pagano baptizante, esse Pontificium Rescriptum, & hoc omnino tenendum. Vide supra cap. 1x. Canon Illiberitanus ita exponitur a Bellarmino, ut probet baptismum collatum a non bigamo & baptizato, nil vero de non baptizato aut bigamo statuatur. Interpretantur eundem canonem Suarez, & alii, non de necessitate, sed de contentia. Albaspinæus tamen, Mendoza, Martinus Lopez, & Van-Espen ajunt supponi eo canone non unum laicum adesse, sed plures: quo in casu lavacrum subministrare debeat, qui publicam poenitentiam non subierit, nec sit bigamus: atque his subscribunt Theologi recentiores. At Gregorius III. rebaptizationem mandavit, quia pagani formam nequaquam servaverant, caute usus a. inadversione, si ita habetur: unde Glossa in cap. *Quos a paganis*, inquit: *Scilicet in forma Ecclesie non fuerunt baptizati.*

Opp. 2. Augustinus lib. 2. advers. Parmen. cap. xiiii. num. 30. ait: *Et hæc quidem alia questio est, utrum & ab iis, qui nunquam fuerunt Christiani, possit baptismus dari: nec aliquid temere inde affirmandum est sine auctoritate tanti Concilii, quantum tantæ rei sufficit.* Similia scribit lib. vii. de Bapt. cap. lxi. num. 102. Immo cum Donatistas frequentissime urgeat, ex eo quod Baptizati non possint sacramentum amittere, quod in Catholica susceperunt, ac dari possit baptismus ubi potest haberi; videtur S. Pater aliud sentire de hæreticis, aliud de non baptizatis, qui cum baptismum non habeant, consequenter nec dare poterunt.

Resp. laudandam esse Augustini moderationem, dum in re nondum Ecclesie auctoritate, & judicio definita, sententiam dicere detrectavit; quod modo post Romanorum Pontificum, & Conciliorum statuta, nequaquam faceret. Verum etsi dubitavit; ostendit tamen se ita affectum, ut crederet ratum, legitimumque baptismum, ubique, & a quibuscumque verbis Evangelicis consecratum: ita nimirum proficitur citato cap. 53. Imo dum adversus Donatistas demon-

mon-



monstrat, Baptismo propriam inesse virtutem, esse illum Sacramentum Christi, non ministrantium, & alia hujus generis plurima, ubique propositionem istam confirmat. Quod vero Donatistas refutaverit, ex quo extra Ecclesiam non amittatur baptismus, id fecit eorum principiis, commonstrans, quod si extra Ecclesiam habetur, extra Ecclesiam & datur. Dicebant enim Donatistæ: *Recedens ab Ecclesia baptismum non amittit, jus dandi tamen amittit*, eodem num. 30. nuper citato. Sed, inquis, quomodo dat qui non habet? Si loquaris de elemento sensibili, idest, aqua; hanc habet & paganus: si de forma, hoc est de Evangelicis verbis, & hæc proferre potest, si didicerit. At si de gratia, cujus Sacramentum est signum visibile; illam non homo baptizans dat, sed Christus, in cujus nomine baptizat; cujus est baptismus: cujus virtus assistit signo a se divinitus instituto. *Redeo nunc ad illud vestram quod dicitis, Qui non habet quod det, quomodo dat?* (inquit S. Optatus lib. v. de Schism. Donatist. num. 6.) *Unde hæc vox est? de qua lectione recitari potest? Vox est de vico collecta, non de libro lecta: Qui non habet quod det, quomodo dat? Hæc verba in lege scripta non sunt, nam si, ut vultis homo dat, Deus vacat; & si Deus vacat, & apud vos est quod dandum est, ad vos sit conversio; quos baptizatis, in nomine vestro tinguantur. Erubescite, beato Paulo clamanti, & suam gratulationem profrenti, numquid in nomine meo baptizati estis?* Ita pag. 86. possemus edit. Parisiensis.

## C A P U T XV.

*Explicatur quando in praxi baptismus sit repetendus.*

**S**equitur ex præcedentibus dissertationibus, numquam iterandum esse baptismum rite, & in nomine Trinitatis collatum: quoniam baptismus unus est, una spiritalis regeneratio, & una Christi mors, cujus hoc Sacramentum gerit similitudinem; & quoniam id præscribit consuetudo ab Apostolis derivata, auctoritas canonum, definitio Apostolicæ cathedræ: idem commonstrat denique permanens in transfugis & apostatis nota, & character. Pollueret ergo se nefario sacrilegii crimine, qui iterum tingeret jam baptizatum, sacramentum Christi pessumdans, ac nullum reddens. Fieret etiam irregularis, & a suscipiendis Ordinibus arceretur, ut omnes Theologi & Jurisconsulti unanimiter docent; quum ex cap. 2. de Apostat. lib. v. Decret. acolytus, quamvis illum minor ætas, & intentio fraternæ salutis excusare videatur, si rebaptizanti publice assiteris, ad superiores Ordines minime sit promovendus; si autem occulset, cum eo

To. VI. R r r tan-

tantum valeat dispensari, *si ad religionem transire voluerit*. Quanto ergo magis eadem pœna mulctandus est scienter, & data opera rebaptizans? Li etiam, qui rebaptizantur, *si ignoranter id fecerint*, nequeunt secundum canones ordinari, *nisi magna aliqua necessitas cogat*, ex cap. *Qui bis ignoranter*, de Consecrat. dist. 1v. n. 117. si vero his baptizantur *ex industria*; in pœnitentia jacere illos convenit usque ad exitus sui diem, ex canone proximo, *Eos, quos Episcopos*. Atrociore quoque pœnis corporis subijci Rebaptizantes legibus imperatoriis, dictum est ad calcem capitis tertii decimi. Generalis ergo sit regula: nunquam repetatur baptismus, nisi post diligentiam adhibitam de priori baptismate gravis emergat dubitatio; atque in eo casu, non *absolute*, sed *conditionate* baptizetur; ut diximus pertractantes de Sacramentis in genere, decrevitque Alexander III. cap. *De quibus dubium est*, lib. 111. Decret. tit. 42.

## II.

Quid ergo agendum, si ad Catholicam Ecclesiam veniat, qui se in aliqua hæresi asserat baptizatum? Respondeo, *si in sanctæ Trinitatis nomine baptizatus sit*, instruendum esse, quo sensu in Ecclesia ejusdem Trinitatis mysterium teneatur, & purgatum fidei integritate confirmandum manus impositione; ut habetur cap. *Si qui apud illos*, de Consecrat. dist. 1v. num. 28. Si tantum *in nomine Domini* se tinctum profiteatur, sine dubitationis ambiguo *in nomine sanctæ Trinitatis* est iterum baptizandus, ex cap. *Si revera*, ibidem num. 30. Si nesciat, num sit baptizatus, nulla que extent indicia, baptizandus est; quoniam *non potest in iterationis crimen venire, quod omnino factum nescitur*, ut alibi diximus, & liquet ex cap. *Cum itaque*, ibi. num. 112. Quod si certo sciat baptizatum se in nomine Trinitatis; omnino abstinendum est a baptismo, nisi aliqua perfidia hæresum præcedens lavacrum reddiderit nullum aut forma vitiata, aut contra Ecclesiæ consuetudinem pronuntiata ab aliquo, qui non profuderit aquam. Solent enim recentiorum hæreticorum quidam, ut demonstrent verba *concionatoria* esse, *non consecratoria*, ita profanare baptismum, ut unus aquam fundat, alter Evangelica verba pronuntiet: quod animadvertens Synodus Mechliniensis celebrata. an. 1607. & proximo anno a Paulo V. approbata, statuit tit. 3. cap. 6. *ut ab hæreticis, (qui non sunt ad baptismum admittendi, ubi aliquis Catholicus præfuso est) baptizati, iterum sub conditione baptizentur*.

## III.

At si domi ab obstetrice, urgente necessitate, baptizatus sit infans; est ne iterum sub conditione baptizandus? Affirmat citato loco Synodus Mechlin. necnon Iprensis tit. 12. cap. 5. neq. aliter sentiunt Joannes Molanus Tract. 1v. cap. 3. Sylvius in q. 66. art. 1x. & Farvaques de Bapt. q. v 111. Horum ratio est, quod mulieres subito neces-

necessitatis casu turbari possunt, & Parocho interroganti aliter referre, quàm in ea perturbatione fecerint, aut dixerint. Fieri etiam potest, ut malitiose errent, maleficiis & fortilegiis dæmoni infervientes. Verum quia baptismus iterari non debet, nisi adsit de illius nullitate prudens suspicio; extra controversiam positum arbitror, non repetendum baptismum, si obstetrices diligenti Parochorum examine deprehendantur idoneam adhibuisse materiam, præscriptam callere formam, hanc protulisse; nec responsis suis nutent, nullamque exhibeant peractæ rei ambiguitatem: si demum nulla prudens hæsitatio oriatur, illas aut ignorantia, aut malitia, aut negligentia peccasse; atque hoc sensu accipiendos esse puto cum præcætatæ Synodis Farvacquesium, Sylvium, Molanum. Eam ob rem qui audit se infantulum fuisse baptizatum ab obstetrice, nulla angi debet sollicitudine, & firmiter tenere Parochum baptismi sui explorasse rationem; ac memoria repetere, quod cap. *Veniens*, de Presb. non baptiz. ait Innoc. III. *De illo, qui natus de Christianis parentibus, & inter Christianos est fideliter conversatus, tam violenter presumitur quod fuerit baptizatus, ut hac præsumptio pro certitudine sit habenda, donec evidentissimis forsitan argumentis contrarium probetur.*

IV.

De infantibus denique exposititiis quæstio instituitur, an sub conditione baptizandi sint, si deferant collo appensam schedam, qua asseratur baptizatos fuisse? Respondent Theologi paulo supra laudati, utique istiusmodi infantes esse baptizandos, quoniam incomperum est, num scheda illa a malefica muliere, ab atheo, a Judæo, a perditissimo aliquo homine sit appensa. Haud aliter statuit Rituale Romanum editum, jussu Pauli V. tit. de baptizandis parvulis: *Infantes expositi, & inventi, si re diligenter investigata de eorum baptismo non constet, sub conditione baptizentur.* Quibus tamen verbis mone-mur, a baptizando parvulo abstinendum, si scheda illa a fide digno inveniaturs conscripta; propterea quod, ut sæpè diximus, & præcedenti titulo ejusdem Ritualis cautum est, *conditionali forma non passim, aut leviter uti licet, sed prudenter, & ubi re diligenter per- vestigata, probabilis subest dubitatio infantem non fuisse baptizatum.*

C A P U T XVI.

*Pertractatur de Pædobaptismo, idest, de baptismo parvulorum.*

**P**roximum est, ut postquam egimus de Rebaptizantibus, de subje-cto baptismi, sive de baptizandis, dicere instituamus. Ac princi-  
pio

pio indubitatum est, posse baptizari omnes filios Adæ, qui generatione carnali contrahunt originale reatum; cum ad hunc expiandum baptismus sit a Christo institutus: quod generale Christi mandatum Mat. xxv 111. 19. *Docete omnes gentes, baptizantes eos, &c.* universalis redemptio, participatio meritorum Christi, & ea, quæ de baptismi necessitate postea dicturi sumus, aperte confirmant. In quæstionem venire potest, an baptizari potuerit, & baptizata sit purissima Dei Genitrix nullo originali peccato, ut pie creditur, inquinata, idque de creatura alia, quæ extra consuetum naturæ ordinem, & absque polluto viri semine procrearetur, eadem ratione subjici posset disputationi. Nec vereor, quin multi asserant, nec Deiparam, nec innoxiam aliam creaturam fore baptizandam, propterea quod Augustinus de Præd. SS. cap. x111. num. 25. scribat, *In eis, qui nullum habent omnino peccatum, falsus est baptismus, qui in remissionem traditur peccatorum:* & Walafridus Strabo de Reb. Eccl. cap. 26. de Pelagiano dogmate, *Si verum esset, (inquit) vel parvuli non baptizandi essent, vel si extra necessitatem baptizarentur, imperfectum & non verum in eis esset baptismi Sacramentum: quod in symbolo confitemur dari in remissionem peccatorum.* Euthymius tamen in caput 3. Joannis ex Majorum traditione refert, Christum manibus suis tantummodo baptizasse *Petrum & Virginem matrem*; quamvis Evodius ætati Apostolorum proximus apud Nicephorum lib. 11. cap. 5. litteris tradiderit, *solum Petrum a Domino baptizatum.* Certe Augustinus & Walfridus loquuntur de Baptismatis primario effectu, de remissione scilicet originariæ culpæ, quam negabant hæretici Pelagiani, non de initiatione, & cooptatione in Christi Ecclesiam, atque de visibili signaculorum consortio: quarum rerum intuitu, salvo meliori iudicio, affirmarem Virginem, tametsi nulla contaminatam labe, sacra unda perfusam, quemadmodum, licet non pepererit *suscepto semine*, neque fuerit immunda ob sanguinis menstrui defluxum, secundum legem Moysei adiit templum, obtulit parvulum, aut duos pullos columbarum, servata aliarum puorperarum consuetudine.

Hac prætermissa parvi momenti quæstione, utilius disputatur, an ante rationis usum baptizari possint infantes: quod negant Valdeses, Petrobruissiani, Cathari, ac præsertim Anabaptistæ, de quorum secta diximus supra. Tribuunt quidam hanc hæresim & Hæreticis, de quibus Epiphanius hæ. 67. & S. P. August. h. 47. sed hi pueris negabant solummodo ante rationis usum salutem, *eo quod nullum certamen obierint*; & potius errasse videntur circa baptismi effectum, quam circa tempus administrationis. Solet & idem error tribui Tertulliano; sed, quemadmodum constabit infra, prorsus immerito. Recentiorum hæreticorum complures contendunt olim neminem

minem baptizatum, *nisi atate jam adulta*, neque invicte demonstrari antiquam esse & derivatam ex Apostolis consuetudinem pædobaptismi. Ita censent Salmasius in Epistola ad Justum Pacium, data sub nomine Simplicii Verini, Vitringa de Pædob. Vandale in Hist. Baptism. & in animadv. ad Augustinianam Epistolam 166. Joannes Phereponus, ubi more suo in S. Patrem iniquissimus, ait: *At Augustinum oportuisset proferre locum aliquem Scripturæ, ex quo liquido constet infantibus necessario impositum esse baptismum, ita, ut sine eo damnentur, quævis locus nullus est.* Similia ad epist. 175. His nil poterat dici absurdus, nam S. Pater, quæ ex Scriptura adduci poterant, attulit & exornavit, devicitque Polagianos etiam traditione, quam hi minime denegabant. Id ex hac dissertatione patefecit. Quantum ad Scripturam attinet, Vossius disput. x. de Baptismo conqueritur Bellarminum lib. iv. de Verbo Dei cap. 4. Costerum in Enchiridio, & Gretsrum in defens. Bellarmini tit. 1. cap. 9. lib. 4. asserere Baptismum infantium probari contra Anabaptistas non posse, *seclusa traditione non scripta*, & nihilominus Bellarminum lib. de Bapt. cap. 8. hanc veritatem ex Scripturis demonstrare; quod, inquit, & præstant Eckius, Suaresius, Gregorius de Valentia, aliique. Verum, dum Catholici ajunt baptismum parvulorum non evinci ex Scripturis, id tradunt de veritate, quæ in Scriptura contineatur expresse, perspicue, & nequeat seclusa Ecclesiæ auctoritate, ab iis qui jactant se duci privato spiritu, facile eludi: non de veritate, quæ ex Scripturis recte inferatur, maxime si Ecclesiæ judicium, consensus Patrum, & robur traditionis accedat: nec mirum ita loqui Vossium, qui solis Scripturis dogmata firmari putat, more ceterorum hæreticorum. Præter Sectarios autem *neminem olim admotum sacro baptisterio, nisi adulta atate*, affirmavit Annot. in librum primum de Civit. Dei cap. 27. Ludovicus Vives; nec aliter Walfridus Strabo de Rebus Eccl. cap. 26. Hi tamen, licet in historia temporum erraverint, & quorundam consuetudinem differendi baptismum, crediderint esse universalem & perantiquam; minime tamen negarunt licite, ac valide parvulos baptizari, ut ostendunt præcitata verba Walfridi. Consulto Ludovici Vives opinionem ex præcitatæ Annotationibus expunxerunt Theologi Lovanienfes. Erasmus in Epistola, quæ præmittitur illius Paraphrasi in Matth. docuit parvulos, *cum adoleverint interrogandos, an ratas habeant promissiones per eorum sponsas factas*, neque ad Christianam vitam cogendos, si illas noluerint confirmare: quam sententiam anno 1527. proseripxit Facultas Parisiensis, immo & Tridentinæ Concilium sess. vii. canone 14. de Baptismo. Ex iis demum, qui probarunt parvulorum baptismum, Fides, quem Pamelius Episcopum putat, Morellius autem presbyterum, vult nonnisi die octava baptizandum infantem,

eant Ipforum fides, ac motus arbitrii; quia nec illorum affenfus interfuit, ut peccarent in Adam. Vide quæ fcriptifimus volum. v. pag. 399. Hinc eft, quod etiam parvulis Chrifti beneficia collata funt: Matthæi quippe xix. 13. *Oblati funt ei parvuli, ut manus eis imponeret; & difcipulis increpantibus eos, qui parvulos offerebant, inquit: Sinite parvulos, & nolite eos prohibere ad me venire; talium enim regnum calorum.* Immo ab Apoftolis etiam parvulos baptizatos haud obfcure colligitur ex Aët. xvi. 15. ubi legimus baptizatam integram familiam, domumque Lydiæ purpurariæ, & verfu 33. *domum omnem* cuftodis carceris: Paulus etiam 2. ad Corinth. 16. teftatur fe baptizaffe *Stephanæ domum*. In tota autem domo, ac familia univerfa comprehenduntur & parvuli. III. Non tantum adulti, verum etiam infantes Hebræorum tranfierunt mare rubrum, ut liquet ex libro Exodi xii. 37. Omnia autem in figura contingebant illis, & *omnes in Moyfe baptizati funt in nube, & in mari*, ut inquit Apoftolus 1. ad Corinth. x. 2. Debet ergo typo veritas refpondere, & parvulis conferri baptifmus. Ad revincendam Phereponi temeritatem obiter nota hæc argumenta non uno in loco pertractari ab Auguftino: primum de Circumcifione lib. 1v. de Baptifmo cap. xxiv. num. 31. de Peccat. Origin. cap. xxx. num. 35. lib. 2. de Nupt. & Concup. cap. xi. num. 24. Contra Julianum lib. 2. cap. vi. num. 18. & lib. 1. Op. Imperf. num. 50. Alterum de Chrifti Redemptione, morte, ac fepultura lib. 1. de peccat. meritis cap. 27. num. 41. ac lib. 3. cap. v. num. 10. lib. vi. contra Jul. cap. 1v. n. 8. 10. 13. & in Op. Imperf. lib. 2. num. 172. Tertium quoque Tract. xlv. in Joan. num. 9. in Pfal. lxxi. num. 5. & lxxx. n. 8. Serm. 1v. num. 9. & cccxi. num. 3. de Catechiz. rud. cap. xx. num. 34. ubique iifdem Scripturæ locis productis.

Deinde propofitio demonftratur ex Traditione, quam adverfus Pelagianos urget S. Pater ferm. x. de Verbis Apoft. nunc 176. num. 2. his verbis: *Hoc Ecclefia femper habuit, femper tenuit: hoc a majorum fide percepit: hoc ufque in finem perfeveranter cuftodit.* Superiori ferm. 174. num. 9. morem baptizandi parvulos appellaverat *antiquam fidei regulam*. Commendat Auguftinus eandem traditionem lib. x. de Genef. ad literam cap. xxiii. num. 39. Compertam & inconcuflam effe traditionem iftam inde liquet, quod illam nec Pelagiani aufi funt denegare, comminifcentes baptizandum quidem parvulum, fed non ut mundetur ab originali peccato: unde S. Pater lib. 1. de peccat. merit. cap. 36. num. 39. de Pelagianis inquit. *Porro quia parvulos baptizandos effe concedunt, qui contra auctoritatem univerfæ Ecclefie, proculdubio per Dominum & Apoftolos traditam, venire non poffunt: concedant oportet eos egere beneficiis Mediatoris, &c.* Profecto fi hæc traditio ætate Auguftini ambigua & inexplor-

plorata fuisset; nunquam illam probassent Pelagiani, ingenia bona & peracuta, nimium ab Augustino argumentis petitis a baptismo parvulorum vexati. II. Revera hæc traditio lectione Patrum redditur manifesta. Auctor libri de Eccl. Hierarch. cap. ult. ait *Juvenias*, idest, divinæ, ac spiritalis generationis participes fieri *etiam pueros, qui nondum divina mysteria percipiunt*. Scriptor Constit. Apostolic. cap. 15. libri 6. pag. edit. Cotel. 344. *Sed & baptizate* (inquit) *vestros pueros, atque eos educate in disciplina, ac monitis Dei*. Irenæus lib. 2. adversus hæreses cap. 39. & ex distinct. Massuet. 22. ait: *Omnes etatem Dominus sanctificat: omnes, inquam, omnes venit per semetipsum salvare: omnes, inquam, qui per eum renascuntur in Deum, infantes, & parvulos, & pueros, & juvenes, & seniores*. Similia Origenes in cap. vi. ad Rom. & hom. 8. in Levit. S. Cyprianus Epist. 59. ad Fidum. Chrysostomus hom. ad Neophytos, Ambrosius lib. 11. de Abraham cap. xi. n. 81. alique omnes.

Accedunt Ecclesiæ definitiones: inter quas connumerari potest Cypriani Epist. ad Fidum, olim lxxvi. Episcoporum, postea Hieronymi in fine Dialogi 111. adversus Pelagianos, & Augustini lib. 1v. contra duas Epist. Pelag. cap. viii. num. 23. & lib. 1. contra Jul. cap. 111. num. 6. suffragio probata. Concilium Africæ plenarium, celebratum Carthagine anno 418. edidit proximum canonem num. 2. *Placuit, ut quicumque parvulos recentes ab uteris matrum baptizandos negat, aut dicit in remissionem quidem peccatorum eos baptizari, sed nihil ex Adam trahere originalis peccati, quod lavacro regenerationis expiatur, anathema sit*. Tribuitur Tom. 2. Concil. Concilio Milevitano celebrato an. 416. sed vide Append. Tom. x. Op. Aug. pag. 106. Gerundensem, & Barchinonensem Synodum profert Tournelius pag. 155. Senonensem anni 1524. Parisiensem an. 1557. Bituricensem an. 1584. Acquensem an. 1585. nec non capitularia Caroli Magni an. 789. producit Martenius de Antiq. Eccl. Rit. lib. 1. cap. 1. art. 8. num. 11. Adde caput, *Parvuli*, aliaque a Gratiano collecta, de Consecrat. dist. 1v. five a Turrocremata lib. 1. p. 1v. tit. 2. rubr. 9. Contenti erimus definitione Tridentini sess. vii. canone 13. de Baptismo: *Si quis dixerit parvulos, eo quod actum credendi non habent, suscepto baptismo inter fideles computandos non esse, ac propterea cum ad annos discretionis pervenerint esse rebaptizandos; aut præstare omittere eorum baptisma, quam eos non actu proprio credentes baptizari in sola fide Ecclesiæ, anathema sit*.

Confirmatur propositio rationibus Theologicis. Ac prima petitur ex damnationis æternæ periculo, cui subjectos esse parvulos non regeneratos liquet ex dictis. Adeo est hæc ratio urgens & valida, ut S. Carolus Borromæus in Concilio 1. Mediolanensi excommunicationis pœna mulcendos censuerit, *qui natum infantem ante nonum diem*

*diem ad suscipiendum baptismum deferendum non curent*. Idem in Synodali mandato præstitit anno 1645. Rothomagensis Antistites Franciscus Harlaeus. Innuerat olim eandem rationem Alcimus Avitus scribens in Consolatorio carmine ad Fuscina Sororem :

*Omnibus id vero gravius, si forte lavacri  
Divini expertem, tenerum mors invida natum  
Præripiat, dura generatum forte gebenna.*

Profert rationem alteram citata Epist. ad Fidum S. M. Cyprianus ; quod nempe *omnes, sive infantes sint, sive majores natu*, habere possint eandem divini muneris æqualitatem : ad quod comprobandum versat ingeniose factum Helisei, qui super infantem viduæ filium, qui mortuus jacebat, ita se Deum deprecans subtravit, ut capiti caput, & faciei facies applicaretur, & superfusi Helisei membra singulis parvuli membris, & pedes pedibus jungerentur. Ubi æqualitas divina & spiritualis exprimitur, cum naturaliter adulto infans non possit æquari. Afferit quoque Cyprianus circumcisionis exemplum, necnon unctionem postium, quæ rebus sensu carentibus adhibita primogenitis tribuit salutem. Postrema ratio sit, quam insinuat S. Gregorius Nazianzenus Orat. XL. optimum esse, percommodum, & summo opere utile, si, ne occasione arripiat improbitas, *infans sanctificetur, & spiritui consecretur ab ipsis unguiculis*. Apposite laudato Carmine Avitus :

*Nulla Deo siquidem est acceptior hostia, quam quæ  
Immaculata sibi primis offertur in annis.  
Sic quondam cum prima voto splenderet ortu  
Terra nitens, pulchrasque darent sua semina fruges,  
Viventem ducens ad sancta altaria sætum  
Innocuis sonuisse Deum balatibus agnum  
Insinuante Deo justus cognoverat Abel.*

Huc spectat cura adhibenda, ne filii Adam diu vivant mancipia diaboli.

Opp. 1. Præcepit Christus Mat. ult. ut soli adulti, & qui Evangelicam doctrinam audierint, sacro abluantur baptismate : *Euntes, inquit, docete omnes gentes, baptizantes, &c.* Non sunt ergo parvuli ante rationis usum tingendi ; siquidem doceri nequeunt, & Evangelium percipere. Corroboratur argumentatio ; nam Marci ult. ait Dominus, *Qui crediderit, & baptizatus fuerit, salvus erit* : debet ergo fides baptismum præcedere. Idem affirmari potest de poenitentia, quandoquidem Petrus Act. 15. 28. ait : *Poenitentiam agite, & baptizetur unusquisque vestrum in remissionem peccatorum*. Infantes verò quam poenitentiam agent, quam fidem concipient, quam proferent confessionem ? Hoc Anabaptistarum argumentum non diluunt, inquit Vitringa & Vandale, quæ in oppositum e



sacris litteris fuerunt producta. Non sententia illa, *Nisi quis renatus fuerit*, &c. etenim cum parvuli præceptorum vi obstringi nequeant, nec ad illos spectat hoc mandatum, quemadmodum nec aliud Joan. vi. 54. *Nisi manducaveritis carnem*, &c. Non Evangelica verba. Mat. xix. *Sinite parvulos venire ad me*, eo enim loci parvuli dicuntur *parvuli*, nimirum adolescentuli; qui propria voluntate, ut demonstrat complexio verborum, accedunt. Non denique Apostolica consuetudo totam domum baptizandi; siquidem *domus tota* dicitur, parvulis quoque seclusis. Nam 1. ad Corinth. xvi. 15. postquam Paulus domum Stephanæ commemoraverat, quam a se baptizatam scripserat cap. 1. ait: *Et in ministerium sanctorum ordinaverunt seipsos*; quod certe nequit parvulis convenire. In 1. etiam Paralip. x. 6. legitur: *Interiit ergo Saul, & omnis domus illius pariter concidit*, & tamen in Gelboe non interiit Isoboth, neque Eshaël, neque Miphiboth. Ita phrasi Scripturarum *omnis domus* minime significat *universam familiam*.

Ad primum respondet clarissimus Auctor de Ingeniorum moderat. lib. 111. cap. 2. Mat. ult. *mandatum* esse idem, ac *discipulos facere*, sive in scholam, ac professionem admittere, eorumque verborum sensum esse. *Colligite discipulos, baptizate, ac docete*: ibi enim Evangelista doctrinæ post baptismum iterum meminit. Videtur hæc responsio deprompta ex Vossio. disput. x111. num. 6. Verum hæc responsioni non aquiescent Anabaptistæ, quoniam, & Græcum illud vocabulum significat etiam *docere*; & fieri discipulum non aliud est, quam *discere*, atque ad doctrinam admitti: & negari non potest prædicandum prius fuisse Evangelium, quam conferendum baptismum. Veteres cum Illiberitano Canone 42. & Auctore Constit. Apost. (quæ objectat Grotius in Mat. pag. 286.) docent prius *inferendam esse pietatem, fidemque credulitatis*, deinde conferendum baptismum: denique Vulgata nostra habet, *Docete*. Respondendum est igitur, Mat. ac Marci ultimo, mitti Apostolos ad gentes idololatrias, quæ utique ante baptismum docendæ erant, quia nemo ad Christianam religionem trahitur invitus: sed non prohibentur hoc mandato baptizari infantes eorum, qui crediderunt; parentibus enim & adultis Christi corpori insertis, tota domus, ac parvuli, majoribus annuentibus, sunt inferendi. Prædicandum est ergo Evangelium omnibus, baptizandi sunt omnes, & ab omnibus, qui credere & pœnitentiam agere possunt, fides & pœnitentia exigenda, non ab iis, qui nondum credere & pœnitentiam agere possunt. Id exemplo, & ratione fit manifestum. Ut circumcideretur Abraham adultus, fides præcessit; non præcessit autem, ut circumcideretur Isaac. Ipse Abraham iussus omnes masculos circumcidere, proculdubio adultos prius de hac ceremonia, Deique mandato instituit.

Num-

Numquid parvulos incapaces hujus institutionis reliquit incire uncifos? Mutuatus sum exemplum istud ex Augustino lib. iv. de Baptismo cap. xxiv. Vide paginam hujus voluminis 60. Rationem quoque suppeditat ipse Augustinus. Cum enim parvuli detineantur solo originali peccato; congruum est, ut quemadmodum alieno fœto vulnerantur, ita ad aliena verba sanentur. Hinc S. Pater lib. 1. de peccatorum meritis cap. 19. num. 25. docet parvulos recte fideles, ac pœnitentes vocari, *quoniam fidem per verba gestantium quodummodo profitentur, atque per eorundem verba gestantium diabolo, & huic seculo renuntiare monstrantur*. Lib. 111. cap. 2. num. 2. inquit: *Sicut ergo eorum, per quos renascuntur, justitia spiritus responsione sua trajicit in eos fidem, quam voluntate propria nondum habere potuerunt: sic eorum, per quos nascuntur, caro peccati trajicit in eos noxam, quam nondum viâ propria contraxerunt. Et sicut eos vita spiritus in Christo generat fideles, sic eos corpus mortis in Adam generaverat peccatores*. Item serm. xiv. de Verbis Apostoli, nunc 294. num. 12. *Ad verba aliena sanatur, quia ad factum alienum vulneratur. Credit in Jesum Christum? sit interrogatio: respondeatur, Credit. Pro non loquente, pro silente, pro sente, & quodammodo ut subveniatur orante, respondetur, & valet. An etiam hoc serpens ille persuadere conatur quia non valet? Absit a cordibus qualiumcumque Christianorum. Ergo respondetur, & valet; conspiratione quadam communicat spiritus; credit in altero, quia peccavit in altero. An vero invenit vitam præsens seculi, quem parturivit infirmitas; & non invenit vitam futuri seculi, quem parturivit caritas?* Hactenus Augustinus.

Nec enervant Anabaptistæ argumenta a nobis e Scripturis petita. Etenim sententia Domini, *Nisi quis renatus fuerit, &c.* ostendit necessitatem baptismi, quia ex carne nascitur caro, idest, quia generatione noxa originalis trajicitur; & per hanc, non ob transgressionem baptismatis, parvuli non baptizati cælorum regno privantur: quemadmodum, inquit Estius dist. 1v. §. 27. phrenetico necessarium est pharmacum, non propter præceptum, cujus phreneticus non est capax, sed quia sine tali pharmaco curari non potest. At præcepti Dominici, *Nisi manducaveritis, &c.* diversa prorsus est forma, quoniam Christus his verbis non absolute, ac in tertia persona loquitur, sed in secunda compellat adultos: quamquam & ad parvulos mandatum illud spectat, si de spiritali manducatione loquamur, per quam fidelis Christi corpori inferitur. De qua re alibi. In verbis autem illis, *Sinite parvulos venire ad me, &c.* designari infantes ante usum rationis constat, quia non solum dicuntur *nati, pueri*, apud Matthæum & Marcum, sed etiam *spem, recentes ab utero*, Lucæ 18. 16. Confer Græca Act. vii. 19. & 1. Petri 11. 2.

Utitur quoque his verbis Ecclesia in parvulorum exequiis. Adde quod & parvuli ad Christum veniunt; quia, ut Augustinus scribit serm. x. de verbis Apost. nunc 176. num. 2. *Accommodat illis mater Ecclesia aliorum pedes ut veniant, aliorum cor ut credant, aliorum linguam ut fateantur: ut quoniam quod agri sunt, alio peccante praegravantur, sic cum hi sani sunt, alio pro eis consistente salventur.* Ex quibus corruunt alia argumenta Anabaptistarum, opponentium non esse baptizandos incredulos: infantes quippe non increduli dicendi sunt, sed fideles, cum fidem profiteantur eo modo, quo profiteri possunt, id est, ore gestantium, aut sanctæ matris Ecclesiæ. Postrema denique cavillatio retunditur; quoniam in 1. ad Corinth. xvi. in ministerium sanctorum ordinati dicuntur Stephana, Fortunatus, & Achaicus, non singuli familiæ eorumdem; tametsi & parvuli, qui actu ministeria exercere non valent, deputari possint ad ministerium. Præcitato autem loco Paralip. nominantur tres filii Saul, qui interierunt, Jonathan, Abinadab, & Melchisua, ideoque proximis verbis, *Et omnis domus concidit*, nequeunt designari alii filii, qui non processerant ad pugnam, nec illi, qui in objectione commemorantur; sed Saul, tres isti, familiares, famuli, & auxiliarii: unde legit Syrus, *Mortuus est Saul cum tribus filiis suis, & armigero suo, & strenuissimi quique milites ejus simul occubuerunt.* Tom. 2. Bibl. Valt. pag. 658. Addo Miphibosech non fuisse filium Saulis, sed Jonathæ, 1. Paralip. 1x. 40. & 2. Regum 1v. 4.

Opp. 2. Canon vi. Neocæsariensis rationem reddens, quare cum muliere prægnante nequeat baptizari fœtus, ait: *Quod proprium uniuscujusque institutum ac propositum in confessione ostendatur.* Non potest ergo parvulis prodesse fides parentum. Revera si illis nocere non potest parentum malitia; quomodo prodesse potest parentum fides?

Respondeo ideo juxta Neocæsariensem canonem factum in utero matris inclusum non habere cum matre communem baptismum, quoniam baptismus matris non afficit puerum nondum natum, ut in hunc canonem adnotarunt Balsamon, Zonaras, & Aristenus: nam ad verba, quæ obijciuntur, hæc præcedunt, *Neque enim ea quæ patris cum fœtu qui paritur ea in re aliquid habet commune.* Verbis autem proximis innuitur, quod nec fides salvare potest in utero matris existentem puerulum; quoniam fides uniuscujusque propria est, atque ideo pristinis Ecclesiæ sæculis *catechumens*, inquit in illum canonem. Albaspinæus, *se baptizari velle magna voce contestabantur.* Itaque puer materno in utero nec baptismo matris, nec fide salvatur: non baptismo, quia illi non applicatur; non fide, quia istam non profitetur. At enim, inquis, profitetur mater: cur illi non prodest? *Quia, ut possit regenerari infans per officium voluntatis alienæ,*

*aliena, cum offertur consecrandus, facit hoc unus Spiritus, ex quo regeneratur oblati: non enim scriptum est, Nisi quis renatus fuerit ex parentum voluntate, aut ex offerentium vel ministrantium fide, sed, Nisi quis renatus fuerit ex aqua & Spiritu sancto. Aqua igitur exhibens forinsecus Sacramentum gratiae, & Spiritus operans intrinsecus beneficium gratiae regenerant hominem in uno Christo ex uno Adam generatum; ait Augustinus epist. 23. ad Bonif. nunc 98. n. 2. Non prodest ergo parvulo sola parentum fides; quoniam gratia regeneratrix non ipsi fidei, sed Sacramento fuit divina institutione alligata. Atque per hæc diluitur postrema instantia. Fides enim parentum non ita prodest infantibus, ut illos regeneret; sed ut offerantur regenerationis lavacro, atque ita connumerentur inter credentes, dum illos extrinsecus abluit aqua, & intrinsecus sanctificat Spiritus. Quare parvuli, etsi non recta intentione a parentibus offerantur, dummodo celebrentur necessaria mysteria & verba Sacramentorum, intelliguntur offerri ab universa societate sanctorum, & sanctificantur a Spiritu, qui agit quod agit etiam per servitutem aliquando non solum simpliciter ignorantium, verum etiam damnabiliter indignorum. Vide eandem Epistolam num. 5. Ex hujus lectione etiam percipies, quomodo non communicetur culpa per alterius voluntatem, communicetur autem gratia per sancti Spiritus unitatem: quia nimirum, potest & in hoc, & in illo homine esse unus Spiritus sanctus, etiamsi invicem nesciant, per quem sit utriusque gratia communis. Non autem potest spiritus hominis esse & huius & illius, per quem peccante altero, & altero non peccante, sit tamen culpa communis.*

Opp. 3. Tertullianus de Baptismo cap. 18. baptismum parvulorum his verbis improbat: *Itaque pro cuiusque personæ conditione aut dispositione, etiam ætate cunctatio baptismi utilior est. Quid enim necesse est, si non tam necesse, sponsos etiam periculo ingeri? qui & ipsi per mortalitatem destituere promissiones suas possunt, & proventu mala indolis falli. Ait quidem Dominus, Nolite illos prohibere ad me venire. Veniant ergo dum adolescunt, veniant dum discent, dum quo veniant doceantur, fiant Christiani quum Christum nosse potuerint. Quid festinat innocens ætas ad remissionem peccatorum?* Et S. Hieronymus in fine Commentarii in Mat. *Non potest fieri, inquit, ut corpus baptismi recipiat sacramentum, nisi ante anima fidei receperit veritatem.* Tom. IV. pag. 144.

Resp. ex ipso textu Tertulliani evinci pædobaptismum. Si enim tunc temporis in baptismo sponsores aderant, certe baptizabantur qui non poterant ore proprio fidem profiteri, & Evangelicæ legis observationem promittere. Loquitur ergo Tertullianus de baptizandis infantibus extra casum necessitatis, & quando parentes infideles sunt,

sunt, ac magnum urget periculum, ne baptizati, si *sponsores* decedant, injuriam faciant Sacramento. Ita in hunc locum Jacobus Pamelius, ac noster Moreau Tom. 2. pag. 134. Quod revera Tertullianus accipiendus sit extra casum necessitatis, demonstrant ea verba, *Si non tam necesse*, & quod supra scripserat cap. 12. *nemini sine baptismate competere salutem*. Quod vero loquatur, dum pueri in potestate permanent infidelium, constat, quia si vivant in Christianorum societate, nulli periculo subjiciuntur sponsores. Nec moveat quemquam Tertulliani effatum illud, *Quid festinat innocens aetas ad remissionem peccatorum?* Si enim aetatem infantium dixit innocentem, idest, sine originali reatu, deferendus est, & privatæ opinioni nimium indulsit, inquit Auctor de Moderat. Ingeniorum loco citato: si innocentem dixit, idest, absque actuali peccato, nil urget instantia. Hoc postremum mihi probatur, quod sint illustria Tertulliani testimonia, quibus adstruit damnationis traducem, & originariæ labis transfusionem, a nobis producta Volum. 111. pag. 19. & quod in baptisinate ceremoniæ permultæ ad idololatriam, mundique illecebras ejurandas, quibus pueruli minime inquinantur, antiqua peragantur consuetudine. Ad has itaque festinandum non esse parvulis illis, quos nondum polluit infidelium societas, asseruit, ut opinor, Tertullianus. Hieronymus verò sapientissime scribit infideles utiliter non baptizari, nisi antea fidem susceperint: quod accipiendum de adultis, inde patet, quia parvuli *negativè* tantum infideles sunt, nulloque *æternæ* vitio laborant, & quia idem Hieronymus in Epist. ad Lætam 2. p. Tom. 1v. pag. 593. inquit *filios, si baptismus non acceperint, reos esse peccati, & etiam scelus referri ad eos, qui dare noluerint*: & in fine tertii Dialogi adversus Pelagianos, pag. 546. *etiam infantes in remissionem peccatorum baptizandos in similitudinem prævaricationis Adam*.

Opp. ultimo: Acquum est, ut imitemur exemplum Christi, qui ad baptismum venit anno tricesimo. Nam & multi præclari viri, ut Constantinus, Ambrosius, Augustinus, Paulinus, Christi exemplum baptismum ad grandævam aetatem distulerunt. Deinde si parvuli tingendi sunt; cur saltem postquam ad justam aetatem pervenerunt, non interrogantur, an in religione Christiana, quæ nullum cogit invitum, permanere velint, ut post Zuingerum existimavit Erasimus? Si demum tingendi sunt recentes ab utero exemplo circumcisorum; quare octavo die, ut Fides contendebat, non baptizantur?

Respondet ad primum S.Gregor. Nazianzenus Orat. xl. pag. 658. *Cum Deum dixisti, questio a te soluta est: nam ille purgatio ipsæmet erat, nec purgationis indigebat: verum tua causa purgabatur, quemadmodum & carnem ferebat, cum carnis expertus esset. Nec vero quicquam*

quam periculi ei metuendum erat baptismum proroganti : quippe qui passionis quoque suæ arbiter esset , quemadmodum & natiuitatis . Tibi autem non leve periculum imminet , si hinc corruptioni soli genitus , nec incorruptibilitate indutus excefferis . Ex quibus constat quàm male exemplo Christi Michael Seruetus , & aliqui Anabaptistæ , dissentientibus tamen ejusdem sectæ aliis , baptizarint anno tricesimo . Cur vero nonnulli baptismum distulcrint , dicam capite xx. Sufficiat modo animadvertere hæc exempla nullatenus juvare Anabaptistas : nam Constantinus , si baptizatus est Romæ anno 324. a Silvestro , cum natus sit anno 273 . Aureliano imperante , ad baptismum accessit anno ætatis suæ 11. & si baptizatus est Nicomediæ morti proximus , id contigit anno 337. & vitæ ejus LXIV. Ambrosius baptizatus est anno 374. ætatis suæ 35. aut 42. nam quidam illum natum scribunt anno 340. quidam vero annum ejus natalem statuunt 333. Augustinus baptismum regeneratus est anno ætatis suæ 33. aut inchoato , aut completo ; ac S. Paulinus anno circiter duodequadragesimo . Nullus horum aut tricesimo anno , ut optabat Seruetus , aut primis annis exferentis sese rationis , ut vellet Anabaptistarum pars major , accessit ad salutiferum baptismi lavacrum . Ad alterum respondemus interrogandos non esse , qui ad ætatem perveniunt adultam , an velint in religione persistere ; quia nec olim interrogabantur circumcisi octava die : quia eorum utilitas postulat , ut in Christiana religione permaneant , nec danda est illis optio in animarum suarum perniciem : quia parentibus non obluantibus indelebili Christianorum militum nota sunt insigniti : quia demum non proprii juris sunt , sed per Sacramentum regenerationis Ecclesiæ nati , emptitii , subiecti . Vid. Innoc. III. in cap. *Majores* , §. *Verum* , canonem 45. Concilii Tolet. IV. & Trident. de Bapt. 14. Ad ultimum respondet cp. 59. S. Cyprianus : *Nam quod in Judaica circumcissione carnali octavus dies observabatur , sacramentum est in umbra , atque imagine ante præmissum , sed veniente Christo veritate completum . Nam quia octavus dies , idest , post sabbatum primus dies , futurus erat quo Dominus resurgeret , & nos vivificaret , hic dies octavus , idest , post sabbatum primus & Dominicus præcessit in imagine : quæ imago cessavit superveniente postmodum veritate , & data nobis spiritali circumcissione . Non negamus tamen aliquos observasse in baptismum octavum diem , ut constat ex Epistola 44. Ambrosii ad Horontianum , atque ut moris est , auctore Allatio , apud Græcos : aliquos protrahere baptismum masculorum ad quadragesimum diem , & feminarum ad octuagesimum . , ut solent Chaldæi , Indorum aliqui , & Moschi : aliquos etiam annum tertium commendare , ut Gregorius Nazianzenus , aliique apud Martenium loco cit. num. 10. Sed horum consuetudinem sequi non tenemur , primo quia & ipsi quacunque die bapti-*

baptizant parvulum, si immineat periculum; deinde quia privata consuetudini præferenda est universalis, & Oecumenicis Synodis comprobata; tum quia infinita baptizandorum multitudo, aliam modo postulat a priscis sæculis disciplinam: demum quia cum omnes parvuli contrahant per Adam originale peccatum, æquum est ut omnes vivificentur in Christo: unde Prosper *non diximus*:

*Immortalem hominem factum si creatis, & nos  
Credimus: inciderit mortem peccando, suamque  
Progeniem culpa, & leto devinxerit omnem;  
Nullus non egeat sacro baptismate Christi,  
Infantesque etiam purgentur fonte lavacri.*

## C A P U T XVII.

*An infidelium pueri baptizandi sint parentibus reluctantis  
atque invitis?*

**E**X quo plura nos compellunt ad parvulos baptizandos, Ecclesiæ nimirum consuetudo, auctoritas Patrum, atque Theologica ratio, ut dictum est hætenus, nemo inferat tingendos puerulos a Judæis, vel paganis progenitos, dominio parentum vi sublato. Tenet id quidem Scotus in 1v. dist. 4. 9. ac probabile censet Estius dist. vi. §. 2. sed videntur nobis melius sentire, qui cum D. Thoma q. lxxviii. art. 10. & 2. 2. q. x. art. 12. negant istiusmodi pueros licite baptizari. Atque hæc sententia inter Scholasticos communior est, eamque propugnant etiam nostrates laudati a Frid. Gavardi q. v. de Bapt. art. 1. Ad partes tamen Scoti accesserunt ex Lovanien-sibus nostris Farvacques de Bapt. cap. vi. q. 3. §. 2. Vanroy cap. 2. q. 9. & Aurelius Piette q. pariter 9. ita, ut recentior Scotista Henno disp. 1v. q. 3. scripserit Augustinianos communiter Scoto adhærere: at non sunt Augustinien-ses omnes pauci illi Lovanien-ses. Ut brevi solvatur quæstio, prænotandum est non pertractari de baptismi validitate; nam certum est ratum esse baptismum ubicunque, & a quibuscunque verbis Evangelicis consecratur, nec requiri voluntatem parentum, ut possit infans regencrari: quod opus esse Spiritus sancti *intrinsecus operantis beneficium gratiæ*, non semel cum Augustino tradidimus. Certum quoque est licite baptizari parvulum ex infidelibus parentibus natum, in extrema constitutum necessitate; si id absque Christianæ plebis detrimento fieri possit, & mors sit certo consecutura; quia tunc jure patriæ potestatis non violato, nec Sacramento injuria aliqua illata, ad spiritalem, æternamque vitam parvulus, alioqui periturus, regeneratur. Indubitatum præterea filios  
infi-

infidelium licite baptizari, si posteaquam ad usum rationis pervenire, baptismum petant; cum in iis, quæ spectant ad jus naturale, ac divinum, tunc incipiant esse potestatis suæ, habeantque liberi arbitrii exercitium. Postremo fatentur omnes licite parvulos hujusmodi baptizari, si Christianorum principum sint mancipia, quoniam eo in casu possunt jure gentium vendi, manumitti, inter libertinos ascisci, ideoque etiam a patria potestate separari; quia postquam servitus invasit, pueri etiam curæ parentum relicti, domino rum manui ac potestati subjiuntur. Fiunt autem mancipia ac servi, vel nativitate, dum nascuntur ex ancillis, vel jure gentium, idest, ex captivitate, vel jure civili, dum liber homo major viginti annis sese venundari patitur ad pretium participandum. Ita Justin. de Jure Personarum tit. 3. Remanet ergo difficultas de pueris infidelium, qui Christiano principi non *serviliter*, & tanquam mancipia, sed *civiliter* tantum, idest, ut cives atque indigenæ, subjiuntur.

PROF. Licitum non est baptizare pueros infidelium, ipsorum parentibus invitis & reluctantibus, casibus, qui subjiuntur, exceptis.

Etenim idem de Baptismo, & de circumcisione videtur esse asserendum; præsertim quod Scotus hanc institutam fatetur ad delendum originale peccatum, nostrique præcitati Lovanienfes ad sententiam suam corroborandam solent proferre quod legitur in primo Machab. 11. 46. de Mathathia, ejusque commilitonibus: *Et circumciderunt pueros incircumcisos, quotquot invenerunt in finibus Israel, & in fortitudine*. At neque facta sibi a Domino permissione, neque recepta unquam consuetudine, circumciderunt Hebræi subiectas sibi nationes civili duntaxat politia, si aut pro se, aut pro puerulis repugnaverunt adulti. Idem ergo in baptismate initiandis est observandum. Quod de circumcisione dixi nuper, liquet ex Genesis xviii. 19. quo in loco præcepit Deus Abrahamo, ut circumcideretur omnis infans, *tam vernaculus, quam emptitius*, & de ejusdem stirpe, non procreatus, sed aut domesticus, aut serviliter subiectus: nam indigenis aliis, & colonis pudenda non debebant abscondi, nisi voluissent Judæis permisceri, & unâ cum illis Phasæ Domini celebrare, ex libro Exodi xxi. 48. Hinc lib. xiii. Antiquit. Judaicarum cap. viii. num. 1. narrat de Hircano Josephus, quod subactis omnibus Idumæis permisit in regione sua permanere, si præputium circumcidere, Judaicisque legibus uti vellent, eosque sponte patriæ suæ amore admisisse circumcisionem. Similia narrat de Aristobulo post Ituriam debellatam, multamque hujus regionis partem Judææ addictam, lib. xiii. cap. xi. num. 3. nec aliud de quibusdam Trachonitis, in libro de vita sua pag. 11. hac producta ratione, *Hominem quemque oportere ex animi sui voluntate Deum colere, & non ad id* To. VI.



*faciendum cogi*. Quæ cum valeant de hominibus ratione utentibus; suiique juris, tenent proculdubio & de parvulis sub patria potestate degentibus. Nec vero ad rem facit exemplum Mathathia, qui circumcidit pueros vel Israelitico genere natos, vel sibi jure belli subiectos, nec amplius sub parentum potestate constitutos, ut dixi ex Justinianeis Institutionibus. II. Neque Christus Dominus præcepit Apostolis, ut aliquem initiarent lavacro regenerationis invitum & reluctantem; sed jussit, ut prædicarent Gentibus Evangelium, & baptizarent credentes, Mat. ult. 19. Aequum est autem, ut imitemur exemplum Apostolorum, ac Domino obtemperemus: qui nemini vult vim inferri; sed quemadmodum sub peccato stant filii Adam propriæ voluntatis arbitrio, ita sponte debent se Domino mancipare. Neque vero dicas id quidem valere de adultis, qui libertatis suæ usum habent, non de parvulis: quoniam hi, donec ratione utantur, sunt aliorum potestatis ac juris; & ideo, si adulti cogi nequeant ut baptizentur, nec baptizandi erunt qui ipsis subjiuntur. Alteri enim vis inferitur non in propria duntaxat persona, verum etiam in iis, qui ad ejus pertinent potestatem. Hinc si fas est baptizare infantes invitis parentibus, licebit quoque vi adultos ad fidem suscipiendam compellere: quare Estius unam quæstionem alteri cognatam recte appellavit, & Scotus in utraque pro affirmante parte complexus est argumenta. III. Revera illinc adversarii complures petant propriæ sententiæ præsidium, quod Rex Hispaniarum Sisebutus, Carolus Magnus, aliique Religiosissimi Principes ad suscipiendum baptismum vi paganos, Judæosque coegerint. Sed nil adjumenti ex hujusmodi exemplis possunt capessere; siquidem Toletana 17. Synodus anno 633. canone 57. præcepit nemini ad credendum, vim esse inferendam: *Cui enim vult Deus miseretur, & quem vult indurat; non enim tales inviti salvandi sunt, sed volentes, ut integra sit forma justitiæ: sicut enim homo proprii arbitrii voluntate serpenti obediens periit, sic vocante gratia Dei propriæ mentis conversione quisque credendo salvatur. Ergo non vi, sed libera arbitrii facultate, ut convertantur suadendi sunt, non potius impellendi*. Vide Tom. 2. Conc. Hisp. pag. 488. Docet similia S. Gregorius Magnus epist. 45. libri 1. nunc 47. ad Arelatensem, & Massiliensem Episcopos. De Sisebuto autem, aliisque Catholicis principibus, qui vi infideles ad Christianam religionem traxerunt, dicam infra: nam regulam formamque rerum agendarum præbent nobis Ecclesiæ statuta, non aliquorum regum exempla. IV. Ipsi tamen religiosissimi Principes, necnon Pontifices summi, sanctitate, doctrina, & zelo religionis clarissimi, quamquam construxerint pro-Neophtis, & Catechumenis domus amplissimas, nunquam tamen parentibus a fide alienis subriperunt infantes, sed invitando singulos, neminem

nem repellendo , cogendo neminem , servaverunt Christi instituta , & propugnatam a nobis sententiam perpetua consuetudine comprobaverunt . Reponit Augustinensis quidam : Cur infensissimos illos Christi hostes , idest , Judæos in sua civitate tolerat Romanus Pontifex , cur eos inde non amandat ? Sicut ergo suas habet rationes gentem illam abominabilem tolerandi , ita & rationem habet infantes Judaica stipe procreatos ab invitis parentibus non avellendi . Bene ac sapienter id dictum est : sed rationem nostram firmat potius , quam diluat . Tolerare enim Judæum , ut illi conversionis non desit occasio , Christianam præfert pietatem ; vi autem illum compellere non finit Christi institutio , arbitrii libertas , & jugum religionis suave . Sed qualiscunque summorum Pontificum animo infideat agendi ratio , quam esse optimam , æquissimamque non dubito ; si tolerandi sunt perveraces Judæi , quoniam ab illis tolerantur : igitur quia non baptizantur eorum pueri , hi non sunt baptizandi . V. Quis vero Principum id præter inveteratam consuetudinem attentabit ? Profecto aut Ecclesiasticus , aut Politicus , aut utraque præditus potestate . Non debet hoc sibi arrogare Princeps Politicus , quoniam ejus auctoritas extenditur tantum ad regimen populi , instituendum juxta naturalis , humanique juris præscriptiones . Neque Ecclesiasticus Princeps ; quippe ad eum non spectat de iis , qui foris sunt , judicare , ut inquit Apostolus in priori ad Corinth. v. 12. Qui vero utraque pollet auctoritate , nihil aliud exequi potest , quàm quod illi se junctim . VI. Postremo , ne prætermittamus tritam communemque argumentationem , puerulus invitis parentibus baptizatus aut sub eorum cura relinqueretur , aut hinc subtraheretur vi illata parentibus ipsis invitis . Primum includit manifestum fidei periculum , filii enim a parentibus infidelibus educati eisdem imbuerentur erroribus . Alterum lædit jus naturæ , quod tribuit parentibus potestatem in filios ; quippe donec hi ad usum rationis perveniant , ita subjiciuntur patriæ potestati , ut a cura parentum subtrahi nequeant , quemadmodum , inquit Sanctus Thomas 2. 2. quæst. 10. art. 12. animalia destituta ratione , atque res aliæ dominorum suorum arbitrio subiectæ .

At opponunt Scotistæ . I. Potius Deo , quàm hominibus obediendum est , ex Aët. v. 29. Atqui Deus præcepit , ut omnes baptizentur . Igitur omnes pueri , etiamsi parentes repugnent , baptizari possunt . II. Apud Lucam xiv. 23. ait Dominus servo : *Compelle intrare , ut impleatur domus mea* . Vi ergo possunt infideles ab baptismum compelli . III. Machabæi invitis parentibus circumciderunt pueros in finibus Israel repertos , & quidem parentibus , ut inquit Tirinus , invitis & reluctantibus . At circumcisionis , & baptismi eadem est ratio . IV. Dum parentes nolunt baptizari filium suum ,

non utuntur jure naturali, sed eo abutuntur; possunt ergo eodem jure privari. Atque hoc argumentum confirmatur, nam si parentes velint filium occidere, aut filiam ad stuprum impellere, aut vi cogere ad furtum, aut alia facinora; filius, & filia a patria potestate subtraherentur. Subtrahi ergo quoque possunt, si parentes nolint eos baptizari; cum inde proveniat mors animæ, quæ magis est pertimescenda, quam carnis interitus. Confirmatur præterea, idem argumentum ex quo Augustinus in Epist. ad Vincentium Donatistam 93. aliàs 48. laudet *leges ab Imperatoribus latas adversus sacrificia Paganorum*, producto decreto Nabuchodonosoris, de quo Danielis 111. 96. Si ergo Imperatores impedire possunt sacrificia paganorum; cur non poterunt infantes ab impia eorum educatione subtrahere? V. Non violatur jus naturale, si a parentibus invitis puer subtrahatur, ac baptizetur. Corruit ergo præcipuum momentum, superius productum. Probatur antecedens, tum quia parentes non habent ex jure naturali potestatem impediendi baptismum suorum, filiorum, si ipsi velint baptizari; tum etiam quia potior est ratio juris divini, quam juris gentium; si ergo jure gentium titulo servitutis possunt filii infidelium baptizari invitis parentibus, non violato jure naturæ; multo magis baptizari poterunt vi juris divini baptismum omnibus præcipientis. VI. Si desit consensus Genitorum, adest consensus Conditoris & Auctoris naturæ, qui omnem puerum ad finem supernaturalem ordinavit, & vult, ut cuique media applicentur, quibus finem suum possit adsequi: ad ipsa quoque media pueri omnes jus habent; ideoque si culpa parentum iis mediis exspolientur, irrogatur illis injuria, nec divina adimpletur voluntas.

Respondetur ad 1. falsam esse minorem propositionem; siquidem vult Deus omnes baptizari, servato, non violato naturæ ordine, qui in adultis exigit eorum assensum, in parvulis consensum unius, vel alterius parentis, ut demonstrat ratio, auctoritas, & consuetudo. Major etiam propositio æquivocatione laborat; nam qui vim non infert parentibus, illis subtrahendo puerulos, non transgreditur Dei præcepta, sed implet, cum a Deo sit quoque lex naturæ indita hominibus universis, atque ob nullum positivum præceptum violanda. Ad 2. respondetur eatenus Gentiles compelli ad fidem, quatenus ad Evangelii prædicationem ex nolentibus fiunt volentes, accedente ea gratia, quæ a nullo duro corde respuitur, persistente tamen liberi arbitrii facultate & optione. Alioqui ex eo loco inferretur, impios quoque in sceleribus perveraces ad cælestis regni hæreditatem violenter perducere. Ad tertium jam dictum est pueros a Machabæis in sinibus Israel circumcisos, fuisse filios Judæorum: quod recte observatum est a Lyrano, Estio, clarissimisque aliis interpretibus. Præcedenti enim cap. 1. §1. legimus præcepisse Antiochum,

chum, ut Judæi filios suos relinquerent incircumcisos, eique multos ex Israel concessisse . Hos itaque pueros, quos parentes aut mortis timore, aut apostasia a lege non circumciderant, Mathathias & socii ejus ad pristina instituta revocando Israelitas, fecerunt præputio: & si id fecerunt in filiis gentilium justo bello manu captis, vicem rependentes Antiocho, qui Judaicæ stirpis pueros ad gentium iniquamenta coegerat; nec istud, ut liquet ex prænotatis, nostræ adversatur propositioni. Ad quartum distinguendum est antecedens: Abutuntur parentes infideles jure naturali, adversus debitum justitiæ naturalis, nego: adversus debitum religionis, concedo: sed quantum ad religionem attinet, ipsi parentes infideles nondum alicui hominum subjiuntur. Non debet autem exspoliari potestate sibi naturali jure collata, qui ipsum jus naturale non frangit. Hac verò ratione diluitur prior confirmatio; siquidem si parentes velint filium interficere, aut prostituere filiam, abutuntur jure naturali in iis, quæ ad ipsius juris debitum ac rectitudinem spectant, ideoque merito privantur potestate, quam habent in filios jure naturæ: at dum renuunt filios suos baptizari, peccant adversus jus supernaturale, in quo nulli hominum subjiuntur, ideoque ab homine exspoliari nequeunt ea potestate, qua ex naturali jure fruuntur. Diluitur eadem ratione confirmatio altera; etenim potest ac debet princeps Christianus impedire sacrificia paganorum, qui sibi civiliter subjeeti sunt, quoniam cultus disparitas, ac publicum idololatriæ exercitium potest subditorum suorum, quos continere debet, mores labefactare, ac turbare tranquillitatem. At non potest idololatrias, aut Judæos vti ad baptismum compellere; quia ad religionem homines non trahuntur inviti: tantummodo si Christianæ plebi scandalo sint, potest ac debet ex propria ditione expellere, si baptizari detrectent, aut illos separato contubernio concludere. Hinc Augustinus non laudat leges Imperatorias, quæ vti ad Christianam religionem compellant, sed quæ profanarum religionum cohibent cultum publicum: quæ duo longe diversa sunt, ac plurimum discrepant. In decreto pariter Nabuchodonosoris posita fuit lex, ne aliquis loqueretur blasphemiam contra Deum Sadrach, Misach, & Abdenago, non ut quilibet in cultum ipsius Dei per circumcisionem inviti & obstrictantes initiarentur. Ad quintum negandum est antecedens, cujus futiles afferuntur probationes: nam ad primam dicimus, puerum cum ad usum rationis pervenit, in iis, quæ pertinent ad jus naturale, ac divinum esse potestatis suæ, ideoque non est deinceps penes patriam potestatem illum impedire, si velit baptizari; ante usum autem rationis idem puer jure naturali patriæ potestati subjiectus. Ad probationem alteram dicimus, non quocunque jure gentium licitum esse puerum baptizare invitis parentibus; sed eo tantum jure, quo a potestati-

testate ipsorum parentum subtrahitur, idest, si captivus fiat, si mancipium, si servus: quo in casu etiam Jus divinum baptismi pueri collatum laudat & comprobatur. Ad sextum argumentum respondemus, consensum & voluntatem Dei esse ut impii ad Christianam religionem invitentur, ut nemo expellatur, ut singulis venientibus exhibeantur remedia salutis; non verò ut pertrahantur inviti, nec ut violetur jus naturale, vel patrie potestati inferatur injuria. Hinc Augustinus de Ecclesia inquit, de vera Religione cap. vi. n. 10. *Alios ergo invitat, alios excludit, alios relinquit, alios antecedit: omnibus autem gratia Dei participanda dat potestatem, sive illi formandi sint adhuc, sive reformandi, sive recolligendi, sive admittendi.* Nota, quod omnia fere argumenta ab adversariis producta, si aliquid efficerent, probarent quoque non solum posse principes illata vi baptizare pueros infidelium, verum etiam ad hoc omnino teneri, quemadmodum tenentur dare operam, ne pagani, aut Judæi filios suos interficiant, ne Christianæ plebi sint scandalo, ne Jus naturale, aut civile ab illis quoquo modo violetur.

Opponunt insuper: Sisebutus Hispaniarum Rex apud Baronium ad annum 614. num. 39. Judæos vi ad baptismum coegit; nec id improbatum est a Toletano Concilio IV. quin potius citato canone 57. Sisebutus summis laudibus celebratur, ac præcipitur, ut Judæi qui fidem Christianam vi, vel necessitate susceperunt, tenere cogantur. II. Lege III. Visigothorum lib. XII. tit. 3. Judæi sub pœna exilii compelluntur, ut filios suos baptizandos mittant ad Sacerdotes; idemque statuit Chintillanus Rex, ut constat ex canone 3. Concilii VI. Toletani. III. Carolus Magnus circa annum 804. Saxonum, & Hunnos vi ad baptismum compulit, litteris Adriani primi Pontificis plurimum commendatus. IV. Idem de Chilperico, & Dagoberto refert in differt. de hoc argumento Launojus. V. Addunt Farvacques, & Piette Epistolam S. Francisci Xaverii ad Franciscum Henricum, ubi hæc habentur: *Noli mirari, frater, quod minus in istorum Neophytorum cultura proficias; quippe cum & gens ipsa, ut scribis, idolorum cultui dedita sit, & Rex a Christi religionis alienus acerbè infestetur Christianos. Plus itaque proficis, quam tu putas, infantes diligentissime conquistos per baptismum calo pariendo.*

Resp. adversarios in hisce historiis colligendis parum fuisse oculatos. Sisebuti enim factum reprobatum eodem canone a Synodo Toletana. Dum autem ibidem Sisebutus religiosissimus appellatur; zelus religionis, ac statuta alia adversus Judæos laudem istam promeruerunt. Mandavit quippe Sisebutus lib. XII. tit. 2. l. 12. ne Judæi Christianum mancipium circumciderent, l. 14. ne Christianum liberum tanquam servum, mancipiumque tenerent, l. 16. ut quicumque Christianus exercuerit Judaicos ritus, morte turpissima plecteretur.

tur. Vide has, aliasque leges Sisebuti Vol. 1. legum antiq. Prof. Etò Judæos baptizatos ad retinendam religionem, in qua Sacramenta, participarunt, cogendos esse, licet metu mortis ad baptismum venerint, rectè definitum est canone præcitato; quum in illis fuerit intentio *interpretativa*, ut dixi cap. xviii. præcedentis libri; confirmata etiam, ex eodem canone, susceptione *Chriftmatis*, & participatione *Corporis & Sanguinis Domini*. At lex Wisigothorum, præcipit, ut Judæi, qui noluerunt subire exilii pœnam, promittentes se potius recepturos baptismum, *decalvati susceptisque centum flagellis*, statuta pœna multentur, *si aut se baptizari distulerint, aut filios suos, vel famulos nullo modo ad Sacerdotem baptizandos remiserint, vel se suosque de baptismo subtraxerint, vel anius anni spatium*, post legem illam editam, *quispiam illorum sine gratia baptismatis transferat*. Vide præcit. Vol. 1. legum antiq. pag. 223. Adde ex lege 4. præced. tit. 2. pag. 213. Judæos, pro quibus edita fuit lex illa 3. *Cum veritas*, fuisse forsitan filios Judæorum illorum, qui perceperant *sacra Religionis Christianam fidem antequam baptismatis*. Et si ergo statui non debeat Ecclesiasticæ disciplinæ regula in una lege Wisigothorum; hæc tamen imperitè profertur pro sententiâ, quam refutamus. Idem asserendum est de Carolo Magno: Saxones enim a Carolo rebellarant anno 776. iterumque in ditionem redacti baptizati sunt cum uxoribus & infantibus suis, & anno proximo in Synodo Paderbornæ jurarunt servaturos se Christianam fidem, passuros alioquin dispendium bonorum omnium. Anno tamen 795. iterum a Carolo defecerunt, sed paullopost eidem se se dederunt cum Hunnis, qui pariter baptismum susceperunt. Hæc non tantum Baronius, sed & Ado Viennensis. Albinus Flaccus in Epistola ad Paulinum Patriarcham Aquilejensem, Francorum Annales. Regino, & alii. Jure ergo Carolus Saxones, Hunnosque compulit ad retinendam Christianam religionem, quam liberè susceperant. Chilperici factum. improbat Gregorius Turonensis lib. vi. Hist. Francorum cap. 17. Dagobertus verò literas quidem dedit ad Amandum, Trajectensem Episcopum, ut infideles cogeret ad baptismum, sed sanctus Antistes neminem baptizavit, nisi credentem, & Evangelii prædicatione ab infidelitatis erroribus revocatum. Vide Amandi Acta apud Bolland. Tom. 1. Februarii pag. 850. Denique etiam epistolam S. Francisci Xaverii nimium oscitanter adversarii legerunt. Eo quippe in loco, pag. Rom. edit. 67. ita Xaverius prosequitur: *At memento te octo mensibus, quibus istis versaris, plures animos conservasse moribundis infantibus baptizandis*. Non ergo laudat Xaverius Franciscum Henricum, quod paganorum infantes repugnantibus parentibus baptizaret; sed quod baptizaret morti proximos, & a parentibus derelictos.

## APPENDICULA.

Excipiendi sunt ergo infantes morti proximi, quos Apostolici viri solent etiamnum apud Sinas, Indosque baptizare, non explorato parentum infidelium consensu. Eo quippe in casu nulla inferretur injuria Sacramento, consulitur sempiternæ infantium saluti, ac mors potius, quàm ministrator baptismi, genitoribus filios eripit. II. Idem asserendum de infantibus, qui a parentum contubernio ita separantur, ut omnino patriæ potestatis cesset usus, puta si a piratis capiatur Turcarum triremis, eaque vecti pueruli ad nostra trahantur litora: nam hoc in casu liberi parentibus suis perierunt. Si injurià tamen ac per vim filius separaretur a patre, E. G. puerulus Judæus furtim ab homine Christiano sublati domi retineretur; idem puer parentibus foret remittendus, quia per violentam illam separationem nullum jus patriæ potestas amisit. III. Baptizari potest infans, si consentiat parentum alteruter, eo quod consensus tunc præstatur ab eo, qui naturale jus habet in puerum; & quamquam repugnet parentum alter, prævalere debet assensus ille, qui cedit in favorem religionis, maximamque pueri utilitatem. Hinc canone XIV. Concilii II. Toletani celebrati anno 589. præcipitur, *ne Judæis liceat habere Christianas uxores, vel concubinas, & si qui filii ex tali conjugio nati sunt, adsumendos esse ad baptismum*. Et Synodus Toletana IV. celebrata anno 633. præcepit canone 63. ne pater Judæus impedire valeat baptismum filii a se procreati ex Christiana muliere, jussitque, ut *ex talibus nati fidem atque conditionem matris sequantur*. Idem habetur cap. *lvi, qui Christianas*, XXV. q. 1. Gregorius quoque IX. cap. *Ex literis*, Extra, de Conv. infidel. mandavit, ut a matre in Judaismo relicta traderetur viro ad fidem converso puer adhuc infans, *cum filius in patris potestate consistat, cujus sequitur familiam, & non matris, & in ætate tali* (quadriennis erat) *quis non debeat apud eos remanere personas, de quibus possit esse suspicio, quod saluti, vel vitæ insidientur illius*. Addit Pontifex, *si puerus remanere contingeret apud matrem, posset illum adducere ad infidelitatis errorem; & ideo in favorem maxime fidei Christianæ patri eundem puerum esse assignandum*. IV. Quod dixi de patre, de avo dicendum est, cui competit cura nepotum: ideoque baptizandum esse infantem matre Judæa reluctante, si defuncto patre id velit avus paternus, censet Sylvius q. 68. art. 12. concl. 6. & ait idem a Gregorio XIII. fuisse statutum. V. Postremo si filii infidelium, etiam invitis parentibus baptizati sint, debent ab illis separari. Ita definitum est canone 60. Concilii IV. Toletani, extatque cap. *Judaorum*, c. XXV. q. 1. Idem decernitur cap. *Contra*, in Sexto lib. v. tit. 2. & ratio est, quia cum Christo sint regenerati, curandum est ne paterno

## Liber Trigesimus primus. Cap. XVIII. 521

terno detineantur errore: nec potest obtendi jus potestatis paternæ adversus injuriam, qua tunc afficeretur Sacramentum, Ecclesia, & Deus hominum Conditor, & Reparator.

### C A P U T XVIII.

*De infantibus materno in utero adhuc existentibus.*

**Q**UOD attinet ad infantes nondum ex alvo matris egressos, quaeritur an baptizari debeant, si partus appareat difficilis, imminetque grave periculum ne vivi prodeant in lucem. Tres autem hac in re adinvenio sententias: quarum prima est Cajetani contententis periclitantibus illis pueris impendendam esse benedictionem in nomine Trinitatis, & causæ discussionem divino Tribunali reservandam, concepta spe Deo hujusmodi baptismum in voto parentum acceptum iri, cum nulla incuria, sed sola impossibilitas impediatur Sacramenti executionem. Hæc sententia parum ab ea differt, quam diximus libro XI. cap. 9. traditam a Gersone, aliisque perpaucis docentibus Deum singularem quodam privilegio exaudire tali in casu parentum vota, & supplere baptismi defectum: quamquam hi non asseruerint adhibendum esse exterius signum, sicut affirmasse dicitur Cajetanus. Hanc vero sententiam, licet postea ab omnibus refutata, in Tridentino Concilio nulla censura fuisse perstrictam operæ præsertim Seripandi nostri, auctor est in Historia ejusdem Concilii libro IX. cap. 8. Pallavicinus. Nunc ergo videndum est, an per baptismum exterius collatum, aut per signum, vel benedictionem prægnantis mulieris consulatur periclitantium puerorum salutem; nam ad hanc non sufficere parentum vota, ostendimus teritiodecimo libro, idque repetendum est paullo infra. At secunda sententia est eorum, qui cum fateantur ipsum infantium corpusculum esse abludum, docent id fieri non posse, nisi materno ex alvo infans aut caput, aut saltem partem visibilem aliquam emittat: in qua sententia fuerunt Scholastici omnes antiquiores, necnon ex recentioribus Theologis Jucini quæst. VII. de Bapt. cap. 1. art. 2. Felix Veranus lib. V. Theol. Polemicæ cap. 7. Natalis Alex. cap. VII. prop. 2. Ludovicus Habert Tom. V. pag. 199. Nicolaus L'Herminier de Bapt. cap. 10. Tournellus quæst. 3. art. 3. Martinus Orelli in peculiari de hoc argumento dissertatione, & Cardin. Gotti Tom. XII. pag. 260. Sententiam tertiam propugnant Florentius de Cocq. de Baptif. sect. 7. Franciscus Henno disp. 3. q. 1. concl. 2. Farvaques noster de Sacram. pag. 251. necnon Aurelius Piette quæst. 8. operosius vero Gabriel Gualdus Clericus Regul. in opusculo de hac re accurate conscripto: qui

*To. VI.*

*V u u*

*tenent*



tenent in puerperio, dum mulier nititur parere, & interdum nonnullis antea diebus aperiri uterum, & etiam infantium involucria discindi, adeo, ut obstetrices, vel manu, vel saltim syringia, aut siphunculo possint illos salutari aqua perfundere. Tribus itaque propositionibus quæstio hæc erit expedienda.

PROF. I. Baptismus matris, aut signum, aliquod ei applicatum, nec pertingens ad abluendum puerum, quem gestat in utero, ad hunc regenerandum nequaquam sufficit.

Probatur I. Ex cap. *Si ad matris*, de Consecrat. dist. 4. n. 114. quod desumptum est ex Augustino lib. vi. contra Julianum cap. xiv. num. 43. *Si ad matris corpus, id quod in ea concipitur, pertineret, ita, ut ejus pars deputaretur, non baptizaretur infans, cujus mater baptizata est, aliquo mortis urgente periculo, cum eum gestaret in utero. Nunc vero cum etiam ipse baptizatur, non utique bis baptizatus habebitur. Non itaque ad maternum corpus cum esset in utero pertinebat.* Habentur similia cap. *Si quicquid*, eadem dist. iv. quod depromptum est ex eodem Augustini libro cap. xvi. num. 52. Idem definitur cap. *Si qua mulier*, in eadem dist. ex canone sexto Neocæsariensi. II. Petitur ex his locis Theologica ratio, quam assertit q. 68. art. xi. sanctus Thomas, quoniam nempe fœtus animatus non est pars aliqua materni corporis, sed est propria ac distincta persona; ideoque proprio, distinctoque baptismate est abluendus. III. Illud externum signum, aut benedictio, neque ex sua institutione, neque vi fidei, votorumque parentis potest infantibus asferre salutem: non quidem institutione sua, quoniam fatente Cajetano Sacramentum non est, nec remedium a Christo pro originali peccato institutum; neque ex opere operantis, atque vi fidei, votique alieni, siquidem nemo potest aliis promereri gratiam primam, nisi *de congruo*, orando scilicet, ut Deus excitet in impiis piam animi affectionem, fidem, & virtutum exordia, quorum incapax est puer ille miserrimus. IV. Rejcta est communi Theologorum consensione opinio Cajetani, a Dominico Soto in iv. dist. v. q. un. art. 2. connumerata inter hæreses, & jussu Pii V. Pontificis Maximi ex Cajetani commentariis expuncta. V. Tandem Cajetani argumenta fracta nimium sunt, & infirma. Quod enim inquit post effusum Christi sanguinem facilis esse salutem consequi, quàm in lege veteri, in qua interdum supplebat Sacramenti defectum fides sola; id refutatum est capite 2. libri xxx. ubi affirmavimus longe facilius esse remedium præsens, positum in elemento communi & obvio, atque habens ex se efficientiam; nunquam pueros absque visibili Sacramento regeneratos, & decedentes maternis in uteris nullo aut legis, aut naturæ tempore purgatos fuisse ab originariæ labis reatu. Addebant Cajetanum fore in sententia nostra statum aliquem hominum ineptum

ad recipiendam justitiam, latitantium nempe in alvo matris, quod ait repugnare remedio taliter instituto, ut prodesse valeat hominibus universis; sed neque id firmum est, quoniam docente Augustino in 1. de peccat. meritis cap. 21. & de Dono persever. cap. 12. non tenetur Deus servare parvulum in hac vita, ut possit per baptismum regenerari; & cur uni baptismate subveniatur, alius non solvatur ab originali impietate, reservatum est supernis judiciis: impossibilitas autem illa, neque naturalis est, cum natura procreet homines singulos ut nascantur; neque inducta ex speciali providentia, cum pro universis Deus salutare remedium instituerit ac præparaverit, sed orta ex tali serie causarum, quam ipse Deus non tenetur avertere, nec vult, in uno justitiæ æquitatem, in altero gratiæ beneficium exercens. Atque ex his alio in loco, nec semel commonstratis etiam diluitur quod Cajetanus inquit de divina misericordia; quam nemo nostrum in dubium revocat, sed affirmat duntaxat cum justitia esse conjunctam, ac plenissima potestate & providentia mirabili eligere unum, alterum in massa perditionis relinquere. At de opinione Cajetani dictum hætenus.

PROP. II. Nequit infans in utero matris ante aperitionem partus per Baptismatis sacramentum regenerari.

Probatur 1. Auctoritate Augustini innixa verbis Evangelicis Joan. 111. 3. *Nisi quis renatus fuerit denuo*, & versu 7. *Oportet eos nasci denuo*, quæ ibidem explicantur de renascentia spiritali *ex aqua & Spiritu sancto*. Ait ergo Augustinus in Epist. ad Dardanum 57. nunc 157. *Nec renasci quisquam potest, antequam natus sit*: & paulo infra, *Non video, quomodo edificentur homines in domum Dei ad habendum in se inhabitantem Deum, nisi cum fuerint renati, quod non possunt esse, antequam nati*: & rursus, *Illa sanctificatio, qua efficitur & singuli templa Dei, & in unum omnes templum Dei, non est nisi renatorum, quod nisi nati homines esse non possunt*. Respondet Gualdus cap. VIII. deferendum Augustinum, quemadmodum in questionibus Philosophicis, in sententia de pœnis parvulorum, & in iis quæ spectant ad prædestinationem & gratiam. Repetit eadem in additamento de *Auctoritate Augustini*, vulgato sub nomine Angeli Cupetoli. Addit non requiri nativitatem ex utero, modò infans ablui possit, cum huic nativitati Christus non alligaverit baptismum; sed sufficere nativitatem in utero, qualem commemorat Matthæus cap. 1. 2. *Quod enim in ea natum est*. Inquit, cap. tertio Joannis nativitatem ex aqua dici secundam, non comparate ad nativitatem ex utero; sed ad generationem carnalem, ut liquet ex versu 6. *Quod natum est ex carne, caro est; & quod natum est ex spiritu, spiritus est*. Subjicit, nec futurum esse capacem baptismi partum *Cæsareum*, qualis fuit S. Raymundi *Nonnati*, partum scilicet educum

Etum e mortuæ matris dissecto latere, si necessaria sit ad baptismum propria ex alvo nativitas. Similia reponunt Farvacques, & Piette, si excipias quod Gualdus ait de auctoritate Augustini: atque ne sanctum Patrem deferant, inquirunt ejus scopum fuisse demonstrandi infantem existentes in uteris non posse baptizari baptizata matre, ut doceet S. Pater contra Julianum loco paulo supra producto. Concludunt aperto ostio uteri partum jam inchoative natum esse, & posse aquam ad illum pertingere. Verum hæc nequeunt labefactare Augustinianam argumentationem. Enimvero quod Gualdus ait de auctoritate S. Patris, non facit quin ejus dogmata de puerorum pœna, ac de prædestinatione & gratia a nobis inconcussa non habeantur. Deinde hæc Augustini de baptismo infantum sententia tradita est, inquit Gualdus ipse cap. 1. num. 3. *per plura sæcula ab antiquis tum Theologis, tum Canonistis, tum Casuistis unanimi consensu*; ideoque temere quorundam novitas contra exploratissimam vetustatem obtenditur. Præterea Augustinus non imbecilli ducitur ratiocinio, sed auctoritate Scripturæ. Ipsi denique doctrinam, ut ex dicendis erit manifestum, comprobatur universalis Ecclesia. Corruunt & responsa cetera: siquidem Joannis 111. de nativitate *ex utero*, non *in utero*, sermo instituitur. Primo, quia illa duntaxat est propria nativitas, & nativitas *in utero* ab illa non distinguitur, nisi ut rei alicujus exordium ab ipsius complemento: *Neque enim renatum dicimus hominem, quem mater peperit tanquam iterum natus sit, qui jam semel natus fuerat in utero. Sed illa nativitate non computata, qua gravidam facit, natus dicitur homo partu, ut possit renasci ex aqua & spiritu*; ait citata Epistola S. Pater. Ad hæc homo in utero generatus non dicitur natus absolute, sed *natus* in matre, atque ita legitur citato cap. 1. Matthæi, *Quod enim in ea natum est*: idque ob proprietatem verbi *gignitur*, quod utrumque significat, *nasceri*, & *gignere*. Sed *natus* non dicitur, nisi qui ex utero prodit, ut liquet ex Gen. IV. 26. xxxviii. 4. x. 22. Matth. 11. 1. 6. Igitur & *renatus* nemo dici potest, nisi proprie *natus* sit, idest, ex utero egressus. Quod ajunt fore in sententia nostra incapacem baptismi partum *Cæsareum*; futile nimium est, nam & apud Grammaticos *nasci*, & in *lucem edi* synonyma sunt; & accidentarium est, quod partus vitam hanc & lucem ingrediantur non protrudente muliere, sed extrahentibus aliis; quare Augustinus logomachiam omnem citata Epistola evitans ait loqui *se de hominibus adhuc intra materna viscera constitutis*. At Christum opponere nativitatem carnalem spirituali, non solum Gualdo concedam; sed ulterius affirmabo, id Theophrastum, Cyrillum, Chrysostomum, Augustinum ipsum tradidisse: sed quærimus modo, an nativitatis spiritalis sit capax, qui carne nondum sit natus. Stat ergo Augustini argumentatio contra Cupetiolum, sive Gualdum im-

mobi-

mobilis. Nam Farvacques & Piette non recte distinguunt quæ S. Pater contra Julianum, & quæ ad Dardanum scripsit. Pertractare Augustinum priori loco de baptismo matris, verum est: hæc in re versari scribentem ad Dardanum, falsum est penitus. Agit enim hic de exultatione Joannis in utero matris suæ, disputatque num istic queat infans sanctificari. Dices fortasse: Sed de sanctificatione Joannis male sensit Augustinus: at solvimus hunc nodum lib. xiii. cap. 9. Adde pertractari in præsentia, non de sanctificatione singulari Dei privilegio peracta, sed de ea, quæ habetur ordinaria via, & per instituta Sacramentorum remedia. Denique ante aperitionem partus non potest aqua pertingere ad abluendum infantem, ut adversarii fatentur. *Facta enim conceptione uterus ita clauditur, ut nec cuspidem acus admittat*, inquit Gualdus cap. 3. n. 39. recitato Hippocratis testimonio. Itaque ante aperitionem partus, ac nondum puerperio inchoato, quod nunc asserimus, frustra de baptizandis pueris subit cogitatio. II. Ex his, quæ dicta sunt modo, confirmatur propositio. *Est enim de necessitate baptismi*, inquit S. Thomas q. 66. art. 1. & quest. 68. art. 11. *ut corpus baptizandi aliquo modo aqua abluatur*: ideoque si corpus infantis non possit abluī, nec etiam poterit baptizari. Tandem de Consecratione dist. 1v. c. 115. legitur: *Qui in matris uteris sunt, ideo cum matre baptizari non possunt, quia qui natus adhuc secundum Adam non est, renasci secundum Christum non potest*. Desumptum est ex Isidoro de summo Bono cap. 24. Qui ergo adhuc materno in utero clauditur, natus non est, nec baptismi capax: ut aiebat paullo supra Augustinus.

PAOP. III. Licet initio puerperii aperiatur uteri ostium, & infans possit per siphunculum, aut clystere in aqua perfundi: attamen nisi secundum aliquam corporis partem sit egressus ex alvo, baptizari non debet.

Hæc propositio sequitur ex præcedenti: infans quippe ille juxta Augustinum, juxta Isidorum, juxta communem sensum non est *natus*: igitur nec potest *renasci*. Probatur tamen peculiari ratione. Adscisci inter Ecclesiæ membra, quod sit per baptismum, est duntaxat eorum, qui prodierunt in lucem, qui fruuntur hominum ceterorum consortio, qui ad forum Ecclesiæ pertinere possunt, qui in Ecclesiæ visibilis cœtum possunt coadunari. Atqui infans nulla sui parte ex utero egressus, in lucem non venit, non versatur in foro Ecclesiæ, & cooptari nequit tanquam membrum visibile in mysticum Christi corpus. Igitur infans adhuc materno in utero existens baptizari non potest. Innuit argumentum istud ab Augustino scribente in eadem epistola ad Dardanum, natos duntaxat homines, dum renascuntur per gratiam, *transferri in compagem corporis Christi, tanquam in vivam structuram templi Dei, quod est Ecclesiæ*. Eruitur ex ipsa idea.

Sa-

Sacramentorum, quæ sunt visibilia signa, quibus homines in unum religionis nomen adunantur. Traditur a Divo Thoma citato articulo xi. ad 1. his verbis: *Pueri in maternis uteris exsistentes nondum prodierunt in lucem, ut cum aliis hominibus vitam ducant; unde non possunt subijci actioni humane, ut per eorum ministerium sacramenta recipiant ad salutem.* Profertur a D. Bonaventura in 1v. dist. 6. art. 1. ubi distincto triplici hominum statu, inquit: *Primus est in utero: secundus extra uterum in statu infantia; tertius in statu natura adultæ. In primo ergo statu, cum soli Deo sit notus, potest per ejus voluntatem sanctificari, non per nostram operationem, cum non agnoscat eum Ecclesia, nec sit de foro Ecclesia.* Eandem rationem, inconcussam, firmissimamque existimant Theologi gravissimi, Suarez disp. 1v. sect. 1. in quæst. 61. 3. p. Paulus Comitoulus quæst. xi. 11. Resolut. moral. antiquiores Scholastici ibidem laudati, Auctor Theologiæ ad usum Seminarii Petrocorensis Tom. 3. pag. 149. alique innumeri. Non ergo eadem ratio talis est generis, ut illi præferri debeant commenta quorundam recentiorum. II. Movet tamen me ratio altera longe robustior, praxis nimirum Ecclesiæ, præcipientis ne infantium aliquis *in utero matris* baptizetur; sed hoc fiat tantum, *si caput emiserit*; si emiserit autem *membrum aliud*, quod indicet vitalem motum, baptizetur quidem, si mors immineat; at si natus vixerit, *baptizetur iterum sub conditione.* Ita Rituale Romanum, tit. de Baptiz. parvulis: de quo ubi egimus de modo ablutionis pag. 361. Respondent adversarii, id in Romano Rituali præscribi, ex suppositione, quod infans in utero existens ablui nequeat, cum tamen ætate nostra hoc falsum esse ostenderint obstetrices, & peritissimi Medicorum: miraturque Gualdus hæc Natalem Alexandrum non didicisse ex Francisco Mauriceau lib. 2. cap. 33. Parisiis ætate sua laude artis Medicæ celeberrimo. Sed potius miror ego, Medicorum observationes proferri adversus Ecclesiæ praxim. Ac primo hæc de aperitione uteri observatio non est posterioris ætatis; cum de illa scripserint Hippocrates de nat. puer. alique Medici vetustissimi apud ipsum Gualdum cap. 5. & tamen nunquam Ecclesia docuit, ut infantes baptizentur in utero, sed contra præscripsit ne baptizentur, si non *caput*, aut saltem *membrum aliud* emiserint. Non vult ergo Ecclesia, ut in Sacramentis conferendis nobis philosophi ac medici præbeant regulam, sed ut consulamus Patres, canones, vetustamque consuetudinem, quod scite monet Paulus V. in Bulla *Apostolica*, quæ præmittitur Rituali. Deinde, si docere nos debeant Medici quando administranda sunt Sacramenta, quare cum nulli jam dubium sit, quin in puerperio possit infans nedum ablui, verum etiam contrectari manu obstetricis, non deletur ex Jure Canonico cap. *Qui in maternis*, atque in re tam gravi, dum agitur de sempiterno infantium

tium salute, non præcipitur in Rituali, ut baptizetur fœtus etiam in utero, quamquam foras nullam emiserit partem corpusculi, nec mulier obstetricis fungatur munere, nisi ad baptismum deferat syringias, ac fistulas? Damnat præterea Adversariorum responsio non solum Rituale Romanum, sed Ecclesiarum omnium consuetudinem. Etenim ne baptizetur infans, cujus nulla pars apparet extra uterum, præcipit Sacramentale Ambrosianum editum jussu sancti Caroli pag. edit. Mediol. 9. his verbis: *Si vero fœtus ex utero matris, quæ in partu periculose laborat, vel manu, vel pede, vel aliqua parte extans, in necessitate in ea ipsa parte ab obstetrice baptizatus est, cum superstes erit, sub eadem conditione baptizetur. Si vero in capite, quod primo ex utero prodiit, &c.*, ut in Rituali Romano: de quo supra, pag. 361. Præcipit *Manuale Parochorum* pro Provincia Salisburgensi: in quo pag. 59. edit. Ingolst. habetur: *Nulla modo infans in utero materno adhuc existens, matre etiam periclitante, baptizari debet, propterea quod qui natus non est, ex aqua & Spiritu sancto renasci non potest*. Præcipit *Pastorale* editum pro Ecclesia Mechlinensi jussu Joannis Hauchini Archiepiscopi: præcipit *Rituale Sacramentorum* ad usum Ecclesiæ Bononiensis, olim editum cum Annotationibus Itala lingua conscriptis: præcipit ejusdem Ecclesiæ Antistes eximius, & nunc supremus Ecclesiæ Pastor, in Notificatione primùm edita, die 30. Septembris anno 1732. ac semel, iterumque, hoc etiam anno Romanis typis recusa: præcipit *Liber Sacerdotalis* his verbis: *Puer in ventre matris existens, nec apparens extra, non est baptizandus*: præcipit *Rituale Gregorii XIII.* pag. 17. præcipit vetustissimum *Sacramentale* Angelicæ Bibliothecæ, lit. I. E contra baptizandum puerum, qui *extra uterum* nullam corporis sui emiserit partem, nullius Ecclesiæ, quos noverim, Rituales libri permittunt. Est modo Gualdus, & cum eo juniores quidam litteratuli, Anatomici potius, quàm Theologi, & Augustini argumentationem nitantur eludere, atque elevare. Non Augustinus solus, sed magistra veritatis Ecclesia docet baptizandos non esse infantes maternis in uteris constitutos, nec posse renasci, nisi aliqua sui parte sint extra alvum. Igitur etiam si ope syringiæ, aut siphonis possent perfundi aqua, baptizari tamen non debent.

Oppones I. Instante partu infans ablui potest. Igitur baptismatis capax est. II. Exorta dubitatione, an mulier validum inierit matrimonium ob impedimentum frigiditatis, obstetrices ex cap. *Præternitatis*, de frigid. & malefic. inspicere debent feminam; idemque faciendum est, si oriatur suspicio, num mulier sit gravida, ex l. *Temporibus*, ff. de Insp. ventris. Numquid vero, inquit Gualdus cap. 2. num. 32. major cura pro matrimonio, quàm pro baptisinate est adhibenda, aut majus negotium est filios generari mundo, quàm celo

rena-

renasci? III. Non ex Theologis, sed ex Medicis & Chirurgis petenda est quæstionis hujus solutio. Iccirco namque Scholastici in sententiam abierunt Contrariam, quod putarent ante nativitatem *ex utero* infantes ablui non posse. Docent autem oppositum Medici, Anatomici, obstetrices; quibus attendendum esse demonstrat, inquit Gualdus cap. 4. illud Propertii,

*Novita de ventis, de tauris narrat arator,  
Enumerat miles vulnura, pastor oves.*

IV. Sat est ad quodlibet Sacramentum, si adsit materia, forma, & intentio: quæ tria haberi possunt in casu, de quo disputatur. V. Aperto uteri ostio fœtus est sufficienter visibilis; nam aliquando manibus immisiss extrahitur; atque etiam in alvo existens, si tenellum illius caput ladeatur, inquit Farvacques & Piette, cataplasmate juvari potest, & forte curari: quid ni etiam juvandus non erit spiritali remedio? VI. Infans in utero inficitur originali peccato: igitur expiari, & regencrari potest. VII. Aliquando Deus in utero sanctificavit infantes: sunt ergo illic existentes spiritalis regenerationis capaces. VIII. Baptizatum in utero, & *antea celo, quam terris natum* sanctum Aloysium Gonzagam, narrant ejusdem Acta.

Resp. hæc argumenta ex dictis talia apparere, ut in illorum solutione parum nobis sit immorandum. Primi itaque falsa est consequentia, quænam ut infans sit capax baptismi, non sufficit quod ablui queat; sed requiritur etiam, ut natus sit, ut versetur in foro Ecclesiæ, ut in visibilem corporis Christi compagem possit aptari. Alterum adversus Gualdum retorquetur: nam quia matrimonium per impedimentum frigiditatis solvi potest, mandat Ecclesia ut hujus impedimenti suspitione suborta, obstetrices, honestæque mulieres inspiciant uxorem. At Ecclesia, dum mulier laborat in partu, non præcipit, ut interrogentur obstetrices & medici, an infans capax sit ablutionis; sed districtè mandat ne baptizetur, *nisi caput, aut saltem membrum aliud emisserit*. Censet ergo Ecclesia infantem, cujus nulla pars *extra uterum* prodiit, non esse subjectum idoneum baptismatis: alioqui magis de matrimonio, quàm de baptismo, & magis de carnali generatione, quàm de spiritali foret sollicita. Retorquetur & argumentum, quod consequitur: quippe, *Si novita de ventis, de tauris narrat arator*; medici & obstetrices de corporeo partu, non de regeneratione spiritus, de medicamentorum applicatione, non de administratione Sacramentorum narrare debent: de hac vero Ecclesia primum, deinde Theologi sunt audiendi; quorum argumenta persistunt, si primum petatum ex impossibilitate ablutionis referatur ad tempus, quod præcedit puerperium; alterum ad puerperium ipsum, nondum infantulo *extra uterum* prodeunte. Resp. ad I. tria, quæ assignantur requiri ad perficiendum Sacramentum, sed

sed præsupponendam esse subiecti capacitatem. Ad argumentum proximum, negamus fœtum in utero ita esse visibilem, ut consecratur versari in foro, & notitia Ecclesiæ, cum plerumque dignosci nequeat an sit mortuus aut vivens, an sit homo vel monstrum: & quamvis id tactu perciperetur, non esset tamen talis vita, per quam infans in hominum contubernio, & in Ecclesiæ foro quomodolibet versaretur, & ideo licet capax esset emplastri, non foret capax baptismatis. Præterea quemadmodum emplastrum apponendum non, esset periclitante vita corporis, si Medici id inhiherent; ita in casu non est ministrandum baptismum, cum id prohibeat Ecclesia. Sexti argumenti inepta est consecutio: nam peccatum originale contrahitur generatione carnali, ideoque animato statim fœtu: diluitur autem visibili regenerationis Sacramento, & consequenter postquam fœtus prodiit in lucem. Ad VII. liquet ex dictis proposit. 2. infantes in uteris matrum sanctificari quidem posse singulari privilegio, ac per potestatem divinam; non autem ordinata via, & per Ecclesiæ visibilis ministerium. Respondeo denique ad VIII. scripsisse utique nonnullos Divum Aloysium baptizatum in matris utero, ac plures fuisse commotos, dum in quadam Academia, de qua citato loco Martinus Orellus, recitaretur hoc Epigramma,

*Altra prius, Ludovice, vides, quàm lumina terræ:*

*Ante Deum cernis, quàm videre puer.*

*Sic dum non visus sacro fonte lavaris,*

*Non vivis terris, vivis at ipse polo.*

Nemo tamen aut S. Aloysii baptismate, aut postremo argumento debet permoveri, qui de Aloysio legerit apud Annibalem Marchetti lib. 1. cap. 1. *Cum Medici rem ex arte pensantes negarent eum puerperio fore superstitem, ut animi saltem incolumitati mature consulere-  
retur, ubi puer corpusculi partem, qua sacri baptismatis fonte tingi  
posset, emisit, obstetrix laustralibus aquis aspergere maturavit.*

## C A P U T XIX.

*Quo continentur quedam circa baptismum infantium  
problemata.*

CUM dixerimus periclitantem puerum non esse baptizandum, nisi caput emiserit, aut saltem membrum aliquod præditum vitali motu; oritur questio, an mater prægnans aperiri debeat, præsertim si medici de ejus vita desperent, ut saltem spiritali infantis salutem consulatur. Sed nunquam fas est aliquem, etiam periclitantem occidere, ut alteri subveniatur; ideoque tunc dissecto matris utero

Tv.VI.

X x x

ex-



extrahendus est fœtus, cum mater extremam obierit diem. Id vero, quoniam Rituales libri, Theologi omnes, ipsaque naturalis legis rudimenta inconcussim, atque exploratissimum esse declarant, non est prolixiori disquisitione expendendum. Duntaxat si mater esset ad mortis supplicium damnata, scripserunt quidam posse quamcunque auctoritate judicis mandari executioni sententiam mortis; sed haud dubium, quin satius sit, magisque consonum æquitati, post partum executionem illam differre.

## II.

At mulier enititur monstrosum fœtum: quid agendum est eo in casu? Dispiciendum, an humanam naturam, speciemque præseferat, quod potissimum dignosci potest ex capite, utpote corporis suprema parte, in qua vigent sensus omnes, extatque domicilium rationis, immo judicio philosophorum complurium residet animus immortalis. Atque id in Instructionibus Baptismi docuerunt sanctus Carolus, & Rituale Romanum, necnon in IV. Sent. Landulphus, & Sotus, Sylvius in quæst. 68. Angelus in Summa, aliique permulti. Quod si dubitetur, an fœtus sit homo; nisi imminet mortis periculum, monet sanctus Carolus, ut consulatur Episcopus: si extrema urgeat necessitas, ratio postulat ut baptizetur adhibita conditione. Si gemelli eo in monstro adnati sint, quod discernitur, si plura præsertim distinguantur capita, aut plura pectora, sunt distincto baptismo regenerandi, nisi extrema necessitas compellat, ut tingantur simul pronomine multitudinis sub hac forma, *Ego vos baptizo*, &c. Si vero duarum personarum nequeat dignosci discrimen; una absolute erit baptizanda, & altera sub conditione, ut videtur reiterati baptismatis sacrilegium.

## III.

Quale autem judicium ferendum erit de spuris? Isti sunt ne baptizandi? Utique, & absque ulla prorsus dubitatione: pro omnibus quippe instituta sunt gratiarum remedia, nullumque ex Eva procreatum repellit S. Mater Ecclesia. *A baptismo, atque a gratia Dei, qui omnibus misericors, benignus, & pius est, neminem prohibendum*, scripsit ad Fidum Cyprianus. Similia Augustinus in Epist. ad Auxilium 75. nunc 250. Nec evincit oppositum, quod legitur Deut. xx. 11. 2. *Non ingreditur mamzer, hoc est de scorto natus in Ecclesiam Domini*, &c. hoc enim in loco *ingredi in Ecclesiam* idem est, ac fungi Levitarum officio, sive, ut placuit Maimonidi, habere in populo Dei jus connubii. Revera Jephthe, de quo Jud. xi., *filius erat meretricis*, & tamen non solum circumcissus est, verum etiam ad Hebr. xi. 32. inter eximios viros connumeratur. Adde ampliorem Evangelicæ legis, quam Mosaicæ munificentiam. Zanchius, Boquinius, Tremellius, aliique hæretici scripsere apud Vossium disputat.

## Liber Trigesimus primus. Cap. XIX. 531

xv. th. 5. spurios non esse baptizandos, *si a parentibus impœnitentibus præsententur*, ne videantur pastores præceptum de obfignandis consecrandisque Deo infantibus contempnissse: sed est hæretica, ceterisque similis ludificatio: quippe nullo præcepto arcentur a baptismo impiorum filii, neque ab hominum sanctimonia pendet virtus Sacramentorum.

### IV.

Baptizandi ne erunt pariter filii excommunicatorum? Neque id jure in dubium vertitur; quippe, ut citata Epistola ad Auxilium, ratiocinatur Augustinus, hoc est discrimen inter corporalem, & spiritalem pœnam, quod corporali pœnæ aliqui contemptores divinorum præceptorum subjiciuntur etiam cum omnibus, *qui ejusdem impietatis participes non fuerunt*, quin ad terrorem viventium aliquando mortalia corpora perimuntur *quandoque utique moritura*. At spiritualis pœna infligi non potest, nisi ob proprium peccatum, cum Ezech. xviii. 20. scriptum sit, *Anima qua peccaverit ipsa morietur*. Hinc S. P. infert, non recte anathematizari *pro patris peccato filium, pro mariti uxorem, pro Domini servum*, hortaturque Auxilium, ut certis rationibus, vel Scripturarum testimoniis ostendat, quomodo, si puer eodem tempore, *quo universa domus est anathemate obligata nascatur, non ei possit per lavacrum regenerationis in mortis periculo subveniri*; testaturque se numquam id facere ausum fuisse. Atque hæc Augustini doctrina in canonem relata est, cap. *Si habes*, xxiv. q. 3. num. 1. Immo nec in Generali Interdicto inhiberi baptismum, constat ex cap. *Quoniam* de sent. Excommun. in vi. atque ex omnibus JCC. in caput, *Quod in te*, de pœnit. & remis. Ea autem ratio Augustini commonstrat quàm imperite Farellus errorum filios non intingeret, *nisi prius ad omnem impietatem abnegandam adigerentur parentes*, ut ipse scripsit ad Calvinum; & quàm impie Gerardus Vossius cit. disput. xv. th. 7. contenderit non posse filios sine profanatione Sacramenti ad baptismum admitti, *nisi mundi fuerint utriusque, aut alterutrius parentis ratione*; nemo siquidem spiritali regeneratione privandus est propter aliena flagitia.

De Expositiis, aliisque, de quibus dubium est an fuerint baptizati, diximus supra post confutationem Anabaptismi, capite xv.

## C A P U T XX.

*In quo agitur de dilatione baptismatis, atque  
de Catechumenis.*

**B**aptizandos esse parvulos ostendi cap. xvi. sed pervenerunt tamen ad gratium baptismatis permulti adulta jam ætate, non solum

lum ii, quibus Evangelii lumen serius effulsit, verum etiam quidam imbuti jam fide, & aliqui etiam Christianis parentibus procreari. Constantinus Magnus, qui Christum agnovcrat ante annum 312. si Baronio subscribimus, Romæ anno 324. baptizatus est a Silvestro; si Eusebio, aliisque assentimur, prope vitæ suæ finem, Nicomediæ anno 337. Secutus est exemplum patris Constantii, qui suscepit baptismum Antiochiæ paullo ante mortem, quæ contingit anno 361. Theodosius quoque baptizatus est Thessaloniciæ in gravem delapsus morbum, a quo tamen convaluit. S. Ambrosium paucis diebus ante Ordinationem suam baptizatum, narrat in ejus vita Paulinus Notarius. Augustinum Parentem nostrum regeneratum anno ætatis suæ tertio ac tricesimo, consentiunt omnes. Nolanus Episcopus Paulinus tinctum se, cum ageret annum duodequadragimum, innuit epist. xl. in qua S. P. Augustinum ita alloquitur: *Nolo in me corporalis ortus, magis quàm spiritualis exortus ætatem consideres: quippe ætas mihi secundum carnem ea jam est, qua fuit ille ab Apostolis in porta Speciosa verbi potestate funatus* (idest annorum supra xl. ex Act. 1v. 22.) *in natalibus autem animæ illius adhuc mihi tempus infantie est, quæ intentatis Christo vulneribus immolata digno sanguine Agni victimæ præcucurrit*; Bimatus scilicet Innocentium.

Hæc, aliaque dilati exempla baptismatis nonnullis quæstionibus locum aperit: quarum prima est, quid causæ fuerit tot, tantique viris tandiu Sacramentum summopere necessarium differendi. Multas itaque dilationis hujus causas invenio: ac præcipuam illam puto, quam tradidit Tertullianus lib. de Baptif. cap. 18., ubi ait utilem esse cunctationem baptismi, quia sponsores possunt promissiones suas destituere, & proventu malæ indolis falli; & cetera, quæ produximus cap. 16. op. 3. Hinc aliqui ad usum saltim rationis differendum baptismum existimarunt; & ipse Gregorius Nazianzenus, qui orat. xl. in sanctum baptisma, etsi dilationem baptismatis valde improbet, censet tamen expectandum triennium, aut aliquanto brevius, aut longius temporis spatium, quo tingendi audire ac respondere possint, & si minus plane & exakte intelligant, imbi tamen & informari. Alteram longioris dilationis causam invexit hæresis Novatiana, quæ ex male intellecto loco Apostoli ad Hebræos v. 4. colligebat nullam illis superesse spem veniæ, qui semel illuminati, & accepta baptismi gratia, iterum deliquissent; quare laudatus Nazianzenus ita eos, qui studio baptismum distulissent, alloquitur: *Ἀλλὰ πότε πὺν διαδοίης τὸ χάρισμα, ἃ διὰ τῶν ἀναστάς τῶν νεκρῶν, ὡς διατίπας εἶναι ἵχυν*, idest, *Sed times, ne gratiam amittas, & ideo purgationi moram inducis, utpote nullam aliam ulterius habens*. Tertio causa fuit voluptuosa quorundam vita, ob quam considerantes quantum refrænati esse debeant mores baptizatorum, noluerunt sese ini-

Initiare spiritali lavacro, ne florente ætate illecebris vale dicerent, & arctiori vivendi genere obstringerentur. Infedit enim multorum animo, quod literis mandavit Ambrosius lib. 11. de Pœnit. cap. xi. num. 104. *Nemo in peccato positus arrogare sibi debet auctoritatem, aut usurpationem Sacramentorum*: cujus rei hanc subinde rationem proferit, *Si enim caro menti repugnat, nec subdita est animi gubernaculo & mentis imperio, aliena est terra, qua non domatur exercitio cultoris, & ideo non potest fructus caritatis, patientiæ, ac pacis afferre*. Eam ob rem Monnicam distulisse baptismum Augustini, quod putaret non esse maturandum tempus in adolescente, qui æstu cupiditatum abripietur, adnotarunt in hunc Ambrosii locum PP. S. Mauri. Fuerunt differendi baptismatis causæ aliæ, timor, ne parvulis sub paganorum aut hæreticorum tyrannide ab Ecclesia divulsis Sacramentum afficeretur injuriâ; suborta in Episcoporum exilio laxitas disciplinæ, & adultorum socordia; ipsorum denique negligentia baptizandorum, nata sive ex inolita vitiorum consuetudine, sive ex persuasione, quod in hora mortis baptizati facile consequerentur patratorem omnium scelerum remissionem. Atque hæc quidem causæ, non singulæ unumquemque, sed quædam unum, quædam alterum ad differendum baptismum impulerunt.

Oritur hinc quæstio, expediat ne ob allatas, similesve rationes etiam modò sacrum baptismum differre. Verum quæstionem hanc dirimunt quæ produximus de Pædobaptismo disputantes, præsertim periculum damnationis, servitus diaboli, labisque originariæ reatus, quæ oportet ut, quamcitiùs fieri potest, abjiciamus atque expellamus. Nec sunt productæ rationes adeo validæ, ut aliquem probum virum debeant permovere. Nam prior ex Tertulliano & Nazianzeno petita, (Cet si hi duo non probent dilationem baptismatis ad provectam usque, & senescentem ætatem) refellitur traditione perpetua, ceterisque momentis alibi adductis: quamquam Tertullianus loquitur de parvulis degentibus sub potestate infidelium, & Nazianzenus expectari non vult plenioræ ætatem, *propter inopinatos & repentinos periculorum impetus; quæ ratio*, inquit dist. v. §. 38. illustri Estius, *non minus, imo etiam magis militat pro eo tempore, quod est minus triennio*. Nec injuria infertur parvulis, si baptizentur in infantia, tum quia illorum saluti consulitur, tum etiam quia per susceptores ad id tantum adstringuntur, quod illi, si ratione uterentur, utique deberent suscipere. Verum de his plura cap. xvi. Infirma est etiam causa altera a Novatiani inducta; quoniam nec Apostolus negat lapsis pœnitentiæ remedium, ut suo loco dicemus; nec sani consilii est procrastinando pœnitentiam, & contemnendo Sacramenta thesaurizare sibi iram in futurum; nec denique melius est versari in continuo damnationis periculo, quam sit innovari, remissio-

missionem accipere, supernoque auxilio communiri, ac, si labitur humana fragilitas, habere aditum, & jus ad spiritalia remedia. Tertia autem causa, quemadmodum commendat studium eorum, qui ad Sacramenta non admittunt pravis consuetudinibus irretitos, abreptosque fluctibus cupiditatum; ita illos condemnat, qui baptismum in seram usque ætatem differentes peccatis indulgent, ac se in tali statu constituunt, in quo difficulter Sacramenta cum recta dispositione suscipiuntur. Quare citata oratione xl. in sanctum baptismum ita hujusce generis homines compellat Nazianzenus: *Baptizemur hodie, ne cras vi aliqua cogamur: ne beneficium tanquam injuriam differamus; nec expectemus ut plura peccata congeramus, quod plura nobis condonentur: nec Christo, cautionum & negotiatorum ritu, abutamur; nec graviori sarcina oneremur, quam vires nostra ferre queant, ne una cum ipsa navi demergamur, ac gratiam naufragio amittamus; dumque plura spe, atque animo concipimus, omnia perdamus*. Causæ denique postremo loco productæ eadem refelluntur ratione, qua ingens stupor, supinus error, & culpabilis negligentia reprehenditur. Nemo ergo debet baptismum differre in adultam ætatem, & adversus praxim universalis Ecclesiæ obtendere aliquorum exempla: sed infantes suos baptizando profiteri adversus Pelagianos originale peccatum, & in illis conscriptis in mortem Christi delere damnationis chirographum: detestari insuper Anabaptistas, qui ajunt *præstare omittere parvulorum baptismum, quam eos non actum proprio credentes baptizari in sola fide Ecclesiæ*; & quos sess. vi. i. can. 13. de Baptismo anathematizat Synodus Tridentina.

Nunc quoniam illi, qui ætate adulta statuerunt Christum induere, aliquo tempore inter Catechumenos morabantur, de iisdem Catechumenis dicere instituo. *Κατηχούμενος* ergo, *Catechumenus*, græcum vocabulum est, sive participium passivum verbi *κατηχέω*, *instruo, doceo, elementis religionis imbuo*: quare idem sonat *Catechumenus*, ac *Ille, qui instruitur*, & *Catechizans* idem, ac *Qui instruit*, traditque viva voce sacræ Religionis elementa: unde Apostolus ad Gal. vi. 6. inquit: *Κοινωνεῖτε δι' ὃ κατηχούμενοι τῷ λόγῳ τῷ κατηχῶντι ἐν πάντιν ὅντας, Communicez autem is, qui catechizatur verbo, ei, qui se catechizat in omnibus bonis*. Hinc pariter Institutionem in fide Græci *κατηχήσις*, *catechesis*, Latini, *Catechismus*, appellant a *κατηχέω*, ejusdem cum verbo *κατηχέω* significationis. Dicuntur tamen *Catechumeni* etiam pueri recens nati, qui ad baptismum offeruntur, eo quod in iis servetur ordo veteris disciplinæ, nominis impositio, inunctio, signum crucis, exorcismus, & alia, de quibus infra. Pluribus id demonstrat in Glossario Du-Cangius tom. 1. pag. 887. Dividit eo loci Cangius Catechumenos in tres classes, *Audientium*, *Genuflectentium*, *Competentium*. Secuti sunt eam-

eamdem partitionem recentiores Theologi, Tournelius pag. 177. & Auctor Op. de Re Sacram. pag. 195. sed *Genusfcentes* distinctam classem non constituere tenet lib. 1. cap. 1. art. 6. de Antiq. Ritibus Martenius, affirmans *Genusfcentes* fuisse catechumenos lapsos, qui Dei verbum flexis genibus audirent. Ad hanc opinionum diversitatem componendam faciunt Canon xiv. Nicænus, & v. Neocæsariensis: quorum primus mandat, ut catechumeni lapsi *tribus annis sint inter Audientes*, post hæc autem cum *Catechumenis orent*; alter vero distinguit Catechumenorum stationes duas, *Audientium*, & *Genusfcentium*, qui manuum impositione expurgabantur cum substratis pœnitentibus commorantes: atque hos lapsos mandat rejici ad *Audientiam*, illos de *Audientia* expelli. Ex quibus intelligimus *Genusfcentes* non fuisse diversos a *Competentibus*, qui crebris orationibus, ac pœnitentiis subiciebantur. Nos itaque Catechumenorum classes ita distinguimus, ut prior sit *Audientium*, *Competentium* altera, tertia *Electorum*, tamen laudatus Martenius *Competentibus* præponat *Electos*, Tournelius verò *Competentes*, *Electosque* confundat. Sane partitio nostra comprobatur ipsius Catechumenatus explicatione.

Qui ergo Christianam religionem cupiebant amplecti, præsentati Episcopis inter *Catechumenos* recipiebantur, facto illis signo Crucis in fronte, & alicubi etiam in pectore, in oculis, in ore, in scapulis, in auribus, addita cum precibus manuum impositione, necnon insufflationibus & exorcismis, de quibus infra, ubi pertractabo de ceremoniis baptismi, quæ sunt antiquæ disciplinæ vestigium. Hoc pacto ad audiendum verbum Dei admittebantur in eam Ecclesiæ partem, quam hodie *navim* appellant, & in qua certum est olim habitas fuisse conciones. Quare idem locus, in quo Catechumeni consistebant, *navisquinum*, idest, *Auditorium*, dictum est, ipsique Catechumeni, *Audientes*. Hinc etiam superiores Ecclesiæ porticus olim dicebantur *Catechumenia*, quod ibi starent mulieres auditu conciones, sacrasque Liturgias excipientes: immo istic locarunt Catechumenorum stationes Baronius, Wolphius, & Meursius, decepti fortasse *Catechumenii*, idest, *Auditorii* vocabulo. Ubicumque tamen *Audientes* constiterint, sive in *navim*, *navi*, sive in tabulatis, ac porticibus supernis; primam illi classem constituunt, & si vim nominis attendamus, proprie sunt *Catechumeni*, nimirum *Edocti*, quamquam eo nomine late accepto designentur *Competentes quoque*, & *Electi*. Non denegatas Catechumenis Eulogias dixi pag. 285. Concione audita Catechumeni ab Ecclesia dimittebantur, clamante ex ambone Diacono, *Catechumeni discedite*, ne illis mysteria patefierent ob disciplinam arcani, de qua vide pag. 9. hujus Voluminis. Interrogabantur ante discessum, an vellent sectari illam vivendi rationem,

nem, fufisque pro ipſorum ſalute precibus, iſſemque abeuntibus, ſequabatur Miſſa Fidelium, incipiens ab Offertorio: atque hinc pars Miſſæ præcedens *Miſſa Catechumenorum* appellabatur.

Expleto Catechumenatus, ſive *Audientia* tempore, pro Epiſcoporum diſcretionem, & qualitate initiandorum, longiori, aut breviori, qui baptiſmi deſiderio flagrabant, ad illum admitti ſupplicii demiffione petebant. Hi ſunt, qui ſecundam Catechumenorum ſtationem tenent, ſcilicet *Competentes*. Iſidorus lib. viii. Orig. cap. 4. *Competens*, inquit, *vocatur, qui poſt inſtructionem fidei competit gratiam Chriſti. Inde a petendo Competens vocatur.* Igitur vel ipſum nomen demonſtrat *Competentes*, ut ſupra dixi, poſt *Audientes* locandos eſſe. Petebant Catechumeni baptiſmum in terram proſtrati, ut ſcribit Gregorius Turonenſis lib. v. cap. 7. unde in Eccleſia Mediolanenſi infans humi prope Baptiſterium ſolet collocari. Tunc, non *Audientia* tempore, Catechumeni nomen dabant. *Baptizandi*, inquit Conc. iv. Carthag. can. 85. *nomen ſuum dent*; ac S. Pater Auguſtinus de Fid. & Op. cap. 6. *Competentes vocantur, cum ad percipiendum baptiſmum ſua nomina jam dederunt*: ac de ſe ipſo, utique jam Catechumeno, lib. ix. Confefs. c. 6. *Inde ubi tempus advenit, quo me nomen dare oporteret, &c.* Ferrandus quoque Carthaginenſis in Epiſt. ad Fulgentium, de quodam Aethiope baptizando ait: *Propinquante ſolemnitate Paſchali inter Competentes offertur, ſcribitur, eruditur.* Ex his inferitur nomina Catechumenorum inſcripta fuiſſe Eccleſiaſticis tabulis ante Paſcha duabus, aut tribus hebdomadibus, atque, ut plurimum diebus quadraginta, & aliquando Dominica in Palmis: qua die Catechumenos ad *Competentium* claſſem aſcendiſſe, putat Lupus Parte 2. pag. 1024. Interim *Competentes* aſſiduus orationibus dabant operam. *An uſque adeo diſſimulamus*, ſcribit Auguſtinus citato cap. 6. de Fid. & Op. *quantum fuerimus attenti atque ſolliciti quid nobis præciperent a quibus catechizabamur, cum fontis illius ſacramenta peteremus, atque ob hoc Competentes etiam vocaremur?* Citato etiam Confefsionum loco, ſtetus, cordiſque ſui motus, excitatos hymnis & cantibus, commemorat S. Pater. Tertullianus de Baptiſmo cap. 19. ſcripſit, ingreſſuris baptiſmum ſedulo incumbendum *orationibus crebris, jejuniis, genculationibus, pervigiliis.* Similia Gregorius Nazianzenus Orat. xl. Cyrillus Jeruſolym. Catech. 3. & alii; qui etiam ſcribunt eo temporis Catechumenos confefsos patrata crimina, non Confefsione Sacramentali, ſed ea, quæ ipſorum converſionis, melioriſque propoſiti foret indicium: atque ita omni conatu ſe præparabant ad gratiam regenerationis percipiendam. Eccleſia e contra omnem adhibebat diligentiam, ne initiarentur indigni, inſtituto circa Competentium mores examine, quod appellabant *Scrutinium*. Septem-

vcrō

verò ex Ordine Romano scrutinya celebrabantur , a tertia hebdomada in Quadragesima usque ad Sabbatum sanctum ; & si quis Catechumenorum interea temporis perpetrasset flagitium aliquod , remittebatur , ut supra diximus , ad classem *Audientium* . Præcipuum tamen scrutinyum habebatur feria 1v. majoris hebdomadæ , quæ propterea dicebatur *dies scrutinyi* , ut scribunt Rupertus de divinis Officiis lib. 1v. cap. 18. Hugo Victorinus 1. de Sacram. cap. 17. Casalius de Antiq. Rit. Christ. cap. 5. Dufresne in Glossario , Vicecomes , Martenius , alii .

Nisi prioribus scrutinyis *Competentes* inventi fuissent indigni , illis Symbolum tradebatur , & dicebantur *Electi* : quo nomine designantur qui initiandi , aut consecrandi sunt , priusquam initientur , aut consecrentur , ac præsertim Episcopi . Hoc nomine appellantur Catechumeni in Ordine Romano , ubi agitur de *dies scrutinyi* , idest , feria 1v. majoris hebdomadæ , ad quam fideles omnes invitantur his verbis , *Scrutini diem , dilectissimi fratres , quo Electi nostri divinitus instruuntur , imminere cognoscitis : ibidem solita devotione , succedente sequenti quarta feria , circa horam tertiam convenire dignemini* . Majori itaque hebdomada accepto Symbolo *Competentes* dicebantur *Electi* : immo Casalius contendit *Competentes* appellatos fuisse *Electos* eo tantum die , quo baptizabantur , ex Siricio epist. 1. ad Himerium cap. 2. Ut ut sit , pertinent *Electi* ad classem Catechumenorum sublimiorem . Symbolum tradebatur in die Palmarum , ex Alcuino de divinis Offic. cap. de Dominica Palm. & Isidoro lib. 1. cap. 27. Idcirco Dominica Palmarum *Pascha Competentium* appellabatur : extatque sermo S. Patris 115. de Tempore , nunc de *Traditione Symboli* , habitus eadem die . Amalarius tamen Fortunatus lib. 1. cap. 8. scribit traditum Symbolum Catechumenis feria 2. post Dominicam tertiam Quadragesimæ : eamque consuetudinem inductam a S. Gregorio existimat Lupus in Canonem lxxviii. Trullanum . Reddebant Catechumeni symbolum in Ecclesia Romana Sabbato sancto , paullo ante baptismum , ex Ordine Romano , & Amalario , citato loco : nec aliter in Africa ex Homilia xlii. Augustini , cap. 1. Præcitato tamen canone Trullano , & 46. Laodicensi præcipitur , ut Catechumeni reddant Symbolum *feria quinta* . Idem habetur cap. *Non licet ante* , de Consecr. dist. 1v. num. 59. Est autem *reddere symbolum* illud memoriter recitare , & Christianam fidem ante susceptionem baptismatis profiteri . Una cum Symbolo tradebatur Catechumenis *Oratio Dominica* , quam tamen reddebant non Sabbato sancto , sed in proxima Paschali solemnitate post Eucharistiam , ut scribunt citata homilia Augustinus , & in libro de Baptis. cap. 28. Tertullianus . Quo autem ritu mergerentur Catechumeni dictum supra in Appendice cap. vi. Hæc itaque de Catechumenis , eorumque



classibus verisimiliora nobis videntur, atque possunt ex dictis facile comprobari.

## C A P U T XXI.

*Solvantur quæstiones aliquæ circa adultorum baptismum.*

**Q**Uæritur modo quid agendum sit, si baptismum petat adultus, paganus, aut baptizatus in hæresi absque præscripta forma, verorum? Respondeo non statim, & absque delectu tingendum esse; sed ejus voluntate explorata, dandam operam, ut ritu ad justificationis gratiam disponatur. Pertrahatur de hac dispositione Synodus Tridentina sess. vi. cap. 6. nonnullaque a me dicta sunt lib. xi. cap. 4. Excitanda est ergo in catechumeno fides per Evangelicam Institutionem: nam inquit Apostolus ad Rom. x. 17. *Fides ex auditu, auditus autem per verbum Christi*. Exigit hanc fidem Dominus in Evangelio, dicens Mat. xxv 11. 19. *Ite, docete omnes gentes, baptizantes eos*. Et Marci xv 1. 16. *Qui crediderit, & baptizatus fuerit, salvus erit*. De Petro etiam legitur Act. 11. 41. *Qui ergo receperunt sermonem ejus, baptizati sunt*. Philippus pariter Eunacho baptismum petenti, Act. v 11. respondit, *Si credis ex toto corde, licet*. Fidem comitari debent spes, timor, ac poenitentia: quod citato in loco demonstrat sacrosancta Synodus verbis Christi alloquentis paralyticum Matt. ix. 2. *Confide fili, remittuntur tibi peccata tua*: tum recitata sententia Eccli. 1. 27. *Timor Domini expellit peccatum*: conatione insuper Petri Act. 11. 38. *Poenitentiam agite, & baptizetur unusquisque vestrum in nomine Jesu Christi, in remissionem peccatorum*. De hac poenitentia inquit Augustinus serm. 351. num. 2. *Omnis, qui jam suæ voluntatis factus est arbiter, cum accedit ad Sacramenta fidelium, nisi eam poeniteat vitæ veteris, novam non potest inchoare*. Ab hac poenitentia cum baptizantur, soli parvuli immunes sunt; nondum enim uti possunt libero arbitrio. Haud secus in Epist. 265. ad Seleucianam aliâs 108. num. 7. & uterque locus extat in Decreto cap. Omnis, & cap. Agunt homines, de Consecr. dist. iv. n. 96. & 97. Quo autem sensu: etiam parvuli credere, & poenitentiam agere dicantur, scripsi Vol. iii. pag. 491. ac paullo supra Pædobaptismum propugnans. Requirit etiam Tridentina Synodus, ut adulti, qui se ad justificationem disponunt, Deum tanquam omnis justitiæ fontem diligere incipiant; ut habeant nimirum amorem saltim inchoatum, de quo prolixius agemus de Poenitentia. Paucis hac completitur Rabanus Maurus lib. 1. de Instit. Cleric. cap. 27. *Primum interrogatur paganus, si abrenunciat diabolo, & omnibus*  
dam-

*damnosus operibus ejus , atque fallacibus pompis , ut primum respuat errorem , & sic appropinquet ad veritatem ; possitque juxta Apostolum depovere veterem hominem secundum pristinam conversationem , qui corrumpitur secundum desideria erroris , abnegans impietatem & secularia desideria .* Inserta hæc sunt cap. Primum , cit. dist. 1v. num. 95.

II.

Præterea quæritur , quo tempore solemnis adultorum baptismus sit celebrandus . Respondeo autem , jure præscribere Rituale Romanum , ut id fiat *in Sabbato sancto Paschatis , vel Pentecostes* , nisi obstat impedimentum aliquod , aut ad fidem post Pentecosten conversi , ac plene doctrina Evangelica instructi , dilationem baptismatis in longum tempus ægre ferant . Primo enim Romani Pontifices ex perantiqua traditione statuerunt , ut nonnisi prædictis diebus , *exceptis ægritudine laborantibus* , præsumant Episcopi baptismum Catechumenis tradere . Ita definiit Siricius epist. 1. ad Himerium . cap. 2. anno 385. S. Leo epist. 16. ad Episcopos per Siciliam constitutos cap. 3. anno 447. Gelasius epist. 9. ad Episcopos Lucaniæ cap. 10. circa annum 493. quorum decreta extant de Consecrat. dist. 1v. capp. *Non ratione . Proprie in morte . Baptizandi* . num. 11. 13. 18. Accedit antiquarum Ecclesiarum consuetudo . Thessalicas olim baptizasse in festo Paschatis , testatur Socrates lib. v. H. E. cap. 26. Africanas in Paschate , & Pentecoste Tertullianus de baptismo cap. 19. iisdem diebus Gallicanas , Gregorius Turonensis lib. v. Hist. Franc. cap. 11. Addi poterat congruentia , quam profert citato loco Tertullianus : *Diem baptismo solemniorum Pascha præstat , cum & passio Domini , in qua tingimur , adimpleta est : exinde Pentecoste ordinandis lavaeris latissimum spatium est , quo & Domini resurrectio inter discipulos frequentata est , & gratia Spiritus sancti dedicata , & spes adventus Domini subarsensa* . Similiter Leo Magnus laudat . Epist. xvi. *Ipsa igitur operis qualitas docet celebranda generaliter gratia eam esse legitimum diem , in quo orta est & virtus muneris , & species actionis , &c.* Ea de causa , non quavis hora Paschalis Sabbati conferebatur baptismus , sed nona , *propter mysterium sepultura Christi* , inquit Amalarius Fortunatus lib. 1v. de Offic. Eccl. cap. 29. Plura de baptismi tempore Josephus Vicecomes de Antiq. Baptismi ritib. lib. 1. cap. 22. Barnabas Brissonius in lib. Observat. divini , & humani juris , Martenius lib. 1. cap. 1. Vossius etiam disput. xvi. thesi 6. Ob antiquæ igitur disciplinæ venerationem , æquum est , ut adulti prædefinito tempore baptizentur : quod tamen , ut dixi , non est necessario servandum ; quoniam ea , quæ ad disciplinam pertinent , sæpenumero patiuntur variationem . Invenimus quippe aliquando collatum fuisse baptismum in die Epiphania-



*ejus est, baptizari aut pœnitentiam accipere potest, si voluntatis aut præterita testimonium aliorum verbis habet, aut præsentis in suo nutu.* S. Cyprianus Epist. 13. *Si qui fuerint, ait, periculo præventi, vigilantia vestra non desit.* Ratio ex eo petitur, quod ad suscipiendum baptismum sufficiat intentio *interpretativa*, de qua diximus præcedenti libro xxx. cap. 28. Ex eodem capite constat quid dicendum sit de amentibus, & energumenis; qui tingendi sunt, si aliquando baptismatis ostenderint desiderium. Si tamen habeant lucida, ut inquitunt, intervalla, in iis regenerandi sunt, ut percipiant quod in eis perficitur: si numquam compotes sui fuerint, eadem omnino illorum est ratio, ac sit parvulorum. Quod si adultus implicatus, peccati consuetudine corripiatur morbo, nec ullum pœnitentiæ signum exhibeat, utrum baptizandus sit, videtur gravior difficultas. Atque illum baptizandum non esse, si constet cum voluntate baptismi habuisse voluntatem permanendi in peccato, ob quam sese ostenderit indignum percipiendæ gratiæ, docent in art. xi. quæst. 68. celebres, probique Theologi, quoniam cum tali obice prorsus inutiliter ablueretur vitæ lavacro. Augustinus tamen in capite ultimo de adulterinis coniugiis, baptizandos censet Catechumenos retinentes *adulterina consortia*, (tametsi salvi corpore in iis permanentes ad baptismum non admittantur,) *si desperati, & intra se pœnitescentes jacuerint, nec per se respondere potuerint*, ea permotus ratione, quoniam credibile est, nolle ipsos ulterius *carnis illecebra detineri*. Et quidem si tali in casu baptizandi sunt, quamquam nondum reddiderint symbolum, nec ore abrenunciaverint diabolo, quoniam in catechumenatu commorantes creduntur id esse facturi; baptizandi sunt quoque coniugiis illicitis copulati, dum hæc a se dimittenda fore ipsum catechumenatus studium, officiumque promittit. Verum, cum impenitentes lapsosque in Catechumenorum classibus passim, numquam sit vetus Ecclesiæ disciplina; præcipuum catechizantium est manus, baptismi cupidos instruere simul, & a carnis illecebris remove.

IV.

Postrema quæstio est de illis adultis, qui simulato animo, idest, fide interna destituti, & cum peccati mortalis affectu accedunt ad regenerationis Sacramentum. Ab his, modò non baptizentur inviti & prorsus coacti, perspicuum est recipi characterem, non autem gratiam: unde Augustinus lib. 111. de Baptis. cap. xiv. num. 19. *Non interest, inquit, cum de Sacramenti integritate tractatur, quid credat, aut quali fide imbutus sit ille, qui accipit Sacramentum. Interest quidem plurimum ad salutis viam, sed ad Sacramenti questionem nihil interest.* Vide cap. *Sicut in Sacramentis, de Consecrat.* dist. iv. num. 151. Ad gratiam itaque percipiendam debet baptizatus cre-

credere, & agere poenitentiam: remota enim fictione Sacramentum baptismatis reviviscere, & gratiam justificationis conferre, tradidit S. Pater, affirmantque Theologi universi. *Tunc valere incipit ad salutem*, ait de Baptismo Augustinus lib. 1. cap. 12. *cum illa fictio veraci confessionis recesserit*. Idem docet S. Pater de hæreticis, lib. 111. cap. 13. asserens tunc illis baptismum valere ad dimittenda peccata, *cum ad Ecclesiam pacem venerint*: nec aliter de Christianis, qui solis verbis, & non factis renuntiant sæculo, scribit lib. 1v. cap. 3. affirmans hoc illis veram conversionem præstare, *Ut sacramentum, quod non mutatis valebat ad perniciem, mutatis valere incipiat ad salutem*. Hæc nota falli Morinum, qui lib. 1x. de Poenit. cap. 13. scribit reviviscere duntaxat baptismum extra Ecclesiam collatum; cum idem de hæreticis, ac de improbis Catholicis tradat Augustinus. Indefinite pariter loquitur cap. *Tunc valere*, de Consecr. dist. 1v. num. 152. Hujus *reviviscentiæ* probationes petunt Theologi ex regeneratione, quæ baptismati tribuitur, Joan. 111. 5. & ad Titum 111. 5. Cum ergo ficto baptizatus nondum regeneratus sit, & ab originali peccato solutus; dum remota fictione consequitur gratiam, hæc suscepto baptismati est tribuenda, ideoque Sacramentum, quod erat *informe*, tunc effectum sortitur suum. Hinc Augustinus citato cap. 12. libri 1. de Baptismo confirmat quod scripserat, ex quo nemo possit Christum induere, nisi sit baptizatus in Christo, fictæ autem baptizatus nequeat accipere Spiritum sanctum, productis verbis Apostoli ad Galatas 111. 27. *Quicumque enim in Christo baptizati estis, Christum induistis*, & Sapientiæ 1. 5. *Spiritus enim sanctus discipline effugiet fictum*. Accedit in hujus argumenti confirmationem, quod baptismus iterari non potest, ideoque ut salutem afferat baptizatis sine prævia dispositione, debet in poenitentibus vim propriam exercere, quod præstare non potest in hæresi, schismate, & contaminatis moribus persistenti; ut S. Pater exquisitis testimoniis demonstrat duobus aliis in locis prælaudatis. Atque hinc apparet Vasquesium nimia confidentia scripsisse disp. 159. cap. 3. ab Augustino nulla ratione fuisse comprobata *reviviscentiam* istam baptismatis. Alteram addunt Theologi probationem, quod nempe peccata baptismum præcedentia non sint *materia* Sacramenti Poenitentiae, instituti ad dimittenda peccata post baptismum commissa, ut docet Tridentinum sess. vi. cap. 14. & sess. xiv. cap. 1. Necessum est ergo, ut peccata illa deleantur per baptismum, qui fictione remota reviviscat. Solet opponi, quod baptismus, dum removetur obex, non amplius existat: quod ipsa baptismatis susceptio fuerit in simulantibus *opus mortuum*, ideoque reviviscere nequaquam possit; postremo quod fictio ipsum baptismum præcedat, & tamen per solam poenitentiam possit remitti. Sed hæc facile diluuntur. Ad primum enim responsum est

pag. 252. hujus Voluminis. Ad alterum dicimus baptismum non reviviscere, quatenus est sacrilega actio baptizati; sed in quantum est Sacramentum Christi virtute collatum, & in se non *mortuum*, sed efficax, quamvis perseverante fictione gratiam non conferat, ad instar seminis, cui ariditas terræ est impedimento ne germinet. Ad ultimum reponimus fictionem actu, vel affectu perseverasse in ipsa susceptione baptismatis, ideoque remitti per Pœnitentiam, quemadmodum remittuntur peccata, in quæ regenerati post baptismum labuntur: & quod affirmamus de fictione, asserendum est de quolibet peccato, cujus affectu detineatur accedens ad sacrum spiritualis regenerationis mysterium, ut docent in quæstionem LXIX. art. 10. Sylvius, alique Theologi.

## C A P U T XXII.

*De baptisinate mortuorum, ærisque Campani.*

**B**aptismata duo remanent expendenda, quorum unum nos in antiquis hæreticis condemnamus, alterum hæretici recentiores reprehendunt in nobis; mortuorum illud, istud verò signorum, quæ *Campanas* consuetum nobis est appellare. Ac de baptisinate mortuorum dicam primò quoniam mortuos, aut vivos pro mortuis baptizaverint, deinde cur id fecerint, tandem an recte gesserint, an male. Baptizarunt itaque vivos pro mortuis vetustissimi hæretici Cerinthiani, & Marcionitæ: quorum ductor Cerinthus vixit Apostolorum temporibus, ut constat ex Irenæo lib. III. adversus hæreses cap. 3. & Eusebio lib. III. H. E. cap. 22. alter, idest, Marcion fuit successor Cerdonis, ex eodem Irenæo lib. I. cap. 27. aliàs 28. vixitque Hygini Papæ, & Antonini temporibus, ut ex priori Apologia Justini, & Epiphanio hæresi XLII. demonstrat ad annum Christi CXLIV. num. 3. Antonius Pagius. Et de Cerinthianis quidem id refert Epiphanius h. XXV. III. *Ex traditione res quadam ad nos pervenit, quod ut quidam apud ipsos de vita decesserunt morte præoccupati citra baptismum, alii pro ipsis in nomen ipsorum baptizentur, ne ubi resurrexerint, illi in resurrectione pœnas luant, eo quod non acceperunt baptismum, & subditi fiant potestati, quæ mundum condidit.* De quo loco plura Estius in Paulum Tom. I. pag. 387. necnon Vossius disput. XII. de Baptismo, thesi 2. Idem de Marcionitis scribunt Chrysostomus hom. XL. in I. ad Corinth. cap. 15. Theophylactus eundem in locum, & ex Latinis Tertullianus lib. V. contra Marcionem cap. 10. & de Resurrect. carnis cap. 48. Horum vero testimoniis, & quæ scripsit Ambrosiaster in Paulum, & Walafridus de rebus Ecclæs.

clef. cap. 26. cum apertissima sint, & omnia a Vossio producta, brevitatis gratia prætermittimus. Addimus Constantinum Herinopolitanum libro de Sectis cap. 11. a Vossio quidem omiffum, sed laudatum a Lupo ad Canonem 83. Trullanum, atque hæc de Marcionitis, & Manichæis scribentem: *Quoties apud ipsos non baptizatur aliquis moritur, sub lectulo defuncti viro quodam occultato, lectulum adeunt, ac mortuum interrogant, an baptizari velit. Respondet occultatus ab imo, velle: atque ita loco defuncti eum baptizant.* Hi ergo hæretici, idest, Cerinthiani, ac Marcionitæ, viventem aliquem pro mortuo tingebant. Cataphrygas autem, quorum in hoc Opere sæpe mentionem fecimus, exortos juxta Ephanium h. xlviii. circa annum Antonini Pii xix. idest, Christianæ Aeræ 156. auctore pseudo-propheta, perditissimoque Montano, Cataphrygas, inquam, baptizasse mortuos, scribit Brixienfis Episcopus sanctus Philastrius h. xlix. pag. novæ edit. 37. his verbis: *Hi mortuos baptizant.* In quem locum Auctor Not. lectorem remittit ad Vossium supra laudatum, ad Grotium in 1. ad Corinth. xv. 29. & ad Historiam Pædobaptisini editam Anglicæ lingua. At Vossius Philastrium quidem laudat, observatque errasse Alphonsum de Castro, qui ait Cataphrygas non baptizasse mortuos, sed vivos pro mortuis, ut fecerunt Cerinthiani & Marcionitæ: at Grotius plura eo loci tractans de baptismo mortuorum, nec Philastrii, nec Cataphrygum fecit mentionem ullam. Hujus præterea erroris non meminit agens de Cataphrygis Ephemianus h. xlviii. nec Augustinus de hæres. num. 26. nec Irenæus lib. iii. cap. 11. ubi suppresso nomine Montanistas exagitari animadvertit Massuetus. Hæc tamen talia non sunt, ut dicamus erravisse Philastrium; cum ex alia parte constet mortuos a nonnullis hæreticis baptizatos, præsertim ex canone Synodi iii. Carthaginensis, de quo infra. Videntur Cataphrygis accensendi Archontici; nam de his scribit Theodoretus lib. 1. hæret. fabul. cap. 11. pag. 202. *Post mortem oleum & aquam mortuorum capitibus injiciunt, sic fore dicentes, ut ipsi invisibiles sint, superioresque evadant interjectis dominationibus, & potestatibus.* Atque hi sunt hæretici, quos invenimus baptizasse mortuos, aut viventes pro mortuis.

Cui bono, & qua intentione id fecerint, perdifficile est edisserere. Nam si baptizare mortuos positum fuit in consuetudine aliquorum hæreticorum, ante exortam Cerinthi hæresim, ut quidam conjectant ex verbis Pauli 1. ad Corinth. xv. 29. *Alioquin quid facient, qui baptizantur pro mortuis, si omnino mortui non resurgunt? ut quid & baptizantur pro illis?* probabile est inductum morem illum ex frequentissimis lotionibus Phariseorum, apud quos fertur usu fuisse receptum, ut si quis mortuus esset legaliter immundus, pro ipso alius ablueretur, eaque cæremonia fieret ne immunditia noceret mor-

mortuo, simulque fides excitaretur futuræ resurrectionis, quam Sadducæi denegabant. Visum ita Francisco Turriano, qui id ex Apollinari, Ephræm Diacono, & Eustratio presbytero conatus est demonstrare apud clarissimum Estium in Paulum pag. 388. Sed ambigua sunt, sacrorumque Interpretum ingenia torquent præcitata. Apostoli verba. Si autem dixerimus Apostolum de perverso illo more nequaquam fuisse locutum, nec obtinuisse consuetudinem baptizandi mortuos, quando scripsit ad Corinthios priorem Epistolam, idest, circa annum V. Aë. LVII. hand inverisimile erit exortum tingendi mortuos abusum ex prava Apostolicorum verborum intelligentia. Postquam itaque reprobavero mortuorum baptismum, proferam nonnulla de obscuro illo, ac perdifficili Apostoli testimonio.

Sane mortuos baptizandos non esse probatur auctoritate, & ratione. Etenim in Codice canonum Ecclesiæ Africanæ c. 18. legitur: *Placuit ut corporibus defunctorum Eucharistia non detur. Scriptum est enim, Accipite & edite; cadavera autem nec accipere possunt, nec edere. Et ne jam mortuos homines baptizari faciat presbyterorum ignavia*; sive, ut habetur in Collect. Conciliorum, can. 6. Conc. III. Carthaginensis, *Cavendum est, ne mortuos baptizari posse fratrum infirmitas credat*. Ratio etiam evidens est, quoniam mortuorum cadavera recipere nequeunt spiritalem regenerationem, & gratiam, cum anima rationali sint destituta. Neque potest vivus baptizari pro mortuo, quia cum ille renasci debeat ex aqua & Spiritu sancto, qui natus est carne, baptismus prodesse non potest, nisi suscipientibus; præterquamquod defunctis absque baptismo, & ab Ecclesia alienis, nequeunt aliquid præstare suffragia viventium. De Eucharistia data mortuis differendum est alibi: sufficit modò animadvertere & hanc vetari citato canone Carthaginensi, LXXXIII. Trullano, aliisque; imperite autem a nonnullis receptam in usu, quod antiqui Patres ad compescendas diabolicas grassationes in fidelium cadavera, iis aliquando applicuerint Dominici corporis Sacramentum. Vide in præcitatum canonem Trullanum Christ. Lupum P. 2. vet. edit. pag. 1044.

Restat ergo, ut dicamus de perdifficili illo textu, *Alioquin quid facient qui baptizantur pro mortuis, &c.* Varias loci hujus interpretationes offert, expenditque accuratissime Estius in Paulum, & in peculiari dissertat. de Baptismate mortuorum Augustinus Calmet Tom. 2. pag. 203. Plura etiam de hoc argumento Raynaudus, Alabspinæus, Poncius noster, atque, ne de Vossio, & Grotio aliquid repetam, Epistolarum Pauli Interpretes universi. Tres tamen sunt expositiones, quæ videntur mihi ceteris præferendæ. Prima est eorum, qui asserunt ex consuetudine aliquorum, qui viventes baptizabantur pro mortuis, demonstrare Apostolum futuram corporum resurrectionem, argumento, ut inquirunt, *ad hominem*, non consuetu-



dinem illam approbando, sed ex illa adstruendo fidem resurrectionis. Pugnat pro hac interpretatione acerrime Calmet: eamque præter ea, quæ diximus de more Phariseorum, confirmant verba Tertulliani lib. v. contra Marcionem cap. 10. scribentis, Paulum non fuisse baptismi pro mortuis auctorem & confirmatorem, sed ea scripsisse, *Ut tanto magis fisteret carnis resurrectionem, quanto illi, qui tunc pro mortuis baptizarentur, fide resurrectionis hoc facerent.* Altera interpretatio est eorum, qui censent loqui Paulum de iis, qui decumbentes in lecto, & morti proximi baptismum suscipiunt, & reipsa declarant se baptizari *pro mortuis*, idest, ut baptismus proficiat sibi vita functis, & pro eo statu, ad quem accelerant: quod pariter ad probandam resurrectionem invictum est argumentum, quia dum Sacramentum impenditur corporibus, consecrantur immortalitati; ideoque suscipientes baptismum ex hac vita migraturi sperant se fore resurrecturos. Ac de hac interpretatione legendus Estius, nec prætermittendus Gerardus Vossius. Expositio tertia est eorum, qui interpretantur *pro mortuis*, pro corporibus morti obnoxiiis, ita, ut verborum Apostoli sensus sit, Si futura non est carnis resurrectionis, cur in spe & fide resurrectionis baptizantur corpora, ita ad dicta morti, ut nunquam sint immortalitate donanda? Amplectuntur interpretationem istam Chrysostomus, Isidorus Pelusiota, Theophylactus, & Oecumenius, ut præteream juniorum complures: & in ejus confirmationem observat Chrysostomus, baptizandos recitatis verbis symboli, *Credo carnis resurrectionem*, in hac fide regenerari. Hoc ergo (inquit hom. xl. in 1. ad Corinth. pag. edit. Commel. 688.) in memoriam revocans Paulus dicebat, *Si non est resurrectio, cur baptizaris pro mortuis, idest, corporibus? Propter hoc enim baptizaris, mortui corporis credens resurrectionem, idest, quod non maneat mortuum.*

Hanc Chrysostomi explicationem præpono ceteris: prima siquidem, licet non levibus conjecturis innixa sit, inde refutatur, quod vero non videatur simile, Apostolum adstruere fidem resurrectionis ex perversa quorundam consuetudine. Hanc præterea consuetudinem ante annum lxxx. & Cerinthianæ hæreseos primordia, certo non constat obtinuisse. Insuper Sadducei, alique resurrectionem negantes potuissent eludere argumentationem Apostoli, repouentes mortuos, aut vivos pro mortuis baptizari, non in spem resurrectionis, sed ne defunctis obceset immunditia legalis. Secunda pariter expositio non videtur invicta; quoniam in spem resurrectionis non solum baptizantur Clinici & decumbentes, sed omnes omnino qui baptizantur, fruentes quoque bona valetudine: contra interpretationem Chrysostomi quadrat optime scopo Apostoli de resurrectione differentis, & cohæret præcedenti argumento inde petito, quod

quod sicut in Adam omnes moriuntur, ita in Christo omnes vivificabuntur. Respondet Calmet, incertum esse quod Apostoli ætate baptizandi recitarint illum articulum, *Credo carnis resurrectionem*: addit Estius hæc verba *pro mortuis* ægre trahi ad sensum illum, *pro corporibus mortui obnoxiiis*, sive, *pro fide & spe resurrectionis corporum*, ut visum Chrysostomo. Sed quod ait Calmet refellitur ex his, quæ diximus lib. xxii. cap. 6. de Symbolo Apostolico: & insuper baptizandos, nisi ore, saltem corde professos fuisse resurrectionem carnis, adeo apertum est, ut non indigeat probatione. Estio autem primò respondemus, si *pro mortuis* coacte referatur ad corpora moritura, & nondum mortua, coacte etiam accipi ab ipso Estio pro decumbentibus & moribundis. Deinde asserimus recte corpora subiecta mortis necessitati, ab Apostolo dici *mortua*; siquidem idem Paulus ad Rom. vii. 10. inquit: *Si autem Christus in vobis est; corpus quidem mortuum est propter peccatum, spiritus vero vivis propter justificationem*: quem in locum scribit pag. 83. ipsemet Estius: *Mortuum corpus vocat, quod paullo post mortale: sed ideo dicit mortuum, quia non tantum tale est, ut mori possit, sed quod corruptionem in se habeat, qua perpetuo & inevitabiliter tendat ad mortem. Unde & corpus mortis ipsum appellavit superiori capite. Quod pertinet etiam illud vulgatum, Nascentes morimur*. His itaque vindicata a nobis est interpretatio Chrysostomi, investigatus sensus Apostoli, & dissertatio de mortuorum baptismo ad umbilicum perducta.

Agendum est modò de Campanarum baptismo; quem, ut diximus, hæretici damnant supersticiosi ritus, Magdeburgenses cent. x. cap. 6. Hospinianus lib. i. de Templis, Vossius Tract. Theolog. tom. 6. pag. 300. alique apud Joannem Georgium pag. 343. Horum argumenta sunt. I. Quod hujus ritus inventor fuit Joannes XIII. qui anno 968. omnium primus sacris ceremoniis consecravit Lateranensis Ecclesiæ Campanam. II. Eundem ritum proscripsit Carolus Magnus in Capitul. pag. edit. Moguntinæ 266. hæc Constitutio, *Ut cloacas non baptizent, nec chartas per perticas pendant propter grandinem*. III. Quoniam Campanæ sunt omnino baptismatis incapaces. IV. Quia ridiculum ac supersticiosum videtur in Campanarum baptismo ea omnia adhiberi, quæ in baptismo hominum usurpantur, impositio nominis, inunctio, lavacrum, candida vestis, necnon *Patri-*

Verùm hæc ad eliminandum sacrum Ecclesiæ ritum infirma nimium sunt, & futilia. Principio enim, quantum attinet ad usum Campanæ, quovis tempore ad Ecclesiam signo aliquo fideles congregati fuere: in veteri lege tubis argenteis, ac ductilibus, ut habetur in Num. x. 2. pro quibus substitutas Campanas scribit Albinus Flaccus de div. Off. pag. Rom. edit. 66. Et licet incompertum sit, quo

præcise signo primis Ecclesiæ sæculis convocarentur, neque, ut opinor, signum duntaxat unum fuerit in usu; convocatos tamen signo aliquo sonoro, scripsit sæculo iv. S. Ephrem Edeffæ in Syria Diaconus Parænesi 43. & alii apud Casaliū de vet. Rit. Christ. cap. 43. Et quidem Græci, antequam Ursus Participatius Dux Venetorum circa annum 865. Campanas quasdam dono mitteret ad Michaelē Imperatorem, consueverunt plebem evocare ad templa, nunc lingnea tabula, quam malleis duobus pulsabant, nunc verò lamina ferrea, malleo pariter percussa: quæ instrumenta describit, delineatque in Opusculo de Tintinnabulis Hieronymus Magius, ubi quoque ait primum appellatum *εὐαγγελιον*, *Symandrum*, alterum *ἁγιοσφιδιον*, *Hagiosfidrum*. At in Ecclesia Occidentali Campanæ longè antea fuerunt in usu: siquidem earum meminit Auctor Ordinis Romani tit. de Sabbato sancto, S. Audænus in Vita S. Eligii scripta circa annum 650. lib. 2. cap. 21. & sub initio sæculi vii. Ven. Bedæ lib. iv. Hist. Gentis Anglorum cap. 23. Quis verò Campanarum invexerit usum, arduum est definire. Sabiniano ad Petri catedram evecto anno 604. id tribuunt Polydorus Vergilius lib. vi. de Rer. invent. cap. 12. Genebr. in Chronico, Panvinius noster in Epitome Rom. Pontif. Ciaconius, & quidam alii. At vellent eruditi hujus ævi, protulissent viri illi percelebres assertionis hujus momentum, aliquod: nam si sola Polydori ducantur auctoritate; de illo haud illepidē Joannes Audænus Epigram. 49.

*Virgilii duo sunt: alter Maro, tu Polydore*

*Alter; tu mendax, ille poeta fuit.*

Fert vulgaris, & communior opinio Campanas initio sæculi v. usurpatas a S. Paulino Nolano Episcopo, ac propterea *Campanas*, & *Nolas*, a Nola Campaniæ urbe fuisse dictas. Sed & opinionem hanc refellunt plurimi, quibus novissime accesserunt Sandinus in Notis ad Sabinianum, & Joseph Catalanus in Pontif. Romanum P. 2. tit. 23. ea ducti ratione, quod nullus veterum, qui scripsere de Paulino, nec Paulinus ipse describens in Epist. ad Severum partes omnes Basilicæ a se constructæ, inventionem istam laudaverit. Addunt vocabulum *Nola* tribus fere ante Paulinum sæculis usurpatum a Quintiliano lib. vii. cap. 6. ubi ait: *In cubiculo nola*. Ego utique non ausum id definire; contemnendum tamen non est argumentum peti- tum a nominum etymologia. Puto enim Sandinum labi, dum post Magium, aliosque putat Quintilianum adhibuisse vocem *Nola* ad significandum tintinnabulum. Fefellit viros doctos Cælius Rhodiginus lib. xix. cap. 11. & *nola* est femina, quæ in triclinio simulat se paratam ad venerem, ad quam non vult in cubiculo adduci: unde est ænigma illud apud Fabium, *In triclinio coa, in cubiculo nola*: de quo Vossius lib. iv. Instit. Orat. cap. xi. & in Etyr. ol. pag. 99. Non arbi-

arbitror autem a re tam obscœna nomen sacrorum signorum derivasse; præsertim cum nomen aliud *Campanæ*, nonnisi a Campania sit derivatum; quemadmodum trutina, sive statera constans scapo lineis distincto, ex quo reperta sit in Campania, *Campana* & ipsa dicitur ab Isidoro lib. xvi. cap. 24. & a Græcis *καμπανη*. Derivari *Campanæ* nomen a *καμάν*, *galea*, inserto M. demonstrari non potest; & Vossius, qui hanc præmiserat etymologiam, ait postea, plus illam argutiarum habere, quàm veritatis. Certe Walafridus Strabo de div. Off. cap. 5. *Campanas* a Campania, *Nolas* a Nola dici absque ulla hæsitacione pronuntiat. Solemnem Campanarum benedictionem antiquiorem esse Joanne XIII. consentiunt recentiores, probantque ex Ritualibus libris editis ante eundem Pontificem. Vide Bonam lib. 1. de Rebus Liturgicis cap. 22. nostrum Angelum Roccam Tom. 1. pag. 162. Martenium de Antiq. Eccl. ritibus lib. 2. cap. 21. Catalanum citato loco, & Sandinum in Vitis Rom. Pontif. pag. 309. Etsi Joanne XIII. ritus ejuscemodi recentior esset, nil evincerent Ecclesiæ hostes, cum sit in Ecclesia novus instituendi ritus plena potestas. Profectò *Campanæ* non baptizantur, quasi fidei & gratiæ sint capaces, sed ut nos sacra quadam voce ad Ecclesiam convocemur, ac benedictione æris tinnientis percipiat populus invitari se ad fidei verbum, confortetur in Domino convocatus, crescat in eo devotio, procul pellantur omnes insidiæ inimici, fragor grandinum, procella turbinum, & impetus tempestatum: quem ob finem consecrari Campanas docent ipsa verba Pontificalis Romani, & cap. 14. Concilii Colonienfis Tom. xiv. Labbei pag. 549. necnon Confutatio Claudii De-Vert §. 21. confirmantque admiranda, quæ de Campanis consecratis collegerunt Gretserus lib. 2. de Benedict. cap. 45. & Angelus Rocca cap. vii. pag. 166.

Ad primum ergo hæreticorum argumentum, dicimus Joannem XIII. non esse institutorem consecrationis sacrorum signorum, nec nomen suum imposuisse *Campanæ* Lateranensi, ut inquit Vossius, & Balæus; sed consecrassè Campanam illam, imposito ei S. Joannis nomine, ritu jam antea instituto: quamquam si hunc primò induxisset Joannes XIII. frustra heterodoxi garrirent. Ad 2. dicimus reprobasse Carolum Magnum consecrationem *Campanæ* peractam superstitionis quodam ritu, non recepto ab Ecclesia, ut animadvertit Vitus Amerbachius apud Roccam pag. 163. etsi fidei norma non sit a Carolinis Capitulis repetenda. Ad tertium reponimus benedictionem *Campanæ* dici *baptismum* lata significatione, quatenus idem est, ac ablutio, ut in exemplis productis supra pag. 293. non *baptismum* consecratum *forma* verborum, & sacramentum producens gratiam. Ad 4. respondemus in Campanarum baptismo non adhiberi *formam*, quæ Sacramentum constituit, nec instructionem & catechismum, ut recte

recte ait Bellarminus lib. 1v. de Rom. Pontif. cap. 12. Imponitur verò Campanæ nomen, ut quasi voce alicujus Sancti christiana plebs convocetur: benedicitur, & inangitur, inquit Durantus lib. 1. cap. 22. quemadmodum lapis, quem Jacob erexit in titulum, nempe quia consecratur in Dei cultum: extergitur lintco mundo in sacri olei venerationem: admittuntur denique in quibusdam Cataloniæ partibus, non tamen ubique, nec ex Pontif. Romani præscriptione, in hoc baptismo *patrini*, ut sacrorum signorum præsent custodibus, atque hi ea pulsant juxta Ecclesiæ consuetudinem, atque ob finem, pervulgato disticho expressum,

*Laudo Deum verum, plebem voco, congrego Clerum,  
Defunctos ploro, nimbum fugo, Festaque bonoro.*

## C A P U T XXIII.

*Quatenus baptismus ad salutem sit necessarius, & per  
votum, aut martyrium suppleri possit.*

**A**Mpla, ac perdifficilis foret præsens quæstio de Baptismi necessitate, nisi variis partibus harum lucubrationum pertractata esset, atque expedita. Nam antiqui hæretici, Cajani, Archontici, alique baptismum aquæ ad salutem necessarium denegantes, quibus accessere discipuli cujusdam Gandulfi Itali anno MXXXV. damnati in Synodo Atrebatensi, capite 1v. hujus libri exagitantur & refelluntur. Pelagiani negantes originale peccatum, & asserentes parvulos non propter salutem & propter vitam æternam, sed duntaxat propter regnum cælorum, quod perperam distinguebant a vita æterna, sacro baptismate esse abluendos, lib. x111. refutantur proluxa dissertatione. Calvinus, alique Novatores autumantes filios baptizatorum salvos fieri absque generationis lavacro, adultos autem justificari per solam fidem, eodem libro x111. cap. 4. & libro x1x. cap. 2. & 5. data opera revincuntur. Sociniani quoque nullum aliud baptismum necessarium affirmantes, præter institutionem atque doctrinam, confutantur cap. 1. & 4. hujus libri. Denique infantes salutem non consequi per solam fidem, votumque parentum, ut visum est nonnullis Catholicis, capite nono libri x111. secundo, tertio, & quarto libri xxx. necnon libri hujus duodevicesimo, satis, quantum arbitror, demonstravimus. Compendio itaque, ne sæpe eadem repetamus, nobis de necessitate baptismatis est pertractandum.

PROP. I. Baptismus omnibus *necessitate mediis*, & adultis, qui libero utuntur arbitrio, & Evangelicæ legis notitiam habent, etiam *necessitate præcepti*, necessarius est ad salutem.

Illud

## Liber Trigessimus primus. Cap. XXIII. 551

Illud enim necessarium est ad salutem *necessitate medii*, sine quo finis obtineri non potest. At sine baptismate sempiterna salus obtineri non potest. Ergo baptismus necessarius est ad sempiternam salutem obtinendam *necessitate medii*. Minor probatur 1. ex Scripturis: nam Joan. 111. 5. ait Dominus: *Nisi quis renatus fuerit ex aqua & Spiritu sancto, non potest introire in regnum Dei*. Ad Titum 111. 5. *Salvos nos fecit per lavacrum regenerationis, & renovationis Spiritus sancti*. 1. Petri 111. 21. *Quod & vos nunc similis formæ salvos fecit baptisma*: aliaque hujus generis in superioribus disputationibus producta & explicata. II. Confirmatur Ecclesiasticis definitionibus. Etenim in Concilio Palæstino, idest, Diospolitano Pelagius Ecclesiastico judicio *anathematizare compulsus est, infantes etiamsi non baptizentur habere vitam æternam*; ut refert S. P. Augustinus epist. 106. ad Bonifacium, nunc 186. ad Paulinum. Concilium Carthaginense 1v. in Epistola Synodica ad Innocentium, inter Augustinianas 90. nunc 175. prope finem hæc habet: *Quicumque negat parvulos per baptismum Christi a perditione liberari, & salutem percipere sempiternam, anathema sit*: & Tridentinum Concilium, ut cetera brevitas gratia prætermittamus, sess. v11. can. 5. ait: *Si quis dixerit baptismum liberum esse, hoc est, non necessarium ad salutem, anathema sit*. III. Corroboratur perpetua Patrum traditione. Cyprianus Epist. Lxix. aliàs v11. libri 1v. *Si Fide Trinitatis*, inquit, *mundatus non fuerit, in resurrectione apud sanctorum collegium immundus erit*: loquitur autem aperte de Sacramento visibili, subiciens, *asperersionem aqua instar salutaris lavacri obtinere*. S. P. Augustinus lib. 1. de Peccat. meritis cap. xv1. num. 21. *Quisquis ex concupiscentia carnis, & lege peccati & mortis carnaliter generatur, regenerari spiritualiter opus habet, ut non solum ad regnum Dei perducatur, sed etiam a damnatione peccati liberetur*: sicut enim per primum hominem in peccato & morte nascuntur, sic etiam per Christum in iustitia & vita æterna in baptismo renascuntur. Lib. 11. cap. 27. num. 43. *Sicut generatio carnis peccati per unum Adam in condemnationem trahit omnes, qui eo modo generantur, sic generatio spiritus gratiæ per anum Jesum Christum ad justificationem vita æterna ducit omnes qui eo modo prædestinati regenerantur*. Sacramentum autem baptismi profecto Sacramentum regenerationis est, &c. Chromatius Aquilejensis hom. in Matth. apud Justum Fontanini in Hist. Aquil. lib. 111. cap. 4. *Non potest quis gratiam doni celestis accipere, nisi prius purgatus fuerit ab omni sorde peccati per donum baptismi salutaris*. Laudantur hæc verba sub nomine Joannis Chrysostomi apud Gratianum de Pœnit. dist. 1. cap. 41. Fulgentius de Fide ad Petrum cap. xxv11. num. 68. *Firmissime tene, & nullatenus dubites, non solum homines jam ratione utentes, verum etiam par-*

*parvulos, qui sive in uteris matrum vivere incipiunt, & ibi moriuntur, sive cum de matribus nati, sine Sacramento sancti baptismatis, quod datur in nomine Patris, & Filii, & Spiritus sancti, de hoc seculo transeunt, sempiterno igne puniendos; quia etsi propria actionis peccatum nullum habuerunt, tamen originalis peccati damnationem carnali conceptione & nativitate traxerunt. Hæc ex innumeris Patrum testimoniis selegimus, quoniam singula inter canones dist. iv. de consecr. relata sunt; aliorumque Patrum consensio liquet ex præmissis dissertationibus.*

Probatur altera pars. Omnes quippe tenentur adhibere ea media, quæ ad consecutionem finis sunt necessaria; nec aliam, si ea media negligent, & aspernantur, habere possunt excusationem, nisi latæ legis invincibilem ignorantiam. Adulti itaque habentes liberæ atis usum, si illis annuntiatum sit Evangelium, præcepto fuscipiendi baptismatis obstringuntur. Comprehendi autem in Evangelica lege præceptum baptismi, constat ex cap. xxviii. Matth. *Euñtes ergo docete omnes gentes, baptizantes eos, &c.* ex praxi Apostolorum, Act. 11. 38. vii. 12. 36. ex Epistola prima ad Corinth. 1. 14. 16. quæ loca vindicavi ab interpretamentis Socinianorum supra pag. 295. & 297. Urget eadem loca prælaudatum Concilium Atræbatense cap. 1. ubi etiam hæretici, qui usurpabant lotionem pedum, baptismum, autem damnabant, gravi hac ratiocinatione revincuntur: *Quid sibi vult illa materialis aquæ alluvio, quæ lavandis pedibus invicem exhibere soletis? Nam si hoc ab Evangelio vos accepisse dicitis, ut quia Dominus discipulorum pedes lavans hoc illis exemplum reliquisse legitur, & vos quoque hujus rei gratia facere vos invicem dicatis; stultum est, imo sacrilegum cetera, & multo majora repudiare, quæ ab ipso rerum auctore Domino sunt constituta, ab Evargelio nuntiata, ab Apostolis tradita, sine quibus nostra salutis plenitudo non potest consistere: quæ quidem ipse Dominus & ante resurrectionem, & post resurrectionem discipulis suis servanda instituit.* Extat tom. xi. Concil. collect. Venetæ pag. 1154.

Opponent hæretici. I. Deus Gen. xv. 7. statuit pactum cum Abraham, & semine ejus, *fædere sempiterno*. Atqui hæc promissio per fidem spectat ad filios baptizatorum, ex Apostolo ad Rom. 14. 13. & 1x. 8. Igitur filii baptizatorum per solam fidem, & absque visibili Sacramento æternam promissionem poterunt adipisci. II. Ex eodem Apostolo ad Rom. xi. 16. filii credentium sunt *Rami* ex radice sancta pullulantes, & ex prima ad Corinthios vii. 14. sunt *sancti, & mundi*. Nulio ergo egent salutari lavacro. III. Act. x. 44. Cornelius, & omnes, qui audiebant verbum loquente Petro, nondum suscepto baptismate receperunt Spiritum sanctum. Non est ergo, necessarium ad sanctificationem & gratiam lavacrum aquæ. IV. Ec-  
clesia

eclesia priscis sæculis consuevit orare pro Catechumenis absque baptismo defunctis; ut constat ex Canone 79. Concilii IV. Carthaginensis celebrati anno 398. & ex canone 12. Concilii II. Arelatenensis celebrati anno 452. Ex veteri ergo disciplina Ecclesiæ pro Catechumenis istas preces & sacrificia offerentis, constat quamplurimos absque unda baptismatis salutem consequi.

Resp. ad primum nego consequentiam: nam quemadmodum Judæi procreati ex semine Abrahamæ participes non erant sempiterni fœderis, nisi accepto signo circumcisionis; ita filii credentium non sunt filii promissionis, nec reputantur in semine, nisi per expositionem corporis carnis sint consecuti Christo in baptismo: & sicut debebatur anima pueri incircumcisi de populo Dei, ob præscriptum legis, *Masculus, cujus præputii caro*, &c. ita excluditur a regno Dei quisquis non regeneratur baptismo, juxta Evangelicam sententiam, *Nisi quis renatus fuerit* &c. Vide supra lib. xxx. cap. 3. prop. 5. Ceterum Apostolus ad Romanos IV. loquitur adversus Judæos circumcisionem, legisque Mosaicæ observationem jactantes, demonstratque homines justificari *per fidem Christi*, minime seclusis Evangelicis institutis, virtutum operibus, & sacramentis, ut diximus disputantes de Justificat. lib. XIX. cap. 4. & 5. Ad 2. & 3. diximus lib. XIII. cap. 4. *radicem sanctam* esse religionem Christianam, & *ramos insertos* filios gentilium, baptismo regeneratos, qui appellantur *sancti* ob renascentiam spiritualem, & Sacramenti virtutem: unde poterit lector dicta eo loci repetere, aut rectè adire præstantissimum Augustinum lib. 2. de peccat. meritis & remis. cap. 25. & 26. Ad tertium respondeo, ex Cornelii factò nullum accedere heterodoxis præsidium; primò quoniam etiam Cornelius, alique gentiles jubente Petro baptizati sunt, eodem cap. x. 48. quare licet idem Cornelius ante visibile Sacramentum cum suis qui aderant acceperit Spiritum sanctum; verumtamen nec visibile Sacramentum contemni potuit, inquit Augustinus quæst. XXI. in Num. n. 9. Secundò, quoniam hoc in factò *singulari privilegio* sanctificatio præcessit baptismum, ac propterea id nihil derogat hujus Sacramenti necessitati; sicut nec tollitur necessitas circumcisionis, ex quo Abraham antea ipsam circumcisionem justificatus fuerit ex fide. Videatur S. Pater quæst. LXXXIV. in Leviticum, & serm. 269. num. 2. necnon lib. IV. de Bapt. cap. 24. Tertio, quia licet *elemosynæ mandaverint Cornelium ad quemdam modum, restabat tamen, ut tanquam cibis mundus incorporaretur Ecclesiæ*: ita Eximius Doctor serm. 149. num. 7. Tandem quia exorta dubitatione, utrum incircumcisi baptizandi essent, ideo accidit illapsus visibilis Spiritus sancti, ut ipsa rei magnæ attestazione perciperent ex circumcisione fideles, etiam in gentes effundi gratiam ejusdem Spiritus, & Petrus manifesta Dei virtute ani-



animatus regnum Dei nationibus aperiret. Traditur hæc ratio ab ipso Augustino serm. xcix. num. 12. ab Oecumencio pag. 99. in Acta & a præcitata Synodo Atrebatensi cap. 1. ac videtur certa, & planissima, modò conferatur cum Apostolicâ historia. Ad ultimum respondet, non ubique locorum viguisse consuetudinem orandi pro Catechumenis sine baptismo defunctis, & ubi id fuit in usu, pro iis Catechumenis oblatas preces, qui decessissent cum vehementi baptismatis desiderio.

PROV. II. Baptismus fluminis, idest, ardens baptismi votum, supplet in adultis, non autem in parvulis, qui per se votum illud nequeunt concipere, necessitatem baptismi fluminis, hoc est, aquæ.

Demonstratur prima pars ex Scripturis, quæ in Deum credentibus ac sperantibus, & eum ardenti caritate diligentibus salutem promittunt æternam. Legimus quippe Joelis 11. 32. Act. 11. 21. & ad Rom. x. 13. *Omnis, quicumque invocaverit nomen Domini, salvus erit.* If. xxv 11. 16. & ad Rom. x. 11. *Omnis, qui credit in illum, non confundetur.* Ps. l. 19. *Cor contritum & humilitatum Deus non despicies.* 2. Paralip. xxx. 19. *Dominus bonus propitiabitur cunctis, qui in toto corde requirunt Dominum Deum patrum suorum; & non imputabit eis quod minus sanctificati sunt.* Lucæ 11. 14. *Pax hominibus bonæ voluntatis.* Ex quibus constat remissionem peccatorum cum fide, & conversione ad Deum esse conjunctam, si voluntas humana vehementer expetat sacramenta, eaque ob rerum circumstantias elemento, aut ministris deficientibus, percipere reipsa non valeat; ut de Judæo quodam injecta arena baptizato dixi pag. 339. Accedunt definitiones Tridentinæ Synodi: quæ sess. vi. cap. 4. posteaquam justificationem describit, *ut sit translatio ab eo statu, in quo homo nascitur filius primæ Adæ, in statum gratiæ, & adoptionis filiorum Dei per secundum Adam Jesum Christum Salvatorem nostrum, addit, Quæ quidem translatio post Evangelium promulgatum, sine lavacro regenerationis, aut ejus voto fieri non potest, sicut scriptum est, Nisi quis renatus fuerit, &c.* Similia leguntur sess. vi 1. can. 4. de Sacram. in Gen. ubi pariter ad justificationem S. Synodus requirit præter fidem, a qua duntaxat hæretici justitiam repetunt, *aut sacramenta, aut saltem eorum votum.* Confirmatur propositio Patrum auctoritate. Sanctus enim Ambrosius in Oratione de obitu Valentiniani n. 51. inquit: *Audio vos dolere, quod non acceperis sacramenta baptismatis. Dicite mihi, quid aliud in nobis est, nisi voluntas, nisi petitio? Atqui etiam dudum hoc votum habuistis, ut antequam in Italiam venisset, initiaretur, & proxime baptizari se a me velle significavistis: & ideo præ ceteris causis me accersendum putavit. Non habet ergo gratiam, quam desideravistis? non habet quam poposcistis? Certe quia poposcistis, acceperis.* Plura ibidem ad rem nostram aptissima Præsul sancti-

Etissimus. Augustinus quoque lib. IV. de Baptismo cap. XXI. n. 29. affirmat, non tantum passionem pro nomine Christi id quod ex baptismo deerat posse supplere; sed etiam fidem, conversionemque cordis, si forte ad celebrandum mysterium baptismi in angustiis temporum succurri non potest. Et infra ait, sine visibili Sacramento impleri invisibiliter, quod ad Rom. x. 10. inquit Apostolus, Corde creditur ad justitiam, ore autem confessio fit ad salutem, quando mysterium baptismi non contemptus religionis, sed articulus necessitatis excludit. Et cap. xxv. ejusdem libri num. 32. scribit, aliud esse Sacramentum baptismi, aliud conversionem cordis, sed salutem hominis ex utroque compleri: nec si unum horum defuerit, ideo putare debemus consequens esse, ut & alterum desit, quia & illud sine isto potest esse in infante, & hoc sine illo potuit esse in latrone, complente Deo sive in illo, sive in isto, quod non ex voluntate defuisset. Cum vero ex voluntate alterum horum defuerit, reatu hominem involvi, & baptismus quidem potest inesse, ubi conversio cordis defuerit: conversio autem cordis potest quidem inesse non percepto baptismo; sed contempto baptismo non potest. Neque enim ullo modo dicenda est conversio cordis ad Deum, cum Dei sacramentum contemnitur. Habentur hæc omnia cap. Baptismi vicem, de Consecrat. dist. IV. num. 34. Etiam S. Bernardus Epist. LXXV. ad Hugonem Victorinum, Si quis voluerit, (inquit) & petierit baptizari, sed mortis præoccupatus articulo forte obtinere nequiverit, dum non desit fides recta, spes pia, caritas sincera, huic ego ob solam aquam, si defuerit, nequaquam, omnino possum desperare salutem, nec vacuum credere fidem, nec confundere spem, nec excidere caritatem, tantum si aquam non contemptus, sed sola, ut dixi, prohibeat impossibilitas. Productis deinde testimoniis Ambrosii & Augustini, Ab his duabus columnis, ait, difficile avellor; cum his, inquam, me aut errare, aut sapere fateor, credens & ipse sola fide hominem posse salvari cum desiderio percipiendi sacramenti; si tamen pio adimplendi desiderio mors anticipans, seu alia quacunque vis invincibilis obviaverit. Vide Bern. Tom. IV. pag. 118.

At in parvulis non suppleri baptismum per fidem, votumque parentum, ostendi lib. XIII. cap. 9. & hoc ipso, in quo versamur, cap. 18. Etenim aliena fides & caritas nihil in parvulis operatur, eosque relinquit a Deo aversos, pollutosque ea labe, quam contraxerunt generatione carnali, quoadusque abluantur, & renascantur per lavacrum spiritualis regenerationis. Eatenus quippe adulto sufficit fides, & caritas propria, quatenus per has potest Deo conjungi, & averti a peccato; cum ex adverso fides & caritas nostra nequeat, ut alibi dictum est, ad aliorum justificationem prodesse, nisi eis promerendo pios illos arbitrii motus, quorum incapaces sunt parvuli.

Ad hæc Christus instituit medium, per quod sancta mater Ecclesia possit fidem suam infantibus accomodare: ac medium illud est baptismus; in quo *os maternum* Ecclesia parvulis præstat, illosque parit quidem & enititur, sed *ex aqua*, tanquam ex alvo & matrice. Frustra itaque fidem præstaret suam, nisi regeneraret ex aqua; cum fides sit, quasi nifus, ac dispositio ad emittendum partum, baptismus vero sit regenerationis mysterium, & quasi uterus parientis. Recte Augustinus lib. 1. de peccat. meritis cap. xxiii. num. 33. *Nulla igitur ex nostro arbitrio, præter baptismum Christi, salus aterna promittatur infantibus, quam non promittit Scriptura divina, humanis omnibus ingenii præferenda*. Habet similia epistola 187. ad Dardanum num. 33. epist. 166. ad Hieronymum num. 10. & 25. lib. 3. de Origine animæ cap. ix. num. 12. & vi. contra Julianum cap. 1v. num. 10.

Oppones contra primam propositionis partem. S. Ambrosius serm. 3. in Psalmum 118. num. 14. & lib. de Myst. cap. 1v. num. 20. docet neminem consequi salutem, *nisi per Sacramentum baptismi*. Idem repetit lib. 2. de Abraham cap. xi. num. 79. & 84. ubi recitata Evangelii sententia, *Nisi quis renatus fuerit, &c.* inquit: *Nallum excipit, utique non infantem, non aliqua præventum necessitate*. S. P. Augustinus pluribus in locis negat Catechumenum justificari sine baptismo. Illustriora sunt Tract. 1v. in Joan. num. 13. & Tractatu xiii. num. 7. Ecclesia demum per quinque priora sæcula nunquam consequit sacrificia & preces offerre pro Catechumenis defunctis absque baptismo. Votum ergo baptismi nequaquam supplet ejusdem Sacramenti necessitatem.

Resp. Ambrosium, & Augustinum accipiendos de infantibus; atque de Catechumenis, qui cum sibi justi videantur, contemnunt Sacramenti virtutem; & in quibus licet sit fides aliqua, & etiam caritas initialis, cum non sit illa conversio cordis, quæ inesse non potest *contemnenti baptismum*, nec etiam est tale votum, quod salvet hominem jeopardata morte præventum. Atque hæc responsio constat ex præcatis Ambrosii, & Augustini testimoniis, atque ex iisdem tractatibus 1v. & xiii. in Joannem. Expedita ergo est via ad has, aliasque Patrum sententias percipiendas, si dicamus *baptismi* nomine comprehendendi etiam baptismi desiderium, quando necessitas excludit actualem ipsius perceptionem, ut in dist. 1v. §. 18. inquit Estius. Ob ipsam negligentiam, & contemptum Catechumenorum procrastinantium baptismum ad provectam ætatem, ut diutius improbis moribus indulgerent, jure canone 17. Concilii Bracarensis an. 563. aliisque Ecclesiæ statutis definitum est, ne Catechumeni illi decedentes absque sincera cordis conversione, fruerentur communionem sanctorum; atque hujusmodi disciplinâ consultum ceteris, ut quam-

quamprimum salutaribus undis expiarentur. Non fuit tamen hæc disciplina universalis, ut apparet ex præced. propositione.

Adversus partem alteram propositionis objicies: Fides adultorum supplet fidem in parvulis: Quare votum adultorum non potest supplere votum iisdem in parvulis? Deinde, nonne instituta circumcissione parvuli ante octavam diem decedentes salvabantur per vota parentum? Num fides suam modò vim, ac præstantiam deperdidit?

Resp. fidem adultorum non regenerare parvulos, id enim *aquæ & Spiritus sancti* proprium est; sed illis applicare *Sacramentum regenerationis*, sine quo fides aliena non prodest infantibus, & cum quo etiam sine fide aliena salvantur, ut dixi pag. 509. Idem ergo dicendum est de parentum voto, quod infantibus absque applicatione *Sacramenti visibilis* non potest spiritalem vitam, salutemque conferre. Accedit, quod nec adultis potest fides opitulari absque cordis conversione & caritate, quam habere nequeunt infantes. Quocunque ergo tempore originale peccatum *visibili Sacramento* oportuit expiari, ut cum Augustino scripsimus præcedenti libro xxx. pag. 23. & 59. ubi etiam de puerulis ante diem octavam demortuis, quando circumcissio obtinebat. Vide etiam supra cap. xvi. pag. 522.

PROP. III. Martyrium quoque supplet baptismi vicem, non tantum in adultis, verum etiam in parvulis.

Demonstratur I. ex Scripturis. Matth. enim x. 32. legitur: *Qui me confessus fuerit coram hominibus, confitebor & ego eum coram Patre meo*; & cap. xvi. 25. *Qui perdiderit animam suam propter me, inveniet eam*; quæ duo loca ingeniosè versans Augustinus lib. xiii. de Civit. Dei cap. 7. ait: *Nam quicumque etiam non percepto regenerationis lavacro pro Christi confessione moriuntur, tantum eis valet ad dimittenda peccata, quantum si abluerentur sacro fonte baptismatis. Qui enim dixit, Si quis non renatus fuerit ex aqua & Spiritu sancto, non intrabit in regnum celorum: alia sententia istos fecit exceptos, ubi non minus generaliter dixit, Qui me confessus fuerit coram hominibus, confitebor & ego eum coram Patre meo, qui in celis est. Et alio loco: Qui perdiderit animam suam propter me, inveniet eam. Hinc est quod scriptum est, Pretiosa in conspectu Domini mors Sanctorum ejus. Quid enim pretiosius quam mors, per quam sit ut delicta omnia dimittantur, & merita cumulatiùs augeantur?* II. Confirmatur thesis veterum traditione. Ac primo Auctor Constit. Apost. lib. v. cap. 6. pag. 304. hæc habet: *Qui vero martyrio dignus est habitus, lætitia in Domino effertur, quod tantam coronam nactus fuerit, ut per confessionem ex hac vita migret. Quamvis Catechumenus sit, sine tristitia excedat: passio enim pro Christo perlata erit ei sincerior baptismus; quandoquidem ipsa revera, & pe-*  
ricu-

*riculum faciendo, Christo commoritur: reliqui vero, hoc est, qui baptizantur, figura tantum.* Cyprianus Epist. lxxvii. ad Iubajanum de Catechumenis pro fide occisis inquit: *Sciant Catechuminos nec privari baptismi sacramento, utpote qui baptizentur gloriosissimo & maximo sanguinis martyrio, de quo & Dominus dicebat habere se aliud baptisma baptizari. Sanguine autem suo baptizatos, & passione sanctificatos consummari & divine pollicitationis gratiam consequi declarat in Evangelio idem Dominus, quando ad latronem in ipsa passione credentem & confitentem loquitur, & quod secum futurus sit in paradiso pollicetur.* Vide pag. postremæ edit. Ven. 286. Cyrilus Jerosolym. Catech. viii. Joanne Grodecio interprete pag. 60. hæc habet: *Redimens terram Salvator per crucem, & in latere vulneratus sanguinem & aquam emisit: ut alii quidem pacis tempore in aqua baptizarentur; alii vero tempore persecutionis in propriis sanguinibus. Quod vero etiam is recte baptismus vocetur, vide Salvatoris testimonium qui dicit: Potestis bibere calicem, quem ego bibam, & baptismo, quo ego baptizor, baptizari?* S. Basilius de Sp. S. cap. xv. pag. 178. edit. Morel. *Sunt nonnulli, inquit, qui in certaminibus pro pietate, revera pro Christo mortem perpepsi, nihil hujusmodi Sacramentis, quæ sunt in aqua, opus habuerunt ad salutem, nimirum in proprio baptizati sanguine.* Vertit Erasmus Christi mortem: sed habetur in Græco, *ὡς ἵπ' ἑαυτοῦ θάνατον.* Ambrosius prælaudata Orat. de obitu Valentin. num. 53. hæc habet: *Si quia solemnius non sunt celebrata mysteria, hoc movet: ergo nec martyres, si Catechumeni fuerint, coronentur: non enim coronantur si non initiantur. Quod si suo abluantur sanguine; & hunc (Valentinianum) sua pietas abluat, & voluntas.* Augustini locum insignem produximus paulo supra: testimonium aliud ex lib. iv. de Baptismo laudavimus præcedenti propositione. Vide & epist. 108. ad Seleucianam, nunc 265. num. 4. necnon lib. 2. de Anima & ejus orig. cap. xii. num. 17. Accedit tertio loco ratio convenientissima; siquidem ad Rom. vi. 3. legitur: *Quicumque baptizati sumus in Christo Jesu, in morte ipsius baptizati sumus.* Qui ergo pro Christo fundunt sanguinem, cum non tantum figura, sed etiam re, ac veritate referant Christi mortem, non baptizari tantum, sed baptizari baptismo gloriosissimo, maximoque dicendi sunt. Quæ sane ratio insinuat a D. Thoma q. 66. art. 12. atque præcatis Sanctorum sententiis fulcitur ac roboratur.

Tenent hæc omnia de infantibus pro Christo necatis; quoniam & hi proprio sanguine baptizantur: ad quod nec requiritur natiuitas ex utero; cum martyrium non sit secunda natiuitas supponens primam, & etiam in utero clausi possint in se recipere stigmata Christi, ut dixi Tom. i. pag. 96. Hinc Ecclesia semper infantes Bethlehemiticis tanquam martyres venerata est. Irenæus lib. iii. adver-

adversus hæc. cap. 18. ex distinct. Massuet. 16. num. 4. de puero Jesu ait: *In se infans cum esset, infantes hominum martyres parans, propter Christum, qui in Bethelem natus est Judæ, in civitate David, interfectos secundum Scripturas.* Ambrosius lib. 1. de Officiis Ministr. cap. xl. num. 213. *Quid de Bimulis loquar, qui ante palmam victoriam acceperunt, quàm sensum naturæ?* Et Epistola ad Horantianum xlii. num. 9. *Una mihi stella abundat pro omnibus, stella splendida & matutina: cujus ad exortum seminata est, non frugum, sed martyrum seges: quando Rachel ploravit filios suos, ut lacrymis ablutos suis, pro Christo offerret infantulos.* S. P. Augustinus lib. 111. de lib. arbit. cap. 23. num. 68. *Non enim frustra, inquit, etiam infantes illos, qui cum Dominus Jesus Christus necandus ab Herode quaereretur, occisi sunt, in honorem Martyrum receptos commendat Ecclesia.* Similia lib. x. de Gen. ad lit. cap. xxi. num. 39. in Psal. xlv. 1. nm. 5. ferm. 199. aliàs 34. de temp. num. 2. & ferm. 375. aliàs 9. ex Vignerianis, aliisque in locis. Consentiunt Patres universi, accedente auctoritate Ecclesiæ, & antiqua sanctorum Innocentium solemnitate; de qua plura Baronius in notis ad Martyrol. Romanum v. Kal. Jan. pag. Rom. edit. 631. Mitto brevitatis gratia Hymnum xli. Prudentii Cathemerinon: unde excerpti sunt quos canimus in Transfiguratione Domini, & in ipsa SS. Innocentium. solemn. die, atque in Epiphania ad Laudes. Adde H. x. *ἡ ἀρχὴ τοῦ ἡμετέρου*, ubi de Infante, qui cum Romano passus est, cecinit ipse Prudentius:

*Hic, hic bibendus, nate, nunc tibi est calix,*

*Mille in Bethelem, quem biberunt parvuli.*

Nec repetam epigramma Prosperi, de quo pag. hujus Volum. 294. Alii quoque, præter necatos ab Herode, puerulos Ecclesia tanquam Martyres veneratur; ut Modestum, & Ammonium, in Rom. Martyr. pridie Idus Februarias, pag. 89. decem alios Idibus Julii, pag. 343.

Ex his inferimus probabiliorē esse sententiā Theologorum illorum, qui censent Martyrium per se, atque, ut ajunt, *ex opere operato* efficax esse ad peccata abluenda. Id enim in primis evincitur ex martyrio infantium: in quibus *singulari quodam privilegio*, non per se martyrium contulisse salutem, affirmant quidem nonnulli, sed istud nullo valido argumento demonstrant. Deinde Augustinus supra laudatus disertè docet, *tantum* martyrium valere ad delenda peccata, *quantum* valet si quis abluatur *sacro fonte baptismatis*. Alii insuper præcitati Patres martyrium appellant *baptismum* lavacro aquæ *præstantiorem*, utpote in quo, *non figura*, sed *re* homines Christo commoriuntur.

Patitur tamen postremum assertum istud quasdam difficultates, quæ in oppositam sententiā viros celebres pertraxerunt. Ac prima

ma

ma est, quod ex Apostolo in priori ad Corinthios xiiii. 3. tradere corpus ad flammam ei, qui caritatem non habeat, *nihil prodest*; S. quoque Thomas 3. p. q. lxxv. art. 12. ad 2. negat effusionem sanguinis habere rationem martyrii, *si sit sine caritate*. Præterea Cyprianus Epist. lxi. ad Cornelium pag. 172. eos redarguit, qui absque Sacramentis subeunt martyrium, dicentes: *Qui martyrium solus, sanguine suo baptizatur*. Idemque docet scribens ad Hugonem S. Bernardus. Accedit, quod si martyrium *ex opere operato*, conferret gratiam, foret inter sacramenta connumerandum. Tandem imbecillis videtur ratio petita ex infantium martyrio, cum priusquam iussu Herodis occiderentur, sanctificati fuerint circumcisionis mysterio.

Verum his facile occurritur. Ad Apostoli enim auctoritatem dico, requiri ad martyrium caritatem in adultis, tanquam dispositionem ad gratiam, quemadmodum requiritur fides, & cordis conversio; præsertim cum mors, corporisque cruciatus nequeant dici *martyrium*, nisi pro Christo, ejusque honore perferantur. Hinc autem non consequitur martyrium non esse *per se* efficax ad peccata delenda; nam & fides, & initialis amor, & cordis conversio requiritur in adultis ad baptismum, cum nec Sacramentum accipientibus prodest, *nisi intrinsecus vera conversione mutantur*, auctore Augustino lib. iv. de Baptis. cap. 3. num. 4. Hæc autem non valere de pueris, qui solo originali peccato, non voluntatis propriæ irretiti sunt culpâ, manifestum arbitror ex capite sextodecimo. Nec aliam esse mentem Doctoris Angelici, inferitur ex q. 87. art. 1. ad 2. ubi docet passionem pro Christo susceptam obtinere vim baptismi, & purgare ab omni culpa, *nisi actualiter voluntatem peccato inoenerit inharentem*; nec aliter docet præcit. quæst. lxxv. art. 12. in Corp. ubi inter baptismum flaminis, & sanguinis hoc statuit discrimen, quod in illo passio Christi operatur *per quamdam affectionem*, in isto autem *per imitationem operis*. Dirimit verò difficultatem, quod scribit ad Annibaldum in iv. dist. 4. art. 4. ubi cum tertio loco objecisset, *Baptismus sanguinis habet efficaciam solum ex opere operante, unde sine caritate non prodest. Sed in pueris nihil habet efficaciam ex opere operante, quia usum liberi arbitrii non habent. Ergo in his baptismus sanguinis non supplet vicem baptismi*; cum, inquam, id objecisset, respondit: *Ad tertium de baptismo sanguinis dicendum, quod baptismus sanguinis non habet supplere effectum baptismi flaminis ex opere operante, sicut objiciebatur; sed ex imitatione passionis Christi; unde de martyribus dicitur, Apoc. vii. Laverunt stolas suas in sanguine Agni*. Ad Cypriani & Bernardi testimonia dico, eum, qui properat ad martyrium, debere se se Ecclesiæ Sacramentis munire, si possit; quoniam, ut dictum est supra cum Augustino lib. iv. de Bapt.

Bapt. cap. XXI. n. 29. non est sincera pietas, animique conversio; *ubi contemnitur Sacramentum, quod ministrorum opere corporaliter adhibetur*. Quod sequitur, hoc pacto diluitur: Sacramentum exhibetur *Christi nomine*, & constat *rebus ac verbis*; ideoque martyrium, in quo deest utrumque, non est verum, propriumque Sacramentum. Ad postremum dico invictum esse argumentum, quod promittitur ex Innocentium cæde; tum quia inverisimile est omnes fuisse circumcisos, cum interfecti fuerint quotquot *erant in Bethlehem, & in omnibus finibus ejus, a bimatu, & infra*, Matt. 11. 16. tum quia Ecclesia non eos tantum commendat tanquam regeneratos, sed etiam tanquam *in honorem Martyrum receptos*, eos appellans *primam Christi victimam, tenerum gregem immolatorum*, & frequenter de illis repetens: *Laverunt stolas suas in sanguine Agni*, Apoc. VII. 14.

## C A P U T XXIV.

*Notationes quædam in postremam de Martyrio propositionem.*

**S**upponunt quæ modo asserui *de baptismo sanguinis*, aliquam saltem de vero Martyrio notitiam, eamque servata brevitate, quam postulat liber ad extrema progrediens, tradere nonnullis notationibus excogitavi. Erit autem notatio prima de *Martyrii* vocabulo, atque etymologia. *Martyrium* Græce, Latine *testimonium* dici a verbo *μαρτυρία, testis sum*, norunt omnes. Ubi legimus Mat. XXIV. *In testimonium omnibus gentibus*, Joan. 1. 7. *Hic venit in testimonium*, aliisque in locis compluribus, habent ubique Græci *ὁ μαρτυρῶν*. Hinc *Martyr* proprie testem significat: unde Aët. 1. 8. habet Versio nostra, *Ericis mihi testes*, & Græca, *ἑρῆδι μὲν μαρτυροῦντες*: atque Apocalypsis 1. 5. illa, *Qui est testis fidelis*; hæc vero, *ὁ μαρτυρῶν*. Eam ob rem *Martyres* illos appellamus, qui propter testimonium Christi mortem oppetierunt. Præclare Augustinus serm. IX. in Psal. 118. num. 2. *Testimonia Græce martyria nuncupantur, quo verbo jam utimur pro Latino*: unde illos, qui propter testimonium Christi diversis passionibus humiliati sunt, & usque ad mortem pro veritate certarunt, non *Testes*, quod Latine utique possemus, sed *Græce Martyres* appellamus. Nec aliter Ammianus lib. 27. Isidorus lib. 7. cap. 11. Du-Cangius in Glossario, Vossius in Etymologico, Du-Mortier in Etymologia sacra, & alii. Cyprianus tamen Epist. XXXVII. pag. 115. *Martyres* vocat etiam Confessores morientes in carcere: & Epist. LII. ad Antonianum pag. 151. de Cornelio nondum *martyr*.  
T6.VI. B b b b rio



rio ejus consummato inquit: *Nonne inter Confessores & Martyres deputandus, qui tantum temporis sedit expectans corporis sui carnifices, & tyranni ferocientis ultores?* Ad omnem vero ambiguitatem tollendam, quidam distinguunt inter Confessores, & Martyres, ut *Confessores* sint, qui coram tyrannis confessi Christum, tormentis superstitibus obierint tranquillam mortem; ac *Martyres*, qui ad mortem usque cum suppliciis decertant. At modò *Confessores* eos dicimus, qui absque martyrio, singulari exercitatione virtutum Deum sunt confessi: Martyres verbò alios *designatos* appellamus, quibus sententia mortis indicta est: *consummatus* alios, qui vitam in tormentis profundunt; alios *vindicatos*, quorum felix exitus discussus, & approbatus est ab Ecclesia; atque id luculenter tradit lib. 1. de Servorum Dei beatificatione & Beatorum Canonizatione cap. 2. Scriptor nostri ævi doctrina, eruditione, dignitate ter maximus. Appellabantur olim *Martyres* etiam qui innoxii quacunq; ex causa necabantur, ut Carolus cognomento simplex, Eadwardus rex Angliæ, & Dagobertus rex Galliarum, apud illustrem Mabillonium Præf. 2. in sæculum 111. Benedictinum num. 9. alique plurimi apud Dufresne Tom. 2. pag. 471. A Martyrum nomine etiam sacræ ædes, ac templum constructum in Martyrum memoriam, necnon altare Martyrum impositum cineribus, dictum fuisse *Martyrium*, rectè observatum est a Walfrido Strab. lib. de rebus Eccles. cap. 6. Altaria constructa supra martyrum tumulos commemorant Gesta Pontificum in Felice primo, Hieronymus adversum Vigilantium Tom. IV. pag. 284. Augustinus lib. XXI. de Civit. Dei cap. 10. Prudentius hymno X. aliàs IV. *pro passionem*, sive de Passione S. Hyppoliti, alique permulti: de quibus legi poterit vir eruditus Joan. Chrysof. Trombelli Abbas Congregationis Rhenanæ dissert. VII. de Cultu SS. cap. 37.

## II.

Dixi quid sit *martyrium*: modò agam *de martyrii causis*. Ac prior causa martyrium inferens est persecutor; nemini quippe fas est fœmetipsum occidere. Nam Matth. x. 17. de Martyribus suis inquit Christus: *Tradent enim vos in Conciliis, & in synagogis suis flagellabunt vos; & ad præsidēs & reges ducemini propter me, in testimonium illis, & gentibus*: quibus in verbis martyribus afflictiones, tyrannis affigendi potestatem tribui scribit Chrysostomus Homil. XXXIV. pag. 325. Petro etiam Joan. ult. 18. ait Salvator: *Cum senueris, extends manus tuas, & alius te cinget, & ducet quo tu non vis*: quæ expendens S. P. Augustinus Tract. LI. in Joan. num. 10. ait: *Satis expressit, non a seipso, sed ab alio debere occidi, qui vestigia sequitur Christi*. Idem Augustinus lib. 1. contra Gaudentium Donatist. cap. xxx. num. 34. refellit Circumcellionum spontaneam mor-

mortem scribens: *Non est hoc consilium, sed furor; non est sapientia, sed amentia.* Proximo cap. xxxi. expendit factum Raziae, qui sese praecipitavit e muro, 2. Machab. xiv. 43. demonstratque hinc nullo pacto spontaneam mortem laudari, eo quod Razias non *habuit liberam fugam*; additque laudari, *quia fuit amator civitatis*, non quod sancte se gesserit, animadvertens legi in sacra historia, occubuisse illum *viriliter*, ac *nobiliter*: quibus verbis laudamus *viros fortes hujus seculi, non martyres Christi*. Etiam de Civit. Dei lib. i. cap. xxii. & seqq. probat occisionem voluntariam ad magnitudinem animi non pertinere, & Catoni Marcum Regulum praefert: ac Feminas sanctas, quæ occiderunt se, ut devitarent pudicitiae suæ infectatores, non alia ratione excusat, nisi quia *hoc fecerunt non humanitus deceptæ, sed divinitus jussæ; nec errantes, sed obedientes; sicut de Samfone aliud nobis fas non est credere.* Lege & Ambrosium lib. i. de Virg. cap. vii. num. 32. ac notas ibidem appositas. Nec inter Martyres vere connumerantur, qui aut martyrii desiderio flagrarunt, aut acerbissimum animi dolorem iusta ex causa fuerunt experti; quamvis *martyres analogia quadam* dicantur, & juxta caritatis ardorem sint præmium a Domino consecuti. Deest quippe in iis exterior passio, quæ fidei exhibuerit *testimonium*, singularis nota, & character martyrii, ut comprobat ipsum *martyrii* nomen. Eos etiam, qui inserviando laborantibus pestilentia, illa inficiuntur & oheunt, ut constat ex Sancto Aloysio Gonzaga, Ecclesiae martyribus non accenset, quoniam illos infecti non proprie necant in fidei odium immanitate sua, animique proposito; sed pestifero halitu afficiunt morte, quam causa naturalis infligit. Quare sententiam Theophili Raynaudi de martyrio *per pestem* oppugnaverunt posteriores Theologi; nec defendi potest, nisi Fidei Persecutor servitio peste laborantium addiceret Christianum hominem, ut contagione attracta periret.

De variis pœnarum generibus, sive *instrumentis martyrii*, non opus est differamus. Ea sub oculis statuerunt pictis quoque imaginibus Gallonius in libro de sanctorum Martyrum cruciatibus, Versteeganus in Theatro crudelitatis hæreticorum, atque in picturis suis ad Romanum templum *Rotundum* S. Stephani, & ad Collegium Anglorum, Nicolaus Circinianus. Conspiciuntur ibidem Martyres damnati ad bestias, consumpti flammis, saxis obruti, verubus, sudibusque transfixi, affectique suppliciis aliis terribis, quæ modò vix nomine nota sunt; *numellis*, idest, ligneis machinis, in quorum foramina immittebantur, ibique constringebantur pedes & colla: *trocbleis*, ligneis scilicet tractorii generis; *uncis*, idest, hastis instructis retorto ferro: *ungulis*, scilicet, forcipibus excavatas habentibus extremas partes; *sartagine*, patella nempe, oleo, pice,

ac sulphure plena: *scorpionibus*, nimirum virgis vulnera arcuata infligentibus: *plumbatis*, hoc est, flagellis, quorum loris, aut catenulis alligabantur plumbeæ glandes; & *equuleis*, sive machinis ad modum equi compactis, ubi varie martyres, reique excruciantur. Quæ vocabula, notioribus missis, in gratiam tyronum descriptionibus hisce posuimus. Qui in suppliciis moriuntur, sunt, ut diximus, martyres *consummati*: si supravixerint, ut Joannes Evangelista, Tecla, Felix Nolanus, & quos laudibus profecutus est Cyprianus epist. 111. tanquam martyres non habentur, nisi certissime constet illos mortem divinitus evasisse, nec superatis tormentis excidisse a caritate & a gratia. Solet propterea Ecclesia in istiusmodi Martyribus virtutum potius præstantiam, earumque ad obitum usque perseverantiam inquirere, quàm non expletam consummatamve passionem; servavitque hanc disciplinam adscribens Beatorum albo Iosephum a Leonissa post *unci* cruciatus superstitem, ætate nostra, anno scilicet MDCCXXXVII. a Clemente XII. P. M. tali honore condecoratum.

Sequitur *causa motiva*, sive ad martyrium impellens, de qua Augustinus serm. 285. in Natali SS. Casti, & Aemilii, num. 2. & serm. 1. in Psalm. xxxiv. num. 13. ait, *Martyres non facit pœna, sed causa*; quæ verba in prologium transiere. Ac prior ex parte martyris causa est *fides*, sive Christianæ religionis universim, quam fidelis profiteatur coram persecutore pagano; sive unius duntaxat articuli, quem propugnet contra hæreticos vir Catholicus. Nam Martyres, ut diximus, *testes* Christi sunt; de quibus ipse Dominus Lucæ xii. 8. *Omnis, quicumque confessus fuerit me coram hominibus, & filius hominis confitebitur illum coram Angelis Dei*. Act. v. 41. de Apostolis legitur: *Digni habiti sunt pro nomine Jesu contumeliam pati*. Et Petrus Epist. 1. cap. iv. 15. 16. ait: *Nemo autem vestrum patiatutur ut homicida, aut fur, aut maledicus, aut alienorum appetitor. Si autem ut Christianus, non erubescat: glorificet autem Deum in isto nomine*. Hinc Augustinus in Psalm. 111. num. 9. *Martyres perdidit animam suam, inquit, fidem ne amitterent*. Et Ecclesia universa, *Hic est vere Martyr, qui pro Christi nomine sanguinem suum fudit*. Appellatur propterea Stephanus *Protomartyr*, quia, ut idem Augustinus ait serm. 314. num. 2. *Pro Christo primus sanguinem fudit*. Alia martyrii causa est, cujuscunque virtutis officium, quod Deus requirat, ideoque virtutem illam exercens, & pro ejus defensione tradens animam, factis testatur se verum Deum profiteri, ejusque cultum tenere. Quare Matt. v. 10. *Beati dicuntur, qui persecutionem patiuntur propter justitiam*. Ideo Ecclesia, tanquam Martyrem veneratur S. Joannem Baptistam occisum, *Pro lege quidem veritatis, pro æquitate, pro justitia; sed non tamen pro illo*

## Liber Trigesimus primus. Cap. XXIV. 565

*illo nomine, quo Christiani sumus*, ait S. Pater in Ps. cxi. n. 26. Per multa exempla SS. Martyrum, qui propter virtutem aliquam occubuerunt, proferunt Cardinalis de Lauræa disput. xx. in 3. p. art. 7. & Sylvius in 2. q. 124. art. 5. plura, & exquisitiora BENEDICTUS XIV. lib. iiii. cap. 19. Atque ex his constat accensendum non esse martyribus illum, qui aut pro veritate, quæ ad fidem credendorum, agendorumque regulam non attinet, aut pro peculiari revelatione sibi facta, aut pro qualicumque dogmate nondum definito ab Ecclesia, oppeteret mortem. In primo enim casu religio, cultusque Dei non apparet: in reliquis deest Ecclesiæ auctoritas, quæ nobis unice exhibet normam fidei, ut ostendimus libro xxi. cap. 2. Docuit propterea sapientissimus Pontifex eodem cap. n. 14. non fore martyrem, qui vitam pro illibata Virginis Conceptione profunderet: quod ex dictis infertur manifesta consecutione. Mirum, quanta hinc moliantur, qui votum alicubi pro ea sententia propugnanda, effuso quoque sanguine, emissum aut defendunt, aut oppugnant. At Benedictus eos, qui hac de causa subirent mortem, optime negat futuros Martyres; de voto autem illo nihil pronuntiat. Consilium autem est mihi hanc imitari prudentiam, quod illa de Conceptione Virginis disceptatio non pertineat ante Ecclesiæ definitionem ad questionem Martyrii, aliosque invenerit aut magis pios, aut magis credulos tractatores. Quæ dixi de causa ex parte martyris, eadem dicenda videntur de causa martyrii ex parte persecutorum. Permovei itaque hi debent aut odio fidei, aut patrocinio iniquitatis: ideoque tyranni non tantum pagani, idolorumque cultores, verum etiam iniqui Christiani, necnon sanguine conjuncti, esse possunt. Dictum a Domino Matt. x. 18. *Ad præfides, & ad reges ducemini propter me*; deinde versu 21. *Tradet autem frater fratrem in mortem, & pater filium*. Priora verba a Patribus referuntur ad persecutores Gentiles; postrema vel ad seductores hæreticos, vel ad malos improbosque Christianos. Videbis Chrysostomum Hom. xxxiv. pag. 325. edit. Commel. Hieron. tom. iv. pag. 37. Augustinum in Psal. ix. num. 27. & lib. xvi. de Civit. Dei cap. 32. ubi S. Pater omnia persecutorum genera enumerat.

Causa denique *finalis* est Dei gloria, ad quam referenda virtutum opera, diximus alio in loco. Ajebat de pseudomartyribus Augustinus Epist. 185. num. 8. *Insaniant qui dividunt membra Christi, & exsufflant sacramenta Christi, & de persecutione gloriantur; & jactant fallaciter, innocentiam suam, & quam non possunt a Domino accipere, ab hominibus querunt Martyrum gloriam*. Neminem præterea latet quod de captantibus laudes hominum scriptum est Matth. vi. 5. *Receperunt mercedem suam*.

## III.

In proximo est, ut agam de *dispositionibus*, quæ requiruntur in Martyre. Harum prima est *aut baptismus, aut saltem baptismi votum*; de quo plura propositione 2. præcedentis capitis. Altera est *libera acceptatio mortis*; cum nemo mereri, & coronari possit invitatus. Tertia est *Ecclesiæ unitas*; de qua Cyprianus lib. de Unit. Ecclesiæ pag. 401. sermonem de iis instituens, qui sunt extra Ecclesiam, *Tales, inquit, etiam si occisi in confessione nominis fuerint, macula ista nec sanguine abluuntur*: & post pauca, *Esse martyr non potest, qui in Ecclesiâ non est*; ac rursus: *Ardeant licet flammis & ignibus traditi, vel objecti bestiis animas suas ponant; non erit illa fidei corona, sed pœna perfidia, nec religiosa virtutis exitus gloriosus, sed desperationis interitus*. Similiter Augustinus præter verba paullo supra laudata ex Epist. 185. inquit Epistola alia, idest, 173. num. 6. *Foris autem ab Ecclesiâ constitutus, & separatus a compage unitatis, & vinculo caritatis, aeterno supplicio puniretur, etiam si pro Christi nomine vivus incenderetur*. Atque libro IV. de Baptismo cap. XVI. num. 24. recitata altera Cypriani scribentis ad Jubajanum sententia, *Neque baptisma hæretico prodest, quamvis Christum confessus extra Ecclesiâ fuerit occisus*, subjicit Augustinus: *Hoc verissimum est; extra Ecclesiâ quippe occisus caritatem non habuisse convincitur*. Accedit quod, sicut olim extra arcam Noe, ita modò extra Ecclesiâ non datur salus. In martyre præterea requiritur *caritas*, non quidem *habitualis*, nec adeo vehemens, quæ secum trahat gratiam sanctificantem, sed quæ dicat *sincerum aliquem affectum erga Deum*, ut cum Nostratibus docet Sylvius 2. p. q. 124. art. 2. Inquit enim Apostolus 1. ad Corinth. XI. 11. 3. *Si tradidero corpus meum ita ut ardeam, caritatem autem non habuero, nihil mihi prodest*: quibus allatis, S. Pater serm. xv. de verbis Apostoli, nunc 169. cap. 12. num. 15. ait: *Si ergo ille non potuit tanta perferre sine amore, nec tu poteris communicare Christi passionibus sine amore. Sed quæro, quo amore? Non sit cupiditas, sed sit caritas*: paucisque interjectis, *Si in te fuerit caritas Dei, communicabis Christi passionibus, & verus eris martyr, in quo caritas coronatur*. Item sermone 138. num. 2. *Ecce venit ad passionem, ecce venit ad sanguinis fusionem; & tamen nihil prodest, quia caritas deest*. Similia citato libro IV. de Baptismo num. 24. Nec aliter docuit sanctus Thomas; nam 2. p. q. 124. art. 2. demonstrat martyrrium esse quidem *actum fortitudinis*, sed a caritate dirigi, atque *imperari*: ac 3. p. q. 66. art. 12. ad 2. *Effusio sanguinis, inquit, non habet rationem martyrii, si sit sine caritate*. Quantum tamen spectat ad Ecclesiæ iudicium, ipsa vitæ profusio est maximum caritatis argumentum; quum nullam rem habeamus vitæ pretiosiorē, cujus contemptu manifestari possit dilectio

Elo

Etio Dei. Requiritur insuper in martyre, qui antea lapsus sit, ut Deo per Sacramentum Pœnitentiæ reconcilietur, si adsit copia Confessarii; sin autem, de patrato scelere conteratur, nec ullatenus sive lapsus sit, sive justus, Christi Sacramenta contemnat. Cujus rei petitur ratio ex supradictis; quoniam juxta Augustinum lib. iv. de Baptismo cap. 22. non est interioris hominis pietas, ubi contemnitur Sacramentum. Accedit ratio altera, quam insinuat Cyprianus Epist. xiv. pag. 172. quoniam idoneus esse non potest ad martyrium, qui ab Ecclesia non armatur ad prælium; & mens deficit. quam non recepta Eucharistia erigit, & accendit. Consimilis est ratio subsequens S. Martyris: Quomodo potest ad confessionem paratus & idoneus inveniri, qui non prius pace accepta receperit Spiritum Patris, qui corroborans filios suos ipse loquitur, & confitetur in nobis? Has tamen dispositiones non esse necessarias in parvulis, qui vel recens nati, vel etiam in uteris matrum in odium fidelis trucidantur, constat ex capite præcedenti.

IV.

Martyrio coronari non posse hæreticos & schismaticos, inferatur ex tertia conditione, scilicet, unitate, & ex iis, quæ precedenti numero ex Cypriano & Augustino protulimus. Addimus modò cap. Firmissime, de hæreticis 3. depromptum ex Fulgentio de Fide ad Petrum, cap. 39. pag. Rom. edit. 497. Firmissime tene, & nullatenus dubites, omnem hæreticum vel schismaticum, quamvis pro Christo sanguinem fundat, cum diabolo, & angelis ejus participandum, nisi ante finem hujus vitæ, Catholica fuerit incorporatus, & redintegratus Ecclesiæ. Quisquis ergo extra unitatem est, occidi potest, coronari non potest; inquit cit. pag. 172. Cyprianus. Nulla itaque habenda est ratio illorum martyrum, quos Donatistæ olim, deinde Anabaptistæ, ceterique hæreticorum enumeraverunt, nec promeretur martyrii laudem hæreticus, si pro aliqua veritate neceretur; si quidem cum veritatem illam non profiteatur ob auctoritatem Ecclesiæ, ac proinde veram non habeat fidem, ut ostendi libro XXI. 10. neque continet occisio illa veræ fidei testimonium. Aliquod tamen donum Dei agnoscit Augustinus lib. de Patient. cap. xxvii. num. 24. in eo, qui ab Ecclesia separatus, non pro errore, qui eum separavit, sed pro veritate Sacramenti, seu verbi, quæ apud eum remansit, timore pœnarum æternarum pœnas patitur temporales. At num. proximo distinguit S. Pater inter dona filiorum illius Jerusalem, quæ sursum libera est mater nostra; & inter dona alia, quæ possunt accipere etiam filii concubinarum, quibus Judæi carnales, & schismatici vel hæretici comparantur. Atque donorum istorum discrepantiam accurate Augustinus exponit hereditate Isaac, & muneribus ab Abramo collatis Isaac, Gen. xxi, 10. Hinc infer-

fert,

fert, patientiam illam *hominis separati* ab Ecclesia donum Dei quidem esse, sed donum absque caritate, & absque arrha sempiternæ retributionis; *donum* scilicet, inquit ille, *exheredatorum, non heredum*. Quare Augustiniana illa de dono patientiæ doctrina evertitur potius, quàm statuatur martyrium in hæresi vel schismate commorantium.

## V.

Adhibuit propterea quovis tempore Ecclesia maximam diligentiam ad veros a falsis martyribus discernendos, ut Mabillonius Præf. 2. in sæcul. v. Benedikt. num. 93. Ruinartius Præf. in Acta Martyr. n. 71. aliique viri clarissimi commonstrarunt. Hujus diligentiae principio argumentum sunt characteres, & notæ a priscis fidelibus insculptæ aut appositæ Martyrum tumulo, signum crucis, Christi nomen monogrammate expressum, palmæ, columba cum ramusculo olivæ, vitrea aut figlina vasa cum sanguine, instrumenta martyrii, aliaque plura; de quibus legendi Severanus, Bosius, Aringhus. Accedit cura Notariorum in consignandis, pervestigandisque Actis Martyrum, jam a Clementis I. temporibus; scribente sectione IV. Anastasio: *Hic fecit septem regiones dividi Notariis fidelibus Ecclesiæ, qui gesta martyrum sollicite & curiose unusquisque per regionem suam diligenter perquirerent*. Similia in libro Pontificali ex vetustissimis monumentis concinnato, ut differt. 111. tom. 1. Antiq. Eccl. demonstrat Em. a Schelestrate, & in Examine ejusdem libri Joannes Ciampinus: eademque ibidem leguntur de Antero, & Fabiano. Præterea etiam Patres hanc in colligendis actis martyrum diligentiam commendaverunt. Cyprianus epist. 37. pag. 155. *Dies, inquit, quibus excedant, annotate, ut commemorationes eorum inter memorias martyrum celebrare possimus*. Et Pontius Cypriani Diaconus apud Ruinart. pag. 179. *Majores nostri plebeis, & catechumenis martyrium consecutis tantum honoris pro martyrii sui veneratione dederunt, ut de passionibus eorum multa, aut, prope dixerim, penne cuncta conscripserint*. Profert Bencinus in not. ad Clementem. tom. 2. Anast. pag. 42. etiam Tertullianum scribentem de Corona milit. cap. 13. *Habes tuos census, tuos fastus; nihil tibi cum gaudiis sæculi*. At ibi, ni fallor, de libro vitæ, non de martyrum catalogis fit sermo. Insuper ad memoriam martyrum servandam, consueverunt olim aliæ Ecclesiæ ad Romanam Acta transmittere: ut de Actis S. Benigni Discipuli Polycarpi demonstrat in absolutissimo, ac sæpè laudato Opere de Canon. SS. lib. 1. cap. IV. num. 15. Prosper Cardinalis Lambertinus, & præcitata Præfat. 2. ad v. sæculum Bened. Joannes Mabillon ex Actis S. Virgilio Episcopi Tridentini, quod martyrium subiit Consulibus Aureliano, & Stilicone, idest, anno 400. Sunt ejusdem diligentiae inivictum argumentum, tum epistolæ

encyclicæ, quibus una Ecclesia aliis suorum Martyrum gesta significabat; qualis est Epistola Ecclesiæ Smirnenfis de Martyrio Polycarpi, apud Eusebium lib. iv. H. E. cap. 15. pag. edit. Valesii 135. & Epistola Ecclesiarum Viennenfis & Lugdunensis de Martyrio S. Pothini; aliorumque complurium apud Ruinart pag. 52. tum etiam recitatio nominis Sanctorum Martyrum *ad altare*, prout ex *Ecclesiastica disciplina* fidelibus nota, tradit serm. 17. de verbis Apost. nunc 159. n. 1. præstantissimus Augustinus. Idem inferitur ex sollicitudine, quæ Ecclesia dedit operam, ne apocrypha Martyrum acta pro genuinis intruderentur. Degradatum enim in Asia a Joanne Apostolo presbyterum, qui commentus est acta quædam Pauli, innuit in lib. de Bapt. cap. 17. Tertullianus. Lucillam factiosam feminam reprehensam a Cæciliano Archidiacono, quoniam ante Eucharistiam, *os nescio cujus Martyris, si tamen Martyris, libare dicebatur*, (Martyris scilicet ab Ecclesia non vindicati,) narrat lib. 1. contra Parmenianum, num. 16. sanctus Optatus. Vagos, otiososque, *qui membra Martyrum, si tamen Martyrum, venditant*, carpit Augustinus de Opere Monach. cap. 28. num. 36. Gelasius in Romana Synodo an. 494. de apocryphis actis Martyrum ait, *Secundum antiquam consuetudinem singulari cautela in Romana Ecclesia non leguntur, quia & eorum qui conscripsere nomina penitus ignorantur, & ab infidelibus, aut idiotis superflua aut minus apte, quam rei ordo fuerit, scripta esse putantur*. Quinifexta, sive Trullana Synodus anno 692. can. 63. de confectis Martyrum historiis, *In Ecclesia, inquit, non publicari jubemus, sed eas igni radi*. Vide in hunc canonem Christianum Lupum P. 2. pag. vet. edit. 978. S. Martinum Turonensem Episcopum, ut narrat Sulpicius Severus in ejus vita cap. 8. falsi cuiusdam Martyris detexit larvam, cultumque prohibuit. Vide alia hujusmodi exempla apud Mabillonium, & Ruinartium prælaudatis in locis.

# VI.

Ex his consequitur haud immerito gloriari Ecclesiam de veracitate, ac immensa propemodum multitudine suorum Martyrum. Postquam temerario ausu hanc studuit evertere Henricus Dodwellus dissert. xi. Cyprianica; hominis audaciam, erroremque castigarunt viri præclari, Pagius ad an. LXIV. num. 3. Ruinart Præf. in Acta Martyrum, Ludovicus Muratori Tom. 2. Anecd. pag. 199. ubi vindicat Catalogum Martyrum, qui Romæ sub Gregorio Magno quiescebant, BENEDICTUS Papa XIV. lib. 1. cap. 1v. num. 14. & lib. 111. cap. 20. num. 10. Nos vero hæc pauca adversus Dodwellum proferimus. Principio legimus Apocalyp. vii. 9. *Vidi turbam magnam, quam dinumerare nemo poterat, ex omnibus gentibus, & tribubus, & populis, & linguis: stantes ante thronum, & in conspectu*



*specū Agni, amīcī stolis albis, & palma in manibus eorum*: quibus verbis designari Martyres, qui obtulerunt, *ὡς τὸ δίδωκεν τὸ ἰδίον αὐτῶν ἱμῶν, pro Magistro sanguinis proprii effusionem*, non solum scribunt antiqui Interpretes, Andreas Cæsarensis, & Arethas, pag. post Occum. 368. verum etiam constat ex vers. 13. & 14. ejusdem capituli 111. ubi habetur: *Hi, qui amīcī sunt stolis albis, qui sunt, & unde venerunt? Hi sunt, qui venerunt de tribulatione magna, & laverunt stolas suas, & dealbaverunt eas in sanguine Agni*. Hinc fortasse Martyres olim sepeliebantur induti colobiis, vestibus scilicet candidissimis. Confirmant multitudinem sanctorum Martyrum Patres. Cyprianus lib. de Mortal. pag. 470. *Martyrum*, inquit, *innumerabilis populus ob certaminis, & passionis victoriam coronatus*. Similia repetit Epist. ad Fortunatum, pag. 522. Prudentius in lib. 11. *capitulum* Hippolyti Passionem sic incipit:

*Innumeros cineres sanctorum Romula in Urbe  
Vidimus, o Christi Valeriae sacer.*

*Incisos tumulis titulos, & singula quaris  
Nomina? difficile est, ut replicare queam:  
Tantos justorum populos furor impius hausit,  
Cum coleret patrios Troia Roma Deos.*

Hieronymus Algasæ scribens, tom. iv. pag. 198. ait: *In novo Instrumento, in quo bonitas est atque clementia, innumerabiles extiterunt Martyres*. S. Paulinus Natali 1x. pag. 604. ita cecinit:

*Vos quoque corporibus cæsi, & sanguine fuso  
Occisam & vicum testati Martyres Agnum,  
Omnes divinis a fontibus una propago,  
Quos pius Abraham, sacer Isaac, lenis Iacob  
Progenere Deo per non numerabile semen.*

Augustinus denique, cui posteriores omnes subscribunt, serm. 51. aliàs 63. de diversis num. 8. inquit: *Pro ista fide interfecta sunt millia Martyrum toto orbe terrarum*: & serm. 252. aliàs 5. de diversis, num. 8. *Unus dies passionis Martyrum si computetur, millia hominum inveniuntur coronatorum*. Refellunt præterea Dodwellum Romanorum Imperatorum crudelissimæ persecutiones. Et quoniam contendit ille, perpaucos persecutos fuisse Ecclesiam, & paucissima esse Imperatorum edicta lata adversus Christianos; optime animadvertit Ruinartius, num. 24. & seq. in persecutionibus non tam numerum, quàm universitatem, immanitatemque spectandam esse, nec ex edictis tantum Imperatoriis, sed etiam ex Romanarum legum præscripto, atque ex arbitrio Præsidum innumeros Martyres fuisse necatos. His addimus caput 111. libri xviii. Augustini de Civit. Dei ad confutationem Dodwelli aptissimum; & quod totum foret hic exscribendum, nisi singulorum manibus versaretur. Dodwellum deni-

## Liber Trigesimus primus. Cap. XXIV. 571

denique refellunt antiqua Martyrologia; quibus perperam illum detrahere fidem, demonstrarunt Pagius ad annum 64. num. 6. & Ruinartius §. 2. Præfationis suæ: suppeditantque hujus rei palmaria argumenta admonitiones Florentinii præviæ ad Martyrologium Occidentalis Ecclesiæ.

### VII.

Postremo loco de fuga persecutionum, & de gloria Martyrum dicendum esset: at de illa satis egimus libro XXI. cap. 8. De hac autem gloria, cum humanum excedat eloquium, disserere non valemus. De Martyribus quippe dicitur mystice in Apocalypsi 11. 17. *Vincenti dabo manna absconditum, & dabo illi calculum candidum.* 111. 12. *Qui vicerit, faciam illam columnam in templo Dei mei.* VII. 15. *Sunt ante thronum Dei.* Huc animum intendens Tertullianus scripsit Scorp. 12. *Victori cuique promittit nunc arborem vite & mortis veniam secundæ: nunc latens manna cum calculo candido, & nomine ignoto: nunc ferrea virga potestatem, & stella matutina claritatem: nunc alba vestiri, nec deleri de libro vite, & columnam fieri in Dei templo: nunc residere cum Domino in throno ejus, quod aliquando Zebedæi filiis negabatur. Quinam isti tam beati victores, nisi proprie Martyres? Adeat qui plura de Martyrio scire desiderat, eximios viros in his animadversionibus laudatos, atque illum præsertim, qui est super omnes laudes, quique ceteros perlegit, libravit, excussit, idest, BENEDICTUM XIV.*

## C A P U T XXV.

### *Effectus Sacramenti Baptismatis recensentur.*

**J**Am verò sermo instituendus est de effectibus baptismi; quos inter principem tenet locum gratia sanctificans, delens vere ac propriè quamcumque peccati maculam. Id a nobis supra pag. 234. & sequentibus demonstratum est multiplici genere argumentorum, quæ non opus est repetamus. Ibi etiam solutæ sunt cavillationes hæreticorum, una duntaxat prætermisâ, de concupiscentia permanente in renatis: quæ tamen objectio libro XI. cap. 4. fuit excussa; ubi ostendimus concupiscentiam a reatu, & a peccati vinculo per gratiam baptismatis separari. Hanc quoque gratiam inhærentem esse adversus Novatores prolixè ostendimus libro XIX. cap. 2. Sufficit ergo, si de hoc priori effectu repetamus decretum Tridentinæ Synodis sess. v. num. 5. *Si quis per Jesu Christi Domini nostri gratiam, quæ in baptismo confertur, reatum originalis peccati remitti negat, aut etiam asserit non tolli totum id, quod veram & propriam peccati rationem habet; sed illud dici tantum radi, aut non imputari, anathema*

*thema sit. In renatis enim nihil odit Deus: quia nihil est damnationis illis, qui verè consepulti sunt cum Christo per baptismum in mortem: qui non secundum carnem ambulant, sed veterem hominem exuentes, & novum, qui secundum Deum creatus est, induentes: innocentes, immaculati, pari, innoxii, ac Deo dilecti effecti sunt; hæredes quidem Dei, cohæredes autem Christi, ita ut nihil prorsus eos ab ingressu cæli remoretur. Munere autem in baptizatis concupiscentiam, vel fomitem, hæc sancta Synodus fatetur, & sentit: quæ cum at agonem relicta sit, nocere non consentientibus, sed viriliter per Jesum Christi gratiam repugnantibus, non valet: quinimo qui legitime certaverit, coronabitur.*

Comitantur hanc baptismi gratiam singulares quædam prærogativæ: quarum prima est, quod homo carne antea genitus, natus mundo, filius iræ, & mancipium diaboli; dicitur, ac est regeneratus ac renovatus Spiritu sancto, ad Titum 111. 3. natus ex Deo, Ioan. 1. 13. ex aqua & Spiritu sancto renatus, Ioan. 111. 5. Dei filius, ad Galat. 111. 26. Dei hæres, & cohæres Christi, ad Rom. 111. 17. Aspersus a conscientia mala, ad Heb. x. 22. ablutus, sanctificatus, iustificatus, 1. ad Corinth. vi. 11. membrum Christi, ac templum Spiritus sancti, Ibid. 15. 19. Quare Chrysostomus Hom. ad Neophytos ab Augustino libro 1. contra Iul. cap. vi. num. 21. laudata & exscripta, *Benedictus, inquit, Deus, qui fecit mirabilia solus; qui fecit universa, & convertit universa. Ecce libertatis fraternitate perfruuntur qui tenebantur paullo ante captivi, & cives Ecclesiæ sunt qui fuerunt in peregrinationis errore, & iustitia in sorte versantur qui fuerunt in confusione peccati. Non enim tantum sunt liberi, sed & sancti: non tantum sancti, sed & iusti: non solum iusti, sed & filii: non solum filii, sed & heredes: non solum heredes, sed & fratres Christi? nec tantum fratres Christi, sed & cohæredes: non solum cohæredes, sed & membra: non tantum membra, sed & templum: non tantum templum, sed & organa spiritus. Vides quot sunt baptismatis largitates: & nonnulli deputant cælestem gratiam in peccatorum tantum remissione consistere; nos autem honores computavimus decem. Quibus verbis nihil dici poterat magnificentius ac præcitatius scripturis magis conforme.*

Ex quo Baptismus nos Christo, *tanquam membra Capiti*, coniungat, sequitur per illum patere nobis ad Sacramenta reliqua accessum, & quodam modo ex illo, tanquam ex incorporatione in Ecclesiam, ac novæ generationis primordiis, conferri nobis gratiam ad evitanda peccata; & si in ea prolabamur, expiari quidem per Pœnitentiam, sed hanc futuram fuisse inutilem, nisi baptismum ipsum, aut saltem votum ejus supponeret. Hinc cap. *Nalli est, de Consecr. dist. 1v. n. 131.* quod Gratianus tribuit Chrysostomo, Fontaninus

taninus autem Chromatio, legimus, *tunc unumquemque fidelium corporis sanguinisque Domini participem fieri, nec alienari ab illius Panis, calicisque consortio, etiamsi antequam panem illum comedat, & calicem bibat, de hoc seculo in unitate corporis Christi constitutus abscedat. Sacramenti quippe illius participatione non privatur, quando ipse hoc, quod illud Sacramentum est, invenit.* Augustinus lib. 1. de Nupt. & Concup. cap. 33. n. 38. in Epist. ad Bonifacium 50. nunc 185. num. 39. ait, *eodem lavacro regenerationis omnia prorsus mala, regenerantium mundari, atque propter ipsum lavacrum dimitti: quod utique non ita accipiendum est, quasi Augustinus deneget, ut hæretici autumant, sacramentum Penitentiae; sed ita, ut quemadmodum homini nato ex Adam non daretur per medicinam sanitas, nisi antea per generationem collata fuisset vita; ita remoto nulla daretur remissio, nisi prius per spiritalem regenerationem resurrexisset cum Christo. Atque ideo S. Pater priori in loco addidit, Quid enim prodesset vel ante baptismum penitentia, nisi baptismus sequeretur, vel postea, nisi praecederet? & in altero pariter, Neque enim aliquid prodest non baptizato dicere, Dimitte nobis debita nostra.*

Ad cumulum istum gratiarum consequitur cuiusque poenae apud Deum luendae remissio. *Morientes* (inquit de baptizatis Florentina Synodus in decreto pro Armeniis) *morientes antequam culpam aliquam committant, statim ad regna calorum, & Dei visionem perveniunt. Ita ut, addit praeaudata Synodus Tridentina, nihil prorsus eos ab ingressu calis remoretur.* Augustinus item lib. 2. de peccat. meritis cap. 28. n. 46. *Si continuo, inquit de baptizatis, consequatur ab hac vita migratio, non erit omnino, quod obnoxium hominem teneat, solutis omnibus, quae tenebant.* Profert congruam, aptissimamque rationem S. Thomas q. 119. art. 2. quoniam cum baptismus sit Sacramentum regenerationis, ac mortis & resurrectionis Christi imitatio, baptizato applicatur per baptismum virtus passionis Christi plenius, quam per quodlibet aliud Sacramentum. Insuper rationem istam Catechismus Rom. de Bapt. num. 47. eamque probant communi consensione Scholastici. Animadvertendum est tantum, plenum hunc effectum baptismi non haberi ex solo ejusdem baptismi voto: quod tradit S. Thomas q. 111. art. 2. ad 2. demonstratque luculenter Estius in 1v. dist. 4. §. 19. Hujus sententiae argumenta sunt, quod Scripturae productae supra cap. 111. prop. 2. debitum persolvendae poenae minime excludant; quod Deus praesumatur id tantum supplere, quod necessarium est; & quod Ecclesia, ut supra diximus, consueverit preces offerre pro Catechumenis cum baptismi voto demortuis. Si quis tamen in illo baptismi desiderio, vehementi flagraret caritate; hunc protinus ad caelestem patriam evoluturum, virtus ipsa caritatis demonstrat. Atque id affirmat etiam Innocen-

tius III. cap. *Debitum*, in III. Decretalium, tit. XLII. num. 3. de quodam Judæo, qui in mortis articulo constitutus in aquam seipsum immerfit : & de quo supra pag. 418.

Remanent tamen in baptizatis concupiscentia ad agonem, moriendi necessitas, nec non aliæ vitæ hujus miseriæ, ut docet experientia, affirmatque Augustinus lib. 2. de Peccat. remis. cap. 2. 27. 28. 29. lib. VI. contra Julianum cap. 4. atque in aliis locis permultis. Legi poterunt quæ scripsimus de hujusmodi pœnis lib. XII. cap. 13. Hinc tamen inferri nequit, quod non deleatur in baptismo omnis culpa, & omnis reatus pœnæ subeundæ in altera vita ; aut nobiscum non reconcilietur Deus, qui adhuc sinit nos post baptismum innumeris animi, corporisque jactari perturbationibus. Remittitur profeclò pœna omnis, sed *propter futurum judicium*, inquit Augustinus cap. 66. Enchiridii : & *quantum ad exclusionem a gloria, non quantum ad necessitatem corporaliter moriendi*, ait q. LII. art. 5. ad 2. Doctor Angelicus. Cur verò Deus velit concupiscentiam, mortem corporis, & alia hujusmodi remanere in renatis, non unam rationem tradidit Augustinus. Factum id primò, ut potissimum intelligeremus ad alterum sæculum prodesse quod renascamur, hujus autem sæculi dispositionem propter vitium superbiæ hominis, per quod apostatavit a Deo, diversis malis peragi in jugo gravi super filios Adam a die exitus de ventre matris. Deinde, ut virtus gratiæ in infirmitate perliceretur, & circumferret homo testimonium peccati, memoriam pristinæ damnationis, & argumentum humilitatis. Præterea, ut relinqueretur animæ experimentum separationis a corpore, ac fidei robore superaretur mortis timor, quod in sanctis Martyribus maxime eminuit. Hæc iisdem plane verbis S. P. Aug. lib. III. contra Julianum cap. 6. lib. VI. Operis Imperfecti. n. 29. & lib. XII. de Civit. Dei cap. 4. Ceterum hæc quoque *pœnalitates* virtute baptismatis in resurrectione sunt auferendæ, quando, ut ait Apostolus I. ad Corinth. XV. 54. *Mortale hoc induerit immortalitatem, & fiet sermo, qui scriptus est : Absorpta est mors in victoria*.

Si quis autem ob contritionem caritate perfectam ante susceptum baptismum consequeretur cum voto Sacramenti remissionem peccatorum ; adhuc tamen per ipsum regenerationis lavacrum, quod nemo debet contemnere, plura perciperet emolumenta gratiarum, idest, characterem, incrementum gratiæ, plenam remissionem pœnæ in altera vita subeundæ, majorem conscientiæ tranquillitatem, cooptationem in visibilem Christi Ecclesiam, & jus ad Sacramenta cetera, quibus fideles in idem religionis nomen coadunati roborantur in fide, nutriuntur, sanantur, aliosque passionis Christi fructus uberrimos consequuntur. Atque hæc ex dictis hætenus arbitror satis obvia. Et quoniam gratia sanctificans, ut definit Tridentina Synodus

nodus fefc. vi. cap. 7. minuitur, atque augetur, *secundum mensuram, quam Spiritus sanctus partitur singulis prout vult, & secundum propriam cuiusque dispositionem, & cooperationem*, quod & a nobis demonstratum est postremo capite libri xix. nullum dubium est, quin, licet *character*, necnon peccatorum remissio in omnibus baptizatis æqualis sit, modò gratiæ non ponant obicem, ipsa tamen *inhærens gratia* ob adultorum cooperationem, non sit in illis inæqualis, ac dispar: quod & de effectibus accidentariis baptismi, quos nempe divina virtus in baptismo miraculose operatur, jure, meritoque decernit q. lxix. art. 8. magnus Aquinas.

*Characterem* quoque inter baptismi effecta nuper commemoravi: de quo, cum plura dixerim cap. 22. præcedentis libri tricesimi, necessum nequaquam est, ut iterum sermonem instituam. Innuam tantummodo, quantum studii adhibere debeamus, ne tanta cælestium donorum copia in nobis magis magisque redarguat scelerosam vitam, ingraticque animi vitium. Ac primò idem *character*, cum sit *nota Imperatoris nostri*, & signum Christianæ militiæ, nobis in fidelium castris, ac supremi Pastoris obedientia contigere debet; ne tanquam desertores & apostatæ illum circumferamus *ad noxam criminis*, nec de nobis repetantur ea verba Augustini de Symbolo cap. viii. num. 15. *Quomodo desertor habet characterem, ita & isti habent baptismum: habent, sed unde damnantur, non unde coronantur*. Hæc aliaque saluberrima monita ex *sigillo isto indelebili* potest quisque deprehendere, si attente præcitatum caput 22. perlegerit, & legenti inspiraverit Dominus caritatem. Laudata etiam gratiarum munera ostendunt quanto jure clamet Apostolus, ablutos nos esse, sanctificatos, justificatos, & vocatos in partem fortis sanctorum in lumine, cooptatos insuper in templum Dei, & consepultos cum Christo in mortem; ideoque nobis in luce ambulandum esse, & secundum hominem, qui a Deo creatus est in justitia & sanctitate, glorificandum & portandum Deum in corpore nostro, servandam denique spiritus unitatem, quoniam in uno spiritu omnes nos in unum corpus baptizati sumus. Atque hæc, aliaque hujus generis plurima ab iis, qui doctrinam Baptismi sint assecuti, legi in Apostolicis litteris absque pietatis sensu non possunt.

## CAPUT ULTIMUM.

*De ceremoniis in solemnibus Baptismatis administratione servandis.*

**A**cturus postremo loco de ceremoniis solemnibus Baptismi, illas primum, quas in præmissis dissertationibus explicavi, silio

tio arbitror prætermittendas. Quisquis ergo tempus, quo solemnè olim ritu baptizabatur, inquirat; adeat caput hujus libri vicessimum primum; qui Catechumenorum exercitamenta, in præcedens caput vicissimum conjiciat oculos: qui sacri fontis benedictionem, & varia meritionum genera, perlegat caput quartum, ac sextum. Ceremonias etiam, quæ in desuetudinem abierunt, brevi oratione complectar. Ac primò certum est traditam aliquando baptizatis *Eucharistiam*, adultis quidem sub utraque specie, parvulis autem sub specie vini, digito Sacerdotis intincto, & quibusdam infantulis admoto etiam calice. Meminerunt Eucharistiæ baptizatis infantibus datæ Tertullianus de Bapt. cap. ult. Ambrosius de Initiandis cap. 8. Paulinus epist. 12. ad Severum, Augustinus disputans adversus Pelagianos multis in locis, Hugo Victorinus lib. 1. de Sacram. cap. 29. alique plurimi. De Eucharistia parvulis administrata, rectè definitum est sess. XXI. Synodi Tridentinæ, cap. 4. non damnamam esse antiquitatem, si eum morem in quibusdam locis aliquando servavit, cum sanctissimi illi Patres probabilem sui facti causam pro illius temporis conditione habuerint; nulla tamen necessitate parvulos illos usu rationis carentes obligari ad sacramentalem Eucharistiæ communionem: *Siquidem per baptismi lavacrum regenerati, & Christo incorporati, adeptam jam filiorum Dei gratiam in illa ætate amittere non possunt.* II. Deinde baptizatis *mel & lac* degustanda fuisse exhibita, constat ex Clem. Alexandr. lib. 1. Pedag. cap. 6. Tertull. de Corona Milit. cap. 3. Hieronymo adversus Luciferianos, necnon ex Ordine Rom. aliisque monumentis apud Vicecomitem, Casalium, Martenium. Additum etiam alicubi *vinum dulce*. Ad hunc, & ad præcedentem baptismi ritum videtur respexisse S. Agnes, ita tyrannum alloquens, ac baptismum & Eucharistiam sub ænigmate demonstrans: *Mel & lac ex ejus ore suscepì, & sanguis ejus ornavit genas meas.* Significabatur eo ritu divina misericordia, gratia regenerationis, legisque Evangelicæ suavitas: de quibus agebat Petrus 1. Epist. cap. 11. 2. *Sicut modo geniti infantes, rationale, sine dolo lac concupiscite;* atque hæc verba Dominica in Albis repetit Ecclesia ex vetustis ritibus Neophytorum. Legi poterunt præter tres eximios viros Antiquorum rituum scrutatores paullo supra laudatos, aliosque de divinis Officiis pertractantes, Albaspinæus lib. 11. antiq. Observat. cap. 36. & Lupus in dissert. de Actis S. Leonis IX. P. III. pag. 871. antiq. edit. III. Imponebatur baptizatorum capitulum; ut apparet ex Orat. xl. Nazianzeni in sanctum lavacrum, & ex Ordine Baptismi Aethiopum, qui Severo Alexandrino tribuitur. Animadverto hujus ferti meminisse cap. 110. in Explicatione divini Offic. Joannem Belethum Parisiensem Theologum, qui floruit juxta Caveum circa annum 1162. unde inferitur perdurasse morem illum im-

imponendi capitibus baptizatorum coronas , ad sæculum usque xii. Martenius profer lib. i. art. xv. num. 7. ad demonstranda ferta baptizatis imposita sarcophagum Neapolitanum , de quo Mabillonius in Itinere Italico pag. 73. At ibidem exprimuntur baptismus Regis , & Reginæ Longobardorum , & aquæ actualis immersio atque infusio , ut dixi supra pag. 350. impositio autem coronæ erat ritus baptismum consequens : unde in altero sarcophago ejusdem antiquitatis , apud Ciampinum tom. 2. Vet. Monum. cap. 9. nullum coronæ apparet indicium . Corona erat lætitiæ symbolum , Evangelicæ libertatis , & sacræ , regalisque initiationis ; ob quam fideles appellantur , 1. Petri 11. 9. *Genus electum , regale Sacerdotium , gens sancta , populus acquisitionis*. IV. Dabantur quoque baptizatis ex Ord. Rom. & Albino Flacco, decem *siliquæ*. Erat autem *siliqua* pecunia minimi valoris , ex Isidoro lib. xvi. cap. 24. *vigesima pars solidi*, ex aliis pars decimoctava drachmæ . Eo ritu demonstrabatur , inquit Cafalius , *apud Christianos res divinas non haberi venales* ; five potius servanda decem legis præcepta , juxta Evangelicam parabolam Lucæ xix. 13. Tradebantur baptizatis & *calceamenta* , ob mortis imaginem , inquit Rupertus libro vii. cap. 1. cereæ denique Agni cælestis imagines , five in Christi , five in gregis Christiani symbolum ; siquidem *Agni* etiam Neophyti e sacro fonte emergentes dicuntur a Paulino Epist. xii. ad Severum eo versu , *Circumdatque rudes festis balatibus Agnos* : immo & Apostoli sub *Agnorum* typo cernuntur depicti in vetustis multis Romanæ Urbis , sicut in Crypta Narniensi sanctus Cassius , & Fausta ejus conjux . At de his plura Panvinus , & Joseph Maria Suarezius . His itaque commemoratis , ad ceremonias Baptismi , quæ etiamnum obtinent , recensendas , vindicandasque progredior .

DE SUSCEPTORIBUS PARVULORUM , IDEST , PATRINIS .

Itaque in Baptismate infantium eliguntur primò qui illos levent e sacro fonte , & qui *Susceptores* dicuntur , *Sponsores* , *Compatries* , *Patrini* , & a Græcis *Αντίχριστοι* , ab *αντίχριστος* , *excipio* . De his initio quæritur , num recte adhibeantur . Atque huic quæstioni respondemus affirmative ; quoniam baptismus est *Sacramentum regenerationis* , ac decet eos , qui Christo gignuntur , instrui ac doceri : quam rationem tradidit S. Thomas q. lxxvi. art. 7. Adde parvulos fidem *per verba gestantium* profiteri , & Ecclesiam eis per fideles suos præstare *os maternum* , ut inquit S. Pater Augustinus Epist. 23. nunc 98. ad Bonifacium , lib. 1. de peccat. meritis cap. xix. num. 25. & cap. xxv. n. 38. Meminit Sponsorum baptismi etiam Tertullianus lib. de Baptif. cap. 18. Vide quæ supra de Pædobaptismo produximus To. VI.

D d d d

cap. xvi.



cap. xvi. S. Thomas cit. art. 7. Estius dist. 6. §. 3. Sylvius, aliique censent Paternos adhiberi *ex traditione Apostolica*, ob testimonium Dionysii Areopagitæ id asserentis de Eccles. Hierarch. cap. 2. Idem nos affirmamus, sed alia ducti ratione; quia nimirum consuetudo hæc est ubique recepta, vetustissima, nec illius adinventur post tempora Apostolorum institutio. Id enim Apostolicæ traditionis argumentum esse, diximus libro xxiii. cap. quinto. II. Vetus fuit circa Susceptores disciplina, ut *nec viri feminas, nec femine viros lavarent*, ut liquet ex canone 22. inter Nicænos Arabicos, tom. 2. Concil. pag. 298. atque ex lib. 111. Const. Apost. pag. 288. ubi per multa adnotavit Cotelierius. Verum spectabat id antiquam consuetudinem denudationis baptizandorum: de qua pertractavi in Appendice cap. 6. Circa numerum Compatrum statuit Tridentina Synodus sess. xxiv. cap. 2. *ut unus tantum, sive vir, sive mulier, juxta sacrorum Canonum instituta, vel ad summum unus & una baptizatum de baptismo suscipiant*. Instituta Canonum habentur de Consecr. dist. iv. cap. *In Catechismo*, num. 100. & cap. *Non plures*, num. 101. Definitum id, ne inter multos contrahatur spiritualis cognatio, quæ est impedimentum Matrimonii, ut eo loci declarat Synodus Tridentina. III. In Susceptoribus requiritur ex canone 3. Concilii Metensis, celebrati anno 888. *ut teneant professionem Christianæ fidei*: ex cap. *In Baptismate*, de Consecr. dist. iv. num. 102. & antiquo Rituali Lemovicensi, apud Marten. tom. 1. pag. 203. atque ex Concilio Mediolanensi 111. an. 1579. necnon ex Rituali Romano, *ut sint sacro Chrismate confirmati*. Prohibentur ibidem, & in Concilio Antissiodorensi ann. 578. cap. *Non licet*, de Consecr. dist. iv. num. 103. *suscipere de baptismo filios, aut commatres habere*, Monachi & cujuscvis Ordinis regulares. IV. Ad quid teneantur Patrini, expressit Auctor sermonis inter Augustinianos de Temp. 163. nunc 168. Append. num. 3. scribens: *Quicumque viri, quæcumque mulieres de sacro fonte filios spiritualiter exceperunt, cognoscant se pro ipsis fidejussores apud Deum exitisse; & ideo semper illis sollicitudinem veræ caritatis impendant, & admoncant ut castitatem custodiant, virginitatem usque ad nuptias servant, a maledicto, vel perjurio linguam refrænent, cantica turpia vel luxuriosa ex ore non proferant, non superbiant, non invidiant, iracundiam vel odium in corde non teneant, auguria non observent, &c.* Apparet, hinc esse depromptum caput, *Vos ante omnia*, de Consecr. dist. iv. num. 105. & non aliunde petitam Exhortationem Catechismi Rom. P. 11. cap. 2. num. 28. hinc pariter derivatum canonem vii. Synodi Parisiensis ann. 829. Habet ergo præcitatus sermo, quamvis nunc inter spurios rejectus, suam adhuc auctoritatem.

DE NOMINE BAPTIZANDIS IMPONENDO .

Imponendi baptizandis nomina consuetudo exorta est ex antiquo ritu Catechumenorum ; qui , ut supra vidimus , ante baptismum *nomen suum dabant* . Nomen vero cuique hominum ob distinctionem personarum est imponendum ; unde & in Adamo , ejusque filiis observatum id est a mundi incunabulis . Romani olim maribus nomen imponebant nono post nativitatem die , & sœmellis octavo . Interdum nomen initio datum immutabatur ; quod & modò usu receptum est , in Romanis Pontificibus a Sergio II. sive potius a Joanne XII. electo anno 956. in Monachis alicui instituto additis : plerumque etiam in mulieribus latinis transeuntibus ad connubia Græcorum , inter quas legimus Pyriscam , & Bertham post nuptias fuisse appellatas *Irenes* ; & Agnetem conjugem Alexii Comneni , *Annam* : in Catechumenis denique , natis præsertim e paganis .

II. De nomine baptizandis imponendo , servandum censemus Arabicum canonem xxx. tom. 2. Conc. pag. 299. *Fideles nomina Gentilium filiis suis non imponant* . Primò , quia *veteres filios suos vocabant Sanctorum nomine* , ut testatur Chrysostomus Hom. 12. in Epistolam 1. ad Corinth. pag. vet. Parisiens. edit. 432. ac primis Ecclesiæ sæculis communia fidelibus erant nomina Apostolorum , maxime *Petri , Pauli , ac Joannis* , auctore Dionysio Alex. apud Eusebium lib. vii. H. Ec. cap. 25. pag. edit. Vales. 275. Deinde , quia Sanctorum nomina deserviunt ad tutelam , atque ad virtutum exempla : notiora quoque sunt , quàm sint domestica & propria : unde Theodoretus ferm. vii. de Græc. affect. tom. iv. pag. 606. *Martyrum nomina* , inquit , *notiora sunt omnibus , quàm familiarium* . *Quin & nascentibus filiis horum vocabula studemus imponere , securitatem inde ipsis , tutelamque comparantes* . Laudandus propterea est Carolus Thomas Cardinalis de Tournon , qui in celebri decreto dato Pudicherii an. 1704. iussit , ut baptizandis apud Sinas *imponatur nomen alicujus Sancti in Martyrologio Romano descripti* , prætermisiss nominibus illis Sinenfibus , de quibus legendus Aloysius Maria Lucinus in defensione ejusdem decreti pag. secundæ Rom. edit. 86. III. Nomina Sanctorum veteris testamenti repudianda non sunt : quinque enim sub nomine *Mosis* celebrantur in Romano Martyrologio ; *Danieles* sex ; quatuor *Hieremia* , Propheta excepto ; tres *Zacharia* , præter Prophetam , ac Patrem Præcursoris ; alterum quoque ab insigni rege , *Davidem* ; *Samueles* item martyres duos . Quinque Aegyptios Martyres abjecisse indita sibi a parentibus nomina , *Eliæ , Hieremia , Ejsaia , Samuelis , & Danielis nomen sibimet adsciscientes* , scribit lib. viii. caput 22. Eusebius : extantque illorum Acta apud Ruinartium pag. 290. Hi sunt , quorum memoria in Martyrologio re-

colitur xiv. Kalendas Martias, Observatum tamen a Martenio tom. i. pag. 74. ex Concilio Burdigalensi an. 1582. Novatores hæreticos *affellare nomina sanctorum Patrum veteris Testamenti*; sive quia sanctos debito honore non prosequuntur, ut inquit idem Martenius; sive, quod censéo probabilius, quia fidem solam deprædicant, Testamenta æquiparant, Romanamque Ecclesiam veteri Synagogæ postponunt. Aequum est igitur, ut baptizandis filiis *nomina tribuamus Sanctorum virorum, qui virtutibus fulserunt, plurimæque apud Deum gratia valuerunt*, ut ait Chrysostomus hom. 2. in Gen. pag. 235. Sanctorumque novi testamenti nomina præferamus veteribus; non quidem in istorum contemptum, sed in hæreticorum hominum execrationem.

#### DE ABRENUNCIATIONE SATANÆ, EXORCISMIS, ET EXSUFFLATIONIBUS.

Hæc tria præsertim, *Abrenunciationes, Exorcismos, & Exsufflationes* in administratione baptismi rejiciunt ac damnant heterodoxi. Attamen prorsus immerito. Quantum enim ad *Abrenunciationem* attinet; de illa inquit Tertullianus de Corona cap. 3. *Aquam adituri, ibidem, sed & aliquanto prius in Ecclesia sub Antislitis manu contestamur nos renuntiare diabolo, & pompæ, & angelis ejus.* Et de Spectaculis cap. 4. *Cum aquam ingressi Christianam fidem in legis suæ verba præstentur, renuntiassent nos diabolo, & pompæ, & angelis ejus ore nostro contestamur.* Cyprianus Epist. vi. ad Rogatianum, pag. 38. *Saculo*, ait, *renuntiaveramus, cum baptizati sumus.* S. Basilii de Spiritu sancto cap. 27. pag. edit. Morelli 211. demonstrat hanc eandem *abrenunciationem* esse ex Apostolica traditione his verbis: *ὡς αὖ δι' ἑα πρὸς τὸ βάπτισμα, ἀποτασσάμενοι τῷ σατᾷ καὶ τοῖς ὑγιαῖναι ἐντὶν, ἐκ τῆς ἱερᾶς γράμματος*; Reliqua item quæ fiunt in baptismo, veluti *renuntiare diabolo, ex qua Scriptura habemus?* Ambrosius de Mysteriis cap. 2. num. 5. ait: *Ingressus es regenerationis sacrarium, repete quid interrogatus sis. Renuntiasti diabolo & operibus ejus, mundo, & luxuriæ ejus, ac voluptatibus*; quem in locum adnotarunt PP. S. Mauri, neminem fere Patrum hujus ceremoniæ non meminisse. Hieronymus Epist. 97. de Virginitate servanda, tom. iv. pag. 789. ita Demetriadem alloquitur: *Nunc autem, quia sæculum reliquisti, & secundo post baptismum gradu, inisti pactum cum adversario tuo, dicens ei, Renuncio tibi, diabole, & saculo tuo, & pompæ tuæ, & operibus tuis: serva fœdus, quod pepigisti.* Augustinus lib. i. de peccat. meritis cap. 34. num. 62. ex hac abrenunciatione demonstrat in parvulis originale peccatum, scribens: *Vellem aliquem istorum, qui contraria sapiunt, mihi baptizandum parvulum afferret. Quid in illo agit exorcismus meus, si in familia diaboli*



nunc 194. num. 43. de Peccat. Originali cap. 40. & in op. imperf. lib. 1. num. 50. 56. 57. 60. &c. Etiam Cælestinus ad Episcopos Gallicæ cap. 12. *Illud*, inquit, *quod circa baptizandos in universo mundo sancta Ecclesia uniformiter agit, non otioso contemplerur intuitu, cum siue parvuli, siue juvenes ad regenerationis veniunt Sacramentum, non prius fontem vitæ adeunt, quam exorcismis & exsufflationibus Clericorum spiritus ab eis immundus abigatur*. Vide App. tom. x. Op. Aug. pag. 134. Accedit ratio, quam tradit S. Thomas q. lxxi. art. 2. atque ex præmissis Ecclesiæ documentis consequitur; Diabolum nempe hostem humani generis truculentissimum, & potestate præditum in filios Adæ originali noxa inquinatos, vi arcendum esse, *ne salutem hominis impediatur*. Postremò Novatores refelluntur antesignanorum suorum confessione. Lutherus enim in Catechismo suo ita statuit: *Dicit Sacerdos audito N. nomine, Exi immunde spiritus, & da locum Spiritui sancto*. Deinde signum Crucis figurat in fronte & pectore dicens, *Accipe signum sanctæ Crucis in fronte, & pectore*. Deinde susus Ecclesiæ nostræ precibus addit Sacerdos, *Adjuro te immunde Spiritus in nomine Patris & Filii & Spiritus sancti, ut discedas atque recedas ab hoc famulo Jesu Christi N. Amen*. Idem extat in Ordinatione Ecclesiæ Witthembergensis impressa anno 1564. a Ducibus Brunswyckenfæ & Lunemburgensæ, nec aliter in Confessione Saxonum, seu Wimarïensî fol. Y. a. Hinc insert Lindanus in altera parte Apologiæ pag. 255. Anonymos Confessionis Augustanæ Patronos, dum impietatis & idololatriæ damnant exorcismos Romanæ Ecclesiæ, insimulare eodem pacto Saxones, Witthembergenses, ipsumque Lutherum. Calvinus lib. iv. Instit. cap. 14. antiquam harum ceremoniarum institutionem nequaquam negat, ita se omnibus præcis Patribus temere & audacter opponens: *Quasi res esset contemptibilis ex Christi præcepto aqua baptizari, inventa est benedictio, vel potius incantatio, quæ veram aquæ consecrationem pollueret*; ac recensitis exorcismis, exsufflationibus, aliisque ritibus, *Etsi autem*, inquit, *me non latet quam vetusta sit hujus faraginis origo, respondere tamen mihi, & piis omnibus fas est quidquid ad Christi institutionem addere ausi sunt homines*. Jacobus Vedrosius Minister Curienfis Rat. 111. docum. 9. haud negat a veteribus exorcismos fuisse adhibitos recte ac provide; sed ait, usurpatos duntaxat tanquam umbras, quibus significaretur efficacia baptismi, recitatis versiculis,

*Sal, oleum, chrisma, cereus, cum veste, saliva,*

*Flatus, virtutes baptismatis ista figurant;*

*Hæc cum Patrinis non mutant esse, sed ornant.*

Quibus verbis suadent imperitis, nos exorcismos, aliosque ritus adhibere, tanquam ejusdem virtutis sint, ac ipse baptismus, cum  
tamen

tamen nos fateamur Ecclesiæ ceremonias *mysticas* esse; & licet exorcismis tribuamus virtutem expellendi dæmonem, idque *per modum impetrationis*; non tamen asserimus illis inesse vim sanctificandi, & delendi maculas peccatorum: quam si hæretici in Sacramentis agnoscerent, illos quidem hujusmodi conviciorum, ineptiarumque puerderet. Bullingerus denique Decade v. ferm. 8. ceremoniarum istarum vetustatem agnoscens plura ex Augustino loca producit, de quibus vide Joannem Georgium in Conversione sua pag. 38. nec aliter Bucerus in deliberatione Lipsica an. 1539. apud Cassandrum in consultatione ad articulum 9. Confess. Augultanæ.

Quamquam verò agere hoc in loco de exorcismis extra baptismum, ratio hujus instituti non postulet; ex dictis tamen illorum usus comprobatur, in rebus etiam inanimatis, puta, *oleo, sale, aqua, &c.* Nam & in his insidias nobis struere nituntur dæmones. Quare Althelmus Schireburnensis Episcopus in libro de laude Virginum cap. 21. Tom. XIII. Biblioth. PP. pag. 9. de sancto Narcisso cecinit:

*Mox fontana jubet Narcissus flumina lymphæ  
Fidens in Dominum, sacros haurire ministros,  
Et complere cavum cum glauco gurgite vitrum.  
Funditur interea per cunctas unda lucernæ,  
Sic exorcizans lychnos benedixit aquosos.*

Commendant sanè exorcismorum virtutem, antiquitatem, & usum quæ scribit Iustinus in Dialogo cum Tryphone pag. 247. de Christo Jesu: *Opitulatorem ipsum & Redemptorem nominatus, cujus etiam nominis potentiam dæmones tremunt & reformidant, & hodie quoque illi per nomen Jesu Christi crucifixi sub Pontio Pilato, qui Judææ procuratorem egit, adjurati nobis parent.* Similia pag. 302. edit. Sonni. Lactantius quoque lib. 1v. Instit. cap. 27. *Sciet, inquit, qui viderit, quatenus adjurati dæmones per Christum de corporibus, quæ obsederint, fugiant.* Ac Julius Firmicus Maternus in libro de errore profanarum Religionum illudens idololatriæ ajebat: *Sic apud nos, Deos vestros, cum hominibus nocere ceperint, Religionis sermonis flagella castigant.* Hos vero ex multis laudavimus, quoniam adversus Christiani nominis hostes stilum exercentes narrabant rem adversariorum experimento compertam. Posset huc referri Exorcistarum munus: de quo Cyprianus Ep. LXXV. 1. ad Magnum, pag. 323. *Quod hodie etiam geritur, ut per exorcistas voce humana, & potestate divina flagelletur, & aratur, & torqueatur diabolus, &c.* necnon Paulinus Nat. 1v. pag. 545. edit. Antwerp. scribens de S. Felice inter Clericos cooptato,

*..... Primis Lætor servivis in annis;  
Inde gradum cepit, cui munus voce fideli*

*Ad:*

*Adjurare malos, & sacris pellere verbis:*  
At de exorcismis dictum satis.

DE SIGNO CRUCIS, MANUS IMPOSITIONE, SALE, OLEO  
CATECHUMENORUM, ET SALIVA.

Pluries Sacerdos parvulum *signo Crucis* communit: eo quippe signo receptos olim Catechumenos, dictum est supra. De eodem signo illustria occurrunt testimonia apud Basilium de Spiritu sancto præcit. cap. 27. Augustinum Conc. 3. in Psalm. xxx. de catechizandis rudib. cap. 20. aliisque in locis, (quorum aliqua mox proferam,) necnon apud omnes antiquos Patres. Constat autem ex superiori paragrapho, hujus ritus antiquitatem neque a Luthero, neque a Calvino, neque ab aliis hæreticis denegari. In fronte potissimum imprimitur signum salutare, *tanquam in sede pudoris*, ne in Christi nomine erubescamus. II. Additur *manus impositio*; cujus ritus meminit S. Pater lib. 2. de peccat. meritis & remis. cap. 26. ubi ait n. 42. *Nam & Catechumenos secundum quemdam modum suum per signum Crucis, & orationem manus impositionis puto sanctificari.* Et Ivo Carnot. serm. inter Augustinianos 19. de Sanctis, nunc 247. Ap. *Hujus crucis mysterio rudes catechizantur, eodem mysterio fons regenerationis consecratur, ejusdem Crucis signo per manus impositionem baptizati dona gratiarum accipiunt.* III. Sale non uti Græcos in baptisinate, advertit eruditus Menardus in Sacram. Gregorii Tom. 111. novæ edit. pag. 377. & licet Joseph Vicecomes de Antiq. Bapt. ritibus lib. 2. cap. 42. laudet homiliam sextam Origenis in Ezechielem Prophetam; illam tamen factum esse hominis Latini, demonstrat aperte Lupus in expulsiōe x 111. Calumniæ Michaelis Cerularii P. 3. pag. 873. Antiquissimus est tamen ritus ingerendi salem in os baptizandorum, cum de illo, tanquam de ceremonia ætate majorum recepta, sermonem instituunt Ordo Romanus, Amalarius Fortunatus. Ac nos ejusdem ritus hæc monimenta producimus. Extat in tertia Carthaginienſi Synodo canon v. *Placuit ut etiam per solemnes Paschales dies Sacramentum Catechumenis non detur, nisi solum sal.* Habita fuit hæc Synodus Attico & Cæsario Cofs. anno scilicet 397. Legendi de hoc canone Lupus citato in loco, & Albaspinæus lib. 2. observat. cap. 36. Præterea Ambrosius hunc tangens ritum, ita loquitur de Aqua baptismatis, lib. x. in Lucam num. 48. *Per te factor tabida carnis aboletur; & pereuntia sita viscera adperso sale in multam servantur ætatem:* ubi recte notatum a PP. S. Mauri tom. 1. pag. 1514. ceremoniam, de qua differimus, longe tempora Ambrosii præcessisse, quod & observatum a Vicecomite lib. 2. de anti-

antiquis Rit. pag. 195. Insuper S. Pater Augustinus in primo Confessione. cap. xi. num. 17. ait: *Signabar jam signo Crucis, & condiebar ejus sale*: quo in loco, cum enarratur quod peragi solet in Catechumenis, non debet *sal* accipi mystico tantum sensu, pro *sale sapientia*. Huc spectant quæ S. Pater scribit de Catech. rudib. cap. xxvi. num. 50. verba faciens de Catechumenorum initiatione, *Dicendum etiam quid significet & sermo ille, quem audiuit, quid in illo condiat, cujus illa res similitudinem gerat*. Putant quoque PP. S. Mauri eo loci, idest, tom. vi. pag. 293. ubi legitur, *de Sacramento sane, restituendum, de Sacramento salis*. Isidorus libro 2. de Offic. cap. 20. Ivo Carnotensis in serm. de Sacram. Neophyt. & Hugo Viêt. lib. 1. de Sacram. cap. 18. non tantum meminerunt hujusce ritus, verum etiam hanc ejusdem rationem protulerunt: *Sal propterea Catechumenis datur in mysterio, ut nos esse sal terræ, idest, Dei sapientiam noscamus*. Neque vero quidquam refert, ceremoniam hanc non servari a Græcis; cum ritus pro locorum, temporumque conditione mutari possint, & in Ecclesia Romana aliarum magistra, cum perpetua successione Pontificum, etiam dogmata, & perantiqua disciplina perstiterint. IV. *De oleo Catechumenorum*, quo baptizandi in pectore, & inter scapulas liniuntur, præter Isidorum, Magnum Senonensem, & antiquum Auctorem qq. ad Orthodox. inter opera Justinii, q. 137. quos omnes laudavit Martenius lib. 1. art. 6. num. 15. hæc vetustiora momenta adinvenio. Auctor Constit. Apostolic. lib. 111. cap. 17. pag. 288. *Baptismus*, inquit, *in mortem Jesu datur: & aqua adbibetur pro sepultura, oleum pro Spiritu sancto, signum crucis pro cruce, Chrisma confirmatio est confessionis*, & lib. vii. cap. 22. pag. 368. *Unges autem prius oleo sancto, deinde baptizabis aqua, & tandem signabis unguento*. Cyrillus Jerosolymit. Catech. Mystag. 2. pag. 516. scribit: *Deinde vero jam exuti exorcizato oleo peruncti estis*: & infra, *Illud ergo exorcizatum oleum symbolum est pinguedinis Christi nobiscum communicata*. Ostendens vero hanc inunctionem præcessisse baptismum, sequitur: *Postea dacebimini ad sanctum divini baptismi lavacrum*. Chrysostomus Hom. vi. in Epist. ad Coloss. pag. 1358. de accedente ad baptismum, inquit, *Ungitur, sicut athleta stadium ingressuri*. Ambrosius pariter lib. 1. de Sacram. cap. 2. n. 4. *Venimus ad fontem, ingressus es: considera quos videris, quid loquutus sis considera, repete diligenter. Occurrit tibi levita, occurrit presbyter: unctus es quasi athleta Christi, quasi luctam hujus seculi luctaturus*. Eadem fere lib. 2. cap. 7. num. 14. Augustinus adhiberi *oleum visibile* in signum invisibilis unctionis, scribit in Ps. xliv. num. 19. De unctione Catechumeni ante baptismum inquit Tract. xlii. in Joan. num. 2. *Inunctus est, nondum lotus*. Et post pauca: *Sed non eis sufficit ad quod inuncti sunt; festinent*

To. VI.

E e e e

nent



*venit ad lavacrum, si lumen inquirunt.* Denique Vensantius Fortunatus lib. v. carmine 5. de Judæis conversis per Avitum Episcopum, ait:

*Hinc oleari ovium perfunditur unguine vellus,*

*Aspersuque sacro fit gregis alter odor.*

Ex his quoque percipiuntur hujus olei mysteria: ungitur siquidem baptizandus in pectore, *ne lateant in eo ulla inimici reliquia*, atque inter scapulas, *ut undique muniatur, & ad bona opera facienda per Dei gratiam roberetur.* Ita Rabanus lib. 1. de Instit. Cleric. cap. 27. in can. 70. de Consecr. dist. 1v. *Deinde a Sacerdote.* V. Saliva non tangunt Græci baptizandorum nares, nec aures, ut ex silentio Patrum, & Euchologiorum observavit Meuardus in Sacram. Gregorii Tom. 3. pag. 381. Lucinus quidem egregie vindicans Decretum Cardinalis de Tournon pro abolitione Rituum Sinenfium, producit pag. 66. Euchologium Jacobi Goarii, in quo pag. 338. legitur: *Insuffla igitur, & expue in illum.* Sed hæc sunt verba Sacerdotis Catechumenum alloquentis, ut ipse quoque exsufflando & expuendo abrenunciationem a se factam Satanæ confirmet, atque a se adversarium expellet, illum insufflans & conspuens. Etenim exsufflationes olim ab ipsis quoque Catechumenis fiebant; ut docti viri observarunt ex cap. 2. de Ecclesiastica Hierarchia Dionysio Areopagita attributa; ubi pag. Platin. edit. 253. jubetur baptizandus manibus Occidentem versus protensis, *Satanam insufflare, atque insuper abrenuntiationis verba proferre.* Ceterum hujus ritus probationes habemus alias. Enimvero in illum intendens mentem Ambrosius lib. de Myst. cap. 1. num. 3. inquit: *Aperite igitur aures, & bonum odorem vite æternæ inbalatum vobis munere Sacramentorum carpite; quod vobis significavimus, cum apertionis celebrantes mysteriam diceremus Epheta, quod est adaperire.* Et lib. 1. de Sacram. cap. 1. n. 2. *Ergo quid egimus Sabbato? nempe apertionem: quæ mysteria celebrata sunt apertionis, quando tibi aures tetigit Sacerdos, & nares. Quod significat in Evangelio Dominus noster Jesus Christus, cum ei oblatas esset surdus & mutus, & tetigit aures ejus, & os ejus; aures, quia surdus erat; os, quia mutus; & ait, Epheta, &c.* Augustinus etiam præcitato Tract. XLIV. ad mysteria baptismi scite accommodat illuminationem cæci a nativitate, scribens: *Venit Dominus: quid fecit? Magnam mysterium commendavit. Expuit in terram; de saliva sua lutum fecit. Et inunxit oculos cæci, &c.* Neque enim apud nos ob alium finem oculi Catechumenorum liniuntur saliva, nisi ob mysticam spiritualis luminis significationem, ut diximus pag. 278. & habetur cap. *Postea tanguntur*, de Consecr. dist. 1v. num. 68. Haud secus Rabanus Maurus præcitato cap. 27. Quantum ad Sinenfes attinet; dispensatum quidem fuerat anno 1656. ne apud illos omnia adhi-

adhiberentur *Sacramentalia*; sed ad eliminandum inolitum errorem, quod saliva sit res immundissima, nec religiosa esse queat ceremoniam, quæ saliva ipsa peragitur, statuit Cardinalis de Tournon cap. 3. prælaudati decreti, *Ne in baptizandis tam pueris, quam adultis, cunjunctum sessus & conditionis, omittantur Sacramentalia, sed omnia palam adhibeantur, & signanter saliva, sal, & insufflatio, &c.* De hoc autem decreto vide quæ scripsimus lib. xxi. cap. 9. in dissertatione de Sinenfium Ritibus, tom. iv. pag. 486.

DE UNCTIONE CHRISMATIS, LINTEOLO ALBO,  
ET CANDELA ACCENSA.

Ceremoniæ prædictæ præcedunt omnes baptismum: quo peracto Sacerdos sacro *Chrismate* inungit verticem baptizati. Constat ex Apostolicis Constitut. paulo supra laudatis, unctionem Chrismatis factam fuisse post ablutionem. De hac unctione scribit Innocentius I. Epist. ad Decentium cap. 3. *Presbyteris, seu extra Episcopum, sine præsentate Episcopo baptizent, chrismate baptizatos ungere licet, sed quod ab Episcopo fuerit consecratum, non tamen frontem ex eodem oleo signare, quod solis debetur Episcopis, cum tradunt Spiritum Paracletum.* Habetur in cap. *Presbyteris*, de Consecr. dist. iv. n. 119. Etiam Augustinus lib. xv. de Trinit. cap. 26. num. 46. inquit de dono gratiæ, *Quod visibili significatur unguento, quo baptizatos ungit Ecclesia.* Similia tradunt alii Patres. Plurimum tamen testimonia ambigua sunt; nec satis apparet, an loquantur de hac unctione, an de Sacramento Confirmationis. Istud enim statim post baptismum olim conferebatur, quando baptizabant Episcopi, ac, ut plurimum, in sabbato tantum Paschæ, vel Pentecostes. At cum presbyteris munus baptizandi demandatum fuit; ut omnes antiquæ complerentur ceremoniæ, inducta fuit hæc *verticalis inunctio*, a Sacramento Confirmationis distincta. In libro Pontificali legimus de Sylvestro: *Et hoc constituit, ut baptizatum leniret presbyter chrismate levatum de aqua.* Quem locum citant Rupertus Abbas lib. v. de divinis off. cap. 16. Amalarius lib. 1. cap. 27. alique complures. Ergo Patres antiquiores Sylvestro, dum laudant unctionem Chrismatis factam, baptizatis, accipi possunt de Confirmatione, posteriores autem Sylvestro ceremoniam istam commendant, præsertim illam tribuentes presbyteris baptizantibus, & afferentes fieri in vertice, non in fronte. Ad hunc modum loquitur Fortunatus præcitato carmine V.

*Abluitur Judæus, odor baptismate divo;  
Et nova progenies reddita surgit aquis.  
Vincens ambrosios suavi spiramine rores,  
Vertice perfunctus Chrismatis efflat odor.*

Intelligimus ex dictis, quare presbyter baptizans non debeat chrismate signare frontem; quod etiam prohibuit Gregorius epist. 9. libri 111. ad Januarium Episcopum Calaritanum, cap. *Presbyteri baptizatos*, animadvertitque Theodulphus editus a Sirmondo, & a Menardo inferius notis in Sacrament. Gregorii, in libro de *Ordine baptismi*, num. 17. Cautum nempe id est, ut hæc inunctio secernatur a Sacramento Confirmationis. Hujus unktionis mysterium exponit Ivo Carnotensis serm. 14. de Sacram. scribens, Christianos illitos in capite chrismate post baptismum esse, *ut caritas, qua per Spiritum sanctum datur semper abundet in corde secundum verbum illud, Ecclesiastici ix. 8. Oleum de capite tuo non deficiat.* II. Post inunctionem verticis imponitur baptizato *lintheolum candidum* loco vestis albae, qua olim inducebantur Neophyti, sive *propter gratiam regenerationis*, ut in Officio de Sab. S. inquit Albinus Flaccus; sive ad commostrandum, oportere, ut regeneratus perpetuo incedat in vitæ innocentia, animique candore, quemadmodum eruitur ex Catech. 17. Mystag. Cyvilli, atque ex verbis hanc ceremoniam comitantibus. De albo hoc indumento ait Ambrosius lib. de Myst. cap. 7. num. 34. *Accepisti post hæc vestimenta candida, ut esset indicium quod exueris involutorum peccatorum.* Augustinus serm. 223. aliàs 81. de diversis num. 1. inquit: *Infantes isti, quos cernitis exterius dealbatos, interiorum mundatos, qui candore vestium splendorem mentium præfigurant, cum peccatorum suorum nocte premerentur, tenebra fuerunt. Nunc autem, quia mundati sunt lavacro indulgentiæ, &c.* Citari etiam solet sermo 157. de tempore, & liber quartus de Symbolo ad Catech. sed supposititii sunt ambo. Pervulgati sunt & versus Paulianæ Epist. 12. ad Severum pag. 145.

*Inde parens sacro ducit de fonte Sacerdos*

*Infantes, niveos corpore, corde, habitu.*

Laudatur item carmen de Resurrect. quod tribuitur Lactantio; sed est revera incerti auctoris. Mitto Victorem Vitensem, Venantium Fortunatum, Joannem Moschum, Theodulphum, aliosque collectos ab erudito viro Hugone Menardo, not. 326. in Sacrament. Gregorii. III. Traditur præterea baptizato *candela accensa*, ex vetustissima consuetudine. Ritus hujus mysterium exponit Ivo Carnotensis serm. de Sacram. Neophyt. his verbis: *Ad ultimum datur cereus ardens in manus baptizati, quatenus implere doceatur illud Evangelii, Sic luceat lux vestra coram hominibus, &c.* Plura de hoc ritu Vicecomes lib. v. cap. 21. ac sequentibus. Eundem ac præcedentem ritum complectitur Fortunatus prælaudato quinto carmine, pag. edit. Mogunt. 124.

*Vndique rapta manu lux cerea provocat astra,*

*Credas ut stellæ ire trahendo comas.*

Es-

*Lacteus hinc vestis color est , hinc lampade fulgor ,  
Ducitur & vario lumine picta dies .*

His ergo ceremoniis , quarum & antiquitatem vindicavi , & mysticas significationes ex probatissimis Auctoribus exposui , absolvitur Sacramenti BAPTISMATIS solemnis administratio , ita Ministro baptizatum alloquente , *Vade in pacem , & Dominus sit tecum* : atque istud quoque indicium est veteris ceremoniæ , qua olim baptizans pacem Neophytis apprecabatur , addito quibusdam in locis osculo , ut colligimus ex Epistola LIX. S. Cypriani ad Fidum , pag. 212. Iisdem verbis , quibus Sacerdos ritus Baptismi , nos librum istum absolvimus ; haud ineptè quidem , cum ipsum perlegendis nihil tam sanctum , ac tam utile precari possimus , quàm Spiritus sancti communicationem , caritatem , & pacem .

*Explicit Liber primus ac tricesimus :*



# SEXTI VOLUMINIS

## PROPOSITIONES.

- I. Cum sanguis & aqua, quæ ex aperto Christi latere prodigiōse  
exierunt, eximiam Sacramentorum Ecclesiæ virtutem signa-  
verint; 1
- II. De iisdem Sacramentis pertrahaturi, nomen primò jure in Eccle-  
sia retineri affirmamus. 5
- III. Quod utique nomen, tametsi ad plura significanda soleat ad-  
biberi; 7
- IV. Propria tamen, ac speciali significatione usurpatur pro signo rei  
sacræ, ac præsertim gratiæ spiritualis atque invisibilis. 10
- V. Optima propterea est definitio Sacramenti a Catholicis tradita; 11
- VI. Sicut ex adverso falsæ sunt illa omnes, quas proprio Marte baretici  
fabrificarunt. 15
- VII. An Sacramenta in statu Innocentiæ extiterint, necne, solidè  
non revincitur, nec demonstratur invictè; 18
- VIII. Cum illo tamen statu nullam repugnantiam habuerunt, eoque  
persistente fuissent fortasse instituta. 21
- IX. In lege autem naturæ tam pro parvulis aliquod gratiæ signaculum, 22
- X. Quam pro adultis extitisse quadam Sacramenta, censemus; 26
- XI. Ad circumcisionem quod attinet, eò omnium primum usum  
Abrahamum certa argumenta demonstrant. 29
- XII. Negari non potest, quin data fuerit in signum distinctivum se-  
minis Abraham a reliquis mundi gentibus. 36
- XIII. Sed alucinantur, qui hanc unam instituendæ circumcisionis  
causam agnoscunt; 37
- XIV. Etenim institutam fuisse ad originale peccatum delendum, com-  
plures ante Augustini tempora tradiderunt; 40
- XV. Postea id S. Pater offeruit, & valide sacris literis confirma-  
vit; 43
- XVI. Deinde Augustino Patres, qui subsequuti sunt, & illustres  
Scholastici subscripsere; 49
- XVII. Atque frustra hanc sententiam multis postmodum oppositis argu-  
mentis tentaverunt excutere. 52
- XVIII. Vindicata verò Augustiniana sententiâ, septem legis gratiæ  
Sacramenta cum Ecclesiâ Catholica recipimus, ac propugna-  
mus; 61
- XIX. Quo in dogmate baretici falsò, ne temere autumant, Augu-  
stinum duo tantum Sacramenta agnovisse. 68

- xx. Septem hęc Sacramentis accensenda nequaquam est latio pedum, quę nec Sacramentum est, nec ad Sacramentum baptis-  
mi essentialiter pertinet. 78
- xxi. Illa autem septem Sacramenta ad salutem necessaria sunt, (quam-  
vis non omnia necessaria sint singulis) habentque inter se con-  
gruum ordinem, ac suam qualibet dignitatem. 86
- xxii. Eadem omnia Christus Iesus instituit immediatè; 90
- xxiii. Licet istud a Tridentina Synodo non sit tanquam fidei dogma,  
statutum ac definitum: 95
- xxiv. Pura creatura non habet huiusmodi institutionis auctorita-  
tem. 97
- xxv. Sacramenta rebus, tanquam materia, & verbis, tanquam  
forma perficiuntur: 100
- xxvi. At non habent materia & forma Sacramentorum cum princi-  
piis rerum corporalium omnino æquabilem analogiam. 102
- xxvii. Non est penes Ecclesię potestatem hanc materiam, formam-  
que immutare. 105
- xxviii. Verba autem, quę constituunt formam Sacramentorum,  
nec promissionis, nec concionis sunt, sed tantummodo consecra-  
tionis. 111
- xxix. In Sacramentis conficiendis nefas est uti materia, aut forma  
tantum probabili. 120
- xxx. Si mutatio substantialis in materia & forma contingat, Sacra-  
mentum irritum erit & prorsus nullum. 123
- xxxi. Secus si mutatio sit duntaxat accidentalis; etiam si facta esset  
eo fine, ut induceretur aliqua hæresis. 124
- xxxii. Fas est aliquando uti in Sacramentis forma conditionali, etsi  
huius ante viii. Christiani nominis sæculum non constet usum  
obtinuisse. 126
- xxxiii. Homo tantum viator est ordinarius Sacramentorum Mini-  
ster. 131
- xxxiv. At extraordinaria potestate conficere possunt Sacramenta  
etiam Angeli sancti, & Beati in calo regnantes. 132
- xxxv. Neque tamen singuli homines sunt idonei Ministri quorumlibet  
Sacramentorum. 133
- xxxvi. Valet Sacramentum collatum ab improbo, scelestissimoque mi-  
nistro, modò nihil eorum desit, quę ad illius constitutionem  
sunt necessaria, idest, aut materia, aut forma, aut inten-  
tio. 140
- xxxvii. Sacerdos tamen lethalis culpę sibi conscius, impie atque illi-  
cite Sacramenta conficit ac ministrat; quod de aliis sacrorum mi-  
nistris ordinariis, Diaconis præsertim, est asserendum; nec non  
probabiliter de verbis divini Concionatoribus. 152
- xxxviii. Ita-

- xxxviii. Itaque extra necessitatis casum Sacramenta ab impio Sacer-  
dote peti non debent; 156
- xxxix. Quamquam in casu necessitatis licite a quocunque ministro,  
etiam excommunicato, & haeretico, recipiantur Baptismus,  
ac Pœnitentia. 157
- xl. A Paroco autem, si nullus alius minister commodè possit ba-  
beri, fas est Sacramenta recipere, quantumvis ille sit impro-  
bus, & scelerosus; ibid.
- xli. Et si iusta adsit ratio, a ministris aliis, concubinariis etiam, at-  
que excommunicatis a jure; dummodo sententiâ Judicis non  
constet inhiberi illis sacrorum Mysteriorum dispensationem. 158
- xlii. Circa ministri intentionem rejicimus primo, ac damnamus sen-  
tentiam haeticorum, asserentium Sacramentum ratum & va-  
lidum esse, quamvis irrisoriè & mimicè conferatur. 167
- xliii. Affirmamus quoque Sacramentum nullum & irritum fore, si  
minister habeat solum intentionem peragendi ritum externum,  
geratque in animo latentem deliberationem non faciendi rem Sa-  
cræ; etiamsi materiam adhibeat & formam proferat, neque con-  
traria illa deliberatio externâ aliquâ irrisione se prodat: 177
- xliv. Quam utique sententiam nostram neque argumenta Catharini,  
neque eorum, qui illius ediderunt vindicias, neque alia qua-  
libet possunt labefactare, aut revincere. 193
- xlv. Non illam tamen intentionem necessariam existimamus, quæ  
minister Sacramentorum intendat effectum, eaque credat sacra  
revera esse atque utilia; sed fatemur sufficere si id proponat fa-  
cere, quod fieri solet in Christi Ecclesia, licet ejusdem Eccle-  
siae, sacrorumque Mysteriorum notitiâ perspicuâ careat. 209
- xlvi. Actualem intentionem plurimum commendamus: virtuales  
sufficere asserimus; habituales, ut communiter solet accipi,  
insufficientem esse tenemus. 210
- xlvii. Intentio item interpretativa, quatenus a virtuali distingui-  
tur, nequaquam sufficit. 211
- xlviii. De intentione autem conditionata servatis quibusdam regulis  
judicium est proferendum. 212
- xlvi. Pro solis hominibus viatoribus Sacramenta, juxta præsentem  
rerum ordinem, sunt instituta. 214
- l. In adultis ad Sacramenti characterem recipiendum intentio ali-  
qua, saltem interpretativa, necessaria est; ibid.
- li. Ac præter intentionem, quadam alia in ipsis adultis disposi-  
tione requiruntur, ut Sacramenti percipiant fructum. 218
- lii. Effectus Sacramentorum præcipuus est Gratia; de qua Catholico-  
rum sententiam haetici improbe, falso, ac fraudulentè tra-  
ducunt. 219
- liii. Ut

LIII.	<i>Ut perspicue veritatem catholicam propugnemus, asserimus primò, non esse Sacramentorum omnium, tam veteris, quàm novæ legis eandem vim, atque efficientiam;</i>	224
LIV.	<i>Afferimus deinde vetera Sacramenta per se contulisse duntaxat emundationem &amp; sanitatem legalem, gratiam verò sanctificantem per accidens tantum, &amp; ob fidem susipientium:</i>	226
LV.	<i>Quare Sacramenta illa conferebant gratiam ex opere operantis; si excipias Circumcisionem,</i>	229
LVI.	<i>De qua non una est sententia Scholasticorum.</i>	ibid.
LVII.	<i>Verum Sacramenta novæ legis ex merito passionis Christi justificandi vim habent,</i>	233
LVIII.	<i>Atque ex opere operato producant gratiam.</i>	ibid.
LIX.	<i>Num ita gratiam contuleris circumcisio, in utramque partem, ut dixi nuper, disceptatur, ac plura sunt argumenta hinc inde producta.</i>	239
LX.	<i>Est pariter inter adiaphoras questio de modo, quo Sacramenta producant gratiam: &amp; nos propugnamus esse illa causam gratiæ physicam quidem, sed indirectam.</i>	244
LXI.	<i>De hac gratia, quam Sacramenta producant, quæstiones aliæ facile expediuntur.</i>	252
LXII.	<i>Alter Sacramentorum effectus est character, quem impræmunt tria Sacramenta, quæ iterari non possunt, Baptismus scilicet, Confirmatio, &amp; Ordo.</i>	255
LXIII.	<i>Character iste animæ revera inbaret, atque est immutabilis.</i>	259
LXIV.	<i>Potest tamen citra fidei pericula negari, Sacramentalem hunc characterem esse rem distinctam ab anima.</i>	260
LXV.	<i>Servanda sunt in Sacramentorum administratione ceremoniæ, quas Ecclesia rectè prudenterque præscripsit;</i>	270
LXVI.	<i>Et quas institutas esse defendimus ob mysticam præsertim, &amp; symbolicam significationem.</i>	272
LXVII.	<i>Nequeunt eedem ceremoniæ contemni, aut pro libito omitti, aut in alias mutari per quemcunque Ecclesiarum Pastorem.</i>	274
LXVIII.	<i>Refutantur Novatores oppositum sentientes.</i>	276
LXIX.	<i>Temere ipsi damnant sacras vestes, quibus utimur in solemnibus Sacramentorum administratione,</i>	278
LXX.	<i>Plasmodiam item, &amp; cantica Ecclesiastica,</i>	279
LXXI.	<i>Candelas insuper, &amp; cereos ad officiorum divinorum condecantiam accensos,</i>	281
LXXII.	<i>Item thuris usum,</i>	283
LXXIII.	<i>Lustralem pariter aquam,</i>	284
LXXIV.	<i>Præterea sacrorum cinerum,</i>	285
LXXV.	<i>Nec non palmarum, cereique Paschalis benedictionem;</i>	286
	<i>26. I.</i>	III
		LXXVI. C.



- LXXVI. *Cereas quoque imagines, quas dicimus Agnos Dei,* 287
- LXXVII. *Atque benedictionem candelarum in festo Purificationis B. M. V.* 288
- LXXVIII. *His itaque præmissis. de Sacramentis in genere, & de Sacramentalibus, quæ perperam oppugnant hæretici; de Baptismo disputationem instituentes, illius tradimus etymologiam, atque definitionem.* 292
- LXXIX. *Negamus Baptismi nomine significari institutionem atque doctrinam;* 295
- LXXX. *Ac Baptismum nostrum cum lustrationibus Gentium, & Judæorum meritoribus affinitatem habere aliquam.* 301
- LXXXI. *Etiam baptismus Joannis, quamvis institutus divino instinctu, & Moisaicis meritoribus excellensior.* 305
- LXXXII. *Multiplici tamen titulo discrepat a baptismo Redemptoris;* 306
- LXXXIII. *Isle enim valet per se ad ablutionem culpe, cum baptismus Joannis non conferret remissionem peccatorum, nisi ratione penitentiae, fideique suscipientium.* 308
- LXXXIV. *Probabilius est baptismum a Christo fuisse institutum antepassionem; & quidem dum baptizatus est in Jordane.* 322
- LXXXV. *Sed præceptum suscipiendi ipsum baptismum, saltem generaliter, non obstrinxit ante Evangelicæ legis promulgationem.* 330
- LXXXVI. *Aqua duntaxat naturalis est materia Sacramenti Baptismatis.* 335
- LXXXVII. *Eadem verò aqua, non recenti usu, sed vetustissimo, ac derivata a Patrum traditione, in Romana Ecclesia solemniter benedicatur, & consecratur.* 335
- LXXXVIII. *Non valet baptismus in aqua ex rosis, aliisque floribus vi subjecti ignis expressa.* 344
- LXXXIX. *Si aqua sacri Fontis haberi queat, nefas est in baptismo adhibere communiem, atque profanam.* 347
- XC. *Quid verò dicendum est de modo ablutionis? Obtinuit a prioribus Ecclesiæ sæculis consuetudo baptizandi per immersionem, & quidem trinam.* 348
- XCI. *Non fuit tamen ad sæculum usque XIII. trina versio ita communiter recepta; ut probatus aliquando non fuerit baptismus, aut infusione, aut unica versione collatus.* 350
- XCII. *At quocumque ritu conferatur, sive immersione, sive infusione, sive adpersione, baptismus validus est; & Ecclesiæ Romanæ, quæ præscribit immersionem, aut infusionem, imperitè nulloque jure a Marco Ephesio, aliisque Græculis reprehenditur.* 354

- XCIII. Quonam modo olim baptizati mergerentur, Appendix ad  
præmissum Theorema demonstrat. 358
- XCIV. Debet nunc unusquisque servare Ecclesiæ, in qua degit, con-  
suetudinem; 360
- XCv. Ita tamen, ut saltem caput salutaris undis perfundat; & si  
aliam corporis partem infans emittat ex utero, immineatque  
vite periculum, illam sub conditione baptizet. 361
- XCvI. Tenet verò baptismus, etiam in illius administratione mors  
datâ operis baptizato inferatur. 362
- XCvII. Legitima est, antiquissima, & omnino certa verborum for-  
mula, sub qua baptizant Latini. 364
- XCvIII. Illâ, qua utuntur Græci, enuntiativa est, valida & ipsa, nec  
ab ea, qua utuntur Latini, substantialiter discrepat. 365
- XCIX. Verum complures sunt baptismi formula confictæ ab hæreticis,  
& quæ tollunt Sacramenti veritatem. 367
- c. Requiritur ad validitatem baptismi verbum, quo actus baptizantis  
exprimitur; 373
- CI. Neque baptismus valet absque expressa Sanctæ Trinitatis invo-  
catione. 375
- CII. Etiam Apostoli nonnisi cum expressa hac invocatione baptizave-  
runt; 380
- CIII. Tametsi oppositum sentientes nulla debeant censoria nota per-  
stringi. 395
- CIV. De singulis formæ verbis per distinctas quæstiones differimus.  
 397
- CV. Baptizandi solemnî ritu potestas Episcopis principaliter compe-  
tit: deinde Presbyteris id commissum, non tamen absque Epi-  
scoporum auctoritate. 403
- CVI. Diaconi nonnisi ex delegatione possunt baptismum solemniter ad-  
ministrare. 407
- CVII. In casu autem necessitatis quilibet homo, etiam laicus, potest  
absque solemnî ritu baptismum conferre; 409
- CVIII. Et, si desit alius minister, etiam femina. 412
- CIX. Quæ in praxi possunt hac in re difficultatem aliquam excitare,  
distinctè singula expediuntur. 415
- CX. Consueverunt permulti hæreticorum baptismum repetere. 421
- CXI. Hæreticos quoque rebaptizandos nonnulli vererum tradiderunt,  
inter quos connumerantur Agrippinus, ejusque gentilitius Ter-  
ullianus. 424
- CXII. Idem docuerunt Firmilianus Cæsareæ in Cappadocia Episcopus,  
& S. Cyprianus Antistes Carthaginiensis: quorum de hoc ar-  
gumento Epistolæ tanquam genuinas recipimus. 426
- CXIII. Obstitit his Stephanus Romana Ecclesiæ Præsul sanctissimus;

- a quo non fuit approbatum baptisma omnium promiscue hereticorum, sed collatum duntaxat in nomine Trinitatis. 450
- CXIV. Ea tamen Stephanus usus est moderatione, ut neque Cyprianum, neque Firmilianum intorto anathemate a sui communione sejunxerit. 455
- CXV. Num Cyprianus, aut Firmilianus a sententia resilierint, nobis est penitus incompertum. 460
- CXVI. Multa sunt nihilominus, quae istorum, ac praesertim S. Martyris Cypriani excusant errorem. 462
- CXVII. Ex quo Martyr ille praeclarissimus decreto sancti Stephani sit oblitatus, nequit inde labefactari Romanorum Pontificum in rebus fidei vel morum iudicium irreformabile. 463
- CXVIII. Sunt inter Patres quidam alii, quorum de Rebaptismo sententia est obscura admodum & ambigua: ac primus est Dionysius Alexandrinus. 472
- CXIX. Hunc, & magnum Basilium nos rebaptizantibus accensimus. 473
- CXX. Secus iudicamus de Athanasio, de Optato Milevitano, & de Cyrillo Ierosolymorum Episcopo. 475
- CXXI. Plenarium Concilium, de quo Augustinus contra Donatistas affirmat ad ejus auctoritatem & robur perductam fuisse antiquam unius Baptismatis consuetudinem, videtur esse Nicanum primum, quamquam non istud solum innuere vult Praesul sapientissimus. 478
- CXXII. At multa alia Ecclesiastica definitiones, praeter Nicanum canonem XIX. probarunt haereticorum baptisma, verbis Evangelicis consecratum. 485
- CXXIII. Legibus quoque Augustorum proscriptus est Rebaptismus. 487
- CXXIV. Persistit itaque inconcussum, firmissimumque dogma Catholicum, de valore baptismi dati ab haereticis in nomine Trinitatis. 488
- CXXV. Immo & tenet baptismus a pagano sub eadem forma collatus. 495
- CXXVI. Repetendus idcirco idem baptismus nunquam est, nisi datus fuerit vitiosa forma; & si res ambigua sit admodum, iterari debet apposita conditione. 497
- CXXVII. Licitum, & congruum est infantes ante usum rationis sacro regenerari baptismo: 502
- CXXVIII. Non tamen salva aequitate idem fiet pueris infidelium, parentibus reluctantibus, si casus nonnullos excipias. 513
- CXXIX. Dum pueri maternis in uteris claudantur, nihil eis prodest ablutio matris, aut signum aliquod extrinsecus applicatum: 522

<i>CXXX. Neque ante aperitionem uteri possunt idem pueri ex aqua;</i> <i>&amp; Spiritu sancto renasci;</i>	523
<i>CXXXI. In ipso denique puerperio, licet per siphunculum possent aqua</i> <i>perfundi, baptizandi non sunt, nisi aliquam corporis sui par-</i> <i>tem foras emiserint.</i>	525
<i>CXXXII. Monstra baptizari non debent, nisi humanam referant spe-</i> <i>ciem: bene tamen filii excommunicatorum, ac spurii.</i>	530
<i>CXXXIII. Quamvis olim multi baptismum distulerint ad longam ata-</i> <i>tem;</i>	531
<i>CXXXIV. Jure tamen, meritoque dilatio illa improbat.</i>	533
<i>CXXXV. Diverſerant in catechumenis gradus, Audientium, scilicet,</i> <i>Competentium, &amp; Electorum.</i>	535
<i>CXXXVI. In adultorum baptismo quadam exiguntur dispositiones:</i>	538
<i>CXXXVII. Et, nisi aliter aliqua ratio suadeat, congruum est, ut ba-</i> <i>pizentur in Sabbato sancto Paschatis, vel Pentecostes.</i>	539
<i>CXXXVIII. Sacramentum in illis adultis, qui simulato animo ad ip-</i> <i>sum accedunt, sublato postmodum obice reviviscit.</i>	541
<i>CXXXIX. Damnatus errorem illorum, qui vel mortuos, vel viven-</i> <i>tes pro mortuis baptizarunt.</i>	543
<i>XL. Refellimus etiam qua effutunt hæretici adversus baptismum</i> <i>aris Campani.</i>	547
<i>XLII. Baptismus omnibus necessitate medii, &amp; adultis etiam neces-</i> <i>sitate præcepti, necessarius est ad salutem.</i>	550
<i>XLIII. Hanc tamen necessitatem supplet in adultis baptismus flammis,</i> <i>ardens nimirum ejusdem baptismi vocem;</i>	554
<i>XLIII. Atque in adultis, ac parvulis baptismus sanguinis, idest,</i> <i>martyrium,</i>	557
<i>XLIV. Videtur nobis idem martyrium efficax esse ad peccata abluen-</i> <i>da, per se, atque, ut dicimus, ex opere operato.</i>	559
<i>XLV. Quid sit martyrium, quotuplex martyrii causa, &amp; quid te-</i> <i>nendum sit de martyribus Hæreticorum &amp; Schismaticorum, at-</i> <i>que de Martyrum nostrum certitudine ac numero, etiam nos,</i> <i>post Viros eximios, brevioribus animadversionibus investiga-</i> <i>mus.</i>	561
<i>XLVI. Gratiam, characterem, aliosque effectus præstantissimos pro-</i> <i>ducit in nobis sanctum Baptismi lavacrum.</i>	571
<i>XLVII. Inter ceremonias Baptismi quadam in consuetudinem abie-</i> <i>runt.</i>	575
<i>XLVIII. Adhibentur modò ex perantiqua consuetudine Susceptores,</i> <i>sive Patrimi,</i>	577
<i>XLIX. Impositio nominis Sancti alicujus, aut Martyris,</i>	579
<i>CL. Exorcismi item, &amp; abrenunciationes;</i>	580
<i>CLII. Nec-</i>	

CLI. Necnon signum crucis, manus impositio, sal, Oleum, Cate-  
chumenorum, & saliva: 584

CLII. Denique unctio Chrismatis, alba vestis, & cereus accensus.

587











